


Diža' güen çe
ancho Jesucristo



New Testament in Zapotec, Zoogocho (MX:zpq:Zapotec,
Zoogocho)

Diža' güen che ancho Jesucristo

New Testament in Zapotec, Zoogocho (MX:zpq:Zapotec, Zoogocho)

copyright © 1987 Wycliffe Bible Translators, Inc.

Language: Zapotec, Zoogocho

Translation by: Wycliffe Bible Translators, Inc.

Zapoteco, Zoogocho [zpq], Mexico

Copyright Information

© 1987, Wycliffe Bible Translators, Inc.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Zapotec, Zoogocho

© 1987, Wycliffe Bible Translators, Inc.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

PDF generated using Haiola and XeLaTeX on 18 Apr 2025 from source files dated 29 Jan 2022
de7d40fb-3909-53d8-8bea-744cf1ce0e41

Contents

San Mateo	1
San Marcos	67
San Lucas	106
San Juan	174
Hechos	223
Romanos	285
1 Corintios	313
2 Corintios	340
Gálatas	356
Efesios	366
Filipenses	376
Colosenses	383
1 Tesalonicenses	389
2 Tesalonicenses	394
1 Timoteo	397
2 Timoteo	405
Tito	411
Filemón	415
Hebreos	417
Santiago	438
1 Pedro	446
2 Pedro	454
1 Juan	459
2 Juan	466
3 Juan	467
Judas	468
Apocalipsis	471

DIŽA' GÜEN DAN' BZOJ SAN MATEO

Ķozxtao' Jesucriston' (Lc. 3:23-38)

¹ Nga nyoj la bene' gosac Ķozxtao' Jesucriston' chzolaon len da' Ķozxta'ocho Abraham. Le Jesúsen' goque' xi'in diaža che da' David, na' da' Davin' goque' xi'in diaža che da' Abrahanna'.

² Abrahanna' goque' xa Isaac, na' Isaaquen' goque' xa Jacob, na' Jacoben' goque' xa Judá len yezica'chle bene' biše' ca'.

³ Judán' na' Tamar gosaque' xaxna' Fares na' Zara. Na' Faresen' goque' xa Esrom, na' Esronna' goque' xa Aram.

⁴ Na' Aranna' goque' xa Aminadab, na' Aminadaben' goque' xa Naasón, na' Naasónna' goque' xa Salmón.

⁵ Salmónna' na' Rahab gosaque' xaxna' Booz. Na' Boozen' na' Rut gosaque' xaxna' Obed. Na' Obeden' goque' xa Isái.

⁶ Na' Isáin' goque' xa rey David, na' rey Davin' goque' xa Salomón. Na' xna' Salomónna' goque' xo'ol da' Urías cate' za' yeca'a rey Davin' le' par gaque' xo'ole'.

⁷ Na' Salomónna' goque' xa Roboam, na' Roboanna' goque' xa Abías, na' Abíasen' goque' xa Asa.

⁸ Na' Asan' goque' xa Josafat, na' Josafaten' goque' xa Joram, na' Joranna' goque' xa Uzías.

⁹ Uzíasen' goque' xa Jotam, na' Jotanna' goque' xa Acáz, na' Acázen' goque' xa Ezequías.

¹⁰ Na' Ezequíasen' goque' xa Manasés, na' Manasésen' goque' xa Amón, na' Amónna' goque' xa Josías.

¹¹ Josíasen' goque' xa Jeconías len yezica'chle biše' ca' gosanita' ca tiemp caten' bene' Babilonia ca' gosezene' bene' Israel ca' na' goseche' xoxje' legaque' Babilonian'.

¹² Gwde goc ca', golje Salatiel xi'in Jeconíasen'. Na' Salatielen' goque' xa Zorobabel.

¹³ Na' Zorobabelen' goque' xa Abiud, na' Abiuden' goque' xa Eliaquim. Na' Eliaquinna' goque' xa Azor.

¹⁴ Na' Azoren' goque' xa Sadoc, na' Sadoquen' goque' xa Aquim. Aquinna' goque' xa Eliud.

¹⁵ Na' Eliuden' goque' xa Eleazar, na' Eleazaren' goque' xa Matán. Na' Matánna' goque' xa Jacob.

¹⁶ Nach Jacoben' goque' xa José ben' goc bene' che María. Na' Marían' goque' xna' Jesús ben' nzi' Cristo, zeje diža' ben' gwlej Diosen' cont yedenabi'e.

¹⁷ Na' gwzolaon tiemp che da' Abraham bžinte tiemp che da' David gosac žta' diaža čhen', na' ca tiemp che da' David bžinte ca tiemp caten' gosezene' bene' Israel ca' goseche' xoxje' legaque' Babilonia, lecze gosac yežta' diaža čhen', na' ca tiempen' bžinten ca žan' golje Criston' ben' gwlej Diosen' cont yedenabi'e, gosac yežta' diaža čhen'.

Can' goc cate' golje Jesucriston' (Lc. 2:1-7)

¹⁸ Na' quingan' goc cate' golje Jesucriston'. Ba naquen gwšagna' Marián' len José, na' za' ca'a Josén' le' par gaque' xo'ole' cate' gocbe'ede' ba noa' Marián' bdao'. Goc ca' dan' ben Spiritw che Diosen' cont bchendao' bdao'na' lo' le'e.

¹⁹ Na' Joséna' ben' ba naquen si'e Marián' par gaque' xo'ole', goque' to bene' ben da' güen lao Diosen'. Na' bene' xbab cuejyichje' Marián' šizize cont nono gache'e na' cont bi gwsí'e le' zto'.

²⁰ Šlac chone' xbab gone' ca' gwtase' na' to angl bene' gwseła' Xancho Diosen' blo'elagüe' le' lo bišgal. Na' gože' le':

—José, le' goljo' lo diaža che da' rey David. Bitw žebo' si'o Marián' par gaque' xo'olo'. Spiritw che Diosen' benen cont no'e bdao'na'.

²¹ Na' sane' to bi' byo dao' na' gwsí'o labe' Jesús, le len' yeque'e xtoła' bene' gualaž che' ca' bene' yesejnilaže'ne'.

²² Goc yogo' da' ca' cont goc can' gwna Diosen' dan' bzoj to ben' be'e xtižen' caní', gwne':

²³ To no'ol güego' no'ole ne' napši'ichgua cuine' güe'e to bi' byo dao' na' sane'be'. Na' si' labe' Emanuel.

Na' Emanuel zeje diža': Diosen' zoacze' len chio'.

²⁴ Na' cate' beban Josén' beyož gwne'de' yelen', bene' can' gož angl che Xancho Diosen' le', jaži'e Marián' liže' par goque' xo'ole'.

²⁵ Perw bi gwzoalene' le' ca xo'ole' san gwzoacze' le' respetw bžinte ža gwxxane' to bi' byo dao', xi'ine' nechw. Na' gwxi' labe' Jesús.

2

Magos ca' jasene'e Jesúsen'

¹ Ca tiempen' cate' gwnabia' rey Herodes, golje Jesúsen' Belén, to yež gan' mbane distritw Judea. Na' besežin to čhope magos Jerusalén, za'aque' to nación zito' dan' chi' do ga chla' gwbiž.

² Na' gosenabde' bene' lo ciudan' gose'ene':

—¿Gañ rey che bene' Israel, ben' ba golje? Nežeto' ba golje, le ba ble'eto' beljw čhen' cate' blan' lažto' dan' zoa gan' chla' gwbiž. Na' za'to' gonxento'ne'.

³ Cate' gwneze rey Herodesen' can' gosenen', gocchgüe' tole, na' lecze ca' yogo'loł bene' lo ciuda Jerusalénna'.

⁴ Nach reyna' btobe' yogo'loł bxož gwnabia' che chio' bene' Israel na' lecze yogo' bene' ca' chososed chosolo'e dan' bzoj da' Moisésen'. Na' gwñabde' legaue' gan' naquen galje Criston' ben' gwlej Diosen' cont yedenabi'e.

⁵ Nach gose' bene' ca' Herodesen':

—Galje' Belén, gan' mbane distritw Judea, le can' ža dan' bzoj to bene' be' xtiža' Diosen' caní'. Quinga žan:

⁶ Ca nac yež Belén gan' že' diaža che da' Judá, nacczen yež da' zaca'chgua lao yež gwnabia' ca' zjachi' Judean'.

Le to bene' Belén gaque' bene' gwnabia', na' le' güia ne'e nación Israel čhian'.

⁷ Nach Herodesen' goxe' magos ca' bagaše'ze cont ja'aque' lagüen' na' gwnabde' legaue' batyanen' besele'ede' bla' beljon'.

⁸ Nach gwsele' legaue' Belénna', gože' legaue':

—Le šja'ac na' le šjaydiljw bidao'na' tcho'a. Na' cate' yeželebe' le yeda yedyedixjue'ele neda' cont lecze ša'a šjenxena'be'.

9 Beyož bosozenag magos ca' can' gož reyna' legaque', nach gosa'aque'. Na' beljon' dan' besele'ede' do gan' chla' gwbižen' cate' biņa' yesa'ac lažgaquen', zejen le'e yaban' žialaon laogaque' bžinten yo'o gan' zoa bidao'na', na' gwlezen.

10 Na' magos ca' besyebede' juisyw cate' besele'ede' beljon' da' yoble.

11 Nach cate' besežine' yo'o gan' zoa bidaon', goso'e lo' yo'ona' na' besele'ede' bidao'na' len xna'be' Marian'. Nach bosozoa xibgaque' gosonx-ene'be'. Na' gosesaljo caj čhegaquen' gosebeje' oro, yal na' to nechw da' chla' zix da' nzi' mirra na' gosoen' čhebe'.

12 Na' šlac ne' nita' magos ca' Belėnna', Diosen' gwdixjue'ede' legaque' lo' bišgal bich yesyedie' gan' zoa rey Herodesen'. Da'nan' besyequ'e' yeto nez yoble jaya'ac laže'.

Bosoxonje' ja'aque' Egipto

13 Na' cate' ba besyeya'ac magos ca', to angl čhe Xancho Diosen' blo'elagüe' Josėn' lo' bišgal, na' gože'ne':

—Gwyas, gwčhe' bidaon' na' xna'ben' le šja'ac nación Egipto na' soale na'ze, na' cate'ch nia' le'e, cana' guaque yeza'le, le Herodesen' ba nžie' bia' yeyiljue' bidao'na' cont gote'be'.

14 Nach ne' ze bxin gwyas Josėn', gwčhe'e bida'ona' len xna'ben' zja'aque' Egipton'.

15 Nach gosonite' Egipto na'ze šlac bžin ža got Herodesen'. Na' dan' gosone' ca' goc can' gwna Diosen' dan' bzoj to beŋe' be' xtiže'na' cani', gwne': "Čhixjue'eda' Xi'inan' yeze'e Egipton'."

Herodesen' gwsele' soldadw cont gosote' yogo' bi' byo dao'

16 Na' rey Herodesen', cate' gocbe'ede' gosonle magos ca' le' dan' bich besyedie' gan' zoe'na', leca bže'e. Na' bsaque' con can' gwyejni'ide' cate' gwnabde' legaque' batcan' bla' beljon', na' gwsele' soldadw čhe' ca' par jasete' yogo'lo' bi' byo čhe'ęn' dao' zelao bi' chop ize, bi' ca' gosalje Belėnna' na' yezičhle yež ca' zjanyechj zjambi'i Belėnna'.

17 Na' lagüe dan' gosote' bi' byo dao' ca', goc can' bzoj da' Jeremias ben' be' xtiža' Diosen' cani', žan:

18 Nente ši'i beŋe' Ramá,
chesebežchgüe' nita'chgüe' yeļa' güine'.

No'ole ca' zjanaque' xi'in diaža čhe da' Raquel chesyeyaše' chesyegüine'de'
čhe xi'in da'ogaque' ca',

na' bitw chesaclaže' no yeyoexenlaže' legaque', le ba gosatben'.

19 Cate' got Herodesen', Josėn' ne' zoe' Egipton'. Nach to angl čhe Xancho Diosen' blo'elagüe' Josėn' lo' bišgal, na' gože'ne':

20 —Gwyas, beče' bidaon' len xna'be'na' na' le šjaya'ac Israel. Ba gosat beŋe' ca' besyeyiljw bidao'na' cont yesote'be'.

21 Nach gwyas Josėn' beče'e bidaon' len xna'ben' jaya'ac lažgaque' Israel.

22 Perw Josėn', cate' bende' Arquelao bezoe' chnabi'e latje čhe da' xē' Herodesen', bžebe' yeyeje' gan' mbane distritw Judean'. Na' Diosen' gwdixjue'ede' le' lo' bišgalen' bi čheyaļa' šjaya'aque' distritw Judean', san šjaya'aque' gan' mbane distritw Galilean'.

23 Da'nan' besyežine' ciuda Nazaret na' jasenite'. Na' dan' jasenite' Nazareten' goc can' bosozoj da' beŋe' goso'e xtiža' Diosen' cani', gosene': "Yososi'e Jesusen' beŋe' Nazaret."

3

Juan ben' bzoa bene' nis gwdixjue'ede' diža' güen che Diosen'
(Mr. 1:1-8; Lc. 3:1-9, 15-17; Jn. 1:19-28)

¹ Na' gwde zan iz, Juan ben' bzoa bene' nis gweyje' latje daš gan' mbane distritw Judean'.

² Na' gwdixjue'ede' bene' gože' legaque':

—Le yetinje xtoła'le ca', le ba bžin ža cate' Diosen' ben' zoa yaban' nabi'e yichjlaždao' bene' yosozenague' che'.

³ Che Juanna' bzoj da' Isaiasen' caten' bzoje' Xtiža' Diosen' cani', gwne':

Bena' chne' zižje latje dašen', že':

“Le gonšagüe' yichjlažda'olen' cont soale lez gwzenagle che Xanchon' cate' yide'.

Le cuejyichj da' malen' chonle cont yichjlažda'olen' gaquen ca to nez da' ba gosonšagüe'!”

⁴ Na' Juanna', xałane' goquen de yiša' xa camello. Na' da' bchej lsinen' goquen de yid, na' gwdagüe' biše'zo len šina' beser yiže'.

⁵ Bene' že' ciuda Jerusalénna' na' bene' že' yogo' yež ca' gan' mbane distritw Judean', na' lecze bene' že' yež ca' nyechj mbi'i yegw Jordánna' gosa'aque' ja'aque' gan' zoa Juanna' cont bosozenague' xtiže'na'.

⁶ Na' cate' gosexoadole' bi da' xinj zjanone', Juanna' bzoje' legaque' nis lo yegw Jordánna'.

⁷ Na' lecze ja'ac zan bene' Israel bene' ca' zjanzi' fariseo na' bene' ca' zjanzi' saduseo. Ja'aque' cont bzoa Juanna' legaque' nis. Nach Juanna' cate' ble'ede' legaque' gože'ne':

—jLe'e nacchuale bene' zgot na' bene' gwxiye'! ¿Chaquele guac yelale lao castigw dan' seła' Diosen' caten' gone' yela' justis che benachen'?

⁸ Še da' li ba betinjele xtoła'len', cheyala' gonle da' nac güen cont yesache'e bene' ba boša' yichjlažda'olen'.

⁹ Na' bitw gonle xbab gaquele Diosen' bitw gone' le'e castigw che xtoła'len' lagüe dan' nacle xi'in diaža che da' Abrahanna'. Bitw nacho leca chyažje Diosen' le'e. Guac gone' cont yej quinga yesyeyaquen xi'in diaža che da' Abrahanna'.

¹⁰ Ca nacle'e, še bi chonle can' chazlaže' Diosen', zaca'leble ca to yag frut da' bibi chbia. Na' yogo'te yag frut da' bibi chbia, chog xan yaga' len na' gwzeyen'.

¹¹ Neda' da' li chzoa' le'e nis neče ba betinje xtoła'le, perw coža'na' za' yid ben' gon cont soa Spiritw che Diosen' lo' yichjlažda'olen' naban' le'e. Na' bene' ca' bi yeson can' chazlaže' Diosen', sele' legaque' lo' yi' gabilen'. Na' ben' za' za' coža'na' zaca'che' ca neda' na' da' nacchgüe' bene' zaca', bi zaca' gona' xmandadoe' lechja' no xele'.

¹² Benan' gone' len benachen' can' choncho cate' chdecho trigon' lo' rner. Chotobcho trigon' chgo'ošagüe'chon na' chzeycho yix beben'. Na' bene' bi chesejnilaže' Diosen', sełe' legaque' lo' yi' gabilen' dan' cbi cheyol chenit.

Cate' gwzoa Jesúsen' nis
(Mr. 1:9-11; Lc. 3:21-22)

¹³ Na' gwza' Jesúsen' gan' mbane Galilea na' gweyje' gan' zoa Juanna' cho'a yegw Jordánna' cont Juanna' bzoje' le' nis.

¹⁴ Na' Juanna' ben cho'alagüe' gague goclaže' gwzoe' Jesúsen' nis, gože'ne':

—Chyažjda' gwzo' neda' nisen' na' le' zedenabo' gwzoa' le' nis.

¹⁵ Nach Jesúsen' gože' Juanna':

—Bzoa neda' nisen'. Cheyała' goncho ca' cont gac yogo'loł dan' non Diosen' mandadw gac.

Nach gwčheb Juanna' bzoe'ne' nis.

¹⁶ Na' cate' beyož gwzoa Jesúsen' nisen', bechoje' lo' nisen', na' la' byaljwte yaban' gan' zoa Diosen'. Na' ble'ede' Spiritw che Diosen' betjen ca to ngolbex na' bžinen gwzoan len le'.

¹⁷ Na' gosende' gwne Dios ben' zoa yaban', gwne':

—Bengan' Xi'ina' beŋe' chacda' na' chebe chezaquelaže' chgüeda' che'.

4

Goclaže' gwxiyen' co'oyelan' Jesúsen' gone' da' mal

(Mr. 1:12-13; Lc. 4:1-13)

¹ Na' Spiritw che Diosen' benen cont gwyej Jesúsen' latje dašen' gan' Satanás dan' chnabia' da' xigüe' ca' goclažen' co'oyelan' le' cont gone' da' mal.

² Na' bitwbi gwdagw Jesúsen' lao čhoa ža čhoa yel, na' cate' gwde da' čhoa žana' gwdone'.

³ Na' Satanásen' gwbigan' gan' zoa Jesúsen', gožen le':

—Še le' naco' dogualje Xi'in Diosen', gož yej quinga yesyeyaquen yetextil.

⁴ Nach gož Jesúsen' len:

—Nyojcze Xtiža' Diosen' žan: “Gague yela' guagw na'zen' chyažje chio' beŋač cont gac bancho, san lecze chyažjecho yogo'loł diža' dan' ža Diosen'.”

⁵ Nach gwče' Satanásen' le' ciuda Jerusalén dan' nac ciuda che Dios. Na' bcuen le' yichjo' yodao' blao gan' nac la'zelagüe sibe,

⁶ na' gožen le':

—Še len' naco' dogualje Xi'in Diosen', nga boslažo' cuino', le nyojzen le'e Xtiža' Diosen', žan:

Seła' Diosen' beŋe' ca' zjanac angl che' yesaclene' le', na' yesoxe' le' cont bi čego' no yej.

⁷ Na' gož Jesúsen' gwxiye'na':

—Lecze can' nyojen Xtiža' Diosen', žan: “Bitw goncho Xancho Diosen' prueba še lede' can' že'na'.”

⁸ Da' yoble gwxiye'na' gozche'en le' to lo ya'a da' nacchgua sibe, na' blo'en le' yogo' nación dan' zjachi' doxen yežlion' len yela' zaca' yela' xdan čhegaquen.

⁹ Nach gožen le':

—Yogo' da' quinga chle'edo' nga gonan' lo nao' še gwzoa xibo' lagua' nga gonxeno' neda'.

¹⁰ Nach gož Jesúsen' len:

—Beyej ca'ale Satanás. Nyojzen le'e Xtiža' Diosen' žan: “Cheyała' šejnilaže'cho Xancho Diosen' na' toze le' gonxencho.”

¹¹ Na' becuase Satanásen' cuite'na' beyejen ga yoble nach besežin to čhope angl che Diosen' jasaclene' le'.

Jesúsen' gwzologüe' chyixjue'ede' diža' güen che Diosen' distritw Galilea

(Mr. 1:14-15; Lc. 4:14-15)

¹² Na' Jesúsen' beze'e distritw Judean' na' beyeje' distritw Galilea cate' bende' ba de Juanna' ližya.

¹³ Na' gwze'e yež Nazareten' jasoe' ciuda Capernaum dan' chi' cho'a nisdaon' do gan' zjachi' distritw dan' zjanzi' Zabulón na' Neftalí.

¹⁴ Na' dan' jayzoe' ciudan' goc can' gwna da' Isaías ben' be' xtiža' Diosen' cani' caten' bzoje' dan' ža:

¹⁵ Ca nac distritw Galilea gan' že' zan bene' cbi zjanaque' bene' Israel, gan' nita' distritw Zabulón na' distritw Neftalí dan' zjambane yešla'ale nisdaon' na' yegw Jordán,

¹⁶ nchoł yichjlaždao' bene' ca' že' na'.

Perw Diosen' gwsele' to bene' gwlo'o to be'ni' xen lo' yichjlažda'ogaquen'.

Gosaque' ca bene' guat len yichjlažda'ogüen' le gosone' da' malen',

perw bena' gwsela' Diosen' ba bocobe' yichjlažda'ogaquen'.

¹⁷ Cana' gwzolao Jesúsen' gwdixjue'ede' gwne':

—Le yetinje xtoła'len', le ba bžin ža cate' Diosen' ben' zoa yaban' nabi'e yichjlaždao' bene' yosozenague' che'.

Jesúsen' gwleje' tap bene' gwxcn bel cont gosaque' txen len le'

(Mr. 1:16-20; Lc. 5:1-11)

¹⁸ Na' zej Jesúsen' cho'a nisdao' che Galilea cate' ble'ede' chope bene' gwxcn bel, Simón Pedro na' bene' biše' Andrés, na' zjanite' chosozale' yixjw dan' chesezende' belen' lo' nisa'.

¹⁹ Nach gože' legaque':

—Le šo'o len neda'. Nacle bene' gwxcn bel, na' chbejle bel lo' nis, perw na'a gona' cont gaxle bene' yesyechoje' lo da' malen'.

²⁰ Na' la' gosebejyichjte' yixjw chen' nach ja'aclene' Jesúsen'.

²¹ Na' Jesúsen' gwze'e yelate' na' ble'ede' Jacobon' xi'in Zebedeo na' len bene' biše' Juan, zjajo'e to lo' barcw len xagaque', chesyeyonšagüe' yixjw chegaquen'. Na' lecze gox Jesúsen' legaque' šja'aclene' le'.

²² Na' la' gosontie' barcon' lo na' xagaque' Zebedeon' na' ja'aclene' Jesúsen'.

Jesúsen' bsed blo'ede' bene' zan

(Lc. 6:17-19)

²³ Na' Jesúsen' gwyeje' yogo' yež ca' zjachi' gan' mbane Galilea, bsed blo'ede' bene' ca' zjaže' to to yodao' che chio' bene' Israel. Na' gwdixjue'ede' diža' güen can' nabi'a' Diosen' yichjlaždao' bene' yosozenag che'. Na' Jesúsen' beyone' bene' ca' chese'e bite'teže yizgüe'.

²⁴ Na' doxen nación Siria gwxa diža' yogo' da' güen da' ben Jesúsen'. Nach bene' Siria ca' jasesane' yogo' bene' chesacšene lagüe'na', bene' chese'e zan yizgüe', bene' chesey chesela, bene' zjajo'o zjanyaz da' xigüe' yichjlažda'ogaque' len bene' chesaz šon na' bene' natsi' cuerp chegaquen'. Na' beyone' legaque'.

²⁵ Na' zan bene' gosao' le', bene' za'ac distritw Galilea na' distritw Decápolis, na' bene' za'ac ciuda Jerusalén, na' bene' za'ac yezica'chle yež da' zjachi' distritw Judea, na' bene' za'ac yešla'a yegw Jordán.

5

Diža' dan' bsed blo'e Jesúsen' to lo ya'a

(Lc. 6:20-23)

¹ Na' Jesúsen' cate' ble'ede' bene' zan zjanžag, na' gwloe' gwchi'e to lo ya'a. Na' bene' ca' zjanaque' le' txen gosebigue' gan' chi'ena'.

² Nach gwzolao bsed blo'ede' legaque', gwne':

—Mbalaz zoa le'e chache'ele chyažjele gaclen Diosen' le'e, le ba chzenagle che Diosen' cont chnabi'e yichjlažda'olen'.

⁴ Mbalaz soa le'e chacyaše'laže'le, le Diosen' yeyoe'xenlaže' le'e.

⁵ Mbalaz zoa le'e chzexjwlaže'le len Diosen' na' len benachen', le gon Diosen' cont gac lo na'le doxen yežlion' can' gwne'.

6 'Mbalaz zoa le'e chzelaže' chgualē gacle beņe' güen len Diosen', le ba cheyon Diosen' le'e beņe' güen lagüen'.

7 'Mbalaz zoa le'e cheyaše'le beņe' yoble, le lecze ca' Diosen' yeyaše' yeži'ilaže'de' le'e.

8 'Mbalaz zoa le'e ba nacle beņe' laždao' xilaže', le šjayzoale txen len Diosen'.

9 'Mbalaz zoa le'e chego'ole yeļa' chxenlaže' che beņe' chesediļe, le Diosen' ne' nacle xi'ine'.

10 'Mbalaz zoa le'e chosoči chososaca' beņe' le'e lagüe dan' chonle dan' nac güen lao Diosen', le chzenagle che Diosen' cont chnabi'e yichjlažda'olen'.

11 'Na' mbalaz soale še dan' chejnilaže'le neda' chesezi'diža' beņe' le'e na' chososaca'zi'e le'e na' chosošie' diža' güenlaže' chele.

12 Le yebechgüe na' le soa mbalaz, le Diosen' gone' cont gacchgua da' güen chele cate' yežinle gan' zoe'na'. Can' chesonde' le'e, ca'czen' goson da' xozxta'ocho len da' beņe' ca' goso'e xtiža' Diosen' cani'.

*Naccho ca zede' na' ca be'ni' len beņe' že' yežlio nga
(Mr. 9:50; Lc. 14:34-35)*

13 'Le'e nacle ca zede', le zede' chaclenen cont bi cuiayi' no yid bela', na' le'e chonle cont beņachen' cbi chesontaque' da' mal. Perw še zeden' bich bi xzi' naquen, ĩnacxe goncho cont yeyaquen xzi' da' yoble? Na' bich bi zacan', lete cho'õchon na' gwlej gwšošj beņe' len. Na' le'e še cbich gonle can' chazlaže' Diosen', nacle ca zede' dan' bich bi xzi' naquen.

14 'Na' le'e nacle ca be'ni' dan' chaclenle beņe' cont chesenezde' nac chaclaže' Diosen' yesone'. Na' dan' chonle can', nacle ca to ciuda da' chi' to lo ya'a, le yogo'ze beņe' chesele'eden'.

15 'Notno gwguala' to yi' na' gw dosen' to caj, san chde'en le'e ze'e cont chsenin' len yogo' beņe' že' lo' yo'ona'.

16 'Na' ca nac le'e, cheyaļa' soateze soale gonle da' güenna' cont yesele'e beņe' na' yesonxene' Xacho Dios ben' zoa yaban'.

Jesúsen' bsed blo'ede' can' ža ley dan' bzoj da' Moisés

17 'Bitw gaquele še neda' za'a zedeyena' cont ley dan' bzoj da' Moisésen' na' dan' bosozoj yezica'chle beņe' ca' goso'e xtiža' Diosen' cani' bich yesonen žin. Za'a cont gac can' ža yogo'loļ Xtiža' Diosen' dan' bosozoj beņe' ca'.

18 'Da' li žia' le'e, te che yežlio nga len da' ca' chle'echo le'e yaban', perw ne to letr dao' ne to punt dao' dan' nyoj le'e leyna' bi gac yexin, san gac yogo'loļ dan' nžia bia' Diosen' gac.

19 'Da'nān' note'tezle še bi gonle can' žanna', la'czļa' še naquen la'zelagüe to da' dao', na' še lecze gwlo'ele beņe' yoble bi yosozenague' chen, Dios ben' zoa yaba chnabi'e ne' bi nacle beņe' blao len le'. Na' note'tezle še gonle can' žanna', na' še lecze gwlo'ele beņe' yoble yesone' ca', Diosen' ben' zoa yaba chnabi'e ne' nacle beņe' blao len le'.

20 'Chnia' le'e, beņe' fariseo ca' na' beņe' ca' chososed chosolo'e dan' bzoj da' Moisés bitw zjanac yichjlažda'ogaquen' güen lao Diosen'. Na' še yichjlažda'olen' bi gacchen güen lao Diosen' clel ca che beņe' ca', bitw yežinle yaban' gan' zoa Diosen' chnabi'e.

*Da' malen' choncho še chža'a lježcho
(Lc. 12:57-59)*

21 'Na' lecze bsed blo'e Jesúsen' legaque' gože'ne':

—Ba nezele can' bzejni'i Moisésen' beņe' ca' gosenita' cani', gwne': "Nono gotle. Na' še no got ljež beņache', justis ca' yesechoglagüe' che' cheyaļa' gate'."

²² Na' neda' žia' le'e, note'tezle še chža'a ljež benačhle, zacan' yesechoglagüe' gata' castigw chele. Na' note'tezle še chzi'diža' lježle, zacan' yeson bene' blao ca' chesenabia' nación Israel chechon' castigw chele. Na' note'tezle še chado'diža' lježle, zaca'czen' yesela' Diosen' le'e lo yi' gabil.

²³ 'Cheyała' soacho binlo len ljež benačcho. Na' la'czla' cate' ba zoale lo' yodao' cont gwnežjwle bi dan' gwnežjwle gonxenle Diosen', še šjasa'laže'le ba bene' da' mal contr to bene' lježle,

²⁴ na'ze cheyała' gwcua'anle šlož dan' noxe'len' na' šjenle cont yezoale binlo len bene' lježlen'. Yeyoža' guaque šjasanle dan' ba gwlejele cont gonxenle Diosen'.

²⁵ 'Cate' to bene' gagüe' xya chele na' che'e le'e lao justis, šlac ngo'ole nezen' le yeyiljwlaže' nac gonle cont yezoale binlo len le' cont bi che'e le'e lao justisen'. Še bitw gonle ca', cate' žinle lao justisen', nach gone' le'e lo na' bene' ca' yoseyju'e' le'e ližya.

²⁶ Da' li žia' le'e, bitw yebeje' le'e še bina' chixjwle doxen dan' čala'le.

Da' malen' choncho še chzoa xtocho

²⁷ 'Ba nezele ley dan' bzoj da' Moisésen' žan: "Bitw gata'lenle no'ole bi nac no'ol chele o bene' byo bi nac bene' chele."

²⁸ Na' neda' žia' le'e, note'tezle še chža'le to no'ole na' chzelaže'lene', ba naple doła'. Le tozeczce ca malen' ba chonle lo' lažda'olen' len dan' chon bene' chzoa xtoe'.

²⁹ 'Na' še yejlaolen' chonen cont gonle da' xinj, cheyała' cuejyichjle da' malen' chonle. Yejni'a cuiayi' yejlaolen' clcl ca cuiayi'le lo yi' gabilen' neche len.

³⁰ Na' še na'le chonen cont gonle da' xinj, cheyała' cuejyichjle da' malen' chonle. Yejni'a cuiayi' na'le clcl ca cuiayi'le lo yi' gabil neche len.

Bene' ca' zjanšagna' bitw cheyała' yesyele'e

(Mt. 19:9; Mr. 10:11-12; Lc. 16:18)

³¹ 'Lecze nezele ley dan' bzoj da' Moisésen' žan: "Note'teze bene' yele'e len no'ol che', cheyała' chas to yiš ga güen' diža' le besyele'ena'."

³² Na' neda' žia' le'e note'teze bene' chele'e len no'ol che', len nezte'de' no'ole chen' bitw naque' to no'ole chzoa xtoe', chone' cont gague' ca to no'ole bene' chzoa xto. Na' note'teze yošagna'lene' to no'ole bene' bela'a len bene' che', lecze tozeczce ca da' xinj gone' len dan' chon bene' chata'lene' no'ol che bene' yoble.

Jesúsen' bzejni'ide' cheyała' güe'cho diža' li

³³ 'Na' lecze ba nezele can' bzejni'i da' Moisésen' da' xozxta'ocho ca': "Cate' gwzoale testigw Xancho Diosen', cheyała' gonle con can' ba gwnalen'."

³⁴ Perw neda' žia' le'e gwbat nale quinga che bite'teze: "Yabana' zoan testigw chia' cho'a diža' li". Bi nale ca' le yaba nan' zoa Diosen' chnabi'e.

³⁵ Na' neca nale: "Yežlion' zoan testigw chia' cho'a diža' li", le yežlion' den xni'a Dios. Neca nale: "Ciuda Jerusalenna' zoan testigw chia' cho'a diža' li", le naquen ciuda che Dios ben' naque' la'zelagüe bene' chnabia'.

³⁶ Na' neca nale: "Yichja' zoan testigw chia' cho'a diža' li", le bitw gac gonle cont yiša' yichjlen' yesyeyaquen da' šiš o yesyeyaquen da' gasj.

³⁷ Še žale guaquen, gacczen; še žale bi gac, bi gacczen. Le bichle diža' da' nale cont yesejle'e chele, zan' che Satanás dan' chnabia' da' xigüe' ca'.

Bitw co'olaže'cho bene' chesegue'ede' chio'

(Lc. 6:29-30)

³⁸ 'Nezele ley dan' bzoj da' Moisésen' žan: "Še to bene' gone' zi' yejlaolen', guac gonle zi' yejlagüen', na' še to bene' xope' to layle, guac xople to layen'."

³⁹ Perw neda' žia' le'e, bitw gwžonle gwsaca'zi' bene' le'e. Še to bene' cape' šla'a xaga'le, le güe' dan' yešla'a.

⁴⁰ Še to bene' chagüe' xya na' che'nde' que'e xcamisle, le güe' latje que'e len xadon chelen'.

⁴¹ Na' še to bene' blao gone' byen šejlenlene' gua'le yoa' chen' do gašj hor, le šejlene' le guan' chop ca'te'le.

⁴² Na' še bi dan' chnabe bene' le'e, le güen'. Na' le cuej še bi da' chnabe' cuejlene'.

Cheyała' gaquecho bene' chgue'e chio'

(Lc. 6:27-28, 32-36)

⁴³ 'Na' ľecze ba nezele ley chelen' žan: "Cheyała' gaquele bene' migw chele na' gue'ele bene' chgue'ede' le'e."

⁴⁴ Perw neda' žia' le'e, cheyała' gaquele bene' chgue'ede' le'e, na' cheyała' nabele Diosen' gac güen che bene' chesezi'diže' le'e. Le gon binlo len bene' cheseque'ede' le'e, na' le yol güiž Diosen' cont gac güen che bene' ca' chosqacazi'e le'e.

⁴⁵ Še gonle ca', gwlo'ele nacle xi'in Diosen' ben' zoa yaban'. Len' chone' chla' gwbižen' cont chsenin' che bene' zjanaque' bene' güen lente che bene' zjanaque' bene' mal. Na' ľecze chone' yejw par bene' zjanaque' bene' güen len bene' zjanaque' bene' mal.

⁴⁶ Še chaquele šinze bene' chacde' le'e na' bi chaquele bene' yoble žbixchen' chbezle gon Diosen' da' güen chele? Con can' cheson bene' güechixjw ca' chonle, bene' ca' žale zjanaque' bene' xi'achgua.

⁴⁷ Na' še con chguaple tiox bene' biše' ľježle ca'ze žchaquele güenna' chonle da' chonle ca'? Bitw chonle güen, le ca'czen' cheson bene' ca' bi zjanombi'e Diosen'.

⁴⁸ Cheyała' gacle bene' šagüe' bene' güen len note'teze bene' con can' nac Xacho Diosen' ben' zoa yaban' bene' šagüe' bene' güen.

6

Jesúsen' blo'ede' naquen' cheyała' goncho da' chazlaže' Diosen'

¹ 'Cate' gonle to da' güen, bitw gonlen cont yesele'e bene' can' chonlen' na' yesonxene' le'e, le še chonle ca', Xacho Dios ben' zoa yaba bitw gone' ga gac güen chele.

² Da'nan' cate' gwnežjwle to bene' da' chyažjde', bitw gwnežjwlen par yeseneze bene' ca dan' chonlen'. Bene' gwxiye' ca' chosonežjue' bi da' chosonežjue' do lo' yodao' na' do chanež par yeseneze bene' na' yesene' güen čhegaque'. Da' li žia' le'e, ba gosacxencze' lagüe da' chesone' ca', perw Diosen' bitw gone' ga gac güen čhegaque' še ca'.

³ San le'e, še bi da' gwnežjwle to bene', le gwnežjon šižize.

⁴ Gonlen ga cbi yesache'e bene' na' cbi yesonxene' le'e, nach Xacho Diosen' ben' chle'ede' yogo' dan' choncho gone' ga gac güen chele ga yesele'e yogo' bene'.

Bsed blo'e Jesúsen' nac cheyała' yol güižcho Dios

(Lc. 11:2-4)

⁵ 'Cate' yol güižle Diosen', bitw gonle can' cheson bene' gwxiye' ca'. Legaque' chesyebede' chesezeche' chosol güiže'ne' lo' yodao' čhegaque', na' do squin

chanez. Chesone' ca' cont yesele'e bene' can' chesone'na'. Da' li žia' le'e, ba gosaxenczen' lagüe da' chesone' ca', perw Diosen' bitw gone' ga gac güen čhegaque' še ca'.

⁶ Na' cate' yol güižle Diosen', le yeyo'o lo' yo'o čhele na' gwseyjwle puerten' na' güe'le diža' len Diosen' ben' cbi chle'echo la'czla' zoe' len chio'. Na' Xacho Diosen' ben' chle'ede' yogo' dan' chonle gone' ga gac güen čhele.

⁷ Na' cate' yol güižle Diosen' bi güe'le diža' zan can' cheson bene' ca' bi zjanombia' Diosen'. Legaque' chesacde' lagüe' dan' cheso'e diža' zan Diosen' gwzenague' čhegaque'.

⁸ Bitw gonle can' chesone'na'. Ca nac Xacho Diosen', cate' za' nabelenen' ba nezcede' bi dan' čhyažjele.

⁹ Quinga yol güižlene':
Xato' bene' zoa yaba, čnabto' yogo'lo' bene' yesonxene' le'.

¹⁰ Zelaže'to' nabi'o yichjlaždao' yogo' neto' benač.
Gacšca can' chazlažo' yežlio nga can' chac yabana'.

¹¹ Ca nac dan' che'ej chagwto' tža tža, benšcan na'a.

¹² Na' bezi'xenšca četo', le lencze neto' chezi'xento' che ljež benačto' bite'teze da' chesonde' neto'.

¹³ Na' bitw go'o latje soa da' gwžigan' neto' gonto' da' mal, san bcuas bcue'ejšca neto' len da' mala'.

Le'na' čnabi'o na' napo' yela' guac na' naco' bene' zaca' juisyw to'li tocañe.
Ca'czen' gacšca.

¹⁴ Na' še chezi'xenle che ljež benačlen' bite'teze da' chesonde' le'e, lecze Xacho Diosen' ben' zoa yaban' yezi'xene' xto'la'len'.

¹⁵ Perw na' še le'e bi chezi'xenle che ljež benačle, lecze ca' Xacho Diosen' bitw yezi'xene' čhelen'.

Jesúsen' bzejni'ide' nac goncho gwbas

¹⁶ Cate' le'e gonle gwbas cont gonxenle Diosen', bitw gon cho'alaolen' ca' che bene' čegüine'čgüe', can' cheson bene' gwxiye' ca'. Legaque' chesone' ca' contze chesele'e bene' le chesone' gwbas na' yesonxene' legaque'. Da' li žia' le'e, ba gosaxencze' lagüe da' chesone' ca', perw Diosen' bitw gone' ga gac güen čhegaque' še ca'.

¹⁷ San le'e cate' gonle gwbas, le gwpa'a yichjle na' le čhib cho'alaole.

¹⁸ Le gon ca' cont bi yesache'e bene' chonle gwbas, san gache'e toz Xacho Dios ben' zoa len chio' la'czla' bi chle'echone'. Na' Xacho Diosen' ben' chle'e yogo' da' choncho gone' cont gacxenle.

Da' ca' zjazaca'chgua yaba gan' zoa Diosen'

(Lc. 12:33-34)

¹⁹ Bitw co'ošagüe'le da' zcha'o da' zjanac da' zaca' da' zjade yežlio nga, le yesebiayin'. Ba' da' zjade yežlio nga chesaljen be dao' čhesagwban', na' yebalen česezen xche'en, na' lecze chaš bene' gwban na' yeseque'en.

²⁰ San le gaque Diosen' cont gone' da' šagüe' da' güen čhele da' bi te čen cate' yežinle yaban' gan' zoe'na', da' bi šo'ba', na' neca sen xche'en, na' neca gac šo' bene' gwban yeseque'en.

²¹ Le gan' de dan' chaquelen' na' zoa yichjlažda'olen'.

Žia'yejlaocho cont chle'echo

(Lc. 11:34-36)

²² Žia'yejlaole cont chle'ele. Še bitw bi chaquen, chle'eczele binlo.

23 Perw še yejlaolen' bi naquen binlo, bitw chle'ele. Ca'czen' naquen len yichjlažda'olen'. Da' licze leca nchoj yichjlažda'ole še bi chzenagle che Diosen'.

Bitw gac gaquecho Diosen' na' gaquetecho mechw
(Lc. 16:13)

24 'Notno gac gon žin len chope xane' to ši'ize, le še gone' ca', gue'ede' to xan žinna' na' gacde' yetoe'; o gone' žin che toe' do yichj do laže' na' che ben' yeto gonon' to chža'alaže'ze. Lecze ca' le'e bitw gac gonle xšin Diosen' do yichj do laže'le na' gonte xšinle cont gacle bene' gwni'a.

Diosen' chapši'e xi'ine' ca'
(Lc. 12:22-31)

25 'Da'nan' žia' le'e, bi gacžejlaže'le bi da' ye'ej gagwle šlac mbanle, na' lecze ca' bi gacžejlaže'le che xalana'le. Zaca'ch yela' mban chelen' ca' yela' guagw. Lecze ca' cuerp chelen', zaca'chen ca' xalana'le.

26 Le gon xbab ca' nac be ca' zjažia xil ben' chesaš lo be', bitw chesazba', bitw cheselapba', neca zoa da'a xoa' chegacba', perw na' Xacho Diosen' ben' zoa yaba chguagwcz'e'ba'. ĩNacchle zaca' le'e ca' be ca' zjažia xilen'!

27 Na' ne tole bi gac yoston cuinle gašje metr še con cue' yichjle tonle.

28 'Na' žbixchen' chbec yichjle xalana'le? Le gon xbab ca' nac yej ca' da' zjaze yixe' chesecha'oczen'. Bibi žin chesonen, neca chesaljen do.

29 Na' žia' le'e, da' rey Salomón gocue' lache' güen juisyw, perw bitw bežinlaže' xalane'na' ca' yela' xdan che yej ca'.

30 Diosen' none' xdan da' ca' ze yixen' la'czla' to chop žaze nitan' na' chosozeyen'. Nacchxe gon Diosen' len le'e gwleccze yichje' gone' yogo' da' chyažjele, le'e late' lasze chejle'le che'.

31 Da'nan' bitw cuec yichjle che bi dan' chyažjele, nale': "ŽBin' ye'ej gagwcho na' bin' gacwcho?"

32 Bene' ca' bi chesonxene' Diosen' con chesoelaže' bi da' gata' yese'ej yesagüe' na' che xalana'gaque'. Perw Xacho Diosen' ben' zoa yaban' nezczede' bi da' ca' chyažjele.

33 Cheyala' güe'laže'le gwzenagle che Diosen' cont nabi'e yichjlažda'olen' na' cont gacle bene' güen len le', lenna' naquen da' žialaoch, na' yogo' da' ca' chyažjele, goncze Diosen' len.

34 Bitw cuec yichjle che bi dan' gac gwxe güižj, le decze da' cuec yichjcho tža tža. Da'nan' to to ža con cuec yichjcho che dan' chac ca' hora'.

7

Bitw zaca'cho nacho zjanap bene' dola'
(Lc. 6:37-38, 41-42)

1 'Bitw gonle xbab zaca'le nale' bene' zjanape' dola'. Še nale' che bene' zjanape' dola', ca'cze Diosen' ne' le'e nape' dola'.

2 Can' chosbaga'le bene' žale zjanape' dola', lecze can' yosbaga' Diosen' le'e ne' nape' dola'. Con can' chonle len bene', lecze can' gon Diosen' len le'e.

3 ŽBixchen' chna'le beb dao' dan' yo'o lo' yejlaolene' lježle na' bi chacbe'ele naquech beb xen dan' yo'o lo' yejlaolen'?

4 Na' še le'e yo'o to da' xench lo' yejlaolen' ĩnacxechen' che'le bene' lježlen': "Ben' yebeja' beb dao' dan' yo'o lo' yejlaguon'?"

5 ĩBene' güexoayag! Zgua'tec le yebej beb xen dan' yo'o lo' yejlaolen', nach le'ele binlo cont yebejle dan' yo'o lo' yejlaolene' lježle.

6 'Perw bitw güe'tezle xtiža' Diosen' len bene' ca' cheson yichjlaogüe' cbi chesacłaze' yosozenaguen', le xož yesonde' le'e znia ca cheson bał beco' še bi chazłaze'ba' bi da' chosonežjue'ba'. Na' še güe'tezle xtiža' Diosen' len bene' ca' cheson yichjlaogüe', xož yosolej yosošošje' diža' dan' güe'lenlene'. Ca' cheson coš len da' cbi chesacłaze'ba' yesagwba'.

Le nabe Diosen' bi dan' nabelene', le gonczen'
(Lc. 11:9-13; 6:31)

7 'Še žan bi da' chyažecho, chñabchon. Še žan to da' chaclaže'cho želecho, chyiljwchon. Še žan chaclaže'cho saljw bene' puert che' na' necho cho'a puerta' cont saljue'. Na' ca'cze cheyała' ye'le Diosen' cate' bi da' chyažjele, o bi da' chaclaže'le gone'.

8 Na' note'tezle še bi da' chñabelene', gonczen'. Na' še bi dan' che'nele nezele, gwzejni'iczd'en' le'e. Na' še žan chaclaže'le gac to da' gac, yoł güižle Diosen' can' chon to bene' chnie' cho'a puert, nach Diosen' gone' cont gacczen.

9 'Na' le'e xa bidao', še xi'inle nabebe' le'e yetextil čgwnežjwlebe' to yej?

10 Na' še nabbe' yid beł gagwbe', čgwnežjwlebe' to be xigüe'?

11 La' nacle bene' mal, nezele chnežjo xi'inle to da' güen. Nacchxe güen gon Xacho Diosen' ben' zoa yaban' len bene' chñab lagüe'na' bi dan' chyažjde'.

12 'Na' con yogo' da' güen da' chaclaže'le yeson beñachen' len le'e, lecze ca' cheyała' gonle len legaque', le can' zejen da' nyoj le'e ley dan' bzoj da' Moisésen' na' dan' bosozoj da' bene' ca' goso'e xtiža' Diosen' cani'.

Nez da' yežin yaban' zaca'leben ca to nez las
(Lc. 13:24)

13-14 'Lao yela' mban checho chope nez de, to nez güen na' to nez mal. Nez malen' zaca'leben ca to nez yo to nez laga' dan' chaquele leca mba naquen cont talen, na' bene' zan cheseque'en. Perw cheyała' gonle byen šo'le nez güenna' la'czla' chaquele naquen ca to nez las, to nez zdebe, le nez malen' chežinen gabil gan' saca'zi'le toli tocanē. Na' nez güenna' chežinen yaba ga banle toli tocanē.

Dan' choncho chlo'en bin'yo'o lo' yichjlažda'cho
(Lc. 6:43-44)

15 'Cheyała' gwsaca'le cont bi šejle'le xtiža' bene' ca' chesonlaže' chesene' xtiža' Diosen' cheseyixjue'ede'. Xdanchgua cheso'e dižan', le chesacłaze' gonle xbab zjanaque' bene' güen. Perw zjanaque' bene' laždao' xi'a na' chesacłaze' yosožiaje'e le'e.

16 Con can' nac da' chbia to to yaguen' nezecho bi yaga'. Ca nac yag yeše' bitw chbian uvas na' nēca yag lay chbian yixgüigw. Ca'czen' cheyała' gacbe'ele bene' ca' yeseziye'e le'e cate' le'ele dan' chesone'na'.

17 Yag dan' nac yag güen, frut güencze chbian, na' yag da' bi nac güen, lecze frut da' bi nac güen chbian.

18 Bitw nācho to yag frut güen chbian frut da' bi nac güen, na' nēca nācho dan' bi nac güen chbian da' nac güen.

19 Na' yogo'te yag frut da' bibi chbia, chog xan yaga' len na' gwzeyen'.

20 Na' can' nac dan' cheson to to bene', nezecho še zjanaque' bene' güen o bene' mal.

Gague yogo' bene' yesyežine' gan' zoa Diosen' chnabi'e
(Lc. 13:25-27)

21 'Beñe' zan chese'e neda': "Naco' Xana'", perw gague yogüe' yesyežine' yaban' gan' zoa Diosen' chnabi'e. Beñe' ca' cheson can' chazlaže' Xa' Diosen' ben' zoa yaban', legaczen' yesyežine' yaban' gan' zoe'na'.

22 Cate' žin ža yosodie' cuent lao Diosen', beñe' zan yesi'e neda': "Xana', goclen neto' na'a, le ba gwdixjue'eto' xtižo'na'. Na' lecze ca' bza' bzetjto' lao' bebejto' da' xigüe' ca' zjayo'o zjanyaz yichjlaždao' beñe'. Na' lecze bza' bzetjto' lao'na' bento' da' zan yela' guac."

23 Perw na' yapa' legaque': "Bitw nombi'a le'e. Le šjaya'ac ca'ale le'e beñe' güen da' xinj."

Chope beñe' na'yo'o da' chon to toe'

(Mr. 1:22; Lc. 6:47-49)

24 'Beñe' chzenag xtiža'na' na' chone' can' žia'na' zaca'lebde' ca to beñe' sina' beñe' ben liže' na' gwdixjue' lenen len yej gual.

25 Na' goc yejw zil juisyw na' betj yegw gwyechjen liže'na' na' gwyechj be' bdono'. Perw bitw gosezoen yosochixen len dan' gwdixjue' lenen de yej.

26 Na' beñe' chzenag xtiža'na' perw bitw chone' can' žia'na', zaca'lebde' ca to beñe' tont beñe' bzoa ližen' lo yox.

27 Na' goc yejw zil juisyw na' betj yegon' gwyechjen liže'na' na' gwyechj be' bdono'. Nach ližen' bebixen gwžiyain'.

28 Na' cate' beyož be' Jesúsen' diža' ca', beñe' ca' že' na' besyebande' can' bsd blo'eden'.

29 Le can' bzejni'ide' nachbia' nezde' cayanen' nac xbab che Diosen', gague bzejni'ide' can' chosozejni'i beñe' ca' chososed chosolo'e ley dan' bzoj da' Moisésen'.

8

Jesúsen' beyone' to beñe' che'ede' yižgüe' dan' nzi' lepra

(Mr. 1:40-45; Lc. 5:12-16)

1 Beñe' zan zesyenagüe' Jesúsen' cate' beyetje' ya'ana'.

2 Nach to beñe' che'ede' yižgüe' dan' nzi' lepra gwbigue' lao Jesúsen' na' bzoa xibe' lagüe'na' gože'ne':

—Xana', še chaclažo' guac yeca'o yižgüe' dan' che'eda'.

3 Nach Jesúsen' bli ne'e na' gwxoen' yichje' na' gože' le':

—Chaclaža' yeyacdo'. Beyaque.

Nach la' beyactie' ca nac yižgüe' dan' che'ede'.

4 Nach Jesúsen' gože' le':

—Notno yo'o can' ba beyona' le'. Con gwyej jaña' bxoza' cont le'ede' bačh beyacdo'. Na' bnežjw da' cheyla' gwnežjo' dan' non Moisésen' mandadw cont yeyaco' xilaže' len ley che Diosen'. Ben ca' cont yogo' beñe' yesenezde' ba beyacdo'.

Jesúsen' beyone' xmos to soldadw

(Lc. 7:1-10)

5 Na' cate' bežin Jesúsen' Capernaum to xan soldadw beñe' Roma la' bšagte' le'. Na' gota'yoede' Jesúsen',

6 gože'ne':

—Xana', xmosan' die' ližan' chacšenchgüede'. Natsi' cuerp čhen' na' chžaglaochgüe'.

7 Nach Jesúsen' gože' xan soldadoa':

—Sa'lena' le' na' yeyona'ne'.

⁸ Perw na' xan soldadoa' gože'ne':

—Xana', bitw naca' beṇe' zaque' par sa'o liža'na'. Ngateze ben mandadw yeyac xmosan' na' yeyaccze'.

⁹ Neda' zoa beṇe' chnabi'e neda', perw lecze nita' soldadw chia' na' chn-abia'gaca'ne'. Cate' chapa' toe': "Gwyej", na' cheje', na' cate' chapa' yetoe': "Da", na' chide', na' cate' chapa' xmosa': "Da' nga gono'", na' chonen'. Nan' nezda' con ṇao' yeyac xmosan' na' yeyaccze'.

¹⁰ Na' Jesúsen' cate' bende' xtiža' xan soldadoa' bebande' na' gože' beṇe' ca' zjanagüe' le'na':

—Da' licze žia' le'e, ṇe toze beṇe' Israel biṇa' šejnilaže'chgüe' neda' ca bengi bi naque' beṇe' Israel.

¹¹ Žia' le'e, beṇe' zan za'ac doxen yežlion' šjasyenite' txen len da' xoxxta'ocho Abraham, Isaac na' Jacob yaban' gan' zoa Diosen' chnabi'e na' yesebi'e cho'a mes yesagüe'.

¹² Na' ca nac beṇe' nación Israelen' ben' gwlej Diosen' cont yesenite' len le', choj bene' zan bitw yesejnilaže' neda'. Da'nan' sele' legaque' lo' yi' gabil' gan' nac choj na' yesebežyaše' na' yesagwxetje laye' dan' yezežlaochgüe'.

¹³ Beyož gwna Jesúsen' ca' nach gože' xan soldadoa':

—Guac yeyejo'. Yeyaque xmoso'na', con can' chejli'o gac che'.

Na' xmos xan soldadoa' la' beyactede'.

Jesúsen' beyone' taobi'in che Pedroa'

(Mr. 1:29-31; Lc. 4:38-39)

¹⁴ Na' gwyej Jesúsen' liž Pedroa', na' ble'ede' taobi'in che Pedroa' die' yo'e da' la.

¹⁵ Jesúsen' beṇue' ne'e na' la' bechojtie' da' lan'. Nach la' gwyaste no'olen' bsin'i'e da' gose'ej gosagüe'.

Jesúsen' beyone' beṇe' zan

(Mr. 1:32-34; Lc. 4:40-41)

¹⁶ Na' cate' ba gwxin, besežin beṇe' gan' zoa Jesúsen' zjanchi'e beṇe' zan zjajo'o zjanyaz da' xigüe' yichjlažda'ogaquen'. Jesúsen' con bene' mandadw na' besyechoj da' xigüe' ca'. Lecze beyone' yogo' beṇe' ca' chesacšene.

¹⁷ Bene' ca' cont goc can' ža Xtiža' Diosen' dan' bzoj da' Isaías che' cani', žan: "Le'na' yeque'e yela' chžaglao checho na' yeque'e yogo' yižgüe' chechon'."

Can' gož Jesúsen' beṇe' ca' gosaclaš' yesa'ogüe' le'

(Lc. 9:57-62)

¹⁸ Gwde na' ble'e Jesúsen' ba besežin beṇe' zan zjanyechjde' le', nach bene' mandadw len beṇe' ca' zjanaque' le' txen cont yeselague' yešla'a nisdaon'.

¹⁹ Na' bchoj to beṇe' chsed chlo'ede' dan' bzoj da' Moisésen' nach gwbigue' lao Jesúsen' na' gože'ne':

—Maestrw, sa'lena' le' gate'tez šejo'.

²⁰ Nach gož Jesúsen' le':

—Nita' xišna' beza' na' lecz chesyžežin xišna' be dao' ca' zjazoa xil, be chaš le'e yaba, perw bibi xišna' neda' de ga yezi'laža', neda' naca' ben' gwsela' Diosen' golja' benach.

²¹ Na' bchoj yeto ben' naque' Jesúsen' txen na' gože'ne':

—Xana', sa'lena' le' perw za' got xa'. Beṇšca latje zgua'tec šjaycuaša'ne'.

²² Jesúsen' gože'ne':

—Yo'o len neda'. Beṇe' ca' zjanac yichjlažda'ogüe' ca' che beṇe' guat, legaque' guaccze yosocuaše' yezica'chle beṇe' guat.

Jesúsen' bcueze' to be' bdono' lo nisdao'

(Mr. 4:35-41; Lc. 8:22-25)

²³ Beyož be' Jesúsen' diža' ca', gwyo'e lo' barcon' len bene' ca' zjanaque' le' txen.

²⁴ Na' šlac zej barcon' lo nisen' gwzolao gwyechj to be' bdono' na' nisdao'n leze chas chatan' na' gwzolao cheyož nis lo' barcon', perw ba chtas Jesúsen'.

²⁵ Nach bosyosbane' le' gosi'ene':

—jXanto'! jBosla chio'! jBach chbiayi'cho!

²⁶ Nach Jesúsen' gože' legaque':

—¿Bixčhen' chžebtecle ca'? ¿Nacxečhen' bi chejle'le chia'?

Na' gwyase' na' gwdile' be' bdonon' len nisdao'n, na' la' gosebe'žiten.

²⁷ Na' bene' ca' zjanaque' Jesúsen' txen besyebande' can' bene'na', nach gose' lježgaque':

—¿Noxe benga? lente be' bdono' na' len nisdao'n chosozenaguen che da' že'.

Chope bene' Gadara zjajo'o zjanyaze' da' xigüe'

(Mr. 5:1-20; Lc. 8:26-39)

²⁸ Na' besežine' yešla'a nisdao'n gan' chi' laž bene' Gadara ca'. Na' cate' bechoj Jesúsen' lo' barcoa' bosošag čhope bene' le', bene' zjajo'o zjanyaz da' xigüe' yichjlažda'ogaque'. Bene' quinga ba nite' capsantw na' gosacchgüe' bene' znia juisyw len bene' chesyěžague' na' gague no chac ta tnez.

²⁹ Na' bososye'e gose'e Jesúsen':

—¿Bixčhen' chgoša' chlaže' čhio' len neto', Jesús? Naco' dogualje Xi'in Dios. jZao' gwsaco' neto' na'a cate' bina' žin ža si'to' castigw'?

³⁰ Na' gała'ze chesaš zan čoš chesagwba'.

³¹ Nach da' xigüe' ca' gosata'yoen Jesúsen' gose'en le':

—Še yebejo' neto' yichjlaždao' bene' quinga, gwsela' neto' gan' nita' čoš ca' na' beŋ latje šjajo'oto' yichjlažda'oban'.

³² Nach gož Jesúsen' legaquen:

—Le šjajo'o.

Nach besyechojen yichjlaždao' bene' ca' na' jaseyo'on yichjlaždao' čoš ca'. Na' besyeyetjses čoš ca' le'e ya'a gan' nita'ban', na' jaselažo'ba' lo' nisdao'n ga gosatba' gose'ejba' nis.

³³ Na' bene' ca' chosoyoe' cošen' besele'ede' dan' ba goquen na' bosyoxonje' jasyeyeže' bene' lagüe' yež yogo' can' ba goquen' na' can' ba besyeyac bene' ca' gos'o gosaz da' xigüen' yichjlažda'ogaquen'.

³⁴ Nach yogo' bene' ca' že' yeža' jasešague' Jesúsen' na' cate' besele'ede'ne' gosata'yoede' le' yeze'e lažgaquen'.

9

Jesúsen' beyone' to bene' bi chda šla'a ŋi'a ne'e

(Mr. 2:1-12; Lc. 5:17-26)

¹ Nach Jesúsen' beyo'e lo' barcon' len bene' ca' zjanaque' le' txen besyelaque' yešla'a nisdao'n par besyežine' Capernaum gan' ba gwzoacze' sša.

² Na' besežin xonj bene' zjanlene' to bene' xinj bene' bi chda šla'a ŋi'a ne'e, zjanxo'e le' to lo cam dao'. Cate' gocbe'e Jesúsen' le gosejnilaže'ne' nach gože' bene' güe'na':

—Bebe xi'ina'. Ba bezi'xena' xtolon'.

³ Na' bał bene' ca' chososed chosolo'ede' dan' bzoj da' Moisésen' gosende' dan' gož Jesúsen' bene' güe'na' na' gosone' xbab lo' yichjlažda'ogaquen' gosene': "Benga chñie' diža' bya' che Dios chne' ca', le chon cuine' ca' Dios."

⁴ Jesúsen' gocbe'ede' ca' nac da' cheseza'laže', na' gože' legaque':
—¿Bixchen' chza'laže' le ca' lo' yichjlažda'olen'?

⁵ Še yapa'ne': "Ba bezi'xena' xtolo'na'," bi nezele še napa' yela' gwnabia' cont yezi'xena' xtolen'. San še yapa'ne': "Gwyas na' gwda", na' nachbia' še napa' yela' guac gac can' gwnian'.

⁶ Perw neda' naca' bene' gwsela' Dios golja' benach gwlo'eda' le'e na'a zoa' yežlio nga napa' yela' gwnabia' cont yezi'xena' xtolā' benachen'.

Nach gože' bene' xinja':

—Beyas, beyoa' xcamon' na' beyej ližo'.

⁷ Na' beyas bona', beze'e zjayde' liže'.

⁸ Na' bene' ca' besele'ede' can' goquen' besežebchgüe'. Na' gosonxene' Diosen' dan' be'e yela' guac che Jesúsen'.

Jesúsen' gwleje' Mateo cont goque' txen len le'

(Mr. 2:13-17; Lc. 5:27-32)

⁹ Na' Jesúsen' gwdie' latje gan' chi' Mateo chchixjue' impuesto. Na' cate' ble'ede' le' na' gože'ne':

—Da len neda'.

Na' gwzoža' Mateon' gwejlene' le'.

¹⁰ Ca' goquen' ba chi' Jesúsen' liž Mateon' ba che'ej chagüe' txen len zan bene' güechixjw na' len yebałe bene' güen da' xinj na' len bene' ca' zjanaque' txen len le'.

¹¹ Na' bene' fariseo ca' cate' besele'ede' chi' Jesúsen' txen len bene' ca', gose'e bene' ca' zjanaque' le' txen:

—¿Nacxechen' ben' chsed chlo'ede' le'e che'ej chagwlene' txen bene' güechixjw na' yebałe bene' güen da' xinj?

¹² Na' cate' Jesúsen' bende' xtiža'gaquen' na' gože' legaque':

—Bene' cbi chesacšene bitw cheseyažjde' bene' güen rmed. Bene' chesacšende', legaquen' cheseyažjde' bene' güen rmed.

¹³ Le šjased bi zeje Xtiža' Diosen' dan' nyojen žan: "Chaclaža' yeyaše' yeži'ilaže'le bene', gague con gotle beyixe' gonxenle neda'." Gague bene' ba zjanaque' bene' güen len Diosen' zedeneyoeda' cont yesyetinjde' xtolen', san bene' güen da' xinjen'.

Gosenabde' Jesúsen' bixchen' bene' ca' zjanaque' le' txen bi gosone' gwbas

(Mr. 2:18-22; Lc. 5:33-39)

¹⁴ Nach bene' ca' chesone' txen len Juan ben' bzo'e' bene' nis gosebigue' lao Jesúsen' na' gose'ene':

—Neto' na' len bene' fariseo ca' chonchguato' gwbas, perw bene' ca' zjanaque' le' txen bi chesone' gwbas. ¿Bixchen'?

¹⁵ Nach gož Jesúsen' legaque':

—¿Guac yesezoa bene' yela' güine' bene' chesaxe' to ga chac yela' güešagna' šlac ben' bšagnan' zoalene' legaque'? Še zoa ben' bšagnan' bi gac yesegüine'de'. Perw žin ža cate' bich soe' len legaque', cana'ch yesone' gwbas. Na' ca'cze naquen len neda' na' len bene' ca' zjanaque' neda' txen.

¹⁶ Nono zoa bene' chchine' lache' cobe cont yoda' xe' da' de'exo', le lache' coben' yeben' cate' chiben' na' chezan' lache'exon', na' gan' nchezan' gacchen da' xen.

17 Na' læcze neca zoa bene' chgue'e vino cobe lo' bzod yide'exo', le vino coben' chšon' yide'exon' na' lalje vino na' yesebiayi' chopen. San chesegue'e vino coben' lo' yid cobe cont bitw cuiayi' vinon' len yiden'.

Jesúsen' beyone' xi'in Jairo na' beyone' yeto no'ole bene' gwdane' xe'
(Mr. 5:21-43; Lc. 8:40-56)

18 Na' ne' choe'te Jesúsen' dižan', bžin to bene' gwnabia' bzoa xibe' lao Jesúsen' na' gože'ne':

—Za' gotte to xi'ina' no'ole. Yo'ošca xoa taco' yichjbe' cont yebambe'.

19 Na' gwzoža' Jesúsen' na' gwche'e bene' ca' zjanaque' le' txen ja'aclene' bene' gwnabian'.

20 Na' šlac zja'aque' liž bene' gwnabian' zej to no'ole nagüe' legaque', bene' ba goc šižinw iz chzoe' gwba'o', na' bene' byen gwbigue' cože' Jesúsen' gwdane' lox xen'.

21 Le bene' xbab lo' yichjlažda'ogüen', gwne': "Con še ba gwdana' xen' nach yeyacda'."

22 Na' gwyechj Jesúsen' ble'ede' no'olen', gože'ne':

—Bendiplažo' xi'ina'. Ba beyacdo' dan' chejnilažo' neda'.

Na' la' beyactede'.

23 Cate' bžin Jesúsen' liž bene' gwnabian' na' ble'ede' bene' zan zjaže' chesone' ššag chesebežchgüe' na' ba nita' bene' chosocuež bžejo par yosocuaše'be'.

24 Na' gože' legaque':

—Le yechoj ngale. Bi' no'ole daon' biña' gatbe', san chtasben'.

Na' bene' ca' bosoxiže' gosonle' che'.

25 Na' beyož bešaše' yogo'lo' bene' ca', nach gwoyo' Jesúsen', bexue' taca' bi' no'ol guaten', na' beyasbe'.

26 Na' ca' nac yela' guac dan' ben Jesúsen', gwxxoa diža' čhen yogo' yež dan' zjachi' do na'.

Jesúsen' beyone' chope bene' lchol

27 Cate' beza' Jesúsen' len bene' ca' zjanaque' le' txen, ja'aclen čhope bene' lchol' legaque' na' gosene' zižje:

—Le' naco' xi'in diaža che da' rey David, beyaše'laže'šca neto'.

28 Na' cate' Jesúsen' len bene' ca' zjanaque' le' txen besežine' yo'o gan' zjanite' na' besyeyo'e, na' læcze goso'o bene' lchol' ca'. Nach Jesúsen' gože' legaque':

—ČChejle'le guac gona' cont yele'ele?

Nach gose'ene':

—Chejle'to' Xanto'.

29 Nach Jesúsen' gwdane' yejlaogaquen', na' gože' legaque':

—Yele'ele, le chejnilaže'le neda'.

30 Nach besyeyac yejlaogaquen' besyele'ede'. Na' Jesúsen' gože' legaque' bicze yeso'e diža' can' goc besyeyac yejlaogaquen'.

31 Na' besyeya'aque' na' gate'tez ja'aque' doxen distritw Galilean' goso'e diža' ca' nac dan' ben Jesúsen' len legaque'.

Jesúsen' beyone' to bene' bi goc nie'

32 Na' cate' besyeya'ac bene' ca', la' besežinte bene' yoble zjanči'e to bene' bi goc nie', na' yo'o yaz da' xigüen' yichjlažda'ogüen'.

33 Jesúsen' bebeje' da' xigüen' na' la' benete bena'. Na' bene' zan besele'ede' can' goquen' besyebanchgüede', na' gosene':

—Chio' bene' Israel, da' nechon' za' ble'echo yela' guac dan' nac ca'.

³⁴ Perw na' bene' fariseo ca' gosene':

—Satanás dan' nac xan da' xigüe' ca' chaclenen le' cont chebeje' da' xigüen' zjajo'o zjanyaz yichjlaždao' bene'.

Jesúsen' cheyaše' cheži'ilaže'de' benachen'

³⁵ Na' Jesúsen' len bene' ca' zjanaque' le' txen ja'aque' to to yež na' to to ciuda da' zjachi' do na' bzejni'ide' bene' Israel lo' yodao' chegaque' ca', gwdixjue'ede' diža' güen can' nabia' Diosen' yichjlaždao' bene' yosozenag che'. Na' Jesúsen' beyone' bene' ca' chese'e bite'teze yižgüe' na' bite'teze da' chesac chegaque'.

³⁶ Na' ble'ede' ba besežag bene' zan na' beyaše' beži'ilaže'de' legaque', le goche'ede' chesacžejlaže' nac yesone' na' gague' no zoa yesaclen legaque' len yogo' dan' chesežaglaogüe'. Nite' ca nita' no xila' be nono de gwyoe legacba'.

³⁷ Nach gože' bene' ca' zjanaque' le' txen:

—Chyažje bene' zan yeseyixjue'ede' xtiža' Diosen', perw to chopga bene' nita' yeseyixjue'eden'. Na' bene' yosozenague' che Diosen' zjazaca'lebe' ca to coseš xen da' chyažjen yedoben.

³⁸ Da'n'an' le nabe Xancho Diosen' selja'che' bene' yesaclene' chio' yotobcho coseš chen'.

10

Jesúsen' gwleje' bene' šižinw ca' gosaque' txen len le'
(Mr. 3:13-19; Lc. 6:12-16)

¹ Jesúsen' botobe' bene' šižinw ca' zjanaque' le' txen na' bnežjue' legaque' yela' gwnabia' cont besyebje' da' xigüe' lo' yichjlaždao' bene', na' cont besyeyone' bene' bite'teze yižgüe' da' chese'ede' na' bite'teze da' chesac chegaque'.

² Quinga zjale bene' šižinw ca': Simón ben' lecze le' Pedro ben' goque' bene' blao, na' Andrés bene' biše' Pedroa', na' xi'in Zebedeon' Jacobo len Juan,

³ na' Felipe, na' Bartolomé, na' Tomás, na' Mateo ben' goc bene' güechixjw, na' Jacobo xi'in Alfeo, na' Lebeo ben' lecze le' Tadeo,

⁴ na' Simón ben' ben txen len partidw cananista, na' Judas Iscariote ben' bdie' Jesúsen' lo na' ben' besegue'ede' le'.

Jesúsen' gwsele' bene' šižinw ca' jasedixjue'ede' xtiža' Diosen'
(Mr. 6:7-13; Lc. 9:1-6)

⁵ Na' Jesúsen' gwsele' bene' šižinw ca' jasedixjue'ede' xtiža' Diosen', gože' legaque':

—Bitw šejle laž bene' cbi zjanaque' bene' Israel, na' neca šejle yež ca' zjachi' distritw Samaria.

⁶ Le šja'ac gan' že' bene' Israel bene' ba zjambiyi' dan' bitw na' yesombi'e Diosen'.

⁷ Le šja'ac le šjatixjue'ede' ba bžin ža Diosen' ben' zoa yaban' nabi'e yichjlaždao' bene' yosozenag che'.

⁸ Le yeyon bene' chesacsene, le yeyon bene' ca' chese'e yižgüe' dan' nzi' lepra, le yosban no bene' ba gosat, na' le yebej da' xigüe' ca' zjajo'o zjanyaz lo' yichjlaždao' bene'. Diosen' bibi bchixjue' le'e da' ba bene' le'e yela' guac chen' cont gonle da' quinga, da'n'an' le gaclen bene' na' bibi gwchixjwlene'.

⁹ Bitw gua'le mechw de oro, de plata o de cobre šlac co'ole nez.

10 Na' neca gua'le bzod, o yeto xcamisle, neca gua'le yel, na' neca goxe'le xis da' gw'chiše'le. Ca nac le'e chonle xšinan' zaca'le par gon bene' da' ye'ej da' gagwle gan' sela' le'ena'.

11 Na' gate'tez ciuda o yež ga žinle, le nab še zoa to bene' güen bene' yebede' gwlebe' le'e ližen'. Na' še gwlebe' le'e, na'teze soale. Cate'ch žin ža šejle ga yoble, cana'ch yeza'le.

12 Na' cate' žinle liže'na', le gwguape' tiox, na' le nabraže' soa cueze' binlo len yichjlažda'ogüe'.

13 Na' še nita' bene' chesaclaže' yesezoa yesebeze' binlo len yichjlažda'ogaquen', na' gac can' gwnabraže'le par yesezoa yesebeze' binlo. Perw še nono zoa bene' chesaclaže' yesezoa yesebeze' binlo len yichjlažda'ogaque', bi gac dan' ba gwnabraže'len'.

14 Na' še zoa ga bi yosolebe' le'e neca yosozenague' chele, cate' yeza'le na', le cuibe ni'alen' yo bište cont nacbja' bi checa'ale čegaque'.

15 Da' mal xen goson bene' ciuda Sodoma na' bene' ciuda Gomorra cani', perw da' li žia' le'e, cate' žin ža gac juisyw bene' ca' bi bosolebe' le'e ližen' yesale'chde' clel ca bene' Sodomman' na' bene' Gomorran'.

Gac da' saca'zi'cho

16 'Neda' sela' le'e šjatixjue'ele xtižan' len bene' ca' chesegue'ede' le'e. Zaca'leble ca xila' dao' ben' chja'ac gan' že' beco'yo. Da'nann' cheyała' gacle bene' yo'ochgua xbab na' bene' xenlaže' len legaque'.

17 Le gwsaca' len bene' ca' chesegue'ede' le'e. Nita' bene' yesone' le'e lo na' bene' gwnabia' ca' cont yesot yesejine' le'e lo' yodao' čegaquen'.

18 Nach lecze dan' chejnilaže'le neda' nita' bene' yeseče'exoxje' le'e do lao rey, do lao nochle bene' gwnabia'. Na' can' güe'lenle legaque' xtižan', lecze can' güe'lenle xtižan' len bene' bi zjanaque' bene' Israel.

19 Perw cate' yesezene' le'e na' yeseče'e le'e lao bene' ca', bi cuec yichjle nac yoži'ile xtiža'gaquen' o nacle nale. Lo hor na'teze Diosen' gwzejni'ide' le'e bin' cheyała' nale.

20 Le gague le'eczen' nele, san Spiritw che Xacho Diosen' gonen ga nale bin' cheyała' nale.

21 'Cana' bał benač yesečje' yesone' bene' biše' golje' lo na' bene' yesote' legaque', na' nita' bene' yesone' xi'ingaque' lo na' bene' yesot legacbe', na' nita' bene' yesone' xaxne'e lo na' bene' yesote' legaque'.

22 Yogo'ze bene' yeseque'ede' le'e dan' chejnilaže'le neda', perw note'tez le'e gwyo gwčhejlaže'le cont bi cuejyichjle dan' chejnilaže'le neda' žinten gatle, nach šjayzoale len Diosen'.

23 Še bene' že' to yež yosyolague' le'e, le yeza'teze na' yeyejle ga yoble. Bina' yeyož šjatixjue'ele xtižan' yogo' yež gan' že' bene' Israel ca' cate' yida' da' yoble, neda' naca' ben' gwseła' Diosen' golja' benač.

24 'Ca nac cate' to bene' chsede' len to maestrw, bitw nacho naque' bene' blaoch ca maestra'. Na' to mos bitw naque' blaoch ca xanen'.

25 Con cheyała' čazlaže' ben' chseda' še yežinlaže' gague' ca maestrw che' na' cheyała' čazlaže' mosen' še yežinlaže' gague' ca xanen'. Neda' naca' Xanle, na' bene' chesegue'ede' neda' chesene' chona' txen len Beelzebú dan' nac xan yogo' da' xigüe', na' naquechxe yesene' che le'e nacle neda' txen.

*Cheyała' žebcho castigw dan' gon Diosen' che bene' güen da' xinj
(Lc. 12:2-9)*

26 'Bitw žeble bene' bite'teze da' yesonde' le'e, le bitwbi de da' ngaše' da' nacho cbi gwlo'elaon, neca de da' nono na' neze da' nacho cbi yesenezden'.

27 Da' zan dan' chsed chlo'eda' le'e dan' bi chsed chlo'eda' yezica'chle bene'. Na' le'e le gwsed le gwlo'en yogo'lol bene', na' le gon cont bene' zan yesejni'den'.

28 Bitw cheyała' žeble bene' ca' yesot le'e. Legaque' bitw gac bi yesonde' yichjlažda'olen'. Cheyała' žeble Diosen', le len' nape' yela' gwnabia' cont gwžiaye'e cuerp chelen' len yichjlažda'olen' lo yi' gabilen'.

29 'Nezecho byine dao' ca' bitw bi zjazaca'techa', perw bitw nacho toba' gat sin cbi güe' Xacho Diosen' latje.

30 Na' ca' nac chio', chaquechgüe Diosen' chio' na' neztede' bal yiša' yichj to tocho žia.

31 Da'n'an', bitw žeble, le zaca'chle clcl ca' zan byin dao' ca'.

*Cheyała' güe'cho diža' len bene' ye'cho legaque' nombia'czcho Jesucriston'
(Lc. 12:8-9)*

32 'Na' note'teze bene' še cho'e diža' len benachen' che'ene' chejle'e chia', lecze ca' neda' gua' diža' len Xa' ben' zoa yaban' yapa'ne' bena' naque' neda' txen.

33 Na' note'teze bene' še cho'e diža' len benachen' che'ene' bitw chejle'e chia', lecze ca' neda' gua' diža' len Xa' ben' zoa yaban' yapa'ne' bena' bi naque' neda' txen.

*Yesedile bene' neche dan' bid Jesúsén'
(Lc. 12:51-53; 14:26-27)*

34 'Bitw gonle xbab bene' že' yežlio nga yesezoa yesebeze' binlo len lježgaque' na'a ba bida'. Bitw yesezoa yesebeze' binlo san yesedile'.

35 Lagüe dan' ba bida' yesedil bene' byo len xe' na' no'olen' len xne'e, na' yesedil xo'oliž no'ole len le'.

36 Bene' lo' yo'oze yesegue'e lježe'.

37 'Note'tez bene' še chaquechde' xe' o xne'e clcl ca' chacde' neda', bitw zaque' gone' txen len neda'. Lecze ca' še chaquechde' xi'ine' clcl ca' neda' bitw zaque' gone' txen len neda'.

38 Na' note'teze' še bi chzenague' chia' lagüe' dan' chacde' yosoči yososaca' bene' le', bitw zaque' cont gaque' neda' txen še ca'.

39 Note'teze bene' chacde' gone' cont bi či saque' o cont nono yesot le', benan' cuiayi'. Na' note'teze bene' chzanlaže' cuine' saca'zi'e o gate' ne chia' neda, ba de yela' mban che' toli tocane.

*Bene' ca' yesenita' mbalaz cate' yesyežine' yaba
(Mr. 9:41)*

40 'Note'teze bene' chosolebe' le'e chosolebe' neda', lecze chosolebe' Dios ben' gwsele' neda'.

41 Na' note'teze bene' yebede' gwlebe' bene' cheso'e xtiža' Diosen', mbalaz soe' cate' yežine' yaban' lecze ca' mbalaz soa ben' cheso'e xtiža' Diosen'. Na' mbalaz gac che bene' ca' cheson can' chazlaže' Diosen' caten' yesyežine' yaban'. Na' note'teze bene' yebede' gwlebe' legaque' da' chesone' can' chazlaže' Diosen', lecze mbalaz soe' caten' yežine' yaban'.

42 Note'teze bene' gwnežjue' la' to xiga'ze nis ye'ej bene' chejnilaže' neda', la' gwnežjuen' bene' bi naque' bene' blao, da' licze gona' cont soe' mbalaz caten' yežine' yaban'.

11

Juanna' gwsele' chope bene' zjanaque' txen len le' gan' zoa Jesúsen'
(Lc. 7:18-35)

¹ Cate' beyož ben Jesúsen' mandadw can' yeson bene' šižinw ca' gwleje' cont gosaque' le' txen, beze'e latjen'. Na' gwyeje' yež ca' zjachi' do na' jased jalo'ede' xtiža' Diosen' len bene' ca' že'na'.

² Juanna' ben' bzoe' bene' nis, cana' ba die' ližya. Na' bende' diža' che yogo' dan' chon Criston' ben' gwseła' Diosen' cont yedenabi'e. Nach Juanna' gwsele' chope bene' zjanaque' txen len le' gan' zoa Jesúsen',

³ jaseže'ne':

—¿Len' naco' ben' chbezto' seła' Diosen', še cheyała' cuezchto' yid bene' yoble?

⁴ Nach Jesúsen' gože' legaque':

—Le šjaya'ac na' le šjayež Juanna' doxen da' ca' ba ble'ele na' da' ca' ba benele.

⁵ Ba ble'ele chona' cont chesyel'e no bene' lchoł, na' chesyeda no bene' zjanxinj ni'e. Na' lecze bene' gose'e yižgüe' dan' nzi' lepra besyeyacde', na' chesyeyene no bene' cuež. Ba ble'ele bosbana' no bene' guat, na' ba benele choa' diža' güen chia' len bene' yaše' ca'.

⁶ Mbalaz zoa bene' chejle'e chia' na' bi chdebde'.

⁷ Na' cate' besyeya'ac bene' ca' zjanaque' txen len Juanna', nach Jesúsen' be'lene' bene' ca' zjandoben' xtiža' Juanna', gože' legaque':

—¿Nacxe nac ben' jale'ele latje dašen'? ¿Chaque' quil ca'ale? Bi naque' ca'.

⁸ ¿Nac naque' caten' jale'elne'? ¿Nyaze' lache' šägüe'? ¿še bitw? le bene' zjanyaz lache' šägüe' nite' yo'o güenchgua ca no liž bene' gwnabia'.

⁹ ¿Noxen' jale'ele'? ¿to ben' choe' xtiža' Diosen'? Da' li cho'e xtiža' Dios, perw žia' le'e, zaca'che' ca note'teze bene' choe' xtiža' Diosen'.

¹⁰ Che benga nyojen le'e Xtiža' Diosen', žan:

Neda' Dios seła' to bene' cuialagüe' laguo' güe'e xtižon' cont cate' šejo' ba zjanita' bene' yosozenague' chio'.

¹¹ Da' li žia' le'e notoch no benač na' soa bene' naquech bene' blao ca Juanna' ben' bzoe' bene' nis. Perw na' note'tez bene' chzenague' che Diosen' cont nabia' Diosen' yichjlažda'ogüen', la'czła' naque' bene' la'zelagüe bene' bibi zaca', ba chejni'ichde' chia' clel ca Juanna'.

¹² 'Gwzolaon caten' Juanna' gwdixjue'ede' xtiža' Diosen' na' bzoe' bene' nis na' chžinten na'a, bene' zan chesone' ga zelao chesezaquede' cont nabia' Diosen' yichjlažda'ogaque'.

¹³ Na' lecz gwzolaon cani'te bžinten cate' bla' Juanna' gwdixjue'ede' xtiža' Diosen', ley dan' bzoj da' Moisés na' dan' bosozoj yezica'chle bene' goso'e xtiža' Diosen' bzejni'in chio' che yela' gwnabia' che Diosen'.

¹⁴ Na' Xtiža' Diosen' dan' nyojen žan yid yeto bene' yedeyene' can' ben Elías ben' be' xtiža' Diosen' cani'. Che Juanna' žan ca', con še šejle'le.

¹⁵ Le'e žia nagle da' chene, le gwzenag xtiža'na'.

¹⁶ ¿No gwsaca'lebda' le'e zoale na'a? Gwsaca'lebda' le'e ca bidao' dan' bicze bi chlebele. Nacle ca bidaon' nita' gan' chac ya'a chese' lježbe'.

¹⁷ "Ba bcuežto' bžejo, neca bya'ale, na' ba bilyaše'to', neca gwchežle."

¹⁸ Juan ben' bzoe' bene' nis bide' laole nga, bitw güe'ej gwdagwšägüe' can' chese'ej chesagw bene' yoble, nach gwnale che': "Yo'o yaz da' xigüen' yichjlažda'ogüe'."

¹⁹ Na' neda', Diosen' gwsele' neda' golja' beṇaḥ, na' chle'ele che'ej chagua' can' chese'ej chesagw beṇe' yoble, na' žale čhia' naca' beṇe' lia na' beṇe' borrašw. Na' lece žale čhia' naca' xmigw bene' güečixjw ca' na' xmigw yezica'chle beṇe' güen da' xinj. Perw nachbia' yela' sina' che Diosen' dan' naptō' naquen da' güen, le ba ble'eczele can' chon neto' naptōn'.

Yež ca' gan' bitw bosozenague' che Jesúsen'

(Lc. 10:13-15)

²⁰ Nach Jesúsen' be'e xtiža' beṇe' ca' že' yež ca' gan' bene' da' zan da' zaca' yesyebande', na' gwdile' legaque' dan' bitw besyetingjde' xtoła'gaquen'. Nach gwne':

²¹ —jNyaše'chguaze gac che le'e beṇe' Corazín! jNyaše'chguaze gac che le'e beṇe' Betsaida! Beṇe' ca' nita' Tiro na' Sidón ba besyetingjde' xtoła'gaque' šaca' blo'egacda'ne' yela' guac čhia' ca dan' ba blo'eda' le'e. Na' bosose'e ca gosone' šaca' bena' ca', chesazlje' to lache' gasj da' naquen zeše' na' chosože'elja cuine' no de cont yesacbe'e beṇe' ba boša' yičhjažda'ogaquen'.

²² Žia' le'e, saca'zi'chle clcl ca beṇe' že' Tiro na' Sidón cate' žin ža gac juisyw.

²³ Na' le'e nita'le Capernaum chonle xbab šeca Diosen' gone' gacxenchgualc cate' yežinle yaba gan' zoe'na'. Bi gone' ca', san selež' le'e lo yi' gabil. Šeca' bena' da' zaca' yesyebane beṇe' ca' gwnita' Sodomān' can' ba bena' laole nga, zesyetingjde' xtoła'gaquen', na' ne' čhi' ciudan' šeca'.

²⁴ Žia' le'e, galež'chle clcl ca beṇe' Sodomān' cate' žin ža gac juisyw.

Beṇe' ca' yesejnilaže' Jesúsen' nite' mbalaz

(Lc. 10:21-22)

²⁵ Nach Jesúsen' boł güiže' Diosen', gwne':

—Xa', le' naco' Xan yežlio nga na' Xan yaba, chnabi'o doxen. Na' chona' yela' choxcen čhio' ba bzejni'ido' bał beṇe' diža' güen čhio' quinga. Bzejni'ido' beṇe' ca' gosacbe'e cheseyažjde' no gwsed gwlo'e legaque'. Na' bitw bzejni'ido' beṇe' ca' cheson xbab zjanaque' beṇe' sina' na' beṇe' zjanejni'.

²⁶ Beno' ca' Xa', le can' gwnalažo'.

²⁷ Na' gože' beṇe' ca' že'na':

—Xan' ba bene' lo na' gona' cont chombia' beṇe' le'. Le' nombia'yane' neda', na' neda' nombia'yana' le'. Na' beṇe' ca' ba gwleja' ba zjanombi'e Xan'. Na' noch no zjanita' beṇe' zjanombi'e Xan', ne neda' ca zjanombi'e.

²⁸ Le'e chjaḡaque'laže'le na' chacyaše'laže'le da' chaquele nac gonle cont soale binlo len Diosen', chata'yoeda' le'e, le šejnilaže' neda'. Neda' gona' ga soale mbalaz.

²⁹ Le gwzenag čhia' na' gwzejni'ichda' le'e. Neda' naca' beṇe' xenlaže' na' beṇe' šagüe' na' gona' ca soale mbalaz lo' yičhjažda'olen'.

³⁰ Dan' žia' cheyała' gonle bitw naquen zed, na' can' chsed chlo'eda' bitw naquen zdebe.

12

Ža che Dios bene' ca' zjanaque' Jesúsen' txen goselečhje' trigon' da' gosagüe'
(Mr. 2:23-28; Lc. 6:1-5)

¹ Ca tiempen' gozac to ža che Diosa' cate' Jesúsen' gwdie' len beṇe' ca' zjanaque' le' txen gan' nyaž trigw. Nach beṇe' ca' gosedone', na' goselečhje' dao che trigon' cont gosagüe' xsenna'.

² Na' besele'e beṇe' fariseon' can' gosone', na' gosi'e Jesúsen':

—Gwṇašc ḷbixčhen' bene' ca' zjanaque' le' txen chesone' žin da' bi de ḷsens goncho ža čhe Dios?

³ Na' Jesúsen' gože' ḷegaque':

—ḷBiṇa' gwlable can' ben da' rey Davin' to ža cate' ḷe' na' bene' ḷježe' ca' gosedone'?

⁴ Gwyo'o Davin' ga nac liž Dios na' gwdagüe' yetextil da' nac čhe Dios da' bi chac gawgw bene' bi nac bḷoz, na' ḷecze bnežjue' čhe bene' zja'ac len ḷe'.

⁵ Na' ḷbiṇa' gwlable ḷe'e ley dan' bzoj da' Moisés gan' žan bḷoz ca' chesoncze' mandaw čhe yodao' blaon' yogo' ža čhe Diosen'? Na' bitw nacho zjanape' doḷa' dan' chesone' žin ža čhe Diosen'.

⁶ Žia' le'e, neda' zoa' nga zaca'cha' clcl ca' yodao' blaon'.

⁷ Xtiža' Diosen' dan' nyojen žan: “Chaclaža' yeyaše' yeži'ilaže'le bene', gague con gotle beyixe' par gonxenḷe neda'.” Šaca' chejni'ile bi zejenna' žan ca', bilja nale bene' quinga zjanape' doḷa', ḷe bibi da' mal chesone'.

⁸ Žia' le'e, naquen' ḷo na' nia' bi da' nac güen goncho cate' nac ža čhe Diosen', neda' naca' ben' gwseḷa' Diosen' golja' benačh.

Beyac to bene' nḷo'on šḷa'a taque'
(Mr. 3:1-6; Lc. 6:6-11)

⁹ Na' cate' Jesúsen' beze'e latjen', na' gwyo'e to ḷo' yodao' čhe čchio' bene' Israel.

¹⁰ Na' ḷo' yodaon' zoa' to bene' nḷo'on šḷa'a taque', nach bene' fariseo ca' gose'e Jesúsen':

—ḷDe ḷsens yeyoncho bene' xinj ža čhe Diosen'?

Gose'ene' ca' cont de da' yosode'ede' yesagüe' xya.

¹¹ Nach Jesúsen' gože' ḷegaque':

—Še nita' xila' dao' čhele na' lažo' toba' to ḷo' yechw zitjw ža čhe Diosen' cate' bi de ḷsens goncho žin, ḷcbi ḷa' yebejteleba' ḷo' yechon' ḷo žana'?

¹² Da'na'na' žia' le'e de ḷsens gaclencho bene' ža čhe Diosen'. ḷe zaca'ch to bene' clcl ca' to xila' dao'.

¹³ Nach Jesúsen' gože' ben' nḷo'on taque'na':

—Bḷi naon'.

Na' bḷien' na' taquen' beyaquen binḷo can' nac dan' yešḷa'a.

¹⁴ Nach bene' fariseo ca' besyežaše' yodaon' na' bosoxi'e nacle yesone' yesote' Jesúsen'.

To dan' bzoj da' Isaías čhe Jesúsen'

¹⁵ Goche'e Jesúsen' can' bosoxi'a bene' fariseo ca' na' gwze'e gwyeje' ga yoble. Bene' zan ja'aclene' ḷe', nach beyone' yogo' bene' ca' chesacšene.

¹⁶ Na' bene' mandaw nono yesoe'lene' diža' non' beyon ḷegaque'.

¹⁷ Bene' ca' cont goc can' ža Xtiža' Diosen' dan' bzoj da' Isaíasen', žan:

¹⁸ Bengan' naque' xmosa', ben' gwleja' cont gone' can' chazlaža'.

Chacchgüeda' ḷe', na' chbeda' čhe'.

Na' neda' seḷa' Spiritw čhian' soateze soan len ḷe'.

Na' čhixjue'ede' yogo'ḷoḷ bene' can' chazlaža' yesone'.

¹⁹ Bitw gacyože' len bene', neca yosye'e,

na' neca nie' zižjo ḷo nez cont yesene bene' bin' že'.

²⁰ Bi gwzoe' ca'ale bene' chesejnilaže' ḷe' late' lasze.

Soe' gaclene' ḷegaque'.

Nach žin ža gone' cont gac con da' zej to ḷicha ḷo yežlion'.

²¹ Na' bene' že' yogo' naciónna' yesebeze' gaclene' ḷegaque'.

*Gosene' Jesúsen' bebeje' da' xigüe' len yela' guac che Beelzebú
(Mr. 3:19-30; Lc. 11:14-23; 12:10)*

²² Na' zoa to beñe' lchol' na' neca goc ñie', na' yo'o nyaz da' xigüe' yichjlažda'ogüe' na' jasesane'ne' lao Jesúsen'. Na' Jesúsen' bebeje' da' xigüen' yo'o nyaz yichjlaždao' ben' na' la' bele'etede' na' gocte beñe'.

²³ Na' yogo' beñe' ca' besele'ede' can' goca' besyebanchgüede'. Nach gose'e lježe':

—¿Nac benga ben' chbezcho yide' lao diaža che da' rey David?

²⁴ Perw cate' beñe' fariseo ca' gosende' diža' quinga gosene':

—Bitwbi yela' guac nap benga. Le Beelzebú dan' nac xan da' xigüe' ca' chaclenen le' cont chebeje' da' xigüe' zjajo'o zjanyaz yichjlaždao' beñe'.

²⁵ Gocbe'e Jesúsen' can' goson beñe' fariseo ca' xbaden', nach gože' legaque':
—Note'teze gobiern še choje' chop šon cuen na' yeyoža' yesedile' legacze', cuiayi' gobierna'. Na' lecze še beñe' že' bite'teze yež yesaque' chople na' yesedile' legacze', lecze bi sibia' yež chegaquen' še ca'. Na' še beñe' lo' bite'teze yo'o yesechoje' chople na' yesedile' legacze', gague sša yesenite' txen.

²⁶ Lecze ca' še Satanásen' yebejen yeto da' xigüe' yo'o nyaz yichjlaždao' beñe', cuiayi' yela' chnabia' čhen, le chdillen cuinen še ca'.

²⁷ Le'e žale Beelzebún' chaclenen neda' cont chebeja' da' xigüe' ca'. Šaca' naquen can' žalen', lecze zejen Beelzebú dan' chnabia' da' xigüen' chaclenen beñe' lježe chesybeje' da' xigüe' zjajo'o zjanyaz yichjlaždao' beñe'. Na' beñe' lježe ca'ze chosolo'e clelen' chnele.

²⁸ Spiritw che Diosen' chonen neda' yela' guac cont chebeja' da' xigüe' ca', na' da' chona' ca' chlo'en ba bžin ža nabia' Diosen' yichjlaždao' beñe' yosozenag čhe'.

²⁹ ¿Nac gac šo' beñe' gwban liž to beñe' gual na' que'e bi da' de che' še bi zgua'tec gwčheje' beñe' guala? Lete gone' ca' nach gac que'e bi da' de che'.

³⁰ Beñe' bi chone' neda' txen, chone' contr neda'. Na' beñe' bi chaclene' cont yosozenag beñe' yoble čhia', zeje diža' chone' par bi yosozenague' čhia'.

³¹ Da'n'an' žia' le'e, yogo' da' xinj da' chon benač, na' yogo' diža' bya' dan' chesene' che Diosen', Diosen' yezi'xene' čhen, perw note'teze beñe' čne' yela' ya' che Spiritw che Diosen', gwbat yezi'xen Diosen' che'.

³² Na' note'teze beñe' še ne' yela' ya' čhia' neda' naca' ben' gwseła' Diosen' golja' benač, Diosen' yezi'xene' che', perw note'teze beñe' še ne' yela' ya' che Spiritw che Diosen', gwbat yezi'xen Diosen' che' na'a na' bate'teze.

*Diža' da' güe'cho chlo'en bin' yo'o lo' yichjlažda'ochon'
(Lc. 6:43-45)*

³³ 'Ca' nac yag frut ca', yag dan' nac yag güen, frut güencze chbian, na' yag da' bi nac yag güen, lecze frut da' bi nac güen chbian. Con can' nac da' chbia to to yaguen' nezecho bi yaga'.

³⁴ Na' ca'czen' nac len le'e nacchgualo beñe' zgot na' beñe' gwxiye'. Bitw gac güe'le diža' šagüe' dan' nacle beñe' laždao' xi'a. Le yogo'te diža' da' chchoj cho'achon', lo' yichjlažda'ochon' na' za'aquen.

³⁵ To beñe' laždao' xilaže' cho'e diža' šagüe', le can' nac lo' yichjlažda'ogüe' nan' cho'e dižan'. Na' to beñe' laždao' xi'a cho'e diža' xi'a, le can' ža lo' yichjlažda'ogüen'.

³⁶ Na' žia' le'e, cate' žin ža gon Diosen' yesežaglao yogo' beñe' cheson da' xinj toli tocane, cana' yogo'lo' beñe' yosodie' cuent che yogo' diža' dan' ba goso'e da' bitwbi jazacan'.

³⁷ Na' con ca diža' dan' choe'le, Diosen' choglagüen' chele še naple doła' o še bi naple doła'.

Beñe' bi bosozenag che Diosen' gosēnabe' gon Jesúsēn' to yela' guac
(Mr. 8:12; Lc. 11:29-32)

³⁸ Nach bał beñe' ca' chososed chosolo'e dan' bzoj da' Moisés, na' beñe' fariseo ca' gose'e Jesúsēn':

—Maestrw, chaclaže'to' gono' to yela' guac da' le'eto' cont nezeto' še da' licze Diosa' gwsele' le'.

³⁹ Nach Jesúsēn' gože' legaque':

—Le'e zoale na'a nacchgualē beñe' laždao' xi'a na' ba gwlejiyichje Diosen'. Na' chnable gona' yeto yela' guac da' le'ele cont nezele še Diosa' gwsele' neda', perw bi gona' can' chñablēna', le ba ble'ele da' ca' chona'. Dan' gon Diosen' len neda' cont nezele le'na' gwsele' neda' naquen ca da' bene' len da' Jonás ben' be' xtižen' cani'.

⁴⁰ Cate' za' šej Jonásēn' Nínive, Diosen' bene' cont to beł xen be yo'o lo' nisdaon' gwdebbā' le' na' šone ža šone yel gwyo'e lo' le'eban'. Na' ca nac neda', gata' na' gaša', na' yeyoža' šo'a lo' ba šone ža šone yel.

⁴¹ Na' cate' žin ža gon Diosen' cont yogo' beñe' cheson da' mal yesežaglagüe' toli tocañe, žana' beñe' Nínive beñe' ba gosat yedesečiše' le'e mbanle na'a lao Diosen', le legaque' besyētinjde' xtolen' cate' da' Jonásēn' gwđixjue'ede' xtiža' Diosen' len legaque'. Na' neda' zoa' nga naccha' beñe' blao clēl ca da' Jonásēn', na' bitw chzenagle chia'.

⁴² Na' lecze žana' cate' gon Diosen' cont yogo' beñe' cheson da' mal yesežaglaogüe' toli tocañe, da' no'olen' gwnabia' beñe' Seba ca' yedecüše' le'e mbanle na'a. Le le'na' gwze'e Seba gan' nac zito'chgua na' bide' nga cont bzenague' diža' sina' dan' be' da' rey Salomón. Na' neda' zoa' nga naccha' beñe' blao clēl ca da' rey Solomónna', na' bitw chzenagle chia'.

Da' xigüēn' cheyo'on da' yoble lo' yichjlaždao' bene'
(Lc. 11:24-26)

⁴³ Na' še to da' xigüe' da' yo'o nyaz lo' yichjlaždao' beñe' yechojen, nach lažen nile nale yeyiljon ga soan mbalaz. Na' še bibi latje želen, nach nan:

⁴⁴ "Da' yoble šjayo'a lo' yichjlaždao' ben' gan' ba gwyo'a." Nach yeyejen da' yoble gan' zoa ben'. Cate' le'en bačh beyacde', na' ba zoache' binlo, na' gague no yo'o nyazech yichjlažda'ogüe' da' gwžon yeyo'on da' yoble,

⁴⁵ nach šjajyoben yegaže da' xigüe' da' zjanaquech mal ca len, na' txen yeso'on lo' yichjlažda'ogüēn'. Na' še ba gosonen' ca', na' gaguech mal che bēna' clēl ca goc che' cana'. Can' goc che bēna', lecze ca' gac che le'e mbanle na'a dan' nactele beñe' laždao' mal.

Xna' Jesúsēn' len beñe' biše' ca' besežine' ga zoe'
(Mr. 3:31-35; Lc. 8:19-21)

⁴⁶ Ne' choe'te Jesúsēn' diža' len beñe' quinga, cate' bžin xñe'e len biše' ca'. Gosaclaže' yeso'e yeso'e'lene' le' diža' na' beñe' zan nita' lagüe' na'ate.

⁴⁷ Beñe' ca' že' na', toe' gože' Jesúsēn':

—Xna'o len beñe' bišo' ca' zjanite' chy'o'o na' chesaclaže' yeso'e'lene' le' diža'.

⁴⁸ Nach Jesúsēn' gože' le':

—¿Nezele no nac xña'a na' no zjanac biše' lježa'?

⁴⁹ Nach bli ne'e blo'e beñe' ca' zjanaque' le' txen na' gože' bēna':

—Beñe' quinga zjanaque' xña'a na' zjanaque' biše' lježa'.

⁵⁰ Le note'teze bene' chone' da' chnalaže' Xa' Diosen' ben' zoa yaban', bena' nac bene' biša', bene' zana', lecze naque' xna'a.

13

Jempl che bene' goz trigon'

(Mr. 4:1-9; Lc. 8:4-8)

¹ Na' lo žana' gwza' Jesúsen' yo'o gan' zoen' jači'e cho'a nisaon'.

² Nach catec bene' zan juisyw besedobe' gan' chi'en' na' benten byen gwyo'e gwchi'e to lo' barcw. Na' yogo' bene' ca' besedoben' gosenite' cho'a nisaon' ga nac yo biž.

³ Nach da' zan da' bsed blo'e Jesúsen' legaque' len jempl da' bi'e. Na' be'e to jempl, gwne':

—To bene' güen žin jeze' trigw,

⁴ na' šlac zej chose' trigon' late' bin che trigw dan' chazen' jasechazen chanez, nach be ca' žia xil be chaš le'e yaba gosagwban'.

⁵ Yelaten' jasechazen ga nac lo yej ga bibi yotec zoa, na' da' nga byob blan' le bi jasechazen ga nac sitjw.

⁶ Perw na' cate' bla' gwbiža' na' bzeyen len na' gosebižen, le gague zjajo'otec loenna' sitjw.

⁷ Yelaten' jasechazen ga nac lo yag yeše', na' yag yešen' gosecha'on na' bosololen len.

⁸ Perw na' yelaten' jasechazen ga nac yo šagüe' na' beselan'. Na' balen' gosebjan to gayoa güeje to ton, na' yebalen gosebjan gayon güeje, na' yebalen šichoa güeje.

⁹ Le'e žia nagle da' chene, le gwzenag xtižan'.

Jesúsen' be'e diža' bixchen' bzejni'ide' bene' jempl

(Mr. 4:10-12; Lc. 8:9-10)

¹⁰ Nach bene' ca' zjanaque' Jesúsen' txen gosebigue' lagüen', na' gose'ene':

—¿Bixchen' chsed chlo'edo' bene' quinga len jempl?

¹¹ Na' gož Jesúsen' legaque':

—Nono na' neze can' nac yela' gwnabia' che Diosen', na' ba chone' cont le'e chejnlaže'lene' nezelen. Perw bi chon Diosen' ca' len bene' bi chesaclaže' yesejnlaže'ne'.

¹² Note'teze bene' chosozenague' xtiža' Diosen', gwzejni'ich Diosen' legaque' cont šanch dan' yesejni'ide'. Perw na' note'teze bene' bi chosozenague', da' daon' ba zjanezde', yeca'a Diosen' len.

¹³ Da'n'an' chsed chlo'eda' bene' quinga len jemplen', le chesele'ede' dan' chona' perw bitw chesache'ede' bi zejen, na' chesende' xtižan' perw bitw chesejni'iden'.

¹⁴ Len bene' quinga ba chac can' bzoj da' Isaías, žan:

Da' li yenele, perw bitw šejni'ile bi zeje dan' yenelen'.

Na' da' li le'ele, perw bi gache'ele bi zejen dan' le'elen'.

¹⁵ Nacle bene' güedenag na' bačh natcze yičhjlážda'olen'.

Bi chazlaže'le gwzenagle dan' chenele na' dan' chle'ele;

con nacle bene' güedenag.

Šaca' bi nacle bene' güedenag, šejni'ile bi zejen dan' chenele na' dan' chle'ele.

Nach yetinjele xtoła'le cont yeca'an na' yocoba' yičhjlážda'olen'.

¹⁶ Perw le'e nacle neda' txen, leca mbalaz zoale dan' chle'ele da' ca' chona' na' chacbe'ele bi zejen, na' chzenagle xtižan' na' chejni'ilen.

17 Da' li žia' le'e, zan da' bene' ca' gosoe' xtiža' Diosen' cani' na' zan da' bene' ca' yezica'chle bene' bosozenag che Diosen' cani', gosaclačže' chgüe' yesele'ede' dan' chle'ele na'a, perw bitw goła' yesele'eden'. Na' gosaclačže' chgüe' yesende' dan' chenele na'a, perw bitw goła' yesenden'.

Jesúsen' bzejni'ide' bi zejen jempl che ben' goz trigon'

(Mr. 4:13-20; Lc. 8:11-15)

18 Na' le gwzenag, quinga zejen jempl che ben' goz trigon'.

19 Ca dan' byažen zejen xtiža' Dios da' chzejni'i che yela' gwnabia' che'. Na' biñ dan' beselažo' chanezen', zejen bene' ca' chesende' xtiža' Diosen' perw bi chesejni'iden'. Na' ca cheyoža' chžin gwxyien' chebejen xtiža' Diosen' lo' yichjlažda'ogaquen'.

20 Na' biñ dan' beselažo' ga nac lo yej na' bi ben loen, zjanaquen ca bene' la' chesyebetede' xtiža' Diosen' cate' chesenden',

21 perw zjanaque' ca da' bibi loe chontec, šložga chesejle'e che xtiža' Diosen', na' cate' chac bi da' mal chegaquen' o cate' cheseque'e bene' legaque' dan' chosozenague' xtiža' Diosen', la' chesebejyichjte' xtižen'.

22 Na' biñ dan' beselažon' ga nac lo yag yeše', zejen ca bene' ca' ba zjanende' xtiža' Diosen', perw šlac zjambane' chesyelał chesyžejde' na' da' chesaclačže' yeseñi'e chziye'en legaque'. Yogo' da' qui bi choen' latje yega'an xtiža' Diosen' lo' yichjlažda'ogüen', na' da'nan' bi chesejnilaže' le' ca cheyala'.

23 Na' biñ dan' beselažo' lo yo šagüe' zejen ca bene' chesende' xtiža' Diosen' na' chesejni'iden' na' chosozenaguen'. Balen gosebjan to gayoa güeje, na' yebalen gosebjan gayon güeje, na' yebalen šichoa güeje.

Jempl che trigon' na' yiže'

24 Na' gozoe'len Jesúsen' bene' ca' yeto jempl, goze'e legaque':

—Yela' gwnabia' che Diosen' ben' zoa yaban' zaca'leben ca dan' goquen' cate' to bene' jeze' trigw lo yežlio che'na'.

25 Na' do šeže'le gwyej to bene' chgue'e le' šlac chesetas bene' ca' yezica'chle na' jeze' xsa yiže' gan' ba naz xan yežlion' trigon', nach beze'e.

26 Na' to š'i'ize trigon' len yiže' ca' beselan', na' trigon' gwzolao chbian.

27 Na' bene' güen žin che xan yežlion', cate' gosache'ede' nach jaya'aque' gan' zoa xangaque' jasyeyeže'ne': "Bene', žgague biñ trigon' goz yežlio chion'? žBixchen' nchixen len yiže'?"

28 Nach xangaquen' gože' legaque': "To bene' chgue'e neda' jen ca'." Nach xmosen' gose'ene': "žChe'ndo' lažo'to' yixen'?"

29 Na' gože' legaque': "Bitw lažo'len. Le xož lažo'le lente trigon'.

30 Jaseyenna'. Guac yesecha'on t xen. Na' cate' ba gole' yotoble cosešen', cana' gona' mandadw zgua'tec lažo'le yixen' na' gonlen manoj cont yeseyen. Nach šjaytoble trigon' co'ošagüe'len."

Yela' gwnabia' che Diosen' naquen ca biñ che xomdas

(Mr. 4:30-32; Lc. 13:18-19)

31 Nach gozo'e yeto jempl, gozne':

—Šanch bene' yosozenag che Diosen' cont nabi'e yichjlažda'ogaque'. Da'nan' yela' gwnabia' che Diosen' ben' zoa yaban' zaca'leben ca to biñ che xomdas dan' goz to bene' yežlio chen'.

32 Biñ che xomdasen' chnabia' nac da' dao' len biñ ca' chazcho. Perw na' cate' chlan' chcha'ochen ca bichle yiže' cuan na' chaquen ca to yag cha'o, nach byiñ dao' ca' chjasen ližda'ogacba' lo xozenna'.

*Yela' gwnabia' che Diosen' naquen ca levadura
(Lc. 13:20-21)*

³³ Nach gozoe' Jesúsen' yeto jempl, gozne':
—Yela' gwnabia' che Diosen' ben' zoa yaban' zaca'leben ca levadura dan' gwlec no'ólen' len to rob yejz cont gwcha'o doxenen.

*Jesúsen' bzejni'ide' bene' len jempl
(Mr. 4:33-34)*

³⁴ Yogo' da' quinga bsed blo'e Jesúsen' bene' ca' besežag gan' zoe'na'. Bsed blo'ede' legaque' be'e jempl, bitwbi bzejni'ide' legaque' sin ca be'e jempl.

³⁵ Bene' ca' cont goc can' bzoj da' bene' be' xtiža' Diosen' cani', žan:
Gwsed gwlo'egacda'ne' len jempl,
na' yapegaca'ne' dan' nono na' neze da' ba ngaše' cate' gwxete yežlion'.

Jesúsen' bzejni'ide' bi zeje jempl che trigon' na' yixen'

³⁶ Nach beyož bsed blo'e Jesúsen' bene' ca' zjaže' na', beze'e txen len bene' ca' zjanaque' le' txen jaya'aque' yo'o gan' nite'na'. Na' cate' ba besyeyo'e lo' yo'on' bene' ca' zjanaque' le' txen gosebigue' cuite'na' gose'ene':

—Bzejni'išque neto' bi zejen jempl che trigon' na' yixen'.

³⁷ Nach Jesúsen' gože' legaque':

—Quinga zejen: Diosen' gwsele' neda' golja' benač na' zaca'lebda' ca ben' goze' biñ che trigon'.

³⁸ Na' doxen yežlio nga zaca'leben ca pedas yežlio gan' goze' trigon'. Na' bene' ca' chosozenague' che Diosen' cont nabi'e yichjlažda'ogaque' zaca'lebde' ca biñ che trigon'. Na' bene' ca' chosozenague' che Satanás dan' chnabia' da' xigüe' ca' zjazaca'lebde' ca xsa yixen'.

³⁹ Satanásen' zaca'leben ca bene' chxi'a ben' goze' xsa yixen'. Na' žan' gac juisyw zaca'leben ca žan' yosyotobe' trigon'. Na' angl ca' zaca'lebegaque' ca bene' ca' yosyotobe' cosešen'.

⁴⁰ Na' can' šey yixen' yosyotoben', can' gac che bene' ca' chosozenag che Satanásen' cate' žin ža gac juisyon'.

⁴¹ Diosen' gwsele' neda' golja' benač na' cate' žin ža, neda' sela' angl chia' ca' cont yosyotobe' yogo' bene' ca' chesežo'oyele' bene' yoble yesone' da' mal na' lecze yosyotobe' yezica'chle bene' cheson da' mał. Na' angl ca' yesyebje' legaque' cont bich yesenite' txen len bene' ca' chosozenague' che Diosen' cont nabi'e yichjlažda'ogaquen'.

⁴² Nach yesyesele' legaque' lo' yi' gabił gan' yeseye' toli' tocañe. Na' yesyebže'yaše' yesagwxetje laye' tantw yesyēžaglaochgüe'.

⁴³ Cana'ch Xačo Diosen' gone' cont bene' ca' cheson da' güen nite' len le', le zjanaque' xi'ine' na' yesaque' ca be'ni' che gwbižen' cate' yesyēžine' yaban' gan' zoa Diosen' chnabi'e. Le'e žia nagle da' chene, le gwzenag xtiža'na'.

Jempl che mechw xen dan' ngaše' lo' yo

⁴⁴ Yela' gwnabia' che Diosen' ben' zoa yaban' naquen ca to mechw xen dan' ngaše' lo' yo. To bene' bželde' mechw xen da' ngaše' to lo' yežlio. Nach bocašen' da' yoble lecze na'ze na' chebechgüede' beze'e jayete' yogo'loł bi da' de che' cont gwxi'e yežlion' gan' ngaše' mechua'.

Jempl che to perla da' zaca'chgua

⁴⁵ Na' yela' gwnabia' che Diosen' ben' zoa yaban', lecze zaca'leben ca da' nga goc. Zoa to comerciant bene' cha'o perla dan' zjanacchgua xdan.

⁴⁶ Na' bželde' to perla da' leca zacan'. Na' beyote' yogo'loł bi da' de che' na' gwxi'e perlan'. Ca'czen' zaca'lebe bene' ca' chesache'e zaca'chguan yosozenague' che Diosen'.

Jempl che yixjw bel

⁴⁷ Na' yela' gwnabia' che Diosen' ben' zoa yaban' zaca'leben ca da' nga goc. Gwnita' bał bene' gwxcen bel na' bosozale' yixjw bel chegaquen' lo' nisdaon' na' gwxcen zan cuen bel.

⁴⁸ Nach cate' ba gwža' lo' yixjon', besyebejen' yo biž, na' gosebie' be ca' zjanac güen par yesagüe' na' gosegüe'eba' lo' žome. Na' be ca' bi zjanac güen, gosecho'one'ba'.

⁴⁹ Ca'czen gac che yogo' bene' cate' žin ža te che yežlion'. Angl ca' yesebeje' bene' mal ca' ladjo bene' ca' zjanaque' bene' güen lao Diosen'

⁵⁰ na' yosozale' legaque' lo yi' gabił gan' yesebežyaše' na' yesagwxejte laye' dan' leca yesežaglagüe'.

Xtiža' Diosen' dan' byoj cani' len da' chsed chlo'e Jesúsen'

⁵¹ Nach Jesúsen' gože' bene' ca' zjanaque' le' txen:

—žZyejni'ile yogo' da' ca' ba blo'eda' le'e?

Nach gose'ene':

—Zyejni'iton'.

⁵² Nach gož Jesúsen' legaque':

—Note'tezle še chac chsed chlo'ele Xtiža' Diosen' dan' byoj cani', še lecze chzenagle can' chsed chlo'eda' che yela' gwnabia' che Diosen', nachen' zaca'lebe ca to xan yo'o bene' nape' yogo'loł da' zaca' dan' chyažj chchinde', bałen zjanaquen da' cobe na' bałen zjanquen da' gole.

Bene' yež Narzaret bi gosejle'e che Jesúsen'

(Mr. 6:1-6; Lc. 4:16-30)

⁵³ Nach cate' beyož be' Jesúsen' jempl ca', beze'e latjen' len bene' ca' zjanaque' le' txen

⁵⁴ jaya'aque' laže'. Na' jaysed jaylo'ede' bene' gualaž che' ca' lo' yodao' chegaquen'. Na' leca besyebande' len xtižen' na' gose' lježe':

—žGa jasede' yela' sina'? na' žnacxečen' chac chone' yela' guac ca'?

⁵⁵ Nombia'chone', le naque' xi'in ben' chonšagüe' yag. Na' xne'ena' lie' María, na' Jacobo, José, Simón na' Judas zjanaque' bene' biše'.

⁵⁶ Na' lecze bene' zane' ca' nite' lažcho nga. žNacxe chaquen' cho'e diža' ca' na' chacte' chone' yela' guac?

⁵⁷ Na' dan' gosone' xbab nac Jesúsen' con to bene' gualaž chegaque', bi gosaclaže' yesejle'e che'. Na' gož Jesúsen' legaque':

—Yogo'ze bene' chonla'añe' bene' choe' xtiža' Diosen', perw bene' gualaž che' na' bene' lo' yo'o che' bi chesonla'añe' le'.

⁵⁸ Na' to chopze yela' guac ben Jesúsen' Nazareten' dan' bitw gosejle'e che'.

14

Quingan' goc gosote' Juan ben' bzoa bene' nis

(Mr. 6:14-29; Lc. 9:7-9)

¹ Na' ca tiempen' Herodes ben' naque' gubernador che distritw Galilean', bende' diža' ca nac yogo'loł dan' chon Jesúsen'.

² Nach gože' xmose' ca':

—Bengan' da' Juanna', ben' bzoa bene' nis. Ba bebane' ladjo bene' guat ca', da'nan' chaque' chone' yela' guac.

3-4 Herodesen' gwne' ca' dan' bene' mandadw gosote' da' Juanna'. Quingan' goc: Herodesen' beque'e Herodías ca xo'ole' la'czla' Herodías naque' xo'ole bene' biše' Felipe. Na' Juanna' gože' Herodesen':

—Bi cheyała' soalen no'ol che bene' bišon'.

Na' dan' gož Juanna' Herodesen' ca', da'nan' Herodesen' bene' mandadw gosezene' Juanna' na' bosocheje' ni'a ne'e len gden lo' ližya gan' gosegüe'ene'.

5 Herodesen' goclaže' gote' Juanna', perw bitwbi bende' le', le gwnežde' bene' zan chesejle'e Juanna' cho'e xtiža' Diosen', na' bžebe' bi yeson bene' ca'.

6 Perw na' cate' gosone' l̄nin' ža la Herodesen', bi' no'ol che Herodías bya'abe' lao bene' ca' ja'ac l̄nin'. Na' leca bebe Herodesen' can' bya'a no'ol güegon',

7 na' bzoe' Diosen' testigw che' gwnežjue'be' bite'teze nabebe' le'.

8 Na' gwlo'oyela' xna'ben' lebe' cont gožbe' Herodesen':

—Ben neda' to lo platw yichj Juan ben' chzoa bene' nis.

9 Ne late'ze bi gwyazlaže' rey Herodesen' gone' can' gož no'ol güegon' le', perw bačhle bzoe' Diosen' testigw che' lao bene' ca' jasa'ac l̄nin' gwnežjue'be' bite'teze nabebe' le', da'nan' benšaze' mandadw gac can' gwñabebe' le'.

10 Ca' goquen' bene' mandadw jasechogue' yen Juanna' lo' ližya gan' yo'ena'.

11 Na' bosozie' yichjen' to lo platw cont bosonežjue' no'ol güegon' na' lebe' bnežjwben' xna'be'.

12 Nach bene' ca' zjanaque' txen len da' Juanna' jasyexi'e cuerp čhen' na' jasecašen'. Gwde na' ja'aque' gan' zoa Jesúsen' jaseže'ne' can' ba goquen'.

Bguagw Jesúsen' gayo' mil bene'

(Mr. 6:30-44; Lc. 9:10-17; Jn. 6:1-14)

13 Na' cate' bene' Jesúsen' can' goc che' da' Juanna', beze'e latjen' len bene' ca' zjanaque' le' txen na' besyeyo'e to lo' barcw par ja'aque' to latje daš na' nono nochle ja'aclen legaque'. Perw bene' ca' že' yež ca' zjachi' cho'a nisdaon' cate' gosende' ba zjada Jesúsen', na' gosa'ac lažgaque' ja'aque' yo biž jasešague' Jesúsen'.

14 Na' cate' bžin Jesúsen' cho'a nisdaon', ble'ede' nita' bene' zan na' beyaše' beži'ilaže'de' legaque'. Na' beyone' yogo' bene' ca' chesacšene.

15 Na' cate' ba chzoa gwbiž gosebiga' bene' ca' zjanaque' le' txen lagüen', na' gose'ene':

—Zoacho to latje ga bibi de, na' ba nac bagwže' par gagwcho xgüe. Bze bene' quinga diža' cont šjaya'aque' yež dao' ca' dan' zjachi' gała'ze šjasediljue' da' yese'ej yesagüe'.

16 Nach Jesúsen' gože' legaque':

—Bitw cheyała' šjaya'aque', san le'e güe'elne' da' yesagüe'.

17 Nach gose'ene':

—Chopga beł ya'a čechon' de na' gayo'ga yetextil dao'.

18 Nach Jesúsen' gože' legaque':

—Le šjaxin' ni.

19 Nach ben Jesúsen' mandadw gosebe' bene' zan ca' lo yixyen'. Na' gwxi'e yetextil ca' gayo' na' beł ya'a ca' čhope, na' gwne'e yabale be'e yela' choxcen che Diosen', na' bzoxjen' be'en bene' ca' zjanaque' le' txen cont goseyisen' len to bene' ca'.

20 Na' yogüe' gosagüen' na' goseljde'. Na' bososše'e šižinw žome len yetextil bixjw len late' güeje beł dan' bega'anna'.

21 Na' bene' ca' gosagw da' ca' zjanaque' ca do gayo' mil bene' byo, bi cuent no'ol ca' len bidao'.

Jesúsen' gwze'e lo nisdaon'

(Mr. 6:45-52; Jn. 6:16-21)

22 Gwde na' Jesúsen' bene' byen besyeyo'o bene' ca' zjanaque' le' txen lo' barcon' cont gosebialagüe' besyelaque' yešla'ale nisdaon' šlac bega'an le' besele' bene' ca' ližgaque'.

23 Na' beyož besele' bene' ca' ližgaque', gwloe' to lo ya'a jał giüže' Diosen' toze'. Na' cate' goł, toz Jesúsen' zoe' lo ya'an.

24 Na' ca nac barcon' gan' zeseyeyo'o bene' ca' zjanaque' Jesúsen' txen, ba zejen do gachol nisdaon' nžiga'ses nisen' len dan' chas chata' nisdaon', le ben' chehjen clele.

25 Na' do šbal beyetj Jesúsen' ya'ana' na' gwze'e lo nisdaon' na' ba zejgale' gan' zja'aquen'.

26 Nach cate' besele'ede' le' zeje' lo nisdaon' leca besežebe', na' bososye'e gosene':

—iše da' chda chelen' chle'echo!

27 Na' la' boł giüžte Jesúsen' legaque', gože'ne':

—Le gončach laže'le. Neda'na'. Bitw žeble.

28 Nach Pedroa' gože'ne':

—Xanto', še da' li le'na', ben mandadw sa'a lo nisdaon' yida' gan' zon'.

29 Nach gož Jesúsen' le':

—Da, Pedro.

Na' la' bchojte Pedroa' lo' barcon' gwzolao gwze'e lo nisdaon' zeje' gan' zoa Jesúsen'.

30 Perw na' cate' gocbe'ede' chehjhchgua ben', bžebe' na' gwzolao chebe' lo' nisen'. Nach bosye'e, gože' Jesúsen':

—Xana', bosla neda'.

31 Na' la' blite na' Jesúsen' bešue'ne', na' gože'ne':

—žBixčhen' chac chopdo'? Gwyejle'ch chia'.

32 Nach cate' beyo'o Jesúsen' len Pedroa' lo' barcon', la' gwlezte be'na'.

33 Na' bene' ca' že' lo' barcon' bosozoa xibe' lao Jesúsen' gosonxene'ne', gose'ene':

—Da' licze len' naco' doguale Xi'in Diosen'.

Jesúsen' beyone' bene' chesacšene ben' nita' Genesaret

(Mr. 6:53-56)

34 Na' goselaque' nisdaon' na' besežine' yežlio gan' nzi' Genesaret.

35 Na' cate' bene' Genesareten' besyeyombi'e Jesúsen', goseyise' diža' yogo' yež ca' dan' zjachi' gała'ze cont gosenezde' ba bžin Jesúsen' lažgaque'. Na' bene' ca' že' yež ca' goseče'e yogo' bene' chesacšene lao Jesúsen'.

36 Na' goseneyoede' Jesúsen' gwnežjue' latje yesože' la'ch late'ze xni'a xen'. Na' yogo' bene' gosoxen' besyeyaquede'.

15

Diža' mal dan' chchoj cho'achon' chonen cont lažda'ochon' bi naquen xilaže' len Diosen'

(Mr. 7:1-23)

1 Na' bał bene' fariseo ca' na' bene' ca' chososed chosolo'e dan' bzoj da' Moisésen' gosa'aque' Jerusalénna' na' besežine' gan' zoa Jesúsen', na' gose'ene':

2 —¿Bixchen' bene' ca' zjanaque' le' txen bitw zjana'ogüe' da' cheson bene' gol ca'? ¿Bixchen' cbi chosyone'e zan ni'a cate' za' yesagüe'?

3 Nach Jesúsen' gože' legaque':

—Na' le'e ¿bixchen' chbejyichjle cbi chonle can' za Diosen' cheyalá' goncho san chonxen costumbr chelen'?

4 Diosen' none' mandadw can' goncho, gwne': "Le gap bala'an xaxna'le", na' "Note'teze' še chnešaše' len xaxne'e cheyalá' gate'."

5 Perw le'e žale guaque ye' to bene' xaxne'e: "Bibi de gona' gaclena' le'e, le yogo' da' de chia' ba bnežjuan' lo na' Dios."

6 Na' žale bich bi cheyalá' gwnežjue' xaxne'en še ca'. Na' dan' žale ca', chzoale ca'ale dan' za Diosen' na' con na'ole costumbr gole che da' xozxta'ole ca'.

7 Le'e nacle bene' gwxiye'. Chonle cayanen' bzoj da' Isaiasen' chele, gan' žan:

8 Bene' qui chesonxene' neda' len diža' cho'a, perw bi chesonxene' neda' len lažda'ogaque'.

9 Bibi zejen dan' chesonxene' neda',

le dan' chososed chosolo'eden' naquen da' chnalaže' benačze.

10 Nach Jesúsen' bozoł güiže' bene' ca' zjanžaguen' cont gosebigue' lagüen' na' gože' legaque':

—Le gwzenag da' nga nia' le'e na' le šejni'i.

11 Bitw nacho dan' che'ej chagw benačhen' chonen cont lažda'ogüen' bi naquen xilaže' len Diosen'. Perw diža' mal dan' chchoj cho'e, lenna' chonen cont lažda'ogüen' bi naquen xilaže'.

12 Nach gosebiga' bene' ca' zjanaque' Jesúsen' txen lagüen' gose'ene':

—¿Bi gocbe'edo' bene' fariseo ca' beseže'e cate' gosende' xtizo'na'?

13 Na' gož Jesúsen' legaque':

—Gwžin za cate' Xa' Diosen' ben' zoa yaban' gwžiyae'e yogo'loł bene' bi chosozenag che'. Gwžiyae'e legaque' can' choncho cate' chlažo'cho yixe' ca' chesela'ac lo yel.

14 Jaseye bene' fariseo ca'. Zjanaque' ca to bene' lchol bene' che'nde' cue'e nez yeto bene' lchol. Nezecho to bene' lchol bitw gac cue'e nez yeto bene' lchol, le txen šjasebixe' to lo' yechw.

15 Nach Pedroa' gože' Jesúsen':

—Bzejni'išque neto' bi zejen can' gwnaon'.

16 Nach gož Jesúsen' legaque':

—¿Lencze le'e bitw chejni'ile da' quinga ba gwnia'?

17 ¿Bi nezele yogo' dan' che'ej chagw benačhen' cho'on lo' li'e na' chžin hor cheden'?

18 Perw yogo' diža' dan' chesoe' benačhen' chesechojen lo' yichjlažda'ogüen'. Na' še choe' bene' diža' mal, len chonen cont bi nac lažda'ogüen' xilaže' len Diosen'.

19 Le lo' yichjlaždao' benačhen' nan' chchoj yogo' xbab mal cate' žan yesone' da' mal quinga: yesote' bene', yesata'lene' no'ol bi nac xo'olgaque' o bene' byo bi nac bene' chegaque', na' yesone' gwban, yeso'e diža' güenlaže' che lježgaque', na' yeseneye'e che bene'.

20 Xbab mal ca' chesonen cont bi nac laždao' bene' xilaže' len Diosen', gague dan' bi chone'e zan ni'a cate' za' gagüe'.

*To no'ole bi naque' bene' Israel chejnilaže' Jesúsen'
(Mr. 7:24-30)*

²¹ Beza' Jesúsen' latjen' len bene' ca' zjanaque' le' txen jaya'aque' distritw Galilea gala'ze gan' mbane ciuda Tiro na' ciuda Sidón.

²² Na' to no'ole zoa do na', ben' bi naque' bene' Israel, gwze'e laže' cont bžine' gan' zoa Jesúsen' na' jašague'ne'. Na' gwne' zižje, gože'ne':

—Xana', le' naco' xi'in diaža che da' rey David. Beyaše'šque neto'. To bi' no'ol chia' yo'no nyaz da' xigüe' yichjlažda'obe' na' leca chžaglaobe'.

²³ Perw Jesúsen' bitw boži'e xtiža' no'olen'. Nach bene' ca' zjanaque' Jesúsen' txen gosebigue' cuite'na' na' gosata'yoede' le' gose'ene':

—Boži'išca no'olen', le' con nagüe' chio' chol güiže' le' zižje cont gacleno'ne'.

²⁴ Nach gož Jesúsen' legaque':

—Diosen' gwsele' neda' cont chaclena' bene' Israel gualaž checho na'ze, le' legaque' zjazaca'lebe' ca' xila' dao' be' zjanacžeje.

²⁵ Nach no'olen' gwbigue' bzoa xibe' lao Jesúsen', na' gože'ne':

—Xana', goclenšca neda'.

²⁶ Nach gož Jesúsen' le':

—Bitw naquen güen yeca'acho yela' guagw che xi'incho na' gwnežjwchon gagw beco' ca'.

²⁷ Nach gože'ne':

—Leczdo' Xana'. Perw beco' ca' guac yesagwba' bla'a dao' da' cheselažo' lo yo.

²⁸ Nach Jesúsen' gože'ne':

—No'ole, leca chejnilažo' neda'. Guaclencza' le' can' chaclažon'.

Na' la' beyacte xi'in no'olen'.

Jesúsen' beyone' bene' zan bene' chesacšene

²⁹ Beza' Jesúsen' latjen' len bene' ca' zjanaque' le' txen goso'e nezen' dan' chde gala'ze cho'a nisdao' Galilean'. Nach gosepe' to lo ya'a jasechi'e lo ya'ana'.

³⁰ Na' besežin bene' zan lo ya'a gan' zoa Jesúsen' len bene' ca' zjanaque' le' txen. Zjanche'e no'bene' nxinj ni'e, bene' lchol, bene' bi chac nie', bene' bi zoa ni'a na'gaque', na' len bene' chese'e gwde gwdele yižgüe', na' bosonite' legaque' xni'a Jesúsen'. Na' Jesúsen' beyone' yogüe'.

³¹ Na' leca besyebane bene' ca' cate' besele'ede' can' besyene' bene' ca' bi gosac yesene, na' besyeyac bene' bi zjazoa ni'a na'gaque', na' besyeda bene' nxinj ni'e, na' besele'e bene' lchol ca'. Nach gosonxene' Diosen' ben' chonxen chio' bene' Israel.

Jesúsen' bguagüe' tap mil bene'

(Mr. 8:1-10)

³² Gwde na' Jesúsen' goxe' bene' ca' zjanaque' le' txen na' gože' legaque':

—Cheyaše'da' bene' qui, le' ba goc šone ža zjanite' nga len neda', na' bibi de da' yesagüe'. Na' bi chaclaža' yosa'ane' sin cbi yesagüe' cont bi yesecholde' chanez.

³³ Nach legaque' gose'ene':

—Gan' zoacho nga naquen to latje daš ga bibi de. ŽGaxe želecho da' yesagw yogo' bene' quinga?

³⁴ Nach gož Jesúsen' legaque':

—ŽGaca' yetextilen' de chele?

Nach gose'ene':

—Gažga yetextil dao' zjade na' to chopga be' ya'a dao'.

³⁵ Nach Jesúsen' bene' mandadw yesebe' bene' zan ca' lo yon'.

³⁶ Na' gwxi'e yetextil ca' gaže na' len beļ ya'a dao' ca', nach be'e yela' choꝥcġen che Diosen', nach bzoꝥjen' bnežjuen' bene' ca' zjanaque' le' txen na' legaque' bosonežjue' che yogo' bene' nita' na'.

³⁷ Na' yogüe' gosagüe' goseljde'. Gwdena' bososše'e yegaže žome len late' güeje yela' guagw dan' bega'anna'.

³⁸ Na' bene' ca' gosagw yetextilen' len beļen' nac tap mil bene' byo, na' bi cuent no'ole ca' len bidao' ca'.

³⁹ Nach beyož besela' Jesúsen' bene' ca' ližgaque', na' beyo'e to lo' barcw len bene' ca' zjanaque' le' txen na' ja'aque' distritw gan' nzi' Magdala.

16

Gosenabde' Jesúsen' gone' to da' yesele'ede' le'e yaba (Mr. 8:11-13; Lc. 12:54-56)

¹ Na' goquen' baļ bene' fariseo ca' na' bene' saduceo ca' gosebigue' gan' zoa Jesúsen', na' cont yesagüe' xya che' gosenabe' gone' to yela' guac da' yesele'ede' le'e yaban' cont yesenezde' še da' licze Diosa' gwsele' le'.

² Nach Jesúsen' gože' legaque':

—Cate' chle'ele chexna le'e yaban' šeže'le nach žale: “Yeža'a gwꝥe dan' chexna le'e yaban'.”

³ Na' cate' chle'ele zete bejw xna le'e yaban' do cheni' nach žale: “Guac yejw zag, le ze bejw xna le'e yaban'.” Nacle bene' gwxiye', le nezele še guac yejw zag o še guac zeye' caten' chle'ele can' nac le'e yaban', perw bi chache'ele bi zejen da' ca' chon Diosen' timpngua zoacho na'a.

⁴ Le'e zoale na'a naccgualle bene' laždao' xi'a na' ba gwlejšyichjle Diosen'. Da'nan' chnabile gona' yeto yela' guac da' le'ele cont nezele še Diosen' gwsele' neda'. Perw bitw gona' can' chnablen', le ba ble'ele da' chona'. Dan' gon Diosen' len neda' cont nezele le'na' gwsele' neda' naquen ca dan' bene' len da' Jonás ben' be' xtiža' Diosen' cani'.

Nach beyož gwna Jesúsen' ca', beze'e len bene' ca' zjanaque' le' txen gan' nita' bene' ca'.

Dan' chsed chlo'e bene' fariseo ca' na' bene' saduceo ca' zaca'leben ca levadura

(Mr. 8:14-21)

⁵ Na' cate' besežine' yešļa'a nisdao' Galilean', bene' ca' zjanaque' Jesúsen' txen gosache'ede' gosanjaže' yetextil da' yesagüe'.

⁶ Nach Jesúsen' gože' legaque':

—Le gon xbab, le gwsaca' len levadura che bene' fariseo ca' na' che bene' saduceo ca'.

⁷ Nach gose' lježgaque':

—Gwne' ca' le gague bi yetextilen' noa'chon'.

⁸ Na' Jesúsen' gocbe'ede' xbab dan' gosone', na' gože' legaque':

—¿Bixchen' chacžejlaže'le da' bibi yetextil de? ¿Bi chejle'le napa' yela' guac par gwguagua' le'e?

⁹ ¿Biņa' šejni'ile? na' ¿ba gonlaže'le can' bguagua' gayo' mil bene' byo len gayo'ze yetextil dao'? na' lecze ¿bitw zalaže'le do yebaļ žome pedas yetextil botoble dan' becho'onen?

¹⁰ Na' ¿chixe tap mil bene' byo ca' bguagua' len gažze yetextil dao'? ¿Zalaže'le yebaļ žome pedas yetextil can' botoble dan' becho'onen?

¹¹ ¿Bixchen' con benle xbab che yetextilen' cate' gwnia' le'e gwsaca'le len levadura che bene' fariseo ca' na' che bene' saduceo ca'?

¹² Nach be_{ne}' ca' zjanaque' Jesúsen' txen gosache'ede' gague be'e diža' che levadura dan' chosočhine' par chcha'o yetextilen' san be'e dižan' ca' cont bi yosozenague' che dan' chososed chosolo'e be_{ne}' fariseo ca' na' be_{ne}' saduceo ca'.

Pedroa' gwne' Jesúsen' naque' be_{ne}' gwse_{la}' Diosen' cont nabi'e
(Mr. 8:27-30; Lc. 9:18-21)

¹³ Nach Jesúsen' len be_{ne}' ca' zjanaque' le' txen besežine' gala'ze to ciuda dan' nzi' Cesarea de Filipo. Nach Jesúsen' gože' be_{ne}' ca' gosa'aclene' le':

—Diosen' gwse_{le}' neda' golja' be_{na}ch. Perw žbi chesena be_{ne}'? žnon' naca' neda'? žBi chesene'?

¹⁴ Na' gose'ene':

—Ba_{le}' chesene' naco' da' Juan ben' bzoa be_{ne}' nis. Na' yeba_{le}' chesene' naco' Elías ben' be' xtiža' Diosen' cani'. Na' yeba_{le}' chesene' naco' da' Jeremías o yeto be_{ne}' be' xtiža' Diosen' cani'te.

¹⁵ Nach gože' lega_{que}':

—žChixe le'e? žNo žale naca'?

¹⁶ Nach Simón Pedroa' gože'ne':

—Len' naco' Cristo ben' gwlej Diosen' cont nabi'o, na' naco' dogualje Xi'in Dios, Dios ben' zoa toži toca_{ne}.

¹⁷ Nach Jesúsen' gože'ne':

—Simón xi'in Jonás, mbalaz zo' dan' gwnao' ca'. Notno be_{na}ch bzejni'i le' nao' ca'. Toz Xa' Dios ben' zoa yaba, len' ba bzejni'iden' le'.

¹⁸ Na' neda' žia', len' lio' Pedro na' zeje dižan' yej. Na' ca to be_{ne}' güen yo'o chbeje' yej gual cont gonen žin cate' cueque' len' yo'on, ca'cze chbeja' le' gono' xšina', gaco' be_{ne}' nechw yotobo' bene' yesonxene' neda'. Na' bitwbi gac yeson da' xigüe' ca' yosolej yosošošjen be_{ne}' ca' yesonxene' neda'.

¹⁹ Na' gona' lo nao' zgua'tec le' go'o xtižan' len be_{ne}' zan cont yosozenague' che Dios ben' zoa yaban' na' nabi'e yichjlažda'oga_{que}'. Na' le_{cz}e naquen lo nao' yo'o be_{ne}' ca' yesonxene' neda' bica' da' ca' nac güen yesone' na' bica' da' ca' čbi nac güen yesone'. Na' Diosen' gwzejni'ide' le' naquen' ye'gaco'ne' cont yežaguen len dan' ža Diosen'.

²⁰ Nach Jesúsen' gože' lega_{que}' nono yese'e še naque' Cristo ben' gwlej Diosen' cont nabi'e.

Jesúsen' gwdixjue'ede' gate'
(Mr. 8:31-9:1; Lc. 9:22-27)

²¹ Na' žana' Jesúsen' gwzola_{güe}' bzejni'ide' be_{ne}' ca' zjanaque' le' txen cheya_{la}' šeje' Jerusaléna'. Na' gože' lega_{que}' be_{ne}' gole blao ca' chesenabi'e nación chechon', na' bžoz gwnabia' ca' na' be_{ne}' ca' chososed chosolo'ede' dan' bžoj da' Moisés yosoči yososa_{que}' le' na' yesote' le'. Perw yeyon ža yebane' ladjo be_{ne}' guat ca'.

²² Nach Pedroa' gwčhe'e Jesúsen' gan' nac lchojiže na' gwzola_{güe}' be'lene' le' diža' gwdi_{le}' le', gože'ne':

—Xana', Diosen' gaclene' le'. Bitw gac chio' ca dan' žo' nga.

²³ Perw Jesúsen' gwyečhje' gwne'e Pedroa' gože'ne':

—jGwcuas ca'ale Satanás! Chgo'oyelo' neda' bi gona' can' nžia bia' Diosen' gona'. Bi nsa'o xbab che Dios, san nsa'o xbab che be_{na}ch.

²⁴ Gwde na' Jesúsen' gože' be_{ne}' ca' zjanaque' le' txen:

—Note'teze be_{ne}' še chaclaže' ga_{que}' neda' txen, cheya_{la}' cuejyichj cuine' la'czla' žaglagüe' na' con gone' can' nia' neda'.

²⁵ Note'teze bene' chacde' gone' cont bi žaglagüe' o cont nono yesot le', benan' cuiayi'. Na' note'teze bene' chzanlaže' cuine' žaglagüe' o gate' ne chia' neda', ba de yela' mban che' toli' tocaņe.

²⁶ ¿Bixe zejenna' to bene' nabi'e doxen yežlion' na' cuiaye'e bi gata' yela' mban che' toli' tocaņe? Le bi zoa nacle gon benachen' chixjue' cont gata' yela' mban che' toli' tocaņe.

²⁷ Diosen' gwsele' neda' golja' benach na' cate' yida' yežlio nga da' yoble nsa'a yela' zaca' juisyw che Xa' Diosen' na' nchi'a angl' chia' ca', cana'ch gona' cont to to benachen' nite' mbalaz o yesezaca'zi'e neche' da' goson to toe'.

²⁸ Na' da' li' žia' le'e, balle nita'le nga na'a bina' gatle cate' žin ža le'ele neda' yida' gwlo'a yela' gwnabia' chian', neda' naca' ben' gwsele' Diosen' golja' benach.

17

Jesúsen' goque' ca to be'ni'

(Mr. 9:2-13; Lc. 9:28-36)

¹ Gwde xop ža Jesúsen' gwchi'e Pedroa' len Jacobo na' Juan bene' biše' Jacobo na' ja'aque' to lo ya'a sibe. Na' nono nochle ja'aclen legaque'.

² Na' lao legaque' bža' ca goc Jesúsen', cho'alagüen' goctiten ca gwbiž, na' xalanan' beyaquen šiš xila' ca be'ni'.

³ Na' concze besele'ede' da' Moisésen' len da' Elíasen' na' chosošalje' len Jesúsen'.

⁴ Nach Pedroa' gože' Jesúsen':

—jXanto', leca güenna' zoacho nga! Še chaclažo', gonto' šone ranšw, to chio', na' to che Moisés, na' yeto che Elías.

⁵ Ne' choe'te Pedron' dižan' ca' cate' to bejw da' chactiten gwyečhjen legaque' na' ladjo bejon' gosende' gwna Diosen':

—Benga Xi'ina' ben' chacda'. Chbe chezaquelaže' chgüeda' che'. Le gwzenag che'.

⁶ Na' cate' bene' ca' nche'e Jesúsen' gosende' diža' ca' besežebchgüe', con gosaze' coscho'ale lo yon'.

⁷ Nach gwbiga' Jesúsen' gwxoaxa ne'e yichjgaquen' na' gože'ne':

—Le yeyas. Bitw žeble.

⁸ Na' cate' besyečhis lagüen', noch no besele'ede' san toze Jesúsen' zie'.

⁹ Na' gwde na' šlac chesyeyetje' lo ya'an Jesúsen' gože' legaque':

—Nono ye'le can' nac dan' ba ble'ele nga. Cate'ch ba bebana' ladjo bene' guat ca', neda' naca' ben' gwsele' Diosen' golja' benach, cana'ch güe'le diža' čhen.

¹⁰ Nach bene' ca' zja'aclen Jesúsen' gose'ene':

—Bene' ca' chososed chosolo'e dan' bzoj da' Moisésen' chososedde' neto' chesene' zgua'tec da' Elías ben' gwzoxa cani' cheyala' yide' da' yoble cate' za yedenabia' ben' sela' Diosen'. ¿Bixčhen' chesene' ca'?

¹¹ Nach Jesúsen' gože' legaque':

—Da' licze zgua'tec yid da' Elíasen' na' yeyonšagüe' yogo'lol.

¹² Perw žia' le'e, Elías ba bide' na' bi gosache'e bene' še nac le'. Na' gosonde' le' con ca gosaclaže'. Na' ca'czen' yosoči yososaque' neda' naca' ben' gwsele' Diosen' golja' benach.

¹³ Nach bene' ca' zja'aque' len Jesúsen' gosache'ede' cho'e diža' che da' Juan ben' bzo'e bene' nis.

*Beyon Jesúsen' to bi' chazbe' šon**(Mr. 9:14-29; Lc. 9:37-43)*

14 Na' cate' besežine' gan' zjanžag bene' zan, to bene' bšague' Jesúsen' na' bzoa xibe' lagüe'na' gože'ne':

15 —Xana', beyaše'laže'šca xi'ina' nga. Chazbe' šon na' leca chžaglaobe' len len. Na' zan ni'a ba jačhazbe' lo yi' na' lecze zan ni'a ba blažo'be' lo nis.

16 Ba bedesana'be' lao bene' ca' zjanaque' le' txen, perw bitw gosaque' yeseyone'be'.

17 Nach Jesúsen' gože' bene' ca' že'na':

—iLe'e bene' bi chejnilaže', chonchguale clele! ¿Batca' zelao na'lagua' le'e? Bedesan bidaon' ni.

18 Nach Jesúsen' bene' mandadw yechoj da' xigüen' yo'o nyazen yichjlaždao' bidaon' na' la' bechojten. Na' la' beyaquetebe'.

19 Na' gwde goc ca', bene' ca' zjanaque' Jesúsen' txen gosebigue' lagüen' cate' zoe' toze', na' gose'ene':

—¿Bixchen' bi goc neto' yebejto' da' xigüen'?

20 Jesúsen' gože' legaque':

—Bitw goc yebejlen dan' bitw gwyejle'le Diosen' gone' yechojen. Xsa xomdasen' naquen da' dao' riz. Na' da' li žia' le'e, la'czla' dan' chejnilaže'le Diosen' naquen ca' to xsa xomdas lagüe' dan' bi chejnilaže'teclene', še šejnilaže'ine', guaque ye'le ya'a nga: “Gwcuas nga, na' jayzoa na'ate”, na' gac can' nalen'. Bitw bi de dan' bi gac gonle con še chejle'le Diosen' gone' gaquen.

21 Na' cont yebejle da' xigüe' ca' dan' zjanac ca' dan' bebeja' yichjlaždao' bidao'na', cheyala' gwyo gwčhejle gonle gwbas na' zoatezle yoł giüizle Diosen'.

*Da' yoble Jesúsen' gwdixjue'ede' gate'**(Mr. 9:30-32; Lc. 9:43-45)*

22 Na' šlac zjayda Jesúsen' len bene' ca' zjanaque' le' txen do gan' mbane distritw Galilea, Jesúsen' gože' legaque':

—Diosen' gwsele' neda' golja' benačh, na' yosodie' neda' lo na' bene' chesegue'ede'nda',

23 na' yesote'nda'. Perw na' yeyon ža yosban Diosen' neda' ladjo bene' guat ca'.

Nach bene' ca' zjanaque' Jesúsen' txen cate' gosende' xtiže'na' gosacyaše'chgüede'.

Jesúsen' gwdixjue' da' chosočixjue' che yodao'

24 Na' cate' besyežine' Capernaum, bene' ca' chosočixjue' che gastw che yodao' blao che chio' bene' Israel ja'aque' lao Pedrao'. Na' gose'ene':

—¿Bi chyxjw maestrw chelen' da' cheyala' chixjue' che yodaon'?

25 Nach gož Pedrao' legaque':

—Chyxjuen'.

Gwde gwna Pedrao' ca' gwyo'e lo' yo'ona'. Nach Jesúsen' la' gožtie' le':

—¿Bi xbab chono', Simón? Ca nac bene' gwnabia' ca' nita' yežlio nga, ¿non' chacdo' chosočixjue'? ¿bene' gualaž che' o še bene' zito'?

26 Nach Pedrao' gože'ne':

—Chosočixjue' bene' zito'.

Nach Jesúsen' gože' le':

—Bene' zjanaque' biše' lježe' bitwbi cheseyixjue'. Na' chio' naccho xi'in Dios ben' zoa yaba chnabi'e, bitw cheyala' chixjwcho che yodaon'.

27 Perw cont nono yeson xbab chgue'echo yodao' blaon', na' chixjwcho. Gwey cho'a nisaon', na' bzala' yixjw chion' na' bel nechw be seno', lo

cho'aba'na' želdo' to mechw. Na' yeyoxon' šjadixjo' čhechon'. Guaqueczen par šjadixjo' che chopcho.

18

Gosacyož bene' ca' zjanaque' Jesús'en txen noe' nacch blao

(Mr. 9:33-37; Lc. 9:46-48)

¹ Nachen' bene' ca' zjanaque' Jesús'en' txen gosebigue' cuite'na', na' gose'ene':

—¿No neto' gacchto' blao cate' Diosen' ben' zoa yaban' gone' cont nabi'o?

² Na' Jesús'en' goxe' to bidao' na' bzeche'be' gachol'legaque'.

³ Na' gože'ne':

—Da' li žia' le'e, note'tezle še bi gwša' xbab čhelen' cont gwzenagle che Diosen' ca chon to bidao' cate' chzenagbe' che xaxna'be', gwbat nabia' Diosen' ben' zoa yaban' yichjlažda'ole.

⁴ Na' note'teze bene' še yeyaque' ca bidao' nga na' gwzexjwlaže' lao Diosen', nach gague' bene' blao len neda' cate' Diosen' ben' zoa yaba gone' cont solao nabi'a.

⁵ Note'teze bene' chone' güen len to bidao' ca bi' nga neche da' chejnilaže' neda', choncze' güen len neda'.

Bitw cheyała' goncho cont gon bene' da' xinj

(Mr. 9:42-48; Lc. 17:1-2)

⁶ Note'teze bene' chon cont lažo' to bene' za' gwzologüe' chejnilaže' neda' gone' da' xinj, yejñi'acle yosocheje' yene' to yiše xen na' yosozale'ne' lo' nisdawn' cl' ca da' gone' cont lažo' bene' yoble gone' da' xinjen'.

⁷ Nyaše'chguaze gac che benachen' da' zjade da' zan yežlio nga da' chesonen cont yesone' da' xinj. Bia'cze gata' dan' yeson cont lažo' bene' yesone' da' xinj, perw nyaše'chguaze gac che bene' chon cont lažo' bene' yoble gone' da' xinjen'.

⁸ Na' da' li žia' le'e, še ni'a na'len' chonen cont gonle da' xinj, cheyała' cuejyichjle da' malen' chonle. Yejñi'a bibi ni'a na'len' soa cl' ca gonle da' xinjen' len len. Na' yejñi'a šjayzoale len Diosen' toli tocañe bi zoa šla'a taca'len' o nchog šla'a ni'alen' cl' ca yeyejle lo yi' gabil nya' cuerp chelen'.

⁹ Na' še yejlaolen' chonen cont gonle da' xinjen', cheyała' cuejyichjle da' malen' chonle. Yejñi'a bibi yejlaolen' cuia cl' ca gonle da' xinjen' len len. Na' yejñi'a šjayzoale len Diosen' toli tocañe zoa šla'aze yejlaole cl' ca yežinle lo yi' gabil žia chop la'a yejlaolen'.

Jempl che xila' be gocžeje

(Lc. 15:3-7)

¹⁰ Bi gonle note'teze bene' chejnilaže' neda' ca bene' bibi zaca'tec, la'czla' bitec zaque' len beñach. Žia' le'e, angl ca' chesape' legaque' lecze nite' lao Xa' Diosen' yaban' gan' zoe'na'.

¹¹ Na' ca naca' neda', Diosen' gwsele' neda' golja' beñach cont gwnežjua' yela' mban toli tocañe che bene' ba zjambiayi'.

¹² ¿Bixe chonle xbab? Še nita' to gayoa xila' čhele na' yexjw toba' ¿bi yocua'anle be ca' yetaplalj togalj do lo ya'a na'ze na' šjaydiljwle ben' bejxua'?

¹³ Na' da' li žia' le'e, cate' yeže'leleba' yebechle dan' beželban' cl' ca can' chebele che be ca' taplalj togalj ben' bi gosacžeje.

¹⁴ Ca'czen' naquen len bene' ca' chesejnilaže' neda' bene' ca' bitec bi zjazaque' len beñachen'. Xacho Diosen' ben' zoa yaban' bitw che'nde' cuiayi' ne toe'.

Cheyała' yezi' xencho che bene' lježcho bene' chesejnilaže' Diosen' (Lc. 17:3)

15 Še to bene' lježle gone' mal contr to le'e, šejle šje' elenlene' diža' chopzle can' nac dan' chonen' cont yetinjden'. Na' še gwzenague' diža' dan' šje' elenlenen', yezoe' binlo len Diosen' da' yoble.

16 Perw še bi gwzenague' diža' dan' šje' elenlenen', güenč che' ele yeto o yechope bene' lježle cont yesaque' testigw ba gota' yoele ben' yoša' xbab čhen'.

17 Na' še bitwče gwzenague' chele, le güe' diža' can' chonen' lao yogo' le gan' chdop chžagle chonxenle Diosen'. Na' še nēca gwzenagcze' che yogo' le, cbich gonlne' cuent len le'e chdop chžagle chonxenle Diosen'. Perw le gon cuent naque' txen len bene' ca' bi chesejnilaže' Diosen', ca no bene' güečhixjw bene' chesonchgüa da' xinj.

18 'Da' li žia' le'e, naquen lo na' le ye' le bene' ca' yesonxene' neda' bica' da' nac güen yesone' na' bica' da' ca' bi nac güen yesone'. Na' Diosen' gwzejni' ide' le'e naquen' ye' gaclene' cont yežaguen len dan' ža Diosen'.

19 'Na' da' yoble žia' le'e, še čople nita' le yežlio nga gwxi' ale bin' nabele Diosen', Xa' Diosen' ben' zoa yaban' goncze' dan' nabelenen'.

20 Na' gan' nžag čhope šonle chonxenle neda', zoacza' txen len le'e.

21 Nach Pedroa' gwbigue' gože' Jesúsen':

—Xana', še bene' lježa' chone' da' mal contr neda', čbał ni'a cheyała' yezi' xena' che'? čzelao do gaž ni'a?

22 Nach Jesúsen' gože' ne':

—Žia' le', gague cheyała' yezi' xen che lježle zelao do gaž ni'a, san yogo' te ni'a cheyała' yezi' xen che lježle.

Jempl che ben' bi bezi' xene' che dan' čala' bene' lježe'

23 'Na' yeła' gwnabia' che Diosen' ben' zoa yaban' zaca' leben ca da' nga goc. Zoa to bene' gwnabia' ben' česala' xmose' ca' xmechue'. Na' goclaže' yebeje' cuent len legaque'.

24 Na' cate' gwzologüe' bezi' e cuent che to toe', da' nechw bžin to xmose' ben' čala' zan millón.

25 Na' mosen' bitwbi xmechue' gota' par yonežjuen'. Da' nan' bene' gwnabian' bene' mandadw ta' ogaque' len xo' ole', len xi' ine' ca' na' len doxen da' zjade che' cont yeyaxjw dan' čale' čhen'.

26 Nach mosen' bzoa xibe' lao bene' gwnabian' gota' yoede' le' gože' ne': "Xana', gwdapešca yeła' chxenlaže' len neda', na' yeyona' doxen dan' čala' čhion'."

27 Nach bene' gwnabian' beyaše' de' le' na' bezi' xene' che doxen dan' čale' na' bsane' le'.

28 Perw na' cate' bechoj mosen' liž xanen', la' bežagtie' yeto mos lježe' bene' čala' late' xmechue'. Nach la' gwñizte' yene' gože' ne': "Yeyona' dan' čala' čhian' netec na' a."

29 Nach mos lježen' la' bzoate' xibe' lagüen', gože' ne': "Gwdapešca yeła' chxenlaže' chia' na' yeyona' doxen dan' čala' čhion'."

30 Perw na' mos nechon' bitw bzenague' che mos lježen'. La' gwyejte' jene' mandadw goseyixjue' ne' ližya na' bi yechoje' še biña' yonežjue' dan' čale' čhen'.

31 Na' mos ca' yezica' chle cate' besele' ede' can' ben' mos nechon', leca gosacde' zi'. Na' ja' aque' lao bene' gwnabian' jaseže' ne' yogo' lol can' goca'.

³² Nach bene' gwnabian' goxe' mos nechua' da' yoble lagüe' na', gože' ne': "Le' naco' to bene' xi' achgua. Neda' bezi' xena' chio' doxen dan' chalō' chian' dan' gota' yoedo' neda' yezi' xena' chion'.

³³ ¿Bixchen' bi beyaše' do' mos lježo' ben' chale' chion' can' beyaše' da' le'?"

³⁴ Na' bža' achgua bene' gwnabian' na' bdie' le' lo' na' bene' goseyixjue' ne' ližya ga žaglaogüe', na' bi yechoje' še biña' yeyixjue' doxen dan' chale' chen'.

³⁵ Nach Jesúsen' gože' bene' ca' zjanaque' le' txen:

—Can' gon Xa' Diosen' ben' zoa yaban' len note'tezle še bi chezi' xenle che lježe do yichj do laže' le bite'teze dan' chesonde' le'e.

19

Bi cheyala' yela'acho len no'ol chechon' cont soalencho no'ole yoble (Mr. 10:1-12; Lc. 16:18)

¹ Na' Jesúsen' cate' beyož gwne' da' ca' beze'e distritw Galilean' na' gwlague' yegw Jordánna' beyeje' gan' mbane distritw Judean'.

² Na' bene' zan ja'aclen le', na' beyone' bene' ca' chesacšene.

³ Na' bał bene' fariseo ja'aque' gan' zoe' na', le gosaclaže' yesebeje' ne' diža' da' yosočhine' cont gosožie' ne' xya chol, nach gose' ene':

—¿Guac to bene' nšagna' yele'e len xo'ole' še bite'teze dan' chone' cbi cholaže' bene' chen'?

⁴ Nach gože' legaque':

—¿Biña' gwlable can' nyoj Xtiza' Diosen'? Žan cate' gwxe yežlion' Diosen' bene' bene' nechw ca' to bene' byo na' to no'ole.

⁵ Na' gwna Diosen': "Da' nan' bene' byon' gwsane' xaxne'e cont soalene' no'ole chen' na' chope' yesaque' ca toz bene'."

⁶ Na' ca' bich yesac chope' san toze'. Da' nan' bi cheyala' yesyele'e, le Diosen' ba bcode' legaque'.

⁷ Nach gose' ene':

—Še naquen ca' ¿bixchen' ben da' Moisésen' mandadw cate' to bene' yele'e len no'ol chen' cheyala' chas to yiš da' gwnežjue' no'ol chen' ga güen' diža' besyele'ena'?

⁸ Jesúsen' gože' legaque':

—Da' Moisésen' be'e latje yela'ale len no'ol chele lagüe dan' nacle bene' güedenag len Diosen'. Perw cate' Diosen' bene' bene' nechw ca' bitw nacho gogaže' yesyele'e.

⁹ Žia' le'e, note'teze bene' chele'e len no'ol che' na' cheque'e no'ole yoble, len nežtede' no'ol chen' bitw naque' to no'ole chzoa xtoe', toz ca da' xinjen' chone' ca nac dan' chon ben' chata'lene' no'ol che bene' yoble. Na' note'teze bene' yošagna'lene' to no'ole bene' bela'a len bene' che', lecze tozcze ca da' xinj gone' ca nac da' chon bene' chata'lene' no'ol che bene' yoble.

¹⁰ Nach bene' ca' zjanaque' Jesúsen' txen gose' ene':

—Še can' naquen che bene' byo na' no'ole, güench nono gwšagna'.

¹¹ Jesúsen' gože' legaque':

—Gague yogo' bene' yesejni' ide' da' nga, šinze bene' ca' ba bzejni' i Diosen' legaque' bi zejen.

¹² Nita' bene' bi žan yosošagne'e dan' gosalje' bi zjanya' cuerp che', na' lecze nita' bene' bi chosošagne'e lagüe dan' gosone bene' legaque' cont bi zjanya' cuerp chegaque'. Na' lecze ca' nita' bene' cbi chosošagne'e lagüe dan'

chesazlaže'che' yesone' xšin Diosen' ben' zoa yaban' chnabi'e. Le gwzenag che dan' ba gwnian' še ba ben Diosen' cont chejni'ilen.

Jasesane' bidao' lao Jesúsēn'
(Mr. 10:13-16; Lc. 18:15-17)

¹³ Na' ja'ac bene' jasesane' bidao' lao Jesúsēn' cont xoa ne'e yichjgache' na' nabe' lao Diosen' gaclene' legache'. Perw bene' ca' zjanaque' le' txen gosedi'e' bene' ca' zjanche'ebe'.

¹⁴ Nach Jesúsēn' gože'ne':

—Le güe' latje yesid bidao' ca' lagua' nga, na' bi gwžonle, le bene' ca' zjanac ca bidao' quinga, legaque' chosozenague' che Diosen' ben' zoa yaba cont chnabi'e yichjlažda'ogaque'.

¹⁵ Na' beyož gwžoa na' Jesúsēn' yichjgache' gwnabe' lao Diosen' gaclene'be', nach gwyeje' ga yoble.

Bene' güego' bene' goc bene' gwñi'a
(Mr. 10:17-31; Lc. 18:18-30)

¹⁶ Na' goquen', to bene' güego' bžine' gan' zoa Jesúsēn', na' gože'ne':

—Maestrw, le' naco' bene' güen. ĆBi da' güen cheya'la' gona' cont gata' yela' mban chia' toli' tocañe'?

¹⁷ Nach Jesúsēn' gože'ne':

—ĆBixchen' žo' naca' bene' güen? Toz bene' güen zoa, na' len' naque' Dios. Perw na' še chaclažo' gata' yela' mban chio' toli' tocañe, cheya'la' gono' can' non Diosen' mandadw goncho.

¹⁸ Nach gože' Jesúsēn':

—ĆBica' da' ca'?

Nach Jesúsēn' gože' le':

—Nono gotle, bi gata'lenle no'ol bi nac no'ol chele o bene' byo bene' bi nac bene' chele, bi cuanle, bitw güe'le diža' güenlaže' che bene' lježle.

¹⁹ Le gap bala'an xaxña'le, na' le gaque lježle can' chaque cuinle.

²⁰ Nach bene' güegon' gože' Jesúsēn':

—Yogo'lol da' quinga gwzola'gua' chonczan' cate' ne' nactia' bidao'. ĆBixe dan' chyažjeh gona'?

²¹ Jesúsēn' gože'ne':

—Še chaclažo' gaco' cayanen' chazlaže' Diosen', jayete' yogo' da' de chio', na' da' le'edo' chen bnežjon bene' yaše'. Nach še gono' ca', cate' yežino' yaba gan' zoa Diosen', da' zaca'ch gata' chio'. Na' še ba beyož beno' can' žia' le', nach sao' gaco' neda' txen.

²² Perw na' bene' güegon' cate' beyož bende' diža' can' gož Jesúsēn' le', beza'yaše', le bene' gwñi'achgua goque'.

²³ Gwde na' Jesúsēn' gože' bene' ca' zjanaque' le' txen:

—Da' li' žia' le'e, leca zdebe naquen to bene' gwñi'a gwzenague' che Dios ben' zoa yaba cont Diosen' nabi'e yichjlažda'ogüe'.

²⁴ Da' yoble žia' le'e, bedao'ch te to be xen be nzi' camello to lo' nag yeše' cled ca to bene' gwñi'a gwzenague' che Dios cont Diosen' nabi'e yichjlažda'ogüe'.

²⁵ Na' bene' ca' zjanaque' Jesúsēn' txen leca besyebande' cate' gosende' xtižen', nach gosene':

—ĆNoxen' šjayzoa len Diosen' še ca'?

²⁶ Jesúsēn' gwñe'e legaque', nach gože'ne':

—Bibi de da' gac yeson benačhen' cont šjasyenite' len Diosen', perw bi zoa da' nacho da' bi gac gon Dios.

27 Nach Pedroa' gože' Jesúsen':

—Neto' ba gwlejičhjo' yogo' da' de cheto' cont nacto' le' txen. ¿Bi da' güen gata' cheto' dan' ba gwlejičhjo' da' ca'?

28 Jesúsen' gože' legaque':

—Da' li žia' le'e, Diosen' gwsele' neda' golja' benach na' cate' yocobe' yežlion', neda' cui'a nabi'a güen juisyw can' chnabia' Dios ben' zoa yaba. Na' le'e šižinwle cue'le cuita' na' nabi'a'le šižinw cuen bene' ca' zjanaque' xi'in diaža che da' Israel.

29 Na' note'teze bene' ba gwlejičhje' liže', biše', zane', xaxne'e, xo'ole', xi'ine' o yežlio che', dan' chzenague' chia', Diosen' gwnežjue' le' da' zaca'ch da' xench ca' yogo' da' ca'. Na' lecze gata' yela' mban che' toli tocañe.

30 Perw zan bene' zjanaque' bene' žialao na'a, gwžin ža cate' yesaque' bene' bzebe. Na' bene' zjanaque' bene' bzebe na'a, gwžin ža cate' yesaque' bene' žialao.

20

Jempl che bene' güen žin ca'

1 Nach Jesúsen' gože' legaque': —Yela' gwnabia' che Diosen' ben' zoa yaban' zaca'leben ca da' nga goc. To bene' nape' to yežlio gan' že'chgua yag uvas. Na' gwze'e ližen to zil do cheni' gweyje' gan' chac ya'a jatiljue' bene' güen žin cont yesone' žin yežlio chen' žana'.

2 Na' gosexenlaže' bene' güen žin ca' to denario chixue' to toe' con ca chac mosen' tža žin. Nach gwsele' legaque' gan' jasene' žinna'.

3 Na' do cheda ga gozeje' gan' chac ya'an, na' ble'ede' nita'ch bene' bibi žin de yesone'.

4 Na' gože' legaque': “Lencze le'e le šja'ac gan' že' yag uvas chian' le šjen žin na' chixjwca' le'e ca cheyała.” Nach ja'ac bene' ca'.

5 Na' da' yoble gweyje' do guagwbiz na' do cheda šone. Bezle'ede' nita'ch bene' bibi žin chesone' nach gwsele' legaque' cont yesone' žin gan' že' yag uvas chen'.

6 Na' ca do cheda gayo' šeže'le gozeje' da' yoble ble'eczde' nita'ch bene' bibi žin chesone'. Na' gože' legaque': “¿Bixchen' bi gweyje žin?”

7 Nach gose'ene': “Notno gwne neto' šjento' xšine'.” Nach goze'e legaque': “Lencze le'e le šja'ac le šjen žin gan' že' yag uvas chian'. Na' chixjwca' le'e ca cheyała.” Nach ja'ac bene' ca'.

8 Na' cate' bžin hor bosa' xan yag uvasen' bene' güen žin ca', nach gože' mos blao chen': “Beyax bene' güen žin ca' cont chixjo'ne', solao chixjo' bene' ca' besela'ac bzebe, na' yeyožle len bene' ca' besela'ac da' nechw.”

9 Nach mos blaon' zgua'tec gwduxjue' bene' ca' gosezolagüe' gosone' žin cheda gayo' šeže'le tgüje denario to toe'.

10 Na' cate' gwduxjue' bene' ca' gosezolagüe' gosone' žin šezildao', gosacde' chixjoche' legaque' da' zcha'och dan' gosezolagüe' gosone' žin šezildao'. Perw tozcze can' gwduxjue' yogo'lołte'.

11 Na' cate' beyož gosezi' laxjw bene' ca' gosezolao žinna' šezildao', gosadoe' diža' xan žinna'.

12 Gose'ene': “Do ža bžaglaochguato' lo da' zeye' bento' žin chion'. Na' tozcze can' gwduxjo' neto' len bene' ca' besela' bzebe, len to hor güejgan' gosone' žin.”

13 Perw na' xan žinna' gože' toe': “Migw chia', bitwbi da' mal chona' len le'. ¿Gague gwxenlažo' to denario chixjua' to tole’?

14 Laxjon' ba gwxi'o, guac yeyejo'. Chaclaža' gwnežjua' bene' ca' to denario güeje con can' beña' le'e la'czła' besela'aque' bzebe.

15 ¿Bixchen' chxi'o neda' neche dan' naca' bene' šagüe'? Naquen lo na' gona' con ca chaclaža' len da' de čhia'."

16 Nach Jesúsen' gože' bene' ca' bosozenag jemplen':

—Can' naquen, nita' bene' zjanaque' bene' bzebe na'a, perw lecze gwžin ža cate' legaque' yesaque' bene' žialao. Na' nita' bene' zjanaque' bene' žialao na'a, perw gwžin ža yesaque' bene' bzebe. Diosen' chaxe' yogo'lol bene' cont yesejle'e čhe', perw bał guen' chosozenague' čhe', na' legacze' chbeje' cont chesaque' xi'ine'.

Da' yoble chyixjue'e Jesúsen' gate'

(Mr. 10:32-34; Lc. 18:31-34)

17 Jesúsen' len yezan bene' zja'aque' Jerusalénna'. Na' šlac zjangüe'e nezen' gwlejiže' bene' šižinw ca' gwleje' cont zjanaque' txen len le' na' gože' legaque':

18 —Na'a ba zejcho Jerusalénna' gan' yesone' neda' lo na' bžoz gwnabia' ca' na' lo na' bene' ca' chososed chosolo'ede' dan' bzoj da' Moisés, na' yesečhoglagüen' čhia' yesote' neda', neda' naca' ben' gwseła' Dios golja' benach.

19 Na' yesone'nda' lo na' bene' bi zjanaque' bene' Israel cont yesonle' čhia', na' yesot yesejine' neda', na' yesote'nda' yosode'e neda' le'e yag cruz, perw yeyon ža yebana' ladjo bene' guat ca'.

Xna' Jacobo na' Juanna' gwnabe'yesebe' xi'ine' ca' cuit Jesúsen' gan' nabi'ena'

(Mr. 10:35-45)

20 Na' ja'ac xi'in Zebedeo, Jacobo len Juan, na' len xna'gaque' lao Jesúsen'. Na' xna'gaquen' bzoa xibe' lao Jesúsen' gože'ne':

—Chnabda' le' to goclen.

21 Nach Jesúsen' gože'ne':

—¿Bi goclen chaclažo' gona'?

Nach xna'gaquen' gože'ne':

—Chaclaža' gono' cont xi'ina' quinga yesebi'e šla'a güeje cuito'na' cate' žin ža nabi'o.

22 Jesúsen' gože' Jacobo na' Juanna':

—Le'e cabi nezele bi dan' čnabile. ¿Gwčhejlaže'le tele yela' zi' yela' ya' ca dan' tia' neda' na' gac čhele can' gac čhia'?

Nach bosyoži'e xtižen' gose'ene':

—Gwčhejlaže'to'.

23 Nach Jesúsen' gože' legaque':

—Da' licze tele yela' zi' yela' ya' ca dan' tia' neda' na' gac čhele can' gac čhian', perw bi naquen lo na' nia' non' cue' cuitan' cate' žin ža nabi'a, san yesebe' bene' ba mbej Xa' Diosen' gaquen' čhe'.

24 Nach cate' yeši bene' ca' zjanaque' le' txen gosende' can' gosena bene' ca' chope, beseloque' legaque'.

25 Nach Jesúsen' goxe' yogüe' cont gosebigue' lagüen' na' gože' legaque':

—Nezeczzele bene' gwnabia' čhe to to nación na' bene' blao ca' chesone' byen chosozenag bene' čhegaque'.

26 Perw bi naquen ca' len le'e. San note'tezle chaclaže'le gacle bene' blao, cheyała' gwzewjwlaže'le gaclen bene' lježle.

27 Na' še note'tezle chaclaže'le gacle bene' žialao, cheyała' gon cuinle ca xmos bene' lježle.

28 Ca'cze naquen len neda' naca' ben' gwsela' Diosen' golja' beṇaḥ. Gague za'a cont yesaclen beṇe' neda' san za'a cont gaclena' beṇe', na' chzanlaže' cuina' yesote' neda' neḥe xtoḷa' beṇaḥen'.

Jesúsen' bene' cont chope bene' lḥolḷ besyele'ede'

(Mr. 10:46-52; Lc. 18:35-43)

29 Nach cate' besyeya'aque' ciuda Jericó, beṇe' zan zjasenagüe' Jesúsen' len beṇe' ca' zjanaque' le' txen.

30 Na' chope bene' lḥolḷ zjachi' chanez gan' zjayda Jesúsen'. Na' cate' gosacbe'ede' Jesúsen' zej gan' zjachi'ena' nach chososya'adie' gose'e le':

—Xanto', len' naco' xi'in diaža che da' rey Davin'. Beyaše'laže'šca neto'.

31 Nach beṇe' ca' chesyede gan' zjachi'ena' gosediḷe' legaque' cont yesenite' šize. Perw na' gosene' zižjeh gose'ene':

—iXanto', len' naco' xi'in diaža che da' rey Davin', beyaše'laže'šca neto'!

32 Jesúsen' gwleze' gan' nite'na', nach goxe' legaque' gosebigue' lagüen'. Nach gože'ne':

—¿Bin' chaclaže'le gonda' le'e?

33 Nach gose'ene':

—Xanto', chaclaže'to' yele'eto'.

34 Jesúsen' beyaše'laže'de' legaque' na' gwdane' yejlaogaquen', nach la' besyele'etede', na' gos'aogüe' le'.

21

Gosonxene' Jesúsen' cate' beyo'e Jerusalén

(Mr. 11:1-11; Lc. 19:28-40; Jn. 12:12-19)

1 Na' cate' ba zoa yesežine' Jerusalénna' besežine' gan' chi' yež Betfagé, gan' zoa ya'a dan' nzi' Ya'a Olivos. Na' Jesúsen' gwsele' mandadw chope beṇe' ca' zjanaque' le' txen,

² gožgaque'ne':

—Le šja'ac yež dan' chi' gaḷa'ze, na' cate' žinlen' na' yeže'ele to burr be no'ole da'ba' yag na' nche'te to xi'inda'oba'. Le sežgacba' na' le che'gacba' nga.

3 Na' še bi ye' beṇe' le'e na' ye'lnē': “Xanto'na' chyažjde' legacba'.” Na' la' yedyesantecze'ba' len le'e.

4 Goc yogo' da' qui cont goc can' bzoj to ben' bzoj Xtiza' Diosen' cani', gwne':

⁵ Gož beṇe' ca' nita' Jerusalénna':

“Le na'šc, ba za' rey chelen',

žie' cože' to burr dao', xi'in beyixē' be choa' yoa'.

Ze'e ca to beṇe' bi naque' beṇe' blaō.

6 Na' ja'ac beṇe' ca' yež dao' dan' gož Jesúsen' legaque' ca', na' gosone' can' ben' Jesúsen' mandadw.

7 Na' besyeče'e burroa' len xi'inba' lao Jesúsen' na' gosexoa no xagaque' cože'ban' na' gwžia Jesúsen' be daon' cont gwyeje' Jerusalénna'.

8 Na' beṇe' zan gosonxene' Jesúsen' goseyixjw no xagaque' lo nez cont blej burron' len na' yebale' gosechogue' xoze' yag na' goseyixjuen' lo neza'.

⁹ Na' beṇe' zjažialao na' lecze beṇe' za'ac cože' bososye'e gosene':

—iLeca beṇe' zaca' benga nac xi'in diaža che da' rey David! iMbalaz ben' za' nga gwsela' Xancho Diosen' le' cont nabi'e! iLeca beṇe' zaca' ben' zoa yaban'!

10 Na' cate' bžin Jesúsen' Jerusalénna' yogo' beṇe' ca' že' ciudan' besyebande', na' gosene':

—¿No benga bla' nga?

11 Na' bene' ca' nžag Jesúsen' bosyoži'e xtiža'gaque' gosene':
—Bengan' Jesús bene' za' yež Nazaret gan' mbane distritw Galilea na' cho'e xtiža' Dios.

Jesúsen' bebeje' bene' ca' cheson ya'a yodao' blaon'
(Mr. 11:15-19; Lc. 19:45-48; Jn. 2:13-22)

12 Na' Jesúsen' gwyo'e chy'o yodao' blaon' na' bešaše' yogo' bene' ca' chesote' na' bene' chesa'o na'. Nach bchiže' xmes bene' ca' chosoša' mechw, na' yag ga chesebe' bene' ca' chesote' ngolbex.

13 Na' gože' legaque':

—Nyojcze Xtiža' Diosen' žan: “Yesene' ližan' naquen to latje gan' yesoļ güiž bene' neda'”, perw le'e chonlen ca to latje ga že' bene' gwban.

14 Na' bene' lchoļ ca' na' len bene' ca' nxinj ni'e gosebigue' lao Jesúsen' šlac zoe' chy'o yodao'. Nach beyone' legaque'.

15 Perw na' bžoz gwnabia' ca' na' bene' ca' chososed chosolo'e dan' bzoj da' Moisésen' leca beseže'e cate' besele'ede' yela' guac ca' dan' ben Jesúsen'. Na' lecze beseže'e cate' gosende' can' bososya'a bi' bixjw ca' chy'o yodao' blaon', gosenabe': “Leca bene' zaca' beng a nac xi'in diaža che da' rey David.”

16 Nach gose'e Jesúsen':

—¿Zendo' bin' gosena bidao' ca'?

Jesúsen' boži'en gože' legaque':

—Zenda'. ¿Biņa' gwlable can' nyoj Xtiža' Diosen'?, žan:

Ba beno' cont bi' bixjw ca' na' len bi' ne' chesaže' chesonxembe' le'.

17 Na' bechoje' gan' nita' bene' ca' na' beze'e ciudan'. Na' že'na' jayga'ane' Betania.

Ben Jesúsen' cont gwbiž yag yixgüigw
(Mr. 11:12-14, 20-26)

18 Na' zil beteyo besyeya'aque' Betanian' jaseya'aque' Jerusalénna' da' yoble. Na' šlac zjangüe'e nezen' gwdon Jesúsen'.

19 Na' ble'ede' to yag yixgüigw zoan cho'a nezen' na' jañe'e še žia yaguen' yixgüigw. Perw bibi bželde', con xlaguen' na'ze žia. Nach gožen':

—Bich bi yixgüigon' cuio'.

Na' la' gwbižte yaguen'.

20 Nach bene' ca' zjanaque' le' txen besyebande' cate' besele'ede' can' goquen', nach gose'ene':

—¿Nac goquen' la' gwbižte yaguen'?

21 Na' Jesúsen' gože' legaque':

—Da' li žia' le'e, še chejnilaže'le Diosen' na' bitw gacžejlaže'le, guaque gonle can' ba benan' cont gwbiž yaguen'. Na' lecze ca' guac ye'le ya'a nga: “Gwcuase ga na' jaso a lo' nisaon'”, na' gac can' nalen'.

22 Na' še chejnilaže'le Diosen', bite'teze dan' nabelene' cate' yoļ güižlene', gonczen' le'e.

Yela' chnabia' che Jesúsen'
(Mr. 11:27-33; Lc. 20:1-8)

23 Nach Jesúsen' gozeje' yodao' blaon' da' yoble. Na' šlac chsed chlo'ede' bene' ca' že' na', bžoz gwnabia' ca' na' bene' gole blao ca' chesenabi'e nación chechon' gosebigue' cuit Jesúsen'. Nach gosenabde' le':

—¿Bi yela' gwnabia' napo' chono' da' qui? ¿No ben yela' gwnabian' cont chono' da' qui?

24 Nach Jesúsen' boži'e xtiža'gaquen', gwne':

—Lecze de to da' nabda' le'e. Še yoži'ile xtižan' nach nī'a le'e bi yela' gwnabia' chonlenda'.

²⁵ Le našč neda': ¿non' gwseła' da' Juanna' bzoe' bene' nis? ¿Dios nan' gwsele'ne', še benachen'?

Nach legacze' gose' lježe':

—Še ye'chone' Dios gwseła' le', na' ye'e chio': "¿Bixchen' ca gweyje'le' che'?"

²⁶ Na' bi gac ye'chone' benach gwseła' le', le yogo'te bene' že' nga chesejle'e Diosen' gwsele' da' Juanna' be'e xtiže'na', na' xož bi yesonde' chio'.

²⁷ Nach gose'e Jesúsen':

—Bi nezeto'.

Nach gože' legaque':

—Lecze neda' bi yapa' le'e bi yela' gwnabian' chonlenda' da' ca'.

Jempl che chope xi'in bene'

²⁸ Na' Jesúsen' gože' legaque':

—Le gon xbab bi zeje jempl nga: Gwzoo to bene' gwnita' chope xi'ine'. Na' gože' tobe': "Xi'ina', chaclaža' šejo' güen žin na'aža gan' že' yag uvas chia' ca'."

²⁹ Nach xi'inen' gožbe' le': "Bitw ša'a." Perw gwdele beyombe' xbab nach gweyjebe'.

³⁰ Nach gozeje' gan' zoa xi'inen' yeto, na' ježe'be' can' gože' bi' biše'ben'. Na' la' gožte bin' le': "Guacze, na' ša'a." Perw bitw gweyjebe'.

³¹ Gwnašč neda', ¿no bi' ca' chope ben can' gwnalaže' xabe'?

Nach gose'ene':

—Bi' nechoa'.

Nach Jesúsen' gože' legaque':

—Ca'cze naquen. Na' da' li žia' le'e, bene' güechixjw ca' na' no'ole ca' chja'aclen notē'teze bene' byo yobech yosozenague' che Diosen' cont nabi'e yichjlažda'ogaque' clcl ca' le'e.

³² Ca nac Juanna' ben' bzoe' bene' nis, bide' laolen' na' gwduxjue'ede' le'e naquen' cheyala' gonle cont yebe Diosen' le'e. Perw bitw gweyje'le' che'. Na' bene' güechixjw ca' na' no'ole zle' ca' gosejle'e che'. Na' cate' gocbe'ele bene' ca' ba gosejle'e che', bitw betinjele xtoła'le ca' cont šejle'le che dan' bsede da' Juanna'.

Jempl che mos mal ca'

(Mr. 12:1-12; Lc. 20:9-19)

³³ Le gwzenag yeto jempl nga. Gwzoo to bene' na' goze' to cue' xen yag uvas lo yežlio che' na' gwlo'en le'ej. Na' na'teze bene' to ga yesesie' uvasen' cont choj xisen'. Na' lecze bene' to da' sibe ca to campanaryw ga yesecua' bene' yosogüia yesene'e yag ca'.

'Na' bcua'ane' yežlion' lo na' bene' yesonši'e yag uvasen' na' gwze'e gweyje' zito'.

³⁴ Cate' bžin ža yosyotobe' cosešen', gwsele' to chope xmose' gan' že' bene' ca' nac lo na'gaque' yag uvasen' cont šjasyexi'e to tlaw cosešen' dan' cheyala' si'e.

³⁵ Perw na' bene' ca' nac lo na'gaque' yag uvasen' gosezene' mos che' ca'. Goseyine' toe', na' yetoe' bosozie'ne' yej, nach yetoe' gosote'ne'.

³⁶ Nach gossela' xan yag uvasen' mos zanch clcl ca' bene' ca' gwsele' da' nechw, perw lecze can' gosonde' bene' nechw ca', lecze ca' gosonde' legaque'.

³⁷ 'Nach gwdena' xan yežlion' gwsele' cuinče xi'inen', godde' yesezi'e xtižen'.

³⁸ Perw na' bene' ca' nac lo na'gaque' yag uvasen' cate' besele'ede' xi'ine'na', nach gose' lježe': "Bengan' yega'anlene' yežlio nga cate' gat xən'. Le šo'o gotchone' cont yega'anlenchon."

³⁹ Nach gosezene'ne', besyebeje'ne' gan' že' yag ca' na' gosote'ne'.

⁴⁰ Beyož be' Jesúsen' jempl nga, gozne':

—¿Nacxe chaquele gon xan yežlion' len bene' ca' bocua'anlene' yag uvasen' cate' yežin cuine'?

⁴¹ Nach bosyoži'e xtižen' gosene':

—Šeje' šjetoe' bene' mal ca', na' yodie' yežlion' lo na' bene' yoble bene' yeson güen yosyonežjue'ne' to tlaw cosešen' cate' žin ža yosyotoben'.

⁴² Jesúsen' gože' legaque':

—Ca'czen'. ¿Biña' gwlable ga nyoj Xtiža' Diosen', žan quinga?:

Yej dan' bi gosaclaže' bene' güen yo'o ca' yosočhine', len ba naquen yej squin.

Da' nga ben Xancho Diosen',

na' naquen to da' yežejecho.

⁴³ Da'nan' žia' le'e, da' bi chzenagle che Diosen', cuejyichje' le'e na' cueje' bene' yoble bene' yosozenag che' cont nabi'e yichjlažda'ogaque'.

⁴⁴ Na' ca' nac yejen', note'teze bene' lažo' lo yeja' na' cue'žošje', na' note'teze bene' chiže' yeja' cate' lažon' na' gwšošjen le'.

⁴⁵ Na' bxož gwnabia' ca' na' bene' fariseo ca', cate' gosende' jempl ca' dan' be' Jesúsen', gosacbe'ede' be'e diža' che legaque' dan' bi chesejnilaže' le'.

⁴⁶ Nach gosaclaže' yesezene' le', perw besežebe' bi yesone bene' ca' nžague' legaque', le yogüe' gosejle'e gwseļa' Diosen' Jesúsen' cont cho'e xtiže'na'.

22

Jempl che ben' bene' lni cate' bšagna' xi'ine'

¹ Na' da' yoble bsd blo'e Jesúsen' bene' ca' len jempl, gozne':

² —Yeļa' gwnabia' che Diosen' zaca'leben ca' da' nga goc. Gwzoa to bene' gwnabia' na' bene' gastw cate' bšagna' xi'ine'.

³ Na' cate' bžin hor solao lnin' gwseļe' xmore' ca' cont jasexi'e bene' ca' ba boļ güiže' šja'ac lnina', perw notno goclaže' šja'ac lni' chen'.

⁴ Nach gože' yeto xonj xmore' ca': "Le šjež bene' ca' ba boļ güižan' ye'ln'e' ba bsiņi'a dan' gagwchona'. Ba betua' be dao' be chesaņe' na' ba bsiņi'a dan' gagwcho lo lnin'. Na' ye'ln'e' yeside' gagwcho dan' ba bsiņi'an'."

⁵ Perw bene' ca' ba gosata'yoede' cont šja'aque', bitw gosone' cuent dan' gose' mos ca' legaque'. Toe' gwyeje' jane'e yežlio che', na' yetoe' gwyeje' jene' negosyw.

⁶ Na' yebale' gosenize' mos ca' gwseļa' bene' gwnabian' na' gosonde' legaque' zi' na' gosote' legaque'.

⁷ Na' leca bža'a bene' gwnabian'. Na' gwseļe' soldadw che' ca' jasete' bene' ca' gosot xmosen' na' bosozeye' lažgaquen'.

⁸ Nach bene' gwnabian' gože' xmosen': "Ba bsiņi'a dan' gagwcho lo lnin', perw bene' ca' ba boļ güiža' nachbia' bitw zjazaque' yeside'.

⁹ Le šja'ac le šjata yogo' nez na' ye'le yogo' bene' yežagle yeside' lnin'."

¹⁰ Na' mos ca' ja'aque' yogo' nez na' jasetobe' con yogo' bene' besežague', no bene' naque' bene' güen na' no bene' naque' bene' mal, cont beža' yo'o gan' chac lnin'.

11 'Perw cate' gwyo'o bene' gwnabian' jane'e bene' ca' že'na' na' ble'ede' to bene' bi nyaze' lache' da' bnežjue' yesaze' lo l̄nin'.

12 Nach gože' le': "Migw chia', ĩnac goquen' gwyo'o nga bitw nyazo' lache' dan' bena' chazo'?" Nach bena' bitw beželde' bi ye'ene'.

13 Nach bene' gwnabian' bene' mandadw yosochej xmore' ca' ni'a na' bena' cont yesyebje'ne' na' yesebeque'ne' gan' nac chol, ga cuežyaše' na' gan' gagwexjte laye' tantw žaglagüe'.

14 Can' naquen, Diosen' chaxe' yogo' bene' cont yesejle'e che', perw bal guen' chosozenague' che' na' legacze' chbeje' cont yesaque' xi'ine'.

*Ca nac dan' cheyala' gaxjw
(Mr. 12:13-17; Lc. 20:20-26)*

15 Nach bene' fariseo ca' besežague' na' bosoxi'e naclen' yesone' cont yesebeje' Jesúsen' diža' da' yosode'ede' cont yesagüe' xya che'.

16 Na' bene' fariseo ca' gosesele' bal bene' zjanaque' txen len legaque' na' yebal bene' chesone' txen len Herodesen' cont jaseže' Jesúsen':

—Maestrw, nezeto' zoatezo' cho'o diža' li. Na' nezeto' diža' li cho'o chsed chlo'edo' bene' can' chazlaže' Diosen' goncho. Na' bi chono' cuent bi ža bene', le toz can' chono' len note'teze bene'.

17 Da'nan' zedenabeto' le' cont nao' neto' can' chacdo' cheyala' gonto'. ĩNaquen binlo no chixjw da' cheyala' chixjwcho lao ben' nac la'zelagüe bene' gwnabia' ben' chi' Roma, še bi?

18 Jesúsen' goche'ede' yela' xi'a chegaquen', nach gože' legaque':

—ĩNacle bene' gwxiye'! ĩBixchen' chaclaže'le yoslažo'le neda' len xtižan'?

19 Le gwlo'e neda' to mechw dan' chyixjwle che gobiernen'.

Nach goso'ene' to mechw dan' nzi' denario.

20 Nach Jesúsen' gože' legaque':

—ĩNo lao dan' da' le'e mechw nga? na' ĩno la da' nyoj le'en ni?

21 Nach gose'ene':

—Che César ben' nac la'zelagüe bene' gwnabia' ben' chi' ciuda Roman'.

Nach Jesúsen' gože' legaque':

—Le gwnežjo bene' gwnabian' da' nac che bene' gwnabia', na' le gwnežjo Dios da' nac che Dios.

22 Nach cate' gosende' xtiža' Jesúsen' besyebande'. Nach besyeya'aque' gan' zoe'na'.

*Cate' yesyeban bene' guat ca'
(Mr. 12:18-27; Lc. 20:27-40)*

23 Na' lo ža na'teze besežin bal bene' saduceo gan' zoa Jesúsen'. Bene' ca' chesene' bene' guaten' bi yesyebane'. Nach gosenabde' le', gose'ene':

24 —Maestrw, da' Moisésen' gwne': "Še to bene' byo nšagne'e na' gate' sin nono xi'ine' zoa, bene' biše' ben' ba goten' cheyala' yošagna'lene' no'ol güezeba' cont yesenita' xi'in diaža che da' bišen'.

25 Na' len neto' gosenita' bene' gosac gaž biše'. Na' bene' nechua' bšagne'e, na' gote' nono xi'ine' gwnita'. Na' bene' gwchopen' bošagna'lene' no'ol güezeba'.

26 Na' lecze gote' nono xi'ine' gwnita'. Leczze ca' goc len bene' gwyona', bžinten bene' gaža' yogo'lole' gosac che' ca'.

27 Na' gwde gosat yogo'lol bene' ca', nach got len no'ola'.

28 Na' cate' yesyebane' ladjo bene' guat ca', ĩnox bene' ca' soalene' no'ola' ca' xo'ole'?, le yoguen' bosyošagna'lene' le'.

29 Na' gož Jesúsen' legaque':

—Clelen' chonle xbab dan' žale ca', le bi nezele can' ža Xtiža' Dios dan' nyojen, neca nombia'le yela' guac chen'.

³⁰ Caten' yesyeban bene' guat ca', bich yosošagne'e, neca yosonežjo xi'ine' no'ol gwšagne'e, le yesaque' ca angl bene' zjazoa yaba.

³¹ Na' ca nac dan' yesyeban bene' guat ca', žbina' gwlable da' nga can' nyoj Xtiža' Diosen'? žan:

³² “Neda' naca' Dios ben' chonxen Abraham, ben' chonxen Isaac na' ben' chonxen Jacob”. Bene' guat ca' bi chesonxene' Diosen', san bene' zjamban.

³³ Na' bene' ca' zjanžaguen' besyebande' cate' gosende' diža' dan' bsed blo'ede' legaue'.

Dan' nac da' blaoch dan' ža Diosen' cheyala' goncho

(Mr. 12:28-34)

³⁴ Na' cate' gosenē bene' fariseo ca' can' bzoaži Jesúsen' bene' saduceo ca', nach besedobe' jasa'aque' lagüen'.

³⁵ Na' to ben' nsedchgüe' ley dan' bzoj da' Moisés lecze goclaže' cueje' Jesúsen' diža' da' gwchine' contr le', gože'ne':

³⁶ —Maestrw, lo ley che Diosen', žnon' nacch da' žialao da' zjanyojen da' ža Diosen' cheyala' goncho?

³⁷ Nach gož Jesúsen' le':

—“Cheyala' gaquecho Xancho Diosen' con ca zelao chejni'icho do yichj do laže'cho.”

³⁸ Lenna' naquen da' žialaoch na' da' blaoch lagüe da' ca' ža Diosen' cheyala' goncho.

³⁹ Na' da' gwchopen' zejgalan' ca', žan: “Cheyala' gaque lježcho ca' chaque cuincho.”

⁴⁰ Čhope da' ca' ža Diosen' cheyala' goncho chzejni'in chio' can' zeje doxen dan' bzoj da' Moisésen' na' dan' bosozoj bene' ca' goso'e xtiža' Diosen' cani'.

Criston' naque' xi'in diaža che da' rey David

(Mr. 12:35-37; Lc. 20:41-44)

⁴¹ Na' šlac ne' zjanžag bene' fariseo ca',

⁴² Jesúsen' gože' legaue':

—žBixe xbab chonle che Criston' ben' gwlej Diosen' cont yedenabi'e? žNo xi'in diaža che naque'?

Na' gose'ene':

—Xi'in diaža che da' rey Davin'.

⁴³ Nach Jesúsen' gože' legaue':

—Še ca' naquen, žbixchen' cate' da' David bzoje' can' blo'e Spiritw che Diosen' le', gwne' Criston' naque' Xane'? Quinga bzoje':

⁴⁴ Xancho Dios gože' Xanan':

“Gwche'edo' cuita' nga nabia'cho txen, na' gona' cont yogo' no chesegue'e le' yosozexjw yichje' yosozenague' chio'.”

⁴⁵ žNacxe gac nacho Criston' xi'in diaža che da' rey David? le' cuin Davin' gože' le': “Xana”.

⁴⁶ Na' notoch no goc yoyoži'e xtižen'. Na' gwzolao žana' notoch no besyeyaxje bi yesenabde' Jesúsen'.

23

Xtola' bene' fariseo ca' na' bene' ca' chososed chosolo'e leyna'

(Mr. 12:38-40; Lc. 11:37-54; 20:45-47)

1 Nach Jesúsen' gwzolaŋ be'e diža' len bene' ca' zjanaque' le' txen na' len bene' ca' zjanžague' gan' zoe'na', gwne':

2 —Bene' ca' chososed chosolo'e ley na' bene' fariseo ca' ba zjanlane' xlatje da' Moisésen' cont chosozejni'ide' bene' ley che Diosen'.

3 Na' da'nan' cheyała' gwzenagle chegaque' cate' chosozende' le'e can' ža ley'na', na' cheyała' gonle can' chosozejni'ide' le'e. Perw bitw gonle can' cheson legaque', le legaque' bitw chesone' dan' chesene' cheyała' gac.

4 Legaque' chosozanche' dan' ža ley'na'. Chesonen' ca to yoa' da' nono soe gua' na' chesaclaže' gua' bene' yoble len na' bitw chesaclaže' yeso'en legaque'.

5 Ca nac bene' ca, yogo' dan' chesonen', chesonen' ga yesele'e bene' can' chesonen' contze yesonxene' legaque'. Chio' bene' Israel nchejcho caj dao' de yid do na'cho na' do loxgacho na' lo' caj dao'na' chgo'ošagüe'cho to pedas yiš gan' nyoj late' güeje Xtiža' Diosen'. Perw ca nac bene' ca' chososed chosolo'e ley che Diosen' na' bene' fariseo ca', zjanonche' caj dao' chegaque' da' xench ca yezica'chle bene'. Na' ľecze chesone' lox xagaque' da' tońech clcl ca che bene' yezica'chle.

6 Chesyebede' chesebi'e gan' chesebe' bene' blao cate' chja'aque' gan' chac no ľni na' cate' chja'aque' yodao' chegaque'.

7 Chesyebede' chesap bene' legaque' bala'an cate' chesyežague' lagüe ya'a. Na' chesyebede' yese' bene' legaque' maestrw.

8 'Perw žia' le'e, bi gonle byen ye' bene' le'e maestrw, le toz neda' Cristo naca' Maestrw chele. Na' yogo' le'e chejnilaže'le neda' nac biše' ľježle tole yetole.

9 Na' ľecze bitw gonxenle note'teze bene' blao ye'ľne': "Xato". Toze Diosen' ben' zoa yaba naque' Xacho.

10 Na' bitw güe'le latje ye' bene' le'e: "Xana", le toz neda' Cristo naca' Xanle.

11 Še no le'e nacle bene' blaoch, cheyała' gwzexjw yichjle gaclen ľježle.

12 Le note'teze bene' chonxen cuine', Diosen' gone' cont si'e zto' lagüen'. Na' note'teze bene' chzexjwlaže' lagüen', Diosen' gone' cont gaxcene'.

13 'iNyaše'chguaze gac che le'e chsed chlo'ele ley dan' bzoj da' Moisésen' na' le'e bene' fariseo! Chziye'le bene' cont bi yosozenague' che Diosen', le bi chaclaže'le nabia' Diosen' yichjlažda'ogaque', na' ľecze le'e bi chzenagle che Diosen' cont nabi'e yichjlažda'olen'.

14 'iNyaše'chguaze gac che le'e chsed chlo'ele ley dan' bzoj da' Moisésen' na' le'e bene' fariseo! Chziye'le no no'ole güezebe cont checa'ale yo'o chegaque'. Na' cate' chol güizle Diosen', sša choe'le diža' cont yesaque' bene' ľeca chonxenle'. Gacchle castigw clcl ca yezica'chle bene' güen da' xinj.

15 'iNyaše'chguaze gac che le'e chsed chlo'ele ley dan' bzoj da' Moisésen' na' le'e bene' fariseo! iNacle bene' gwxiye'! Chejtez chejle chjatiljwle bene' zito' bene' yeson txen len dan' chsed chlo'elen'. Na' cate' chzelelene' chzejni'ľne' cont yesaque' bene' xi'ach clcl ca le'e.

16 'iNyaše'chguaze gac che le'e! iNacle ca bene' ľchol bene' chesacde' guac yesegüe'e nez bene' yoble! Žale note'teze bene' še ne': "Yodao' blaon' zoan testigw chia' gona' can' ba gwnia'", bitwbi zejen dan' chnen'. Perw še že': "Oro dan' de lo' yodaon' zoan testigw chia' gona' can' ba gwnia'", nach cheyała' gone' can' gwnen'.

17 iLe'e nacle ca to bene' ľchol na' bitw chejni'ile! Oron' bitec bi zacan'. Yodao'na' gan' yo'o oron' ľenna' zaca'chen, le dan' yo'o oron' lo'enna', da'nan' oron' naquen che Dios.

18 Na' ľecze žale še to bene' že': "Mes gan' chosozeye' beyixe' ca' chesonxene' Diosen', zoan testigw chia' gona' can' ba gwnia'", bitwbi zejen xtižen'. Perw

na' še že': "Dan' xoa lo mes lo' yodaon' zoan testigw chia' gona' can' ba gwnia'", nachen' cheyala' gone' can' gwnen'.

19 ¡Le'e nacle ca bene' lchol na' bitw chejni'ile! Dan' chosozeye' chesonxene' Diosen' bitec bi zacan'. Mes gan' chesexoe' dan' chosonežjue' Diosen', lenna' zaca'chen, le naquen che Dios.

20 Še bene' že': "Mes dan' zoa lo' yodaon' zoan testigw chia' gona' can' ba gwnia'", lencze dan' xoa lo mesen' zoan testigw che'.

21 Na' še bene' že': "Yodaon' zoan testigw chia' gona' can' ba gwnia'", lecze zejen Diosen' naque' testigw che', le yodaon' naquen che Dios na' nan' zoe'.

22 Na' še bene' že': "Yaban' zoan testigw chia' gona' can' ba gwnian'", zejen Diosen' naque' testigw che', le nan' zoa Diosen' chnabi'e.

23 ¡Nyaše'chguaze gac che le'e chsed chlo'ele ley dan' bzoj da' Moisés na' le'e bene' fariseo! ¡Nacle bene' gwxiye'! La'czla' chnežjwle Diosen' to part lao ši part che yixegüej, che oreg, che comin, na' che bichle cuan chele, bibi zejen dan' bitw chzenagle che da' ca' zjanac da' žialaoch dan' ža leyna'. Leyna' žan cheyala' gonle da' nac güen lao Diosen', na' cheyala' yeyaše'laže' ljež benachle na' cheyala' gonle can' ba gwlo'o cho'ale gonle. Da' ca' zjanaquen da' zejehen gonle, perw lecze bitw cheyala' cuejyichjle bi gwnežjwle da' ca' chnežjwle Diosen'.

24 ¡Nacle ca to bene' lchol bene' chesacde' guac yesegüe'e nez bene' yoble! Zaca'lebele ca to bene' chebej yogo' beb dao' riz da' nchiže da' che'eje' perw bitw chache'ede' še yo'o to da' xen juisyw da' zaca' yebeje'. Le chi' yichjle che da' ca' bitec bi zaca' da' ža ley chechon' cheyala' goncho, na' bi chonle da' ca' zjazaca'chguan.

25 ¡Nyaše'chguaze gac che le'e chsed chlo'ele ley dan' bzoj da' Moisés na' le'e bene' fariseo! ¡Nacle bene' gwxiye'! Zaca'leble ca ye'eñ dan' chchin bene' na' chyibe' cožen' perw bi chyibe' lo'en. Chonle cont chesaque bene' nacle bene' güen, perw leca chzelaže'le bi da' de che bene' na' chbechgüe'e chca'alén.

26 ¡Le'e bene' fariseo, nchol yichjlažda'olen! Le yetinje xtola'le cont da' licze gacle bene' güen can' chaclaže'le yeson bene' xbab nacle. Nach gacle ca to ye'eñ dan' nyibe' cožen' na' lo'en.

27 ¡Nyaše'chguaze gac che le'e chsed chlo'ele ley dan' bzoj da' Moisés na' le'e bene' fariseo! ¡Nacle bene' gwxiye'! Zaca'leble ca to ba dan' zjanone' xdanchgua lagüen perw lo'en že' žit che bene' guat na' chi'chgua da' zban.

28 Chonle cont chesaque bene' nacle bene' güen, perw len yichjlažda'olen' nacle bene' gwxiye' na' bene' malchgua.

29 ¡Nyaše'chguaze gac che le'e chsed chlo'ele ley da' bzoj da' Moisés na' le'e bene' fariseo! ¡Nacle bene' gwxiye'! Chonšagüe'le cho'a ba che da' bene' goso'e xtiža' Diosen' cani', na' chonšagüe'le cho'a ba che yezica'chle bene' goson da' güen.

30 Na' žale: "Šaca' chio' ba zoacho ca tiemp che da' xozxta'ocho ca', bitw bencho txen len legaque' cate' gosote' bene' ca' goso'e xtiža' Diosen' cani'."

31 Perw na' yogo'lolte dan' chonle chlo'en toczce can' nacle len da' xozxta'ole ca' bene' gosot da' bene' ca' goso'e xtiža' Diosen' cani'.

32 Le gwza'laošaze le gon bica'ch da' zgot dan' bitw goła' yeson da' xozxta'ole ca'.

33 'Le'e nacchgualé bene' zgot na' bene' gwxiye'. Bitw gac yelale lao castigw dan' gon Diosen' le'e, le sele' le'e lo'yi' gabilen'.

34 Na' da' gona', neda' sela' no bene' yeso'e xtiža'na' len le'e na' no bene' sina' na' nochle bene' yososedde' le'e xtižan'. Na' gotle baļe' gwda'gaclene'

to le'e yag cruz, na' yebale' chinle do lo' yodao' chelen', na' yebale' gwlaglene' gate'teze yež šja'aque'.

³⁵ Na' dan' gonle ca' gapple dola' che yela' got che yogo' bene' ca' goson da' güen, ben' gosot da' xozxta'ole ca' gwzolaozen len da' Abel ben' naque' bene' güen lao Diosen' na' beyožen len da' Zacarias xi'in da' Berequías. Zacariasen' gosote'ne' do gan' zoa yodao' blaon' na' do gan' ze mes gan' chosozeye' beyixe' chesonxene' Diosen'.

³⁶ Na' da' li žia' le'e, le'e mbanle na'a si'le castigw che yela' got che yogo' bene' ca' gosot da' xozxta'ole ca'.

Begüine' Jesús'en che xtolá' bene' Jerusalén

(Lc. 13:34-35)

³⁷ Le'e bene' Jerusalén, chotle bene' ca' chsela' Diosen' cont chesoe'lene' le'e xtižen' chchellene' yej. Zan ni'a ba goclaža' yotoba' le'e ca to jed xcaca' ben' nche' xi'in na' chyežba' legacba', perw bitw goclaže'le.

³⁸ Na' na'a ba gwlejiyichj Diosen' le'e.

³⁹ Na' žia' le'e, bich le'ele neda' na'a, perw cate'ch žin ža le'ele neda' yeto nach nale: "Mbalaz ben' za' nga nselá' Xancho Diosen' le' nabi'e".

24

Gwžin ža yosyochinje' yodao' blaon'

(Mr. 13:1-2; Lc. 21:5-6)

¹ Na' ba cheza' Jesús'en yodao' blaon' šeje' ga yoble cate' bene' ca' zjanaque' le' txen gosebigue' gan' zoe'na' na' gosezolagüe' goso'e diža' catec xdan nac yodaon' na' lece ca' yo'o ca' zjanyechjen.

² Nach Jesús'en boži'e xtiža'gaque' gwne':

—Ca nac yogo' da' quinga chle'ele, da' li žia' le'e, ne to yej da' zjancua' nga ca yega'an zjancua' cože' lježen. Yogon' yosyochinje'.

Dan' gac cate' ba za' bagwze yeyož yežlio nga

(Mr. 13:3-23; Lc. 21:7-24; 17:22-24)

³ Na' ja'aque' Ya'a Olivos. Na' cate' Jesús'en' ba chi'e lo ya'an, bene' ca' zjanaque' le' txen gosebigue' lagüen' gose'ene' šižize:

—Che'neto' nao' neto' batcan' gac da' ca'. Na' žnac gac nezeto' cate' ba zoa bagwze yido' na' ba zoa yeyož yežlion'?

⁴ Nach Jesús'en' boži'e xtiža'gaquen' gwne':

—Le gwsaca' cont notno siye' le'e.

⁵ Le zan bene' yesaš yežlio nga bene' yesaclaže' yosolane' xlatja' nga. Na' yesene': "Nedan' Cristo ben' gwlej Diosen' cont nabi'e." Na' yeseziye'e bene' zan.

⁶ Na' yenele chac gwdile nile nale, na' yenele guac gwdile, perw bi žeble, le can' cheyala' gac. Perw gague lenna' nacho ba bžin ža yeyož yežlion'.

⁷ Le yesedil to yež len yeto yež yoble na' to nación len yeto nación yoble. Na' cue' yižgüe', na' gata' gwbin na' zan cuen ga xo'chgua lo yežlion'.

⁸ Perw na' yogo' da' qui gac cate' za' solao gata' yela' zi'.

⁹ Nach bene' ca' že' yogo' nación yesegue'ede' le'e dan' chejnilaže'le neda' na' yesone' le'e lo na' bene' ca' chesegue'e le'e na' yososaca'zi'e le'e nach yesote' le'e.

¹⁰ Cana' bene' zan bene' ba chesejnilaže' neda' yesebejiyichje' bich yesejnilaže' neda'. Na' legacteze' yesechje' yeson lježgaque' lo na' bene' da' chesegue'ede' legaque'.

11 Na' bene' zan yesonlaže' yesene' xtiža' Diosen' cheseyixjue'ede' na' yeseziye'e bene' zan.

12 Na' lagüe dan' šanch bene' ca' yeson da' malen', bene' zan juisyw bene' ba chesejnilaže' neda' bich yesacde' lježe'.

13 Perw na' note'tezle gwyo gwčhejlaže'le cont bi cuejyichjle dan' chejni-laže'le neda' žinten gatle, nach šjazyoale len Diosen'.

14 Na' šja'ac bene' doxen lo yežlion' yeseyixjue'ede' diža' güen cont yeseneze benachen' cheyala' yosozenague' che Diosen' nach nabi'e yichjlažda'ogaque'. Na' cate' bene' že' yogo' nación ba zjanezde' da'na', cana'ch yeyož yežlion'.

15-16 'Da' Daniel ben' gwdixjue'ede' xtiža' Dios cani' bzoje' che da' zbranchua da' gwxiñjen latje gan' chonxencho Diosen'. Na' cate' le'e le'ele ba zoa dan' gan' zoa yodao' blao, cana' bene' yesenita' distritw Judea cheyala' yosoxonje' šja'aque' do ya'adao'. (Bene' gwlaben' cheyala' šejni'iden'.)

17 Na' bene' chda do yichjo'o che ližen', bi yeyetje' yotobe' xšinlaze' že' ližen', con yoxonje'.

18 Na' bene' chda yixe' bi yeyej liže' šjayxi'e xalane'.

19 iNyäše'chguaze zjanac no'ol ca' zjanoa' xi'in na' no'ol ca' ne' chosoguaže' bidao' lo ža ca'!

20 Na' le nab lao Dios bi yažjen gwxonje cate' chac zag o lo ža che Dios.

21 Le yesaquen ža da' leca yesale' bene'. Cate' gwxcete yežlion' na' ža na'aža nono na' gale' ca', neca žinlažen' yesale'de' ca' da' yoble.

22 Na' šaca' Xancho Diosen' bi yozaše' žan' yesac ca', notno yela, perw yozašen' neche chacde' bene' ca' chesejnilaže' le', bene' ba gwleje' zjanaque' xi'ine'.

23 'Cana' še no ye' le'e: "Le na'šc, nga zoa Criston' ben' gwlej Diosen' cont nabi'e", o "Le na'šc, na' zoe'", ne ca'cze bi šejle'le.

24 Yesaš bene' gwxiye' bene' yesaclaže' yosolane' xlatja' nga, na' yeson cuine' ca' bene' chesoe' xtiža' Dios. Na' yesone' yela' guac da' yesele'e bene' na' bichle da' zaca' yesyebande' cont yeseziye'e legaque'. Na' len bene' ca' ba gwlej Diosen' zjanaque' xi'ine' yesaclaže' bene' gwxiye' ca' yeseziye'e šaca' gac yeseziye'e legaque'.

25 Ba nezele can' gac, le ba gwdixjue'eda' le'e yogo' can' gac.

26 Na' še yese'e le'e: "Zoa Criston' latje dašen'", bitw gwzenagle čhegaque', bitw šejle. Na' še yese'e le'e: "Zoa Criston' lo' yo'ona'", bitw šejle'le čhegaque'.

27 Can' chac cate' chep yes chsenin' doxen le'e yaban' zejzenez, lecze can' gac cate' žin ža yida' da' yoble, Diosen' gwsele' neda' golja' benač. Yida' zejzenez na' yogo' lo' bene' yesele'ede' neda'.

28 Nga chonen che ben' že': "Gan' de be guat nan' chesežag šod ca'."

Can' gac caten' yid Jesucriston' da' yoble

(Mr. 13:24-37; Lc. 21:25-33; 17:26-30, 34-36)

29 Na' cate' la' yeyože saca'zi' benachen', gwbižen' yeyaquen čhoj, na' bion' bich gwsenin'. Nach beljw ca' yeselažon' le'e yaban', na' yogo' da' chle'echo le'e yaban' yesaquen ca' chac yežlion' cate' chxo'.

30 Na' cana'ch bene' že' yežlion' yesele'ede' neda' naca' ben' gwsela' Diosen' golja' benač za'a ladjo bejon' len yela' guac xen na' yela' bene' zaca' juisyw chia'. Na' bene' že' yogo' nación che yežlion' yesebežyaše', bene' bi gosejnilaže' neda'.

31 Na' caten' yida', to trompeta' cuežen zižje, na' sela' angl chia' ca' doxen yežlion' yosyotobe' bene' ca' ba gwleja' cont zjanaque' neda' txen gate'teze nite' doxen lo yežlio ga zelao nac zito'.

32 'Le gwzenag che jempl nga che yag yixgüigw: Cate' ba chzolao chebešjw yaguen' na' chelan' laga' che'en dao', chacbe'ele bačh zoa yela' tiemp yejon'.

33 Na' lecze cate' le'ele ba chac da' mal ca' ba gwnian', cana'ch nezele ba za' juisyw, ba zoa gala'.

34 Da' li žia' le'e, biṇa' yenit diaža che le'e nita'le na'a cate' ba goc yogo'loḷ da' ca'.

35 Le'e yaba na' yežlion' yesede chen, perw ca nac xtižan', gague da' te cbi gac can' žanna'.

36 'Perw nono neze bi ža bi horen' gac ca', ne angl ca' nita' yaba, neca neda' naca' Xi'in Diosen' bi nežda'. Toz Xa' Dios neze.

37 'Diosen' gwsele' neda' golja' benačh, na' can' goc tiemp che da' Noé, lecze can' gac caten' neda' yida' da' yoble.

38 Beṇe' ca' gosenita' tiemp che da' Noén' gosenite' chese'ej chesagüe' na' chosošagne'e na' chosošague' na' no xi'inga'que'. Ne' chesonte' ca' caten' bžin ža gwyo'o Noén' lo' barcon'.

39 Bitw gosache'ede' bin' gac. Cate'ch goc yejw sio' juisyw na' bia' nisen' yogo'lole' cana'ch gosache'ede'. Lecz can' gac, con cate'ch yida' da' yoble cana'chen' yesache'e beṇe' bin' gac.

40 Quingan' gac caten' yida' da' yoble: Cho'pe beṇe' nite' do yixe', toe' yezi' yeca'a, na' yetoe' yocua'aṇa'.

41 Na' cho'pe no'ole nite' chesote', toe' yezi' yeca'a na' yetoe' yocua'aṇa'.

42 'Da'n'an' le soa le cueze, le bi nezele bi ža bi horen' yida' da' yoble, neda' naca' Xanle.

43 Le gon xbab che da' nga, šaca' neze xan yo'on' do bi hor lo yelen' žin beṇe' gwbanṇa' ližen', na'ze' cont bitw güe'e latje šo' ben' ližen' cuane' xšinlazen'.

44 Da'n'an' le soa le cueze batcan' yida' da' yoble, le cate' bi chonle xbab yida', cana' yida', neda' naca' ben' gwseḷa' Diosen' golja' benačh.

*Mos ben' chon güen, na' mos ben' bi chon güen
(Lc. 12:41-48)*

45 'Note'tezle še zoale lez bate'teze, zaca'leble ca to mos beṇe' na'que' beṇe' sina' na' beṇe' chon da' cheyaḷa' gone'. Na' še to beṇe' mos chonchgüe' güen, nach xanen' cue'e lo ne'e ližen' cate' se'e cont mosen' gwnežjue' da' yesagw yogo' mos ca' cate' ba goḷe' yesagüe' tža tža.

46 Še to beṇe' mosen' chonteze' can' gož xanen' le', mbalaz soe' cate' yežin xanen'.

47 Da' li žia' le'e, xanen' cue' lo na' mosen' yogo'loḷ da' de che'.

48 Perw še mosen' na'que' beṇe' zgot na' gone' xbab ne': "Ba gwže xanan'".

49 Nach solagüe' tiḷe' mos ca' yezica'chle na' ye'ej gagwṁxate' len no beṇe' borrašw,

50 nach xane'na' yežine' to ža senyale' le' to hor bi nache'ede'.

51 Na' dan' bi chon mosen' ca cheyaḷa' gone', xane'na' chinchgüe' le' ca gatte'. Gac che' can' chac che note'teze beṇe' gwxiye', chjaya'aque' gabilen' gan' chesebežyaše' na' chesagwxejte laye' dan' leca chesežaglagüe'.

25

Jempl che ši no'ole güego' ja'aque' to yela' güešagna'

¹ Nach Jesüsen' goze'e beṇe' ca' zjana'que' le' t xen:

—Cheyaḷa' soale lez batcan' yedenabi'a, can' gwnita' no'ole chesejni'i no'ol ca' za' gua'a diža' chen'. Goc to yela' güešagna', na' nita' ši no'ol güego' zjana'que' migw che beṇe' ca' chosošagan'. Na' zjanxobe' lintern čhega'que'

ja'aque' jaseleze' yesyechoj bene' ca' liž no'olen' par šja'aque' liž bene' byon' txen.

² Na' gayo' no'ol ca' gosaque' bene' chejni'i na' yegayoe' bibi xbab gosone'.

³ Cate' no'ol ca' bibi xbab goson gosa'ac liže', zjanxobe' lintern čhegaquen', perw bitw gosoxe' botey gan' yože set dan' yosočhine' cate' yebiž dan' yože lo' lintern čhegaquen'.

⁴ Na' no'ol ca' chesejni'i, zjanxobe' lintern čhegaque' lente botey seten' dan' yosočhine' cate' yebiž dan' yože lo' lintern čhegaquen'.

⁵ Na' bene' güešagna' ca' gosežede' na' no'ole ca' gosebeze' legaque' gosetase' šlac chesebeze'ne'.

⁶ Na' do chel, to bene' gwne' zižje, gože' legaque': "Ba chesyechoj bene' güešagnan'. Le šo'o šjašagchone'."

⁷ Na' cate' gože' legaque' ca', yogo' no'ol ca' gosezeche' na' gosečhogue' mešw dan' gwyey che lintern' na' bosyogualen' da' yoble.

⁸ Na' no'ol ca' bibi xbab cheson gose'e no'ol ca' yegayo': "¿Bi gonle late' dan' yože botey chelen' neto'? le ba chebiž četon'."

⁹ Nach no'ol ca' gose'e legaque': "Bitw gac gonto' late' chele, le dan' de četon' bitw gaquen par yogo'cho. San le šja'ac le šjaxi' chelen' ga choten'."

¹⁰ Nach no'ol ca' bi goson xbab ja'aque' jasexi'e seta'. Na' šlac zja'aque' besyežin bene' ca' chosošagna' liž bene' byon'. Na' no'ol ca' gosaque' bene' chejni'i, goso'e txen len bene' ca' chosošagnan' lo' yo'o gan' chesone' l̄nin'. Nach mos ca' bososeyjue' puerten'.

¹¹ Na' cate' besyežin no'ol ca' bi goson xbab, gosene' cho'a puerten', gose'e ben' zoa lo' yo'on: "Bene', gwsaljwšca puerta' cont šo'to'."

¹² Perw na' gože' legaque': "Da' li žia' le'e, bitw saljua' šo'le le bitw nombi'a le'e."

¹³ Nach gož Jesusen' bene' ca' zjanaque' le' txen:

—Ca'czen' cheyała' soale lez batcan' yedenabi'a, le bitw nezele bi ža bi hor yida' yežlio nga da' yoble, neda' naca' ben' gwseła' Diosen' golja' benačh.

Jempl che ben' bocua'anlene' xmore' ca' mechon'

¹⁴ Na' dan' yida' yežlio nga da' yoble yedenabi'a zaca'leben ca da' nga goc. To bene' gwyeje' nación zito'. Na' za' se'e goxe' mos che' ca' na' gwlo'e lo' na'gaque' xmechue' cont gosone' delgens.

¹⁵ Toe' bocua'anlene' gayo' mil. Na' yetoe' bocua'anlene' čhop mil. Na' yetoe' bocua'anlene' to mil. Bnežjuen' legaque' con ca ble'ede' da' chac yeson to toe'. Beyož bene' ca' na' gwze'e.

¹⁶ Na' ben' bocua'anlene' gayo' mil la' gwzolaote chone' delgens len mechon' na' bene' gan lecze gayo' mil.

¹⁷ Lecze ca' ben ben' bocua'anlene' čhope mil, na' bene' gan yechope mil.

¹⁸ Na' ben' bnežjue' to mil gwyeje' jacuaše' xmechw xanen' to lo' yechw da' gwche'ene' lo' yo.

¹⁹ Goc šsa gwza' xan mos ca' cate' bežine', nach bene' mandadw ja'ac xmore' ca' lagüen' cont bosyodie' cuent.

²⁰ Mosen' ben' bocua'anlene' gayo' mil bžine' lagüen' na' gože'ne': "Xana', ni de da' gayo' mil dan' beño' neda'. Na' ba bena' gan yegayo' mil."

²¹ Na' xane'na' gože'ne': "Ba beno' da' güen. Naco' mos güen na' ba beno' ca' cheyała' gono'. Na' dan' beno' can' cheyała' gonon' len da' daon' bocua'anlena' len', da'nan' gona' lo' nao' da' xench. Gwyo'o cont so' mbalaz len neda'."

²² Nach cate' bžin ben' bocua'anlene' čhope mil, bena' gože'ne': "Xana', ni de da' čhope mil dan' bocua'anleno' neda', na' ba bena' gan yechope mil."

²³ Nach gož xanen' le': "Ba beno' da' güen. Naco' mos güen na' ba beno' ca cheyala' gono'. Na' dan' beno' can' cheyala' gonon' len da' daon' bocua'anlena' le', da'nan' gona' lo' nao' da' xench. Gwyo'o cont so' mbalaz len neda'."

²⁴ Nach cate' bezžin ben' bocua'anlene' to mil, nach gože' xane'na': "Nga de xmecho' dan' bocua'anleno' neda'. Nezda' naco' to bene' znia. Chelapo' da' gosaz bene' yoble, na' chotobo' coseš ga goson bene' yoble žin.

²⁵ Da'nan' gwya'a jache'ena' to yechw na' bcuaša' xmechon', le' bžeba' še gwnitan'. Na' na'a bezišcan'."

²⁶ Nach xanen' gože' le': "iNaco' mos mal, na' naco' xagüed! Nezdo' chelapa' ga gosaz bene' yoble, na' chotoba' coseš ga goson bene' yoble žin.

²⁷ Na' lagüe da' neždo' chona' ca' žbixchen' bi gwlejo' xmechuan' bene' yoble cont yezí'an len yichjen na'a ba bela'a?"

²⁸ Nach gože' xmose' ca' yezica'chle: "Yeca'ale mechon' dan' bocua'anlena' benga na' gwnežjwlen ben' ba noxe' ši mil.

²⁹ Can' naquen, note'teze bene' chon güen len dan' chnežjo xanen' le', xanen' gwnežjochcze' che', cont gata' da' zcha'och che'. Perw na' note'teze bene' bi chgone' žin dan' chnežjo xanen' le', yeca'a xanen' da' daon' noxe'na'.

³⁰ Na' ca' nac mos xagüed nga, le' yebeje' le' che'exoxje' gan' nac choł na' cuežyaše' na' gagwxejte laye' dan' leca žaglagüe'."

Can' gac cate' Jesús'en gone' yela' justis che yogo' nación

³¹ Diosen' gwsele' neda' golja' benach, na' cate' yida' da' yoble nsa'a yela' zaca' juisyw chia' na' nchi'a yogo' angl chia' ca', cana'ch cui'a nabia' güen juisyw can' chnabia' Dios ben' zoa yaba.

³² Na' yapa' yogo' bene' che yogo' nación ca' yeside' laguan'. Na' cate' ba nita' yogüe' na' la'ane' can' chon to bene' güeye xila' cate' chebeje' partle xila' ca' na' partle šib ca'.

³³ Na' bene' ca' zjanac bene' güen lao Diosen' dan' ba gosejnilaže' neda', gwnita' legaque' cuitan' šla'a licha. Perw bene' mal ca', gwnita' legaque' cuitan' šla'a robes.

³⁴ Na' neda' naca' rey yapa' bene' ca' nita' šla'a lichan': "Ba ben Xa' Diosen' cont le'e soale mbalaz. Le' da' nga cont gona' nabia'le t xen len neda' can' ba nžia bia' Diosen' cate' gwxete yežlio.

³⁵ Gona' cont nabia'cho t xen, le' cate' gwadona' le'e benle dan' gwdagua'. Na' cate' gwbiłda' nis, le'e benle da' güe'aja'. Na' cate' goca' ca' bene' zito' le'e bleble neda' ližlen'.

³⁶ Na' cate' bi gota' da' chaza', le'e benle da' gwyaza'. Na' cate' gocšenda', le'e bedetiple laža'. Na' cate' gota' ližya, le'e bedena'le neda'."

³⁷ Na' bene' güen ca' yes'e'e neda': "Xanto', žbaten' ble'eto' le' gwdonon' na' bento' da' gwdagogo? Na' žbaten' gwbiłdo' na' bento' da' güe'ejo'?"

³⁸ Na' žbaten' goco' ca' bene' zito' na' blebto' le'? Na' žbaten' ble'eto' le' bi de da' chazo' na' bento' da' gwyazo'?"

³⁹ Na' žbaten' gocšendo' o goto' ližya na' bedena'to' le'?"

⁴⁰ Na' neda' naca' rey yape'gaca'ne': "Da' li žia' le'e, bene' ca' chesejnilaže' neda' zjanaque' ca' biša' na' ca' zana'. Na' yogo' ni'a cate' beyaše'laže'le' legaque', la'czla' biatek' bi zjazaque' len benachen', lencze nedan' beyaše'laže'le'."

⁴¹ Nach bene' ca' nita' šla'a robesle, bene' mal ca', yape'gaca'ne': "Le' cuas ca'ale. Ba žia' bia' chele cuiayi'le yela' güen da' mal chelen'. Le' šja'ac lo' yi' gabil dan' bi cheyol, yi' dan' b xen Diosen' cont saca'zi' Satanás toli' tocaņe len da' xigüe' ca' cheson xšinen.

⁴² Le šja'ac lo yi' gabilen', le cate' gwdon'a' bitw beñle dan' gagua'. Cate' gwbiłda' bitw beñle da' ye'eja'.

⁴³ Cate' goca' ca beñe' zito' bitw bleble neda' ližle. Cate' bi gota' da' čhaza' bitw beñle da' čhaza'. Cate' gocšenda' na' cate' gota' ližya, bitw bedena'le neda'."

⁴⁴ Nach legaque' ľecze yosyoži'e xtižan' yesene': "Xanto', čbaten' bi beyaše'to' le' cate' gwdon'o' o gwbiłdo', o goco' beñe' zito', o bi gota' da' čhazo', o gocšendo', o goto' ližyan'?"

⁴⁵ Na' yeyož yese'e neda' ca' nach yape'gaca'ne': "Lagüe' dan' bi beyaše'laže'le beñe' ca' chesejniłaže' neda', la'cze bibi zjazaque' len beñachen', da'nan' lencze nedan' bi beyaše'laže'le."

⁴⁶ Nach beñe' mal ca' yesezaca'zi'e tołi tocañe. Perw beñe' ca' chesone' güen lao Diosen' yesezoe' mbalaz tołi tocañe.

26

Bosoxi'e nac yesone' yesezene' Jesúsen' (Mr. 14:1-2; Łc. 22:1-2; Jn. 11:45-53)

¹ Cate' beyož be' Jesúsen' diža' ca', gože' beñe' ca' gwleje' cont zjanaque' txen len le':

² —Ba nezele yechope žazen' gala' ľni pascw chechon'. Na' cana' gaca' lo na' beñe' ca' cheseque'ede' neda' na' yesote' neda' yosode'e neda' to le'e yag cruz, neda' naca' ben' gwseła' Diosen' golja' beñach.

³ Nach bχoz gwnabia' ca' na' beñe' ca' chososed chosolo'e dan' bzoj da' Moisésen' na' beñe' gole blao ca' chesenabi'e nación Israel chechon' bese-dobe' chy'o liž bχoz blao ben' le Caifás.

⁴ Na' cheseyiljwlaže' naclen' yesone' yeseziye'e Jesúsen' cont yesezene'ne' yesote'ne'.

⁵ Na' gosene':

—Bi senchone' lo ľnin' cont ca yesebec beñe' žaš.

To no'ole bzoe' set zix yichj Jesúsen' (Mr. 14:3-9; Jn. 12:1-8)

⁶ Nach goquen' Jesúsen' len beñe' ca' gwleje' cont zjanaque' txen len le' nite' Betania liž Simón ben' güe'e yižgüe' da' nzi' lepra.

⁷ Na' šlac chi' Jesúsen' cho'a mesen', bžin to no'ole noxe' to de yejese ga chož set da' chła' zix da' ľeca chzaca' la'ay. Na' no'olen' bzoačhočhje' seten' yichj Jesúsen'.

⁸ Na' beñe' ca' zjanaque' txen len Jesúsen' cate' besele'ede' can' ben no'olen' beseže'e na' gosene':

—čBixčhen' con benditjde' set zix nga?

⁹ Ša no bete' len, yesonen mechw xen na' yosonežjuen' gaclenen beñe' yaše'.

¹⁰ Jesúsen' gocbe'ede' bin' gosene' nach gože' ľegaque':

—čBixčhen' chnele che no'olen'? Dan' bene' len neda' nga naquen güen.

¹¹ Le beñe' yaše' ca' bate'teze nita'cze' len le'e, san nedan' bich soa' yessa len le'e.

¹² Dan' bguazje'nda' set zixen' bene' dan' cheyala' yesone' len neda' cate' gaša'.

¹³ Da' ľi žia' le'e, doxen yežlio gate'teze šjasedixjue'e beñe' diža' güen dan' chzejni'in čhia', decze de yesene' can' ben no'ol nga, cont šjasye'ede'ne'.

Judas Iscariote bene' Jesúsen' lo na' bene' chesegue'ede' le'
(Mr. 14:10-11; Lc. 22:3-6)

¹⁴ Gwde da' quinga, Judas Iscariote ben' goque' txen len bene' šižinw ca' ben' gwlej Jesúsen' cont zjanaque' txen len le', gwyeje' jane'e bꝑoz gwnabia' ca'.

¹⁵ Na' ježe' legaque':

—¿Gaca'te' gonle neda' cont gwdia' Jesúsen' lo na'le'?

Nach bosoxi'a bene' ca' yosonežjue'ne' šichoa mechw plata na' bosonežjue'nen'.

¹⁶ Nach čana' Judasen' gwzologüe' gwdiljwlaže' nac gone' gwdie' Jesúsen' lo na'gaquen'.

Jesúsen' blo'ede' legaque' can' yesone' šjasyeza'laže' yela' got čen'
(Mr. 14:12-25; Lc. 22:7-23; Jn. 13:21-30; I Co. 11:23-26)

¹⁷ Na' bžin ža čala' lni caten' chesagüe' yetextil dan' bibi levadura yo'o, na' ža nechw čhe lnin' bene' ca' zjanaque' Jesúsen' txen ja'aque' gan' zoe' na' gose'ene':

—¿Gan' che'ndo' šjasini'ato' cont gagwcho xše' čhe pascon'?

¹⁸ Nach Jesúsen' gože' legaque':

—Le'e šja'ac ciudan' gan' zoa to bene' byo ben' nombia'cho na' ye'ln'e': "Maestron' že' ba zoa žin ža gac da' cheyala' gac čhe', na' ližo' nga che'nde' gagwleno'ne' xše' lni pascon'."

¹⁹ Nach bene' ca' gosone' can' gož Jesúsen' legaque', jasesini'e xše' že' lnina'.

²⁰ Na' cate' beyož gwxa gwbiž, Jesúsen' len bene' šižinw ca' gwleje' cont zjanaque' le' txen gosebi'e cho'a mesen' gosagüe'.

²¹ Na' šlac chesagüen' gož Jesúsen' legaque':

—Da' li žia' le'e, to le'e gwdele neda' lo na' bene' ca' chesegue'e neda'.

²² Nach legaque' besyeyaše'laže'de', nach gosezologüe' tgüjeje tgüjeje' gosenabde' le' gose'ene':

—Xana', čnedan' gona' ca'?

²³ Nach gože' legaque':

—To ben' chagw len neda' txen toz lo' ye'en, le' gwdie' neda' lo na' bene' ca'.

²⁴ Na' gac čhia' can' nyoj le'e Xtiža' Diosen', neda' naca' ben' gwseła' Diosen' golja' beṇač, perw nyaše'čhguaze nac ben' gwdie' neda' lo na' bene' ca'. Yejn'acle ša bi golje'.

²⁵ Nach Judasen' ben' za' gwdie' Jesúsen' lo na' bene' ca' gože'ne':

—Maestrw, čnedan' gwdia' le' lo na' bene' ca'?

Jesúsen' gože'ne':

—Le len'.

²⁶ Na' šlac chesagüen', Jesúsen' gwxi'e to yetextilen' na' beyož be'e yela' choxclen čhe Dios, bꝑoxjen' na' bnežjuen' bene' ca' zjanaque' le' txen, gože' legaque':

—Le gagon'. Lenṇa' cuerp čhian'.

²⁷ Nach beṅue' to vas gan' yože nis uvasen', na' beyož be'e yela' choxclen čhe Dios boznežjuen' legaque', goze'ene':

—Yogo'le, le ye'ej late' güeje dan' yože lo' vas nga.

²⁸ Da' nga xčhena' na' čhanlažan' lajen neče xtola' yogo'loł beṇač. Na' lajen cont solao gac da' cob dan' gwna Diosen' gone' gaclene' beṇačhen'.

²⁹ Čhnia' le'e, bich ye'eja' nis uvas na'a. Cate'č žin ža ba zoacho txen gan' zoa Xa' Diosen' čhnabi'e, cana' ye'ejan' da' yoble.

Jesúsen' gwne' Pedroa' bi chebe' še nombi'e le'
(Mr. 14:26-31; Lc. 22:31-34; Jn. 13:36-38)

³⁰ Na' beyož gosonxene' Diosen' len to da' gosole', nach gosa'aque' ja'aque' Ya'a Olivos.

³¹ Na' šlac zjangüe'e nezen' Jesúsen' gože' legaque':

—Na'aže' yogo'le cuejyichje neda' neče dan' gac chian'. Le nyojczen le'e Xtiža' Diosen' žan: "Gota' bene' güeye' xilan' na' xila' ca' yesaslasba'."

³² Perw na' cate' yosban Diosen' neda' ladjo bene' guat ca', yobch yeya'a Galilea ca' le'e.

³³ Nach Pedroa' gože' Jesúsen':

—La' yogo' bene' quinga yesebejyichje' le', neda' gwbat gona' ca'.

³⁴ Jesúsen' gože' le':

—Da' li žia' le', bina' cuež jean' na'aže' cate' gac šon nia' bi chchebo' še nombi'o neda'.

³⁵ Nach Pedroa' gwne':

—La'czla' še chonen byen guatlencza' le', gwbat nia' bi nombi'a le'.

Na' lecze ca' yogo' bene' šižinw ca' zjanaque' Jesúsen' txen gosene' ca'.

Jesúsen' bol' güiže' Diosen' to latje dan' nzi' Getsemaní
(Mr. 14:32-42; Lc. 22:39-46)

³⁶ Nach besežine' latje gan' nzi' Getsemaní, na' Jesúsen' gože' bene' ca' zjanaque' le' txen:

—Ngaze le cue' šlac ša'a na'le šjal güiža' Diosen'.

³⁷ Na' gwche'e Pedroa' len chop xi'in Zebedeo, Jacobon' len Juanna'. Na' Jesúsen' gwzolao gocyaše' chgüede', na' benchgüe' xbab.

³⁸ Nach gože' legaque':

—Lo' yichjlažda'oguan' chacyaše' chgüeda', chacda' con gatzca' catequen' chžaglagua'. Nga le yega'an bi tasle, le na' txen len neda'.

³⁹ Nach Jesúsen' gwžialagüe' yelate' na' jačhaze' lo yon' coscho'ale nach bol' güiže' Diosen', gwne':

—Xa', še guac ten ca'ale, benšca cont bi saca'zi'a na' bi yesote'nda' can' ba zoa gaca'. Perw bi chnaba' gac da' nia' neda', san gac can' nao' le'.

⁴⁰ Nach beyeje' gan' nita' bene' ca' šone na' ble'ede' zjanite' chesetase'. Na' gože' Pedroa':

—¿Ne šlož dao' ca' goc cuejle bišgal len neda'?

⁴¹ Bi tasle na' le yol' güiž Dios cont bi gon gwxyien' le'e gan'. Nežda' che'nele na'zle len neda' perw bi chzoele.

⁴² Na' gosze'e gan' nite' na' da' yoble jal' güiže' Diosen', gwne':

—Xa', še gac ten ca'ale, benšca cont bi saca'zi'a na' bi yesote'nda', perw gac con can' che'ndo' le'.

⁴³ Na' bezyeje' gan' niten' na' da' yoble ble'ede' chesetase' le' ba chesežode' yejlagüen' bišgal.

⁴⁴ Na' gwze'e da' yoble gan' nite'na' jal' güiže' Diosen' da' gwyone nia', na' goznacze' da' yoble can' ba gwnen'.

⁴⁵ Na' bežžine' gan' nita' bene' ca' šone nach gože' legaque':

—Na'ach guaque tasle na' yezi'laže'le. Ba gole gwde to bene' neda' lo na' bene' güen da' xinj ca', neda' naca' ben' gwseja' Diosen' golja' benačh.

⁴⁶ Le chas. Le yeyo'o. Ba za' ben' gon neda' lo na'gaque'.

Judasen' bdie' Jesúsen' lo na' bene' chesegue'ede' le'
(Mr. 14:43-50; Lc. 22:47-53; Jn. 18:2-11)

47 Ne' choe'te Jesúsen' dižan' ca' cate' bžin Judas ben' goque' txen len bene' šižiŋw ca' gwlej Jesúsen' cont zjanaque' le' txen. Na' zan bene' zja'ac len le' zjanoxe' no yag, no spada, bene' gosesela' bħoz gwnabia' ca' na' bene' gole blao ca' chesenabi'e nación Israel chechon'.

48 Na' Judas ben' bdie' le' lo na' bene' ca', gože' legaque' nac yesenezde' non yesezene', gwne':

—Ben' gwnopa' xague', le'na' Jesús. Le sene'.

49 Nach la' gwbiga'te' cuit Jesúsen', gože'ne':

—Patiox, Maestrw.

Na' bnope'ne'.

50 Jesúsen' gože'ne':

—Migw chia', ĩbixchen' zao' nga?

Nach la' gosebiga'te' bene' ca' gosezene' Jesúsen' na' goseche'ene'.

51 Na' to ben' nac txen len Jesúsen' gwleje' spada chen' na' gwдынen' mos che bħoz blaon' gwchogte' šla'a naquen'.

52 Nach Jesúsen' gože'ne':

—Bego'o spada chion' lo' liženna', le yogo' bene' chesote' bene' len spada, lecze len chesatlene'.

53 ĩBi nezdo' guac nabda' Xan' cont la' sela'te' angl zan juisyw bene' yesaclene' neda'?

54 Perw še gona' ca' ĩnacxe gac dan' cheyała' gac dan' nyoj Xtiža' Diosen' žan quinga gaquen'?

55 Nach Jesúsen' gože' bene' ca' zjasezen le':

—ĩBixchen' nonle neda' ca to bene' gwban za'acle zedexi'le neda' len spada len yag? Yogo' ža gwchi'a chy'o yodao' blaon' bsd blo'eda' bene' že'na' na' bi gwzenle neda'.

56 Perw chac da' qui cont chac can' ža Xtiža' Diosen' dan' bosozoj da' bene' goso'e xtižen' cani'.

Nach yogo' bene' ca' zjanaque' Jesúsen' txen bosoxonje' gosebejyichje'ne'.

Goseche'e Jesúsen' lao bene' ca' chesenabia' nación Israelen'

(Mr. 14:53-65; Lc. 22:54-55, 63-71; Jn. 18:12-14, 19-24)

57 Na' bene' ca' gosenen' Jesúsen' goseche'ene' lao Caifás ben' nac bħoz blao, gan' ba zjanžag bene' ca' chososed chosolo'e dan' bzoj da' Moisésen' na' len bene' gole blao ca' chesenabi'e nación chechon'.

58 Nach Pedroa' na'ogüe' Jesúsen' zito' zito'le bžinte' liž bħoz blaon', na' gwyo'e chy'ona' gwchi'e len bene' ca' chesape' yodao' blaon', le goclaže' le'ede' naquen' zelao gac che Jesúsen'.

59 Nach yogo' bħoz gwnabia' ca' na' yezica'chle bene' gole blao ca' chesenabi'e nación chechon' cheseyiljwlaže' bi diža' güenlaže' yeso'e che Jesúsen' cont yesote'ne'.

60 Perw goc sša bitw besyeželde' bi diža' güenlaže' yosode'ede' le' cont gosozie'ne' xya la'czla' bene' zan gosenite' gosene' diža' güenlažen' contr le'. Gwde na' besechoj yechope bene' na' bedilen can' gosenen'.

61 Quinga gosene':

—Benga gwne': "Neda' guac yochinja' yodao' blao gan' chonxencho Diosen', na' šone žaze yeyonan'."

62 Nach gwzoža' bħoz blaon' gože' Jesúsen':

—ĩBibi de bi nao' ca nac da' nga chosocuiš bene' quinga le'?

63 Bitwbi gwna Jesúsen'. Nach gož bħoz blaon' le':

—Chnia' le' gwna neto' še le len' Cristo ben' nac dogualje Xi'in Diosen', ben' gwleje' cont yedenabi'e. Na' Diosen' ben' zoa toli' tocane cue'e da' ba'li še led'o' can' žon'.

⁶⁴ Jesús'en' gože'ne':

—Le can' žale nan' naca'. Diosen' gwsele' neda' golja' be'nach. Na' chnia' le'e, gwžin ža le'ele neda' chi'a cuit Diosen' ben' nape la'zelagüe yela' guac xen, na' nabi'a txen len le', na' le'ele yetja' yaban' to lo' bejw.

⁶⁵ Cate' bene b'xoz blaon' xtiža' Jesús'en', gwšo' gwčeza'te xen', le par le' da' mal juisyon' gwna Jesús'en' cui'e cuit Diosen' nabi'e. Nach gwne':

—Ba benecho na'a ba gwne' che Diosen' dan' gwne' ca'. Noch no chyažje no gagw xya che'.

⁶⁶ ¿Nac žale che'?

Nach bene' ca' bosyoži'en gose'ene':

—Cheyala' gate' dan' chon cuine' ca Dios.

⁶⁷ Nach bosyoži'e xene' cho'alao Jesús'en', na' gosebaže'ne', na' ba'le gosegape' xague'na'.

⁶⁸ Nach gose'ene':

—Še len' naco' Criston', gwneya'ašc, gwna neto', ¿non' chgapa' le'?

Pedroa' bi gwchebe' še nombi'e Jesús'en'

(Mr. 14:66-72; Lc. 22:56-62; Jn. 18:15-18, 25-27)

⁶⁹ Na' šlac chac da' quinga, chi' Pedroa' chyo'ona', cate' bžin to no'ole güen žin che Caifásen', gože'ne':

—Lencze le' naco' txen len Jesús bene' Galilean'.

⁷⁰ Na' lao yogo' bene' ca' že' na', Pedroa' bitw gwčebe' še naque' txen len Jesús'en', na' gože' no'olen':

—Bi nezda' bi dižan' cho'o.

⁷¹ Gwde beyož gože' no'olen' ca' beyeje' cho'a puert na'le, na' bezle'e yeto no'ole güen žin'na' le', na' goze'e bene' ca' že'na':

—Lecze len benga naque' txen len Jesús bene' Nazareten'.

⁷² Da' yoble bitw gwčebe' še naque' txen len Jesús'en', nach gwne':

—Na' zoa Diosen' cue'e da' ba'li bitw nombi'a bena' žo' ca'.

⁷³ Na' goccze šlož, gosebiga' bene' ca' že'na' goseze'e Pedroa':

—Da' licze, naco' txen len legaque', le nachbia' chnio' can' chesene bene' Galilea ca'.

⁷⁴ Nach Pedroa' chop šone ni'a gwne':

—Diosen' gone' ga saca'zi'a še chonlaža' dan' žia' bi nombi'a bena'.

Na' la' gwchežte to jea.

⁷⁵ Nach jayze'e Pedroa' can' gož Jesús'en' le': “Bi'na' cuež jean' cate' gac šone ni'a bi chčebo' še nombi'o neda'.” Nach beze'e leca gwchežyaše'.

27

Goseche'e Jesús'en' lao Pilaton'

(Mr. 15:1; Lc. 23:1-2; Jn. 18:28-32)

¹ Na' cate' gwyeni', yogo' b'xoz gwnabia' ca' na' bene' gole blao ca' chesen-
abia' nación chechon' besyedobe' na' gosechoglagüen' yesote' Jesús'en'.

² Nach bosocheje'ne' na' goseche'ene' jasesane'ne' lo' na' gobernador Pon-
cio Pilato.

Judasen' beyot cuine'

3 Na' Judasen' ben' bdie' Jesúsen' lo na' bene' ca', cate' gocbe'ede' ba gosechoglagüen' yesote' Jesúsen', betinjde' dan' bdie' le' lo na' bꝥoz gwnabia' ca' na' bene' gole blao ca'. Nach gwyeje' laogaquen' par bonežjue' legaque' šichoa mechw platan'.

4 Nach gože' legaque':

—Malen' bena' bdia' lo na' len' to bene' bi nape' doła'.

Na' gose'ene':

—Bitwbi doła' nap neto' dan' beno' ca'.

5 Nach Judasen' bozale' mechw ca' lo' yodao' blaon', nach beze'e na' jaylo'o do yene' beyot cuine'.

6 Beyož beza' Judasen', bꝥoz gwnabia' ca' bosyotobe' mechon'. Na' gose' lježe':

—Bitw gac co'ochon lo' caj gan' yo'o mechw che yodaon', le naquen mechw dan' gwdixjwcho cont yega'a yela' mban che to bene'.

7 Na' bosoxi'e yesezi'e len mechon' to yežlio dan' de che to bene' güen yeso'. Na' gosezi'en par to capsantw ga yosocuaše' bene' zito'.

8 Na' yežlion' ne' nzin' Yežlio Chen ža na'aža, le gosezi'en len mechw dan' goseyixjue' cont gosote' Jesúsen'.

9 Can' goc cont goc can' bzoj da' Jeremías ben' be' xtiža' Diosen' cani', gan' žan: "Besyezi'e šichoa mechw platan', dan' gosena bene' Israel zaca' bena'.

10 Na' gosezi'e yežlio che to bene' güen yeso', can' gwna Xancho Diosen' neda'."

Bosocuiše' Jesúsen' lao Pilaton'

(Mr. 15:2-5; Lc. 23:3-5; Jn. 18:33-38)

11 Na' goseche'e Jesúsen' lao gobernadoren' na' šlac zeche' lagüen', gobernadoren' gože'ne':

—¿Len' naco' rey che bene' Israel?

Nach Jesúsen' boži'e xtižen', gwne':

—Can' gwnao'na', can' naquen.

12 Na' cate' bꝥoz gwnabia' ca' na' bene' gole blao ca' chesenabia' nación chechon' bosocuiše' Jesúsen', bitw bi gwne'.

13 Nach Pilaton' gože'ne':

—¿Bi chendo' catec da' zan xya nga chesagüe' chio'?

14 Perw Jesúsen' ne to xtiže'na' bitw boži'e, na' bebanechgüe gobernadoren'.

Gosechoglagüen' yesote' Jesúsen'

(Mr. 15:6-20; Lc. 23:13-25; Jn. 18:38-19:16)

15 Na' gota' costumbr, gobernadoren' gwsane' to bene' de ližya cate' čala' lni pascw checho, con bene' yeseñab bene' gualaž chechon'.

16 Na' ližya na' de to bene' chzechgua che' naque' bene' güen da' xinj, na' le' Barrabás.

17 Nach Pilaton' gože' bene' ca' zjanžaguen':

—¿Noe' bene' quinga chaclaže'le gwsana'? ¿Gwsana' Barrabás še Jesús nga ben' chesene' naque' Cristo ben' gwlej Diosen' cont yedeñabi'e?

18 Gocbe'e Pilaton' dan' chesacxi'a bꝥoz gwnabia' ca' Jesúsen', da'n'an' bosodie' le' lo ne'en.

19 Ca' chi' Pilaton' gan' chone' yela' justisen', cate' bžin to rson da' gwsela' no'ol čen', gože'ne': "Bitw bi gondo' bena', le bibi doła' nape'. Nže'e gwñeda'ne' yel na' bžaglaochgua neče dan' chac che bena'."

20 Na' b̄ox gwnabia' ca' na' bene' gole blao ca' chesenabi'e naciōn c̄hechon' gosego'oyēle' bene' ca' že'na' cont yesenabe' gwsane' Barrabásen' na' yesenabe' yesote' Jesúsen'.

21 Nach gubernadoren' gože' legaque' da' yoble:

—¿No bene' quinga chope chaclaže'le gwsana'?

Nach gose'ene':

—Barrabásna'.

22 Pilaton' gože' legaque':

—¿Bixe gona' len Jesús nga ben' chesene' naque' Cristo ben' gwlej Diosen' cont yedenabi'e?

Na' yogüe' gose'ene':

—¡Bde'e le'e yag cruz!

23 Nach gož gubernadoren' legaque':

—¿Bixe da' xinj nonen'?

Na' legaque' da' yoble bososya'achgüe' gose'ene':

—¡Bde'e le'e yag cruz!

24 Gočbe'e Pilaton' bicze bi gac gone'. Ba chyala'ch chesone' žaš juisyw. Nach gwsele' to bene' jaxi'e nis cont bone'e lao bene' ca' že'na' na' gože' legaque':

—Bibi da' xinj non benga. Bitw naquen xbagá' dan' gotlene', xbagá' le'e naquen še ba betwlene'.

25 Nach yogo' bene' ca' gose'ene':

—Xbagá' neto' na' xbagá' xi'into' naquen c̄he yēla' got c̄he benga.

26 Nach bsan Pilaton' Barrabásen' can' gosenaben'. Perw na' bene' mandaw gosot goseyin soldadw c̄he' ca' Jesúsen', nach bene' le' lo' na'gaque' cont yosode'ene' le'e yag cruzen'.

27 Nach soldadw c̄he gubernadoren' gosec̄he'e Jesúsen' lo' yo' o c̄he gubernadoren', nach bosyotobe' yogo' soldadw ca'.

28 Na' goseyine' xalana' Jesúsen' na' bosoguacue'ne' to lache' xna' ca' dan' chesaz rey ca'.

29 Na' gosone' to corona de xis yeše' bosozoen' yichjen', na' ne'e licha bosogxe'ne' to xis. Na' bosozoa xibe' lagüen' par gosonle' c̄he', nach gose'ene':

—¡Viva rey c̄he bene' Israel!

30 Nach bosoži'ene' xene', na' besyeque'e xis dan' noxen' na' bosozeten' yichje'.

31 Na' beyož gosonle' c̄he', besyeque'e lache' xnan' dan' bosoguacue'nen' na' bosyoguacue'ne' xacze'. Nach gosec̄he'ene' cont jasede'ene' le'e yag cruzen'.

Bosode'e Jesúsen' le'e yag cruzen'

(Mr. 15:21-32; Lc. 23:26-43; Jn. 19:17-27)

32 Nach besechoje' ciudan' na' besyežague' to bene' Cirene le Simón na' gosone' byen bosogüe'ene' yag cruz c̄he Jesúsen'.

33 Na' besežine' to latje gan' nzi' Gólgota, zeje diža' latje c̄he žit yichj bene' guat.

34 Na' bosonežjue' Jesúsen' vino da' nchixe to da' zla' par ye'ejen', perw le' con bnixen', bitw güe'ejen'.

35 Na' cate' beyož bosode'ene' le'e yag cruzen', soldadw ca' gosone' rifa cate' besyele'e xalane' cont gota'bia' noe' yechelen'. Na' dan' gosone' ca' goc can' bzoj da' ben' be' xtiža' Diosen' cani', gwne': "Yesyele'e xalanan' na' yesezi' c̄he che', yesonen' rifa."

36 Nach gosebi'e gosape'ne'.

37 Na' yichj yag cruzen gan' de'ena' bosozoje' dan' bcuiš le', na' žan: "Benga Jesús rey che bene' Israel ca'."

38 Na' lecze cana' bosode'e chope bene' gwban le'e yechope yag cruz. Toe' gwda' cuít Jesúsen' licha' na' yetoe' cuite' robes.

39 Na' bene' ca' gosede gan' da' Jesúsen' goson yichjlagüe' dan' leca be-segue'ede' le', na' gosezi'diže' le',

40 gose'ene':

—Len' gwnao' yochinjo' yodao' blaon' na' šone žaze yeyonon', bosla cuino'. Še len' naco' doguale Xi'in Diosen', beyetj le'e yag cruzen'.

41 Na' len bħox gwnabia' ca' na' len bene' ca' chososed chosolo'e dan' bzoj da' Moisésen' na' len bene' fariseo ca', na' len bene' gole blao ca' chesenabi'e nación chechon', yogüe' gosezi'diže'ne' na' gosene':

42 —jYezica'chle bene' bosle' na' bi chac yosla cuine'! Še naque' rey che chio' bene' Israel, yeletj cuine' le'e yag cruzen' na'a na' šejle'cho che'.

43 Le' chejnilaže' Diosen', le gwne': "Dogualje Xi'in Dios neda'." jNa' le'echo yosla Diosen' le' na'a še chacde' le'!

44 Na' bene' gwban ca' zjada' le'e yag cruzen' chop la'a cuiten', lecze gosezi'diže' le'.

Can' goc cate' got Jesúsen'

(Mr. 15:33-41; Lc. 23:44-49; Jn. 19:28-30)

45 Na' do guagwbiž doxen yežlion' goc chol bžinte cheda šone.

46 Na' do cheda šone Jesúsen' bosye'e zižje gwne':

—Elí, Elí, ¿lama sabactani? (Zeje diža': Dios chia', Dios chia', ¿bixchen' ba gwlejjichjo' neda'?)

47 Na' bal bene' ca' zjanita' na' gosende' na' gosene':

—Le gwzenag, benga chol güiže' da' Elías ben' be' xtiža' Diosen' cani'.

48 Nach la' bchojte to bene' gwyejsese' jaži'e to esponja na' bzažeden' vino zichj na' bzoen' to lao xis tone nach jažiguen' cho'a Jesúsen' cont xopen'.

49 Na' yeba'le' gose'e bena':

—Cuezcho, yešč še güide Elíasen' yosle'ne'.

50 Nach da' yoble Jesúsen' bosye'e zižje na' gote'.

51 Na' ca hora' lache' da' ze lo' yodao' blaon' bcheza' gacholen gwza'te yichjen bžinte che'e. Na' gwxo'chgua gosoxjte yej ca'.

52 Na' lecze beseyaljo ba che bene' ba gosat. Na' zan da' bene' ca' gosejnilaže' Diosen' besyebane' ladjo bene' guat ca'.

53 Nach caten' ba beban Jesúsen' ladjo bene' guat ca', besyechoje' lo' ba čegaquen' na' jaya'aque' jase'lo'elagüe' ciuda Jerusalén. Na' zan bene' besele'ede' legaque'.

54 Na' ca nac xan soldadw ca' na' bene' ca' nche'e, bene' nita' chesape' Jesúsen', cate' besele'ede' can' gwxo' na' bichle da' ca' goc, besežebchgüe', na' gosene':

—Da' li le benga goc dogualje Xi'in Dios.

55 Na' lecze nita' zan no'ole ladjo bene' ca' na' goseze' zito' chesene'e can' chaquen'. No'ol ca' gosa'ogüe' Jesúsen' cate' beze'e distritw Galilean' par chesaclene' le' len bi da' chyažjde'.

56 Na' len no'ol ca' María bene' Magdala, na' lecze María ben' nac xna' Jacobo na' José, na' lecze ca' xna' Jacobo na' Juan, xi'in Zebedeo.

*Bosocuaše' Jesúsen'**(Mr. 15:42-47; Lc. 23:50-56; Jn. 19:38-42)*

⁵⁷ Na' gwzoa to bene' gwni'a bene' ciuda Arimatea le' José na' ba gwzolao chzenague' che Jesúsen'. Na' cate' ba chxoá gwbiž

⁵⁸ Josén' gwyeye' lao Pilaton' jaynabe' cuerp che Jesúsen'. Na' Pilaton' bene' mandaw bosyonežjue'ne' cuerp chen'.

⁵⁹ Nach Josén' bego'o lo ne'e cuerp che Jesúsen' na' blaže'ne' to lache' xen da' nyach.

⁶⁰ Na' gwlo'e cuerp chen' to lo' bloj cobe che' da' gwche'ene' le'e yej. Na' blole' to yej xen cho'a blojen' cont bseyjon len. Nach beze'e.

⁶¹ Na' María bene' yež Magdalan' na' yeto María yoble jasechi'e cho'a blojen'.

Bosozoe' bene' chesape' gan' jasecuaše' Jesúsen'

⁶² Na' beteyo, gwde žan' caten' chososini'e par ža che Diosen', besedobe bžoz gwnabia' ca' na' bene' fariseo ca' na' ja'aque' gan' zoa Pilaton'.

⁶³ Na' gose'ene':

—Bene', ba jaysalaže'to' can' gwna da' bene' gwxiyen' cate' ne' mbane', gwne': “Yeyon ža yebana' ladjo bene' guat ca'.”

⁶⁴ Da'nan' gwsele'a šca bene' šjasedape' cho'a blojen' gan' jasecuaše'nen' cont bi šja'ac bene' ca' gosaque' Jesúsen' txen šeže'le šjasyeleje' cuerp chen' na' yese'e bene' le' bebane' ladjo bene' guat ca'. Le še yesaque' bene' ba bebane' ladjo bene' guat ca', gonchen malech clél ca' len diža' dan' gwdise' gwne' Diosen' gwsele' le'.

⁶⁵ Nach Pilaton' gože' bene' ca':

—Gona' le'e soldadw ca'. Le che'e cont yesape' ga zelao yesezoede'.

⁶⁶ Nach ja'aque' len soldadw ca' na' bosochiše' sey le'e yej dan' da' cho'a blojen', na' bosonite' soldadw ca' gosapen'.

28*Jesúsen' bebane' ladjo bene' guat ca'**(Mr. 16:1-8; Lc. 24:1-12; Jn. 20:1-10)*

¹ Na' cate' beyechj ža che Dios, bał dmigw María bene' Magdala len María ben' yeto ja'aque' jase'ne'e gan' bosocuaše' Jesúsen'.

² Na' leca gwxo', le angl che Xanchon' betje' yaban', na' bžine' gwque'e yej dan' nseyjw cho'a blojen', na' gwchi'e lo yeja'.

³ Na' anglen' leca chactit cho'alagüen' cacze ga chep yes na' xalänen' naquen šiš xila' juisyw ca' nac beye'.

⁴ Na' cate' besele'e bene' gop ca' le', leca gosexize' besežebe' na' gosebix'e gosatte' šlat.

⁵ Perw na' anglen' gože' no'ol ca':

—Bitw žeble. Neda' nezda' Jesúsen' ben' bosode'e le'e yag cruz nan' chey-iljwle.

⁶ Nono de nga. Ba bebane' ladjo bene' guat ca', can' gwnacze'. Na' le da, le na' latje nga gan' gosegüe'e cuerp chen'.

⁷ Bedao' le šjaya'ac le šjaydixjue'e bene' ca' zjanaque' Jesúsen' txen ye'gaclene' ba bebane' ladjo bene' guat ca'. Na' ye'gaclene' gwyobech Jesúsen' yežine' Galilean' clél ca' legaque', na' Galilean' na' yesele'ede'ne'. Can' gwna Diosen' zedetixjue'eda' le'e.

8 Nach no'ol ca' la' besyeya'actie' cho'a blojen' do chesežebze' perw leca chesyebede', zjaya'acses'e' zjasyedixjue'ede' bene' ca' zjanaque' Jesúsen' txen can' goca'.

9 Na' šlac zjaya'aque' besyežague' Jesúsen' chanez. Nach bguape' legaque' tiox.

Na' no'ol ca' gosebigue' gan' zoa Jesúsen' bosozoa xibe' lagüen', na' goseyele' ni'e tantw besyebede', na' gosonxene' le'.

10 Jesúsen' gože' legaque':

—Bitw žeble. Le šjaydixjue'e bene' lježcho ca', cheyała' šjaya'aque' Galilean' cont yesele'ede' neda'.

Bene' gop ca' jasyedixjue'ede' bħoz ca' can' ba goca'

11 Na' šlac zjaya'ac no'ol ca' ciudan', bał soldadw ca' bene' ca' gosape' gan' bosocuaše' Jesúsen' jaya'aque' ciudan' jasyedixjue'ede' bħoz gwnabia' ca' doxen can' ba goquen'.

12 Nach besedobe bħoz gwnabia' ca' len bene' gole blao ca' chesenabia' nación chechon' na' bosoxi'e nac yesone' ca' nac dan' gose' soldadw ca' legaque'. Na' bosonežjue' soldadw ca' da' zčha'o mechw.

13 Gose'e legaque':

—Še no nabe le'e bin' goquen', na' ye'gaclene' šeže'le šlac chtasle bene' ca' gosaque' le' txen besyebje' cuerp čhen' lo' blojen' na' besyeyo'en ga yoble.

14 Na' še gobernadore'n'yende' diža' quinga, neto' šjašalj'ento'ne' cont bi že'e le'e na' cont bi gote' le'e.

15 Na' soldadw ca' gosezi'e mechon' dan' bosonežjue' legaquen', nach gosone' con can' gose'e legaque'. Na' ža na'aža yogo' can' gosena soldadw ca' ne' chesene' doxen gan' nita' bene' Israel gualaž chechon'.

Jesúsen' gože' legaque' yeso'e xtiže'na' yogo' nación

(Mr. 16:14-18; Lc. 24:36-49; Jn. 20:19-23)

16 Nach bene' ca' zjanaque' Jesúsen' txen, bene' ca' šnej, jaya'aque' Galilean' cont jasyešague' Jesúsen' to lo ya'a gan' gože' legaque' yesyežague'.

17 Na' cate' besele'ede' Jesúsen' gosonxene'ne'. Perw bia'cze to čhope' gosacžejlaže' še le'na'.

18 Nach gwbiga' Jesúsen' gan' nite'na' na' gože' legaque':

—Ba ben Diosen' lo na' doxen yeła' chnabian' dan' de yaban' na' yežlion'.

19 Da'n'an' le šja'ac le šjased le šjalo'e bene' ca' že' yogo'loł nación cont yesejnilaže' neda'. Na' le gwzoe' nis cont yosolo'e le chesejnilaže' Xacho Diosen', na' chesejnilaže' neda' naca' dogualje Xi'ine', na' lencze Spiritw čhe'na'.

20 Na' gwswed gwlo'elne' cont yesone' yogo'loł dan' ba bena' mandadw gonle. Neda' zoacza' len le'e yogo' ža, na' ca'cze ne' soa' len le'e cate'ch te čhe yežlion'. Da' na'zen' chzoja' na'a.

DIŽA' GÜEN DAN' BZOJ SAN MARCOS

*Juan ben' bzoa bene' nis gwdixjue'ede' diža' güen che Diosen' latje daš
(Mt. 3:1-12; Lc. 3:1-9, 15-17; Jn. 1:19-28)*

¹ Qui goc cate' gwxe xtiža' Jesucristo ben' nac dogualje Xi'in Dios.

² Da' Isaias ben' be' xtiža' Diosen' cani' bzoje' da' nga, žan:

Chseła' to bene' cuialagüe' laogun' güe'e xtižon',
cont ba zjanita' bene' yosozenague' chio' cate' šejo'.

³ Beña' chne' zižje latje dašen' že':

"Le gonšagüe' yichjlažda'olen' cont gwzenagle che Xančon' cate' yide';
le cuejyichj da' malen' chonle cont yichjlažda'olen' gaquen ca to nez da' ba
gosonšagüe'."

⁴ Ca' goquen', Juan ben' chzoa bene' nis bžine' latje dašen' na' gože' bene'
ca' besežag na' cheyala' yesyetiñje' xtoła'gaque' na' yesezoe' nis cont nitlao
xtoła'gaque'.

⁵ Zan bene' za'ac do distritw Judea na' ciuda Jerusalén bosozenague' che diža'
dan' chyixjue'ede'. Na' cate' gosexoadole' bi da' xinj zjanone', Juanna' bzoe'
legaue' nis lo' yegw Jordán.

⁶ Xalana' Juanna' goquen de yiša' xa camello na' da' bčhej lšine' goquen de
yid, na' gwdagüe' biše'zo len šina' beser yiže'.

⁷ Na' gwdixjue'ede' bene' xtiža' Diosen', gwne':

—Coža' na' za' za' to bene' zaca'che' ca neda', na' da' nacchgüe' bene' zaca',
bi zaca' gona' xmandadoe' lechja' no xele'.

⁸ Neda' ba bzoa' le'e nis, perw ben' za' zan' gone' cont soa Spiritw che
Diosen' lo' yichjlažda'olen' naban' xbab chele.

*Jesúsen' gwzoe' nis
(Mt. 3:13-17; Lc. 3:21-22)*

⁹ Ca tiempa' Jesúsen' gwze'e lagüe yež Nazaret da' chi' ga mbane distritw
Galilea, na' Juanna' bzoe' le' nis lo' yegw Jordán.

¹⁰ Na' šlac chechoj Jesúsen' lo' nisen', Jesúsen' ble'ede' byaljw yaban' gan' zoa
Diosen', na' Spiritw che Diosen' betjen jasoan len le', na' ca hora' Spiriton'
naquen ca nac ngolbex.

¹¹ Na' gosende' gwne' Dios ben' zoa yaba gwne':

—Len' naco' Xi'ina' bene' chacchgüeda', na' chebe chezaque'laže'chgüeda'
chio'.

*Satanásen' goclažen' co'oyelan' Jesúsen' cont gone' da' mal
(Mt. 4:1-11; Lc. 4:1-13)*

¹² Nach Spiritw che Diosen' benen cont la' gwyejte Jesúsen' latje daš.

¹³ Na' gwzoe' latje dašen' čhoa ža ladjo be znia ca'. Na' Satanás dan' chnabia'
da' xigüe' ca' goclažen' co'oyelan' le' cont gone' da' mal. Nach beyoža' jasaclen
angl che Diosen' le'.

*Jesúsen' gwzolao chyixjue'ede' xtiža' Diosen' distritw gan' nzi' Galilea
(Mt. 4:12-17; Lc. 4:14-15)*

¹⁴ Beyož gosegüe'e Juanna' ližya, Jesúsen' beze'e beyeje' Galilea gan'
jatixjue'ede' diža' güen, gwne' Diosen' nabi'e yichjlaždao' bene' ca' yosozenag
che'.

¹⁵ Jesúsen' gwne':

—Ba bžin ža cate' Diosen' nabi'e yichjlaždao' bene' yosozenagüe' che'. Le yetinje xtoła' len' na' le šejle' diža' güen che Diosen' da' chyixjue'eda'.

Jesúsen' goxe' tap bene' gw Xen beł šja'aclene' le' txen

(Mt. 4:18-22; Lc. 5:1-11)

¹⁶ Jesúsen' chde' do cho'a nisdao' che Galilean' cate' ble'ede' chope bene' gw Xen beł, Simón na' bene' biše' Andrés. Na' zjanite' chosožale' yixjw dan' chesezende' belen' lo' nisa'.

¹⁷ Na' gož Jesúsen' legaque':

—Le šo'o len neda'. Nacle bene' gw Xen beł na' chbejle belen' lo' nisen', perw na'a gona' cont gaxle bene' yesyechoje' lo da' malen'.

¹⁸ Nach la' bosocua' ante yixjw chen' na' jasa'aclene' le'.

¹⁹ Na' Jesúsen' gwze'e yelate' na' ble'ede' Jacobon' xi'in Zebedeo na' len bene' biše' Juan, zjajo'e lo' barcw chesyeyonšagüe' yixjw chegaquen'.

²⁰ Na' Jesúsen' lecze goxe' legaque' šja'aclene' le' na' bosocua'ane' Zebedeon' ben' nac xagaque lo' barcon' len bene' ca' chesaclen le', nach ja'aque' len Jesúsen'.

To bene' gwyo'o gwyaze' da' xigüen'

(Lc. 4:31-37)

²¹ Besežine' yež da' nzi' Capernaum, na' ža che Dios Jesúsen' gwyo'e lo' yodao' da' zoa na' na' gwzolağüe' bsd blo'ede'.

²² Bene' ca' že' na' besyebande' can' bsd blo'ede', le can' bzejni'iden' nacbia' nezde' cayanen' nac xbab che Diosen', gague bzejni'ide' can' chosozejni'i ben' chosolo'e ley dan' bzoj da' Moisés.

²³ Na' lo' yodaon' zoa to bene' yo'o nyaze' da' xigüen', na' bosye'e gwne':

²⁴ —¿Bixchen' chgoša' chlaže' chio' len neto', Jesús bene' Nazaret? ¿Zedežiayo'o neto'? Neda' nombi'a le' na' nezda' naco' bene' laždao' xilaže' juisyw bene' gwsela' Dios.

²⁵ Nach Jesúsen' gože' da' xigüen':

—ššago', bechoj lo' yichjlaždao' benga!

²⁶ Na' da' xigüen' benen cont gwchole bena', nach chosya'adiachguan bechojen lo' yichjlažda'ogüen'.

²⁷ Yogo' bene' ca' že' na' besyebande' na' gose' lježe':

—¿Bixen' chac? ¿Bixe da' coben' chlo'e benga? ¿Nacbia' nape' yela' chnabia' na' yela' guac, le da' xigüe' ca' chesonen da' že'!

²⁸ Na' ca' nac dan' ben Jesúsen' bedao'nez gos gwlaļe dižan' doxen lağüe yež ca' gan' mbane Galilea.

Jesúsen' beyone' taobi'in che Simón Pedro

(Mt. 8:14-15; Lc. 4:38-39)

²⁹ Cate' besyechoje' lo' yodaon', Jesúsen' len Jacobo na' len Juan ja'aque' liž Simón na' Andrés.

³⁰ Na' taobi'in che Simónna' die' che'ede' xla; na' gose'e Jesúsen':

—Benga die' che'ede'.

³¹ Nach jabiga' Jesúsen' na' beXue' taquen' gwliše'ne'. Na' la' beyactede', nach bsini'e da' gose'ej gosagüe'.

Jesúsen' beyone' zan bene' chese'ede'

(Mt. 8:16-17; Lc. 4:40-41)

³² Cate' ba gwXoa gwbižen' na' ba gwXin, jasesane' lao Jesúsen' zan bene' chese'ede' na' bene' zjajo'o zjanyaze' da' xigüen'.

³³ Na' do yež bene' besedop besežague' cho'a yo'o gan' zoa Jesúsen'.

³⁴ Na' Jesúsen' beyone' bene' chese'ede' gwde gwdele yižgüe' na' bebeje' zan da' xigüe' da' zjajo'o zjanyaz bene', perw bitw bi'e latje bi yesenan, le legaquen zjanezen non' nac le'.

Jesúsen' chyixjue'ede' xtiža' Diosen' Galilea
(Lc. 4:42-44)

³⁵ Šbal cate' ne' nac choljesúsen' gwyase' na' gwze'e gwyeje' ga nono nla' na' bol güiže' Diosen'.

³⁶ Simón na' bene' lježe' ca' ja'aque' jasyediljue'ne'.

³⁷ Na' cate' besyeželde'ne' gose'ene':

—Yogo'ze bene' cheseyiljue' le'.

³⁸ Perw Jesúsen' gože'ne':

—Le šo'o ga yoble ga nac gala'ze cont lecze šjatixjue'eda' xtiža' Diosen' na', le da'nana' ba gwza'a.

³⁹ Can' goc, Jesúsen' gwde' doxen gan' mbane Galilea gwdixjue'ede' xtiža' Diosen' to to yodao' che neto' bene' Ísrael, na' bebeje' da' xigüe' da' yo'o nyaz bene'.

Jesúsen' beyone' to bene' che'ede' lepra
(Mt. 8:1-4; Lc. 5:12-16)

⁴⁰ To bene' che'ede' yižgüe' dan' nzi' lepra jabigue' gan' zoa Jesúsen' na' bzoa xibe' gože'ne':

—Še chaclažo', guac yeca'o yižgüe' dan' che'edan'.

⁴¹ Na' Jesúsen' beži'ilaže'de' le' na' beqxue'ne' gwne':

—Chaclaža' yeyacdo'. Beyeque.

⁴² Cate' gwne' ca' la' bega'ate yižgüen' na' beyacde'.

⁴³ Nach Jesúsen' besele'ne' liže', bene' mandadw, gože'ne':

⁴⁴ —Notno yo'o can' ba beyona' le', con gwyej jana' bxoza' cont le'ede' bačh beyacdo', na' bnežjw da' cheyla' gwnežjo' dan' non Moisésen' mandadw cont yeyaco' xilaže' len ley che Diosen'. Ben ca' cont yogo' bene' yesenezde' ba beyacdo'.

⁴⁵ Perw ben' bi bchejde', yogo'ze bene' gože' can' goca'. Da'nana' Jesús'a bich goc šeje' con ca nla'ze gate'teze yež, san con gwde' do yiže', na' bia'cze bene' za'ac yogo'ze yež jasene'e le'.

2

Jesúsen' beyone' to bene' bi chda šla'a ni'a ne'e
(Mt. 9:1-8; Lc. 5:17-26)

¹ Gwde to chop ža, Jesúsen' beyeje' da' yoble yež dan' nzi' Capernaum, na' bene' Capernaum ca' gosenezde' bežine' to yo'o ga ba gwzoacze'.

² Na' bedao'nez besežag bene' zan, necach gosezaque' yesenite' lo' yo'ona' ne cho'a yo'on, nach Jesúsen' gwdixjue'ede' xtiža' Diosen' len legaque'.

³ Nach besežin xonj bene' cont jasesane' lao Jesúsen' to bene' xinj bene' bi chda šla'a ni'a ne'e; tap bene' zjano'ene'.

⁴ Perw bi chac yesežine' gan' zoa Jesúsen' catec chyi. Nach goseque'e tej dan' ncu'a' yičhj yo'on na' beseletje' le' na'le to lo cam dao'.

⁵ Na' cate' Jesúsen' gocbe'ede' can' chesejnilaže'nen', gože' bene' güe'na':

—Xi'ina', ba bezi'xena' xtolon'.

⁶ Bał bene' chososed chosolo'e ley dan' bzoj da' Moisésen' zjach'i'e na', na' gosone' xbab:

7 “¿Bixchen' chna benga ca'? le chon cuine' ca Dios. Nono zoa bene' gac yezi'xene' xtoła' beñač. Toz Diosen' gac yezi'xenen'.”

8 Perw Jesúsen' chache'eczedede' can' nac xbab čhegaquen', na' gože' legaque':
—¿Bixchen' chza'laže'le ca'?

9 Še yapa'ne': “Ba bezi'xena' xtoło'na'”, bi nezele še napa' yela' gwnabia' cont yezi'xena' xtole'na', san še yapa'ne': “Gwyas, beyoa' xcamon'”, na' nacbia' še napa' yela' guac gac can' gwnian'.

10 Perw neda' naca' ben' gwsela' Dios golja' beñač, gwlo'eda' le'e na'a zoa' yežlio nga napa' yela' gwnabia' cont yezi'xena' xtoła' beñač.

Nach gože' bene' xinja':

11 —Chapa' le', beyas, beyoa' xcamon' na' beyej ližo'.

12 La' beyaste bene' xinja' chesena'te bene' ca' nita'na' na' beyoa' xcamen'. Da'nan' yogo' bene' ca' besyebande' na' goso'e yela' choxclen čhe Diosen', gosene':

—Biña' le'echo yela' guac dan' nac ca'.

Jesúsen' goxe' Leví cont gwyejlene'ne'

(Mt. 9:9-13; Lc. 5:27-32)

13 Da' yoble gwyej Jesúsen' cho'a nisdao' na' bene' zan besedobe' gan' zeje' na' bsd blo'ede' legaque' xtiža' Diosen'.

14 Na' Jesúsen' gwdie' latje gan' chi' Leví xi'in Alfeo chčhixjue' impuesto, na' cate' ble'ede' le' na' gože'ne':
—Da len neda'.

Nach gwzoža' Levín' na' gwyejlene'ne'.

15 Na' gwdena' goquen' chi' Jesúsen' liž Levín' na' güe'ej gwdagwlene'ne' txen len zan bene' güečhixjw na' len yebał bene' güen da' xinj, na' len bene' ca' zjanaque' Jesúsen' txen, le zan bene' zja'ac zjanao' le'.

16 Perw na' bene' ca' chososed chosolo'e ley dan' bzoj da' Moisés na' bene' fariseo ca' cate' besele'ede' che'ej chagüe' txen len bene' ca', gose'e bene' ca' zjanaque' Jesúsen' txen:

—¿Nacxechen' ben' chsed chlo'e le'e che'ej chagwlene' txen bene' güečhixjw na' yebał bene' güen da' xinj ca'?

17 Cate' Jesúsen' bende' can' gosene' na' gože' legaque':

—Bene' bi chesacšene bi cheseyažjde' bene' güen rmed. Bene' chesacšende', legaquen' cheseyažjde' bene' güen rmed. Gague bene' ba zjanaque' bene' güen len Diosen' zedenyoeda' cont yesyetingde' xtołen', san bene' güen da' xinj. Legaquen' zjazaca'lebe' ca bene' cheseyažje bene' güen rmed.

Gosenabde' Jesúsen' bixchen' bene' zjanaque' le' txen bi chesone' gwbas

(Mt. 9:14-17; Lc. 5:33-39)

18 To ža cate' bene' ca' zjanaque' txen len Juanna' na' bene' zjanaque' txen len bene' fariseo ca' gosezoe' gwbas, bał bene' jasa'aque' jaseñabde' Jesúsen':

—Bene' ca' zjanaque' txen len Juanna' na' bene' ca' zjanaque' txen len bene' fariseo ca' chesone' gwbas, na' bene' ca' zjanaque' txen len le' bi chesone' gwbas. ¿Bixchen'?

19 Na' Jesúsen' gože' legaque':

—¿Guaque yesezoa gwbas bene' chaxe' to ga chac yela' güešagna' šlac ben' bšagnan' zoalene' legaque'? Še zoa ben' bšagnan', bi gac yesone' gwbas.

20 Perw žin ža cate' bich zoe' len legaque', cana'ch yesone' gwbas. Na' ca'czen' naquen len neda' na' len bene' ca' zjanaque' neda' txen.

21 'Nono zoa bene' yode'e to lache'exo' na' yezoen' to lache' cobe, le lache' coben' yeben' cate' chiben' na' šon' lache' golen', na' gan' žon'na' gacchen da' xen.

22 Neca zoa bene' chgue'e vino cobe lo' bzod yide'exo', le vino coben' chšon' yide'exon' na' chbiayi' vinon' len yida'. San chesegue'e vino coben' lo' yid cobe cont bibi gaquen.

Bene' ca' zjanaque' Jesúsen' txen chesalje' dao ža che Dios

(Mt. 12:1-8; Lc. 6:1-5)

23 To ža che Dios Jesúsen' gwdie' to ga nyaž trigw, na' bene' ca' zjanaque' le' txen gosezolagüe' chesalje' dao che trigon' šlac gosedie' gan' nyaženna'.

24 Nach bene' fariseon' gose'e le':

—Gwŋa'šc žbixchen' cheson bene' ca' zjanaque' le' txen žin da' bi cheyała' yesone' ža che Dios?

25 Na' Jesúsen' gože' legaque':

—žBiŋa' gwlable can' ben da' rey David to ža cate' le' na' bene' lježe' ca' gosedone'?

26 Gwyo'o Davin' ga nac liž Dios cate' da' Abiatar goque' bžoz blao, na' gwdagüe' yetextil da' nac che Dios da' bi chac gagw bene' bi nac bžoz, na' lecze bnežjue' che bene' zja'ac len le'.

27 Lecze gož Jesúsen' legaque':

—Diosen' gwleje' to ža cate' bi yeson benachen' žin cont gaclenen benačh, gague gwleje' benachen' cont yesonxene' ža čhen'.

28 Da'nan' naquen lo' na' nia' bi da' nac güen goncho lente cate' nac ža che Dios, neda' naca' ben' gwseła' Diosen' golja' benačh.

3

Jesúsen' beyone' to bene' nxo'on šla'a taque'

(Mt. 12:9-14; Lc. 6:6-11)

1 Yeto ža che Dios Jesúsen' gwyo'e da' yoble to lo' yodao' che neto' bene' Israel na' ca hora' ba chi' to bene' nxo'on šla'a taque'.

2 Na' bene' ca' že' lo' yodao'na' chosogüia chesene'e Jesúsen' še yeyone' bena' žan' nac ža che Dios cont de da' yosode'ede' yesagüe' xya che'.

3 Nach Jesúsen' gože' ben' nxo'on taquen':

—Gwzoža' na' gwzecha nga.

4 Nach gwŋabde' bene' ca' yezica'chle:

—žBi da' cheyała' goncho ža che Dios? žGoncho da' güen, še goncho da' mal? žCheyała' yoslacho bene', še cheyała' gotchone'?

Perw na' legaque' gosenite' šižize.

5 Nach Jesúsen' gwŋe'e legaque', bže'e can' gosone' xbab, na' lecze go-
cyaše'laže'de' dan' bi gosejle'e che', nach gože' ben':

—Bli naon'.

Na' blien', na' taquen' beyaquen binlo.

6 Nach besyežaš bene' fariseo ca' na' gosezolagüe' chosoxi'e len bene' ca' zjada' Herodes naquen' yesone' yesote' Jesúsen'.

Zan bene' nita' cho'a nisdaon'

7 Nach Jesúsen' gwyeje' cho'a nisdaon' len bene' ca' zjanaque' le' txen, na' zan bene' Galilea ja'ac len le'.

⁸ Na' zan bene' za'aque' Judea, na' Jerusalén, na' Idumea, na' yeš'la'a yegw Jordán, na' gan' mbane Tiro na' Sidón goside' bedesene'e le' cate' gosenezde' yela' guac da' chonen'.

⁹ Da'nan' Jesúsen' gože' bene' ca' zjanaque' le' txen yeseyiljue' to barcw dao' gan' cuie' cont bi yosochi bene' ca' zjanžaga' le',

¹⁰ le bene' zan ba beyone', na' bene' ca' ne' chese'ede' chosožiga' lježe' nac gac yesože'ne'.

¹¹ Na' bene' ca' zjajo'o zjanyaz da' xigüen' cate' chesele'ede' Jesúsen' choso- zoa xibe' lagüen' na' da' xigüe' ca' chososya'an chese'en le':

—Len' naco' dogualje Xi'in Dios.

¹² Perw Jesúsen' gwdile' legaquen na' bene' mandadw bi yesenan no nac le'.

Jesúsen' gwchie' bene' šižinw ca' gosaque' txen len le'

(Mt. 10:1-4; Lc. 6:12-16)

¹³ Beyoža' Jesúsen' gwloe' to lo ya'a na' goxe' ba' bene' goclaže' šja'aclene' le', nach gosa'aque' ja'aque' gan' zoen'.

¹⁴ Nach gwleje' šižinw bene' yesenita' len le', cont sele' legaque' šjasedixjue'ede' xtižen'.

¹⁵ Na' bnežjue' legaque' yela' guac cont yeseyone' bene' güe' na' yela' gwnabia' cont yesyebeje' da' xigüe' da' yo'o nyaz bene'.

¹⁶ Šižinw bene' quin' gosac: Simón ben' lecce gože'ne' Pedro;

¹⁷ Jacobo len bene' biše' Juan bene' ca' zjanac xi'in Zebedeo, na' bsi'e legaque' Boanerges, zeje diža' bene' zjanac ca' yi' gwzio' cate' chašjw chtinen;

¹⁸ nach Andrés, na' Felipe, na' Bartolomé, na' Mateo, na' Tomás, na' Jacobo xi'in Alfeo, na' Tadeo, na' Simón ben' gwde'e bene' ca' zjanzi' cananista,

¹⁹ na' Judas Iscariote ben' gwdechle' bdie' Jesúsen' lo na' bene' ca' chesegue'ede' le'.

Gosene' Jesúsen' bebeje' da' xigüe' len yela' guac che Beelzebú

(Mt. 12:22-32; Lc. 11:14-23; 12:10)

Beyoža' Jesúsen' len bene' ca' zjanaque' le' txen goso'e lo' yo'o gan' zoe' ca' hora',

²⁰ na' da' yoble besežagchgua bene', neca' goc yese'ej yesagw Jesúsen' len bene' ca' zjanaque' le' txen.

²¹ Na' cate' gosenezze' biše' ljež Jesúsen', ja'aque' cont yesyech'e'ene', le' gosene' chactonte'.

²² Nach bene' ca' bososed bosolo'ede' ley dan' bzoj da' Moisés gosa'aque' Jerusalén na' ja'aque' distritw Galilea gan' chsed chlo'e Jesúsen' na' gose'e bene' ca' že'na':

—Benga yo'o nyaze' Beelzebú dan' chnabia' da' xigüe' ca', na' Beelzebún' chaclenen le' cont chebeje' da' xigüe' zjajo'o zjanyaz bene'.

²³ Nach Jesúsen' goxe' bene' ca' na' bsd blo'ede'ne' gwne':

—¿Nac gon Satanás dan' chnabia' da' xigüe' ca' yebejen lecce da' xigüe'?

²⁴ Še to gobiern' choje' chop šon' cuenle' na' yeyoža' yesedile' legacze', gobiernna' bi sibi'e.

²⁵ Na' še bene' že' toz yo'o yesechoje' chople' na' yesedile' legacze', gague' sša yesenite' txen.

²⁶ Na' še Satanásen' len da' xigüe' chen yesechojen chople' na' yesedilen, lecce bi sibian', san na' yeyož yedon.

²⁷ Nono gac šo'e lo' yo'o che to bene' gual na' que'e bi da' de che' še cbi zgua'tec gwcheje' bene' gual na', lete gone' ca' nach gac que'e bi da' de che'.

²⁸ Da' li žia' le'e, yogo' da' xinj da' chon be_na_{ch} na' yogo' diža' bya' da' yesene', Diosen' yezi'xene' chen še yesyetinjde'.

²⁹ Perw note'teze bene' ne' yela' ya' che Spiritw che Dios, gwbat yezi'xen Diosen' che, san de do_la' che to_li toca_ne.

³⁰ Gwne' ca' dan' gosene' che yo'o nyaze' da' xigüe'.

Xna' Jesúsen' na' bene' biše' gosaxe'ne'
(Mt. 12:46-50; Lc. 8:19-21)

³¹ Na' bžin xna' Jesúsen' len bene' biše', na' gosenite' chyo'ole gosaxe' le'.

³² Na' bene' ca' zjanita' cuit Jesúsen' gose'ene':

—Xna'o len bene' bišo' ca' zjanite' chyo'o na' chesyeyiljue' le'.

³³ Nach Jesúsen' gože' legaque':

—¿Nezele non' nac xna'a na' no zjanac biše' lježa'?

³⁴ Nach gwne'e bene' ca' zjachi' cuite'na', na' gwne':

—Bene' quin' zjanac xna'a na' zjanaque' biše' lježa'.

³⁵ Le note'teze bene' chone' da' chna'laže' Dios, bena' nac bene' biša', bene' zana', lecze naque' xna'a.

4

Jempl che bene' goz trigo
(Mt. 13:1-9; Lc. 8:4-8)

¹ Yeto ža yoble gwzola_o Jesúsen' chsed chlo'ede' cho'a nesdaon', na' be-sežagchua bene' zan juisyw gan' chi'ena'. Na' da' besežagchua bene' zan, berten byen gwyo'o Jesúsen' to lo' barcw dao' da' chda' lo nesdaon' cho'a yo bižen' na' gwchi'e lo'en_na', na' yogo' bene' ca' gosenite' cho'a nesdaon' ga nac yo biž.

² Nach da' zan da' bsd blo'ede' legaque' len jempl da' bi'e. Na' bzejni'ide' legaque', gwne':

³ —Le gwzenag da' nga: To bene' güen žin jeze' trigw.

⁴ Na' šlac zeje' chose' trigon', late' bi_n che trigw dan' chazen' jasechazen chanez nach be ca' žia xil be chaš le'e yaba gosagwban'.

⁵ Yelaten' jasechazen ga nac lo yej, ga bibi yotec zoa, na' da' nga byob blan' le bi jasechazen ga nac sitjw.

⁶ Perw cate' bla' gwbiža' na' bzeyen len na' gwbižen, le gague yo'otec loenna' sitjon'.

⁷ Yelaten' jasechazen ga nac lo yag yeše', na' yag yešen' gosecha'on na' bosolo_len' len, na' bibi goseb_ian.

⁸ Perw na' yelaten' jasechazen ga nac yo šagüe'. Da' nga beselan' na' gosecha'on na' leca güen goseb_ian, ba_len goseb_ian do šichoa güeje to ton, ba_len gayon, na' yeba_len do to gayoa.

⁹ Na' gože' legaque':

—Le'e žia nagle da' chene, le gwzenag xtiža'na'.

Bichen' bzejni'ide' bene' len jempl
(Mt. 13:10-17; Lc. 8:9-10)

¹⁰ Gwdena' cate' ba besyeya'ac bene' zan ca', bene' ca' zjanita' ga_la'ze len le' na' len bene' šižinw ca' zjanaque' le' txen, gosenabde' le' bi zejen jempl dan' bi'en.

¹¹ Na' gože' legaque':

—Nono na' neze can' nac yela' gwnabia' che Diosen', perw ba chone' cont le'e chejnilaže'lene' nezelen. Na' bene' bi chesaclaže' yesejnilaže' Diosen', choe'lengaca'ne' xtižen' len jempl.

¹² Chona' ca' cont yesele'ede' can' chonan' na' bitw yesacbe'ede' bi zejen, na' cont yesede' xtižan' na' bi yesejni'iden', na' neca yesyetinjde', neca yezi'xen Diosen' xtolen'.

Jesúsen' bzejni'ide' bi zejen jempl che ben' ben goza'

(Mt. 13:18-23; Lc. 8:11-15)

¹³ Nach gože' legaque':

—¿Bi chejni'ile jempl nga? ¿Nacxe gac šejni'ile jempl yoble da' güe'lena' le'e?

¹⁴ Ben' ben goza' naque' ca ben' choe' xtiža' Diosa'.

¹⁵ Na' bał bene' zjanaque' ca biñ dan' beselažo' chanez, le chosozenague' cate' chas chlalje xtiža' Diosen', na' ca cheyoža' la' chžinte Satanásen' dan' chn-
abia' da' xigüe' ca' na' chebejen xtiža' Diosen' dan' ba yo'o yichjlažda'ogüen'.

¹⁶ Yebał bene' zjanaque' ca biñ dan' beselažo' ga nac lo yej na' bi ben loen. Legaque' chesyebede' chosozenague' xtiža' Diosen',

¹⁷ perw šložga chesezibi'e, na' cate' chesac bi da' mal čegaque' o bichle chesone bene' legaque' neče da' chosozenague' xtiža' Diozen', la' chesebe-
yichjten'.

¹⁸ Na' yebałe' zjanaque' ca biñ dan' besego'onen ga nac lo yag yeše'. Chosozenague' xtiža' Diosen',

¹⁹ na' šlac zjambane' chesyelał chesyžejde', na' da' chesaclaže' yeseni'e chziye'en legaque' na' chesezelaže' yogo'ze da' de yesata' che'. Yogo' da' qui bi choen' latje yega'an xtiža' Diosen' lo' yichjlažda'ogüen' na' da'nana' bi chesejnilaže' le' ca cheyala'.

²⁰ Perw na' nita' bał bene' chosozenague' xtiža' Diosa' na' chesejnilaže' le' do yichj do laže', bene' qui zjazaca'lebde' ca biñ dan' beselažo' lo yo šagüe'. Bałe' zjanaque' ca biñ dan' gosebjan šichoa güeje to ton, na' yebałe' ca da' ca' bexoen' gayon, o ca no da' ca' bexoen' to gayoa güeje to ton.

Jempl che yi' dan' chguala'cho

(Lc. 8:16-18)

²¹ Lecze gože' legaque':

—Cate' chguala'cho to yi' ¿gwđosa'chon to caj o gwzoachon xan cam? Bi choncho ca', san chguala'cho yin' na' chzoachon sibe cont gwseñin'.

²² Na' da' ngaše' chia' neda' na'a, lenna' gwlo'elaon, na' da' nono na' neze chia', žin ža yesenežden'.

²³ Le'e žia nagle da' chene, le gwzenag xtižan'.

²⁴ Lecze gože' legaque':

—Le gwzenag da' quingan' da' chzejni'ida' le'e. Le con can' chonle len len, can' gon Diosen' len le'e. Na' gonchcze' cont soachle mbalaz da' chzenagle che'.

²⁵ Le še chzenagle xtižen' gwzejni'ichde' le'e, perw na' še bi chzenaglen, da' daon' ba nezele yeyanlaže'len.

Jempl che biñ dan' chlan' na' chcha'on

²⁶ Lecze gwna Jesúsen':

—Yela' gwnabia' che Diosen' zaca'leben ca dan' chac cate' to bene' chaze' bite'teže biñ lo yo.

²⁷ Chjaytase' na' chebane' cheyase', chde ža yel, na' chla' dan' gozen' na' chcha'on, perw le' bi nežde' naquen' chac.

²⁸ Le to gualazze yežlio nan' chonen len, zgua'tec chla' lbe'edagüen', nach chlan' dao, na' cheyoža' chbian da' cheyała' cuian.

²⁹ Na' cate' ba goł dan' chbianna' na' chja'aque' chjasyexi'en, le ba bžin cho'a gwlap.

Jempl che bin che xomdas
(Mr. 13:31-32; Lc. 13:18-19)

³⁰ Nach lecze gwna Jesúsen':

—Gonchcho xbab bi ca da' zaca'lebe yela' gwnabia' che Diosen' na' güe'cha' jempl cont nezele šanch bene' yosozenag che' cont nabi'e yichjlažda'ogaque'.

³¹ Naquen ca to bin che xomdas da' chyaž lo yo. Len chnabia' nac da' dao' len bin ca' chazcho lo yežlion'.

³² Perw cate' bač nyažen, chcha'on na' chaquen da' xench lao yiže' cuan ca', na' da' xenchgua chac xol che xozenna', na' lente byin dao' ca' chesyezi'laže'ba' lo xozenna'.

Jesúsen bgone' žin jempl
(Mt. 13:34-35)

³³ Can' blo'e Jesúsen' xtiža' Diosen' yogo' ni'a, bi'e zan jempl ca che ben' goza' na' che bin ca', con ga zelao goc gosejni'ide'.

³⁴ Bitwbi bzejni'ide' legaque' sin ca be'e jempl, nach cate' bich nita' bene' zan ca', bzejni'ide' bene' ca' zjanaque' le' txen bi zejen yogo' da' ca'.

Jesúsen' bebecžie' be' bdono' len nisdao'
(Mt. 8:23-27; Lc. 8:22-25)

³⁵ Leze lo žana' cate' gwxin, Jesúsen' gože' bene' ca' zjanaque' le' txen:

—Le šo'o laga'cho yešla'a nisdaon'.

³⁶ Nach bosyocua'ane' yezica'chle bene' ca' že' gan' ba bsed blo'ede' na' gosa'aque' lo' barcw daon' gan' ba yo'ocze Jesúsen'. Na' yebał bene' lecze ja'aclene' legaque' len yeto čop barcw dao'.

³⁷ Na' gwzolao gwyechjhgua to be' bdono' na' nisdaon' leze chas chatan', na' gwzolao cheyož nis lo' barcon'.

³⁸ Jesúsen' ba chtase' xante barcon' to lo xcogue' caten' goc ca'. Na' bosyosbane' le' gose'ene':

—iMaestro! žBibi de chza'lažon' še ba gwdebe nisdaon' chio'?

³⁹ Nach gwyas Jesúsen' na' gwdiłe' be' bdonon' na' gože' nisdaon':

—ižižize! ižižize!

Na' bebe'ži be' bdonon' na' beyata'ži nisdaon'.

⁴⁰ Nach Jesúsen' gože' bene' ca' zjanaque' le' txen:

—iBixchen' chžebtecle? iNacxechen' bi chejle'le' chia'?

⁴¹ Legaque' besežebchgüe' na' gose' lježe':

—iNoxe benga? lente be' bdono' na' len nisdaon' chosozenaguen che da' že'.

5

Bene' Gadara yo'o nyaze' da' xigüe'
(Mt. 8:28-34; Lc. 8:26-39)

¹ Besežine' šla'a nisdaon' gan' mbane Gadara,

² na' cate' bechoj Jesúsen' lo' barcon' to bene' yo'o nyaz da' xigüen' bchoje' lo' capsantw na' jašague' le'.

³ Bena' ba zoacze' capsantw na'le na' nono chzoe goxe' le', ne len gden ca gosezoede' le'.

4 Da' zan ni'a bosočheje' ni'a ne'e gden, perw bia'cze gwçhoguen', con bzojx btinen', na' nono gwzoe le'.

5 Yogo' ža yogo' yel gwde' bosya'adie' do lo ya'a na' do ladjo ba ca' na' tža tža chone' zi' cuine' len yej.

6 Na' cate' ble'ede' Jesúsen' zito' gwyejsese' jazoa xibe' lagüen',

7 na' da' xigüen' benen cont bosya'adie' gože' le':

—¿Bixchen' chgoša' chlaže' chio' len neda', Jesús? Naco' dogualje Xi'in Dios bene' nape la'zelagüe yela' chnabia' xen. Neče Dios chñeyoeda' le' bi gwsaco' neda'.

8 Da' xigüen' benen cont gwna ben' ca' dan' gož Jesúsen' len:

—Da' xigüe', hsan benga.

9 Na' gwnabe Jesúsen' len:

—¿Bi lio'?

Na' boži'in xtižen':

—Legión lia', le nac zanto'.

10 Na' goseneyoen Jesús'a' bi yeselen' zito' cate' yesyežašen' yichjlaždao' ben'.

11 Na' gala'ze lo ya'ana' chesaš zan coš chesagwba'.

12 Nach da' xigüen' goseneyoen le':

—Gwseła' neto' gan' nita' coš ca' na' ben latje šjayo'oto' lo' yichjlažda'oban'.

13 Nach Jesúsen' bnežjue' latje, na' besyechoj da' xigüen' lo' yichjlaždao' bena' na' jasyeyo'on yichjlaždao' coš ca'. Nac ca do chop mil cošen'. Na' besyeyetjese coš ca' le'e ya'a gan' nita'ban' na' jasełažo'ba' lo' nisdao' ga gosatba' gose'ejba' nis.

14 Nach bene' ca' chosoyoe' cošen' bosyoxonje' jasyeyeže' bene' lagüe yež len bene' chaš yixe' can' goca'. Na' ja'ac bene' jasene'e bixen' goc.

15 Cate' besežine' gan' zoa Jesúsen' besele'ede' ben' ba gwyo'o gwyaz da' xigüen', na' na'a ba chi'e nyaz xalane' na' ba bezoa yichjlažda'ogüen' binlo. Na' besežebe'.

16 Na' bene' ca' besele'ede' can' goquen' goso'e diža' che dan' goc len ben' gwyo'o gwyaz da' xigüen', lez ca' dan' goc len coš ca'.

17 Nach gosezolagüe' gosata'yoede' Jesúsen' yeze'e lažgaquen'.

18 Na' cate' beyo'o Jesúsen' lo' barcon' ben' ba gwyo'o gwyaz da' xigüen' gota'yoede' Jesúsen' šejlene' le'.

19 Perw Jesúsen' bi be'e latje, san gože' le':

—Beyej ližo' na' jayež bene' lo' yo' chio' na' no bene' migw chio' yogo' da' güen da' ba ben Xancho Diosen' len le' na' catec ba beyaše' beži'ilaže'de' le'.

20 Na' beza' ben' na' gwzologüe' cho'e diža' yež ca' gan' mbane distritw Decápolis yogo' can' ben Jesúsen' len le', na' yogo' bene' gosene xtižen' besyebande'.

Bi' no'ol che Jairo, na' no'ol ben' gwdane' xa Jesúsen'

(Mt. 9:18-26; Lc. 8:40-56)

21 Cate' bežin Jesúsen' cho'a nisdao'n zeze'e lo' barcw daon' dan' zeza' šja'a nisdao'n, bene' zan ja'aque' gan' bežinen', na' Jesúsen' bega'ane' cho'a nisdao' na'ze.

22 Nach bžin to ben' nac bene' gwnabia' che yodao' che yežna', lie' Jairo. Cate' ble'ede' Jesúsen' bzoa xibe' lagüen'

23 na' gota'yoehgüede'ne' gože'ne':

—Xi'ina' no'ole ba chatbe'. Benšca goclen yo'o xoa taco' yichjbe' cont yeyaquebe' na' bi gatbe'.

24 Nach Jesúsen' gwyejlene' le'. Na' bene' zan ja'acch, na' bosočhichgüe' le'.

25 Ladjo bene' ca' len to no'ol che'ede', ba goc šižinw iz chzoe' gwbao'.

26 Ba bžaglaochgüe' jen cuine' rmed len zan bene' güen rmed ca', na' ba benditje' yogo' xmechue' da' de, perw bitwbi gwxi'czen, san chyała'len.

27 Cate' bende' cheso'e xtiža' Jesúsen', no'olna' gwddie' ladjo bene' ca' na' bžine' cože'le Jesúsen' na' gwdane' xen'.

28 Le bene' xbab, gwne': "Con še ba gwdana' xen' nach yeyactecza'."

29 Na' da' li cate' gwdane' xen' la' gwlezte gwbao' dan' zoen', na' no'olen' gocbe'ede' ba bega'a yižgüe' chen'.

30 Na' Jesúsen' la' gocbe'etede' to bene' ba beyacde' len yela' guac chen', nach gwyečhje' gwne'e bene' ca' nita' cože'le, na' gwñabde' legaque':

—¿Non' gwdan xan'?

31 Nach bene' ca' zjanaque' Jesúsen' txen gose'ene':

—Ba ble'eczede' ca chosočhie' le', ¿bixchen' chñabo' non' gwdan xaan'?

32 Perw Jesúsen' chñe'e nile na'le cont le'ede' non' gwdan xen'.

33 Nach no'olen' nezde' can' ba goc che' na' do chaž chžebe' gwyeje' jazoa xibe' lagüen' na' gože'ne' yogo' da' li.

34 Na' Jesúsen' gože'ne':

—Xi'ina', ba beyacdo' dan' chejnilažo' neda'. Beyej binlo, na' bich bi gacdo' len yižgüe' chion'.

35 Ne' choe'te Jesúsen' dižan' ca' cate' besežin bene' gosa'ac liž xan yodaon', na' gosi'e xa bi' no'ol daon':

—Ba got bi' chion', ¿bixchen' choncho' zed Maestro nga?

36 Perw Jesúsen' bi bene' cuent dan' chesena bene' ca', na' gože' xan yodaon':

—Bitw žebo', con gwyejle' chia'.

37 Na' bi bi'e latje šja'aclen bene' zan le' gan' xoa bi' no'olen', san Pedro, Jacobo na' Juan bene' biše' Jacobo, bene' ca'ze ja'aclen le'.

38 Na' cate' besežine' liž xan yodaon', ble'ede' ba chi' žaš chesosye'e chese-beže'.

39 Nach gwyo'e na' gože' legaque':

—¿Bixchen' mbecele žaš chbežle? Bi no'ol daon' bina' gatbe', san chtasben'.

40 Perw bosoxiže' gosonle' che'. Nach Jesúsen' bešaše' yogo'lole', na' gwche'e xaxna'be' na' bene' ca' zja'aclen le' na'ze na' goso'e len le' gan' de bi' no'ol daon'.

41 Na' bežue' taca'ben' na' gože'be':

—Talita, cumi —zeje diža': Bi' no'ole, chapa' le' beban na' beyas.

42 Nach bi' no'ol daon' la' beyastebe' na' goc beza'be', le šižinw izegueben'. Na' bene' ca' besele'e leca besyežejde' can' goca'.

43 Perw Jesúsen' gože' legaque' nono yese'e ca', na' gože' legaque' yeso'e bi' no'ol daon' da' gagwbe'.

6

Jesúsen' bežine' distritw gan' chi' yež Nazaret (Mt. 13:53-58; Lc. 4:16-30)

1 Na' beza' Jesúsen' na' bežine' laže', na' bene' ca' zjanaque' le' txen ja'aclene' le'.

2 Na' cate' bžin ža che Dios, Jesúsen' gwzologüe' bsd blo'ede' lo' yodaon'. Na' bene' zan bene' gosende' xtižen' besyebande' na' gosene':

—¿Nacxe chaquen' cho'e diža' ca'? ¿Bi yela' sinan' nezde'? na' ¿nacxechen' chac chone' yela' guac ca'?

³ Benga chonšagüe' yag na' naque' xi'in María. Nombia'chwne' na' bene' biše' Jacobo, José, Judas na' Simón, na' lecze bene' zane' ca' nite' lažcho nga.

Na' da' zjanombi'ene' nan' bi gosaclaže' yesejle'e che'.

⁴ Nach Jesúsen' gože' legaque':

—Yogo'ze bene' chesonxene' bene' choe' xtiža' Diosen', perw bene' gualaž che', bene' biše' lježe' na' bene' lo' yo'o che' bi chosozenague' che'.

⁵ Na' ne to yela' guac ca goc gone' na', lete gwᵛoa taquen' yichj to čhop bene' güe' na' beyone' legaque'.

⁶ Na' bebande' dan' bi gosejle' bene' che'. Na' gwdechle gwda Jesúsen' bsed blo'ede' to to yež dao' ca' nita' gala'ze.

Jesúsen' gwsele' bene' ca' zjanaque' le' txen jasedixjue'ede' xtiža' Diosen' (Mt. 10:5-15; Lc. 9:1-6)

⁷ Na' goxe' bene' šižinw ca' na' gwsele' čhop güeje' to to yež, na' benežjue'ne' yela' gwnabia' cont goc besyebeje' da' xigüe' lo' yichjlaždao' bene'.

⁸ Na' cate' za' yesa'aque' gože' legaque' bibi yesoᵛe' chanez, ne bzod, ne yetextil, ne mechw, con yesoᵛe' to xis da' yosočiše'.

⁹ Na' yosoleje' yel perw bi yesoe' yeto xcamise'.

¹⁰ Na' lecze gože' legaque':

—Cate' žinle to liž bene', na'ze yega'anle šlac zoale lagüe yeža', cate'ch yeza'le yeža' cana'ch yeza'le latja'.

¹¹ Na' še zoa ga bi yosolebe' le'e neca yosozenague' chele, cate' yeza'le na' le cuibe ni'alen' yo bište cont nachia' malen' chesone' bi chosozenague' xtiža' Diosen'. Da' li žia' le'e cate' žin ža gac juisyw bene' ca' bi yosolebe' le'e yesacche' castigw cdel ca bene' Sodoma na' bene' Gomorra.

¹² Nach gosa'aque', na' goseyixjue'ede' cheya'la' yesyetinje' xtola' benačhen'.

¹³ Leze besyebeje' da' xigüe' da' yo'o nyaz bene', na' zan bene' güe' goseyebene' set na' besyeyacde'.

Gosote' Juan ben' bzoe' bene' nis (Mt. 14:1-12; Lc. 9:7-9)

¹⁴ Na' ca nac rey Herodes, gwᵛezde' can' chesone', le yogo'ze bene' gosende' can' ben Jesúsen'. Na' Herodesen' gwne':

—Juan ben' bzoe' bene' nisen' ba beban ladjo bene' guat ca'. Da'nan' chaque' chone' yela' guac.

¹⁵ Yeba'le bene' gosene':

—Naque' ben' be' xtiža' Diosen' cani', ben' le Elías.

Na' yeba'le' gosene':

—Naque' con to bene' choe' xtiža' Dios ca bene' ca' gosoe' xtiža' Diosen' cani'te.

¹⁶ Cate' Herodesen' bende' dižan' nac ca' na' gwne':

—Bengan' Juan ben' gwčhogbi'an gosečhogue' yene', na' na'a ba bebane' ladjo bene' guaten'.

¹⁷⁻¹⁸ Le Herodesen' beque'e Herodías na' gwzoalene' le' goque' xo'ole' la'czla' Herodíasna' naque' xo'ole' Felipe biše'na'. Na' Juanna' gože' Herodesen':

—Bi cheya'la' soalen no'ol che bene' bišon'.

Da'nan' Herodesen' gwčhogbi'en gosezene' Juanna' na' bosocheje'ne' len gden lo' yo'o ližya gan' gosegüe'ene'.

¹⁹ Can' goc Herodíasna' bgue'ede' Juanna' na' goclaže' gote'ne', perw bi goc.

²⁰ Le Herodesen' gwᵛezde' Juanna' naque' to bene' chon da' zej to liča na' to bene' yo'o lo' na' Dios, nachen' Herodesen' bžebe' Juanna' na' bi be'e latje

bi gone Herodiasen' le'. Na' la'czla' bi gwyejni'iteque Herodesen' dan' bšalj Juanna', con bebede' bzenague' che'.

²¹ Perw Herodiasen' beyiljwlaže' nac bene' cate' ben Herodesen' lni gola' ža le', bsini'e xše' da' gwdagüe' len bene' gwnabia' che' ca' na' no xan soldadw ca' na' nochle bene' blao že' distritw Galilean'.

²² Bi' no'ol che Herodiasen' gwyo'obe' bya'abe' gan' gosagüe' xšen' na' beca'a Herodesen' can' bya'aben', lez ca' ben' gosagw len le' xšen'. Na' reyna' gože' bi' no'ola':

—Gwnabe neda' con da' žan chio' na' gonan'.

²³ Na' lecce gože'be':

—Diosen' naque' testigw chia' gona' le' con da' nabdo'nda', la' gašjo yež ca' gan' mbanda' chnabi'a.

²⁴ Na' bechojbe' na' gožbe' xna'ben':

—Žbi nabda'ne'?

Na' le' gože'be':

—Gwnab yichj Juan ben' chzoe' bene' nis.

²⁵ Na' la' beyo'otebe' gan' chi' reyna' na' gožbe'ne':

—Che'nda' netecna'a gono' neda' to lo' platw yichj Juan ben' chzoa bene' nis.

²⁶ Na' ne late'ze bi gwyazlaže' reyna' gone' can' gož no'ol güegon' le', perw bachle gwne' lao bene' ca' jasa'ac lmin' Diosen' naque' testigw che' gwnežjue'be' bite'teže nabebe' le', da'nan' bi bžone' gac dan' gwnabebe' le'.

²⁷ Nach la' gwsela'te reyna' to soldadw na' gože'ne' šjaxi'e yichj Juanna'.

²⁸ Na' gwyej soldadon' lo' yo'o ližyan' na' jachogue' yen Juanna', na' bžie' yichje' to lo' platw jasanen' bnežjuen' bi' no'ola', na' bi' nga bnežjwben' xna'be'.

²⁹ Cate' gosenže bene' ca' zjanaque' txen len Juanna', jasexi'e cuerp chen' cont bosocuaše'ne'.

Jesúsen' bguagüe' gayo' mil bene'

(Mt. 14:13-21; Lc. 9:10-17; Jn. 6:1-14)

³⁰ Beyoža' postlw ca' besyežague' len Jesúsen' na' gose'ene' bica' da' ba gosone' na' da' ba bosolo'ede'.

³¹ Na' Jesúsen' gože'ne':

—Le da, le šo'o ga nac lchojiže' yezi'laže'cho late'.

Gwne' ca' le chep chetj chac bene', neca chac latje yesagüe'.

³² Nach Jesúsen' len postlw che' ca' gosa'aque' ja'aque' legacze' to lo' barcw, ja'aque' ga nac lchojiže'.

³³ Perw zan bene' besele'ede' gosa'aque' na' besyeyombi'e Jesúsen', na' zan yež bene' ca' bosoxonjsese' na' byobch besežine' ca' Jesúsen'.

³⁴ Na' cate' Jesúsen' bchoje' lo' barcon' ble'ede' ba besežag bene' zan na' beyaše' beži'ilaže'de' legaque', le nite' ca' nita' no xila' be nono de gwyoeba'. Nach gwezolaogüe' bsed blo'ede' legaque'.

³⁵ Cate' ba zoa xin, bene' ca' zjanaque' le' txen gose'ene':

—Ba zoa xin, na' latj gan' zoacho nga naquen latj daš.

³⁶ Na' besela' bene' quinga cont šja'aque' ga že' bene' do ranšw na' do yež dao' ca' dan' nyechj mbi'i šjasexi'e da' yesagüe', le bibi de yesagüe'.

³⁷ Na' Jesúsen' gože'ne':

—Le'e le güe'e da' yesagüe'.

Na' legaque' gose'ene':

—Bi de laxjwto' che chop gayoa ža žin cont šjaxi'to' da' güe'to' legaque' yesagüe'.

³⁸ Jesúsen' gože'ne':

—¿Gaca' yetextilen' de chele? Le šja'ac le šjana'.

Cate' gosenezde' na' gose'ene':

—De gayo' yetextil na' yečhop bel ya'a.

³⁹ Nach gože' bene' ca' yesebi'e to xonj güje' lo yixyen'.

⁴⁰ Na' gosebe' to gayoa güje' na' yebale' šiyon güje'.

⁴¹ Nach Jesúsen' gwxi'e yetextil ca' gayo' na' bel ya'an chope, na' gwne'e le'e yaba bi'e yela' choxclen che Dios na' bzoxje' yetextilen' bi'en bene' ca' zjanaque' le' txen cont goseyisen' len bene' ca'. Leze gwdise' bel ya'a ca' čhop lao yogo'lol bene' ca'.

⁴² Na' yogüe' gosagüen' na' goseljde'.

⁴³ Beyoža' bososše'e yešizñw žome yetextil bixjw na' len late' güje' bel da' bega'an.

⁴⁴ Na' bene' ca' gosagw yetextilen' gosaque' gayo' mil bene' byo, bi cuent no'ol ca' len bidao'.

Jesúsen' gwze'e lo nis

(Mt. 14:22-27; Jn. 6:16-21)

⁴⁵ Gwdena' Jesúsen' bene' byen besyeyo'o bene' ca' zjanaque' le' txen lo' barcon' cont yesyelaga'zegue' nisdan' na' yesežine' Betsaida, šlac le' za chesele' bene' ca' žena' ližgaque'.

⁴⁶ Na' cate' beyož bzede' bene' ca' diža', gwyeje' lo ya'an bol güiže' Dios.

⁴⁷ Na' ca' nac barcon', cate' goc čhol ba zejen gachol nisdan', na' toze Jesúsen' ne' zie' ga' nac yo biž.

⁴⁸ Na' ble'ede' bi' chac yosyose'en binlo, le' ben' chečjen clele na' bi choen' latje sa' barcon'. Na' šbal' beyetj Jesúsen' ya'ana' na' gwze'e lo nisen' ba' zej gale' gan' zja'aquen', na' ba' zoa teze' gan' zjaya'aquen'

⁴⁹ cate' besele'ede' le' chze'e lo nisen'. Na' gosacde' še da' chda' chelen'. Na' bososye'e.

⁵⁰ Le' yogüe' besele'ede'ne' na' besežebe'. Perw le' la' bol güižte' legaque', gože'ne':

—Le' gončhač laže'le; nedan', bitw žeble.

⁵¹ Nach gwyo'e lo' barcw gan' zjaya'ac bene' ca', nach gwche'ži ben'. Na' legaque' leca' besyebande' na' besyežejde',

⁵² le' bi gosejni'ide' dan' bene' yela' guac len yetextil ca', na' bina' yesejnilaže' le'.

Jesúsen' beyone' bene' güe' ca' že' Genesaret

(Mt. 14:34-36)

⁵³ Na' goselague' nisdan' na' besežine' yežlio gan' nzi' Genesaret, na' bosočjeje' barcon' cho'a nisdan'.

⁵⁴ Na' cate' beyož besyechoje' lo' barcon' bene' ca' la' besyeyombia'te' Jesúsen'.

⁵⁵ Na' ja'acese' doxen gan' mbane Genesaret, na' do lo cam dao' zjanxoe' bene' güe' ca' jasesane'ne' gan' zjanezde' zoa Jesúsen'.

⁵⁶ Na' gate'teze gwyej Jesúsen', do yixe', do yež, con goseyixje' bene' güe' ca' do chanez na' goseneyoede' Jesúsen' gwnežje' latje yesoxe' la' ch late'ze xni'a xen', na' yogo' bene' gosoxen' besyeyacde'.

7

Dan' chchoj lo' laždao' beṇaḇhen' chonen cont laždaḡüen' bi naquen xilaže' len Diosen'

(Mt. 15:1-20)

¹ Nach beṇe' fariseo ca' na' len beṇe' ca' bososed bosolo'e dan' bzoj da' Moisés gosa'aque' Jerusalénna' na' ja'aque' gan' zoa Jesúsen'.

² Na' besele'ede' baḷ beṇe' ca' zjanaque' Jesúsen' txen con gosagüe' neca bosityone'e zan ṇi'a can' chesacde' cheyaḷa' yesone', na' da'nan' gosezi'diže' legaque'.

³ (Le beṇe' fariseo ca' na' yogo' beṇe' Israel gualaž cheto' ca' chesonxene' costumbr ca' da' bosyocua'anḷen da' xoxxta'oto' ca' neto' bi yesagüe' še biṇa' yosityone'e zan ṇi'a.

⁴ Na' cate' yesyežine' laḡüe ya'a, bi yesagüe' še biṇa' yosityone'e, na' da' zanch costumbr da' zjana'ogüe', ca' no yeseyibe' xiga' ga chese'eje' nis, no yeso' xguague, no yeso' ya na' no xcame'.)

⁵ Nach beṇe' fariseo ca' na' beṇe' ca' bososed bosolo'ede' dan' bzoj da' Moisésen' gosenabde' le'.

—¿Bixḇhen' bi cheson beṇe' ca' zjanaque' le' txen can' goson beṇe' gol ca'? san con chesagüe' sin cbi chosityone'e zan ṇi'a.

⁶ Jesúsen' gože' legaque':

—Chonle cayaṇen' bzoj da' Isaíasen' che le'e nacle beṇe' gwxiye' gan' bzoje', žan':

Beṇe' qui chesonxene' neda' len diža' cho'a, perw bi chesonxene' neda' len lažda'ogaque'.

⁷ Bibi zejen dan' chesonxene' neda',

le dan' chososed chosolo'eden' naquen da' chnalaže' beṇaḇche.

⁸ Bi chonle ca' chnalaže' Dios, san na'ole can' ža beṇaḇhen' cheyaḷa' gonle, chyible no yeso' xguague, no xiga' ga che'eje' nis, na' da' zanch da' chonle.

⁹ Qui gožch Jesúsen' legaque':

—Chbejyichjle da' non Diosen' mandadw gonle cont na'ole costumbr che beṇaḇch.

¹⁰ Da' Moisésen' gwne': "Le gap bala'an xaxṇa'le", na' "Note'teze' še chžia chnite' xaxṇe'e, cheyaḷa' gate'."

¹¹ Perw le'e žale to beṇe' guac ye'e xaxṇe'e: "Bibi de goṇa' gaclena' le'e, le yogo' da' de chia' naquen Corbán" (zeje diža', ba bnežjuen' lo na' Dios).

¹² Na' žale cate' to beṇe' že' ba naquen lo na' Diosen' nach bich cheyaḷa' gaclen xaxṇe'e.

¹³ Dan' žale ca' chzoale ca'ale dan' ža Diosen' na' con chonxenle costumbr gole che da' xoxxta'ole ca'. Na' da' zanch dan' nac ca' chonle.

¹⁴ Da' yoble gox Jesúsen' beṇe' ca', na' gože' legaque':

—Yogo'le le gwzenag chia', na' le šejni'i.

¹⁵ Bite'teze' da' ye'ej gagw beṇaḇhen', bi nacho len chonen cont lažda'ogüe' bi naquen xilaže' len Diosen'. Dan' chchoj lo' lažda'ogüen', lenna' chonen cont lažda'ogüe' bi naquen xilaže' len Diosen'.

¹⁶ Le'e žia nagle da' chene, le gwzenag xtiža'na'.

¹⁷ Cate' bsan Jesúsen' bich bšajlene' beṇe' ca' na' beyo'e lo' yo'o, nach beṇe' ca' zjanaque' le' txen gosenabde' le' bi zejen dan' gože' legaque'.

¹⁸ Na' Jesúsen' gože' legaque':

—¿Lecze len le'e bi chejni'ile? ¿Bi chejni'ile gague da' ye'ej gagw beṇaḇhen' chonen cont lažda'ogüe' bi naquen xilaže' len Diosen'?

19 Le da' che'ej chagw benachen' gague cho'on lo' lažda'ogüen', san lo' li'en cho'on, na' chžin hor cheden.

Na' da' gwne' ca' zeje diža' bite'teze yela' guagw nacczen xilaže'.

20 Na' lecze gwne':

—Xbab da' yo'o lo' yichjlaždao' benachen', lenna' chonen cont lažda'ogaque' bi zjanaquen xilaže' len Diosen'.

21 Le lo' yichjlaždao' benachen' chchoj xbab mal ca da' žan yesone' da' quinga: yesata'lene' no'ole bi nac xo'olgaque' o bene' byo bi nac bene' čhegaque', gwzoa xtogaque', yesote' bene',

22 yesone' gwban, yesezelaže' gata' čhegaque' da' de čhe bene' yoble, yesone' da' mal, yeseziye'e bene', yesone' bichle da' nac da' yela' zto', yesacxi'ede' bene', yeseneye'e čhe bene', yesaque' bene' ya'laže', yesone' xbab da' bi zaca'.

23 Yogo' da' mal qui chesechojen lo' laždao' benach na' chonen cont bi nac lažda'ogaque' xilaže' len Diosen'.

To no'ol zito' gweyjnilaže' Jesúsen'

(Mt. 15:21-28)

24 Na' beza' Jesúsen' na' gweyje' distritw gan' mbane ciuda Tiro na' ciuda Sidón. Na' gwyo'e to lo' yo'o na' goclaže' nono ņeze, perw bi goc gone' cont bi gosenezde'.

25 Cate la' gwñezete xna' to bi' no'ole bi' yo'o nyazbe' da' xigüen', na' gweyje' na' bzoa xibe' xni'a Jesúsen'.

26 No'olen' goque' bene' zito', no'ole Sirofenicia. Gweyje' gwñabde' Jesúsen' yebeje' da' xigüe' yo'o nyaz bi' no'ol čhen'.

27 Na' Jesúsen' gože'ne':

—Yogo'ze bene' zgua'tec chnežjue' da' chagw xi'ine'. Bi naquen güen yequ'e yela' guagw čhe xi'ine' na' gwnežjuen' yesagw beco' ca'.

28 Na' no'olen' gože'ne':

—Leczedo' can' gwnaon' Xana', perw lecze guaque gagw beco' be chi' xan mes bla'a da' chlažo' lo' yo'.

29 Nach Jesúsen' gože'ne':

—Nacczen can' gwnaon', guac yeyejo', ba bechoj da' xigüen' yo'o nyaz bi' no'ol čhion'.

30 Cate' bežin ližen' ble'ede' de bi' no'ol daon' to lo' cam, na' ba bechoj da' xigüen' yo'o nyazbe'.

Jesúsen' beyone' to bene' cuež, bene' lecze bi goc nie'

31 Jesúsen' bezse'e gan' mbane Tiro na' gwdie' gan' nzi' Sidón na' yež ca' gan' mbane Decápolis, na' bežine' cho'a nisdao' čhe Galilea.

32 Na' jasesane' to bene' byo bene' cuež na' bi goc nie', na' gosenabe' xoa na' Jesúsen' yichje'.

33 Nach Jesúsen' gwče'ene' late' lchojiže' ga nono bene' nita', na' bde xbene' lo' nague' na' bži'en xene' na' gwdane' ložen'.

34 Nach gwne'e le'e yaba, bebande', na' gwne':

—¡Efata! —zeje diža': ¡Byaljo!

35 Nach nag bena' besyeyaljon na' goc bende', na' lecze beyac ložen' na' goc gwnie' binlo'.

36 Na' Jesúsen' gože' bene' ca' nono yese'e ca', perw la'czla' gože' legaque' ca', nachle gos'e diža' can' goca'.

37 Na' leca besyebande', na' gosene':

—Yogon' chone' binlo; chacte chone' cont chesyeyene bene' cuež ca' na' bene' ca' bi chac yesene' chesyenie'.

8

Jesúsen' cho'e da' chagw tap mil bene'

(Mt. 15:32-39)

¹ Ca tiempa' besežagchgua bene' zan na' bibi de yesagüe'. Nach Jesúsen' goxe' bene' ca' gwleje' cont zjanaque' txen len le' na' gože' legaque':

² —Cheyaše'da' bene' qui, le ba goc šone ža zjanite' nga len neda' na' bibi de yesagüe'.

³ Še yesela'ne' ližgaque' na' bina' yesagüe', chanez yesego'onē' yesečholde', le bale' za'aque' zito'.

⁴ Nach bene' ca' zjanaque' le' txen gose'ene':

—¿Nacxe goncho güe'chone' da' yesagüe' latje nga ga nono bene' nita'?

⁵ Na' Jesúsen' gwñabde' legaque':

—¿Gaca' yetextilen' de chele?

Na' legaque' gose'ene':

—Gažen.

⁶ Nach bene' mandadw yesebe' yogo'lol ben' nitan' lo yo, na' gwxi'e da' gaž yetextil ca' na' be'e yela' chočlen che Dios, nach bzojxen' bnežjuen' bene' ca' zjanaque' le' txen na' legaque' goseyisen' che yogo'lol bene' nita' na'.

⁷ Leze zjano'e to chop bel ya'a, na' Jesúsen' be'e yela' chočlen che Diosen' che bel ya'a ca' na' leze goseyisen' che yogo'lol bene'.

⁸ Na' yogüe' gosagüe' na' goseljde'. Gwdena' bososse'e yegaže žome len late' güeje yela' guagw da' bega'an.

⁹ Bene' ca' gosagon' zjanaque' ca do tap mil bene'. Cate' ba besyedagüe', Jesúsen' gože' legaque': —“Nayežagcho”,

¹⁰ na' gwyo'e lo' barcon' len bene' ca' zjanaque' le' txen na' gwyeje' do gan' mbane yež da' nzi' Dalmanuta.

Bene' fariseo ca' gosaclaže' gon Jesúsen' to yela' guac da' yesele'ede' le'e yaba

(Mt. 16:1-4; Lc. 12:54-56)

¹¹ Na' bene' fariseo ca' gosezolagüe' chesediłdiže' len Jesúsen'. Na' da' gosaclaže' yesagüe' xya che' nach gosenabde'ne' gone' to yela' guac da' yesele'ede' le'e yaba cont yesenezde' še da' licze Diosa' gwsele' le'.

¹² Jesúsen' bebanchgüede' na' gwne':

—Ba ble'ele chona' yela' guac. ¿Bixchen' chñable to yela' guac da' le'ele cont nezele še Diosen' gwsele' neda'? Da' li žia' le'e, bitwbi gona' da' le'ele.

¹³ Nach bcua'ane' legaque' na' beyo'e lo' barcon' beze'e beyeje' yešla' nisaon'.

Levadura che bene' fariseo ca'

(Mt. 16:5-12)

¹⁴ Bene' ca' zjanaque' Jesúsen' txen gosanjaže' yeso'e da' yesagüe', na' totec yetextil zjano'e lo' barcon'.

¹⁵ Na' Jesúsen' gože' legaque':

—Le gon xbab, le gwsaca' len levadura che bene' fariseo ca' na' len levadura che Herodes.

¹⁶ Nach gosenabe lježe' bixchen' gwne' ca', na' gose' lježe':

—Gwne' ca' le gague bi yetextil checho den'.

¹⁷ Jesúsen' gocbe'ede' xbab dan' chesone' na' gože'ne':

—¿Bixçhen' chacçejaže'le da' bibi yetextil de? ¿Biṇa' šejni'ile, ṇeca chache'ele? ¿Nac çhach lažda'olen' bi chejle'le?

18 ¿Bi chle'ele len yejlaole, ṇeca chenele len nagle? ¿Bi chjayze'ele?

19 Gwdisa' gayo' yetextil na' goquen che gayo' mil beṇe', na' ¿bi chjayze'ele yebaḷe žome goc da' becho'onen da' botoble?

Na' legaque' gosene':

—Šižinw žome becho'onen da' botobto'.

20 —¿Chixe caten' gwdisa' gaže yetextilen' lao tap mil beṇe'? ¿Yebaḷe žome gwža'te dan' botoblen'?

Na' gosene':

—Gaže žomen'.

21 Nach gože' legaque':

—¿Biṇa' šejni'iczele ṇa'a cho'a diža' che dan' chosed chosolo'e beṇe' fariseo ca'?

Jesúsen' beyone' to bene' lçhol beṇe' Betsaida

22 Gwdechle besežine' Betsaida na' jasesane' to beṇe' lçhol lao Jesúsen', na' gosata'yoede' le' yeyone' le'.

23 Na' beḡue' taca' beṇe' lçhola' na' gwleje'ne' yež. Nach gwdebe' xene' yejlagüen' na' gwḡoa taquen' yichje' na' gwṇabde'ne' še chle'ede' late'.

24 Bene' lçhola' gwne' e na' gwne':

—Chle'eda' beṇe', na' chle'eda'ne' ca yag, perw chesa'aque'.

25 Nach Jesúsen' beḡoa taque' yejlagüen' da' yoble, na' gwṇa'yane' ben' na' beyaque', bele'etede' yogo' binlo.

26 Nach Jesúsen' besele' le' liže', gože'ne':

—Bi yeyo'o lagüe yežen', ṇeca no yo'o da' nga.

Pedron' gwne' Jesúsen' naque' Cristo ben' gwlej Diosen' cont nabi'e

(Mt. 16:13-20; Lc. 9:18-21)

27 Gwdena' gwyej Jesúsen' len beṇe' ca' zjanaque' le' txen yež dao' ca' zjachi' do ga mbane ciuda da' nzi' Cesarea de Filipo. Na' chanez gwṇabde' beṇe' ca' zja'aclen le':

—¿Bi chesena beṇe'? ¿Non' naca' neda'?

28 Legaque' gose'ene':

—Baḷe' chesene' naco' Juan ben' bzoa beṇe' nis, yebaḷe' chesene' naco' Elías, na' yebaḷe' chesene' naco' yeto beṇe' be' xtiža' Dios cani'.

29 Na' gwṇabde' legaque':

—¿Chixe le'e? ¿no žale naca'?

Pedron' gože' le':

—Len' naco' Cristo ben' gwlej Diosen' cont nabi'o.

30 Nach Jesúsen' gože' legaque' nono yese'e ca'.

Jesúsen' gwduxje'ede' gate'

(Mt. 16:21-28; Lc. 9:22-27)

31 Na' gwzolao Jesúsen' bzejni'ide' legaque' can' gac chen', gože'ne':

—Da' zan da' saca'zi'a neda' naca' ben' gwseḷa' Diosen' golja' beṇač. Na' beṇe' blaō ca' chesenabia' nación chechon' na' bḡoz gwṇabia' ca' na' beṇe' ca' chosed chosolo'e dan' bzoj da' Moisés bi yesele'ede' neda' güen da' bi chesejle'e chia', na' yesote' neda', perw gacch šone ža yebana' ladjo beṇe' guat ca'.

32 Da' nga gwnen' zaca'laon. Na' Pedron' gwche'e Jesúsen' ga nac lchojiže' na' gwzolažüe' chdiḷe' le' dan' gwne' ca'.

³³ Perw Jesúsen' gwyechje' na' gwne'e bene' ca' zjanaque' le' txen, na' gwdile' Pedron', gože'ne':

—iGwcuase ca'ale Satanás! Bi nsa'o xbab che Diosen' san nsa'o xbab che benach.

³⁴ Nach Jesúsen' goxe' bene' ca' zjanaque' le' txen na' yezica'chle bene' na' gože'ne':

—Note'teze bene' še chaclaže' gaque' neda' txen, cheyalá' chojyichj cuine', la'czlá' saca'zi'e, na' gone' can' nia' neda'.

³⁵ Note'teze bene' chacde' gone' cont bi saca'zi'e o cont nono yesot le', benan' cuiayi', na' note'teze bene' chzanlaže' cuine' saca'zi'e o gate' ne chia' neda' o neche xtiža' Diosen', ba de yela' mban che' toli tocane.

³⁶ ¿Bixe zejenna' to bene' nabi'e doxen yežlion' na' cuiaye'e bi gata' yela' mban che' toli tocane?

³⁷ Le bi zoa nacle gon benachen' chixjue' cont gata' yela' mban che' toli tocane.

³⁸ Bene' ca' že' na'a bi chesejnilaže' Diosen' na' chesonchgüe' da' xinj. Na' note'teze bene' še cheto'ede' par ye'e lježe' chejnilaže' neda', na' še cheto'ede' par gwzenague' xtižan', lecze ca' neda' yeto'eda' che' par nia' naque' neda' txen, neda' naca' ben' gwsela' Dios golja' benach. Yeto'eda' che' cate' yida' da' yoble nsa'a yela' zaca' juisyw che Xa' Diosen' na' nchia' bene' ca' zjanac angl che'.

9

¹ Lecze gož Jesúsen' legaque':

—Da' li žia' le'e, balle nita'le nga na'a bina' gatle cate' žin ža le'ele Diosen' gwlo'e yela' guac xen chen' can' chnabi'en'.

Bša' Jesúsen' ca goque'

(Mt. 17:1-13; Lc. 9:28-36)

² Gwde xop ža, Jesúsen' gwche'e Pedro, Jacobo na' Juan na' ja'aque' to lo ya'a sibe, na' nono nochle ja'ac len legaque'. Na' nite' besele'ede' bža' ca goc Jesúsen'.

³ Xalane' goquen da' šiš xila', gocten ca da' chactite; la' chibcho lache' yežlio nga bi yechojen gaquen šiš xila' catequen' goc xalanan'.

⁴ Na' concze besele'ede' da' Elías na' da' Moisés chosošalje' len Jesúsen'.

⁵ Nach Pedron' gože' Jesúsen':

—Maestro, jleca güenna' zoacho nga! Gonto' šone ranšw, to chio', to che Moisés, na' yeto che Elías.

⁶ Le bene' ca' zja'aclen Jesúsen' besežebchgüe', na' Pedroa' bi chacbe'ede' bin' že'.

⁷ Nach gwche' to bejw gan' niten' gwyechjen legaque', na' lo' bejon' gosende' gwna Diosen':

—Bengan' Xi'ina' bene' chacda'; le gwzenag che'.

⁸ Na' cate' gosene'e cue'ej cuiten' notno besele'ede', san toze Jesúsen' zie'.

⁹ Na' šlac chesyeyetje' lo ya'an, Jesúsen' gože' legaque' notno yesi'e ca nac dan' besele'eden'. Gože'ne':

—Cate'ch ba bebana' ladjo bene' guat ca', nedan' naca' ben' gwsela' Dios golja' benach, cana' güe'le diža' chen.

¹⁰ Da'nan' gosezoe' šize, nono gose'e ca', perw na' gosenabe lježe' bi zejen dan' gwne' yebane' ladjo bene' guat ca'.

¹¹ Nach gose'e Jesúsen':

—Bene' ca' chososed chosolo'e dan' bzoj da' Moisés chososedde' neto' chesene' zgua'tec da' Elías ben' gwzoa cani' cheyala' yide' da' yoble cate' za' yedenabia' ben' sela' Diosen'. ¿Bixchen' chesene' ca'?

12 Na' boži'e xtižen':

—Da' liczen' zgua'tec Elíasna' yide' na' yeyo'e xneze yogo' loł da' de yežlio nga. ¿Nezele bin' ža gan' nyoj Xtiža' Diosen' chia' neda' naca' ben' gwsela' Dios golja' benach? Žan saca'zi'a na' bene' zan bi yesejnilaže' neda'.

13 Na' žia' le'e, Elías ba bide' na' gosonde' le' con ca gosaclaže', can' nyoj le'e Xtiža' Diosen' žan can' cheyala' gac che'.

Jesúsen' beyone' to bi' yo'o nyazbe' da' xigüe'

(Mt. 17:14-21; Lc. 9:37-43)

14 Gwdena' besyežine' gan' nita' yezica'chle bene' ca' zjanaque' Jesúsen' txen, na' besele'ede' bene' zan zjanita' zjanyechjde' legaque', na' len bene' ca' chososed chosolo'ede' dan' bzoj da' Moisés chesediđiže' len legaque'.

15 Na' cate' bene' ca' besele'ede' Jesúsen', yogüe' besyežejde' na' ja'acese' bosoguape' le' tiox.

16 Nach gwnabde' legaque':

—¿Bin' chdiđiža' le' len bene' ca'?

17 Na' to bene' nchixe bene' ca' boži'e xtižen', gwne':

—Maestro, zedesana' bi' chia' nga, yo'o nyazbe' da' xigüe' na' benen cont bi chac nebe'.

18 Gate'teze chdabe' chzenen lebe' na' chcho'onen lebe' lo yo, na' chbia bžina' cho'abe' na' chagwxej laybe'. Na' ca' zej chedo fuerz chebe'. Na' ba gwnaba' lao bene' qui zjanaque' le' txen yesybeje' da' xigüe' yo'o nyazbe', perw bitw gosaque'.

19 Na' Jesúsen' gože' bene' ca' že'na':

—¿le'e bene' bi chejnilaže'! ¿šna chyažjen soalena' le'e cont šejnilaže'le? ¿Batca' zelao na'lagua' le'e? Le yedesambe' nga.

20 Na' jasesane'be', na' cate' da' xigüen' ble'en Jesúsen', benen gwyazbe' šon, na' gwbižbe' lo yo, chbiž chtolbe' na' chbia bžina' cho'abe'.

21 Nach Jesúsen' gwnabde' xaben':

—¿Bał iz ba goc chacbe' ca'?

Na' xaben' gwne':

—Cate' nache' bida'ote gwzolao chacbe' ca'.

22 Na' zan ni'a da' xigüen' chžalan' lebe' lo yi' na' lo nis cont goten lebe'. Da'nan' še guac yeyono'be', beyaše'šque neto' na' beyombe'.

23 Jesúsen' gože'ne':

—Cheyala' šejnilažo' neda', le yogo' da' chzelaže' bene' chesejnilaže' neda' chaquen.

24 Nach xaben' gwne' zižje:

—¿Chejnilaža' le', goclen neda' šejnilaže'cha'!

25 Na' cate' Jesúsen' ble'ede' chesežagchgua bene', gwdile' da' xigüen' gožen':

—Da' xigüe', le' chono' cont bi' nga bi chenebe' na' bi chac nebe', neda' žia' yechojo'. Bsan bi' nga, na' bich yeyo'o yichjlažda'oben'.

26 Na' da' xigüen' benen ga bosya'abe' na' benen ga gwyazbe' ca yeto šon, nach bechojen. Na' bin' bega'añbe' ca bi' guat, na' zan bene' gosene' gothen'.

27 Perw Jesúsen' bežue' taca'ben' cont beyasbe', nach gwzechabe'.

28 Nach cate' Jesúsen' gwyo'e to lo' yo'o, bene' ca' zjanaque' le' txen gosebeje' le' ca to lchojiže' na' gosenabde' le':

—¿Bixchen' bi goc neto' yebejto' da' xigüen'?

29 Na' gože'ne':

—Cont yechoj da' xigüen' nac ca' cheyała' gonle gwbas na' soatezle yoļ güižle Dios.

Da' yoble Jesúsen' gwne' gate'

(Mt. 17:22-23; Lc. 9:43-45)

30 Cate' besyeya'aque' na', besyedie' distritw Galilea. Na' Jesúsen' goclaže' nono yeseneze,

31 le chzejni'ide' bene' ca' zjanaque' le' txen, che'e legaque':

—Nedan' naca' ben' gwseła' Dios golja' benačh, yosodie' neda' lo na' bene' yesote'nda', perw yeyon' ža yebana' ladjo bene' guat ca'.

32 Perw bi gosejni'ide' bin' gože' legaque', na' besežebe' yesenabde'ne'.

Gosedildiže' gosene' noen' nac bene' blaoch

(Mt. 18:1-5; Lc. 9:46-48)

33 Na' besežine' ciuda da' nzi' Capernaum, na' cate' besežine' yo'o gan' zoa Jesúsen' gwñabde' legaque':

—¿Bixchen' chdildiža'le chanez?

34 Perw con gosenite' šižize, le chanezan' gosedildiže' gosene' noen' nac bene' blaoch.

35 Nach Jesúsen' gwchi'e na' goxe' bene' šižinw ca' zjanaque' le' txen, na' gože' legaque':

—Še no le'e chaclaže'le gacle bene' žialao, cheyała' gonle xbab bibi zaca'tecle, na' cheyała' gon cunle ca xmos yogo' bene' lježle.

36 Nach beḡue' to bidao' na' bzeche'be' gachol' legaque', na' gwlene'be' na' gože' legaque':

37 —Note'teze bene' chone' güen len to bidao' ca bi' nga neche da' chejnilaže' neda', choncze' güen len neda'; na' noteze' chon güen len neda', choncze' güen len Dios ben' gwseła' neda'.

Bene' bi chon chio' contr; txencza' chone' chio'

(Mt. 10:42; Lc. 9:49-50)

38 Nach Juanna' gože'ne':

—Maestro, bežagto' to bene' cho'e lao' na' chebeje' da' xigüe' da' yo'o nyaz bene', na' bžonto' gone' ca', le bi chone' chio' txen.

39 Na' Jesúsen' gwne':

—Bi gwžonle gone' ca', le gague zoa to bene' gone' yeła' guac cho'e lan', yeyoža' ne' yeła' ya' chia'.

40 Le bene' bi chone' chio' contr; txencza' chone' chio'.

41 Čhnia' le'e to da' zejen, note'teze bene' gone' le'e la' to xiga'ze nis da' ye'ejle neche chejnilaže' neda' na' neche nezde' le'e nacle txen len neda', Diosen' gone' cont soacze' mbalaz da' ba goclene' le'e.

Bitw co'yela'cho bene' gone' da' xinj

(Mt. 18:6-9; Lc. 17:1-2)

42 'Note'teze bene' chon cont lažo' to bene' za' gwzologüe' chejnilaže' neda' gone' da' xinj, yejni'acle yosočeje' yene' to yiše xen na' yosozale'ne' lo' nisdaon' clcl ca da' gone' cont lažo' bene' yoble gone' da' xinjen'.

43 Na' še yeña'len' chonen cont gonle da' xinj, cheyała' cuejyichjle da' malen' chonle. Yejni'a bibi na'le zoa clcl ca gonle da' xinjen' len len. Na' yejni'a šjayzoale len Diosen' toli' tocaḡe bi zoa šla'a taca'le clcl ca yeyejle lo' yi' gabil dan' bi cheyol chenit nya' cuerp chelen'.

44 Na' gabilen' neca chesat bzogan', neca cheyol yin'.

45 Na' še ni'alen' chonen ga gonle da' xinj, lecze cheyała' cuejyichle da' malen' chonle. Yejni'a bibi ni'alen' zoa clcl ca gonle da' xinjen' len len. Na' yejni'a šjayzoale len Diosen' toli tocane bi zoa šla'a ni'alen', clcl ca yeyejle lo' yi' gabıl dan' bi' cheyol chenit nya' cuerp chelen'.

46 Na' gabilen' bzoga' ca' bi chesatba', neca cheyol yin'.

47 Na' še yejlaolen' chonen cont gonle da' xinj, cheyała' cuejyichle da' malen' chonlen'. Yejni'a bibi yejlaolen' žia clcl ca gonle da' xinjen' len len. Na' yejni'a šjayzoale len Diosen' toli tocane zoa šla'aze yejlaole clcl ca yežinle lo' yi' gabilen' žia chop la'a yejlaolen'.

48 Ca nac gabilen', bi chesat bzogan', neca cheyol yin'.

49 Le dan' chyi chzaca'le yežlio nga chzejni'in le'e cont bi yeyejle lo' yi' gabıl. Na' da' chyi chzaca'le zaca'leben ca zede' da' cheyała' chixe' yezj yogo' ni'a cate' chjasesane' yezj lao Diosen'.

50 Na' zeden' naquen güen, perw še bich bi zxi' naquen, žnacxe goncho cont yeyaquen zxi' da' yoble? Na' le'e cheyała' gwyo gwchejlaže'le dan' chyi chzaca'le na' cheyała' soale binlo tole yetole, na' še soale ca', zaca'leble ca to yela' guagw da' yo'o zede'.

10

Jesúsen' bzejni'ide' bi cheyała' yela'acho len no'ol checho

(Mt. 19:1-12; Lc. 16:18)

1 Jesúsen' beze'e Capernaum na' gwejche' gan' mbane distritw Judean' na' yešla'a yegw Jordánna'. Na' da' yoble besežag bene' zan gan' zoen' na' lecze da' yoble bsd blo'ede' legaque' con can' choncze'.

2 Nach bal bene' fariseo ca' ja'aque' gan' zoa Jesúsen' gosaclaže' yesebeje'ne' diža' da' yosočhine' cont yosožie'ne' xya chol, na' gosenabde'ne' še guac to bene' yele'e len no'ol che'.

3 Na' Jesúsen' boži'e xtižen', gwne':

—Ca nac dan' bzoj da' Moisésen', žnac bene' mandadw gonle?

4 Legaque' gosene':

—Moisésen' gwne' cate' to bene' yele'e len no'ol chen' cheyała' chas to yiš da' gwnežjue' no'ol che' ga güe'en diža' besyele'ena'.

5 Nach Jesúsen' gože' legaque':

—Moisésen' gwne' gac gonle ca' lagüe dan' nacle bene' güedenag len Diosen'.

6 Perw cate' gwxe yežlion', cate' bxe Diosen' yogo' da' de, bi goquen ca'. Le nyojen žan: "Bene' legaque', to bene' byo na' to no'ole."

7 "Da'nan' bene' byon' gwsane' xaxne'e cont soalene' no'ol chen',

8 na' chope' yesaque' ca' toz bene'." Na' ca' bich yesac chope' san toze'.

9 Da'nan' bi cheyała' yesyele'e, le Diosen' ba bcode' legaque'.

10 Cate' besyežine' yo'o, bene' ca' zjanaque' le' txen da' yoble gosenabde'ne' bi zejen dan' ba gwne'.

11 Na' Jesúsen' gože' legaque':

—Note'teze bene' chele'e len no'ol che' na' cheque'e no'ol yoble, chone' da' xinj, le toz ca' naquen šaca' gata'lene' no'ol che' bene' yoble.

12 Na' še no'olen' chsane' bene' chen' na' cheque'e bene' yoble, lecze toz can' nac da' xinj da' chonen'.

Jesúsen' gwnabde' Diosen' gac güen che bidao' ca' besežag

(Mt. 19:13-15; Lc. 18:15-17)

13 Nach jasesane' bi' bixjw lao Jesúsen' cont xoa ne'e yichjgacbe', perw bene' ca' zjanaque' le' txen gosedi'e' bene' ca' zjanche'ebe'.

14 Na' cate' ble'e Jesúsen' can' gosonen' na' bže'e' legaque' na' gože'ne':

—Le güe' latje yesid bidao' ca' lagua' nga na' bi gwžonle, le bene' ca' zjanac ca bidao' quinga, legaque' chosozenague' che Diosen' cont chnabi'e yichjlažda'ogaque'.

15 Da' li žia' le'e, note'teze bene' cheyała' yosozenague' che Diosen' ca cheson bidao' cate' chosozenagbe' che xaxna'be', le bene' bi yosozenague' ca', gwbat nabia' Diosen' yichjlažda'ogaque'.

16 Nach gwlene' to to bidao' ca' na' gwñabde' Diosen' gac güen chebe', gwxoaa taquen' yichjbe'.

To bene' güego' bšaljlene' Jesúsen'

(Mt. 19:16-30; Lc. 18:18-30)

17 Cate' Jesúsen' gwže'e ngü'e nez, chxonjses to bene' jazoa xibe' lagüen' na' gwñabde'ne':

—Maestro, le' naco' bene' güen. ¿Bi cheyała' gona' cont gata' yela' mban chia' toli tocañe'?

18 Jesúsen' gože'ne':

—¿Bixchen' žo' naca' bene' güen? Toze bene' güen zoa, na' len' Dios.

19 Le' nezdo' da' none' mandadw goncho: “Bi gata'lenle' no'ol bi nac no'ol chele o bene' byo bene' bi nac bene' chele; nono gotle; bi cuanle; bi güe'le diža' güenlaže' che bene' lježe; bi siye'le bene'; le gap bala'an xaxna'le.”

20 Na' boži'e xtižen':

—Maestro, yogo' da' quinga chzenaga', gwzolaagua' chonczan' cate' ne' nactia' bidao'.

21 Jesúsen' gwne'e bene' güegon' na' chacde' le', na' gože'ne':

—Zoa to da' ne' chyažjen gono': šjayeto' yogo' da' de chio' na' da' le'edo' chen bnežjon bene' yaše'. Nach še gono' ca', cate' yežino' yaba gan' zoa Diosen' da' zaca'ch gata' chio'. Na' še ba beyož beno' can' žia' le', nach yo'o gaco' neda' txen la' saca'zi'o.

22 Na' cate' bene ben' dan' gwna Jesúsen', godce' leca zdebe naquen gone' can' gože'ne', na' beza'yaše', le bene' gwñi'achgua goque'.

23 Nach Jesúsen' gwne'e do cue'ej cuite' na' gože' bene' ca' zjanaque' le' txen:

—Leca zdeb naquen to bene' gwñi'a gwzenague' che Diosen' cont Diosen' nabi'e yichjlažda'ogüe'.

24 Na' bene' ca' zjanaque' le' txen besyebande' can' gwnen', perw Jesúsen' gože'e' legaque':

—Xi'ina', bene' chesacde' zaca'chgua yela' gwñi'a chegaquen', leca zdebe naquen yosozenague' che Diosen' cont nabi'e yichjlažda'ogaquen'.

25 Bedao'ch te to be xen be nzi' camello to lo' nag yeše' clcl ca to bene' gwñi'a gwzenague' che Dios cont Diosen' nabi'e yichjlažda'ogüe'.

26 Cate' gosende' dan' gwne', leca besyebande' na' gose' lježe':

—¿Noxen' šjayzoa len Diosen' še ca'?

27 Jesúsen' gwne'e' legaque' na' gože'ne':

—Bibi de da' gac yeson benachen' cont šjasyenite' len Diosen', perw Diosen' guac gonen'; le bi zoa da' nacho da' bi gac gon Dios.

28 Nach Pedron' gože'ne':

—Neto' ba gwlejjichjto' yogo' da' de cheto' cont nacto' le' txen.

29 Jesúsen' boži'e xtižen':

—Da' li žia' le', note'teze bene' ba gwlejiyhje' liže', bene' biše', zane', xe', xne'e, no'ol che', xi'ine', o yežlio che' ne chia' neda' na' neche chzenague' xtižan',

³⁰ yežlio nga yonežjo Diosen' le' to gayoa cate'le, yo'o, biše', zane', xne'e, xi'ine' na' yežlio, la'czla' yesebe'na'ogüe' le'. Na' cate' yežine' yaban' gata' yela' mban' che' toli tocane.

³¹ Perw zan bene' zjanaque' bene' žialao na'a, gwžin ža cate' yesaque' bene' bzebe; na' bene' zjanaque' bene' bzebe na'a, gwžin ža cate' yesaque' bene' žialao.

Da' yoble Jesúsen' gwne' yesote'ne'
(Mt. 20:17-19; Lc. 18:31-34)

³² Zjangüe'e nez zja'aque' bso dan' zoa gala'ze Jerusalenna' na' Jesúsen' žialagüe' lao bene' ca' zjanaque' le' txen. Legaque' chesyebande' na' do chesežebze' zjana'ogüe' le'. Nach da' yoble Jesúsen' goxe' bene' šižinw ca' ca'ale ga nac lchojiže' na' gože' legaque' can' gac chen'.

³³ Gože'ne':

—Na'a ba zejcho Jerusalén gan' yesone' neda' lo na' bxož gwnabia' ca' na' lo na' bene' ca' chososed chosolo'ede' dan' bzož da' Moisés, na' yesechoglagüen' chia' yesote' neda' na' yesone'nda' lo na' bene' bi zjanaque' bene' Israel, nedan' naca' ben' gwseła' Dios golja' benach.

³⁴ Yesezi'diže' neda', yesot yeseyine' neda', gosoži'enda' xene', na' yesote' neda', perw yeyon ža yebana' ladjo bene' guat ca'.

Jacobo na' Juan gosenabe' to goclen lao Jesúsen'
(Mt. 20:20-28)

³⁵ Nach Jacobo len Juan, bene' ca' zjanac xi'in Zebedeo, gosebigue' cuit Jesúsen' na' gose'ene':

—Maestro, chaclaže'to' gono' to goclen da' nabo'to'.

³⁶ Na' gwñabe Jesúsen' legaque':

—¿Bi che'nele gona'?

³⁷ Na' gose'ene':

—Ben cont cue'to' šla'a güeje cuito'na' cate' solao nabi'o.

³⁸ Nach Jesúsen' gože'ne':

—Le'e cabi nezele bi dan' chñable. ¿Gwčhejlaže'le tele yela' zi' yela' ya' ca dan' tia' neda' na' gac chele can' gac chia'?

³⁹ Legaque' gose'ene':

—Gwčhejlaže'to'.

Na' Jesúsen' gože' legaque':

—Da' licze tele yela' zi' yela' ya' ca dan' tia' neda' na' gac chele can' gac chian'.

⁴⁰ Perw bi naquen lo na' nia' non' cue' cuitan' cate' žin ža nabi'a, san yesebe' bene' ba mbej Diosen' gaquen che'.

⁴¹ Cate' yeši bene' ca' zjanaque' le' txen gosende' xtiža'gaquen', beseloque' Jacobon' na' Juanna'.

⁴² Perw Jesúsen' goxe' yogüe' cont gosebigue' laogüen' na' gože' legaque':

—Nezeczele bene' zjambeje' cont chesenabi'e to to nación na' bene' blao ca' chesone' byen chosozenag bene' čhegaque'.

⁴³ Perw bi naquen ca' len le'e. San note'tezle chaclaže'le gacle bene' blao, cheyała' gwzexjwlaže'le gaclenje bene' lježle.

⁴⁴ Na' note'tezle chaclaže'le gacle bene' žialao, cheyała' gon cuinle ca xmos yogo' bene' lježle.

45 Le lencze neda', gwseła' Diosen' neda' golja' benach, gague za'a cont yesaclen bene' neda', san za'a cont gaclena' bene', na' gwnežjw cuina' yesote' neda' neche xtola' benachen'.

Jesúsen' beyone' to bene' lchoł ben' gože' Bartimeo

(Mt. 20:29-34; Lc. 18:35-43)

46 Nach besežine' Jericó. Na' cate' Jesúsen' ba beze'e ciudan' len bene' ca' zjanaque' le' txen na' len yezanch bene', do cho'a ciudan' chi' to bene' lchoł chanez chnabe' yosonežjo bene' le' con gaca' da' chesezande'. Bena' le' Bartimeo na' naque' xi'in to bene' le' Timeo.

47 Na' bene' lchoła' cate' goche'ede' gwde Jesús bene' Nazaret gan' chi'ena', gwzologüe' gwne' zižje gwne':

—Jesús, xi'in diaža che da' rey David, beyaše'laže'sca neda'!

48 Bene' zan gosediłe' le' cont bich yosye'e, perw bosya'adiache' gwne':

—Xi'in diaža che da' rey David, beyaše'laže'sca neda'!

49 Nach Jesúsen' gwleze' na' gwne':

—Le gaxe'.

Nach gosaxe' bene' lchoła' na' gose'ene':

—Benchachlažo', gwzoža', le chaxe' le'.

50 Nach gwcho'one' lache' da' nřoa cože' na' bxite' jabigue' lao Jesúsen'.

51 Nach Jesúsen' gwñabde' le':

—¿Bi chaclažo' gonda' le'?

Bene' lchoła' boži'e xtižen':

—Maestro, che'nda' yele'eda'.

52 Nach Jesúsen' gože'ne':

—Guac yeyejo'. Dan' chejnilažo' neda' ba beyac yejlaguon'.

Na' la' bele'ete bene' lchoła', na' gwda'ogüe' Jesúsen'.

11

Jesúsen' gwyo'e ciuda Jerusalén

(Mt. 21:1-11; Lc. 19:28-40; Jn. 12:12-19)

1 Cate' ba zoa yesežine' Jerusalén, besežine' gan' zjachi' yež dan' zjanzi' Betfagé na' Betania na' gan' zoa ya'a da' nzi' Ya'a Olivos. Na' Jesúsen' gwsele' chop bene' ca' zjanaque' le' txen mandadw,

2 gožgaque'ne':

—Le šja'ac yež dan' chi' gala'ze, na' cate' žinlen' na' yeže'ele to burr dao' da'ba' yag be nono na' cuia. Le sežba' na' le che'ba' nga.

3 Na' še no chñab bichen' chonle ca', le ye'e: "Xanto' chyažjde'ba'", na' la' gwzantecze'ba'.

4 Nach gosa'aque', na' besele'ede' burron' da'ba' yag to cho'a yo'o cuit ga xoa to nez, na' goseseže'ba'.

5 Na' bał bene' ca' nita' na' gose'ene':

—¿Bixen' chonle? ¿Bixchen' chsežle burron'?

6 Nach bosyoži'e xtižen' can' gož Jesúsen' legaque', na' goso'e latje goseže'ba' cont goseche'eba'.

7 Nach goseche' burron' lao Jesúsen' na' goseřoa xagaque' cože'ban' na' gwžia Jesúsen' leba'.

8 Na' bene' zan gosonxene' Jesúsen' goseyixjw no xagaque' lo nez cont blej burron' len na' yebale' gosechogue' xoze' yag na' goseyixjuen' lo neza'.

9 Bene' zjažialao na' lecze bene' za'ac cože' gosezologüe' bososye'e, gosene':

—jLeca zaca'chgua benga! jMbalaz ben' za' nga nse!a' Xancho Diosen' le' cont nabie'!

¹⁰ jMbalaz yela' gwnabia' che' da' nse'e, le' nabie' ca da' xozxta' ocho David! jLeca zaca'chgua Dios ben' zoa yaban'!

¹¹ Can' goc, Jesús'en' gwyo'e Jerusalén, na' lecze gwyo'e chyo'o che yodao' blaon'. Na' beyoż gwne'e yogo' lo! da' de na', beyeje' Betania len bene' šiżinw ca' ba gwleje' cont zjanaque' le' txen, le ba zoa ga!.

Jesús'en' gwne' gacxi'a yag yixgüigw da' bibi žia

(Mt. 21:18-19)

¹² Beyechj ža cate' besyeya'aque' Betania, Jesús'en' gwdone'.

¹³ Na' zito' ble'ede' to yag yixgüigw da' žia laga', na' jane'e še žia yaguen' yixgüigw, na' bibi bželde', san laga'ze ca' da' žian, le gague canan' chesebia yixgüigon'.

¹⁴ Nach Jesús'en' bo! güiže' yag yixgüigon', gožen':

—Noch no gagw da' chbio' le'.

Na' bene' ca' zjanaque' le' txen gosende' can' gwnen'.

Jesús'en' bešaše' bene' ca' cheson ya'a chyo'o yodaon'

(Mt. 21:12-17; Lc. 19:45-48; Jn. 2:13-22)

¹⁵ Gwdena' besežine' Jerusalén. Na' cate' gwyo'o Jesús'en' chyo'o yodao' blaon', gwzologüe' bešaše' bene' ca' chesote' na' bene' chesa'o na'. Na' bchiže' xmes bene' ca' chosoša' mechw na' yag ga chesebe' bene' ca' chesote' ngolbex.

¹⁶ Na' bi be'e latje yesexoa xnez bene' zjanao' yoa' chyo'o yodaon'.

¹⁷ Na' bsed blo'ede' bene' ca' že' na', gože'ne':

—Nyojcze Xtiza' Diosen' žan: “Yesene' ližan' naquen latje gan' šja'ac bene' yogo' nación yoso! güiže'nda'”, perw le'e ba benlen ca to latje ga že' bene' gwban.

¹⁸ Na' bhoz gwnabia' ca' na' bene' ca' chososed chosolo'e dan' bzoj da' Moisés gosende' can' gwnen', na' goseyljwlaže' nacle yesone' yesote'ne'. Ba chesežebe' Jesús'en', le yogo' bene' besyežejde' can' bsed blo'eden'.

¹⁹ Perw na' cate' go!, Jesús'en' beže'e ciudan'.

Gwbiž yag yixgüigon'

(Mt. 21:20-22)

²⁰ Beyechj ža šezil, gosodie' na' besele'ede' yag yixgüigon' ba gwbižen lente loen.

²¹ Nach Pedron' jayze'ede' na' gože' Jesús'en':

—Maestro, gwna' yag yixgüigw dan' gwnao' gacxi'an, ba gwbižen.

²² Jesús'en' boži'e xtižen':

—Le šejnilaže' Dios.

²³ Da' li žia' le'e, note'teze bene' ye'e ya'a nga: “Gwcuase nga na' jayzoa lo' nisdao'”, še bi chaczejlaže' lo' yichjlažda'ogüe', san chejnilaže' Diosen', guacczen.

²⁴ Da'n'an' žia' le'e, yogo'te da' nable cate' cho! güižle Dios, le šejle' guaqqezen, na' le gacczen.

²⁵ Na' cate' cho! güižle Dios, še zoa da' chac chele len bene' yoble, le yezi'xen che', cont lecze ca' Xacho Dios ben' zoa yaba yezi'xene' che xto!a'le.

²⁶ Perw še le'e bi yezi'xenle che bene', Xacho Dios bene' zoa yaba bi yezi'xene' che xto!a'le.

Yela' gwnabia' che Jesús'en'

(Mt. 21:23-27; Lc. 20:1-8)

²⁷ Nach ja'aque' Jerusalén da' yoble, na' šlac chda Jesúsen' chyo'o yodao' blaon' jasebiga' b̄xoz gwnabia' ca' na' bene' ca' chososed chosolo'e dan' bzoj da' Moisés na' len bene' gole blao' ca' chesenabi'e nación̄na'.

²⁸ Na' gosenabde' le':

—¿Bi yela' gwnabia' napo' chono' da' qui? ¿No ben̄ yela' gwnabian' cont chonon'?

²⁹ Jesúsen' boži'e xtižen', gwne':

—Leze de to da' nabda' le'e na' še yoži'ile xtižan', nach n̄ia' le'e bi yela' gwnabia' chon̄lenda'.

³⁰ ¿No gwseła' da' Juanna' bzoe' bene' nis? ¿Dios nan' gwsele'ne' še ben̄ačhen'? Le yoži'i xtižan'.

³¹ Nach legacze' gose' lježe':

—Še ye'chone' Dios gwsele' le', na' ye'e chio': “¿Bixchen' ca' gwyejle'le che'?”

³² Bi gac ye'chone' ben̄ač gwseła' le'.

Gosene' ca' da' besežebe', le yogo'te bene' že' na' gosejle'e Diosen' gwsele' da' Juanna' be'e xtiže'na'.

³³ Nach gose'e Jesúsen':

—Bi n̄ezeto'.

Nach Jesúsen' gože' legaque':

—Lecze neda' bi yapa' le'e bi yela' gwnabian' chon̄lenda' da' ca'.

12

Jempl che bene' güen žin ben' gosaque' bene' mal (Mt. 21:33-46; Lc. 20:9-19)

¹ Nach Jesúsen' gwzologüe' choe'lene' legaque' diža' chzoe' jempl, na' gože' legaque':

—Gwzoa to bene' goze' to cue' xen yag uvas na' gwlo'en le'ej. Na' bene' to ga yesesie' uvasen' cont choj xisen', na' bene' yeto da' sibe ca to campanario ga yesecua' bene' yogögüa yesene'e yag ca'.

'Nach bcua'añe' yežlion' lo na' bene' yesonši'e yag uvasen', na' gwze'e gwyeje' zito'.

² Na' cate' bžin ža yosyotobe' cosešen', gwsele' to xmose' lao bene' ca' nac lo na'gaque' yag uvasen' cont yosonežjue'ne' to tlaw coseš dan' yesyezi'en.

³ Perw na' bene' ca gosezene' mosen' gosot goseyine'ne', na' to ga'alze' bosyose'ene' bibi goso'ene'.

⁴ Nach xan yežlion' da' yoble gwsele' yeto xmose'; perw benga bosozie'ne' jej, gosone' güe' yichje' na' gosonde' le' zgot.

⁵ Nach xan yežlion' gwseła'che' yetoe', na' benga gosottecze'ne'. Gwdena' gwseła'che' bene' zan, na' bałe' gosot goseyine' le' na' yebałe' gosottecze'ne'.

⁶ 'Ne' zoa yeto bene' bina' sele', bena' xi'ine' bene' chacchgüede', na' bzebte gwsele' le', le bene' xbab: “Yesezi'e xtižen'!”

⁷ Perw bene' ca' gose' lježe': “Bengan' yega'añlene' yežlio nga cate' gat xen'. Le da gotchone' cont yega'añlenchon.”

⁸ Na' gosezene'ne', gosote'ne', na' besyebeje' cuerp chen' gan' že' yag ca', bosozalen' ga yoble.

⁹ Nach Jesúsen' gwñabe':

—¿Bi chaquale? ¿Nacxe gon xan yežlion' len bene' ca' bocua'añlene' yag uvas chen'? Šjeje' šjetoe' legaque', na' yodie' yežlion' lo na' bene' yoble.

¹⁰ ¿Bina' gwlable ga nyoj Xtiža' Diosen'? žan quinga:

Yej dan' bi gosaclaže' bene' güen yo'o ca' yosochine',

len ba naquen yej squin.

11 Da' nga ben Xancho Dios, na' naquen to da' yežejecho.

12 Nach gosaclaže' yesezene' Jesúsen', le gosacbe'ede' be'e jemplna' neche dan' bi chesejnilaže' le'. Perw besežebe' še bi yesone bene' ca' nžaguen' legaque', da'nan' bosocua'ane'ne' na' besyeya'aque'.

*Ca nac che dan' cheyala' gaxjw
(Mt. 22:15-22; Lc. 20:20-26)*

13 Gwdena' gosesele' bal bene' fariseo na' bal bene' ca' goseda' Herodes cont yesebeje' Jesúsen' diža' da' yosode'ede' cont yesagüe' xya che'.

14 Bene' ca' ja'aque' na' gose'ene':

—Maestro, nezeto' zoatezo' cho'o diža' li na' bi chono' cuent bi ža bene', le toze can' chono' len note'teže bene'. Na' nezeto' diža' li cho'o chsed chlo'edo' bene' can' chazlaže' Diosen' goncho. Da'nan' zedenabeto' le' žnaquen binlo no chixjo da' cheyala' chixjo che ben' nac la'zelagüe bene' gwnabia' ben' chi' Roma? žGwdixjwton', še bi chixjwton'?

15 Jesúsen' goche'ede' gague do lažen' chese'ene' ca', san chesacclaže' yesonlede' le' len xtiža'gaquen', nach gože'ne':

—žBixchen' chaclaže'le yoslažo'le neda' len xtižan'? Le gon neda' to mechw cont ņa'an.

16 Na' goso'enen', na' cate' ble'eden' na' Jesúsen' gwnabde' legaque':

—žNo lao dan' da' le'e mechw nga? na' žno la dan' nyoj le'en ni?

Nach bosoyoži'en gose'ene':

—Che César ben' nac la'zelagüe bene' gwnabian' ben' chi' ciuda Roman'.

17 Nach Jesúsen' gože'ne':

—Le gwnežjo bene' gwnabian' da' nac che bene' gwnabia', na' le gwnežjo Dios da' nac che Dios.

Na' besebande' can' boži'e xtižen'.

*Gosenabde' le' bi zejen dan' yesyeban bene' guat ca'
(Mt. 22:23-33; Lc. 20:27-40)*

18 Nach besežin bal bene' saduceos gan' zoa Jesúsen'. Bene' ca' chesene' bene' guaten' bich yesyebane'. Nach gosenabde' le', gose'ene':

19 —Maestro, da' Moisésen' bzoje' can' cheyala' goncho, gwne' še to bene' byo gate' na' chzeb no'ol čhen' perw na' nono bi' güezeb chga'an, na' bene' biše' ben' ba got cheyala' yošagna'lene' no'ol güezeba' cont yesenita' xi'in diaža che da' bišen'.

20 Gosenita' bene' gosac gaž biše'. Na' bene' nechua' bšagne'e, na' gote' nono xi'ine' gwnita'.

21 Na' bene' gwchopa' bošagna'lene' no'ol güezeba', na' lecce gote' nono xi'ine' gwnita'. Lecce ca' goc len bene' gwyona'.

22 Na' ca' goc gosedaš bene' gaža' bosošagna'lene' no'ola', na' ne toe' ca' gosezoa xi'ine' len le'. Gwde gosat yogo'lol bene' ca', ca beyožen got len no'ola'.

23 Gož neto', cate' yesyebane' ladjo bene' guat ca' žnox bene' ca' soalene' no'ola' ca' xo'ole'? le yogo' bene' gaža' bosošagna'lene' le'.

24 Nach Jesúsen' boži'e xtižen', gwne':

—Clelen' chonle xbab dan' žale ca', le bi nezele can' ža Xtiža' Dios da' nyojen, neca nombia'le yela' guac čhen'.

25 Cate' yesyeban bene' guat ca' bich yosošagna' bene', neca yosonežjo xi'ine' no'ol gwšagne'e, le yesaque' ca' angl bene' zjazoa yaba.

²⁶ Na' ca nac dan' yesyeban beñe' guat ca', ¿bina' gwlable gan' bzoj da' Moisés, can' gož Diosen' le' caten' bol' güiže'ne' to lo yag yeše' dao' da' chey? Gože'ne': "Neda' naca' Dios ben' chonxen Abraham, ben' chonxen Isaac, na' ben' chonxen Jacob."

²⁷ Beñe' guat ca' bi chesonxene' Diosen', san beñe' zjamban. Na' ca nac le'e, leca clelen' chonle xbab.

Da' nac da' žialao da' cheyała' goncho

(Mt. 22:34-40)

²⁸ Leze bžin to beñe' bsed blo'ede' ley dan' bzoj da' Moisés, beñe' bende' caten' chesežeše' len Jesúsen', na' nezde' boži'icze Jesúsen' xtiža'gaquen' binlo. Na' bena' gwñabde'ne':

—¿Non' nacch da' žialao da' zjanyojen da' ža Diosen' cheyała' goncho?

²⁹ Jesúsen' boži'e xtižen' gože'ne':

—Da' nga nacch da' žialao lao yogo'lojen, žan: "Le gwzenag beñe' Israel gualaž chia', toze Xancho Dios naque' beñe' zaca' gonxencho.

³⁰ Da'nan' cheyała' gaguecho Xancho Diosen' con ca zelao chejni'icho, do yičj do laže'cho, do fuerz valor checho." Lenña' naquen da' žialao lagüe da' ca' ža Diosen' cheyała' goncho.

³¹ Na' da' gwchopen' zejgalan' ca', gan' žan': "Cheyała' gague lježcho ca chaque cuincho." Bich bi de da' že' cheyała' goncho da' zaca'ch ca da' qui.

³² Nach ben' chsed chlo'e dan' bzoj da' Moisésen' gwne':

—Ca'yanen' naquen, Maestro. Da' licze can' gwnaon'. Toze Xancho Dios zaque' gonxenčone', na' noch no zoa beñe' zaca'ch ca le'.

³³ Na' še gaguecho Dios, con ca zelao chejni'icho, do yičj do laže'cho, do fuerz valor checho, na' gague lježcho ca chaque cuincho, lenña' zaca'chen ca yogo' da' choncho chotcho no beyixe' na' chzeychoba' chonxencho Diosen'.

³⁴ Nach cate' gočbe'e Jesúsen' boži'icze' xtižen' to lica, gože'ne':

—Gague da' xen chyažjen cont nabdo' Diosen' nabi'e yičjlažda'oguon'.

Na' ne yetoe' bich beseyaxjde' bichle yesenabde' Jesúsen'.

Criston' naque' xi'in diaža che da' rey David

(Mt. 22:41-46; Lc. 20:41-44)

³⁵ Jesúsen' bsed blo'ede' chyo'o yodaon', gwne':

—¿Nacxečhen' beñe' ca' chososed chosolo'e dan' bzoj da' Moisés chesene' Criston' ben' gwlej Diosen' cont yedenabi'e naque xi'in diaža che da' rey David?

³⁶ Cuin Daviden' gwne' can' blo'e Spiritw che Diosen' le':

Xancho Dios gože' Xanan':

"Gwche'edo' cuita' nga nabi'acho txen,

na' gona' cont yogo' no chesegue'e le' yosozexjw yičje' yosozenague' chio'."

³⁷ ¿Nacxe gac nacho Criston' naque' xi'in diaža che da' David? le cuin Davin' gože' le': "Xana'".

Na' zjanyanchgua beñe' ca' chosozenag xtižen', na' besyebede' xtižen'.

Jesúsen' bcuiše' bene' ca' chososed chosolo'e ley dan' bzoj Moisés

(Mt. 23:1-36; Lc. 11:37-54; 20:45-47)

³⁸ Jesúsen' caten' chsed chlo'ede' legaque' gwne':

—Le gwsaca' cont bi gonle can' cheson beñe' ca' chososed chosolo'e dan' bzoj da' Moisés, le chesyebede' chesaše' zjanyaze' lache' ton, na' chesyebede' chesap beñe' legaque' bala'an cate' chesyěžague' lagüe ya'a.

³⁹ Cheseyebede' chesebi'e gan' chesebe' bene' blao cate' chja'aque' yodao' na' cate' chac lni.

⁴⁰ Legaque' cheseque'e yo'o che no'ol güezeb ca', na' cate' chosol güiže' Dios, sša cheso'e diža' cont yesaque bene' leca chesonxene' Diosen'. Bene' can' yesacche' castigw clcl ca yezica'chle bene' güen da' xinj.

To no'ol güezebe be'e Diosen' xmechue'
(Lc. 21:1-4)

⁴¹ Na' šlac zoa Jesúsen' chyo'o yodaon', gwchi'e gala'ze gan' xoa caj gan' chesegüe'e mechw che yodaon', na' chñe'e can' chesego'o bene' mechw. Na' zan bene' gwñi'a ca' chesegüe'e da' z'cha'o mechw.

⁴² Ca' chac, cate' bžin to no'ol güezebe bene' yaše', gwlo'e chop mechw dao' da' bibi zaca'tec.

⁴³ Nach Jesúsen' goxe' bene' ca' zjanaque' le' txen na' gože'ne':
—Da' li žia' le'e, no'ol güezebe yaše' nga ba gwlo'oche' mechw da' zaca'ch len Diosen' clcl ca yogo' bene' ca' chesego'o mechw lo' cajen',

⁴⁴ Le yogo' legaque' chesegüe'e da' checho'onen lo yela' gwñi'a chegaquen', perw no'ol nga, lo yela' yaše' yela' zi' che' gwlo'e yogo' da' de che' da' chacbanlende'.

13

Jesúsen' gwne' gwžin ža yosyočinje' yodao' blaon'
(Mt. 24:1-2; Lc. 21:5-6)

¹ Cate' cheza' Jesúsen' yodao' blaon' to bene' ca' zjanaque' le' txen gože'ne':

—iMaestro, gwñi'ašc catec xdan zjanac yej qui na' yo'o qui!

² Na' Jesúsen' boži'e xtižen', gože'ne':

—Ca nac yo'o xen qui chle'echo, žin ža cate' ne to yej da' zjancua' nga ca yega'an zjancua' cože' lježen. Yogon' yosyočinje'.

Can' gac cate' ba zoa yeyož yežlion'
(Mt. 24:3-28; Lc. 21:7-24; 17:22-24)

³ Nach ja'aque' Ya'a Olivos gan' nla' yodao' blaon'. Na' cate' ba chi' Jesúsen' lo ya'an len Pedro na' Jacobo, na' Juan na' Andrés, bene' ca' zjanaque' le' txen, legaque' gose'ene' šižize:

⁴ —Che'neto' nao' neto' batcan' gac da' ca'. ¿Nac gac nezeto' cate' ba zoa gac yogo' da' ca'?

⁵ Jesúsen' boži'e xtižen', gwne':

—Le gwsaca' cont nono siye' le'e.

⁶ Le bene' zan yesaš yežlio nga yesaclaže' yosolane' xlatja' nga, yesene': "Nedan' naca' Cristo ben' gwlej Diosen' cont nabi'e." Na' yeseziye'e bene' zan.

⁷ Na' cate' yenele chac gwdile nile nale, o yenele guac gwdile, bi žeble, le can' cheyała' gac. Perw gague lenna' nacho ba bžin ža yeyož yežlion'.

⁸ Le yesedil to yež len yeto yež yoble na' to nación len yeto nación yoble, na' zan cuen ga xo'chgua lo yežlion', na' gata' gwbin na' yesebec bene' žaš. Na' da' qui gac cate' za' solao gata' yela' zi'.

⁹ Na' le gwsaca' can' gonle, le yesone' le'e lo na' bene' gwnabia' ca' cont yesot yeseyine' le'e lo' yodao' chegaquen', na' dan' chejnilaže'le neda' nita' bene' yeseche'əoxje' le'e no lao rey no lao nochle bene' gwnabia', na' can' güe'lenle legaque' xtižan'.

¹⁰ Le za' te che yežlion', xtiža' Diosen' cheyała' gas lajjen doxen yežlion'.

¹¹ Na' cate' yesezene' le'e na' yeseche'e le'e lao bene' gwnabia' ca', bi cuec yichjle nac yoži'ile xtiža'gaquen', neca gonlen xbab. San le na con da' ye' Diosen'

le'e nale lo hor na'teze, le gague le'eczen' nele, san Spiritw che Diosen' gonen ga nale bin' cheyala' nale.

12 Cana' bal benach yesechje' yesone' bene' biše' golje' lo na' bene' yesot legaque', na' nita' bene' yesone' xi'ingaque' lo na' bene' yesot legacbe', na' nita' bene' yesone xaxne'e lo na' bene' yesot legaque'.

13 Yogo'ze bene' yesegue'ede' le'e dan' chejnilaže'le neda', perw note'tez le'e gwyo gwchejlaže'le cont bi cuejyichje' dan' chejnilaže'le neda' žin žate gatle, nach šjayzoale len Diosen'.

14 'Da' Daniel ben' gwdixjue'ede' xtiza' Dios bzoje' che da' zbanchgua da' gwxinjen latje gan' chonxencho Diosen'. Na' cate' le'e le'ele ba zoa dan' gan' bi cheyala' soan, cana' bene' yesenita' distritw Judea cheyala' yosoxonje' šja'aque' do ya'adao'. (Bene' gwlaben' cheyala' šejni'iden'.)

15 Na' bene' chda do yichjo' che liže' žana', bi yeyetje' yotobe' xšinlaze' ca' že' ližen', con yoxonje'.

16 Na' bene' chda yixe' bi yeyej liže' šjayxi' xalane'.

17 iNyaše'chguaze zjanac no'ol ca' zjanoa' xi'in, na' no'ol ca' ne' chosoguaže' bidao' lo ža ca'!

18 Le nab lao Dios bi yažjen gwxonje' caten' chac zag,

19 le yesaquen ža da' leca yesale' bene'. Cate' bxete Diosen' yežlio na' ža na'aža nono na' gale' ca', neca žinlažen' yesale'de' ca' da' yoble.

20 Na' šaca' Xancho Diosen' bi yozaše' žan' yesac ca', notno yela, perw yozašen' neche chacde' bene' ca' chesejnilaže' le', bene' ba gwleje' zjanaque' xi'ine'.

21 'Cana' še no ye' le'e: "Le na'šc, nga zoa Cristo ben' gwlej Diosen' cont nabi'e", o "Le na'šc, na' zoe'", bi šejle'le.

22 Le yesaš bene' gwxiye' bene' yesaclaže' yosolane' xlatja' nga, na' yeson cuine' ca' bene' chesoe' xtiža' Dios. Na' yesone' yela' guac da' yesele'e bene' na' bichle da' zaca' yesyebande' cont yeseziye'e legaque', na' len bene' ca' ba gwlej Diosen' zjanaque' xi'ine' yesaclaže' bene' gwxiye' ca' yeseziye'e šaca' gac yeseziye'e legaque'.

23 Perw ca' nac le'e, le gwzenag, le ba gwdixjue'eda' le'e yogo' can' gac.

*Can' gac cate' ben' gwsela' Diosen' golje' benach yide' da' yoble
(Mt. 24:29-35, 42-44; Lc. 21:25-36)*

24 'Perw ca' nac ža ca' cate' yeyož gale'le can' gwnia', gwbižen' yeyaquen čol na' bion' bich gwsenin'.

25 Na' beljw ca' yeselažon' le'e yaban', na' yogo' da' chle'echo le'e yaban' yesaquen ca' chac yežlion' cate' chxo'.

26 Nach bene' že' yežlion' yesele'ede' neda' naca' ben' gwsela' Diosen' golja' benach za'a ladjo bejon' len yela' guac xen na' yela' bene' zaca' juisyw čhian'.

27 Nach selja' angl čhian' yosyotobe' yogo' bene' ca' ba gwleja' cont zjanaque' neda' txen gate'teze nite' doxen lo yežlion', ga zelao nac zito'.

28 'Le gwzenag che jempl nga che yag yixgüigon': Cate' ba chzolao chebešjw yaguen' na' chelan' laga' che'en dao', nezele ba za' lagüe ba.

29 Na' lecze cate' le'ele ba chac da' mal ca' ba gwnia', cana'ch nezele ba za' juisyw, ba zoa gala'.

30 Da' li žia' le'e, biža' yenit diaža che le'e nita'le na'a cate' yeyož gac yogo'lol da' ca'.

31 Le'e yaban' na' yežlion' yesede čhen, perw ca' nac xtižan', gague da' te čhi gac can' žanna'.

³² 'Perw nono neze bi ža bi horen' gac ca', ne angl ca' nita' yaba, neca neda' naca' Xi'in Diosen' bi nezda'. Toze Xa' Dios neze.

³³ 'Da'nan', le soa le cueze, le güia le na', na' le soateze yoľ güizle Dios, le nono neze batcan' žin ža.

³⁴ Naquen ca nac che to bene' šeje' zito', na' cate' za' se'e choň liž xlatje' lo na' bene' güen žin che', cho'e žin da' yeson to toe', na' chzoe' bene' chape' cho'a yo'ona'.

³⁵ Le soa le cueze ca bene' chesape' liže'na', le bi zjañezde' batcan' yela' xan yo'on, še cate' ba zoa gaľ, še chel, še cate' chbež jea, še cate' ba gwyeni'.

³⁶ Le xož yele'e zejzenez na' yedole'de' legaue' chesetase'.

³⁷ Da' nga žia' le'e leze žiczan' par yogo'loľ bene'. Le soa le cuez batcan' žin ža.

14

Bosoxi'e yesezene' Jesúsen'

(Mt. 26:1-5; Lc. 22:1-2; Jn. 11:45-53)

¹ Yechop ža za' gaľa' pascw na' lni dan' chesone' caten' chesagüe' yetextil dan' bibi levadura yo'on. Na' bxož gwnabia' ca' na' bene' ca' chososed chosolo'e dan' bzoj da' Moisés cheseyiljwlaže' nac yesone' yeseziye'e Jesúsen' cont yesezene'ne' yesote'ne'.

² Perw gosene':

—Bi senchone' lo lnin' cont ca yesebec bene' žaš.

To no'ole bzoe' set zix yichj Jesúsen'

(Mt. 26:6-13; Jn. 12:1-8)

³ Na' goquen' Jesúsen' zoe' Betania liž Simón ben' güe'e yižgüe' da' nzi' lepra. Na' šlac chi' Jesúsen' cho'a mes, bžin to no'ole noxe' to de yejese ga chož set da' chla' zix, naquen dogualje da' bchoj lo yag yej da' nzi' nardo, na' zaca'chguan la'ay. Na' bzoxye' gan' yož seta' na' bzoačochje' seta' yichj Jesúsen'.

⁴ Na' baľ bene' ca' zjanita' na' beseže'e, na' gose' lježe':

—¿Bixchen' benditjde' set zix nga?

⁵ Ša no bete' len güesoňen ca no laxjw mos da' gone' gan tgüiz, na' gwnežjuen' gaclenen bene' yaše'.

Na' beseloque' no'ola'.

⁶ Perw Jesúsen' gwne':

—Jayen'. ¿Bixchen' chnele che no'olen'? Dan' bene' len neda' nga naquen güen.

⁷ Le bene' yaše' ca' bate'teze nita'cze' len le'e, na' guaque gonle len legaue' da' güen cate' žan chele, san neda' bich soacza' yesša len le'e.

⁸ No'ole nga bene' da' zelao gwzaque'de'. Ba bguazje' neda' set zix can' cheyala' yesone' len neda' cate' gaša'.

⁹ Da' li žia' le'e, doxen yežlio gate'teze šjasedixjue'e bene' diža' güen dan' chzejni'in chia', decze de šjasyeze'ede' can' ben no'ol nga.

Judas gwchoglaže' gwdie' Jesúsen' lo na' bene' ca' chesegue'e le'

(Mt. 26:14-16; Lc. 22:3-6)

¹⁰ Nach Judas Iscariote, ben' goque' txen len bene' ca' šižinw ben' gwlej Jesúsen' cont zjanaque' le' txen, gwyeye' jaňe'e bxož gwnabia' ca' cont yosoxi'e nac gone' gwdie' Jesúsen' lo na'gaque'.

¹¹ Cate' gosende' xtiža' Judasen', besyebede' na' gose'ene' yeso'ene' mechw. Nach Judasen' gwzologüe' gwdiljwlaže' nac gone' gwdie' Jesúsen' lo na'gaque'.

*Xše' dan' gosagüe' len Xanchon'**(Mt. 26:17-29; Lc. 22:7-23; Jn. 13:21-30; 1 Co. 11:23-26)*

12 Na' bžin ža chala' lni caten' neto' bene' Israel chagwto' yetextil dan' bibi levadura yo'o. Naquen ža nechw che lni pascw cate' chotto' xila' dao', cont šjayza' laže'to' can' bosla Diosen' da' xoxxta'oto' ca' lo na' bene' Egipto ca'. Na' bene' ca' zjanaque' Jesúsen' t xen gosenabde' le':

—ŽGa che'ndo' šjasini'ato' cont gagwcho xše' che pascon'?

13 Nach gwsele' chop bene' ca' na' gože'ne':

—Le šja'ac ciudan', na' yežagle to bene' byo no'e to che'e nis. Le šejlene',

14 na' gan' yežinen', le ye' xan yo'on: "Maestrona' že': Gonšco' to yo'o gan' gagwto' xše' ža lni nga len bene' ca' zjanaque' neda' t xen."

15 Nach gwlo'ede' le'e to cuart xen dan' zoa yichjen na'ale gan' de yogo' da' chyažjecho. Na' le gwsini'a cont gagwcho na'.

16 Na' gosa'ac bene' ca' chope, na' besežine' ciudan', na' yogo' can' gož Jesúsen' legaque' goc, na' bososini'e xše' že' lnin'.

17 Cate' beyož gwxa gwbiž, bžin Jesúsen' len bene' šižinw ca' gwleje' cont zjanaque' le' t xen.

18 Na' gosebi'e gosagüe' xše'. Na' šlac chesagüen', Jesúsen' gože' legaque':

—Da' li' žia' le'e, to le'e chagwle len neda' t xen, gwdele neda' lo' na' bene' ca' chesegue'e neda'.

19 Nach legaque' besyeyaše' laže'de' na' gosezolagüe' tgüjeje' tgüjeje' gosenabde' le' gosene':

—ŽNedan' gona' ca'?

Na' yetoe' leze gwne':

—ŽNedan' gona' ca'?

20 Na' Jesúsen' gože'ne':

—Ladjo le'e bene' šižinw, to bene' chagw len neda' t xen toze lo' ye'eñ gon ca'.

21 Na' gac chia' can' nyoj le'e Xtiža' Diosen', neda' naca' ben' gwseła' Diosen' golja' beňach. Perw įnyaše'chguaze nac ben' gwdie' neda' lo na' bene' ca'! Yejni'acle ša bi goljen'.

22 Na' šlac chesagüe', Jesúsen' gwxi'e to yetextilen', na' beyož be'e yela' choxcen che Dios, bzojxen', na' bnežjuen' legaque', gwne':

—Le gagon'. Lenna' cuerp chia'.

23 Nach bežue' to vas gan' yože nis uvasen' na' beyož be'e yela' choxcen che Dios, be'en legaque', na' yogüe' gose'eje' late' güej dan' yože lo' vassen'.

24 Na' gože' legaque':

—Da' ngan' xchena' na' chzanlažan' laljen neche yogo'lol beňach. Na' laljen cont solao gac da' coben' da' gwna Diosen' gone' gaclene' beňach.

25 Da' li' žia' le'e, bich ye'eja' xis uvas na'a. Cate'ch žin ža ba zoacho t xen gan' chnabia' Diosen', canan' ye'ejan' da' yoble.

*Jesúsen' gwne' Pedroa' bi chebe' naque' le' t xen**(Mt. 26:30-35; Lc. 22:31-34; Jn. 13:36-38)*

26 Beyož gosole' gosonxene' Diosen' nach gosa'aque' ja'aque' Ya'a Olivos.

27 Nach Jesúsen' gože'ne':

—Na'aže' yogo'le' cuejyichje neda' neche dan' gac chian'. Le nyojzen le'e Xtiža' Diosen', žan: "Gota' bene' güeyoe xilan' na' xila' ca' yesaslasba'."

28 Perw cate' yosban Diosen' neda' ladjo bene' guat ca', yobch yeya'a Galilea ca' le'e.

29 Nach Pedron' gože'ne':

—La' yogo' bene' quinga yesebejyichje' le', neda' bi gona' ca'.

30 Perw Jesúsen' gože'ne':

—Da' li žia le', biŋa' cuež jean' chop ni'a na'aže' cate' gac šon ni'a bi chchebo' še nombi'o neda'.

31 Perw Pedroa' do laže' gwne':

—La' czła' še chonen byen guatlencza' le', gwbat nia' bi nombia' le'.

Na' lecze ca' gosena' yogüe'.

Jesúsen' boł güiže' Xe' Dios Getsemaní

(Mt. 26:36-46; Lc. 22:39-46)

32 Nach besežine' latje gan' nzi' Getsemaní, na' Jesúsen' gože' bene' ca' zjanaque' le' txen, gože'ne':

—Ngaze le cue'edo' šlac neda' šjel güiža' Dios.

33 Na' gwche'e Pedro, Jacobo na' Juan, na' gwzolaon da' juisyw da' gocde' lo' yichjlažda'ogüen' na' benchgüe' xbab.

34 Na' gože' legaque':

—Lo' yichjlažda'ogua' nga chacyaše'chgüeda', chacda' gatzca' catequen' chžaglagua'. Nga le yega'an na' le soa le na' txen len neda'.

35 Nach Jesúsen' gwžialagüe' yelate' na' jachaze' coscho'ale lo yon' gwnabde' Dios še guac ten ca'ale bi gac can' ba zoa gac che'.

36 Gože' Diosen':

—Xa', bibi de da' nacho da' bi chac gono'. Benšca cont bi saca'zi'a na' bi yesote'nda', perw bi chnaba' gac da' žia' neda', san gac da' nao' le'.

37 Nach beyeje' gan' nita' bene' ca' šone, na' ble'ede' zjanite' chesetase'. Na' gože' Pedron':

—Simón žchtason'? žNe šlož da'oze ca' goc cuejo' bišgal len neda'?

38 Bi tasle, san le yoł güiž Dios cont bi gon gwxiyen' le'e gan. Da' li lo' yichjlažda'olen' chna'laže'le gonle da' nac binlo, perw cuerp chelen' bi chzoeczen.

39 Nach gwyeje' da' yoble na' boł güiže' Dios na' da' yoble gože'ne' dan' ba gožcze'ne' tni'a.

40 Nach bezyeje' gan' niten', na' da' yoble ble'ede' chesetase', le yejlagüen' chesexa' chesežoden' bišgal. Na' bi besyežellaže' nac yosyoži'e xtižen'.

41 Na' da' gwyone ni'a gwyeje' na' bezžine' gan' nita' bene' ca' šone na' gože' legaque':

—žNe' chtasle? žNe' chezi'laže'le? Ba goc. Ba gole' gon to bene' neda' lo na' bene' güen da' xinj ca', neda' naca' ben' gwsela' Diosen' golja' benach.

42 Le chas, le yeyo'o. Ba za' ben' gon neda' lo na'gaque'.

Gosezene' Jesúsen' cont yeseche'ene' lao bene' gwnabia' ca'

(Mt. 26:47-56; Lc. 22:47-53; Jn. 18:2-11)

43 Jesúsen' ne' choe'te dižan' ca' cate' bžin Judas, na' zan bene' zja'aque' len le' zjanoxe' no yag, no spada, bene' gosesela' bžox gwnabia' ca' na' bene' gole' blao ca' chesenabia' nación Israel cheton'. (Judasen' goque' to bene' šižinw ca' gwlej Jesúsen' cont zjanaque' le' txen.)

44 Na' Judasen' ba gože' legaque' nac yesenezde' non' yesezene', gwne':

—Ben' gwnopa' xague', le'na'; le sene' na' le che'e.

45 Na' cate' bžin Judasen' na' jabigue' gan' zoa Jesúsen' na' gože'ne':

—Maestro, Maestro.

Na' bnopene'.

46 Nach gosezene' Jesúsen' cont yeseche'ene'.

47 Perw to ben' zecha cuit Jesúsen' gwlej spada čhen' na' gw dinen' mos che bχoz blaon' gwčhogte' šla'a nagen'.

48 Nach Jesúsen' gože' beņe' ca':

—¿Nonle neda' ca to beņe' gwban za'acle zedexi'le neda' len spada na' len yag?

49 Yogo' žaze gwzoa' len le'e bsed blo'eda' beņe' chyo'o yodao' blaon', na' bi gwzenle neda'. Perw chac da' qui cont chac can' nyoj Xtiža' Diosen'.

50 Nach yogo' beņe' ca' zjanaque' Jesúsen' txen bosoxonje' gosebejyichje'ne'.

Bi' güego' bin' boxonj

51 Na' to bi' güego' na'obe' Jesúsen', na' nχoa cože'be' toze sávana. Na' beņe' ca' ba gosezene' Jesúsen' lecze gosēize'be'.

52 Perw gwlejiyichje'be' sávanan' na' boxonjbe' ga'alyidbe'.

Goseche'e Jesúsen' lao bene ca' chesenabia' nación Israelen'

(Mt. 26:57-68; Lc. 22:54-55, 63-71; Jn. 18:12-14, 19-24)

53 Nach goseche'e Jesúsen' lao bχoz blaon', na' besežag yogo' beņe' ca' zjanac bχoz gwnabia', na' beņe' gole blao ca' chesenabi'e nación čheton' na' beņe' ca' bososed bosolo'ede' dan' bzoj da' Moisés.

54 Na' Pedron' na'ogüe' Jesúsen' zito' zito'le bžintie' liž bχoz blaon' na' gwyo'e chyo'ona' gwchi'e txen len beņe' ca' chesape' yodao' blaon' boše'e cuine' cho'a yi'.

55 Na' ca' nac bχoz blaon' na' yogo' beņe' ca' chesenabia' nación čheton', besyeyiljwlaže' bi da' yesagüe' xya che Jesúsen' cont yesote'ne', perw bi besyezelden'.

56 Na' zan beņe' gosone' diža' güenlaže' che Jesúsen', perw bi gosene' toz ca' yesene'.

57 Baļe' gosezože'e na' bososbague'ne' xya čhol, gosene':

58 —Neto' beneto' gwne': "Neda' yochinja' yodao' nga da' ben beņach, na' šone žaze yeyona' yeto yodao' da' bi gon beņach."

59 Perw ne ca' ca' gosene' toz ca' yesene'.

60 Nach bχoz blaon' gwzože'e ladjo yogo'lole' na' gwñabde' Jesúsen':

—¿Bi choži'o xtižen'? ¿Bi dan' chosožie' le' xya?

61 Perw Jesúsen' bitw bi gwne', bitw boži'e xtižen'. Na' bχoz blaon' da' yoble gwñabde' le', gwne':

—¿Naco' le' Cristo ben' gwlej Diosen' cont nabi'e, na' Xi'in Dios ben' chonx-encho?

62 Jesúsen' gože'ne':

—Le can' naca'. Na' le'ele neda' cate' ba chi'a šla'a licha che Dios ben' nac la'zelagüe beņe' gwnabia', neda' naca' ben' gwsele' golja' beņach. Na' le'ele yetja' ladjo bejw dan' ze le'e yaban'.

63 Nach bχoz blaon' gwčeza' xalane' cont nabcia' bi beque'e can' gwna Jesúsen', na' gwne':

—Noch no chyažje beņe' co' da' baļi.

64 Le'e ba benele čņe' che Dios dan' že' ca', chon cuine' ca' Dios. ¿Nacxe ža le'e?

Na' yogüe' gosene' nape' doļa' na' cheyaļa' gate'.

65 Nach baļe' gosezolağüe' chosoži'ene' xene' na' bososeyjue' lağüen' len to lache' na' gosot goseyine' le', na' gosonle' che' gose'ene':

—jGwnašc non' chot le'!

Na' bene' ca' chesape' yodao' blaon' gosot goseyine' le'.

Pedron' bi gwchebe' še nombi'e Jesúsen'
(Mt. 26:69-75; Lc. 22:56-62; Jn. 18:15-18, 25-29)

⁶⁶ Pedron' chi'e chyo'o che'e'ele, cate' bžin to no'ole güen žin che bžoz blaon'.

⁶⁷ Na' cate' no'olen' ble'ede' le' chi'e choše'e cuine' cho'a yin', gwne'e le' na' gože'ne':

—Lencze le' naco' txen len Jesús bene' Nazaret.

⁶⁸ Perw Pedron' bi gwchebe', gwne':

—Bi nombi'ane', neca nezda' bin' žo'.

Na' beyej Pedron' jayzie' cho'a puert na'le. Nach gwchež to jea.

⁶⁹ Na' no'ol güen žinna' gwne'e le' da' yoble na' gože' bene' ca' nita' na':

—Benga naque' legaque' txen.

⁷⁰ Perw le' da' yoble bi gwchebe' še naque' txen len Jesúsen'. Na' gocze štit da' yoble bene' ca' nita' na' gose'e Pedron':

—Da' licze, le' naco' txen len legaque', le naco' bene' Galilea, nacia' chnio' can' chesene bene' Galilea ca'.

⁷¹ Nach Pedron' chop šone ni'a gwne':

—Diosen' gone' neda' castigw še chonlaža' žia' bi nombi'a bena'.

⁷² Na' cate la' gwchežte jean' da' gwchope. Nach jayze'e Pedron' can' gož Jesúsen' le': "Biŋa' cuž jean' chop ni'a cate' gac šon ni'a bi chebo' še nombi'o neda'." Na' cate' jayze'ede' can' gož Jesúsen' le', na' gwcheže'.

15

Goseche'e Jesúsen' lao Pilato
(Mt. 27:1-2, 11-14; Lc. 23:1-5; Jn. 18:28-38)

¹ Ca gwyeni', bžoz gwnabia' ca' besežague' len bene' gole blao ca' cheseni'abi'e nación cheton' na' len bene' ca' chososed chosole' dan' bzoj da' Moisés na' len yezica'chle bene' gwnabia' ca'. Na' bosocheje' Jesúsen' na' goseche'ene' jasesane'ne' lo' na' Pilato ben' nac gobernador.

² Pilaton' gwñabde'ne', gože'ne':

—¿Len' naco' rey che bene' Israel?

Jesúsen' boži'e xtižen', gwne':

—Can' gwnao'na', can' naquen.

³ Na' bžoz gwnabia' ca' da' zan da' bosocuiše'ne'.

⁴ Nach Pilaton' da' yoble gwñabde'ne', gože'ne':

—¿Bi choži'o xtiža'gaquen'? le' da' zan da' chosocuiše' le'.

⁵ Perw Jesúsen' bitw bi gwne'. Na' Pilaton' bebande' che'.

Gosechogbi'en gat Jesúsen'
(Mt. 27:15-31; Lc. 23:13-25; Jn. 18:38-19:16)

⁶ Na' gota' costumbr, Pilaton' gwsane' to bene' deližya caten' čala' lni pascw che neto' bene' Israel, con to bene' yesenab bene' gualaž cheton'.

⁷ To bene' lie' Barrabás na' len yexonj bene' gosot bene' cate' besyedabague' gobiernna' zjajo'e lo' ližya len nochle bene' güen da' mal.

⁸ Nach besežag bene' na' gosenabde' Pilaton' gwsane' to bene' con can' nac costumbr čegaquen'.

⁹ Na' Pilaton' boži'e xtiža'gaquen' gwne':

—¿Čaclaže'le gwsana' rey che le'e nacle bene' Israel?

¹⁰ Gwne' ca' le' gocbe'ede' dan' chesacxi'a bžoz gwnabi'a ca' Jesúsen', da'nann' bosodie' le' lo' ne'e.

11 Perw b̄xoz gwnabia' ca' bosota bosone' bene' ca' že' na' cont gosenabe' gwsane' Barrabás ben' de ližyan'.

12 Nach Pilaton' gwnabde' legaque':

—¿Bixe gona' len ben' žale nac rey che le'e nacle bene' Israel'?

13 Legaque' bososya'adie' bosyoži'e xtižen':

—jBde'e le'e yag cruz!

14 Pilaton' gože' legaque':

—¿Bixe da' xinj nonen'?

Nach legaque' da' yoble bososya'achgüe' gosene':

—jBde'e le'e yag cruz!

15 Nach Pilaton', cont bega'ane' güen len bene' ca', bsane' Barrabásen' can' gosenabe'. Na' bene' mandadw gosot goseyin soldadw che' ca' Jesúsen', nach bene' le' lo na'gaque' cont yosode'ene' le'e yag cruz.

16 Nach soldadw ca' goseche'ene' yeto latje dan' zoa chyo'o che liž bene' gwnabian', na' bosotobe' yogo' soldadw ca', zjanac zane'.

17 Gosečize' Jesúsen' to lache' moradw, na' gosone' to corona de xis yeše' bosozoen' yichjen'.

18 Na' gosezolagüe' chesonle' che', chesosye'e:

—jViva, rey che bene' Israel!

19 Na' bosozete' yichjen' xis, bosoži'ene' xene', na' bosozoa xibe' gosone' ca' bene' chesonxen le'.

20 Beyož gosonle' che', besyeyine' lache' moradon' na' bosyoguacue'ne' xacze'. Nach goseche'ene' cont jasede'ene' le'e yag cruz.

Bosode'ene' le'e yag cruz

(Mt. 27:32-44; Lc. 23:26-43; Jn. 19:17-27)

21 Na' šlac zjanche'ene' gan' yesote'ne' besyežague' to bene' yež Cirene le' Simón, xa Alejandro na' Rufo, za' zeze'e yixe', na' bosogüe'ene' yag cruz che Jesúsen'.

22 Goseche'e Jesúsen' latje ga nzi' Gólgota, zeje dižan' Latje che Žit Yichj Bene' Guat.

23 Na' goso'ene' vino da' nchiže to nechw da' nzi' mirra, perw Jesúsen' bi goclaže' ye'ejen'.

24 Nach bosode'ene' le'e yag cruzen'. Na' soldadw ca' gosone' rifa cate' besyele'e xałana' Jesúsen' cont bla' bi besyecheł to toe'.

25 Cheda ga šezille caten' bosode'ene' le'e yag cruz.

26 Na' yichj yag cruzen' bosozoe' dan' bosozoje' choen' diža' bixchen' gosote'ne'. Qui nyojen, žan: “Rey che Bene' Israel.”

27 Txen len Jesúsen' lecze bosode'e le'e yag cruz yechope bene' gwban, toe' šla'a licha, na' yetoe' šla'a robes.

28 Na' da' gosone' ca', goc ca' nyoj Xtiža' Diosen', žan: “Gosone'ne' ca' bene' güen da' xinj.”

29 Na' bene' gosede gała'ze gosezi'diže'ne', con chosota yichje' gosene':

—Le' gwnao' yočhinjo' yodaon' na' šone žaze yeyontion'.

30 Bosla cuino' na' beyetj le'e yag cruza'.

31 Lecze ca' b̄xoz gwnabia' ca' na' bene' ca' bososed bosolo'e dan' bzoj da' Moisés gosezi'diže'ne', na' gose' lježe':

—Bosle' bene' yoble, perw bi chac yosla cuine'.

32 Le'echone' yeyetje' na'a le'e yag cruzen', nach šejle'cho naque' Cristo ben' gwlej Diosen' cont nabi'e chio' bene' Israel.

Na' lente bene' ca' bosoda'lene' le' le'e yag cruz ca' gosezi'diže'ne'.

Can' goc caten' got Jesúsen'
(Mt. 27:45-56; Lc. 23:44-49; Jn. 19:28-30)

³³ Cate' bžin guagwbiz, doxen yežlion' goc chol, bžinte cheda šone.

³⁴ Na' ca hora' Jesúsen' gwne' zižje gwne':

—Eloi, Eloi člama sabactani? —zeje diža': Dios čhia', Dios čhia', čbixčhen' ba gwlejičhjo' neda'?

³⁵ Na' bał bene' ca' zjanita' na' gosende' na' gosene':

—Le gwzenag, chol güiže' da' Elías, ben' be' xtiža' Dios cani'.

³⁶ Nach to bene' ca' gwyejese' na' bzažede' to esponja vino zichj na' bzoen' to lao xis toņe nach jažiguen' cho'a Jesúsen' cont xopen', na' gwne':

—Cuezcho, yešque güid Eliásen' yeletje' le'.

³⁷ Nach Jesúsen' bosye'e zižje, na' gote'.

³⁸ Na' lache' da' ze lo' yodao' blaon' bcheza' gacholen, gwza'te yičhjen bžinte che'e'le.

³⁹ Na' xan soldadw ca' zie' lao Jesúsen', na' cate' bende' can' bosye'en na' ble'ede' can' gotten', gwne':

—Da' li le bengan' goc dogualje Xi'in Dios.

⁴⁰ Lecze bał no'ole zjanite' zito'le cheseņe'e. Na' len legaque' zjanita' María no'ole Magdala, na' Salomé, na' María xna' Jacobo bene' naše'te, na' lecze goque' xna' José.

⁴¹ No'ol qui gosa'ogüe' Jesúsen' na' gosaclene' le' cate' chsed chlo'ede' bene' ca' že' distritw Galilea. Na' yezanch no'ol zjanita' na', bene' ja'aclene' le' txen Jerusalén.

Bosocuaše' Jesúsen'
(Mt. 27:57-61; Lc. 23:50-56; Jn. 19:38-42)

⁴² Žana' goquen žan' bososiņ'e par ža čhe Dios cate' bi de lsens yesone' žin. Na' cate' ba čhxoa gwbiž,

⁴³ to bene' le' José, bene' ciuda Arimatea, beyaxjde' gwyeje' lao Pilaton' na' jaynabe' cuerp čhe Jesúsen'. José goque' to bene' zaque' lao bene' ca' gosenabi'e nación Israel čheton', na' ba zoe' chbeze' batcan' solao nabia' ben' sela' Diosen'.

⁴⁴ Pilaton' bebande' dan' ba gote', na' goxe' xan soldadw ca' cont gwñabde' le' še da' li ba gote'.

⁴⁵ Na' cate' xan soldadw ca' gože' le' le' can' ba goc, Pilaton' bnežjue' latje beyoa' Josén' cuerp čhe' Jesúsen'.

⁴⁶ Nach Josén' gwzi'e to lache' xen, beletje' cuerp čhe Jesúsen' na' bolažen' len. Na' la' jaseło'ote' le' to lo' bloj da' nčhe'ene' le'e yej xen, na' blöle' to yej cho'a blojen' cont bseyjon len.

⁴⁷ Na' María no'ole Magdalan' len María xna' Josén' besele'ede' gan' bosocuaše'nen'.

16

Beban Jesúsen' ladjo bene' guat ca'
(Mt. 28:1-10; Lc. 24:1-12; Jn. 20:1-10)

¹ Cate' gwde ža čhe Diosen', María no'ole Magdalan', María xna' Jacobo, na' Salomé gosezi'e da' čhla' zix cont šjaselo'en cuerp čhe Jesúsen'.

² Na' šezildao' ža dmigw besežine' cho'a ban', cate' za' čhla' gwbiž.

³ Na' za' yesežine' gose' lježe':

—¿Noxe ca'a yej xen dan' da' cho'a blojen'?

⁴ Perw cate' besežine' na' gosen'e, besele'ede' yej xen dan' da' cho'a blojen' ba bga'an.

⁵ Nach goso'e lo' blojen', na' besele'ede' chi' to bene' xcuide' šla'a licha, nyaze' to lache' toŋ da' šiš. Na' besežebe'.

⁶ Na' bena' gože'ne':

—Bitw žeble. Cheyiljwle Jesús bene' Nazaret ben' bosode'e le'e yag cruz. Perw ba bebane'; notoch no nla' nga. Le na' gan' gosexo'e'ne'.

⁷ Le šjaya'ac na' le ye' bene' ca' gosaque' le' txen, na' len Pedron', gwyobech Jesús'en' yežine' Galilea clcl ca' legaque'. Na' Galilean' na' yesele'ede'ne' can' gwnacze'.

⁸ Nach no'ol ca' chosyoxonjsese' besyeya'aque' cho'a blojen', le chesexiztite' besežebe'. Na' notno gose'e ca', le besexožde'.

Jesús'en' blo'elagüe' María no'ole Magdala
(Jn. 20:11-18)

⁹ Beyož heban Jesús'en' ladjo bene' guat ca' šezilda' ža dmiwg, Jesús'en' blo'elagüe' da' nechw len María no'ole Magdalan', ben' bebeje' gaž da' xigüe' yo'o nyaze'.

¹⁰ Na' María nga jatixjue'ede' bene' ca' ba gosenita' len le'. Zjanita'yaše' na' chesebeže' cate' bžine'.

¹¹ Na' cate' gosende' be'e diža' mban Jesús'en' na' gosende' be'e dižan' can' ba ble'ede'ne', bi gosejle'e.

Jesús'en' blo'elagüe' len chop bene' ca' gosaque' le' txen
(Lc. 24:13-35)

¹² Beyož goc ca', chop bene' ca' gosaque' Jesús'en' txen zjangüe'e nez yix'e cate' Jesús'en' blo'elagüe' legaque', na' nža'le besele'ede'ne'.

¹³ Lecze legaque' ja'aque' jasedixjue'ede' bene' yezica'chle, perw neca gosejle'e chegaque'.

Da' bgon Jesús'en' yeson bene' ca' chsejnilaže'ne'
(Mt. 28:16-20; Lc. 24:36-49; Jn. 20:19-23)

¹⁴ Gwdena' bene' šnej ca' gwlej Jesús'en' cont zjanaque' le' txen zjachi'e cho'a mes chesagüe' cate' blo'elagüe' len legaque'. Na' gwdile' legaque' da' bi chsejnilaže' le' do yichj do laže' na' zjanaque' laždao' čačh, le bi gosejle'e che bene' ca' besele'ede'ne' ba bebane' ladjo bene' guat ca'.

¹⁵ Na' gože' legaque':

—Le šja'ac doxen yežlio, na' le šjatixjue'e diža' güen chia' len yogo'lol bene'.

¹⁶ Bene' ca' yesejnilaže' neda' na' yesezoe' nis, gata' yela' mban chegaque' toli tocan'e. Perw bene' bi chsejnilaže' neda', yesebiaye'e.

¹⁷ Na' bene' ca' chsejnilaže' neda', yesyega'anlene' da' qui: Yeso'e la' na' yesyebaje' da' xigüe' yo'o nyaz bene'; yesenie' diža' cobe da' bi zjansede';

¹⁸ na' še yesoxe' no beļ znia, o še yese'eje' da' nac venen, bibi yesacde'; na' lecze yesexo'a taque' yichj bene' chese'e na' yesyeyacde'.

Begüe Jesús'en' yaba
(Lc. 24:50-53)

¹⁹ Beyož bšaljlene' legaque', Xancho Jesús'en' begüe' yaba, na' gwchi'e cuit Diosen' šla'a licha.

²⁰ Na' bene' ca' zjanaque' le' txen besežaše' na' jasedixjue'ede' diža' güen che' doxen. Na' cuin Xancho Jesús'en' goclene' legaque' gosone' yela' guac cont gosejle' bene' le nac da' li dižan' goso'en. Da' na'zen' chzoja'.

DIŽA' GÜEN DAN' BZOJ SAN LUCAS

Da' nga bzoj Lucasen' par Teófilo

¹⁻⁴ Teófilo, naco' bene' zaca' na' chzoja' le' diža' quinga cont neздо' da' li ca nac da' ba bosozejni'ide' le' che da' ca' ba gosac. Bene' zan bač bosozoje' che Jesúsen', goso'e diža' che da' ca' bene', con can' bosozejni'i bene' ca' neto', bene' ca' besele'ede' can' gwzolaon cate' goljte Jesúsen'. Na' bene' ca' gosende' na' besele'ede' can' goquen' bososed bosolo'ede' bene' yoble diža' güen che'. Na' neda' cate' beyož gwnabyoža' can' goquen' na' gwyazlaža' gwzojan' tcho'a cont neздо', Teófilo.

To angl gwdixjue'ede' galje Juan

⁵ Ca tiemp caten' gwnabia' rey Herodes distritw gana' nzi' Judea, na' gwzoa to bxož che bene' Israel ca' bene' le Zacarías. Bene' žin len to xonj bxož bene' zjale Abías. Na' no'ol che Zacarías le Elisabet, na' naque' diaža' che da' bxož Aarón.

⁶ Na' Zacarías len Elisabeten' zja'accze' to licha len Diosen' na' gosonyane' yogo'loł da' non Xancho Diosen' mandadw da'na' nyoj le'e ley che' na'.

⁷ Na' nono xi'ingaque' nita' neche Elisabeten' naque' no'ol güiž. Na' chopte' ba zjanaque' bene' gole.

⁸ Na' goquen' beyala' Zacaríasen' len bene' lježe' ca' bene' ca' zjanaque' bxož cont yesone' da'na' besyeyale' yesone' yesonxene' Dios.

⁹ Na' bxož ca' yogo' ni'a chesone' rifa cont chata'bia' noe' choj gwzeye' yal lo' yodao' blao chegaque' gan' chesonxene' Xancho Diosen'. Na' bchoj Zacaríasen' caten' gosone' rifan' bzeye' yala' lo' yodao'na'.

¹⁰ Na' šlac bzeye' yala' gosonita' yogo'loł bene' zan ca' chyo'ole bosol güiže' Diosen'.

¹¹ Na' to angl bene' gwseła' Xancho Dios blo'elagüe' Zacaríasen', na' gwzecha angla' cuít mesa' lichale gan' chosozeye' yala'.

¹² Na' cate' ble'e Zacaríasen' anglen', benit bečhoł lo' yichjlažda'ogüe' na' bžebchgüe'.

¹³ Perw anglen' gože' le':

—Bitw žebo' Zacarías. Diosa' ba bzenague' che dan' gwnabdo'ne', na' no'ol čio' Elisabeten' sane' to xi'ino', na' gwsí'obe' Juan.

¹⁴ Na' so' mbalaz na' yebedo' na' lecze bene' zan yesyebede' še ba goljbe'.

¹⁵ Gacbe' to bene' blao lao Diosen'. Bitw ye'ejbe' vino ne bichle da' chože bene'. Na' cate' za' galjtebe' ba yo'o Spiritw che Diosa' lo' yichjlažda'obe' nabi'an lebe'.

¹⁶ Na' gombe' cont zan bene' Israel ca' yosoša' yichjlažda'ogüe' na' yesonxene' Xancho Diosen' can' cheyala' yesonxene' le'.

¹⁷ Na' cuialaobe' lao Xančon', na' soa Spiritw che Diosen' len lebe' can' gwzoan len da' Elíasen', na' lecz ca' yela' guac che Diosen'. Na' bene' ca' bi nita' binlo len xi'ine' ca', gombe' ga yesenite' binlo len legacbe', na' bene' güedenag ca' gombe' yosozenague' che Diosen'. Gombe' cont yesenita' bene' yesonxene' Xančon' cate' yide'.

¹⁸ Nach Zacaríasen' gože' anglen':

—¿Nac gac nežda' da' nga? Neda' naca' bene' gole na' lecz ca' no'ol čian' ba naque' bene' gole.

19 Nach anglen' gože' le':

—Neda' naca' angl Gabriel bene' za' yaba. Zoa' len Diosen' na' chonx-ena'ne', na' gwsele' neda' zedetixjue'eda' le' diža' güen qui.

20 Le' bi gac nio' na'a, le bi chejli'o xtiža' nga. Cate' žin ža gac da' nga, cana' gac yenio' da' yoble. Na' da' li gwžin ža gac can' gwnia'.

21 Na' bene' ca' že' chy'ole chesebeze' Zacariasen' besyebande' da' gwžede' lo' yodao' blaona'.

22 Na' cate' bechoj Zacariasen', bene' señw len ne'e da' bi goc nie'. Nach gosache'e bene' ca' ble'ebande' lo' yodao'na'.

23 Na' cate' beyož bdelaze' dan' bene' žin lo' yodao'na', beyej liže'.

24 Gwde na' no'ol che' Elisabeten' gwchendao' bidaon' lo' le'e. Na' gayo' bio' gwzoaze'.

25 Na' gwne':

—Güenchguan' ba ben Xancho Diosen' len neda'. Ba bžin ža beži'ilaže'de' neda', cont bich yeson beñacha' xbab bibi zaca'.

To angl gwdixjue'ede' galje Jesucriston'

26 Goc xop bio' noa' Elisabeten' bidaon', Diosen' besele' anglen' ben' le Gabriel, gwyeje' to yež da'na' nzi' Nazaret gan' mbane distritw Galilea.

27 Gwsele' le' gan' zoa to no'ol güego' le' María. Na' Marian' napši'ichgua cuine'. Na' to bene' le' José bach naquen gwšagna'lene' le' cont gaque' xo'ole'. Na' Joséna' naque' diaža che rey David ben' gwzoa cani'.

28 Na' bžin to angl bene' za' yaban' gwyo'e gan' zoa María na' gože'ne':

—Patiox. Xancho Diosen' nži'ide' le' na' zoe' len le'. Na' gone' cont so' mbalazch ca yogo'lol no'ole yezica'chle.

29 Cate' ble'e Marian' anglen', bebanchgüede' ca nac dižan' dan' gože' le'. Na' bene' xbab bi zejen dan' gwne' caten' bguape'ne' tiox.

30 Na' anglen' gože'ne':

—Bitw žebo' María, Diosen' nži'ide' le'.

31 Na'a gua' xi'ino' to bi' byo dao', na' sano'be', na' go'o labe' Jesús.

32 Na' Jesúsen' gaque' to bene' blao na' benachen' yososi'ene' Xi'in Dios, Dios ben' naque' la'zelagüe bene' blao. Na' Xancho Diosen' gone' cont nabi'e nación Israel chele ca gwnabia' da' xozxta'ogüe' rey David.

33 Na' le' nabi'e nación Israelen' toli tocané, na' gwbat te yela' gwnabia' chen'.

34 Nach gož Marian' angla':

—¿Nacxe gac sana' bdaon'? Bitw nžaga' bene' byo.

35 Nach gož angla' le':

—Spiritw che Diosen' yiden gana' zo'na', na' yela' guac che Diosa' soan len le', Dios ben' naque' la'zelagüe bene' blao. Da'nán' bidaon' za' galje gacbe' laždao' xilaže' na' yososi'ebe' Xi'in Dios.

36 Na' bene' xn'a'o Elisabeten' lecze bach gwchendao' bidao' lo' le'e la'czla' ba naque' bene' gole. Ba goc xop bio' no'e to bi' byo dao', len gosene' naque' no'ole güiž.

37 Bibi de da' nacho da' chi gac gon Dios.

38 Nach gož Marian' anglen':

—Ni zoa' naca' xmos Xana' Diosen'. Gacšca chia' con can' ba gwnao'.

Nach beza' anglen' gan' zoa Marian'.

Marian' jane'e Elisabeten'

39 Gwde na' la' gwyejte Marian' to yež da' žia to lo ya'a gan' mbane distritw Judean',

40 na' bžine' liž Zacaríasen'. Na' gwyo'e bguape' Elisabeten' tiox.

41 Na' cate' Elisabeten' bende' choł güiž Marían' le', nach gocbe'ede' chxite' chžia bidaon' lo' le'e. Na' Spiritw che Diosen' gwnabian' yichjlaždao' Elisabeten'

42 na' gwne' zižje da' bebecgüede', gože' Marían':

—Zo' mbalazch ca yogo'loł no'ole yezica'chle. Na' ľecze bidaon' no'ona' soabe' mbalaz.

43 Chebanda' le' naco' xna' Xana' zedena'o neda'.

44 Con cate' benda' chguapo' neda' tiox, bidao' chian' ľecze bebebe', bxite' bžiabe' lo' lian'.

45 Zo' mbalaz da' gwyejli'o gac can' gwna xtiža' Diosen' dan' gož anglen' le'.

46 Nach Marían' gwne':

Chonxena' Xancho Diosen' do yichj do laža'.

47 Na' do yichj do laža' chebecgüeda' Dios ben' bebeje' neda' lo da' malen'.

48 Ba beyaše'de' neda' naca' xmose' la'czla' bibi zaca'.

Na' na'a bene' yesenita' toli tocanę yesene' neda' zoa' mbalaz.

49 Dios ben' chac chon da' tono gac gon ba bene' da' güen juisyw len neda'.

Toz len' naque' bene' laždao' xilaže' juisyw.

50 Na' note'teze bene' chesape' le' bala'an do yichj do laže', Diosen' cheži'ilaže'de' ľegaque'.

Cheži'ilaže'de' bene' že' na'a na' yeži'ilaže'de' xi'in diaža čhegaque' ca'.

51 Bač blo'e Diosen' beňačen' yela' guac čhe'.

Na' ba bolague' bene' ya'laže' ca'.

52 Ba bene' cont bene' gwnabia' ca' bich yesenabi'e.

Na' bene' bi naque' bene' blao, Diosen' ba bnežjue' latje yesaque' bene' blao.

53 Na' bene' chesedon, Diosen' ba bnežjue' ľegaque' da' zan da' güen.

Na' bene' gwni'a ca', ba bose'e ľegaque', bibi bonežjue' ľegaque'.

54 Nach ba goclene' chio' bene' Israel naccho ca' xmose'.

Ba blo'ede' bitw ganlaže' chio', san ba cheyaše' cheži'ilaže'de' chio'.

55 Ba bene' can' gože' da' Abraham len yezica'chle da' xozxta'ocho.

Na' soacze' yeyaše' yeži'ilaže'de' xi'in diaža čhe da' Abrahanna' toli tocanę.

56 Na' cate' ba goc šone bio' zoa Marían' len Elisabeten', nach Marían' beyej liže'.

Golje Juan bene' bzo'e' bene' nis

57 Na' cate' bžin ža san Elisabeten', gwzane' bi' byo dao'.

58 Na' cate' goseneze bene' gualiž čhegaquen' na' diaža čhegaquen' Xancho Diosen' ba beyaše' beži'ilaže'de' Elisabeten', nach besyebecgüede' len le'.

59 Na' goc xono' ža goljbe' na' jasezoe'be' seřw dan' že' circunciśiön can' gosone' len yogo' bi' byo dao' bi' gosaljbe' lo diaža čhe da' Abraham. Na' gosaclaže' si' labe' Zacarías can' le xaben',

60 perw xna'be' gwne':

—Bi gac. Cheyala' si'be' Juan.

61 Na' ľegaque' gose'ene':

—Notno diaža čhele nita' bene' zjale ca', neca xozxta'ole.

62 Na' gosone' seřw gosenabde' xaben' nac che'nde' si' labe'.

63 Nach bene' seřw gwnabe' to yagla' dao' da' bzoje': "Si' labe' Juan." Na' yogüe' besyebande'.

64 Beyož bzoje' da'na', la' gocte bene', nach la' gwzolaote be'e diža' benxene' Diosen'.

⁶⁵ Na' besyebane bene' gualiz̄ chegaquen'. Na' xtiža'gaquen' gos gwłaljen doxen yež ca' zjachi' lo ya'ana' gan' mbane distritw Judean'.

⁶⁶ Na' yogo'loł bene' gosende' dižan' gosone' xbab lo' yichjlažda'ogüe' che da' ca', na' gosene':

—¿Bixe gon bdao'na'?

Gosene' ca' le gosenezde' zoacze Xancho Diosen' len lebe'.

Diža' da' be' Zacarías

⁶⁷ Nach gwnabia' Spiritw che Diosen' yichjlaždao' Zacaríasen', nach be'e xtiža' Diosen', gwne':

⁶⁸ Chonxena' Xancho Dios ben' chonxen chio' bene' Israel.

Cheyaše' cheži'ilaže'de' chio' naccho nación che' na' ba chsele' bene' yebej chio' lo da' malen'.

⁶⁹ Na' bena' bač za' cont yebej chio' lo da' malen', naque' bene' gwnabia' gual, na' naque' xi'in diaža che da' rey David ben' goc xmos Diosen'.

⁷⁰ Chac can' gwna Diosen' len cho'a da' bene' ca' gwsele' cani', bene' gosac lo ne'e goso'e xtižen'.

⁷¹ Ba za' ben' gwne' yosle' chio' lo na' yogo' bene' chesegue'e chio'.

⁷² Chac can' gože' da' xozxta'ocho ca' yeyaše' yeži'ilaže'de' legaue'.

Bi chanlaže', san chone' yogo' da' ba gwne' gone' gaclene' chio'.

⁷³ Diosen' chone' can' gwlo'e da' bałi lao da' xozxta'ocho da' Abraham gože'ne' gacze can' gwnen'.

⁷⁴⁻⁷⁵ Gwne' yosle' chio' lo na' bene' chesegue'ede' chio'.

Nach gac lažda'ochon' xilaže' lao le' na' gonxenchone' sin cbi žebcho,

na' šejcho licha gonxenchone' šlac de yela' mban checho.

⁷⁶ Nach Zacaríasen' gože' bdao' chen':

Bdao' chia', beñač yesene' chio' naco' bene' choe' xtiža' Dios, Dios ben' naque' la'zelagüe bene' blaō.

Yesene' ca' da' cuialaguo' lao Xančon' na' go'o xtižen' cont nita' bene' yosozenague' che' cate' yide'.

⁷⁷ Gwsed gwlo'edo' neto' can' chaclaže' Diosa' yebeje' chio' naccho nación che' lo da' mala' na' yezi'xene' xtoł'a'chon'.

⁷⁸ Diosen' cheyaše' cheži'ilaže'de' chio',

le len' gwlo'e be'ni' che' lo' laždao' chio' beñač.

⁷⁹ Cue'e be'ni' che' lo' yichjlaždao' chio' naccho ca' bene' chaš ga nac čhoł, chio' chžebcho gatcho.

Na' gwzejni'ide' chio' beñač naquen' soa cuzcho yežlio nga.

Can' be' Zacaríasen' xtiža' Diosen'.

⁸⁰ Na' Juanna' zej chcha'obe' zejte chac yichjlažda'oben' can' chazlaže' Diosen'. Na' jasoe' latje daš. Na'ate zoe' cate' gwzologüe' gwduxjue'ede' xtiža' Diosen' len bene' Israel ca'.

2

Caten' golje Jesúsen' (Mt. 1:18-25)

¹ Na' lecz šlac gwnabia' rey César Augusto, bene' mandadw gwyas to censo cont nezde' bał bene' že' to to yež da' zjachi' doxen yežlio gan' chnabi'e.

² Na' lecz cana' Cirenio naque' gobernador gan' nzi' Siria. Na' naquen da' nechw bchele' bał bene' že' to to yež.

³ Na' yogo'loł bene' jaya'aque' lažgaque' jasyede cuent cuine' cont bosochele' le'.

4 Na' José naque' diaža che da' rey David. Da'nan' beze'e Nazaret gan' mbane distritw Galilea, beyeje' yež Belén dan' nac laž da' rey David. Na' chi' yež Belén gan' mbane distritw Judea.

5 Beyeje' jayde cuine' cuent na' zenche'e no'ol che' Marían' perw bina' yeseca'a lježe'. Na' Marían' ba no'e bdao'.

6 Na' šlac nite' Belén bžin ža sane'.

7 Na' gwxane' bi' nechw, to bi' byo dao', na' btobe'be' lache' na' gwlo'ebe' ga chesagw beyixe', da' bich bi latje yo'o mesónna' par legaque'.

Angl ca' bosozende' bene' güeyoe xila' ba golje Jesúsen'

8 Na' že'na' yixe' che yež Belén na'ate že' bene' güeyoe xila' chesape' xila' čhen'.

9 Na' to angl bene' gwsela' Xancho Diosen' bžine' gan' nita' bene' güeyoe xila' ca', na' be'ni' che Xancho Diosa' gwyečhen bsenin' gan' nite'na'. Na' bešežbčgüe'.

10 Na' gož angla' legaque':

—Bitw žeble. Na'a chixjue'eda' le'e to diža' güen da' yesebečgüe yogo'lol bene'.

11 Na'aža lo yež che rey David ba golje bena' gac yebeje' benačhen' lo da' mal. Naque' Cristo, na' zeje diža' naque' ben' gwsela' Dios cont nabi'e, na' lecze naque' Xancho.

12 Cont yeželele bdao'na', quinga naquen: bdao'na' ba ntobe'be' lache' na' debe' gan' chesagw beyixe' ca'.

13 Beyož gwna angla' ca' la' besežinte bene' zan angl gan' zoa angl nechua', za'aque' gan' zoa Diosen'. Na' chesonxene' Diosen' chesene':

14 iChonxencho Diosa' ben' zoa yaba,

na' lo yežlio yesezoa yesebez benačhen' binlo, con bena' cheson can' chazlaže' Diosen'.

15 Na' cate' besyeya'ac angl ca' zjaya'aque' yaba, na' bene' güeyoe xila' ca' gose' lježe':

—Yeyejcho Belén šjajna'cho dan' ba goc can' nac dan' gwsela' Xančhon' angl quinga bedesedixjue'ede' chio'.

16 Na' beseya'aces bene' güeyoe xila' ca' jaya'aque' Belén. Na' besyeželde' Marían' len Josén' na' len bdao'na'. Na' bdao'na' debe' gan' chesagw beyixe' ca'.

17 Beyož besele'ede' can' ba goquen, na' goso'e diža' che bdao'na' len bene' ca' yezica'chle ca nac dan' gož anglen' legaque'.

18 Na' yogo'lol bene' ca' gosende' diža' dan' gosoe' bene' güeyoe xila' ca' besyebande'.

19 Na' lecze Marían' gwlo'o yichje' yogo'lol diža' dan' gosoe' bene' güeyoe xila' ca' na' bene' xbab lo' yichjlažda'ogüe' bi zejen.

20 Nach besyeya'ac bene' güeyoe xila' ca' chesonxene' Diosen'. Na' cheso'e diža' nacchgua Diosen' bene' güen da' ba goc yogo'lol da' ba gosende' na' besele'ede' dan' gož anglen' legaque'.

Diaža che Jesúsen' jasesane'be' lo'yodao' blaona'

21 Cate' goc xono' ža golje bdao'na' jasezoe'be' señw da'na' nzi' circuncisión, na' bososi'e labe' Jesús, can' ben anglen' mandadw cate' za' gua' Marían' lebe'.

22 Na' cate' gwde ba beyac Marían' xilaže' len bdao'na' con can' bzoj da' Moisésen', nach ja'aque' ciuda Jerusalén goselene'be' jasesane'be' lao Xancho Diosen'.

²³ Gosone' can' nyoj ley che' dan' ža: "Yogo' bi' byo dao' bi' nechw cheyała' gache' lo' na' Dios."

²⁴ Nach gosonxene' Diosen', gosone' can' ža ley che Xancho Dios dan' žan: "Cheyała' gotle chop ngolbex o chope plomxtil."

²⁵ Na' Jerusalénna' gwzoa to bene' le' Simeón. Benan' gwyeycze' bene' da' güen lao Diosen' na' benxene' le', na' gwleze' batcan' yid Cristo ben' sela' Xancho Diosen' cont yebeje' bene' Israel ca' lo' da' mal. Na' Spiritw che Diosen' gwyo'on lo' yichjlaždao' Simeón,

²⁶ na' bzejni'in le' bi' gate' še bina' le'ede' Criston'.

²⁷ Na' Spiriton' benen cont gwyeye' yodao' blaona', na' zoe' yodao'na' cate' besežin xaxna' Jesúsén' zjano'ebe' cont yesone' len lebe' can' non ley chegaquen' mandadw.

²⁸ Nach Simeónna' gwlene'be' nach benxene' Diosen', gože'ne':

²⁹ Xana' Dios, bačh goc can' gwnaon'.

Beñ latje yeyeda' binlo' gana' zo'na', neda' naca' xmoso'.

³⁰ Ba ble'eda' bena' zedyelej neto' lo' da' mal.

³¹ Naque' bene' gwnalažo' gwseło' neče yogo'lol benačh.

³² Na' cue'e be'ni' che' lo' yichjlaždao' bene' cbi zjanaque' bene' Israel. Na' gaque' la'zelagüe bene' zaca' len neto' bene' Israel.

³³ Nach xaben' len xna'ben' besyebande' ca diža' chebe' dan' be' Simeónna'.

³⁴ Na' Simeónna' gwñabde' Diosen' cont gac güen chegaque'. Na' gože' Marian':

—Bene' Israel ca' yesejnilaže' xi'ino' nga yesenite' mbalaz, na' bene' Israel ca' cbi yesejnilaže'ne' bi' yesenite' mbalaz. Zedelo'ede' benačhen' can' chaclaže' Diosen' goncho, perw zane' bi' yesejle'e che'.

³⁵ Nach Diosen' gwlo'e non' chzenag che' na' non' cbi chzenag. Na' cacze chac ga chaz cwšiyw gac lo' yichjlažda'oguoñ' catequen' žaglaguo' len da' gac che'.

³⁶ Na' lecz yodao' blaona' gwzoa to no'ole le Ana, na' cho'e xtiža' Diosen'. Naque' xi'in da' ben' le' Fanuel na' naque' diaža che da' Aser. Bšagne'e cate' naque' no'ol güego', perw na' gaž izga gwzoalene' bene' che' na' gote', na' bga'ane' güezebe. Na' Anan' ba naque' to bene' gole,

³⁷ taplalj tap izde'. Bicze chechoje' yodao' blaona'. Leca chonxene' Xancho Diosen' do ža do yel, gwzoatie' tgüejje bene' gwbas na' con gwzoachgüe' bol güiže' Diosen'.

³⁸ Na' goquen' gwbiga' Anan' gan' zoa Josén' len Marian' lo' yodao'na' na' be'e yela' choxclen che Diosen' bačh gwsele' Jesúsén'. Na' be'e diža' che Jesúsén' len yogo' bene' ca' že' Jerusalén ben' chesebeze' batca' sela' Diosen' ben' yebeje' legaque' lo' da' malen'.

Jaya'aque' Nazaret

³⁹ Nach Josén' len Marian' cate' beyož gosone' yogo'lol dan' non ley che Xancho Diosen' mandadw yesone', jaya'ac lažgaque' Nazaret gan' mbane distritw Galilea.

⁴⁰ Na' Jesúsén' zej chcha'ogüe' na' zej chchachlaže'. Na' ca zej chcha'ogüe' na' zej chejni'ichde', na' Diosen' nži'ilaže'de'ne'.

Can' ben Jesúsén' chašil yodao' blaona'

⁴¹⁻⁴² Na' xaxne'e ca' yogüiz chja'aque' lni da' čala' Jerusalén chjaseze'ede' can' goc cate' Diosen' betue' bi' nechw che yogo' bene' Egipto na' bosle' bene' Israel. Šižiw ize Jesúsén' cate' goseče' xaxne'en le' ja'aque' lnin' Jerusalén.

⁴³ Na' cate' gwde l̄nina' besyeya'aque', perw Jesúsen' bega'ane' ciuda Jerusalén. Na' x̄ne'ena' len Joséna' bi gosacbe'ede'.

⁴⁴ Con gosacde' ba zjayde' txen len bene' ca' n̄zagaque'. Na' t̄ža nez ba gosa'aque' cate' gwzola' chesyeyiljue'ne' ladjo diaža c̄hegaque' na' no bene' x̄migüe'.

⁴⁵ perw bitw besyeželde' le'. Nach besyebi'e jaya'aque' Jerusalénna' da' yoble cont šjasyediljue' le'.

⁴⁶ Na' beyon žach besyeželde' Jesúsen' chašil yodao' blaona', chi'e gachol bene' ca' chososed chosolo'ede' dan' bzoj da' Moisés. Jesúsen' chzenague' x̄tiža'gaquen' na' zanen ch̄nabde' legaque'.

⁴⁷ Na' yogo'lol bene' ca' chosozenague' x̄tiža' Diosen' da' cho'e chesyebande' can' chejni'ide' na' can' choži'e x̄tiža' bene' ca' zjansed dan' bzoj da' Moisés.

⁴⁸ Na' cate' besele'e x̄axne'en le', besyebande', na' x̄ne'en gože' le':

—Xi'indagua', ž̄bixčhen' chondo' neto' ca'? X̄ao' nga na' neda' ba gwdato' beyiljwto' le', na' da' juisyw ba ble'eto'.

⁴⁹ Jesúsen' gože' legaque':

—ž̄Bičhen' beyiljwle neda'? ž̄Bi nezele liž X̄a' ngan' cheyala' soa'?

⁵⁰ Perw x̄axne'e bitw gosejni'ide' bi zejen dan' gože' legaque'.

⁵¹ Na' beyeje' yež Nazaret len x̄axne'e bzenague' c̄hegaque'. Na' gwlec yichj x̄ne'ena' yogo'lol dan' goca'.

⁵² Na' ca' chac zej chejni'iche Jesúsen' na' zej gwcha'oche', na' Diosen' len benača' zej chesazlaže'che' le'.

3

Juan gw̄dixjue'ede' diža' güen c̄he Diosa'

(Mt. 3:1-12; Mr. 1:1-8; Jn. 1:19-28)

¹ Cate' lo iz šino' dan' ch̄nabia' César Tiberio doxen ga mbane nación Roma, izna' goc Poncio Pilato gobernador che distritw Judea, na' goc Herodes gobernador c̄he distritw Galilea. Na' bene' biše' Herodesen', ben' le Felipe, goque' gobernador c̄he distritw Itorea na' c̄he distritw Traconite. Na' goc Lisanias gobernador c̄he distritw Abilinia.

² Nach leceze izna' Anás na' Caifás gosacche' b̄xoz blao c̄he bene' Israel. Izna' Juan ben' naque' xi'ın Zacarias gwzoe' to latje daš. Nach Diosen' be'lene' Juanna' diža'.

³ Na' Juanna' gwyeje' yogo'lol yež dan' nita' gala'ze yegw Jordán, jatixjue'ede' yogo'lol bene' cheyala' yesyetinjide' x̄tola'gaque' na' yesezoe' nis cont nitlao x̄tola'gaquen'.

⁴ Juanna' bene' dan' bzoj da' Isaías ben' be' x̄tiža' Diosen' cani'te, gana' žan: Bena' ch̄ne' zižje latje dašen', že':

“Le gonšagüe' yichjlažda'olen' cont soale gwzenagle c̄he X̄anchon' cate' yide', le' cuejyichj da' malen' chonle cont yichjlažda'olen' gaquen ca to nez da' ba gosonšagüe'.

⁵ Gwžin ža cate' yogo' ya'a yegw ca' yesyeyaquen laše', na' no nez da' nacchgua b̄xoca' yesyeyaquen liča, na' no nez da' n̄žaš nche'ene' yesyeyaquen ba'a.

⁶ Na' yogo'lol bene' yesacbe'ede' can' chaclaže' Diosen' yebeje' benačhen' lo da' mal.”

⁷ Na' bene' zan ja'aque' gan' gwzoa Juanna' cont gwzoe'ne' nis. Na' Juanna' gože' legaque':

—Le'e nacchgualē bene' zgot na' bene' gwxiye'. ¿Chaquele guac yelale lao castigw dan' seła' Diosen' caten' gone' yela' justis che benachen'?

⁸ Še da' li ba betinjele xtoła'le, cheyala' gonle da' nac güen cont yesacbe' bene' ba boša' yichjlažda'olen'. Na' bitw gonle xbab gaquele Diosen' bitw gone' le'e castigw che xtoła'len' lagüe da' nacle xi'in diaža che da' Abrahanna'. Bitw nacho leca chyažje Diosen' le'e. Guac gone' cont yej quinga yesyeyaquen xi'in diaža che da' Abrahanna'.

⁹ Ca nac le'e, še bi chonle can' chazlaže' Diosen', zaca'leble ca to yag frut da' bibi chbia. Na' yogo'te yag frut da' bibi chbia, chog xan yaga' len na' gwzeyen'.

¹⁰ Nach bene' ca' chosozenag xtize'na' gosenabde' Juanna', gose'ene':

—¿Bica' da' cheyala' gonto'?

¹¹ Na' gože' legaque':

—Ben' nape' chope camis cheyala' gwnežjue' ton che bene' bi de che'. Na' lece ca' che ben' de da' gagüe', cheyala' gwnežjue' che ben' bi de gagüe'.

¹² Na' cate' to chope bene' güechixjw ca' jasebigue' cont gwzoa Juanna' legaque' nis, na' gose'ene':

—Maestrw, ¿bica' da' cheyala' gonto'?

¹³ Na' gože' legaque':

—Bitw gwchixjwchle ca da' cheyala' yeseyixjue'.

¹⁴ Na' to chope bene' ca' zjanac soldadw lece gosenabde' le', gose'ene':

—¿Chix neto'? ¿Bica'ch da' cheyala' gonto'?

Na' Juanna' gože' legaque':

—Bitw ca'ale da' de che bene', na' neca gonlaže'le len da' yosbague'le bene' cont ca'ale xmechwgaque'. Le gon banez len laxjwle.

¹⁵ Na' bene' ca' gosezoe' lez yid Cristo ben' naquen seła' Diosen' yedenabi'e, na' gosacde' še Juanna' naque' Cristo.

¹⁶ Na' Juanna' goche'ede' xbab chegaquen' na' gože' yogo'lole':

—Neda' da' li chzoa' le'e nis, perw za' yid bena' gon cont soa Spiritw che Diosen' lo' yichjlažda'olen' nabian' le'e. Na' Spiriton' naquen ca yi', na' gwxi gwloan yichjlažda'ole. Bena' za' za' zaca'che' ca neda', na' da' nacchgüe' bene' zaca' bitw zaca' gona' xmandadoe' lechja' no xele'.

¹⁷ Benan' gone' len benachen' can' choncho cate' chdecho trigon' lo' rner. Chtobcho trigon' chgo'ošagüe'chon na' chzeycho yix beben'. Na' bene' chesejnilaže' Diosen', yotobe' legaque' cont šjasyenite' txen len le', na' bene' bi chesejnilaže' le', sele' legaque' lo' yi' gabilen' dan' cbi cheyol chenit.

¹⁸ Da' zanch da' gwna Juanna' gwduxjue'ede' legaque' diža' güen, na' gwneyoede' legaque' yesejle'en.

¹⁹ Nach Juanna' gwdi'e' gobernador Herodes ca nac da' mal da' bene' beque'e Herodias ca xo'ole', le Herodiasna' naque' xo'ole Felipe bene' biše' Herodesen'. Na' Juanna' lece be'e diža' yogo'lol da' mal dan' ba ben Herodes.

²⁰ Na' Herodesen', gualaz da' gwzenague' che Juanna', benche' yeto da' mal, gwlo'e Juanna' ližya.

Can' goc caten' gwzoa Jesúsen' nis

(Mt. 3:13-17; Mr. 1:9-11)

²¹ Nach šlac chzoa Juanna' bene' nis, bene' zan ja'ac cont bzoe' legaque' nis. Na' len Jesúsen' gwzoe' nis. Na' lo' hora' Jesúsen' bol' güiže' Diosen' na' la' byaljwte yaba gan' zoa Diosen'.

²² Na' betj Spiritw che Diosen' bžinen gwzoan len le', na' ca hora' Spiriton' naquen ca to ngolbex. Na' gosende' gwne' Dios ben' zoa yaban', gwne':

—Le' naco' Xi'ina' bene' chacchgüeda', na' chebe chezaquelaže'chgüeda' chio'.

Diaža che Jesúsén'
(Mt. 1:1-17)

²³Na' ca do šichoa ize Jesúsén' cate' gwzolao bene' yogo'lo' da' zedeyene'. Na' bene' ca' gwnita' na' gosone' xbab še naque' xi'in Joséna'. Josén' naque' xi'in Elí,

²⁴na' Elí naque' xi'in Matat, na' Matata' naque' xi'in Leví, na' Levína' naque' xi'in Melqui, na' Melquin' naque' xi'in Jana, na' Janan' naque' xi'in yeto ben' le' José.

²⁵Na' Joséna' naque' xi'in Matatías, na' Matatíasén' naque' xi'in Amós, na' Amósen' naque' xi'in Nahum, na' Nahunna' naque' xi'in Esli. Na' Eslin' naque' xi'in Nagai,

²⁶na' Nagain' naque' xi'in Maat, na' Maata' naque' xi'in Matatías, na' Matatíasén' naque' xi'in Semei, na' Semein' naque' xi'in José, na' Josén' naque' xi'in Judá.

²⁷Na' Judán' naque' xi'in Joana, na' Joanan' naque' xi'in Resa, na' Resan' naque' xi'in Zorobabel, na' Zorobabelen' naque' xi'in Salatiel, na' Salatielen' naque' xi'in Neri,

²⁸na' Nerin' naque' xi'in Melqui, na' Melquin' naque' xi'in Adi, na' Adin' naque' xi'in Cosam, na' Cosanna' naque' xi'in Elmodam, na' Elmodanna' naque' xi'in Er.

²⁹Na' Era' naque' xi'in Josué, na' Josuéén' naque' xi'in Eliezer, na' Eliezeren' naque' xi'in Jorim, na' Jorinna' naque' xi'in Matat.

³⁰Na' Mataten' naque' xi'in Leví, na' Levín' naque' xi'in Simeón, na' Simeóna' naque' xi'in Judá, na' Judán' naque' xi'in José, na' Josén' naque' xi'in Jonán, na' Jonánna' naque' xi'in Eliaquim.

³¹Na' Eliaquinna' naque' xi'in Melea, na' Melean' naque' xi'in Mainán, na' Mainánna' naque' xi'in Matata, na' Matatan' naque' xi'in Natán.

³²Na' Natánna' naque' xi'in David, na' Davida' naque' xi'in Isai, na' Isain' naque' xi'in Obed, na' Obeda' naque' xi'in Booz, na' Boozen' naque' xi'in Salmón, na' Salmónna' naque' xi'in Naasón.

³³Na' Naasónna' naque' xi'in Aminadab, na' Aminadaba' naque' xi'in Aram, na' Aranna' naque' xi'in Esrom, na' Esronna' naque' xi'in Fares. Na' Faresen' naque' xi'in Judá,

³⁴na' Judán' naque' xi'in Jacob, na' Jacoben' naque' xi'in Isaac, na' Isaaquen' naque' xi'in Abraham, na' Abrahanna' naque' xi'in Taré, na' Tarén' naque' xi'in Nacor.

³⁵Na' Nacoren' naque' xi'in Serug, na' Seruga' naque' xi'in Ragau, na' Ragaun' naque' xi'in Peleg, na' Peleguen' naque' xi'in Heber. Na' Heberen' naque' xi'in Sala,

³⁶na' Salan' naque' xi'in Cainán, na' Cainánna' naque' xi'in Arfaxad, na' Arfaxaden' naque' xi'in Sem, na' Senna' naque' xi'in Noé, na' Noén' naque' xi'in Lamec.

³⁷Na' Lamequen' naque' xi'in Matusalén, na' Matusalénna' naque' xi'in Enoc, na' Enocá' naque' xi'in Jared, na' Jareden' naque' xi'in Mahalaleel. Na' Mahalaleela' naque' xi'in Cainán,

³⁸na' Cainánna' naque' xi'in Enós, na' Enósen' naque' xi'in Set, na' Seta' naque' xi'in Adán, na' Adánna' naque' xi'in Dios.

4

Satanásen' goclažen' co'oyelān' Jesúsen' cont gone' da' mal
(Mt. 4:1-11; Mr. 1:12-13)

¹ Na' Spiritw che Diosen' gwnabian' yichjlaždao' Jesúsen'. Na' Jesúsen' beze'e cho'a yegw Jordán, na' Spiritua' benen cont gwyeje' latje daš.

² Čhoa ža gwzoe' latje dašen' na' lao čhoa žan' bicze bi gwdagüe'. Na' cate' gwde čhoa žan' gwdone'. Na' Satanás dan' chnabia' da' xigüe' ca' goclažen' co'oyelān' le' cont gone' da' mal.

³ Nach gož Satanásen' le':

—Še le' naco' Xi'in Dios, gož yej nga yeyaquen yetextil.

⁴ Na' gož Jesúsen' len:

—Nyojczje Xtiža' Diosa' žan: "Gague yela' guagw na'zen' chyažje chio' benač cont gac bancho, san lecze chyažjecho yogo'loł diža' dan' ža Diosen'."

⁵ Na' gwčhe' Satanásen' le' to lo ya'a sibe na' bedao'nez blo'en le' yogo'loł nación da' zjachi' yežlio.

⁶⁻⁷ Nach gožen le':

—Doxen yela' gwnabia' da' de yežlio nga naquen lo na' cont gwnežjuan' con no che'nda'. Še le' gwzoe' xibo' gonxeno' neda', nach gona' le' yela' gwnabia' che nación ca' zjachi' yežlio nga na' len yela' zaca' yela' xdan che nación ca'.

⁸ Nach Jesúsen' gože' Satanásen':

—Becuas ca'ale Satanás. Nyojczje Xtiža' Diosen' žan: "Cheyala' šejnilaže'cho Xancho Diosen' na' toz le' gonxencho."

⁹ Nach Satanásen' gozche'en le' ciuda Jerusalén. Na' bcuen le' yichjo' yodao' blao gan' nac la'zelagüe sibe, na' gožen le':

—Še len' naco' dogualje Xi'in Dios, nga boslažo' cuino',

¹⁰ le nyojczje Xtiža' Diosen', žan:

Sela' Diosen' bene' ca' zjanac angl che' yesaclene' le' na' yesape' le',

¹¹ yesože' le' cont bi čego' no yej.

¹² Nach Jesúsen' gožen':

—Lecz ca' nyoj Xtiža' Diosen' žan: "Bitw goncho Xancho Diosen' prueba še lede' can' žen'."

¹³ Beyož gota'bia' bi gwzoe' Satanásen' co'oyelān' Jesúsen' gone' da' mal, nach becuasen šlož len le'.

Jesúsen' gwzolağüe' chyixjue'ede' diža' güen che Diosen' distritw Galilea
(Mt. 4:12-17; Mr. 1:14-15)

¹⁴ Nach Jesúsen' beyeje' distritw Galilea, na' yela' guac che Spiritw che Diosen' gwzoan len le'. Na' yogo'loł bene' že' yež ca' zjachi' doxen Galilea gosenezde' che Jesúsen'.

¹⁵ Na' Jesúsen' bsed blo'ede' legaque' lo' yodao' čhegaquen', na' yogo'loł bene' ca' gosonxene' le'.

Bežin Jesúsen' Nazaret

(Mt. 13:53-58; Mr. 6:1-6)

¹⁶ Na' bežin Jesúsen' yež Nazaret gan' gwcha'ogüe', na' gwyo'e yodao' ža che Dios can' ba yolağüe' chone', na' gwzechede' cont gwlab'e'.

¹⁷ Na' ben' yo'o lo ne'e yodao' na' bnežjue'ne' yiš da' ndobe gan' nyoj dan' bzoj da' Isaías ben' be' Xtiža' Diosen' cani'te. Na' Jesúsen' bzaše' yišen' na' beželde' ga nyojen žan:

¹⁸ Zoa Spiritw che Diosa' len neda',

na' Diosen' gwleje' neda' zedeya' diža' güen len bene' yaše'.

Na' gwsele' neda' zedeyena' cont yesyeyaclaže' bene' ca' chesacyaše'de'.

Na' za'a cont gwsana' bene' ca' zjade ližya.

Na' zedeyena' cont yesyele'e bene' lchol.

Na' bene' chyj chzaca', zedeyena' cont noch no yosoči yososaque' legaque'.

19 Na' zedetixjue'eda' ba bžin ža gaclen Diosen' benačhen'.

20 Jesúsen' botobe' yišen' na' bonežjuen' ben' yo'o lo ne'e yodaon' na' gwchi'e.

Na' yogo' bene' ca' nita' yodaon' la' gosenat'ie' le'.

21 Nach gwzolao be'e diža' gwne':

—Ža na'aža ba chac can' ža Xtiža' Diosen' dan' ba benele nga.

22 Na' yogo' bene' ca' gosende' diža' dan' be'e besyebande' catec mba nac xtiža' Jesúsen'. Na' gosenie' güen che' na' gose' lježe':

—¿Gague benga xi'in Josén'?

23 Nach gož Jesúsen' legaque':

—Ye'ljale neda' can' ža diža' dan' de: "Bene' güen rmed le', beyon cuino'." Na' lecze ye'ljale neda': "Dan' chesene' beno' yež Capernaum da' bebane bene', lecz can' cheyala' gono' lažcho nga."

24 Nach goze'e legaque':

—Da' li chnia' le'e, bene' gualaž che note'teze bene' choe' xtiža' Diosen' bitw chesezi'e che'.

25 Ca timp che da' Elías ben' be' xtiža' Diosen' cani', bibi yejw goc šon iz yo gaše na' goc gwbin juisyw chegaque' doxen gan' zelao mbane Israel. Naquen da' li gwnita' zan no'ol güezebe yež ca' gan' mbane Israel ca tiempa',

26 perw Diosen' bi gwsele' Elíasen' cont gaclene' ne to bene' güezeb ca'. Gwsele' le' yeto yež yoble gan' nzi' Sarepta gan' mbane ciuda Sidón cont goclene' to no'ol güezebe.

27 Na' lecz ca' timp che da' Eliseo ben' be' xtiža' Diosen' cani', gwnita' zan bene' Israel bene' gosacšene len yižgüe' da' nzi' lepra. Ne to legaque' bi beyon Eliseon'. Toz bene' zito' bene' Siria, ben' le' Naamán, beyon Eliseon'.

28 Na' yogo' bene' ca' že' yodao'na' cate' gosende' dan' gwna Jesúsen' beseža'achgüe'.

29 Na' la' besyezoža'te' na' besyebeje' Jesúsen' yežen', na' goseche'ene' to lo ya'a da' zoa gała'ze, gosacclaže' yososlažoe'ne' lo ya'a na'ate,

30 perw bibi goc yesonde' le'. Con beza' Jesúsen' bedie' gachol gaque'.

Jesúsen' bebeje' da' xigüe' dan' yo'o yichjlaždao' bene'

(Mr. 1:21-28)

31 Na' jasoe' yež Capernaum gan' mbane Galilean', na' ža che Dios bsd blo'ede' bene' ca' že' lo' yodao'na'.

32 Na' bene' ca' besyebande' ca nac dan' bsd blo'eden', le bzejni'ide' cacze to bene' nežde' cayanen' nac xbab che Diosen'.

33 Lo' yodao'na' gwzoa to bene' yo'o nyaze' da' xigüen'. Na' bosye'e gwne':

34 —¿Bixchen' chgoša' chlaže' chio' len neto', Jesús bene' Nazaret? ¿Zedežiayo'o neto'? Neda' nombi'a le' na' nežda' naco' bene' laždao' xilaže' juisyw ben' gwseła' Diosen'.

35 Nach Jesúsen' gwdile' da' xigüen' na' gožen':

—iššago'! Bechoj yichjlaždao' benga.

Na' bchiž da' xigüen' bena' gachol bene' ca' že'na' nach bechojen. Perw bitw benen le' zi'.

36 Na' leca besyebane yogo' bene' ca', nach gose' lježe':

—¿Bixen' chac? ¿Bixe da' coben' chlo'e benga? Nacbia' nape' yela' chnabia' na' yela' guac, le chone' mandadw na' la' chechojte da' xigüe' da' yo'o nyaz bene'.

³⁷ Na' ca nac dan' ben Jesús'en' gos gwlalje dižan' doxen lagüe yež ca' zjachi' do na'.

Jesús'en' beyone' taobi'in che Simónna'
(Mt. 8:14-15; Mr. 1:29-31)

³⁸ Na' cate' beze'e yodao'na', na' gweje' liž Simón. Na' taobi'in che Simónna' chacšende', yo'e da' la. Na' bosol güize' Jesús'en' cont yeyone' le'.

³⁹ Na' Jesús'en' gwzeche' cuite' gan' die', na' bcheque' gwdile' da' lan' cont bechojen. Nach taobi'in che Simónna' la' gwyastie' na' bsiñi'e da' gose'ej gosagüe'.

Jesús'en' beyone' bene' zan
(Mt. 8:16-17; Mr. 1:32-34)

⁴⁰ Na' cate' ba chxoá gwbižen' goseče'e con yogo' bene' chese'e yižgüe' jasesane' legaque' lao Jesúsna'. Na' Jesús'en' gwxoá ne'e yichj to toe' na' beyone' legaque'.

⁴¹ Na' lecz ca' bebej Jesús'en' da' xigüe' da' yo'o yichjlaždao' bene' zan. Na' besyechojen gosenen' žižje, gosenan:

—Le' naco' Xi'in Dios.

Na' Jesús'en' gwdile' legaquen na' bitw be'e latje bi yesenan, le gosenezen naque' Cristo ben' gwlej Diosen' cont yedenabi'e.

Jesúsna' gwde' doxen Galilean' bsed blo'ede'
(Mr. 1:35-39)

⁴² Na' beteyo cate' gwe'ni', beze'e na' beyeje' to latje ga nono nla'. Na' bene' ca' besyeyiljue'ne' na' ja'aque' gan' zoen'. Na' gosaclaže' yosozague' Jesús'en' cont bi yeže'e.

⁴³ Na' Jesús'en' gože' legaque':

—Lecz ca' bene' ca' nita' yež yoble cheyała' šjalo'eda'ne' cont yosozenague' che Diosen' na' nabi'e yichjlažda'ogaque'. Diosen' gwsele' neda' cont šjatixjue'eda' legaque' xtižen'.

⁴⁴ Ca' goquen', Jesús'en' gwde' to to yež che distritw Galilea na' bsed blo'ede' bene' ca' lo' yodao' čhegaquen'.

5

Gosezene' be zan bel ya'a
(Mt. 4:18-22; Mr. 1:16-20)

¹ Na' šlac zecha Jesús'en' cho'a nisdao' da'na' nzi' Genesaret, besežag bene' zan na' bosochite' Jesús'en' da' gosaclaže' yosozenague' xtiža' Diosen' dan' bi'e cho'a nisdaon'.

² Na' Jesús'en' ble'ede' chope barcw dao' cho'a nisdaon'. Na' bene' gwxen bel ca' ba besyežaše' lo' barcon' ba chesyeyibe' yixjw bel čhegaquen'.

³ Na' Jesús'en' gwyo'e lo' barcw che Simónna' na' gwñabde' le' bosožigue' barcon' yelate' lo' nisen'. Na' Jesús'en' gwchi'e lo' barcon' blo'ede' bene' ca' že'na'.

⁴ Cate' beyož bi'e dižan' na' gože' Simónna':

—Le gwžiga'ch barcon' yelate' gan' nac sitjw, na' le gwzala' yixjw chelen' na' senle belen'.

⁵ Nach Simónna' gože' Jesús'en':

—Maestrw, ba bento' žin do yel na' ne to nono bdoła'. Perw le' ba gwnao' yezolaoto', na' gwzala'to' yixjw ca' da' yoble.

⁶ Na' beyož bosozala' yixjw čhegaquen' zjanyicoco'ten belen', yezeze ca yesyecheza'ten.

⁷ Na' bene' ca' zjanita' lo' barcw čhe Simónna' gosone' seřw gosaxe' bene' lježen' že' yeto lo' barcw yoble cont yesaclene' legaque' yesyebeje' yixjon'. Yelez ca gwdebe nisen' chopte barcw ca' dan' gosegüe'e beł zan lo'enna'.

⁸ Nach Simónna', ben' lecz le' Pedro, cate' ble'ede' da'na' goquen' na' bzoa xibe' lao Jesúsen' gože' le':

—Xana', neda' naca' to bene' mal, bibi zaca' par so' nga len neda'.

⁹ Gwne' ca' le' le' txen len bene' lježe' ca' že' lo' barcon' besyebanchgüede' da' gosezene' beł zanna'.

¹⁰ Lecz ca' besyebane xi'in ben' le' Zebedeo, zjanac čhop biše'tie', Jacobo len Juan. Bene' ca' chesone' žin len Simónna'. Nach Jesúsen' gože' Simónna':

—Bitw žebo'. Le' naco' bene' gwxcen beł, na' chebejo' belen' lo' nisen'; perw na'a gona' cont gaxle bene' yesyechoje' lo' da' malen'.

¹¹ Na' cate' besyežinlene' barcon' yo biž, nach gosebejyichje' barcon' len yogo' xšinlaže' ca' na' ja'aclene' Jesúsen'.

Jesúsen' beyone' to bene' che'ede' yižgüe' dan' nzi' lepra

(Mt. 8:1-4; Mr. 1:40-45)

¹² Na' šlac Jesúsen' zoe' to yež na' bžin to bene' che'ede' to yižgüe' dan' nzi' lepra. Na' bena' cate' ble'ede' Jesúsen', bzoa xibe' lagüe' na' boł güiže'ne' gože'ne':

—Xana', še chaclažo', guac yeca'o yižgüe' dan' che'eda' nga.

¹³ Nach Jesúsen' bli ne'e na' gwxoen' yichje' na' gože' le':

—Chaclaža' yeyacdo'. Beyaque.

Nach la' bega'ate yižgüe' dan' che'eden'.

¹⁴ Nach Jesúsen' bene' mandadw gože' le' notno ye'e can' ba beyone' le'. Na' gože' le':

—Con gwyej jaña' bxoza' cont le'ede' bačh beyacdo'. Na' bnežjo da' cheyla' gwnežjo' dan' non Moisésen' mandadw cont yeyaco' xilaže' len ley čhe Diosen'. Ben ca' cont yogo' bene' yesenezde' ba beyacdo'.

¹⁵ Na' tža tža gos gwłalje diža' ca' nac yela' guac dan' ben Jesúsen'. Na' besedob bene' zan cont bosozenague' xtiža' Jesúsen' na' cont beyone' legaque' len bite'teze yižgüe' da' chese'ede'.

¹⁶ Nach Jesúsen' bchoje' to ši'i güeje jał güiže' Diosen' to latje daš.

Jesúsen' beyone' to bene' bi chda šla'a ni'a ne'e

(Mt. 9:1-8; Mr. 2:1-12)

¹⁷ Nach to ža zoa Jesúsen' to yo'o gan' chsed chlo'ede' bene'. Na' gała'ze zjanita' zan bene' Israel bene' zjanzi' fariseo. Na' lecze zjachi' yeto cuen bene' ca' chososed chosolo'ede' dan' bzoj da' Moisés. Bene' ca' že'na' za'aque' yogo'loł yež ca' gan' mbane distritw Galilea len distritw Judea, na' lecze bale' za'aque' ciuda Jerusalén. Na' bosozenague' diža' da' be' Jesúsen'. Na' yela' guac čhe Xancho Diosen' zoan len Jesúsa' na' beyone' bene' güe' ca'.

¹⁸ Na' besežin xonj bene' zjanlene' to bene' xinj, bene' bi chda šla'a ni'a ne'e, zjanxoe' le' to lo cam dao'. Na' gosaclaže' yesedie' šjasesane' le' lao Jesúsa'.

¹⁹ Na' da' že'chgua bene' zan bi goc latje yesedie' šjasesane' bene' güen' lao Jesúsen'. Nach bene' ca' gosepe' yichjo'ole gosesaljue' goseque'e tej na'

beseletje'ne' len xcame'na' gachol bene' ca' že' lo' yo'ona' cont bžine' lao Jesúsen'.

²⁰ Cate' gocbe'e Jesúsen' gosejnilaže' le' na' gože' bene' güe'na':

—Xi'ina', ba bezi'xena' xtolon'.

²¹ Na' bene' ca' chososed chosolo'e dan' bzoj Moisésa' na' bene' fariseo ca' gosene':

—¿Non' chaque benga naque' chne' ca'? Chon cuine' ca' Dios. Le nono zoa bene' gac yezi'xene' xtoła' benachen'. Toz Diosen' gac yezi'xenen'.

²² Jesúsen' gocbe'ede' ca' nac da' cheseza'laže' na' gože' legaque':

—¿Bichena' chza'laže'le ca' lo' yichjlažda'ole?

²³ Še yapa'ne': "Ba bezi'xena' xtoło'na'", bi nezele še napa' yela' gwnabia' cont yezi'xena' xtołe'na'. San še yapa'ne': "Gwyas na' gwda", na' nachbia' še napa' yela' guac gac can' gwnian'.

²⁴ Na'ach gona' cont gache'ele napa' yela' gwnabia' cont yezi'xena' xtoła' benach, neda' naca' bena' gwseła' Diosen' golja' benach.

Nach gože' bene' xinja':

—Chapa' le' beyas, beyoa' xcamon', na' beyej ližo'.

²⁵ Nach la' beyaste bene' xinja', cheseŋa'te bene' ca' nita'na'. Nach beyoa' xcamen' na' beze'e zjajda liže' chonxene' Diosen'.

²⁶ Na' yogo'lol bene' ca' že'na' besyebande' yela' guac che Jesúsen' dan' bene'na'. Nach gosonxene' Diosen', na' do chesežebe' gose' lježe':

—Da' yebanecho da' ca' ba ble'echo ŋa'aža.

Jesúsen' gwleje' Leví cont goque' le' txen
(Mt. 9:9-13; Mr. 2:13-17)

²⁷ Gwdena' beza' Jesúsen' na' ble'ede' to bene' güechixjw bene' le' Leví, chi'e latje gan' chchixjue'. Na' Jesúsen' gože' le':

—Da len neda'.

²⁸ Nach gwzoža' Levín' gwlejjichje' yogo' xšinłaze' na' gwyejlene' Jesúsen'.

²⁹ Nach Levína' bene' to lni xen ližen' par Jesúsen', na' ja'ac bene' zan bene' güechixjw ca' na' bene' yezica'chle' na' gosebe'lene' le' cho'a mesen' gosagüe'.

³⁰ Na' bene' ca' chososed chosolo'ede' dan' bzoj Moisésen' na' len bene' fariseo ca' gosacyožlene' bene' ca' zjanaque' Jesúsen' txen, gose'e legaque':

—¿Nacxechen' che'ej chagwle txen len bene' güechixjw na' yebałe bene' güen da' xinj ca'?

³¹ Jesúsen' gože' legaque':

—Bene' cbi chesacšene bitw cheseyažjde' bene' güen rmed. Bene' ca' chesacšene, legaquen' cheseyažjde' bene' güen rmed.

³² Gague bene' ba zjanaque' bene' güen len Diosen' zedeneyoeda' cont yesyetinjde' xtolen', san bene' güen da' xinj. Legaque' zjanaque' ca' bene' cheseyažjde' bene' güen rmed.

Gosenabde' Jesúsen' bixchen' cbi gwleje' tgüeje ža gwbas
(Mt. 9:14-17; Mr. 2:18-22)

³³ Nach bał bene' gose'e le':

—Bene' ca' zjanaque' txen len Juan na' bene' zjanaque' txen len bene' fariseo ca' chesonchgüe' gwbas chosol güiže' Diosen'. Perw na' bene' ca' zjanaque' le' txen chese'ej chesagüe'. ¿Bixchen'?

³⁴ Nach gož Jesúsen' legaque':

—¿Guac yesezoa gwbas bene' chaxe' to ga chac yela' güešagna' šlac ben' bšagnan' zosalene' legaque'? Bi gac.

³⁵ Perw žin ža cate' bich soe' len legaue', cana'ch yesone' gwbas. Na' ca'cze naquen len neda' na' len bene' ca' zjanaque' neda' txen.

³⁶ Na' Jesúsen' be'e jempl nga bzejni'ide' legaue':

—Notno zoa bene' cheza' xe' da' cobe na' yode'en de'exo'. Še gone' ca' gwžiaje'e xe' da' coben' na' xe' de'exon' bitw gac leben len lache' coben'.

³⁷ Na' neca zoa bene' chgue'e vino cobe lo' bzod yide'exo', le vino coben' chšon' yide'exon' na' laje vino na' yesebiayi' chopen.

³⁸ Cheyala' yesegue'e vino coben' lo' yid cobe cont bibi gaquen.

³⁹ Na' ca nac bene' bačh yolagüe' che'eje' vino golen', bitw ye'nde' ye'eje' vino coben', san že': "Vino golen' nacchen güen."

6

Bene' ca' zjanaque' Jesúsen' txen goselečhje' trigon' gosagüen' ža che Dios
(Mt. 12:1-8; Mr. 2:23-28)

¹ Na' to ža nac ža che Dios, Jesúsen' gwdie' gan' nyaž trigw len bene' ca' zjanaque' le' txen. Nach bene' ca' zjanaque' le' txen goselečhje' trigon' na' gosexoben' gosagüen'.

² Na' besele'e bał bene' fariseon' can' gosone' na' gose'e legaue':

—žBičen' chonle da' bi de lsens goncho ža che Dios?

³ Na' Jesúsen' gože' legaue':

—žBi'na' gwlable can' ben da' rey David to ža cate' le' na' bene' lježe' ca' gosedone'?

⁴ Gwyo'o Davin' liž Dios na' jaži'e yetextil da' nac che Dios da' bi chac gagw bene' bi nac bxož, na' gwdagüen', na' lecze bnežjue' che bene' zja'ac len le'.

⁵ Na' lecz ca' gwna Jesúsen':

—Naquen lo na' nia' bi da' nac güen goncho cate' nac ža che Dios, neda' naca' ben' gwsela' Diosen' golja' benačh.

Beyac to bene' nxo'on šla'a taque'
(Mt. 12:9-14; Mr. 3:1-6)

⁶ Na' yeto ža che Dios gozeje' lo' yodaon' na' bsed blo'ede' bene' ca' že'na'. Na' ladjo bene' ca' zjaže'na' yo'o to bene' nxo'on taque' liča.

⁷ Na' bene' ca' chososed chosolo'e dan' bzoj da' Moisés na' bene' fariseo ca' chosogüia chesene'e Jesúsen' še yeyone' bena' ža che Dios cont de da' yosode'ede' yesagüe' xya che'.

⁸ Na' goche'e Jesúsen' can' chesone' xbaden', na' gože' ben' nxo'on taque':

—Gwzoža' na' gwzecha nga gachol.

Nach bena' bžine' gwzeche' lagüen'.

⁹ Na' Jesúsen' gože' bene' ca' že'na':

—žBi da' cheyala' goncho ža che Dios? žGoncho da' güen, še goncho da' mal? žCheyala' yoslacho bene', še gwžiayi' chone'?

¹⁰ Jesúsen' gwne'e yogo'te ben' že'na', nach gože' ben' nxo'on taque':

—Bli naon'.

Nach blien' na' taquen' beyaquen binlo.

¹¹ Na' bene' ca' chososed chosolo'e leyna' na' len bene' fariseon' leca beseže'e na' gwzolao bosoxi'e nacle yesone' len Jesúsen'.

Jesúsen' gwleje' šiziw postlw
(Mt. 10:1-4; Mr. 3:13-19)

¹² Na' to ža gwyej Jesúsen' to lo ya'a jel güiže' Diosen'. Na' do yel be'lene' Diosen' diža'.

13 Na' cate' gwye'ni', goxe' bene' ca' zjanaque' le' txen, nach gwleje' šižinue' na' bsi'e legaque' postlw.

14 Bene' qui gwleje': Simón ben' bsi'e Pedro, na' bene' biše' Andrés, na' Jacobo, na' Juan, na' Felipe, na' Bartolomé,

15 na' Mateo, na' Tomás, na' Jacobo xi'in Alfeo, na' Simón ben' nac cananista,

16 na' Judas bene' biše' Jacobo, nach Judas Iscariote ben' bdie' Jesúsen' lo' na' bene' chesegue'ede' le'.

Jesúsen' bzejni'ide' bene' zan

(Mt. 4:23-25)

17 Na' beyetje' lo' ya'an len legaque' na' gwzeche' ga' nac to laše' len bene' ca' zjanaque' le' txen. Na' lecze' nita' bene' zan bene' za'ac doxen Judean', do ciuda Jerusalénna' na' do gan' mbane yež ca' zjanzi' Tiro na' Sidón. Na' Tiro len Sidón zjachin' cho'a nisdao'. Na' len bene' ca' nita' chosozenague' xtiža' Jesúsen' zjančixe' bal' bene' chese'e yižgüe'. Na' Jesúsen' beyone' legaque'.

18 Na' bene' ca' zjajo'o zjanyaz da' xigüen' yichjlažda'ogaque', Jesúsen' beben' jen'.

19 Na' yogo' bene' goseyiljue' nacle yesone' cont yeselapa' na'gaquen' le', le gosenезде' nape' yela' guac cont yega'a yižgüe' chegaquen' še yeseche'ne'.

Non' zoa mbalaz na' non' cbi zoa mbalaz

(Mt. 5:1-12)

20 Na' Jesúsen' gwlis lagüe' gwne'e bene' ca' zjanaque' le' txen na' gože' legaque':

—Mbalaz zoa le'e bene' yaše', le'e chzenagle che Diosen' cont chnabi'e yichjlažda'olen'.

21 'Mbalaz zoa le'e chdonle' na'a, gwžin' ža cate' bich tonle.

'Na' mbalaz zoa le'e chbežle' na'a, gwžin' ža cate' gwxižle.

22 'Neda' naca' ben' gwseła' Diosen' golja' benač. Na' mbalaz soale še dan' chejnilaže'le neda' chesegue'e bene' le'e, na' chesyebeje' le'e lo' yodao' chegaque', na' chesene'e' chele, na' chesene' nacle bene' mal.

23 Le yebechgüe cate' chac da' quinga, na' le soa mbalaz, le Diosen' gone' cont gacchgua da' güen chele cate' yežinle gan' zoe'na'. Can' chesonde' le'e, ca'czen' goson da' xoxxta'ogaque' len da' bene' ca' gos'o'e xtiža' Diosen' cani'.

24 Na' nyaše' chguaze nac le'e bene' gwni'a. Chac güen chele' na'a, perw gague toli točanen' gac chele ca'.

25 'Nyaše' chguaze nac le'e dechgua da' chagwle' na'a. Gwžin' ža cate' bich bi gata' chele.

'Nyaše' chguaze nac le'e chxižle' na'a. Gwžin' ža cate' yegüine'le na' cuežyaše'le.

26 'Nyaše' chguaze nac le'e chesonxen yogo'lo' bene' le'e. Ca'czen' goson da' xoxxta'ogaque', gosonxene' bene' ca' goseziye'e gosene' cheso'e xtiža' Diosen' cani'.

Cheyala' gaguecho bene' chesegue'ede' chio'

(Mt. 5:38-48; 7:12)

27 'Le'e chzenagle chia', cheyala' gaguele bene' chesegue'ede' le'e. Cheyala' gonle da' güen len bene' ca' chesegue'ede' le'e.

28 Le nab' cont bene' chesegue'ede' le'e nite' mbalaz. Le soa le nabe Diosen' gaclene' bene' chososaca'zi' le'e.

29 Še to bene' chaze' šla'a xaga'le, le güe' dan' yešla'a. Še to bene' que'e xadon chele, le güe' latje lechje' len xcamisle.

30 Note'teze bene' bi dan' nabde' le'e, le gwnežjon. Še to bene' que'e bite'teze da' de chele, bitw yenablen.

31 Con yogo' da' güen da' chaclaže'le yeson benačnen' len le'e, lecze ca cheyala' gonle len legaque'.

32 Še chaquele šinze bene' chacde' le'e na' bi chaquele bene' yoble, žbixchen' chaquele chebe Diosen' can' chonle? Ca'cze cheson bene' güen da' mal ca'.

33 Lecze še chonle da' güen len bene' ca' cheson da' güen len le'e na' bi chonle güen len bene' yoble, žbixchen' chaquele chebe Diosen' can' chonle? Ca'cze cheson bene' güen da' mal ca'.

34 Še chbejle bi da' chbejle len bene' chaquele yesyeyonen' le'e, žbixchen' chaquele chebe Diosen' can' chonle? Ca'cze cheson bene' güen da' mal ca', chesebeje' bi dan' chesebej lježgaque', na' nite' lez yosyonežjuen'.

35 Perw na' le'e, le soa le gaque bene' chesegue'ede' le'e, na' le soa le gon da' güen. Na' le soa le cuej bi dan' cuejle, perw bitw soale lez yesyeyonen'. Še gonle ca dan' ba gwnia' le'e, gwlo'ele nacle xi'in Dios ben' nac la'zelagüe bene' blaö, na' Diosen' güebi'icze' güen len le'e. Le'na' naque' bene' šagüe' len bene' ca' bi cheso'e yela' choxcen che' na' len yezica'chle bene' güen da' mal ca'.

36 Na' ca Xacho Diosen' ben' zoa yaba cheyaše' cheži'ilaže'de' yogo' benačnen', ca'cze cheyala' yeyaše' yeži'ilaže'le ljež benačhlen'.

Bitw zaca'cho nacho bene' zjanape' dola'

(Mt. 7:1-5)

37 'Bitw gonle xbab zaca'le nale bene' zjanape' dola'. Še nale che bene' zjanape' dola', ca'cze Diosen' ne' le'e naple dola'. Na' bibi yosbaga'le bene' cont Diosen' bibi yosbague'de' le'e. Le soa le yezi'xen che bene' cont Diosen' yezi'xene' chele.

38 Le soa le gwnežjo bi da' gwnežjwle bene' na' Diosen' güeyoncze' chele. Bal bene' leca nala' chosochixe' bi dan' chesote', chosochiše' lao yagarm chegaquen' na' chesebiben' na' chosozoaya'aten'. Ca'czen' cheyala' gonle gwnežjwle bi dan' cheseyažje bene' na' lecz ca' gon Diosen' len le'e.

39 Nach Jesús'en be'lene' bene' že'na' to jempl, gwne':

—žGuaque to bene' lchoł cue'e nez yeto bene' lchoł? Bi gac. Le nezecho chopte' šjasebiže' to lo' yechw.

40 Ca nac cate' to bene' chsede' len to maestrw, bi nacho naque' bene' blaöch ca maestroa'. Na' la'czla' še ben' chseda' gwda' yichje' yogo'loł dan' blo'e maestron' le', bitw naque' bene' sina'ch ca maestroa'.

41 žBixchen' chna'le beb dao' dan' yo'o lo' yejlaö bene' lježle, na' bi chache'ele naquech beb xen dan' yo'o lo' yejlaölen'?

42 Na' še le'e yo'o to da' xen lo' yejlaölen' žnacxechen' che'le bene' lježlen': "Ben yebeja' beb dao' dan' yo'o lo' yejlaöun'?? jBene' güexoayag! Zgua'tec le yebej beb xen dan' yo'o lo' yejlaölen', nach le'ele binlo cont yebejle dan' yo'o lo' yejlaö bene' lježle.

Dan' choncho chlo'en bin' yo'o lo' yichjlažda'ochon'

(Mt. 7:17-20; 12:34-35)

43 'Bitw nacho to yag frut güen chbian frut da' bi nac güen, na' neca nacho dan' bi nac güen chbian da' nac güen.

44 Con can' nac da' chbia to to yaguen' nezecho bi yaga'. Yag yeše' bitw chbian da'na' nzi' yixgüigw. Lecz ca' yag bisga'a bi chbian uvas.

45 To bene' laždao' ži'ilaže' chone' da' güen, le ca ža lo' yichjlažda'ogüe' nan' chone'. Na' ben' chon da' mal, chone' ca' lagüe dan' chzenague' che laždao'

xi'a che'na'. Na' yogo'te diža' dan' chchoj cho'achon', lo' yichjlažda'ocho nan' za'aquen.

Chope bene' na'yo'o da'chon to toe'

(Mt. 7:24-27)

46 Ĵičhen' che'le neda': "Xana'", na' bi chonle can' nona' mandadw?

47 Na'a nia' nac zaca'lebe bene' nao' neda' na' chzenague' xtiža' na' chone' can' nona' mandadw.

48 Naque' ca to bene' ben yo'o na' gwche'ene' sitjw gwleque' lene yo'on da' nac da' gual. Cate' betjchgua yegw gwyechjen liže'na', na' bitw bebixen cuiayin', le gwzoachachchguan.

49 Na' yogo' bene' chende' xtiža'na' na' bi chone' can' žia'na' naque' ca yeto bene' ben yo'o, con benen' lo' yo na'ze na' bibi lenen gwleque'. Na' cate' betjchgua yegw gwyechjen liže'na', na' bebixen gwžiai'te yo'on.

7

Jesúsen' beyone' xmos to xan soldadw

(Mt. 8:5-13)

1 Na' cate' beyož be' Jesúsen' diža' len bene' ca', beyeje' yež Capernaum.

2 Na' zoa to xan soldadw bene' bitw naque' bene' Israel. Na' zoa to xmose' chacšenchgüede', na' yelez ba de' par gate'. Na' xan soldadon' chacchgüede' le'.

3 Na' cate' xan soldadon' bende' diža' che' Jesúsen', gwsele' bal' bene' gole blao che' bene' Israel cont jasenabde' Jesúsen' šeje' liže' yeyone' xmos'e'.

4 Nach cate' besežine' gan' zoa Jesúsen', gosenabde' le' gaclene' xan soldadon'. Na' gose'e Jesúsen':

—Xan soldadon' naque' to bene' zaque' gacleno',

5 le' chacde' chio' bene' Israel, na' le' bene' yodao' cheto' nga len xmechue'.

6 Nach gwyej Jesúsen' len legaque', perw za' yesežine' liže'na' cate' gwseła' xan soldadon' bal' bene' migw che' lao Jesúsen' na' gose'ene':

—Xan soldadon' že' bitw gwša'a yichjo' yido' liže'na', le' nežde' bitw zaque' cont šo' liže'na'.

7 Da'n'an' bitw beyaxjde' yide' nabde' le' gacleno'ne'. Con che'nde' gonšco' mandadw yeyaque' xmos'e'na'.

8 Xan soldadon' že' zoa bene' chnabia' le' perw lecze nita' soldadw che' na' chnabi'e' legaque'. Na' cate' che'e' toe': "Gwyej", na' cheje', na' cate' che'e' yetoe': "Da", na' chide', na' cate' che'e' xmosen': "Da' nga gono'", na' chonen'. Na' nežde' con nao' yeyac xmos'e'na' na' yeyacde'.

9 Na' Jesúsen' cate' bende' diža' dan' gose' bene' migw che' xan soldadon' le', bebande' na' beyechje' gože' bene' zan ca' zjanao' le':

—Žia' le'e' ne toze bene' Israel biža' šejnilaže' neda' ca chejnilaže' benga bi naque' bene' Israel.

10 Nach jaya'ac bene' ca' gwseła' xan soldadon'. Cate' besyežine' liže'na' ba beyaque' xmosen'.

Jesúsen' bosbane' xi'in to no'ole güezebe

11 Jesúsen' gwyetje' to yež dan' nzi' Naín len bene' ca' zjanaque' le' txen na' zan bene' yoble.

12 Ba zja'aque' gała'ze par yesežine' cho'a puert che' yežna' cate' besele'ede' chesechoj xonj bene' cho'a puerten' zjanlene' to bene' guat. Na' ben' goten' naque' bene' tliša', na' xne'en' naque' no'ole güezebe. Na' bene' zan bene' lo' yeža' zja'aclene' xna' bene' guaten'.

13 Na' cate' ble'e' Xanchon' no'olen', beyaše'de' le' na' gože'ne':

—Bitw cuežo'.

14 Nach gwyeje' jaxoa ne'en lo yagla' gan' xoa bene' guata'. Nach bene' ca' zjanlen le' gosebeze'. Na' gože' bene' guata':

—Bene' güego', neda' žia', beyas.

15 Nach bene' guaten' gwchi'e na' gwzologüe' benie'. Na' Jesús'en' beyone' le' lo na' xne'e.

16 Na' yogo'lol bene' ca' besežebe' dan' beban bene' guata' nach gosonxene' Diosen' gosene':

—Ba bla' to bene' blao ga zoacho, bene' choe' xtiža' Diosen', na' Diosen' ba gwsele'ne' cont gaclene' chio' naccho nación che'.

17 Ca nac dan' ben Jesús'en' gos gwlalj diža' čhen' doxen Judea na' yogo'lol yež ca' dan' zjanita' gala'ze.

Juanna' gwsele' čhope ben' gosaque' le' txen gan' zoa Jesús'en'
(Mt. 11:2-19)

18 Nach bene' ca' zjanaque' txen len Juanna' jaseye'lene' le' diža' yogo'lol ca' nac dan' chon Jesús'en'. Nach gox Juanna' čhope bene' ca'

19 nach gože' legaque':

—Le šja'ac gan' zoa Jesús'en' na' ye'ln'e': “¿Len' naco' ben' chbezto' seļa' Diosen' o še cheyaļa' cuezchto' yid bene' yoble?”

20 Nach bene' ca' chope cate' besežine' gan' zoa Jesús'en' gose'ene':

—Juan ben' chzoa bene' nis gwsele' neto' laguo' nga nabeto' le' še len' naco' ben' chbezto' seļa' Diosen' o še cuezchto' yid bene' yoble.

21 Šlacte ne' nita' chope bene' ca', Jesús'en' beyone' bene' zan bene' ca' chesacšene' na' bene' chese'ede' yižgüe' gual. Lecze bebeje' da' xigüe' da' zjajo'o' zjanyaz yichjlaždao' bene' zan. Na' bene' cont besyele'e' zan bene' lchol.

22 Nach Jesús'en' boži'e xtiža' bene' ca' gwseļa' Juanna' lagüe'na', gože' legaque':

—Le šjaya'ac na' le šjayež Juanna' doxen da' ca' ba ble'ele na' da' ca' ba benele. Ba ble'ele chona' cont chesyele'e' no bene' lchol, na' chesyeda no bene' zjanxinj ni'e. Na' lecze bene' gose'e' yižgüe' dan' nzi' lepra besyeyacde', na' chesyeyene no bene' cuež. Ba ble'ele bosbana' no bene' guat, na' ba benele choa' diža' güen len bene' yaše' ca'.

23 Mbalaz zoa bene' chejle'e' čhia' na' bi chdebde'.

24 Na' cate' besyeya'ac bene' ca' gwseļa' Juanna', nach Jesús'en' be'lene' bene' ca' zjandoben' xtiža' Juanna', gože' legaque':

—¿Nacxe nac ben' jale'ele latje dašen'? ¿šayichj šayen chaque'? Bi naque' ca'.

25 ¿Nac naque' caten' jale'elne'? ¿Nyaze' lache' šagüe'? ¿še bitw? le bene' ca' zjanyaz lache' šagüe' na' chesenite' chese'ej chesagwšagüe' na' chesone' legr, bena' nita' yo'o' güenchgua, ca no liž bene' gwnabia'.

26 ¿Noxen' jale'ele? ¿Naque' to bene' choe' xtiža' Diosen'? Da' li naque' to bene' choe' xtiža' Dios, perw chnia' le'e, zaca'che' ca note'teze bene' choe' xtiža' Dios.

27 Čhe benga nyojen le'e Xtiža' Diosen' žan:

Neda' Dios seļa' to bene' cuialagüe' laguo' gü'e xtižon' cont cate' yido' ba nita' bene' yesonxene' le'.

28 Čhnia' le'e, notech no benach na' soa bene' naquech bene' blaoch ca Juanna'. Perw na' note'teze bene' gwzenague' čhe Diosen' cont Diosen' nabi'e

yichjlažda'ogüe', la'czla' bi naque' bene' blao, gwžin ža cate' šejni'ichde' chia' cnel ca Juanna'.

²⁹ Ba bzoa Juanna' bene' zan nis na' len bal bene' güechixjw. Na' yogo' bene' ca' gosacbe'ede' Diosen' zejcz'e to licha dan' gwsele' Juanna' jatixjue'ede' legaue' yesyetejnjde' xtoła'gaue'.

³⁰ Perw na' bene' fariseo ca' na' bene' ca' chososed chosolo'e dan' bzoj da' Moisés, goson yichjlaogaquen' cbi besyetejnjde' xtoła'gaquen' can' goclaže' Diosen'. Bi gosaclaže' gwzoa Juanna' legaue' nis.

³¹ Nach Jesúsen' gože' legaue':

—¿No gwsaca'lebd'a le'e zoale na'a? ¿No chon can' chonlen'?

³² Nacle ca bidao' neche bicze bi de chlebele. Can' zjanac bidao' ca', cate' nita'be' gan' chac ya'a chese' lježbe': “Ba bcuežto' bžejo, neca bya'ale, na' ba bilyaše'to', neca gwchežle.”

³³ Juan ben' chzoa bene' nis bide' laole nga, bitw güe'ej gwdagwšagüe' can' chese'ej chesagw bene' yoble, na' neca güe'ej'e' vino, nach gwnale che': “Yo'o nyaz da' xigüen' yichjlažda'ogüe'.”

³⁴ Na' neda', chle'ele che'ej chagua' can' chese'ej chesagw bene' yoble, na' žale chia' naca' bene' lia na' bene' borrašw, neda' naca' ben' gwseła' Diosen' golja' benač. Na' lecze žale naca' migw che bene' güechixjw ca' na' migw che nochle bene' güen da' xinj.

³⁵ Perw na' bene' chosozenag che Diosen' zjanape' to yela' sina' na' chesone' cont nachbia' Diosa' naque' la'zelagüe' bene' sina'.

Jesúsen' gweyje' liž Simón bene' fariseo

³⁶ To bene' fariseo goxe' Jesúsen' šeje' liže' cont yesagüe'. Na' bžin Jesúsen' liž bena' na' gwchi'e cho'a mesen'.

³⁷ Na' to no'ole lo ciudan', no'ole zle', gwnezde' bžin Jesúsen' liž bena'. Na' Jesúsen' len bene' ca' yezica'chle ba nite' cho'a mesen' cont yesagüe', cate' bžin no'olen'. Na' no'olen' noxe' to da' nac de yejese da' yože set da' la'zelaoze chl'a zix.

³⁸ Na' jabigue' gala'ze xni'a Jesúsen' na' gwcheže' na' nis xchež chen' bžonen ni'a Jesúsen' gwbišen. Na' bxie' ni'ena' len yiša' yichje' na' bnopen' na' gwdeben' set zixen'.

³⁹ Na' ben' goxe' Jesúsen' ližen', cate' ble'ede' can' chon no'ola' na' gocde': “Šaca' benga naque' to bene' choe' xtiža' Dios, guacbe'ede' no'olen' chgan ni'ena' naque' no'ole zle'”.

⁴⁰ Nach Jesúsen' gože'ne':

—Simón, de to da' che'nda' yapa' le'.

Nach Simónna' gože' Jesúsen':

—Gwnan Maestrw.

⁴¹ Jesúsen' gože'ne':

—Gwzoa to bene' na' nita' chope bene' chesale' xmechue'. Toe' chale' gayo' gayoa mechw da' nzi' denario, na' ben' yeto chale' šiyon mechw lecze denario.

⁴² Na' chopte bene' ca' ne toe' ca de chegaue' cont yesyeyixjue' xyan'. Na' ben' gwlej mechon' gwlejiychje' dan' chesale' chen'. Gwnašč neda', žnoe' bene' ca' chope' gosacchde' che'?

⁴³ Nach Simónna' gože'ne':

—Šeca ben' goc xya chen' da' xench na' gwlejiychjen'.

Jesúsen' gože'ne':

—Da' li can' ba gwnao'na' naquen.

44 Nach Jesúsen' gwyechje' gwne'e no'ola' na' gože' Simónna':

—¿Chle'edo' no'ole nga? Neda' ba gwyo'a ližo' nga na' bi beño' nis chib ni'a, perw no'ole nga ba gwdibe' ni'an' len nis xchež chen' bxien' len yiša' yichje'.

45 Bi bnopo' neda', perw na' no'ole nga cate' bla'atia' gwzologüe' chnope' ni'a nga.

46 Bi gwdebo' set yichja', perw no'ole nga ba gwdebe' set zix ni'a nga.

47 Na' žia' le', xtole'na' gosaquen da' zan, perw ba bezi'xena' che'. Da'nan' chacchgüede' neda'. Bene' bi žinlaže' xtolen' ca xtoła' no'ole nga, cate' yezi'xena' che' bitw gactecde' neda'.

48 Nach gože' no'olen':

—Ba bezi'xena' xtoło'na'.

49 Nach bene' ca' chesagw len Jesúsen' txen lo mesen' gwzoloa chese' lježe':

—¿Nox benga chacde' le'na' chezi'xene' xtoła' benachen'?

50 Nach gož Jesúsen' no'ola':

—Dan' chejnilažo' neda' da'nan' ba de yela' mban chio' toli tocane. Beyej to šagüe' to güen.

8

No'ol ca' gosaclene' Jesúsen'

1 Na' gwdechle gwey Jesúsa' zan ciuda na' zan yež jatixjue'ede' diža' güen, gwne' Diosen' nabi'e yichjlaždao' bene' yosozenague' che'. Na' zja'aclen bene' šižinw ca' le', bene' ca' zjanzi' postlw.

2 Nach to xonj no'ole ľecze zja'aclene' Jesúsen' bene' ca' ba beyone'. Baľe' ba bebeje' da' xigüe' da' zjajo'o zjanyaz lo' yichjlažda'ogaque' na' yebaľe' ba beyone'ne' cate' gosacšende'. Na' toe' lie' María bene' Magdala, bebej Jesúsen' gaže da' xigüe' gwyo'o gwyaz yichjlažda'ogüe'na'.

3 Nach ľecze len ben' le Juana, xo'ole ben' le Chuzan, gwyo'o lo ne'e liž rey Herodes na' yežlio che' ca'. Na' ľecze len ben' le Susana gweyjlene' Jesúsen', na' yezan bene' yezica'chle. Na' no'ol ca' bosochine' bite'teže da' gota' chegaque' cont bosonežjue' dan' byažje Jesúsen' len bene' ca' zjanaque' le' txen.

Jempl che bene' goz trigon'

(Mt. 13:1-9; Mr. 4:1-9)

4 Na' bene' zan besežag gan' zoa Jesúsen' bene' za'ac to to yež ca'. Na' be'e to jempl, gwne':

5 —To bene' güen žin jeze' trigw na' šlac zeje' chose' trigon' late' bin jasechazen do cho'a nezen', na' bosolej bosošošj bene' len, na' be žia xil be chaš le'e yaba gosagwban'.

6 Yelaten' jasechazen ga nac lo yej, na' cate' beselan' na' gosebizen, ľe gague bi gopa' den'.

7 Yelaten' jasechazen ga nac lo yag yeše', na' gosecha'on txen, na' bosoloľe' yag yeše' ca' len.

8 Perw na' yelaten' jasechazen ga nac yo šagüe' na' beselan', na' baľen gosebian to gayoa güeje.

Na' beyož be'e diža' quinga gwne' zižje gože' ľegaque':

—Le'e žia nagle da' chene, ľe gwzenag xtiža'na'.

Jesúsen' gwne' bixchen' bi'e jempl cate' bzejni'ide' bene'

(Mt. 13:10-17; Mr. 4:10-12)

⁹ Nach bene' ca' zjanaque' Jesúsen' txen gosenabde' le' bi zejen jempl da' ba bi'e.

¹⁰ Na' gož Jesúsen' legaque':

—Nono na' neze can' nac yela' gwnabia' che Diosen'. Perw ba chone' cont le'e chejnilaže'lene' nezelen. Perw bene' bi chesaclaže' yesejnilaže'ne', chzejni'igacda'ne' len jempl. Chona' ca' cont yesele'ede' can' chonan' na' bitw yesache'ede' bi zejen, na' cont yesende' xtižan' na' bi yesejni'iden'.

Jesúsen' bzejni'ide' bi zejen jempl che bene' goz trigon'

(Mt. 13:18-23; Mr. 4:13-20)

¹¹ Na' ca' nac jempl nga zejen quinga: Ca dan' byažen zejen xtiža' Dios.

¹² Na' biñ dan' besego'onen chanezen', zejen bene' ca' chesede' xtiža' Diosen', perw na' chžin Satanás dan' chnabia' da' xigüe' ca' chebejen xtiža' Diosen' lo' yichjlažda'ogaque' cont bi yesejnilaže' le' na' bi gata' yela' mban chegaque' toli tocañe.

¹³ Na' biñ dan' besego'on ga nac lo' yej zjanaquen ca bene' chesyebede' xtiža' Diosen', perw zjanaque' ca to da' bibi loe chon, šložga chesejle'e che xtiža' Diosen', na' cate' chac bi da' mal chegaque' la' chesebejyichjte' xtižen'.

¹⁴ Na' biñ dan' besego'onen ga nac lo' yag yeše', zejen ca bene' ca' ba gosende' xtiža' Diosen', perw šlac zjambane' chesyela' chesyžejde' na' chese'nde' yesen'e, na' chesede' chesonteze' con da' žazen chegaque'. Na' da' qui bi choen' latje yega'an xtiža' Diosen' lo' yichjlažda'ogaque' na' da'nan' bi chesejnilaže' le' ca cheyala'.

¹⁵ Na' da' ca' besego'onen lo' yo šagüen', zejen ca bene' cate' chesende' xtiža' Diosen' chesezi'en chesonen' chegaque', na' chesejnilaže' le' do yichj do laže', na' chesežejde' bite'tez dan' chac chegaque' cont chesone' can' che'ne Diosa'.

Jempl che yi' dan' chguala'cho

(Mr. 4:21-25)

¹⁶ Na' Jesúsen' gwne':

—Notno gwguala' to yi' na' gw dosen' to yeso', na' neca gwcuše' yin' xan xcame'. San chde'en le'e ze'e cont gwsenin' len yogo'lol' bene' yeso'o lo' yo'o.

¹⁷ Le yogo'lol' da' ngaše' chia' neda', lenna' gwlo'elaon, na' yogo'lol' da' nono na' neze chia', žin ža yeseñzden' na' yesejni'iden'.

¹⁸ Le gwzenag da' quinga da' chzejni'ida' le'e, le note'teze bene' chzenague' xtiža' Diosen' gwzejni'ich Diosen' le', perw na' note'teze bene' bi chzenague', da' daon' chacde' ba nežde', yeca'a Diosen' len.

Xna' Jesúsen' len bene' biše' ca' besežine' gan' zoe'

(Mt. 12:46-50; Mr. 3:31-35)

¹⁹ Na' xna' Jesúsen' len bene' biše' ca' besežine' gan' zoa Jesúsen', gosaclaže' yeso'e, perw catec bene' zan že' gague goc latje yesežine' lagüe' na'ate.

²⁰ Na' to ben' ze na' gože' Jesúsen':

—Xna'o len bene' bišo' ca' zjanite' chy'o na' chesaclaže' yedesene'e le'e.

²¹ Na' Jesúsen' gože' legaque':

—Bene' ca' chosozenag xtiža' Diosen' na' chesezi'e cho'ala' xtižen', bene' can' zjanaque' xna'a na' biša'.

Jesúsen' bcueze' be' bdon'o lo' nisdao'

(Mt. 8:23-27; Mr. 4:35-41)

²² Na' goc to ža Jesúsen' gwyo'e to lo' barcw len bene' ca' zjanaque' le' txen. Na' gože' legaque':

—Laga'cho yešla'ale nisdaon'.

Nach bosose'e barcon'.

²³ Šlac zejen lo nisen' gwtas Jesúsen'. Nach gwzolao gwyechj to be' bdono' lo nisdao', na' gwzolao cheyož nis lo' barcon'. Na' besexožde' yesebiaye'e.

²⁴ Nach bosyosbane' Jesúsen' gose'e le':

—¡Maestrw! ¡Maestrw! Bačh chbiayi'cho.

Nach gwyase' na' gwdile' be' bdono' len nisdao', na' la' gosebe'žiten.

²⁵ Na' gože' legaque':

—¿Nacxečen' bi chejle'le chia'?

Nach legaque' besežebe' len besyebande'. Nach gose' lježe':

—¿Noxe benga? lente be' bdono' na' len nisdao' chosozenaguen che da' že'.

To bene' Gadara yo'o nyaze' da' xigüe'

(Mt. 8:28-34; Mr. 5:1-20)

²⁶ Na' besežine' laž bene' Gadara ca', to yež da' chi' šla'a distritw Galilean', laga'cho nisdao'.

²⁷ Na' cate' bechoj Jesúsen' lo' barcoa', to bene' lo yežna' jašague' le'. Ba gwža yo'o nyaz da' xigüen' yichjlaždao' bena'. Na' ba chde' con gague bi xe' chazche', na' bich zoe' liže', con ba zoe' do capsantwle.

²⁸⁻²⁹ Na' bene' gualaž che' ca' bosocheje' ni'a ne'e len gden na' gosape' le'. Na' da' xigüe' ca' gosonen cont bzojbtine' gden'na' zan ni'a. Na' gosonen cont gwyeye' ga nono bene' zjanla'. Na' bena' cate' ble'ede' Jesúsen' na' bzoa xibe' lagüen'. Na' bosye'e ziže gwne':

—¿Bixčen' chgoša' chlaže' chio' len neda', Jesús? Le' naco' dogualje Xi'in Dios ben' nape' la'zelagüe' yela' gwnabia' xen. Chneyoeda' le' bi gwsaco' neda'. Gwne' ca' dan' ben Jesúsen' mandadw yechoj da' xigüen' yichjlažda'ogüen'.

³⁰ Nach Jesúsen' gože' da' xigüen' yo'o nyaz yichjlaždao' bena':

—¿Bi lio'?

Nach da' xigüen' gwnan:

—Legión lia'.

Gwnan ca' le' zjanaquen da' zan zjajo'on yichjlažda'ogüen'.

³¹ Nach da' xigüe' ca' gosata'yoen Jesús'a bi yeselen' lo yi' gabil.

³² Na' to ya'a da' zoa gala'ze chesaš zan coš chesagwba'. Nach da' xigüe' ca' gosata'yoen Jesúsen' gwnežjue' latje šjaseyo'on yichjlaždao' coš ca'. Na' Jesúsen' benežjue' latje.

³³ Nach besyechojen yichjlaždao' bena' na' jaseyo'on yichjlaždao' coš ca'. Na' besyeyetjes coš ca' le'e ya'a gan' nita'ba' na' jasełažo'ba' lo' nisdao' ga gosatba' gose'ejba' nis.

³⁴ Na' bene' ca' chosoyoe' cošen' besele'ede' dan' ba goquen' bosyoxonje' jasyeyeže' bene' lagüe yež len bene' chaš yixe', gose'e legaque' can' ba goquen.

³⁵ Nach ja'ac bene' jasene'e bixen' goc. Na' cate' besežine' gan' zoa Jesúsen' besele'ede' bena' ba gwyo'o gwyaz da' xigüen', na'a ba chi'e gala'ze cuít Jesúsen' nyaz xalane', na' ba bezoa yichjlažda'ogüe' binlo. Na' besežebe'.

³⁶ Na' bene' ca' besele'ede' can' goquen' goso'e diža' che dan' goc che bena' gwyo'o gwyaz yichjlažda'ogüe' da' xigüen' na' can' ba beyaque'.

³⁷ Nach yogo'lol bene' ca' že' gan' mbane yež Gadaran' jaseta'yoede' Jesúsen' yeze'e lažgaquen', le besežebchgüe'. Nach Jesúsen' beyo'e lo' barcon' cont yeze'e.

³⁸ Na' bena' beyaque cate' Jesúsen' bebeje' da' xigüe' ca' goso'o gosazen yichjlažda'ogüe', gota'yoede' le' gwnežjue' latje šejlene'ne'. Perw Jesúsen' bi be'e latje, san gože'ne':

39 —Beyej ližo' na' jayež bene' lo' yo'o chio' yogo' da' güen da' ba ben Diosen' len le'.

Nach beza' ben' na' gwzologüe' cho'e diža' doxen yežen' yogo' can' ba ben Jesúsen' len le'.

Jesúsen' beyone' xi'in Jairo na' beyone' yeto no'ole bene' gwdane' xe' (Mt. 9:18-26; Mr. 5:21-43)

40 Na' cate' Jesúsen' beľague' nisdaon', bene' zan ba nita' chesebeze' le'. Chesyebechgüede' da' bežine' na'.

41 Na' bžin to bene' le' Jairo, ben' nac to bene' gwnabia' che yodao' che yežna'. Na' bzoa xibe' lao Jesúsen' gota'yoede' le' šejlene' le' liže',

42 le ba zoa gat bi' no'ol che'. Nache' bi' tliša', na' šižinw izguebe'. Na' šlac zej Jesúsen' len le', bene' zan gosebiadi'e le' na' bosochichgüe' le'.

43 Na' len to no'ole ba goc šižinw iz chzoe' gwbao' na' ba benditje doxen xmechue' len bene' güen rmed ca'. Na' notno goc gon le' rmed.

44 Na' gwbiga' no'olen' cože' Jesúsen' na' gwdane' lox xen', nach la' gwlezte gwbao' dan' zoen'.

45 Na' gwna Jesúsen':

—¿Non' gwdan neda'?

Na' ne toe' ca' gosechebe' še ba gosegane' le'. Nach Pedron' len bene' ca' zja'aclen Jesúsen' gose'e le':

—Maestrw, bene' zan bene' za'ac nga chosochie' le' na' chosožigue' le' nile na'le. ¿Bixchen' chnabo' no gwdan xaon'?

46 Nach Jesúsen' gože' ľegaque':

—To bene' ba gwdane' neda'. Chacbe'eda' ba beyacde' len yel'a guac chia'na'.

47 Nach no'olen' cate' gocbe'ede' cbi bgaše' dan' benen', nach gwbigue' lao Jesúsen' do chaž chžebe' na' bzoa xibe' lagüe'na', be'e diža' lao yogo' bene' ca' že'na' bixchen' gwdane' le' na' can' goc la' beyactede'.

48 Nach gož Jesúsa' no'ola':

—Xi'ina', ba beyacdo' dan' chejnilažo' neda'. Beyej binlo.

49 Ne' choe'te Jesúsa' dižan' ca' cate' bžin to bene' gwza' liž Jairo ježe' le':

—Ba got bi' no'ol dao' chion'. Bich gondo' Maestrosa' zed.

50 Perw cate' bene' Jesúsen', na' gože' Jairo:

—Bitw žebo', con gwyejnilaže' neda' na' yeyaquebe'.

51 Na' cate' besežine' liž Jairona', Jesúsen' bi be'e latje yeso'o zan bene' ca' zja'aclen le', san Pedro, len Juan, len Jacobo, na' len xaxna' bi' guat na'ze goso'o.

52 Na' ba chi'chgua žaš na' yogo' bene' ca' že'na' chesebežchgüe'. Na' Jesúsen' gože' ľegaque':

—Bitw cuežle. Biņa' gatbe', san chtasbe'.

53 Na' bosoxiže' gosonle' che' da' zjanezde' ba gotbe'.

54 Perw Jesúsen' be'xue' taca' bi' no'ol guaten' na' bol güiže'be' gože'be':

—No'ol dao', beyas.

55 Nach bebambe', la' beyastebe'. Na' Jesúsen' bene' mandadw yeso'ebe' da' gagwbe'.

56 Na' xaxna'be' besyebanchgüede'. Perw Jesúsen' bene' mandadw bi yeso'e diža' can' goca'.

9

Jesúsa' gwsele' bene' šižinw ca' jasedixjue'ede' xtižen'
(Mt. 10:5-15; Mr. 6:7-13)

¹ Jesúsen' botobe' bene' šižinw ca' gwleje' cont zjanaque' le' txen na' bnežjue' legaque' yela' gwnabia' na' yela' guac cont goc besyebeje' da' xigüe' lo' yichjlaždao' bene', na' lecze ca' beseyone' bene' ca' chesacšene.

² Na' lecze bene' mandadw šjasedixjue'ede' Diosa' nabi'e yichjlaždao' bene' yosozenag che'. Na' bene' mandadw yeseyone' no bene' güe'.

³ Na' gože' legaque':

—Bibi goxe'le tnez. Bitw goxe'le xis da' gwčhiše'le, neca gua'le bzod, ne yet, ne mechw, na' bitw gua'le yeto xcamisle.

⁴ Cate' žinle to liž bene', na' ze yega'anle šlac zoale lagüe yeža'; cate'ch yeža'le yeža', cana'ch yeža'le latja'.

⁵ Na' še zoa ga bi yosolebe' le'e, cate' yeža'le na', le cuibe ni'alen' yo bište cont nachia' malen' chesone' bi chosozenague' xtiža' Diosen'.

⁶ Nach bene' šižinw ca' ja'aque' to to yež, na' gate'teze ja'aque' jasedixjue'ede' diža' güen che Jesúsen' na' beseyone' no bene' güe'.

Ba gosote' Juan ben' bzoa bene' nis

(Mt. 14:1-12; Mr. 6:14-29)

⁷ Na' gobernador Herodes goque' tole bende' yogo'lol da' güen da' chon Jesúsen'. Gocžejlaže', le bał bene' gose'e le' ba beban da' Juan ladjo bene' guat ca'.

⁸ Na' yebale' gosene' šeca da' Elías ben' be' xtiža' Diosen' cani' ba bela' yežlio nga da' yoble. Yebale' chesene' yeto bene' be' xtiža' Diosen' cani'te ba bebane' ladjo bene' guat ca'.

⁹ Na' Herodesen' gwne':

—Neda' bena' mandadw gosechogue' yen Juanna', perw čnoxen' chon da' güen ca dan' chesoe' bene' diža'?

Na' gwdiljwlaže' nacle gone' cont le'ede' Jesúsen'.

Bguagw Jesúsen' gayo' mil bene'

(Mt. 14:13-21; Mr. 6:30-44; Jn. 6:1-14)

¹⁰ Na' cate' besyežin postlw ca' gan' zoa Jesúsen' nach gose'e le' can' ba gosonen'. Na' gwčhi'e legacze' na' ja'aque' to latje gan' mbane yež Betsaida.

¹¹ Cate' gosacbe'e bene' ca' nita' gan' zoa Jesúsen' ba gosa'aque' len bene' ca' zjanaque' le' txen, nach zja'aque' zjana'ogüe' legaque'. Jesúsen' blebe' legaque' na' bsd blo'ede' legaque' Diosen' nabi'e yichjlaždao' bene' yosozenag che', na' beyone' bene' ca' chesacšene.

¹² Cate' gwzolaogwxoa gwbižen', nach bene' šižinw ca' zjanaque' Jesúsen' txen gose'ene':

—Besela' bene' quinga cont šjaya'aque' ga že' bene' do ranšw na' do yež ca' dan' nychj mbi'i cont yeseyiljue' ga yesetase' na' yeseyiljue' da' yese'ej yesagüe', le ca nac latje gan' zoacho nga, naquen to latje daš.

¹³ Perw na' gož Jesúsen' legaque':

—Le'e le güe'e da' yesagüe'.

Na' gose'e le':

—Gayo'ga yetextil na' yechopga beł ya'a de checho, lete še si'chon cont gaquen yesagw yogo'lol bene' quinga.

¹⁴ Gosene' ca' le že' ca gayo' mil bene' byo, bi cuent no'ol ca' len bidao'. Nach Jesúsen' gože' bene' ca' zjanaque' le' txen:

—Le gon mandadw yesebe' šiyon güej bene' ca'.

¹⁵ Nach gosone' mandadw gosebe' yogo' bene' ca',

¹⁶ na' Jesúsen' gwxi'e gayo' yetextilen' na' chope bel ya'ana', na' gwne'e yabale, be'e yela' choxclen che Diosen' na' bzojxen' na' be'en bene' šižinw ca' cont goso'e che to to bene' ca'.

¹⁷ Na' gosagüen' ca goseljde'. Nach bososše'e šižinw žome len yetextil bixjw na' len late' güeje bel da' bega'an.

Pedron' gwne' Jesúsen' naque' bene' gwsela' Dios

(Mt. 16:13-19; Mr. 8:27-29)

¹⁸ Na' gozac yeto, bene' ca' zjanaque' Jesúsen' txen zjanite' len le' lchojiže, na' Jesúsen' choł güiže' Diosen'. Nach gože' legaque':

—¿Bi chesena bene'? ¿Non' naca' neda'?

¹⁹ Na' gose'e le':

—Bałe' chesene' naco' da' Juan ben' bzoe' bene' nis. Na' yebałe' chesene' naco' Elías ben' be' xtiža' Diosen' cani'. Na' yebałe' chesene' naco' yeto bene' be' xtiža' Diosen' cani' ben' ba' beban ladjo bene' guat ca'.

²⁰ Nach gože' legaque':

—¿Chixe le'e? ¿No žale naca'?

Na' gož Pedron' le':

—Len' naco' Cristo ben' gwlej Diosen' cont yedenabi'o.

Jesúsen' gwdixjue'ede' gate'

(Mt. 16:20-28; Mr. 8:30-9:1)

²¹ Nach Jesúsen' gože' legaque' nono yese'e naque' ben' gwlej Diosen' cont yedenabi'e.

²² Na' gože' legaque':

—Da' zan da' saca'zi'a, neda' naca' ben' gwsela' Dios golja' benačh. Na' bene' gole blao ca' chesenabia' nación chechon' na' bzož gwnabia' ca', na' bene' ca' chososed chosolo'e ley dan' bzoj da' Moisés, bi yesele'ede' neda' güen dan' bi gosejle'e chia', na' yesote'nda', perw yeyon ža yebana' ladjo bene' guat ca'.

²³ Nach gože' yogo' bene' ca' zjanaque' le' txen:

—Note'tez bene' še chaclaže' gaque' neda' txen, cheyala' cuejyichj cuine' yogo' ža, la'czla' saca'zi'e, na' gone' can' nia' neda'.

²⁴ Note'tez bene' chacde' gone' cont bi saca'zi'e o cont nono yesot le', benan' cuiayi'. Na' note'teze bene' chzanlaže' cuine' saca'zi'e o gate' ne' chia' neda', ba de yela' mban che' toli tocaņe.

²⁵ ¿Bixe zejenna' to bene' nabi'e doxen yežlion' še cuiaye'e na' bi gata' yela' mban che' toli tocaņe?

²⁶ Na' note'tez bene' še cheto'ede' par ye'e lježe' chejnilaže' neda' na' še cheto'ede' par gwzenague' xtižan', lecze ca' neda' yeto'eda' che' par nia' naque' neda' txen, neda' naca' ben' gwsela' Diosen' golja' benačh. Yeto'eda' che' cate' yida' da' yoble nsa'a yela' zaca' juisyw chia' na' yela' zaca' juisyw che Xa' Diosen' na' che' ben' zjanac angl che'.

²⁷ Da' li žia' le'e, bałle nita'le nga na'a bina' gatle cate' žin ža le'ele gwlo'e Diosen' yela' gwnabia' čhen'.

Jesúsen' goque' ca to be'ni'

(Mt. 17:1-8; Mr. 9:2-8)

²⁸ Nag goc to xman gwna Jesúsen' ca', gwyeye' to lo ya'a jel güiže' Diosen' na' gwče'e Pedro len Juan len Jacobo.

²⁹ Na' šlac choł güiže' Diosen' goc cho'alagüen' ca da' bža'. Na' xałanen' beyaquen šiš xila' na' goctiten.

30 Na' lo hora' besežin čhoph bene' gan' zoa Jesúsen', toe' da' Moisés na' yetoe' da' Elías bosošaljlene' le'.

31 Goso'e diža' gosene' ba zoa gat Jesúsa' Jerusalén. Na' be'ni' che Diosen' gwyechjen bsenin' legaque'.

32 Na' Pedron' len bene' ca' yečhope leca gosac ša tase' perw bi gosetase' na' besele'ede' Jesúsen' chactit cho'alagüen' na' zeche' choe'lene' da' Moisésen' len da' Elíasen' diža'.

33 Na' cate' ba cheza' da' Moisésen' len da' Elíasen', Pedroa' gože' Jesúsen':
—iMaestrw, leca güenna' zoacho nga! Gonto' šone ranšw, to čhio', to che Moisés, na' yeto che Elías.

Con gwne' ca' sin ca bene' xbab.

34 Ne' choe'te Pedron' diža' cate' to bejw gwyechjen legaque' na' besežebe' lagüe dan' goc ca'.

35 Na' lo' bejon' gosende' gwne' Diosen', gwne':

—Benga Xi'ina' ben chacda'. Le gwzenag che'.

36 Na' cate' beyož gwna Diosen' ca', besele'ede' yetoze Jesúsen'. Na' ca' beyoža' bibi diža' gosoe'lene' bene' ca' yezica'chle can' nac dan' ba gosende' na' dan' ba besele'ede'. Con gosenita'teze' šžize.

Beyon Jesúsen' to bi' gwyo'o gwyaz da' xigüe'

(Mt. 17:14-21; Mr. 9:14-29)

37 Na' beteyo cate' ba besyeyetje' ya'ana' bene' zan jasešague' legaque' gan' nite'na'.

38 Na' toe' gwne' zižje, gože' Jesúsen':

—Maestrw, chata'yoeda' le' gaclenšco' xi'ina' nga. Nache' xi'ina' tliša'.

39 Chniz da' xigüen' lebe' na' la' chgosya'aten lebe', chonen cont chazbe' šon na' cont chžia bžina' cho'abe' na' chonen lebe' zi', na' cane chsanen lebe'.

40 Ba gota'yoeda' bene' ca' zjanaque' le' txen cont yesyebeje' da' xigüen' yo'o nyazbe', perw bitw gosezaque'de'.

41 Nach Jesúsen' gože' bene' ca' že' na':

—iLe'e bene' bi chejnilaže', chonchgualle clele! žšna chyažjen soalena' le'e cont šejnilaže'le? žBatca' zelao na'lagua' le'e?

Nach gože' xa bidao'na':

—Ben bidao' chion' nile.

42 Na' šlac zjasane'be' lao Jesúsen', da' xigüen' benen cont gwyazbe' šon, na' bchix btole' lebe' lo yo. Na' Jesúsen' gwdile' da' xigüen' cont bechojen lo' yichjlažda'obe'. Nach beyaquebe'. Gwdena' beyone'be' lo na' xabe'.

43 Na' yogo' ben' že'na' besyebande' cate' besele'ede' yela' guac che Diosen'.

Da' yoble Jesúsen' gwdixjue'ede' gate'

(Mt. 17:22-23; Mr. 9:30-32)

Na' besyebande' che yogo'lol dan' chon Jesúsen', na' šlac nite' ca', Jesúsen' gože' bene' ca' zjanaque' le' txen:

44—Le gon cont diža' nga šo'on yichjlažda'ole, na' bi ganlaže'len. Neda' gaca' lo na' ben' chesegue'enda', neda' naca' ben' gwseja' Diosen' golja' benačh.

45 Perw legaque' bitw gosejni'ide' diža' dan' be' Jesúsen', le naquen ca to da' ngaše' len legaque'. Na' besežebe' yesenabde'ne' bi zejen dan' gože' legaquen'.

Gosacyože' noe' nacch blao

(Mt. 18:1-5; Mr. 9:33-37)

46 Na' bene' ca' zjanaque' Jesúsen' txen gosacyože' noe' nacch blao.

⁴⁷ Jesúsen' goçbe'ede' xbab dan' chesonen', na' be_{xue}' to bidao' na' bzeche'be' cuite'na'

⁴⁸ na' gože' legaue':

—Note'teze bene' chone' güen len to bidao' ca bi' nga ne_{che} da' chejnilaže' neda', choncze' güen len neda'. Na' note'teze chon güen len neda' choncze' güen len Dios ben' gwsela' neda'. Na' note'tez le'e cate' chon_{le} xbab che cuin_{le} bibi zaca'tecle, canan' ba nacle bene' blao.

Bene' bi chon contr chio' txenczen' chone' len chio'

(Mr. 9:38-40)

⁴⁹ Nach Juanna' gože'ne':

—Maestrw, bežagto' to bene' cho'e lao' na' chebeje' da' xigüe' da' yo'o nyaz bene'. Na' bžonto' gone' ca, le bi chone' chio' txen.

⁵⁰ Nach Jesúsen' gože'ne':

—Bitw gwžonle gone' ca, le še to bene' bi chone' contr chio', txenczen' chone' len chio'.

Jesúsen' gwdile' Jacobo len Juan

⁵¹ Na' lagüe' ba zoa bagwze yezi' yeca'a Diosen' le', beçhoglaže' šeje' Jerusalén.

⁵² Na' gwsele' to chope bene' gosebialao lagüe'na'. Na' ja'aque' to yež gan' mbane distritw Samaria cont šjasesin_i'e gan' soa Jesúsen' len bene' ca' zjanaque' le' txen.

⁵³ Perw bene' Samaria ca' bi bosolebe' Jesúsen' len bene' ca' nžague', le gosache'ede' zja'aque' Jerusalén.

⁵⁴ Na' chope bene' ca' zjanaque' Jesúsen' txen, Jacobon' len Juanna', cate' besele'ede' can' goson bene' Samaria ca', nach gosenabde' Jesúsen':

—Maestrw, žche'ndo' gonto' can' ben da' Elías ben' be' xtiža' Diosen' cani', nabeto' Diosen' sele' yi' gwzeyen bene' qui?

⁵⁵ Nach Jesúsen' gwyeçhje' gwdile' legaue' gwne':

—Le'e bitw nezele non' chnabia' yichjlažda'ole.

⁵⁶ Neda' bitw za'a cont gwžia_{ya}'a be_{naç}, san za'a cont gwnežjua'ne' yela' mban toli toca_{ne}, neda' naca' ben' gwsela' Diosen' golja' be_{naç}.

Nach ja'aque' yež yoble.

Can' gož Jesúsen' bene' ca' gosaclaže' yesaque' le' txen

(Mt. 8:19-22)

⁵⁷ Šlac zja'aque' na', to bene' gože' le':

—Sa'lena' le' gate'teze šejo'.

⁵⁸ Nach gož Jesúsen' le':

—Nita' xišna' beza' na' lecz chesyežin xišna' be dao' ca' zjazoa xil be chaš le'e yaba, perw bibi xišna' neda' de ga yezi'laža', neda' naca' ben' gwsela' Diosen' golja' be_{naç}.

⁵⁹ Nach Jesúsen' gože' yeto bene':

—Yo'o len neda'.

Perw bena' gože' le':

—Xana', za' got xa'. Beņšca latje zgua'tec šjaycuaša'ne'.

⁶⁰ Na' gož Jesúsen' le':

—Bene' ca' zjanac yichjlažda'ogüe' ca che bene' guat, legaue' guaccze yosocuaše' yezica'chle bene' guat. Perw le', jatixjue'e bene' Diosa' nabi'e yichjlaždao' bene' yosozenague' che'.

⁶¹ Nach lecze yetoe' gože' Jesúsen':

—Sa'lena' le' Xana', perw zgua'tec šjayzenda' xaxna'a len diaža chia'.

⁶² Jesúsen' gože' le':

—Bene' ba gwzolao nagüe' neda', še bi ze'e do yichj do laže', o še yo'o yichje' da' ba gwdele, bi zaque' gone' xšin Diosen'. Naque' ca to bene' chñe'e coscože'le šlac chgua'ane' go'n.

10

Jesúsen' gwsele' gayonši bene' šjasedixjue'ede' xtiže'

¹ Na' gwdechle Xancho Jesúsen' gwleje' yegayonši bene' na' bene' mandadw yesebialagüe' šja'ac chope güeje' to to yež ga za' šej le'.

² Na' cate' za' yesa'aque' gože' legaque':

—Chyažje bene' zan yeseixjue'ede' xtiža' Diosen', perw to chopga bene' nita' yeseixjue'eden'. Na' bene' yosozenag che Diosen' zjazacalebe' ca to coseš xen da' chyažje yedobe. Da'nan' le nabe Xancho Diosen' seļa'che' bene' yesaclene' chio' yotobcho coseš chen'.

³ Le šja'ac, le neda' chseļa' le'e šjatixjue'ele xtižen' len bene' ca' chesegue'ede' le'e. Zacaleble ca xila' dao' ben' chja'ac gan' že' beco'yo.

⁴ Bitw gua'le bzod, ne mechw, ne yel, na' bi šele guaple bene' tiox bene' yežagle chanez.

⁵ Note'tez liž šo'le zgua'tec ñale: “Chñablaže'šca' soa cuezle binlo len xbab dan' yo'o lo' yichjlažda'ole, le'e nita'le nga.”

⁶ Na' še zoa to bene' chaclaže' soa cueze' binlo len yichjlažda'ogüe'na', nach gac can' gwñablaže'le cont soa cueze' binlo; perw še nono zoa bene' chaclaže' soa cueze' binlo len yichjlažda'ogüe', bi gac dan' ba gwñablaže'len'.

⁷ Na' lo' yo'o na'teze yega'anle. Bitw tale to to yo'o. Le ye'ej le gagw bite'teze da' chesone' ye'ej gagwle. Ca to bene' güen žin cheyaļa' si' laxjue', lecz ca' le'e zaca'le yesone' da' ye'ej gagwle.

⁸ Na' cate' žinle to yež ga chesonxene' le'e, le ye'ej le gagwteze da' yesone' le'e.

⁹ Le yeyon bene' güe' bene' nita' yež gan' žinle, na' le' ye'e: “Ba bžin ža gwzenagle che Diosen' cont ñabi'e yichjlažda'ole.”

¹⁰ Perw na' cate' žinle to yež ga bi yosolebe' le'e, le šja'ac la cay na' le ye'e:

¹¹ “Bište che lažle nga da' žia ñi'ato', cuibton' cont gwlo'eto' le'e malen' chonle bi chzenagle xtiža' Diosen' dan' choe'to'. Perw chyixjue'eto' le'e Diosen' chazlaže' gwzenagle che' cont ñabi'e yichjlažda'olen'.”

¹² Da' mal xen goson bene' ciuda Sodoma cani', perw žia' le'e, žan' gac juisyw bene' ca' bi bosolebe' le'e ližen', yesa'le'chde' clal ca bene' Sodomán'.

Bene' ca' bi chosozenag xtiža' Jesúsen'

(Mt. 11:20-24)

¹³ Nach gozna Jesúsen':

—iNyaše'chguaze gac che le'e bene' Corazín! iNyaše'chguaze gac che le'e bene' Betsaida! Bene' ca' nita' Tiro na' Sidón ba besyetinjde' xtoļa'gaque' šaca' blo'egacda'ne' yela' guac chia' ca da' ba blo'eda' le'e. Na' bosose'e ca gosone' šaca' bena' ca', chesazlje' to lache' gasj da' naquen zeše' na' chosože'elja cuine' no de cont yesacbe'e bene' ba boša' yichjlažda'ogüen'.

¹⁴ Saca'zi'chle clal ca bene' že' Tiro na' Sidón cate' žin ža gac juisyw.

¹⁵ Le'e nita'le yež Capernaum chonle xbab šeca Diosen' gonchgüe' le'e yela' bala'añ. Bi gone' le'e yela' bala'añ san gone' le'e castigw toli tocane dan' bi chejle'le chia'.

16 Nach Jesúsen' goze'e bene' gayonši ca':

—Bene' gwzenag xtiža'len' lecze gwzenague' xtiža'na', na' bene' goncze yichjlagüe' bi gwzenague' xtiža'len', lecze bi gwzenague' chia' neda'. Na' bene' goncze yichjlagüe' bi gwzenague' xtiža'na', lecze bi gwzenague' xtiža' Diosen' ben' gwseła' neda'.

Besyežin bene' gayonši ca'

17 Bene' gayonši ca' cate' beyož jasedixjue'ede' xtiža' Jesúsen', besyežine' gan' zoen' na' besyebechgüede'. Nach gose'e Jesúsen':

—Xanto', chebechgüeto' can' goquen', le da' xigüe' ca' chosozenaguen cheto' cate' chonto' mandadw yesyechojen lo' yichjlaždao' bene' choe'to' lao'.

18 Na' gože' legaue':

—Ble'eda' bedao'nez gwnit yela' gwnabia' che Satanásen' dan' chnabia' da' xigüe' ca'.

19 Ba bena' le'e yela' guac cont gwlej gwšoşjle no bel znia na' no bejxoni' na' cont soele Satanásen' bi gonen le'e gan. Na' bibi de da' gonen le'e zi'.

20 Perw bi yebele neche da' xigüen' chosozenaguen chele, san le yebe da' ba bzoj Diosen' lala le'e libr gan' nyoj la yogo'lol xi'ine' ca'.

Bebechgüe Jesúsen'

(Mt. 11:25-27; 13:16-17)

21 Za' beyože gwna Jesúsen' ca' nach ben Spiritw che Diosen' cont bebechgüede' na' bol güiže' Diosen', gwne':

—Xa', le' chnabi'o bene' ca' že' yaba na' yežlion'. Na' chona' yela' choxclen chio' ba bzejni'ido' bał bene'. Ba bzejni'ido' bene' ca' gosacbe'ede' cheseyažjde' no gwsed gwlo'e legaue'. Na' bitw bzejni'ido' bene' ca' cheson xbab zjanaque' bene' sina' na' bene' zjanejni'i. Beno' ca' Xa', le can' gwyazlažo'.

22 Nach gože' bene' ca' že'na':

—Xan' ba bene' lo' na' chona' cont chombia' bene' le'. Le' nombia'yane' neda', na' neda' nombia'yana' le'. Na' bene' ca' ba gwleja' ba zjanombi'e Xan'. Na' nono nochle zjanombia' Xa' ne neda'.

23 Na' gwyechj Jesúsen' gwne' bene' ca' zjanaque' le' txen na' gože' legaue':

—Mbachgua zoale chle'ele neda' na' chle'etele da' ca' chona'.

24 Na' chnia' le'e zan bene' ca' goso'e xtiža' Diosen' cani' len bene' zan rey gosacłaže' yesele'ede' dan' chle'ele na'a, perw bitw goła' yesele'eden', na' gosacłaže' yesende' dan' chenelen', perw bitw goła' yesenden'.

Jempl che to bene' güen, bene' Samaria

25 Na' gwzoža' to bene' nsedchgüe' ley dan' bzoj da' Moisés, gocłaže' cueje' Jesúsen' diža' da' gwčhine' contr le' na' gože'ne':

—Maestrw, ¿bi da' cheyała' gona' cont gata' yela' mban chia' toli tocaņe?

26 Na' gož Jesúsen' le':

—¿Bi nyoj le'e leyna'? ¿Nac žan?

27 Na' ben' chejni'ichgüe' leyna' boži'e xtiža' Jesúsen', gože' le':

—Ley che Diosa' žan: "Cheyała' gaquecho Xancho Diosen' con ca zelao chejni'icho, do yichj do laže'cho, do fuers valor checho, na' gaque lježcho ca chaque cuincho."

28 Nach gož Jesúsen' le':

—Da' licze can' ba gwnao'na'. Can' cheyała' gono' cont bano' toli tocaņe.

29 Na' bena' gocłaže' gwlo'ede' choncze' can' ža leyna', na' gože' Jesúsen':

—¿Non' nac bene' lježa' ben' cheyała' gacda'?

30 Na' Jesúsen' gože' le':

—To bene' beza' Jerusalén par yežine' yež Jericó, jasyexen bene' gwban le'. Na' goseyine' xalane' na' gosot goseyine' le'. Nach besyeya'aque' bosocua'ane' le' cacze to bene' guat.

31 Na' to bꞑoz che bene' Israel ca' gwdie' lo neza', na' cate' ble'ede' bena' dena', nach gwcuase' to šla'ale neza' na' con gwdeze'.

32 Lecz ca' ben to diaža che da' bene' Leví ca'. (Xi'in diaža che da' Leví yo'o lo na'gaque' chesoṇe' mandadw lo' yodao' blao.) Bena' zeje' tnez na' cate' ble'ede' ben' dena', na' gwcuase' to šla'ale neza' na' con gwdeze'.

33 Nach to bene' Samaria ngü'e neza' nlague' xpurrue' na' bžine' gan' de bena', perw na' le' cate' ble'ede' ben' beyaše' laže'.

34 Na' gwbigue' gan' de' na' bene' le' rmed, bšone' set len vino lao güe' che'na' na' bꞑhejen' lache'. Na' božie' le' cože' xpurrue' na' beꞑhe'e le' ga zoa to mesón ga gwne'e le'.

35 Na' beteyo cate' beza' bene' Samaria, gwleje' mechw da' zaca' ca' chop ža žin na' bnežjuen' xan mesónna' ca' laxjue', na' gože' le': "Gwna' bengana' še žan bichle da' gono' gastw na' chixjuan' cate' zeza'a."

36 Beyož be' Jesúsen' diža' can' goc che ben' jasyexen bene' gwban ca', nach gože' bena' chsed chlo'e leyna':

—¿Nac chono' xbab? ¿No bene' ca' šoṇe' gocde'ne' ca' bene' lježe'?

37 Nach bena' chsed chlo'e leyna' gože' Jesúsen':

—Bena' beyaše' beži'ilaže'de' bena' jasyexen gwban ca'.

Nach gož Jesúsen' le':

—Lecze ca' cheyała' gono' le', yeyaše' yeži'ilaže'do' yogo'lol bene'.

Jesúsa' jane'e Marta na' María

38 Na' gosego'oche' nez na' besyežine' to yež ga zoa to no'ole lie' Marta, na' Jesúsen' gwyeje' liže'na'.

39 Na' zoa to bile' le' María. Na' Marían' gwchi'e cuít Jesúsen' bzenague' xtiže'na'.

40 Perw na' Martan' belalchgüede' bsiṇi'e da' yesagüe'. Na' gwyeje' lao Jesúsen' na' gože' le':

—Xana', ¿bi chacdo' median can' bcua'aṇ bene' bilan' neda' toza' len mandadua'? Benšca mandadw gaclene' neda'.

41 Xancho Jesúsen' gože' le':

—Marta, chi'chgua yichjo' mandadua' na' chacžejlažo' dan' nyanchguan.

42 María nga ba gwleje' da' naquech da' güen. Chi'e chzenague' chia', na' notno gwžon gone' ca', le len da' nacch da' žialao da' cheyała' gonle'.

11

Jesúsen' blo'ede' can' yosoł güiže' Diosen'

(Mt. 6:9-15; 7:7-11)

1 Na' gwzoa Jesúsa' to latje chol güiže' Diosen'. Cate' beyož bol güiže'ne' to bene' ca' zjanaque' le' txen gože' le':

—Xanto', bzejni'i neto' nac cheyała' yol güižto' Diosen', can' bzejni'i da' Juanna' bene' ca' gosaque' txen len le'.

2 Na' Jesúsen' gože' legaque':

—Cate' yol güižle Diosen', quinga nale:

Xato' bene' zoa yaba,
chnabto' yogo'lol bene' yesonxene' le'.

Zelaže'to' nabi'o yichjlaždao' yogo' neto' benačh.

Gacšca can' chazlažo' yežlio nga can' chac yabana'.

³ Ca nac dan' che'ej chagwto' tža tža, benšca čheto' na'a.

⁴ Na' bezi'xenšca čheto', le lencze neto' chezi'xento' che ljež benačhto' bite'tez da' chesonde' neto'.

Na' bitw go'o latje soa da' gwžigan' neto' gonto' da' mal, san bcuase bcue'ejšca neto' len da' mala'.

⁵ Nach gož Jesúsen' legaue':

—Le gon xbab še šejle liž bene' migw čhele do chel na' ye'lnē': "Migw chia', benšca neda' šone yetextil.

⁶ Ba bla' to bene' migw chia' bene' za' zito', na' bibi de chia' da' gua'ane' gagüe'."

⁷ Na' chixe še migw chelen' yo'e lo' yo'ote yoži'e xtiža'len': "Bitw gondo' neda' zed, le ba nyeyjw cho'a yo'o na' ba deto' chtasto' len bi' čheto' ca'. Bi gac čhasa' gona' dan' chyažjdo'."

⁸ Chnia' le'e, la'czla' naque' migw čhele, bitw ye'nde' chase' gone' dan' chyažjele, perw še gata'yoelne' šša na' čhasšaze' gone' bite'tez da' chyažjele.

⁹ Na' chnia' le'e, še žan bi da' chyažjecho, chnabchon. Še žan to da' chaclaže'cho želecho, chyiljwchon. Še žan chaclaže'cho saljw bene' cho'a yo'o čhe', na' necho cho'a yo'on cont saljue'. Na' ca'cze cheyała' ye'le Diosen' cate' bi da' chyažjele o bi da' chaclaže'le gone'.

¹⁰ Na' note'tezle še bi da' nabelene', gonczen'. Na' še bi dan' che'nele gwzejni'ide' le'e, gwzejni'iczdēn'. Na' note'tezle še žan chaclaže'le gac to da' gac, yoł güižle Diosen' can' chon to bene' chnie' cho'a yo'o, nach Diosen' gone' cont gacczen.

¹¹ Na' le'e nacle xa bidao', še xi'inle nabebe' le'e yetextil, čgwnežjwlebe' to yej? Na' še nabebe' le'e yid beł gagwbe' čgwnežjwlebe' to be xigüe'?

¹² Na' še nabebe' le'e to žit gagwbe' čgwnežjwlebe' to be xjoni'? Cabi gonle ca'.

¹³ La' nacle bene' mal, nezczele gwnežjo xi'inle to da' güen. Nacchxe güen gon Xacho Diosen' ben' zoa yaba gwnežjue' Spiritw čhen' soan lo' yichjlaždao' bene' chnab len.

Gosene' Jesúsen' bebeje' da' xigüe' len yela' guac che Beelzebú

(Mt. 12:22-30; Mr. 3:19-27)

¹⁴ Gwzoa to bene' gwyo'o gwyaz da' xigüe' yichjlažda'ogüe' na' benen cont bi goc nie'. Na' Jesúsen' bebeje' da' xigüe' lo' yichjlažda'ogüe'na'. Na' cate' bechoj da' xigüen', na' goc benie'. Na' bene' ca' že'na' besyebanchgüede'.

¹⁵ Perw bale' gosene':

—Beelzebú dan' chnabia' da' xigüe' ca' chaclenen le' cont chebeje' da' xigüe' zjajo'o zjanyaz yichjlaždao' bene'.

¹⁶ Na' yebale' cont gosagüe' xya čhe' gosenabde'ne' gone' to yela' guac da' yesele'ede' le'e yaban' cont yeseñezde' še da' licze Diosa' gwsele' le'.

¹⁷ Perw Jesúsen' gocbe'ede' xbab dan' gosone', na' gože' legaue':

—Ša to gobiern choje' čhop šon cuen na' yeyoža' yesediłe' legacze', gobiernna' bi sibi'e. Na' še bene' to lo' yo'o yesechoje' čhople na' yesediłe' legacze', gague šša yesenite' txen.

¹⁸ Na' še Satanásen' dan' chnabia' da' xigüen' len da' xigüe' čhen ca' yesechojen čhople na' yesediłen, lecze bi sibian', san na' yeyož yedon. Le'e chnale Beelzebún' dan' chnabia' da' xigüe' ca' chaclenen neda' cont chebeja' da' xigüe' zjajo'o zjanyaz yichjlaždao' bene'.

19 Šaca' naquen can' žalen', lecze zejen dan' chnabia' da' xigüe' ca' chaclenen bene' lježle ca' chesybeje' da' xigüe' zjajo'o zjanyaz yichjlaždao' bene'. Bene' lježle ca' yese'e le'e cleden' žale.

20 Neda' chebeja' da' xigüe' len yela' guac che Dios, na' dan' chona' ca' chlo'en ba bžin ža Diosen' nabi'e yichjlaždao' bene' yosozenag che'.

21 'Satanásen' naquen ca to bene' gual, na' neda' naccha' bene' gualch. Na' nezele cate' to bene' gual chape' ližen' len spada, bibi gac che da' de che'.

22 Perw cate' žin to bene' gualch ca le' na' tillene' le', nach ben' nac bene' gualch gon gan. Na' que'e spada che ben' da'na' zoe' lez gaclen le' na' ca'atie' bichle da' de che' na' čhisen' len bene' migw che' ca'.

23 'Bene' bi chone' neda' txen, chone' contr neda'. Na' bene' bi chaclene' cont yosozenag bene' yoble čhia', zeje diža' chone' par bi yosozenague' čhia'.

Da' xigüe'na' yeyo'on da' yoble lo' yichjlaždao' bene'
(Mt. 12:43-45)

24 'Na' še to da' xigüe' da' gwyo'o gwyaz lo' yichjlaždao' bene' yechojen, nach lažen nile na'le yeyiljon ga soan mbalaz. Na' še bibi latje želen, nach nan: "Da' yoblecze šjajo'a lo' yichjlaždao' ben' gan' ba gwyo'a."

25 Nach yeyejen da' yoble gan' zoa ben'. Cate' le'en bač cheyone' güen, na' ba zoache' binlo,

26 nach šjaytoben yegaže da' xigüe' ca' da' zjanacch malech ca len, na' txen yeso'on lo' yichjlažda'ogüe'na'. Na' še bač goc ca', gacch mal che bena' clel ca dan' ba goc che' da' nechw.

Mbalaz nita' bene' ca' chosozenag xtiža' Diosen'

27 Šlac be' Jesúsen' diža' quinga, gwzoo to no'ole gacho|bene' ca' že' gan' bsd blo'ede', na' no'ola' gwne' zižje, gože'ne':

—Mbalaz zoa no'ola' gwxa' le' na' bguaže' le'.

28 Perw na' Jesúsen' gože'ne':

—Nacchxe mbalaz nita' bene' ca' chosozenag xtiža' Diosen' na' chesone' can' žanna'.

Bene' bi chosozenag che Diosen' chesenabe' gon Jesúsen' to yela' guac
(Mt. 12:38-42; Mr. 8:12)

29 Na' bene' zan gosebigue' gosechjde' Jesúsen', nach Jesúsen' gwne':

—Le'e zoale na'a nacchuale bene' laždao' xi'a. Čhñable gona' yeto yela' guac da' le'ele cont nezele še Diosa' gwsele' neda', perw bi gona' ca dan' chñablena', le ba ble'ele da' ca' chona'. Lete gac čhia' can' goc che da' Jonás ben' be' xtiža' Diosen' cani'.

30 Na' ca dan' goc che Jonásen' blo'en bene' Níneve ca' Diosen' gwsele' le', ca'cze dan' gac čhia' gwlo'en le'e zoale na'a Diosen' gwsele' neda' golja' be'nač.

31 Cate' žin ža gon Diosen' castigw che yogo'lol bene' cheson da' mal, da' no'olen' gwnabi'e bene' Seba ca' yedecuiše' le'e mban|le na'a. Le' gwze'e gan' nac zito'chgua na' bide' nga cont bedezenague' diža' sina' dan' be' da' rey Salomón len le', na' neda' zoa' nga naccha' bene' blaoch ca da' Salomón na' bitw čhenagle čhia'.

32 Na' cate' žin ža gon Diosen' castigw che yogo'lol bene' cheson da' mal, lecze žana' yesyeban bene' Nínive ca' na' yosocuiše' le'e nita'le ža na'aža. Le' legaque' besyetinjde' xtola'gaque' cate' da' Jonásen' gwduxjue'ede'ne' can' gwna Diosen'. Na' neda' zoa' nga naccha' bene' blaoch ca da' Jonása' na' bi čhenagle čhia'.

Dan' bsd blo'e Jesúsen' naquen ca to yi'
(Mt. 5:15; 6:22-23)

³³ 'Notno gwguala' to yi' na' gw dosen' caj, na' nēca gw cuašen' ga yoble ga nono le'e len, san chde'en le'e ze'e cont gw senin' len yogo'lo' beñe' yeso'o lo' yo'ona'.

³⁴ Žia yejlaochō cont le'echo. Con še bibi chaquen chle'eczecho binlo. Perw še nchōlcho, bi chle'echo. Ca'czen' naquen len yichjlažda'ochon'. Še naccho beñe' laždao' güen, yo'o be'ni' che Diosen' lo' yichjlažda'ochon'. Perw še naccho beñe' mal, chol nac yichjlažda'ochon'.

³⁵ Da'nan' le gon cont gacle beñe' laždao' güen, na' šo' be'ni' che Diosen' yichjlažda'ole.

³⁶ Še nyeni' yichjlažda'olen' na' bibi da' mal yo'on, gw senin' czen xnezle can' chseni' to yi' ga nac chol.

Jesúsen' gože' beñe' fariseo ca' zjanape' do'la' na' len beñe' ca' chososed chosolo'e ley

(Mt. 23:1-36; Mr. 12:38-40; Lc. 20:45-47)

³⁷ Cate' beyož be' Jesúsen' diža' quinga, to beñe' fariseo gwche'e le' liže' cont yesagüe'. Na' gwoyo' Jesúsen' liž beñe' fariseon' na' gwchi'e cho'a mesen'.

³⁸ Na' beñe' fariseon' bebande' ble'ede' bitw bona' Jesúsen' cate' za' gagüe' can' cheson' legaque' chesacde' chebe Diosen' legaque' dan' chesone' ca'.

³⁹ Na' Xancho Jesúsen' gože' le':

—Le'e bene' fariseo nacle ca xiga' ye'en da' chchin beñe' na' chyibe' cožen' binlo perw bi chyibe' do lo'en. Chonle cont chesaque beñe' nacle beñe' güen, perw chebele chca'ale bi da' de che beñe' na' nacle beñe' mal juisyw.

⁴⁰ Bicze bi chejni'ile. Chi' yichjle gacle xilaže' len cuerp chelen'. Lecz ca' cheyala' cue' yichjle gacle xilaže' len yichjlažda'ole, le Diosen' ben' bene' cuerp chechon' lecze bene' yichjlažda'ochon'.

⁴¹ Le yeyaše' beñe' na' le gwnežjo bi da' cheseyažjde'. Še gonle ca', nacia' nacle beñe' laždao' xilaže'.

⁴² 'iNyaše'chguaze gac che le'e beñe' fariseo! La'czla' chnežjwle Diosen' to part lao ši part che yixe'güej, che yej Santa María, na' che bichle cuan chele, bibi zejen dan' bi chonle bichle da' nac da' güen, na' da' bi chaquale Diosen'. Da' nac da' žialao gonle, gonle da' nac güen na' gaquale Diosen'. Perw bi cuejyichjle gwnežjwle da' ca' chnežjwle Diosen'.

⁴³ 'iNyaše'chguaze gac che le'e beñe' fariseo! Chzelaže'le cue'le lo' yodao' txen len beñe' blao ca', na' cate' chejle do gan' chac ya'a chaclaže'le yesonxen beñe' le'e.

⁴⁴ 'iNyaše'chguaze gac che le'e chsed chlo'ele da' bzoj da' Moisés na' len le'e beñe' fariseo! Chonle cont nacia' gan' xoa ba che beñe' guaten', le ley chechon' žan zjanaquen zban na' bi cheyala' gwlejchon. Perw le'e nacle ca ba da' bi zjanacia'. Chosozenag beñe' chele na' bi chesacbe'ede' nacle beñe' laždao' zban.

⁴⁵ To bene' chsed chlo'e ley boži'e xtiža' Jesúsen', gože'ne':

—Maestrw, lagüe da' žo' da' quinga, chaqueton' zi'.

⁴⁶ Na' gož Jesúsen' legaque':

—Lecz ca' le'e chsed chlo'ele ley da' bzoj da' Moisés, inyaše'chguaze gac chele! Da' žale da' zan da' cheyala' yeson beñe', chonle leyna' ca to yoa' da' nocze no do'e, to yoa' da' chaclaže'le yesoa' beñe' yoble, perw le'e ne late'ze bi chaclaže'le gua'len.

⁴⁷⁻⁴⁸ ;Nyaše' chguaze gac che le'e chonšagüe' le cho'a ba che da' bene' ca' gosoe' xtiža' Diosen' cani! Chacle toze len da' xoxxta'ole ca' ben' gosote' legaue'. Na' dan' chonle ca', zejen chazlaže' le dan' gosote' legaue'.

⁴⁹ 'Da'nan' Diosen' lao yela' sina' che' gwne' sele' bene' yesoe'lene' le'e xtižen' na' sele' postlw che' ca' len le'e. Na' gwne' gotle baļe' na' gwchi gwsaca'le yebale'.

⁵⁰ Na' da' li ba chonle can' gwnen'. Da'nan' si'le castigw che yela' got che yogo' bene' ca' gosoe' xtižen' gwzolaon caten' gwxete yežlion' chžinten ža na'aža.

⁵¹ Zan bene' gosot bene' yoble legaue' gwzolaon len da' Abel ben' beyot da' biše' Cain le', na' beyožen len da' Zacarias ben' gosote' ladjo yodao' blaona' na' ladjo mes de vej dan' zoa chyo'o yodao' gan' chesote' beyixe' cont chesonxene' Diosen'. Na' le'e mbanle na'a si'le castigw che yela' got che yogo' bene' ca'.

⁵² ;Nyaše' chguaze nac le'e chsed chlo'ele ley che Diosen'! Bitw chzejni'ile bene' leyna' to liča can' naquen, neca chzenagle chen. Na' bene' chesacļaže' yosozenaguen', neca choe'le laže yosozenaguen'.

⁵³ Na' cate' beyož be' Jesúsen' diža' quinga, nach bene' fariseo ca' na' bene' ca' chososed chosolo'e ley gosacyožchgüe' len le'. Na' gosaclaže' yesebeje' le' diža'

⁵⁴ le gosaclaže' choj dižan' cho'e da' yosode'ede' yesagüe' xya che'.

12

Yela' güexoayag che bene' fariseo

¹ Na' goc zan mil bene' besežague' gan' zoa Jesúsen', catec bene' zan besežag bosolej bososošjte ni'a lježe'. Na' Jesúsen' zgua'tec gwzolažüe' be'e diža' len bene' ca' zjanaque' le' txen, gože' legaue':

—Le gwsaca' len levadura che bene' fariseo ca'. Dan' cheseziye'e bene' cont yesacde' zjanaque' bene' güen zaca'leben ca' levadura dan' chchixede' yetextil. Bitw gonle can' chesonen'.

² Le bitwbi de da' ngaše' da' nacho cbi gwlo'elaon, neca de da' nono na' neze da' nacho cbi yesenezden'.

³ Da'nan' bite'teze da' gwnale bagaše'ze, bene' zan yesenden'. Na' dan' ba gwnale šižize lo' yo'o chelen', yogo'ze bene' yesenezden'.

Non' cheyaļa' žebcho (Mt. 10:28-31)

⁴ 'Bene' migw chia', chyixjue'eda' le'e bitw žeble bene' ca' yesot le'e, le cate' ba gotle bich bi gac yesonde' le'e.

⁵ San zoa ben' cheyaļa' žeble, cheyaļa' žeble Diosen', le cate' bach beque'e yela' mban chele, leče nape' yela' chnabia' cont yesele' le'e gabil'. Da' yoble chnia' le'e, cheyaļa' žeble Diosen'.

⁶ 'Nezecho byin dao' ca' bibi zjazaca'tecba', perw na' Diosen' ne toba' bi chanlaže'.

⁷ Na' ca' nac chio', da' leca chaque Diosen' chio' neztede' baļ yiša' yichj to cho žia. Da'nan' bitw žeble, le zaca'ch le'e clcl ca' yogo' byin dao' ca'.

Cheyaļa' ye'cho bene' nombia'czcho Jesucriston' (Mt. 10:32-33; 12:32; 10:19-20)

8 'Na' chnia' le'e, note'tez bene' še cho'e diža' len benačhen' che'ene' chejle'e chia', lecze ca' neda' gua'a diža' len angl che Diosen' bene' že' yaba yapegaca'ne' bena' naque' neda' txen, neda' naca' ben' gwseła' Diosen' golja' benačh.

9 'Na' note'teze bene' še cho'e diža' len benačhen' che'ene' bitw chejle'e chia', lecze ca' neda' gua'a diža' len angl che Diosen' bene' že' yaba yapegaca'ne' bena' bitw naque' neda' txen.

10 'Na' note'teze bene' še ne' yela' ya' chia' neda' naca' ben' gwseła' Diosen' golja' benačh, Diosen' yezi'xene' che' še yetinjde'. Perw note'teze bene' še ne' yela' ya' che Spiritw che Diosen', gwbat yezi'xen Diosen' che'.

11 'Na' cate' yeseche'əxoxje' le'e lao bene' gwnabia' che yodaon' o lao justis o še lao nochle bene' gwnabia', bi cuec yichjle nac yoži'ile xtiža'gaquen' o še nacle nale.

12 Lo hor na'teze gwzejni'i Spiritw che Diosen' le'e bin' cheyalā' nalen'.

Bitw cheyalā' cuec yichjcho tlaoze bi da' de checho

13 To bene' bchoje' ladjo bene' zan juisyw ben' zjanžag na', na' gože' Jesúsen': —Maestrw, gonšco' mandadw cont bene' bišan' gone' neda' bien che da' xaxna'to' da' cheyalā' si'a.

14 Na' Jesúsen' gože' le':

—Bitw naca' neda' juez chele. Bi cheyalā' gua' neda' laze da' de chele.

15 Nach gože' yogo'lol bene' ca' že'na':

—Le gwsaca' cont bi selaže'le bi da' gata' chele yežlio nga, la' de bi de checho o la' bibi de checho bi da' chyažj chchinecho, gague da' can' nac yela' mban checho.

16 Na' be'lene' legaue' to jempl, gwne':

—To bene' gwni'a gocchgua coseš che',

17 na' bene' xbab lo' yichjlažda'ogüe' gwne': “¿Nacxe gona'? Bich bi latje de ga gwže'sagua' coseš chian'.”

18 Nach gozne': “Quinga gona', yočinja' yo'o gan' že' coseš chia' quinga na' gona' yo'o xench. Na' gwže'sagua' cosešen' na' bichle da' de chia'.

19 Na' lagüe ba de da' yažjida' da' zan iz, bich gona' žin. Ye'ej gagwteza' con da' chaclaža' na' gona' legr.”

20 Perw Diosen' gože' bena': “Chono' xbab da' bibi zaca'. Na'aže' bžin hor gato', na' ¿nola lo na' gac yogo' da' de chio'?”

21 Can' gac che note'tez bene' še con chbec yichje' tlaoze da' de che' šlac mbane' na' bi chone' da' chazlaže' Dios.

Diosen' chapši'e xi'ine' ca'

(Mt. 6:25-34)

22 Na' gož Jesúsen' bene' ca' zjanaque' le' txen:

—Da'nan' žia' le'e, bi gacžejlaže'le bi da' gagwle šlac mbanle, na' lecž ca' bi gacžejlaže'le che xałana'le.

23 Zaca'ch yela' mban chelen' ca' yela' guagw. Lecze ca' cuerp chelen', zaca'chen ca' xałana'le.

24 Le gon xbab che bechj ca', bitw chesazba', bitw chesyelapba', neca zoa da'a xoa' chegacba', neca zoa ga ncu'a' no goš chegacba' ga že' da' yesagwba', perw na' Diosen' chguagwcz'e'ba'. ¡Nacchle zaca' le'e ca' be ca' zjažia xil!

25 Na' ne' tole bi gac yoston' cuinle gašje metr še con cue' yichjle tonle.

26 Nezele bitw gac yoston' cuinle, na' neca naquen da' zaca'. Da'nan' bi gacžejlaže'le che bica'chle da' chyažjele.

27 'Le gon xbab ca nac yej ca' da' dzaje yixē'. Chesecha'oczen, bibi žin chesonen, nēca chesaljen do. Na' chnia' le'e, da' rey Salomón gocue' lache' güen juisyw, perw bitw bžinlaže' xalane'na' ca yela' xdan che yej ca'.

28 Diosen' none' xdan da' ca' ze yixen' la'czla' to čhop žaze nitan' na' chozozeyen'. ĩNacchxe gon Diosen' len le'e gwleccze yichje' gone' yogo' da' chyažjele, le'e late' lasze chejle'le che'!

29 Da'nan' bitw güe'laže'le cont gata' da' ye'ej da' gagwle. Bitw gacžejlaže'le čhen.

30 Beņe' ca' bi chesonxene' Diosen' con chesoe'laže' che bi da' gata' yese'ej yesagüe' na' che xalana'gaque'. Perw Xacho Diosen' nezcze' bi da' ca' chyažjele.

31 Cheyala' güe'laže'le gwzenagle che Diosen' cont nabi'e yichjlažda'olen', na' yogo' da' ca' chyažjele, goncze Diosen' len.

Da' zaca'ch gata' checho yežincho yaba
(Mt. 6:19-21)

32 'Bitw žeble la'czla' nac to čople. Diosen' chbede' chnabi'e yichjlaždao' le'e chzenagle che' na' chaclene'le'e.

33 'Le yeyote' da' de čele cont gata' da' gwnežjwle beņe' ca' cheseyažje. Še gonle ca', Diosen' gone' le'e da' zaca'ch na' da' cbi te čhen cate' yežinle yaba gan' zoe'na'. Na' bitw gac šo' beņe' gwban que'en, na' nēca gac šo' be dao' gwžiyai' len.

34 Gan' de dan' chaquele nan' zoa yichjlažda'olen'.

Cheyala' soa cuezcho batcan' yide Criston' yeto

35-36 'Le soa le cueze batcan' yida' yeto. Le soa can' nita' beņe' chesape' liž xangaquen' šlac zeje' to yela' güešagna'. Zjanyaz xalana'gaque' na' čala' yi'. Nach cate' yežine' na' nie' cho'a yo'on, na' la' yesesaljwte' cont yeyo'e.

37 Mba gac che beņe' ca' chesebeze' batcan' yežin xangaquen'. Še nite' chesebeze' le' caten' yežinen', nach gwsini'e da' yesagüe' na' cuine' gwnežjue' leaque' dan' yese'ej yesagüe'.

38 Mba gac čhegaque' še chesebeze' batcan' yežine' la'czla' yežine' do chel o do šbal.

39 'Le gon xbab che da' nga. Šaca' neze xan yo'on baten' žin beņe' gwban liže'na', le gwna'ze' cont bi güe'e latje šo' bena' liže'na' cuane' xšinlazen'.

40 'Le soa le cueze batcan' yida' da' yoble, le cate' bi chonle xbab yida', canan' yida', neda' naca' bena' gwsela' Diosen' golja' beņach.

Mos ben' chon güen, na' mos ben' bi chon güen
(Mt. 24:45-51)

41 Pedroa' gože' Jesúsēn':

—Xanto', ĩcho'o jempl nga par neto'ze o še par yogo'lol beņach?

42 Nach gož Xanchon' Pedroa':

—Naquen par note'tez beņe' še chone' can' chon mos blao ben' chejni'i, ben' chon can' cheyala' gone'. Ben' chon ca', co' xane' lo ne'e ližen' cont ne'e mos ca' yezica'chle. Na' gone' da' yesagw to toe' cate' žin hor yesagüe'.

43 Še to beņe' mos chonteze' can' ben xanen' mandadw gone', mba soe' cate' yežin xanen'.

44 Da' li chnia' le'e, xanen' cue'e lo na' mosen' yogo'lol da' de che'.

45 Perw na' še mosen' gone' xbab na' ne': "Ba gwže xanan'", na' solagüe' got čhine' mos' yezica'chle na' ye'ej gagwžate' na' sožde',

46 nach xane'na' yežine' to ža senyale' le' cate' bi gache'ede'. Na' da' bi chon mosen' can' cheyala' gone', xane'na' got chinchgüe' le' na' gone' cont si'e castigw txen len yezica'chle bene' bi cheson can' cheyala' yesone'.

47 'Na' mos ben' nac bene' güedenag, la'czla' ba neзде' can' che'ne xanen' gone', bi chone' ca'. Bi zoe' chbeze' batcan' yežin xanen', na' da'nana' xanen' got chinchgüe'ne'.

48 Na' bene' bi neзде' bin' non xanen' mandadw gone' na' da'nana' chone' da' zaca' chine' le', na' xanen' bi chinteque' le' zi'. Note'teze bene' zjanye'chgua xbab, chesego'o bene' lo na'gaque' da' zan da' yesone', na' chonen byen yesone' yogo' da' ca' zjajo'o lo na'gaque' yesone'.

Yesedil bene' neche da' bid Jesúsén'
(Mt. 10:34-36)

49 Nach gwna Jesúsén':

—Dan' zedeyena' yežlio nga naquen ca to yi' da' cuec bene'. Na' yebeda' šaca' ba chi' yi'na'.

50 Za'a cont saca'zi'a na' gata'. Na' chžaglagua' šlac chbeza' žin ža yeyož gaquen.

51 ¿Chonle xbab bene' že' yežlio yesezoa yesebeze' binlo len lježgaque' na'a dan' ba bidan'? Chnia' le'e, bi yesezoa yesebeze' binlo len lježgaque' na'a ba bida', san yesedile' na' yosošaše'.

52 Quinga solao gac na'a, še žan nita' gayo' bene' to lo' yo'o, yesedil legacze', chope' contr šone' na' šone' contr chope'.

53 Yesedil bene' byo len xi'ine' na' xi'ine' len le'. Na' yesedil no'olen' len xi'ine' no'ole, na' xi'ine' no'olen' len le'. Na' yesedil no'olen' len xo'oliže' na' xo'oliže' len le'.

Bitw gosache'ede' bi zeje da' ca' chon Diosén'
(Mt. 16:1-4; Mr. 8:11-13)

54 Nach lecze gož Jesúsén' bene' ca' nita' na':

—Cate' chle'ele chi' bejw gan' chxoa gwbiža' na' žale: “Gac yejw”, na' chac ca'.

55 Na' cate' chechj be' da' za' ži'le na' žale: “Guac zeye”, na' chac zeye'.

56 Bene' gwxiye' le'e. Cate' chle'ele nac chac le'e yaban' na' lo yežlion' nezele še gac yejw o še gac zeye'. ¿Bixchen' bi chache'ele bi zejen da' ca' chon Diosén' tiemp nga zoacho na'a?

Cheyala' goncho cont yezoacho binlo len bene' che'e chio' lao justis
(Mt. 5:25-26)

57 ¿Bixchen' bi chonle xbab cont nezele can' cheyala' gonle?

58 Cate' to bene' gonle xya che' na' che'e le'e lao justis, šlac ngo'ole nezen' le yeyiljwlaže' nac gonle yezoale binlo len le' cont bi che'e le'e lao justisen'. Še bitw gonle ca', cate' žinle lao justisen' nach gone' le'e lo na' bene' ca' yososeyjue' le'e ližya.

59 Chnia' le'e bitw yebeje' le'e še biža' chixjwle doxen da' čala'le.

13

Cuiayi'cho še bitw yetinjecho xtoła'chon'

1 Na' len bene' ca' že'na' gwnita' balbene' gosoe'lene' Jesúsén' diža', gose'ene' Pilaton' gwsele' soldadw che' ca' jasetue' to xonj bene' Galilea ca' na' bchixde' xchengaquen' len che beyixe' ca' ba gosote' cont yesonxene' Diosén'.

2 Nach boži'i Jesúsén' xtiža'gaquen' gože' legaque':

—¿Chonle xbaba' gosac chegaque' ca' lagüe dan' gosonche' da' malech clel ca bene' Galilea ca' yezica'chle'?

³ Chnia' le'e, bi naquen ca'. Še bitw yetinjele xtoła'le ca', lecze gwžin ža cate' cuiayi'le.

⁴ Nezele che bene' šino'šone ca', šlac zjanite' yež Siloé gwbiže to campanaryw na' gwdenen legaque' na' gosate'. ¿Lecze chonle xbab goc ca' dan' zjanacche' bene' mal clel ca bene' ca' zjaže' Jerusalén?

⁵ Chnia' le'e, gague can'. Še le'e bi yetinjele xtoła'le, lecze gwžin ža cate' cuiayi'le.

Jempl che yag yixgüigw da' bibi chbia

⁶ Na' be'lene' legaque' jempl nga, bzejni'ide'ne' cheyal'a' yesyetinjde' xtoła'gaque', na' gože' legaque':

—To bene' zoa to yag yixgüigw che' gan' že' yag uvas che' ca'. Na' gwyeje' lo' yaguen' jane'e še de toga yixgüigw gagüe', perw bitw bi bželde'.

⁷ Na' gože' ben' chape' yag che' ca': “Ba chac šon iz chedena'a yag nga še chbian yixgüigw, perw bitw bi chbian. Gwchoguen, lažjw con zoan nlanen, na' neca bi chbiazen.”

⁸ Na' gož ben' le': “Xana', jayenna', za' zoašazen yetgüiz, che'ena' xanenna' na' cuecan' yo beb.

⁹ Na' še cuian yixgüigw do yetgüiz, bitec da' güen, perw še bicze bi cuian, nach chogchon.”

Jesúsen' beyone' to no'ole ža che Dios

¹⁰ Na' to ža che Dios bsd blo'e Jesúsen' bene' že' to lo' yodao'.

¹¹ Na' zoa to no'ole bene' ba goc šino'šone iz yo'o nyaz da' xigüen' yichjlažda'ogüe'na'. Na' ben da' xigüen' cont bdoce cuerp che'na', na' gague gocch se' to licha.

¹² Na' cate' ble'e Jesúsen' le', goxe'ne' na' gože'ne':

—No'ole, na'a yeyacdo' yižgüe' chio' nga.

¹³ Na' gwxo'a ne'e cuerp che no'ola', na' la' bezete' to licha. Na' no'ola' benene' Diosen'.

¹⁴ Perw na' bene' gwnabia' che yodao'na' bloque' da' beyon Jesúsen' no'ole güen' ža che Dios. Na' gože' bene' ca' nita' lo' yodaon':

—De xop ža cont gonle žin. Le da lo ža ca' cont yeyone' yižgüe' chelen' perw bitw yidle ža che Dios cont yeyacle.

¹⁵ Nach Xancho Jesúsen' gože'ne':

—Bene' gwxiye' le' len bene' lježo'. ¿Gague lo ža che Dios bia'cze chsežle go'ñ chele o burr chele ga zjada'ba' chjasanlba' güe'ej nis?

¹⁶ No'ole nga naque' xi'in diaža che da' Abraham, na' Satanásen' dan' chnabia' da' xigüe' ca' benen cont ba bdoce cuerp chen' šino'šone iz. Da'n'an' nacczen licha ba beyona'ne' ža che Dios.

¹⁷ Cate' gwne' ca', bene' ca' chesegue'e le' gosacde' zto', perw yogo'lol bene' ca' yezica'chle nita'na' besyebanchgüede' len yogo' dan' ben Jesúsen', le leca güen zjanac dan' benen'.

Yela' gwnabia' che Diosen' naquen ca bin che xomdas

(Mt. 13:31-32; Mr. 4:30-32)

¹⁸ Nach gwna Jesúsen':

—Na'a gwlo'eda' le'e cont nezele šanch bene' yosozenag che Diosen' cont nabi'e yichjlažda'ogaque'.

19 Da'nan' yela' gwnabia' che Diosen' naquen ca bin che xomdas. To bene' gozen' na' cate' blan' gwcha'on goquen yag cha'o na' be ca' zjazoa xil goson ližgacba' lo xoze' yaga'.

*Yela' gwnabia' che Diosen' naquen ca levadura
(Mt. 13:33)*

20 Nach da' yoble gozne':

—Na'a nia' le'e yelate' nac nac yela' gwnabia' che Diosen'.

21 Naquen ca levadura dan' gwlec no'olen' len to rob yezj cont gwcha'o doxenen.

*Cheyala' chiljwlaže' cho nac goncho cont soacho binlo len Diosen'
(Mt. 7:13-14, 21-23)*

22 Na' gwda Jesúsen' bsed blo'ede' bene' ca' že' ciuda ca' na' yež ca' gan' bedie' cont bežine' Jerusalénna'.

23 Na' to bene' gože' Jesúsen':

—Xanto', žcon to chopze bene' šjasyenite' len Diosen'?

Nach Jesúsen' gože' legaque':

24 —Chnia' le'e, bene' zan chese'nde' yesenite' binlo len Diosen', perw gwžin ža cate' bich gac yesone' cont yesenite' binlo len le'. Da' nac žialao gonle, chiljwlaže'le nac gonle cont soale binlo len Diosen'

25 cont bi gone' len le'e ca ben to xan yo'o cate' bžin hor gwseyjuen'. Gwžože'e bseyjue', na' gwdechle besežin bene' bososiže' le'e puert che'na' na' bich gwsaljue' cont yeso'e. Na' gose'ene': "Gwsaljwšca cont šo'to." Na' gože' legaque': "Bitw nombi'a le'e, neca nezda' ga za'acle."

26 Can' gac che balle. Nach solaole ye'lne': "Güe'ej gwdagwto' len le' na' bsed blo'edo' neto' la cay lažto'."

27 Perw na' da' yoble ye'e le'e: "Bitw nezda' ga bene' le'e. Le šjaya'ac yogo' le'e bene' güen da' mal." Can' ye'e le'e.

28 Na' le'ele Abraham na' Isaac na' Jacob na' yogo'lol bene' ca' gosoe' xtiža' Diosen' cani' nite' yaba gan' zoa Diosen' chnabi'e. Na' le'e bitw gac šo'lena'. Nach cuežyaše'le na' gagwxexje layle dan' leca žaglaole cate' gache'ele bich gac šo'le.

29 Bene' zan bene' za'ac doxen yežlio yesyežine' yaba gan' zoa Diosen' chnabi'e na' yesebi'e cho'a mes yesagüe'.

30 Nita' bene' zjanaque' bene' bzebe na'a perw gwžin ža cate' yesaque' bene' žialao. Na' nita' bene' zjanaque' bene' žialao na'a, perw gwžin ža cate' yesaque' bene' bzebe.

*Begüine' Jesúsen' neche xtoła' bene' Jerusalén ca'
(Mt. 23:37-39)*

31 Lo ža na'teze bal bene' fariseo ca' besežine' gan' zoa Jesúsen' gose'ene':

—Cheyala' yoxonjo' nga gan' chnabia' rey Herodes, le chaclaže' gote' le'.

32 Jesúsen' gože' legaque':

—Herodesen' naque' ca to beza' yela' gwxiye' chen'. Le šja'ac na' ye'lne' yeto chope žazen' soa' yebejcha' da' xigüe' ca' zjajo'o zjanyaz yichjlaždao' bene' na' yeyoncha' bene' chesacšene. Ba zoa yeyož gona' dan' cheyala' gonan'.

33 Perw ca nac dan' chona' na'a gonchczan' gwxe güižj. Gague ngan' chesote' bene' ca' chesoe' xtiža' Diosen', san Jerusalén chesote' bene' ca'.

34 'Le'e bene' Jerusalén, chotle bene' ca' chesoe' xtiža' Diosen' na' ca nac nochle bene' ca' chselā' Diosen' len le'e, chčhellene' yej. Zan ni'a goclaža'

yotoba' le'e ca to jed xcaca' be n̄che' xi'ĩn na' chyežba' legacba', perw bitw goclaže'le.

³⁵ Na' na'a ba gwlejyichj Diosen' le'e. Na' chnia' le'e, bich le'ele neda' na'a. Cate'ch žin žana' nale: "Mbalaz ben' za' nga nseła' Xancho Diosen' le' cont nabi'e", cana'ch le'ele neda' da' yoble.

14

Jesúsen' beyone' to bene' de yi

¹ Na' to ža che Dios Jesúsen' gwyeje' jatagüe' liž to bene' fariseo ben' nac bene' blao. Na' yezica'chle bene' fariseo ca' chosogüia chesene'e bixen' goncze' cont gata' da' yosode'ede' yesagüe' xya che'.

² Na' lagüe'na' zecha to bene' chacsene, de cuerp chen' yi.

³ Na' gož Jesúsen' bene' fariseo ca' na' bene' ca' chososed chosolo'e ley dan' bzoj da' Moisés:

—¿De lsens len ley chechon' yeyoncho to bene' güe' ža che Dios o še bitw bi lsens de'?

⁴ Perw notno boži'i xtiže'na'. Nach Jesúsen' beḡue' na' bena' na' beyone' le', na' gože'ne':

—Guac yeyejo'.

⁵ Nach gož Jesúsen' bene' ca' že' liž bene' fariseon':

—Le'e še zoa to burr o to go'ñ chele na' lažo'ba' to lo' yechw sitjw, žcabi la' yebejteleba' la'saze nac ža che Dios?

⁶ Na' nono goc yoži'i xtiža' Jesúsen'.

Bene' ca' gosaxe' gan' chac güešagna'

⁷ Na' ble'e Jesúsen' can' cheson bene' ca' gosaxe' liž bene' fariseon', gosebeje' gan' zjachi' bene' blao ca' cont gosebi'ena'. Na' Jesúsen' be'e to jempl, gože' legaque':

⁸ —Cate' to bene' gaxe' le'e gan' chac güešagna', bitw cue'le gan' cheyała' cue' bene' blao ca', le še cue'le na', guacte yid bene' nacch bene' blao

⁹ na' xan yo'ona' ye'e tole: "Le soža' cont cue' benga." Nach do chaquele zto' soža'le cue'le ga yoble len bene' ca' bitec bi zjazaca'.

¹⁰ Na' cate' gan' gaxe' le'e cue'le len bene' bitec bi zjazaca', na' cate' yid xan yo'ona' na' ye'e tole: "Bene' migw chia', da cui'o len bene' blao ca'." Nach gacxenle lao bene' ca' zjachi' len le'e cho'a mesen'.

¹¹ Le note'teze bene' chonxen cuine', Diosen' gone' cont si'e zto' lagüen'. Na' note'teze bene' chzeḡjwlaže' lagüen', Diosen' gone' cont gacxene'.

¹² Na' lecze gož Jesúsen' ben' goxe' le' ližen':

—Cate' gono' to lni na' gaxo' bene' yesagüe' len le', bitw gaxo' bene' biše' lježo', bene' migw chio' o bene' zjanaque' bene' gwñi'a. Legaque' lecze yesaxe' le' ližgaquen', na' yesyegüe'e gwzon lagüe dan' ba goxgaco'ne' ližo'na'.

¹³ Cate' gono' to lni gox bene' yaše' na' bene' nchog no ni'a na'gaque', bene' nxinj ni'e, na' bene' lchol.

¹⁴ Še gaxo' legaque', Diosen' gone' so' mbalaz, le bene' ca' bi gac yesyegüe'e gwzon chio'. So' mbalaz cate' Diosen' yosbane' le' ladjo bene' guat ca' txen len yezica'chle ben' ja'ac to lica cate' gosebane'.

Jempl che to bene' ben lni xen

¹⁵ Na' to bene' chi' cho'a mesen' txen len Jesúsen' bende' xtiže'na' na' gože'ne':

—Mbalaz soacho gagwcho lo lni da' gac caten' ba chnabia' ben' seła' Diosen'.

16 Nach Jesúsen' gwne':

—To bene' bene' to lni xen, na' goxe' bene' zan šja'ac ližen' cont yesagüe'.

17 Na' cate' bžin hor yesagüe', na' xan yo'ona' gwsele' xmosen' cont šjatobe' legaque' yesagüe'. Na' cate' jane'e to toe', gože' legaque': "Le šo'o, ba bsini'e dan' gagwchon'."

18 Na' yogo'lole' gose'e ben' bi zjazoe' latje šja'aque' gan' chone' lnin'. Bene' nechon' gwne': "Za' gwxia' to yežlio, na' cheyala' šjana'an. Na' ye'šco' xanon' bitw gac yida'."

19 Na' yetoe' gwne': "Za' gwxia' gayo' cue' go'n na' na'a šjengaca'ba' prueba. Ye'šco' xanon' si'xene' chia', bitw gac yida'."

20 Na' yetoe' gože'ne': "Za' bšagna'. Da'nan' bitw gac yida'."

21 Na' mosen' beyeje' na' jayeže' xanen' can' gose' bene' ca' le'. Nach xan yo'ona' ben' chon lnin' bže'e. Nach gože' xmosen': "Gwey' jata to to cay na' to to nez lo ciudan', na' gwtobo' bene' yaše' na' bene' nchog ni'a na'gaque' na' bene' nxiņj ni'e, na' bene' lchol cont yeside' yesagüe'."

22 Gwde bene' ca' nach gože' le': "Xana', ba jatoba' bene' ca' ba gwnaon', na' ne' dehcze latje par bene' yoble'."

23 Nach xane'na' gože' le': "Bchoj lo' ciudan' na' gono' byen yesid ben' nita' chanez. Na' šjaxi'o bene' ca' zjaže' yiže'. Gono' byen yeside' liža' nga yesagüe' cont yežan' bich bi latje šo'."

24 Na' ca nac bene' ca' goxa' da' nechw, bich gua' latje yesagw legaque' dan' ba bsini'ana'."

Dan' cheyala' goncho cont gaccho txen len Jesucriston'

25 Na' bene' zan juisyw zjana'ogüe' Jesúsen', na' gwyečhje' gože' legaque':

26 —Note'teze bene' še chaclaže' šejnilaže' neda' na' gwzenague' chia', še bi gacchde' neda' clcl ca xaxne'e, no'ol che', xi'ine', biše', zane', na' lente cuine', bi gac gone' neda' txen.

27 Na' note'teze bene' bi chzanlaže' cuine' saca'zi'e o gate' ne chia' neda', lecze bitw gac gone' neda' txen.

28 Še tole che'nele gonle to campanaryw, zgua'tec cue'le na' gonle xbab gwsaca'le ca do gaca' da' chyažjele cont gonlen, še gaque xmechwle cont yeyož campanaryon'.

29 Še bi gwchix gwtolē xbab chelna' gaca'te' dan' chyažjele, cate' ba gwlecle lenenna' na' gacbe'ele bich bi mechw de cont yeyožēn, na' yogo' bene' yesele'ede' lenenna' yesezi'diže' le'e,

30 yesene': "Benga gwzolao chone' to campanaryw perw bitw beyož xšinen'."

31 Na' še to rey chone' xbab tile' len yeto rey, lecze zgua'tec gwsaque' še gwzoede' len ši mil soldadw che' gone' gan yeto rey bene' nche' galje mil soldadw.

32 Na' še chacbe'ede' bi gone' gan, šlac ne' zoa ben' yeto, zito', sele' ben' šjasadie' xtižen' lao rey ben' yeto yesenabe' yesyenite' binlo.

33 Ca' naquen len le'e, note'tezle še bi cuejyichjele yogo'lol bi da' de chele, bitw gac gonle neda' txen.

Cate' zeden' bich naquen xzi'

(Mt. 5:13; Mr. 9:50)

34 'Zeden' naquen güen, perw na' še bich naquen xzi', žnacxe goncho cont yeyaquen xzi' da' yoble'?

35 Bibi zacan', neca gaclenen yežlio, neca gaquen par beb, lete cho'onchon. Le'e žia nagle da' chene, le gwzenag xtiža'na'.

15

Jempl che xila' ben' gocžeje

(Mt. 18:10-14)

1 Na' bene' güechixjw ca' na' yebałe bene' güen da' xinj, yogüe' gosebigue' gan' zoa Jesús'en' cont gosende' xtiže'na'.

2 Na' bene' fariseo ca' na' bene' ca' chososed chosolo'e ley dan' bzoj da' Moisés gosezi'diže' le', gosene':

—Benga chlebe' bene' güen da' xinj ca' na' chagwlene' legaque'.

3 Nach Jesús'en' be'e to jempl, gože' legaque':

4 —Še nita' to gayoa xila' chele na' gacžeje toba', žbi yocua'anle be ca' taplaj togalj gan' že'ba' latje daša' na' šjaydiljwle ben' ba gocžejena' cont yeželba'?

5 Na' cate' yeželban' yebechgüele na' yexoalba' ya'axichjle yeyoa'lba'.

6 Na' cate' yežin ližle, gwtoble bene' migw chele na' bene' gualiž chele na' ye'lné': "Le yebe len neda'. Ba bežel xila' chia' ben' gocžeje."

7 Chnia' le'e, gwbeche Diosen' txen len angl che' ca' cate' to bene' chon da' mal yetinjde' xtole' clcl ca' yesyebede' che taplaj togalj bene' zjanaque' bene' güen bene' bitw de xtoła'gaque' da' yesyetinjde'.

Jempl che mechw dan' gwnit

8 Na' le'e no'ole še de ši mechw plata chele na' še nit ton, la' gwguala'tele to yi' na' gwloale lo' yo'o chele na' yeyiljwyožlen cont yeželen.

9 Na' cate' yeželenna', na' yotoble no'ole migw chele ca' na' bene' gualiž chele na' ye'le legaque': "Le yebe len neda', le ba beželda' mechw chia' dan' gwnit."

10 Chnia' le'e lecze chesyebe chesyenzaque' angl che Diosen' bene' zoa yaba cate' to bene' chon da' xinj chetinjde' xtole'na'.

Jempl che ben' benditje xi'inen' xmechue'

11 Na' lecze gože' legaque':

—Gwzoa to bene' na' gwnita' chop xi'ine' bene' byo.

12 Na' bžin ža bene' xcuiden' gože' xen': "Xa', beŋ neda' dan' cheyała' sia' da' de chio'." Nach xen' bnežjue' dan' cheyała' si'en.

13 Goc to chop ža nach bene' xcuiden' btobe' yogo'lol bi da' de che' na' gwze'e gwyeye' nación zito' na' zlez da' bi zaca' jene'. Na' benditje' xmechue'na' zejlene' da' malen'.

14 Na' cate' beya xmechuen', goc to gwbin juisyw doxen naciónna', na' bich bi gota' xmechue' cont si'e da' ye'ej gagüe'.

15 Da'n'an' gwyeye' gan' zoa to bene' naciónna' gwnabe' žin, na' bena' gwsele' le' yiže' ga že' be zan xcoše' na' jayoe'ba'.

16 Na' catec gwdone' goclaže' gagüe' dan' chosonežjue' chesagw coš ca', perw ne len ca' bosonežjue' le' gagüe'.

17 Na' beyone' to xbab šagüe', gwne': "Nita' mos zan che xan' na' dechgua da' chesagüe', na' neda' gatda' yela' chdon.

18 Yeza' nga na' yeya'a gan' zoa xa' na' yapa'ne' bena' da' mal lao Diosen' na' lao le'.

19 Na' bich zaca' gone' neda' cuent ca' xi'ine', con še gone' latje gaca' ca' to xmose'."

20 Nach beze'e beyeye' gan' zoa xen'. Na' zito'le za' yežine' cate' ble'e xen' le' na' beyaše'de' le' na' gwza'sese' jašague'ne'. Na' gwdele'ne' bnopene'.

²¹ Nach gož xi'ine'na' le': "Xa', ba bena' da' mal lao Diosen' na' laguo' le'. Bich zaca' gono' neda' cuent ca xi'ino'."

²² Na' xe'na' gože' xmoše' ca': "Le šjalej tgot lache' šagüe', le guacwben', na' le šjaxi' to niy na' le co'on xbembe', na' le šjaxi' šcue' yel na' gwdelen ni'abe'."

²³ Na' le šjaxi' go'ḥ dao' ben' čane' na' le gotba' cont gagwchoba', le goncho lni.

²⁴ Xi'ina' nga ba bena'be' cuent ca to bi' guat, perw ne' zoabe' mbambe' na'a. Gwlejiyichjbe' chio', perw na'a ba bela'be'." Na' gosezolaogüe' chesone' lni.

²⁵ Na' xi'ine' bene' nechon' zeje' yixe' cate' bežin xi'inen' yeto ben' benditje xmechuen', na' cate' zeza' ben' gwyey yixen', ba zoa yežine' liž xen' cate' bende' chosocueže' na' chosoye'e.

²⁶ Na' goxe' to mosen' na' gwnabde' le' bixchen' chesone' lni.

²⁷ Na' mosen' gože'ne': "Bi' bišo'na' ba bela' na' xaoon' ba betue' go'ḥ daon' ben' čane'chgua da' bela'be' to šagüe' to güen."

²⁸ Nach xi'ine' nechua' bže'e na' bi' goclaže' yeyo'e liž xen'. Na' bchoj xen' na' gota'yoede' le' yeyo'e yo'o.

²⁹ Perw xi'ine' bene' nechua' gože' xen': "Zan iz ba chac zoa' nga chonteza' žin con can' žo' le', na' biḥa' gaca' bene' güedenag. Na' ne' to šib dao' caḥa' goḥo' neda' cont gota'ba' gona' lni len bene' migw čhia' ca'."

³⁰ Na' na'a ba bela' xi'ino' nga benditjbe' yogo'loḷ da' bnežjo'be' gwdalembe' no'ole zle', na' beto' par lebe' go'ḥ dao' ben' čane'."

³¹ Na' xe'na' gože'ne': "Xi'indagua', le' zoatezo' len neda', na' yogo'loḷ da' de naquen čio'."

³² Perw cheyaḷa' goncho lni nga na'a da' chbechgüecho ba bela' bi' bišon', le' ba bena'be' cuent ca to bi' guat, perw na'a zoabe' mbambe'; gwlejiyichjbe' chio', perw ba bela'be'."

16

Jempl che to mos blao ben' benditjde' da' de che xane'

¹ Nach gož Jesúsen' bene' ca' zjanaque' le' txen:

—Gwzoa to bene' gwni'a na' gwzoa to mos blao che' ben' gwyo'o lo ne'e yogo'loḷ da' de che'. Na' bene' gwni'ana' bende' rson xmoše' blaon' ba benditjde' bi' da' de che'.

² Na' xanen' goxe' le' na' gože'ne': "Ba benda' diža' can' chonon'. Cheyaḷa' yodio' cuent yogo'loḷ da' ba benditjedo' čhia'. Bich gac gono' xšinan' na'a."

³ Nach mosen' bene' xbabēn': "ŽBixe gona' na'a? Xanan' ba cholague' neda'. Bich gac gona' xšinen', na' neca gac goncha' žin gual, na' gacda' zto' še naba' carida'."

⁴ Nezdā' bi' gona' cont nita' bene' yesene'e neda' cate' bich chona' žin che xanan'."

⁵ Nach goxe' yogo'loḷ bene' ca' chesala' xmechw xane'na' tgüej tgüejje' na' gože' bene' nechw: "ŽGaca' čalo' che xana'?"

⁶ Na' bēna' gože'ne': "Čala' che tap mil litrw set." Nach gož mos blaona' le': "Bedao'nez gwche'edo' na' bzoj lo cuenten' bzoan čalo' che čhop mil litrwze seten'."

⁷ Gwde' na' gože' bene' gwchopen': "ŽGacan' čalo' che xanan'?" Nach bēna' gože'ne': "Čala' che to mil rob trigw." Nach mosen' gože' bēna': "Gwche'edo' na' bzoj lo cuent čio'na' bzoan čalo' che xono' gayoa robze trigon'."

⁸ Na' xan mos gwxiyen' gocbe'ede' xmosen' leca nye'e xbab da' beyiljwlaže' nacle gone' soe' binlo len lježe' bene' ca' chesala' che xanen'. Le bene' ca'

zjachi' yichje' to zleze dan' chac lo yežlion' chesonchgüe' xbab nacle yesone' len dan' zjade chegaque', perw zan bene' ba zjajo'o be'ni' che Diosen' lo' yichjlažda'ogaque' bitw chesone' xbab naclen' yosočhine' dan' de chegaque'.

⁹ Na' chnia' le'e, dan' de chele yežlio nga da' te chen', perw le gwčhinen cont nita' migw chele. Na' cate' ba beya bi dan' de chele yežlio nga, nach nita' bene' yosolebe' le'e cate' yežlinle yaba gan' soale toli tocaņe.

¹⁰ Še to bene' chone' can' cheyała' gone' len da' bibi zaca'tec, lecz ca' gone' len da' zaca'chgua. Na' bene' bi chone' can' cheyała' gone' len da' bibi zaca'tec, lecz bitw gone' can' cheyała' gone' len da' zaca'chgua.

¹¹ Še le'e bi chonle can' cheyała' gonle len dan' de chele yežlio nga da' te chen', bitw gon Diosen' le'e da' zaca'ch da' bi te che.

¹² Dan' de chele yežlio nga, che Diosen' gague chelen'. Na' še bitw chonle can' cheyała' gonle len da' nac che', bitw gone' le'e da' zaca'ch da' bi te chen'.

¹³ Nono mos gac gone' žin len chop xane' to ši'ize, le še gone' ca', gue'ede' to xan žinna' na' gacde' yetoe'; o gone' žin che toe' do yichj do laže' na' che ben' yeto gonen' do chža'alaže'ze'. Lecze ca' le'e, bitw gac gonle xšin Diosen' do yichj do laže'le na' gonte xšinle cont gacle bene' gwñi'a.

¹⁴ Na' lecze nita' bene' fariseo ca' chesende' xtiža' Jesúsen', na' gosezi'diže' le', le gosaclaže' yesaque' bene' gwñi'a.

¹⁵ Na' gož Jesúsen' legaque':

—Le'e chonle cont benačhen' chesacde' chdaczle licha, perw Diosen' neze nle'ede' yichjlažda'ole, na' Diosen' chgue'ede' bał da' chesaque benačhen' zjanaquen da' žialao xen.

Ley che Diosen' na' bene' ca' chnabia' Diosen' yichjlažda'ogaque'

¹⁶ Na' gozna' Jesúsen':

—Gwzolaon cani'te bžinten cate' bla' Juanna' bedetixjue'ede' xtiža' Diosen', ley dan' bzoj da' Moisés len dan' bosozoj yezica'chle bene' gosoe' xtiža' Diosen' bzejni'in chio' che Diosen'. Na' na'a gwzolaon len Juanna', ne' nita'cze bene' cheseyixjue'ede' Diosen' nabi'e yichjlaždao' bene' yosozenague' che'. Na' bene' zan cheseyiljue' nacle yesone' cont nabia' Diosen' yichjlažda'ogaque'.

¹⁷ 'La'czła' še yežlion' len da' ca' zjažia le'e yaban' yesede chegaquen, ca nac Xtiža' Diosen' dan' nyojen, ne late' daon' cbi te chen'.

Bi cheyała' yela'acho len no'ol chechon' cont soalencho no'ole yoble

(Mt. 19:1-12; Mr. 10:1-12)

¹⁸ Note'teze bene' chele'e len no'ol che' na' cheque'e no'ole yoble chone' da' xinj, tozcce ca' naquen šaca' gata'lene' no'ol che bene' yoble. Na' note'teze bene' yošagna'lene' to no'ole bene' bela'a len bene' che', lecze tozcce ca' da' xinj gone' len dan' chon bene' chata'lene' no'ol che bene' yoble.

Bene' gwñi'a na' Lázaro

¹⁹ Nach gozna' Jesúsen':

—Gwzoa to bene' gwñi'a na' xdanchgua goc xałane'na', na' leca gwdagwšagüe' yogo' ža.

²⁰ Na' to bene' yaše' le' Lázaro, yogo' ža jasedixjue' le' cho'a puert zaguan che bene' gwñi'ana' cont gwñabe' yosonežjue'ne' con gaca' da' chesezande'. Na' Lázaron' leca gwžia yežo' doxen cuerp chen'.

²¹ Na' catec gwdone' goclaže' gagüe' bla'a dao' yela' guagw da' beselažo' cho'a mes che bene' gwñi'an'. Na' beco' ca' ja'acba' jasele'eba' yežo' dan' gwžia cuerp che'na'.

²² Na' got bene' proben' nach angl bene' že' gan' zoa Diosen' besyezi' besyeque'e le' yaban' gan' zoe' na'a len da' xozxta' ocho Abraham. Na' lecze got bene' gwñi'ana' na' bosocuaše'ne'

²³ na' beyeje' lo' yi' gabil'. Na' šlac chžaglagüe' na' gwlis lagüen' na' ble'ede' zito'le nita' da' Abraham len Lázaron' yabana'.

²⁴ Nach bene' gwñi'an' gwñe' ziže gwne': "Xa' Abraham, beyaše'laže'šca neda' na' gwseła' Lázaron' cont yosbise' loža' nga len late' nis da' gwlapa' xbene'na', le leca chžaglagua' lo' yi' nga."

²⁵ Perw na' Abrahanna' gože' le': "Xi'ina', bosa'laže' cate' gwmano' yežlio zleze da' šagüe' da' güen gota' chio', na' Lázaro nga to zleze da' mal goc che'. Na' ba zoe' mbalaz nga na'a na' le' chžaglaguo'.

²⁶ Bi gac gona' can' chaclažon', le Diosen' bač nze' to bdiñj xen ga nono gac te, cont nono gac sa' nga šeje' gan' zon', neca nono gac sa' gan' zon' na' yide' nga."

²⁷ Nach bene' gwñi'ana' gože' Abrahanna': "Bene' gol dao', chata'yoeda' le' gwseła'šca Lázaron' liž xan'.

²⁸ Nita' gayo' bene' biša' na' che'nda' šjatixjue'ede' legaque' nac yesone' cont Diosen' bi yesele' legaque' latje nga gan' yesežaglagüe'."

²⁹ Na' Abrahanna' gože' le': "Decze dan' bzoj da' Moisésen' na' dan' bosozoj yezica'chle bene' ca' goso'e xtiža' Diosen' cani'. Cheyała' yosozenague' che da' ca' zjanyojen."

³⁰ Na' gože' Abrahanna': "Bitw, bene' gol dao'. Še to bene' yebane' ladjo bene' guat na' güe'lene' legaque' diža', nach yesyetinjde' xtola'gaquen'."

³¹ Nach gož Abrahanna' le': "Še bitw chosozenague' che dan' bzoj da' Moisésen' na' dan' bosozoj yezica'chle bene' ca' goso'e xtiža' Diosen', la'czła' še yeban to bene' ladjo bene' guat ca', bi yesejle'cze' che Diosen'."

17

Bitw cheyała' goncho cont gon bene' da' xinj

(Mt. 18:6-7, 21-22; Mr. 9:42)

¹ Na' gož Jesüsen' bene' ca' zjanaque' le' txen:

—Decze da' gonen cont lažo' bene' yesone' da' xinj, perw nyaše' chguaze gac che bene' chone' cont bene' yoble yesone' da' xinj.

² Yejni'a šaca' yosocheje' yene' to yiše na' šjasezale' le' lo' nisdao' clal ca soe' gone' cont to bene' za' gwzologüe' chejnilaže' neda' lažoe' gone' da' xinj.

³ Da'nana' le' gwsaca' cont bi gonle ga lažo' bene' gone' da' xinj.

'Na' še to bene' lježle gonde' le'e mal, le til'e' na' še gwše'e xbab na' ne' bich gone' ca', le yezi'xen che'.

⁴ La'czła' gaž ni'a lao tža gone' da' mal contr bene' lježen', še gaž ni'ate ne': "Ba betinjda' che dan' benan', bezi'xen chia'", na' cheyała' yezi'xene' che'.

Gosaclaže' yesejle'che' che Diosen'

⁵ Na' gose' postlw ca' Xancho Jesüsen':

—Gaclenšco' neto' cont šejle'chto' che Diosen'.

⁶ Nach gož Xanchon' legaque':

—Xsa yag xomdas naquen da' dao' riz, na' la'czła' dan' chejnilaže'le Diosen' naquen ca to xsa xomdas lagüe dan' bi chejnilaže'teclne', še šejnilaže'rne', guaque ye'le yag nga: "Gwcuase nga na' jayzoa lo' nisdan'", na' guaccze can' nalna'.

Dan' cheyała' yeson mos ca'

⁷Le'e še mos chelen' chgua'ane' go'ŋ, o še chyo'e' xila', cate' chele'e güeyeban' bitw che'ln'e': "Beyo'o ngale, gwche'edo' gagu'o' xše'."

⁸San che'ln'e': "Bsiñi'a da' ye'ej gagua' na' gonon'. Te yedaguan' nach gago'."

⁹Na' bitw cho'elne' yela' choxclen cate' ba bene' dan' gožlene'.

¹⁰Na' lecz ca' le'e, cate' ba benle yogo'lol dan' ža Diosen' gonle, cheyała' nale: "Bitw zaca'to' no gon yela' choxclen cheto' ca dan' ba bento', le bento' con da' cheyała'cze gonton'."

Jesúsen' beyone' ši bene' chese'ede' yižgüe' da' nzi' lepra

¹¹Na' zej Jesúsen' Jerusalénna' len bene' ca' zjanaque' le' txen na' gwdie' gan' ndil distritw Samaria len distritw Galilean'.

¹²Na' besežine' to cho'a yež dao' na' besechoj ši bene' chese'e yižgüe' da' nzi' lepra jasešague' Jesúsen'. Na' gosezie' zito'

¹³na' gosene' zižje gosene':

—Maestrw Jesús, beyaše'laže' neto'.

¹⁴Na' Jesúsen' cate' ble'ede' legaque' na' gože'ne':

—Le šjaya'ac lao bxož ca' cont yesene'e le'e še ba beyacle.

Na' goquen' lo neza' besyeyacde'.

¹⁵Nach toe' cate' gocbe'ede' bačh beyaque', na' bebi'e na' gwnie' zižje benxene' Diosen',

¹⁶na' bzoa xibe' lao Jesúsen' bi'e le' yela' choxclen. Ben' ben ca' naque' to bene' Samaria.

¹⁷Nach gwna Jesúsen':

—Beyona' ši bene'. ¿Ganxe bene' ca' yega?

¹⁸¿Toz bene' zito' nga bebi'e chonxene' Diosen'?

¹⁹Nach gož Jesúsen' bena':

—Bezoža' beyej to šagüe' to güen. Ba beyacdo' da' chejnilažo' neda'.

Yela' chnabia' che Diosen'

(Mt. 24:23-28, 36-41)

²⁰Na' bene' fariseo ca' gosena' abde' le' batxen' yid ben' sela' Diosen' nabi'e nación Israelen'. Nach boži'i Jesúsen' xtiža'gaquen' gwne':

—Ca nac yela' gwnabia' che Diosen', bi naquen da' le'echo.

²¹Nono cheyała' güe' diža' ne': "Gwna' nga chnabi'e", o "Gwna' na' chnabi'e." Le ba zoe' len le'e na'a chnabi'e.

²²Nach gože' bene' ca' zjanaque' le' txen:

—Gwžin ža cate' nale: "Šaca' na'a ba chnabia' ben' gwsela' Diosen'", perw bitw gac can' nablaže'len'.

²³Yesenita' bene' yesi'e le'e: "Gwna'šc nga zoa ben' gwsela' Diosen'", o "Gwna'šc na' zoa ben' gwsela' Diosen'." Perw bitw ga'ole ben' yesi'e le'e ca'.

²⁴Can' chac cate' chep yes, chsenin' doxen le'e yaban' zejzenez, lecz can' gac cate' žin ža yida' da' yoble, neda' naca' ben' gwsela' Diosen' golja' benačh. Yida' zejzenez na' yogo'lol bene' yesele'ede' neda'.

²⁵Zgua'tec de da' zan da' cheyała' saca'zi'a na' bene' ca' že' na'a bitw yesejle'e čhia'.

²⁶Lecz ca' goc ca' tiemp che da' Noé, lecz ca' gac cate' ba zoa žin ža yida' da' yoble, neda' naca' ben' gwsela' Diosen' golja' benačh.

²⁷Bene' gwnita' ca' tiemp che da' Noén' gosaše' gose'ej gosagüe' goso'elaže' bosošagne'e na' bosošague' na' no xi'ñ che' cate' bžin ža gwyo'o Noén' lo'

barcon'. Nach goc to yejwsio' juisyw. Na' gosebiayi' yogo' bene' ca' bi goso'o lo' barcon'.

²⁸ Lecz ca' goc ca tiemp che da' Lot, bene' Sodomian' gose'ej gosagüe' gosote' bi da' de chegaque', na' gosezi'e bi da' beseyazjde', na' gosaz gosa'ane', na' goson liže'.

²⁹ Perw na' žan' beza' Loten' Sodomian', Diosen' bene' cont byinj yi' na' azufre yaba na' gosebiayi' yogo' lo'le'.

³⁰ Can' gac cate' yida' da' yoble, neda' naca' ben' gwseła' Diosen' golja' benach, na' yogo' lo' bene' yesele'ede' neda'.

³¹ Na' ža caten' yida' še chda to bene' do yichjo'o che liže', na' xšinlaze' žen' lo' yo'o che', bi yeyetje' cont yotoben', con yoxonje'. Na' lecze ca' bene' chda do yiže', bitw gadce' yeyej liže'.

³² Le šjayza' laže' can' goc che no'ol che Loten'.

³³ Note'tez bene' chacde' gone' cont chi saca'zie' o cont nono yesot le', bena' cuiayi'. Na' note'tez bene' chzanlaže' cuine' saca'zie' o gate' ne chia' neda', ba de yela' mban che' toli' tocaņe.

³⁴ Chnia' le'e, quinga gac caten' yida' da' yoble. Chope bene' zjadie' chesetase' toz cam. Toe' yeca'a Diosen' na' yetoe' yega'an'.

³⁵ Na' chop no'ole nite' txen chesote', toe' yeca'a Diosen' na' yetoe' yega'an'.

³⁶ Na' chope bene' nite' do yiže', toe' yeca'a Diosen' na' lecze yega'an' yetoe'.

³⁷ Cate' gosende' diža' nga gose'e le':

—¿Gan' gac da' qui, Xanto'?

Nach Jesús'en gože' legaque':

—Nga chonen che ben' že': "Gan' de be guat nan' chesežag šod ca'."

18

Jempl che to no'ol güezeb len to juez mal

¹ Na' be'len Jesús'en legaque' to jempl bsd blo'ede' legaque' cheyała' nita'teze' yesonchachlaže' yosol güiže' Diosen'.

² Na' gože' legaque':

—Gwche' to ciuda ga gwzoo to juez na' juezen' bi gwdape' Diosen' bala'an na' neca gwche'yichje' še chesazlaže' benachen' can' chonen'.

³ Na' ciudan' gwzoo to no'ol güezeb, na' goxjze cheje' lao juezen' na' che'e le': "Ben yela' justis chia' len bene' chgue'ede' neda'."

⁴ Ba goc sša bi chzenague' che', perw gwdechle bene' xbab, gwne': "Bitw chapa' Diosen' bala'an na' neca chi'yichja' še chesazlaže' benachen' can' chonan'.

⁵ Perw na' no'ol güezeb nga chone' neda' zed, na' na'a gaclena'ne' cont bich yide' yostoe' yela' chxenlaže' chia'."

⁶ Nach gož Xanchon' legaque':

—Le gon xbab che dan' gwna juezen' ben' bi zej to licha.

⁷ Nacchxe gon Diosen' gwzenagche' che bene' ca' ba gwleje' cont zjanaque' xi'ine', bene' ca' chosol güiže' le' do ža do yel. ¿Gwleze' sša cont yosle' legaque' lo na' bene' ca' chesegue'ede' legaque'?

⁸ Chnia' le'e, Diosen' bedao'nez yosle' legaque' lo na' bene' ca'. Perw cate' neda' yida' yežlio nga yeto, neda' naca' ben' gwseła' Diosen' golja' benach, čne' nita'ch bene' chesejnilaže' neda'?

Jempl che to bene' fariseo len to bene' güečixjw

⁹ Gwnita' bał bene' gosacde' zjanaque' bene' güen lao Diosen' neche da' chesone'. Bene' ca' chesacde' bene' ca' yezica'chle bibi zjazaque' len Diosen'. Na' Jesúsen' bi'e jempl nga da' bcuišen bene' ca', gwne':

¹⁰ —Chope bene' ja'ac yodao' blao jasel güiže' Diosen', toe' bene' fariseo na' yetoe' bene' güechixjw.

¹¹ Bene' fariseon' gwzeze' bol güiže' Diosen' na' con chonxen cuine', gwne': “Dios, neda' chona' yela' choxclen chio' bitw chona' cana' cheson yezica'chle bene'. Bitw chca'a bi da' de che bene' yoble, na' bitw chona' bichle da' mal. Bitw chata'lena' no'ol bi nac no'ol chia', na' neca naca' bene' mal can' nac bene' güechixjw ni.

¹² Chope ni'a to xman chona' gwbas, na' yogo'lol da' chona' gan, chbecan' ši cuen na' chnežjua' to cuen che yodao'.”

¹³ Na' bene' güechixjon' gwzeteze' zito'le, neca cheyaxjde' lis lagüe' yabale. Nach chbaže' lcho'e gwne': “Dios, beyaše'laže' neda' naca' bene' güen da' xinj.” Da'na'z da' gwna bene' güechixjon'.

¹⁴ Na' chnia' le'e, Diosen' bezi'xene' che bene' güechixjon' na' beyej liže' bibi xtöle' gota'. Perw bi goc' len bene' fariseon'. Le note'tez bene' chonxen cuine', Diosa' gone' cont si'e zto', na' note'tez bene' chzexjwlaže' lagüen', Diosen' gone' cont gaxene'.

Jasesane' bidao' lao Jesúsen'

(Mt. 19:13-15; Mr. 10:13-16)

¹⁵ Na' jasesane' bidao' lao Jesúsen' cont xoa ne'e yichjgache'. Na' cate' bene' ca' zjanaque' le' txen besele'ede' can' chesonen', gosedile' legaque'.

¹⁶ Perw na' Jesúsen' goxe' bene' ca' cont yeside' len bidao' chegaquen', na' gože' bene' ca' zjanaque' le' txen:

—Le güe' latje yesid bidao' ca' lagua' nga, bi gwžonle, le bene' ca' zjanac ca' bidao' quinga, legaque' chosozenague' che Diosen' cont chnabi'e yichjlažda'ogüe'.

¹⁷ Na' da' li žia' le'e, note'teze bene' bi yosozenague' che Diosen' ca' cheson bidao' quinga cate' chosozenagbe' che xaxna'be', gwbat nabia' Diosen' yichjlažda'ogaque'.

To bene' gwni'a be'lene' Jesúsen' diža'

(Mt. 19:16-30; Mr. 10:17-31)

¹⁸ To bene' gwnabia' gože' Jesúsen':

—Maestrw, le' naco' bene' güen. ¿Bi cheyala' gona' cont gata' yela' mban chia' toli tocaņe'?

¹⁹ Nach Jesúsen' gože'ne':

—¿Bixchen' žo' naca' bene' güen? Toz bene' güen zoa, na' len' Dios.

²⁰ Le' nezdo' da' none' mandadw goncho: “Bi gata'lenle' no'ol bi nac no'ol chele o bene' byo bene' bi nac bene' chele. Nono gotle. Bi cuanle. Bi güe'le diža' güenlaže' che bene' liježle. Le gap bala'aņ xaxna'le.”

²¹ Na' gož ben' le':

—Yogo'lol da' quinga gwzolağua' chonczan' cate' ne' nactia' bidao'.

²² Nach cate' bene' Jesúsen' xtižen' na' gože'ne':

—Zoa to da' ne' chyažjen gono', jayete' yogo' da' de chio', na' mechw dan' le'edo' chen, bnežjon bene' yaše'. Yeyoža' šejnilažo' neda' na' yo'o gaco' neda' txen. Nach še gono' ca', cate' yežino' yaba gan' zoa Diosen' da' zaca'ch gata' chio'.

²³ Perw na' bena' cate' beyož bende' diža' dan' gož Jesúsen' le', goyaše'chgüede', le bene' gwni'achgua goque'.

24 Na' Jesúsen' gwne'e bene' gwni'ana' na' gože'ne':

—Leca zdebe naquen to bene' gwni'a gwzenague' che Diosen' cont Diosen' nabi'e yichjlažda'ogüe'.

25 Bedao'ch te to be xen be nzi' camello to lo' nag yeše' clel ca to bene' gwni'a gwzenague' che Diosen' cont Diosen' nabi'e yichjlažda'ogüe'.

26 Na' bene' ca' bosozenague' xtiže'na' gose'ene':

—¿Noxen' šjayzoa len Diosen' še ca'?

27 Na' Jesúsen' gože' legaque':

—Da' bi gac gon benachen', bitw nacho bi gac gon Diosen' len.

28 Nach Pedroa' gože' le':

—Neto' ba gwlejyichjto' yogo' da' de cheto' cont nacto' le' txen.

29 Na' gož Jesúsen' legaque':

—Da' li žia' le'e, note'teže bene' ba gwlejyichje' liže', xaxne'e, biše', xo'ole' o xi'ine' neche chzenague' che Diosen' cont Diosen' chnabi'e yichjlažda'ogüe',

30 yežlio nga yonežjo Diosen' le' da' nac da' zaca'ch, na' cate' yežine' yaban' gata' yela' mban che' toli' tocanē.

Da' yoble gosyixjue' e Jesúsen' ba zoa gate'

(Mt. 20:17-19; Mr. 10:32-34)

31 Na' gwlejiže Jesúsen' bene' šižinw ca' gwleje' cont zjanaque' txen len le' na' gože' legaque':

—Na'a ba zejcho Jerusalēna' gan' gac yogo'lol dan' nyoj chia' dan' bosozoj da' bene' ca' gosoe' xtiža' Diosen' cani', neda' naca' bena' gwseļa' Diosen' golja' benach.

32 Gaca' lo' na' bene' ca' bi zjanac bene' Israel, na' yesezi'diže' neda', na' yesene' yela' ya' chia', nach yosoži'e xene' cho'alagua'.

33 Yesot yeseyine' neda' na' yesote' neda', perw yeyon' ža yebana' ladjo bene' guat ca'.

34 Perw bene' ca' zjanaque' Jesúsen' txen bi gosejni'ide' dan' gože' legaque', le' zjanchoļ yichjlažda'ogüen', da'nān' bi gosejni'iden'.

To bene' lchol bene' Jericó bele'ede'

(Mt. 20:29-34; Mr. 10:46-52)

35 Nach cate' ba zoa yežin Jesúsen' Jericó, to bene' lchol' chi'e chanezen' chnabe' yosonežjo bene' le' con gaca' da' chesezande'.

36 Na' bende' chesede bene' zan gan' chi'ena', na' gwñabe' bin' chac.

37 Na' gose'ene':

—Jesús bene' Nazaret chdie' lagu' nga.

38 Na' bosya'adie' gwne':

—Jesús, xi'in' diaža che da' rey David, beyaše'laže'šca neda'.

39 Nach bene' ca' zjažialao lao Jesúsen' gosedile' bene' lcholēn', gose'e le' cheyaļa' soe' šize, perw nachle bosya'adiache', gwne':

—Xi'in' diaža che da' rey David, beyaše'laže'šca neda'.

40 Jesúsen' gwleze', nach bene' mandadw šjasexi'e bene' lcholēn' lagüe'na'. Na' cate' gwbiga' bene' lcholēn' lao Jesúsen', nach gože'ne':

41 —¿Bi chačažo' gonda' le'?

Na' bene' lcholēn' gože'ne':

—Xana', benšca cont yele'eda'.

42 Jesúsen' gože'ne':

—Bele'e. Dan' chejnlažo' neda' bačh beyac yejlagon'.

⁴³ Na' la' bele'ete bene' lchola' na' gwda'ogüe' Jesúsen' benxene' Diosen'. Na' lecze ca' yogo' bene' ca' besele'ede' can' goquen' gosonxene' Diosen'.

19

Jesúsen' na' Zaqueo

¹ Nach Jesúsen' gwyo'e yež Jericó na' gwdeze' yešla'a ciudan'.

² Na' zoa to bene' le' Zaqueo. Naque' bene' gwnabia' che bene' güechixjw ca', na' naque' bene' gwni'a.

³ Gwdiljwlaže' naclen' gone' le'ede' Jesúsen', perw bitw goc, le gwnita' bene' zan len Jesúsen' na' Zaqueon' goque' to bene' b'checw dao'.

⁴ Da'nan' gwza'sese' gwdie' lao bene' ca' cont gwyep'e' to lo yag da' zoa gala'ze gan' te Jesúsen'.

⁵ Perw na' cate' bžin Jesúsen' xan yaguen', gwne'e lo yaguen' na' gože'ne':

—Zaqueo, bedao'nez beyetj. Cheyla' yega'ana' ližo' na'aže'.

⁶ Nach Zaqueon' beyetjsese' chebede'. Nach beče'e Jesúsen' liže'na' na' benxene' le'.

⁷ Perw na' bene' ca' zjanžague' len Jesúsen' cate' besele'ede' can' goquen', yogüe' gosenie' che Jesúsen' gosenie':

—Ba zeje' zjazoe' to liž bene' güen da' xinj.

⁸ Nach Zaqueon' gwzeche' na' gože' Xanchon':

—Xana', gašje dan' de chia' gwnežjuan' bene' yaše'. Na' dan' ba gwca' che bene', gwziya'a legaque' cont goseyixjwche' da' zcha'och ca dan' cheyla' yeseyixjue', yonežjwgaca'ne' tap ca'te'le.

⁹ Na' Jesúsen' gože'ne':

—Na'aža ba ben Diosen' yela' mban chio' toli tocane len che bene' lo' yo'o chio'. Na' da' li ba naco' xi'in diaža che da' Abraham lagüe dan' ba chejnilažo' Diosen' can' ben da' xozxta'och Abraham.

¹⁰ Ca nac neda', gwseła' Diosen' neda' golja' benač cont zedyediljua' note'tez bene' ba mbiayi', na' gwnežjua' legaque' yela' mban toli tocane.

Jempl che ši bene' bnežjw xangaque' legaque' mechw xen

¹¹ Na' šlac ne' zjanžag bene' chosozenague' diža' dan' choe' Jesúsen', be'lene' legaque' to jempl, le ba nite' gala'ze Jerusalenna' na' gosacde' la' solaote nabi'e nación Israelen'.

¹² Nach gwne':

—To bene' blao gwyeye' to yež zito' jene' dan' cheyla' gone' cont jaxi' lo ne'e nabi'e yež che', le gosebeje'ne' nabi'e yež chen' cate' yežine'.

¹³ Na' cate' za' se'e, gwleje' ši mos che' na' bnežjue' to toe' mechw xen. Nach gože' legaque': “Mechw nga gonele negosyw šlac bi zoa”.

¹⁴ Perw bene' gualaž chen' besegue'ede' le', nach cate' beyož gwze'e, gosesele' bene' lao xane'na' ben' gwnabia'che' lao yogüe', jaseže'ne': “Bitw chaclaže'to' nabi'a' benga neto'.”

¹⁵ Perw la'czla' bi gosacclaže' bene' gualaž chen', bia'cze gwxi' lo ne'e nabi'e. Nach cate' bežin lažen' da' yoble, bene' mandadw šja'ac xmose' bene' ši ca' lagüe'na', bene' ca' bocua'anlene' xmechuen'. Goclaže' nezde' gaca' gosone' gan len mechw dan' bocua'anlene' to toe'.

¹⁶ Bene' nechw bžine' lagüen' na' gože'ne': “Xana', xmecho' dan' bocua'anleno' neda' benen gan ši ca'te'le ca dan' bocua'anon'.”

17 Nach *xanen'* gože'ne': "Ba beno' da' güen. Naco' mos güen. Beno' can' cheyała' gono' len da' daon' bocua'anlena' le', da'nana' gona' cont nabi'o ši ciuda."

18 Na' bene' gwchopen' bžine' lao *xanen'* na' gože'ne': "Xana', xmecho' dan' bocua'anleno' neda' benen gan gayo' ca'te'le ca dan' bocua'anon'."

19 Nach gože' le': "Le' nabi'o gayo' ciuda."

20 Nach bžin yetoe' lao *xane'na'* na' gože'ne': "Xana', nga de xmecho' dan' bocua'anleno' neda'. Ba blažechachan' bay nga.

21 Bžeba' le' dan' naco' to bene' znia. Chono' gan da' bi beno' žin na' chelapo' dan' gosaz bene' yoble."

22 Nach gož *xanen'* le': "Dan' ba gwnao' ca' chlo'en napo' doła'. Naco' mos mal. Chacdo' naca' to bene' znia, na' nezdo' chona' gan da' bi bena' žin na' chelapa' dan' gosaz bene' yoble.

23 Na' še nezdo' chona' ca', žbichen' bi gwlejo' xmechuan' bene' yoble cont yezian' len yichjen na'a ba bela'a'?"

24 Nach gože' bene' ca' zjaze cuite'na': "Yeca'ale xmechuan' dan' bocua'anlena'ne' na' gwnežjwlen ben' ba noxe' ši ca'te' ca dan' bocua'anlena'ne'."

25 Nach gose'e le': "Xanto', ba noxe'cze' ši ca'te' ca dan' bocua'anleno'ne'."

26 Nach gož bene' gwnabian' legaque': "Chnia' le'e, ben' chon güen len dan' chnežjua'ne', gwnežjua'ne' da' zčha'och, perw na' bena' bi chgone' žin dan' chnežjua'ne', yeca'a da' daon' noxe'na'.

27 Na' ca nac bene' ca' chesegue'ede' neda', bene' ca' bi chesaclaže' nabia'gaca'ne', le šjaxi'e na' gotlene' lagua' nga."

Gosonxene' Jesúsen' cate' beyo'e Jerusalén

(Mt. 21:1-11; Mr. 11:1-11; Jn. 12:12-19)

28 Na' cate' beyož be' Jesúsen' jempl nga nach gwze'e zeje' ciuda Jerusalén.

29 Na' cate' ba zoa yesežine' yež ca' da' zjanzi' Betfagé na' Betania do gan' zoa ya'a da' nzi' Ya'a Olivos, na' gwsele' chop bene' ca' mandadw ben' zjanaque' le' txen,

30 gože' legaque':

—Le šja'ac yež dan' chi' gała'ze, na' cate' žinlen' na' yeže'lele to burr dao' da'ba' yag, be nono na' cuia. Le sežba' na' le che'ba' nga.

31 Še no nab bixchen' chsežleba', na' ye'ln'e': "Xanto' chyažjde'ba'."

32 Nach bene' ca' gwsela' Jesúsen' gosa'aque' na' besele'ede'ba' da'ba' gan' gož Jesúsen' legaque' ca'.

33 Nach šlac cheseseže'ba', xamba' ca' gose'e legaque':

—žBixchen' chsežle burr daon'?"

34 Nach bene' ca' gwsela' Jesúsen' gose'e legaque':

—Xanton' chyažjde'ba'.

35 Nach goseche'eba' lao Jesúsen' na' gosexo'a xagaque' čože'ban' nach bosožie' Jesúsen'.

36 Na' šlac zeje' ngü'e'e nez bene' ca' zjanžag gosonxene'ne', na' goseyixjw no xagaque' lo nez cont blej burron' len.

37 Nach ba zja'aque' gała'ze Jerusalénna' na' besežine' gan' yesyeyetje' Ya'a Olivos. Na' bene' ca' zja'aclene' le' gwzolao gosonxene' Diosen', zižje cheso'e diža' che yogo'loł yela' guac da' ba besele'ede' da' ben Jesúsen'.

38 Nach gosene':

—¡Mbalaz rey chechon' ben' ba za' nga gwseła' Xancho Diosen' le' cont nabi'e! Cheyala' gonxencho Diosen' txen len bene' ca' nita' gan' zoe'na', le ba bene' cont benachen' gac yesyenite' binlo len le'.

³⁹ Na' len bene' zan ca' zja'aclene' Jesúsen' zja'ac ba| bene' fariseo. Nach to chope' gose'e Jesúsen':

—Maestrw, ben mandadw len bene' ca' za'ac len le' txen cont yesenite' šize.

⁴⁰ Nach boži'i Jesúsen' xtiža'gaquen', gwne':

—Chnia' le'e, šaca' bene' quinga nite' šize, yej quinga yesosya'an yesonxen neda'.

⁴¹ Cate' bžine' gala'ze Jerusalenna', gwne'e ciudan', na' bene' xbab che bene' lo' ciudan' na' gwchežyaše',

⁴² na' gwne':

—Šaca' la'ch na'aža šejni'ile nac gonle cont soale binlo len Diosen', perw na'a ne' ngašen'.

⁴³ Gwžin ža cate' bene' ca' chesegue'ede' le'e yesone' to yež de yej da' šechjen ciudan' cont nono gac yoxonj.

⁴⁴ Na' yesote' le'e len xi'inle ca'. Na' yosyočinje' ciudan' na' yesoslase' yej ca'. Ca' gac lagüe da' bi chejle'le Diosen' ba gwsele' neda' laole nga.

Jesúsen' bebeje' bene' ca' cheson ya'a yodao' blaon'

(Mt. 21:12-17; Mr. 11:15-19; Jn. 2:13-22)

⁴⁵ Jesúsen' gwyo'e chyo'o yodao' blaona' na' gwzomagüe' bešaše' bene' ca' chesote' na' bene' chesa'na'.

⁴⁶ Na' gože' legaque':

—Nyojce Xtiža' Diosen' žan: “Ližan' naquen' to latje gan' yeso| güiž bene' neda'”, perw le'e ba benlen ca to latje ga že' bene' gwban.

⁴⁷ Na' bšed blo'ede' bene' ca' že' yodao' blaona' yogo' ža. Na' bžoz gwnabia' ca' na' bene' ca' chososed chosolo'e dan' bzoj da' Moisésen' na' nochle bene' blao che bene' Israel ca', goseyljwlaže' nacle yesone' yesote'ne'.

⁴⁸ Perw bi besyeželde' nacle yesone' le' neche yogo' bene' besyebechgüede' xtiže'na'.

20

Yela' gwnabia' che Jesúsen'

(Mt. 21:23-27; Mr. 11:27-33)

¹ To ža šlac chsed chlo'e Jesúsen' bene' ca' chyo'o yodao' blaona' na' chyixjue'ede' diža' güen che Diosen', besežin bžoz gwnabia' ca' na' len bene' gol ca' chesenabi'e naciöenna' na' bene' ca' chososed chosolo'e dan' bzoj da' Moisés.

² Na' gose'e le':

—Gwnašc neto' bi yela' gwnabia' napo' chono' da' qui, na' no ben yela' gwnabian' cont chonon'.

³ Na' boži'i'e xtiža'gaquen', gwne':

—Lecze de to da' nabda' le'e. Le našc neda'

⁴ ¿non' gwseła' da' Juanna' bzoe' bene' nis? ¿Dios nan' gwsele'ne', še benachen'?

⁵ Na' legacze' gose' lježe':

—¿Bi nacho? Še ye'chone' Dios gwseła' le', na' ye'e chio': “¿Bixchen' ca gwyejle'le che?”

⁶ Na' bi gac ye'chone' benach gwseła' le', le yogo'te bene' že' nga chesejle'e Diosen' gwsele' da' Juanna' be'e xtiže'na', na' yosožie' chio' yej še ye'chone' ca'.

7 Na' gose'e Jesúsen':

—Bi ñezeto' non' gwseła' da' Juan.

8 Nach Jesúsen' gože' legaque':

—Łecz ca' neda' bi yapa' le'e bi yeła' gwnabian' chonłenda' da' ca'.

Jempl che mos mal ca'

(Mt. 21:33-44; Mr. 12:1-11)

9 Na' be'e jempl nga bzejni'ide' bene' ca' chosozenag che', gwne':

—To bene' goze' to cue' xen yag uvas na' bocua'anen' lo na' bene' ca' yesonen' žin na' gwze'e gwyeje' zito' na' jasoe' sša.

10 Cate' bžin ža yosyotobe' cosešen', nach gwseła' to xmose' lao bene' ca' nac lo na'gaque' yag uvasen' cont yosyonežjue'ne' to tlaw coseš dan' yesyezi'en. Na' bene' ca' nac lo na'gaque' yag uvasen' goseyine' mosen' na' to ga'alze bosyose'ene' bibi goso'ene'.

11 Nach xan yežlion' gwsele' yeto mosen', na' łecz gosot goseyine' le' na' gosonde' le' zgot, na' to ga'alze bosyose'ene' bibi goso'ene'.

12 Na' xan yežlion' gwseła'che' mos gwyoŋe, na' łecz gosotlate'ne' gosone'ne' güe', na' besyebeje'ne' gan' že' yag uvas ca'.

13 Na' xan yežlion' gwne': "¿Nacxe gona?" Nach beyone' xbab gwne': "Seła' xi'ina' ben' chacchgüeda', le šeca güesezi'e xtiža' le'."

14 Perw bene' ca' nac lo na'gaque' yag uvasen' cate' besele'ede' xi'ine'na', gose' lježe': "Benga yega'anlene' yežlio nga cate' gat xe'. Le da gotchone' cont yega'anlenchon."

15 Nach besyebeje' le' gan' že' yag ca' na' gosote'ne'.

Nach Jesúsen' gwñabde' bene' ca' zjanžaguen':

—¿Nacxe gon xan yežlion' len bene' ca' bocua'anlene' yežlio čhen'?

16 Šeje' šjetue' legaque' na' yodie' yežlion' lo na' bene' yoble.

Na' bene' ca' že'na' cate' gosende' diža' quinga dan' be' Jesúsen' gosene':

—¡Catec da' mal juisyw dan' goc!

17 Na' Jesúsen' gwñachgüe' legaque' na' gwne':

—¿Bixe zejen da' nga nyojen le'e Xtiža' Diosen'? žan:

Yej dan' bi gosacłaže' güen yo'o ca' yosočhine',

łen ba naquen yej squin.

18 Na' ca nac yejna', note'tez bene' lažo' lo yeja' na' cue'žošje', na' note'tez bene' čiže' yeja' cate' lažon' na' gwšošjen le'.

Ca nac dan' cheyala' gaxjw

(Mt. 21:45-46; 22:15-22; Mr. 12:12-17)

19 Na' bene' ca' chososed chosolo'e dan' bzoj da' Moisés na' bžoz gwnabia' ca' la' besyeyiljwlaže'te nacle yesone' yesezene' Jesúsen', le gosacbe'ede' Jesúsen' be'e jemplna' ñeche dan' bi chesejnilaže' le'. Perw bibi gosone', le besezebe' bi yeson bene' ca' že'na' bene' chesejle'e che Jesúsen'.

20 Da'nan' gosesele' bene' yosogüia yesene'e Jesúsen' cont yesebeje'ne' diža' da' yosode'ede' cont yesagüe' xya che' lao gobernador ben' chnabia'. Gosacde' gone' xbab do laže'gaque' chosozenague' che'.

21 Nach gose'e le':

—Maestrw, ñezeto' diža' da' cho'o na' da' chsed chlo'edo' bene' zejen to lıcha. Ñezeto' toz can' chono' len note'tez bene'. Na' ñezeto' diža' li cho'o chsed chlo'edo' bene' can' chazlaže' Diosen' goncho.

22 Na' da'nan' zedenabeto' le' ¿naquen binlo no čixjo da' cheyala' čixjwcho che ben' nac la'zelagüe bene' gwnabia' ben' čhi' Roma, še bi?

23 Na' gocbe'e Jesúsen' gague do lažen' chese'ene' ca', san chesaclaže' yesagüe' xya che xtižen'. Na' gože' legaque':

—¿Bixchen' chaclaže'le yoslažo'le neda' len xtižan'?

24 Le gwlo'e neda' to mechw. ¿No lao dan' da' le'e mechw nga? na' ¿no la dan' nyoj le'en ni?

Nach gose'ene':

—Che César ben' nac la'zelagüe bene' gwnabia' ben' chi' ciuda Roma.

25 Nach gože' legaque':

—Le gwnežjo bene' gwnabian' da' nac che bene' gwnabia', na' le gwnežjo Dios dan' nac che Dios.

26 Na' bi gosezaque'de' yososlažoe' le' len xtižen' lao bene' ca' že'na'. Na' besyebande' can' boži'e xtiža'gaquen', na' bich bi gose'ene'.

Cate' yesyeban bene' guat ca'

(Mt. 22:23-33; Mr. 12:18-27)

27 Na' lecze besežin bal bene' saduceo gan' zoa Jesúsen'. Bene' ca' chesene' bene' guaten' bi yesyebane'. Nach gosenabde' le', gose'ene':

28 —Maestrw, da' Moisésen' bzoje' can' cheyal'a goncho, gwne' še to bene' byo gate' na' chzeb no'ol chen' perw na' nono bi güezeb chga'an, na' bene' biše' ben' ba gota' cheyal'a yošagna'lene' no'ol güezeba' cont yesenita' xi'in diaža che da' bišen'.

29 Na' gosenita' bene' gosac gaž biše'. Na' bene' nechua' bšagne'e, na' gote' nono xi'ine' gwnita'.

30 Na' bene' gwchopen' bošagna'lene' no'ol güezeba', na' lecze gote' nono xi'ine' gwnita'.

31 Na' bene' gwyona' lecze bošagna'lene' no'olen', na' lecz ca' goc len le'. Na' ca' goc gosedas bene' gaža' bosošagna'lene' no'ola', na' ne toe' ca' gosezoa xi'ine' len le'.

32 Gwde gosat yogo'lol bene' ca', nach got len no'ola'.

33 Na' cate' yesyebane' ladjo bene' guat ca', ¿nox bene' ca' soalene' no'ola' ca' xo'ole'?, le yogo' bene' gaža' bosošagna'lene' le'.

34 Na' Jesúsen' boži'e xtiža'gaquen', gože' legaque':

—Bene' ca' nita' lo yežlio nga chosošagne'e na' lecze chosošague' na' no xi'ingaque'.

35 Perw na' bene' ca' chaque Diosen' zjazaque' cont yosbane' legaque' ladjo bene' guat ca' cont šjasyenite' len le' toli tocane, caten' yesyežine' gan' zoa Diosen' bich yosošagne'e neca yosonežjo xi'ine' no'ol yosošagne'e.

36 Bich yesate', le yesaque' ca' angl ben' že' yaba, na' yesaque' xi'in Dios lagüe dan' ba bosban Diosen' legaque' ladjo bene' guat ca'.

37 Na' lecze da' Moisésen' bzoje' che dan' chesyeban bene' guat ca'. Bzoje' can' gož Diosen' le' caten' bol güiže'ne' to lo yag yeše' dao' da' chey. Na' gwne' Xancho Diosen' naque' Dios ben' chonxen Abraham, ben' chonxen Isaac, na' ben' chonxen Jacob.

38 Na' bene' guat ca' bi chesonxene' Diosen', san bene' zjamban. Na' yogo' bene' ba gosejnilaže' Diosen', ne' zjambane' cont chesonxene' le'.

39 Na' bal bene' chososed chosolo'ede' ley dan' bzoj da' Moisés gose'e Jesúsen':

—Maestrw, binlo boži'o xtiža'gaquen'.

40 Na' bich besyeyaxjde' bi yesenabde' le'.

Criston' naque' xi'in diaža che da' rey David

(Mt. 22:41-46; Mr. 12:35-37)

⁴¹ Jesúsen' gože' legaque':

—¿Nacxechen' chesena bene' Criston' ben' yedenabi'e naque' xi'in diaža che da' rey David?

⁴² Cuin Daviden' bzoje' Xtíza' Diosen' le'e libr da' nzi' Salmos, gwne':

Xancho Dios gože' Xanan':

“Gwche'edo' cuita' nga nabia'cho txen,

⁴³ na' gona' cont yogo' no chesegue'e le' yosozexjw yichje' yosozengue' chio'.”

⁴⁴ ¿Nacxe gac nacho Criston' naque' xi'in diaža che da' rey David? le' cuin Davin' gože' le': “Xana”.

Xtola' bene' ca' chososed chosolo'e dan' bzoj da' Moisésen'

(Mt. 23:1-36; Mr. 12:38-40; Lc. 11:37-54)

⁴⁵ Bene' zan zjanžag chosozenague' cate' gože' bene' ca' zjanaque' le' txen:

⁴⁶ —Le gwsaca' cont bi gonle can' cheson bene' ca' chososed chosolo'e ley dan' bzoj da' Moisés. Legaque' chesyebede' chesaše' zjanyaze' lache' ton. Na' chesyebede' chesonxen bene' legaque' cate' chesyěžague' lagüe ya'a. Chesyebede' chesebi'e gan' chesebe' bene' blao cate' chja'aque' yodao' na' cate' chac lni.

⁴⁷ Na' chesyegue'e yo'o che no'ole güezeb ca'. Na' cate' chosol güiže' Dios, šša cheso'e diža' cont yesaque bene' leca chesonxene' Diosen'. Bene' can' chesacche' castigw clel ca' yezica'chle bene' güen da' xinj.

21

To no'ole güezebe bnežjue' Diosen' xmechue'na'

(Mr. 12:41-44)

¹ Šlac zoa Jesúsen' chyo'o yodao', gwne'e na' ble'ede' bene' gwni'a ca' gosego'o xmechwgaquen' lo' cajen' gan' chesegüe'e mechw che yodaon'.

² Na' lecce ble'ede' to no'ol güezebe bene' yaše' gwlo'e chop centav dao' che'na'.

³ Nach Jesúsen' gwne':

—Da' li žia' le'e, no'ol güezebe yaše' nga ba gwlo'oche' mechw da' zaca'ch clel ca' yogo' bene' ca' yezica'chle.

⁴ Le yogo' legaque' chesegüe'e da' checho'onen lo' yela' gwni'a chegaquen', perw no'ol nga, lo' yela' yaše' yela' zi' che' gwlo'e yogo' da' de che', yogo' da' chachbande'.

Gwžin ža yosyočinje' yodao' blaona'

(Mt. 24:1-2; Mr. 13:1-2)

⁵ Na' bal bene' ca' chesejnilaže' che dan' chsed chlo'e Jesúsen' goso'e diža' catec xdan nac yodao' blaona' dan' gosonen' de yej xdan da' zaque' na' yo'on bi da' bosonežjo bene'. Nach Jesúsen' gwne':

⁶ —Ca nac da' quinga chle'ele ngan', žin ža cate' ne to yej dan' zjancua' nga ca yega'an zjancua' cože' lježen. Yogon' yosyočinje'.

Dan' gac cate' ba za' bagwze yeyož yežlion'

(Mt. 24:3-28; Mr. 13:3-23)

⁷ Na' gosenabde' Jesúsen' gose'ene':

—Maestrw, ¿do bat gac dan' žo' nga? na' ¿nac gac nezetoi' cate' ba zoa gac yogo' da' ca'?

⁸ Na' gwne':

—Le gwsaca' cont nono siye' le'e. Le bene' zan yesaš yežlio nga bene' yesaclaže' yosolane' xlatja' nga, yesene': "Nedan' Criston' ben' gwlej Diosen' cont nabia", na': "Ba za' gac juisyw." Perw le'e bitw gwzenagle xtiža'gaquen'.

⁹ Na' cate' yenele chac gwdile nile na'le o yenele chi' žaš contr bene' ca' chesenabia', bi žeble, le zgua'tec da' quinga cheyała' gac. Perw gague lenna' nacho na'tec na'a yeyož yežlion'.

¹⁰ Nach gože' legaue':

—Na' yesedile to yež len yeto yež yoble na' to nación len yeto nación yoble,

¹¹ na' zan cuen ga x'ochgua na' zan latje lo yežlion' ga gata' gwbin na' cue' yižgüe', na' yesac yela' guac da' yesele'e bene' le'e yaban' da' zaca' yesyebande', na' yesেžebchgua benachen' neche dan' chac.

¹² Perw za' gac yogo' da' quinga cate' yesezene' le'e na' yosoči yososaque' le'e na' yesone' le'e lo na' bene' gwnabia' che yodao' chelen', na' yeseyixjue' le'e ližya. Na' yesেche'xoxje' le'e do lao rey na' do lao nochle bene' gwnabia' dan' chejnilaže'le neda'.

¹³ Na' cate' gac da' quinga güe'le xtiža'na'.

¹⁴ Na' le gon xbab zoacza' chaclena' le'e, nach cate' gacle lo na' bene' ca' bi cuec yichjle nacle yoži'ile xtiža'gaquen',

¹⁵ le neda' gona' le'e xbab len yela' sina' chian' cont yoži'ile xtiža'gaque' sin cbi bi gac yesene'.

¹⁶ Na' balle xaxna'le na' bene' biše'le na' biše' lježle na' bene' migw chele yesেchje' yesone' le'e lo na' bene' chesegue'e le'e. Na' yesote' balle.

¹⁷ Na' yogo'ze bene' yesegue'ede' le'e dan' chejnilaže'le neda'.

¹⁸ Perw chape Diosen' le'e na' bitw güe'le latje cuiayi'le,

¹⁹ na' gone' yela' mban chele toli tocane še soale gwyo gwchejle yogo'lol dan' yesonde' le'e.

²⁰ Na' cate' le'ele ba besela'ac soldadw zan cue'ej cuit Jerusalénna' ben' yesedillen le'e, canan' nezele ba zoa cuiayi' ciudadan'.

²¹ Cana' bene' yesenita' Jerusalén cheyała' yosoxonje'. Na' bene' že' yezica'chle yež ga mbane Judea cheyała' šja'aque' do ya'adao'. Na' bene' yesenita' yixe', bi cheyała' yesone' xbab yesyeyo'e lo' ciuda.

²² Cana' gwnežjo Diosen' castigw che xtoła' bene' ca' že' Judean', cont gac can' nyojen le'e Xtiža' Diosen'.

²³ ¡Nyaše' zjanac no'ol ca' zjanao' xi'in na' no'ol ca' ne' chosoguaže' bidao' lo ža ca'! Leca yesesaca'zi' bene' ca' že' doxen Judean', le Diosen' ža'achgüe' legaue'.

²⁴ Soldadw ca' yesote' bale' lo gwdile na' yebale' yesেche'xoxje' nación ca' dan' zjachi' doxen yežlion'. Na' bene' ca' bi zjanaque' bene' Israel yosyočinje' yo'o ca' dan' že' Jerusalénna' na' yosolej yosošošen'. Perw ba bžia' Diosen' bia' žin ža cate' bene' ca' bi zjanaque' bene' Israel bich yesenabi'e nación Israel.

Yid Jesucriston' da'yoble

(Mt. 24:29-35, 42-44; Mr. 13:24-37)

²⁵ Ca' nac gwbiž, bio' na' beljw ca', gac da' yebanecho len legaquen. Na' bene' že' yežlion' yesaque' tole na' yesacžejlaže' catec sšag gon nisdaon' chas chata' gaquen.

²⁶ Na' bene' že' yežlio nga yesatte' šlat yesেžebchgüe' dan' gaquen, le yogo' da' chle'echo le'e yaban' yesaquen ca' chac yežlion' cate' chxo'.

²⁷ Na' cana'ch bene' že' yežlion' yesele'ede' neda' naca' ben' gwsela' Dios golja benačh, za'a to lo' bejw len yela' guac xen na' yela' bene' zaca' juisyw chia'.

²⁸ Na' cate' solao gac da' quinga, le gončačh laže'le na' le yebe. Ba zoa žin ža yida' da' yoble yebeja' le'e lo' da' malen'.

²⁹ Na' Jesúsen' be'lene' legaque' to jempl, na' gože' legaque':

—Le na'šc can' chon yag yixgüigw na' bite'teze yag yoble,

³⁰ cate' chle'ele ba chebian laga' che'en dao' nach nezele bačh zoa yela' tiemp ba.

³¹ Ca'czen' cate' le'ele ba chac da' mal ca' ba gwnia', cana'ch nezele ba zoa gwlo'e Diosen' yela' gwnabia' che'.

³² Da' li žia' le'e, biņa' yenit diaža' che le'e nita'le na'a cate' yeyož gac yogo'lo' da' ca'.

³³ Le'e yaba na' yežlion' yesede čhen, perw ca nac xtižan', gague da' te cbi gac can' žanņa'.

³⁴ Na' le gon xbab cont bi gacle bene' lia na' bene' borrašw na' cont bi soale yela' yežejele. Bene' ca' yesac bene' lia na' borrašw na' bene' ca' yesyela' yesyežejde' bi yesebeze' batcan' gac yogo' da' quinga.

³⁵ Na' toz can' gac che bene' že' doxen yežlion', yesac yogo' da' quinga cate' nono chon xbab.

³⁶ Perw yogo' ža le soa le cuez batcan' gac da' quinga na' le yo' güiž Diosen' cont bibi gac chele na' gac yedyesoale len neda' naca' ben' gwsela' Diosen' golja benačh.

³⁷ Yogo' ža gwzoa Jesúsen' bsd blo'ede' bene' yodao' blao, na' yogo' že' beyeje' lo' ya'a da' nzi' Ya'a Olivos.

³⁸ Na' yogo' zil besežin bene' zan bosozenague' che' šlac bsd blo'ede' legaque' chy'o yodao' blao.

22

Bosoxi'e cont yesezene' Jesúsen'

(Mt. 26:1-5, 14-16; Mr. 14:1-2, 10-11; Jn. 11:45-53)

¹ Na' ba zoa gala' lni pascw caten' chesagüe' yetextil da' bibi levadura yo'on.

² Na' bħoz gwnabia' ca' na' bene' ca' chososed chosolo'e ley dan' bzoj da' Moisésen' beseyljue' nacle yesone' na' bi da' yosode'ede' cont yesezene' Jesúsen' na' yesote'ne', le besežebe' še cate' bi yesone yezica'chle bene' legaque'.

³ Nach Satanásen' dan' chnabia' da' xigüe' ca' gwyo'o gwyazen lo' yichjlaždao' Judas Iscarioten' ben' goque' t xen len bene' šižinw ca' zjanaque' Jesúsen' t xen,

⁴ na' gwyeye' jane'e bħoz gwnabia' ca' na' bene' gwnabia' che bene' ca' chesape' yodao'na' cont bosoxi'e nacle gone' gwdie' Jesúsen' lo' na'gaque'.

⁵ Na' leca besyebede' na' gose'e le' yosonežjue'ne' mechw.

⁶ Na' Judasen' gwxenlaže' len legaque', na' gwzologüe' gw diljwlaže' nacle gone' gwdie' Jesúsen' lo' na'gaquen' cate' bi že' bene' zan.

Jesúsen' blo'ede' legaque' can' cheyala' yesone' šjasyeza'laže' dan' gaten'

(Mt. 26:17-29; Mr. 14:12-25; Jn. 13:21-30; I Co. 11:23-26)

⁷ Na' bžin ža gala' lni caten' chesagüe' yetextil dan' bibi levadura yo'o. Naquen ža cate' chesote' xila' dao' cont šjasyeza'laže' can' bosla Diosen' da' xozxta'ogaquen' lo' na' bene' Egipto ca'.

⁸ Na' Jesúsen' gwleje' Pedroa' len Juanna' na' gože' legaque':

—Le šja'ac na' le šjasiņa'a dan' gagwcho lo' lnin'.

9 Na' gose'ene':

—¿Ga che'ndo' šjasini'ato'?

10 Nach gože' leaque':

—Le šja'ac na' cate' ba gwyo'ole ciudan' na' yežagle to bene' byo no'e to che'e nis. Na' šejlen'ne' na' gan' yežinen'

11 Le ye' xan yo'on': "Maestron' že': Gonšco' to yo'o ga gagua' xše' že' lni nga len bene' ca' zjanaque' neda' t xen."

12 Nach gwlo'ede' le'e to quart xen dan' zoa yichjen na'ale gan' de yogo' da' chyažjecho. Na' le gwsini'a cont gagwcho na'.

13 Na' gosa'aque' na' yogo' can' gož Jesúsen' leaque' goc. Nach bososini'e xše' že' l'ina'.

14 Na' cate' bač gwchi'e cho'a mesen' len postlw che' ca',

15 na' gože' leaque':

—Leca gwzelaža' gagua' yela' guagw che lni nga len le'e na'a za' saca'zi'a na' gata'.

16 Chnia' le'e, na'a zelao gagan'. Cate'ch ba blo'e Diosen' yela' gwnabia' che'na', cana'ch gagan' da' yoble.

17 Na' gwxi'e vas gan' yože nis uvasen', na' beyož be'e yela' choxclen che Dios, nach gwne':

—Le sin', na' le ye'ej yogo'le late' güeje dan' yože lo' vas nga.

18 Chnia' le'e na'a zelao che'eja' vino che uvasen'. Cate' ba blo'e Diosen' yela' gwnabia' che'na', cana'ch ye'ejan' da' yoble.

19 Nach gwxi'e yetextilen' na' be'e yela' choxclen che Diosen' na' bzojxen' na' bnežjuen' leaque'. Na' gože' leaque':

—Da' nga cuerp' chia' chzanlaža' neče le'e. Quinga gonle cont šjayze'ele bi zejen len le'e dan' yesote' neda'.

20 Na' lecze bexae' vassen' cate' ba beyož gosagüe' xšen' na' gože' leaque':

—Dan' yože lo' vas nga zejen da' cobe dan' gwna Diosen' gone' gaclene' le'e. Na' solao gone' can' gwne', le yesote' neda' na' gwlaļ xchenan' neče le'e.

21 Na' da' li ben' gwdie' neda' lo na' bene' ca' chesegue'e neda' nga chagw-lene' neda' t xen.

22 Na' gac chia' can' nžia bia' gac, neda' naca' bena' gwseļa' Diosen' golja' benač, perw nyaše'chguaze nac ben' gwdie' neda' lo na' bene' ca'.

23 Nach gosezolagüe' gosenabe lježgaque' noen' gon da' malen' nac ca'.

Gosacyože' noe' nacch blao

24 Na' lecze gosezolagüe' gosacyože' noe' nacch blao.

25 Na' Jesúsen' gože' leaque':

—Nita' bene' gwnabia' che to to nación ca' na' chesone' byen chosozenag bene' chegaque', na' bene' gwnabia' ca' chesaclaže' yesoe' bene' diža' chegaque' zjanaque' bene' güenchgua.

26 Perw le'e gague can' cheyaļa' gonle. Še no le'e nacchle bene' blao, cheyaļa' gwzejjwlaže'le len bene' lježle na' gonle ca' bene' xcuide' ben' bibi na' neze. Na' še no le'e chnabia'le, cheyaļa' soale gaclen lježle.

27 Le gon xbab noe' nacch bene' blao, še bena' chi' cho'a mesen' o še xmosen' ben' chon mandaw che'. Nacia'cze ben' chi' cho'a mesen' naccze' bene' blaoch. Perw neda', zoa' cont gaclena' le'e la'cze naca' Xanle.

28 Le'e bina' cuejyichje neda' la'czļa' bene' zan ba chesegue'ede' neda'.

29 Na' ca' nac Xan' ba none' chia' cont nabi'a t xen len le', lecze neda' ba nona' chele cont nabi'a'le t xen len neda'.

³⁰ Na' gona' cont ye'ej gagwle txen len neda' cate' yela'le gan' nabi'a, na' cue'le cuita'na' nabia'le šižiŋw cuen bene' ca' zjanaque' xi'ŋ diaža che da' Israel.

Jesúsen' gwne' Pedroa' bi chebe' še nombi'e le'
(Mt. 26:31-35; Mr. 14:27-31; Jn. 13:36-38)

³¹ Nach Jesúsen' gwne':

—Simón, ben xbab chio', Satanásen' dan' chnabia' da' xigüe' ca' ba gwñaben gaco' lo ne'en cont gonen cuejyichjo' bich šejnilažo' neda'. Na' dan' gonen len le' naquen ca dan' chon bene' caten' chdie' trigon' lo' rner.

³² Perw na' neda' ba gwñaba' gaclen Diosen' le' cont bi cuejyichjo' dan' chejnlažo' neda'. Na' cate' ba betinjo' xto'lo'na', gono' chach laže' bene' lježo' quinga.

³³ Nach Pedroa' gože'ne':

—Ba bechoglaža' sa'alena' le', gague ližya na'ze, san gatlencza' le'.

³⁴ Na' Jesúsen' gože'ne':

—Pedro, žia' le', biŋa' cuež jean' ŋa'aže' cate' gac šon' ni'a bi chchebo' še nombi'o neda'.

Gwne' ba zoa yosochi yososaca' bene' legaque'

³⁵ Na' gože' bene' ca' zjanaque' le' txen:

—¿Byažjele bi da' byažjele cate' gwsela' le'e jatixjue'ele xtiža'na'? Gwsela' le'e sin cbi bia'le mechw, ne bzod, na' ŋeca bia'le xelle.

Na' gose'ene':

—Bitw bi byažjeto'.

³⁶ Na' gože' legaque':

—Perw ŋa'a še napple mechw, cheya'la' gua'len, na' lecze ca' gua'le bzod. Na' še bitw bi spada chele de, le gote' xadon chelen' cont si'le to spada.

³⁷ Chnia' le'e gonle ca', le gac chia' can' nyojcen le'e Xtiža' Diosen' žan: "Gosone'ne' ca' bene' güen da' xinj." Na' cheya'la' gac yogo'lol dan' nyojen.

³⁸ Nach gose'ene':

—Xanto', gwña'šc nga noa'to' chope spada.

Na' gože' legaque':

—Güesaquecen.

Jesúsen' chol güiže' Diosen' latje gan' nzi' Getsemani'
(Mt. 26:36-46; Mr. 14:32-42)

³⁹ Nach gwze'e gwyeje' Ya'a Olivos can' ba yolagüe' chone', na' bene' ca' zjanaque' le' txen zjana'ogüe' le'.

⁴⁰ Nach cate' besyežine' latjen' na' gože' legaque':

—Le yol güiž Dios cont bi gon gwxiyen' le'e gan.

⁴¹ Na' gwle'e len legaque' zito' ca' gan' zelao žin to yej da' gwzala'cho, na' bzoa xibe' na' bol güiže' Dios,

⁴² gwne':

—Xa', benšca cont bi saca'zi'a na' bi yesote'nda' še ca' chazlažo', perw bi chnaba' gac da' žia' neda', san gac can' nao' le'.

⁴³ Na' to angl bene' za' yaba blo'elagüe' le' na' be'e le' fuerz valor.

⁴⁴ Na' šlac chžaglaochgüe' len yichjlažda'ogüe'na' gwzolao chžaglaoch' chol güiže' Diosen' beyaqljite' yes. Na' nis yes che'na' beyaquen ca' tlab'a güeje chen dan' zjanaquen chel'son, besyeyinjen lo' yo.

⁴⁵ Na' bezeche', na' beyeje' gan' nita' bene' ca' zjanaque' le' txen, ble'ede' zjanite' chesetase' dan' leca gosacyaše'chgüede'.

46 Na' gože' legaque':

—¿Bixchen' chtasle? Le chas, le yol güiz Dios cont bi gon gwxiyen' le'e gan.

Gosezene' Jesúsen'

(Mt. 26:47-56; Mr. 14:43-50; Jn. 18:2-11)

47 Ne' choe'te Jesúsen' diža' cate' besežin bene' zan gaļa'ze gan' zoen'. Na' ben' le' Judas, ben' goque' txen len bene' šižinw ca' gwlej Jesúsen' cont zjanaque' le' txen, žialagüe' laogaque'. Na' gwbigue' gan' zoa Jesúsen' na' bnope' xague', perw gague do lažen' bene' ca'.

48 Na' Jesúsen' gože' le':

—Judas, ¿chnopo' neda' cont gwdio'nda' lo na' bene' quinga? neda' naca' bena' gwseļa' Diósen' golja' benach.

49 Na' cate' bene' ca' zjanaque' Jesúsen' txen besele'ede' can' gac che'na' nach gose'ene':

—Xanto', ¿gwyinto' bene' quinga spada cheton'?

50 Na' toe' gwđinen' mos che bxož blaon', gwchogtechgüe' nague' licha.

51 Perw Jesúsen' gože'ne':

—Bich gonle ca'.

Nach gwdane' nag mosen' na' beyone' le'.

52 Jesúsen' gože' bxož gwnabia' ca' na' bene' ca' chesenabi'e bene' ca' chesape' yodao', na' bene' gole blao ca' chesenabia' nación Israelen' ben' zja'ac zjasexi'e le', gože'ne':

—¿Bixchen' nonle neda' ca to bene' gwban za'acle zedexi'le neda' len spada na' len yag?

53 Yogo' žaze gwzoo' len le'e chyo'o yodao' blaon' na' bitw gwzenle neda'. Perw na' ba bžin ža gonele neda' con can' chaclaže'le, na' ba bžin ža gac can' chaclaže' Satanásen' dan' chnabia' bene' ca' chesaš lo cholen'.

Pedroa' bi gwchebe' še nombi'e Jesúsen'

(Mt. 26:57-58, 69-75; Mr. 14:53-54, 66-72; Jn. 18:12-18, 25-27)

54 Nach gosoxe' Jesúsen' na' goseche'ene' liž ben' naque' bxož blao che nación Israelen'. Nach Pedroa' na' ogüe' Jesúsen' zito' zito'le.

55 Na' bosoxene' yi' chyo'o che bxož blaona' na' gosebi'e cho'a yi'na'. Na' gwche' Pedroa' len legaque'.

56 Na' to no'ole güen žin ble'ede' chi'e cho'a yi'na' na' gwne'e le' na' gwne':

—Lecze len benga naque' txen len Jesúsen'.

57 Perw Pedroa' bitw gwchebe' še nombi'e Jesúsen'. Gože'ne':

—No'ole, bitw nombi'ane'.

58 Na' gocze šlož, yeto bene' ble'ede' Pedroa' gože'ne':

—Lenczo' naco' txen len bene' ca'.

Na' Pedroa' gože'ne':

—Bitw lena' len legaque'.

59 Gwde to hor yetoe' gwne':

—Da' licze nac benga txen len Jesúsen', le naque' bene' Galilea.

60 Na' Pedroa' gože'ne':

—Bene', bi nežda' bi dižan' cho'o.

Na' ne' choe'te Pedroa' dižan' ca', gwchež to jea.

61 Na' Xancho Jesúsen' gwyechje' gwne'e Pedroa' na' jayze'e Pedroa' diža' dan' gož Xanchon' le' caten' gwne': "Biņa' cuež jean' na'aže' cate' gac šone ni'a bi chebo' še nombi'o neda'."

62 Na' Pedroa' beze'e leca gwchežyaše'.

Gosezi'diže' Jesúsen'
(Mt. 26:67-68; Mr. 14:65)

⁶³ Na' bene' ca' goseche'e Jesúsen' gosezi'diže' le', na' gosot goseyine' le'.

⁶⁴ Na' bosochaje' to lache' lao Jesúsen' na' goseyine' le' na' gose'ene':
—Gwñeya'ašč non' chyin le'.

⁶⁵ Na' zanch diža' da' gosene' gosezi'diže' Jesúsen'.

Goseche'e Jesúsen' lao bene' ca' chesenabia' nación Israelen'
(Mt. 26:59-66; Mr. 14:55-64; Jn. 18:19-24)

⁶⁶ Na' cate' gwyeni', bene' gole blao ca' chesenabia' nación Israelen' na' bꝯoz gwnabia' ca' na' bene' ca' chososed chosolo'e ley dan' bzoj da' Moisés be-sežague' na' gosone' mandaw gwyej Jesúsen' laogaque' gan' chesenabi'ena', nach gose'ene':

⁶⁷ —Gwnašč neto' še le' naco' ben' gwlej Diosen' cont nabi'o nación chechon'.
Nach gože' legaque':

—Šaca' nia' le'e neda' naca' Criston' ben' gwlej Diosen' cont nabia' nación chechon', bitw šejle'le chia'.

⁶⁸ Na' šaca' bi nabda' le'e, neca yoži'ile xtižan', neca gwsanlenda.

⁶⁹ Neda' naca' ben' gwsela' Diosen' golja' beñach. Na' na'a cui'a cuit Diosen' nabi'a txen len le', Dios ben' chnabia' doxen.

⁷⁰ Nach yogüe' yose'ene':

—¿Len' naco' dogualje Xi'in Diosen'?

Na' gože' legaque':

—Le can' žale nan' naca'.

⁷¹ Na' gosene':

—iNoch no chyažje no gagw xya che! Chio' ba benecho na'a chne' che Diosen' dan' že' ca'.

23

Bosocuiše' Jesúsen' lao Pilaton'
(Mt. 27:1-2, 11-14; Mr. 15:1-5; Jn. 18:28-38)

¹ Na' yogo'lol bene' ca' gosezože'e na' goseche'ene' lao Pilaton' ben' nac gobernador.

² Na' gwzolaos bosocuiše' Jesúsen' gosene':

—Ba gwchoglaoto' che benga cheyala' gate' dan' chde' chgo'oyele' nación Israelen' cont yesejle'e che' na' lecze chžone' chixjwto' da' cheyala' chixjwto' lao rey César. Na' lecze že' len' naque' Criston' ben' gwlej Diosen' cont nabi'e nación cheton'.

³ Nach Pilaton' gwñabde'ne' gože'ne':

—¿Len' naco' rey che bene' Israel?

Nach Jesúsen' boži'e xtižen', gwne':

—Can' gwnao'na', can' naquen.

⁴ Nach Pilaton' gože' bꝯoz ca' len yogo'lol bene' ca' zjanžag lagüe'na':

—Bibi nla'lagüe' še bi dola' nap benga.

⁵ Perw na' goseneche', gosene':

—Chde' chgo'oyele' yogo' bene' že' distritw Judea nga yesejle'e dan' chsed chlo'ede'. Gwzolaogüe' bsd blo'ede' distritw Galilean' perw lencze nga bač chsed chlo'ede' na'a.

Pilaton' gwsele' Jesúsen' lao Herodes

⁶ Cate' bene Pilaton' can gosene', nach gwnabe' še Jesúsen' naque' bene' Galilea.

⁷ Na' cate' goche'ede' Jesúsen' ze'e Galilean' gan' chnabia' gobernador Herodes, na' gwsele'ne' lao Herodes, le ca hora' zoa Herodes Jerusalénna'.

⁸ Cate' Herodes ble'ede' le' bebede', le ba goc sša che'nde' le'ede' le'. Ba bende' xtiža' Jesúsen' na' zoe' lez le'ede' gone' to da' zaca' yebande'.

⁹ Nach da' zan da' gwnabde' Jesúsen', perw ne to xtižen' ca boži'i Jesúsen'.

¹⁰ Bxoz gwnabia' ca' na' bene' ca' chososed chosolo'e ley dan' bzoj da' Moisés gosezeche' gala'ze na' bosocuiše'ne' len zan diža'.

¹¹ Na' Herodes len zan soldadw che' ca' gosezolaogüe' gosezi'diže'ne' na' gosonle' che'. Nach cate' beyoz bosoguacue'ne' to lache' xdan juisyw, gosele'ne' da' yoble lao Pilaton'.

¹² Na' žana' Pilaton' len Herodes gwzolao gosaque' migw, la'czla' cate' za' gac ca' besegue'e lježe'.

Gosechoglagüen' gat Jesúsen'

(Mt. 27:15-26; Mr. 15:6-15; Jn. 18:39-19:16)

¹³ Nach Pilaton' botobe' bxoz gwnabia' ca' na' bene' ca' chesenabia' nación Israelen' len yezan bene' yež, gan' chesone' yela' justisen'.

¹⁴ Nach gože' legaque':

—Le'e bedesanle benga lagua' nga, na' gwnale chde' chgo'oyele' bene' Israelen' yesone' contr gobiernna'. Neda' bach gwnabyožda'ne' lao le'e ca xyan' dan' chagwle che', ne to da' xinj ca chželda' še bi dan' none'.

¹⁵ Na' lecz ca' Herodes bitw bi xtóle' bželde', na' besele' le' laoto' nga. Na' nachbia' bibi ben benga da' cheyała' gate'.

¹⁶ Na' na'a con gona' mandadw yeseyine' le' na' gwsana'ne'.

¹⁷ Gwne' ca', le yogiüz chsane' to bene' pres lo lni pascw chegaque'.

¹⁸ Na' yogo' bene' ca' že' bososye'e toz ca gosene':

—Chojtega benga gate' na' gwsano' Barrabásen'.

¹⁹ Na' Barrabásen' goseyixjue'ne' ližya da' bxie' gwdiłe lo' ciudan' na' goque' to bene' güet bene'.

²⁰ Na' da' yoble Pilaton' gwnabde' legaque' še gwsane' Jesúsen',

²¹ perw bososye'e zižjech gosene':

—jBde'e le'e yag cruz! jBde'e le'e yag cruz!

²² Da' gwyon ni'a gož Pilaton' legaque':

—¿Bixe da' xinj nonen'? Ne to da' xinj bi chželda' še bi none' da' zaca' gate'. Na' gona' mandadw yeseyine' le' na' gwsana'ne'.

²³ Perw gosone' byen bososye'e yelate' zižjech gosenabe' gwde'ene' le'e yag cruz. Nach Pilaton' bzenague' chegaquen'

²⁴ na' gwchoglagüe' che' gac can' gosenabde' le'.

²⁵ Nach bsane' Barrabás ben' zjanyixjue' ližyan', ben' gosenabe' gwsane', la'czla' Barrabásna' goque' ben' bxie' gwdiłe na' bene' güet bene'. Na' Pilaton' bodie' Jesúsen' lo' na'gaque' cont yesone' len le' ca chesaclaže'.

Bosode'e Jesúsen' le'e yag cruz

(Mt. 27:32-44; Mr. 15:21-32; Jn. 19:17-27)

²⁶ Na' šlac zjanče'ene' gan' yesote'ne' besyežague' to bene' yež Cirene le' Simón, za' zeze'e yixe'. Na' bosogüe'ene' yag cruz che Jesúsen' na' gwyeye' gwda'ogüe' Jesúsen'.

27 Na' bene' zan zjana'ogüe' le' na' zjalen zan no'ole. Na' no'ol ca' gwzolaos bososye'e gosebeže' che'.

28 Na' Jesúsen' gwyechje' na' gože' legaque':

—No'ole Jerusalén, bitw cuežle chia'. Yejni'a le' cuež chele na' che xi'ñle.

29 Da' li gwžin ža cate' yesene': "Mbalaz nita' no'ole güiž no'ole cono gwxa na' nono bguaže'."

30 Cana' yesenablaže' yesebixe ya'a ca' cont čhenen legaque'. Yesenablaže' che' bđinj goten legaque'.

31 Še yesot bene' neda' len bibi xtoła' de, ĵnacchxe yesonde' le'e nacle bene' güen da' xinj!

32 Na' lecze goseche'e chop bene' güen da' xinj cont bosode'e legaque' le'e yag cruz can' gosone' len Jesúsen'.

33 Na' cate' besežine' latje gan' nzi' Latje che Žit Yichj Bene' Guat, bosode'e Jesúsen' le'e yag cruzen'. Na' lecze bosode'e bene' mal ca' chop le'e yag cruzen' len le', toe' gwda' cuít Jesúsen' licha, na' yetoe' gwda' cuíten' robes.

34 Na' Jesúsen' gwne':

—Xa', bezi'xen che bene' quinga chesegue'ede' neda'. Gague zjanезде' bin' chesone'.

Na' gosone' rifa cate' besyele'e xalane' cont gota'bia' noe' yechelen.

35 Na' bene' zan besyežejde' le'. Na' bene' gwnabia' čhegaque' ca' gosonle' che', gosene':

—Yezica'chle bene' bosle'. Še da' li naque' Criston' ben' gwlej Diosen' yedenabi'e, žbixčhen' bi chosla cuine'?

36 Nach soldadw ca' lecž ca' gosonle' che'. Gosebigue' gała'ze gan' zoa yag cruzen' na' bosonežjue'ne' vino zičhj.

37 Nach gosene':

—Še len' naco' rey che bene' Israel, bosla cuino'.

38 Na' yichj yag cruz che'na' gwzoa to dan' nyojen, žan: "Bengan' rey che bene' Israel." Na' byojen diža' griego, diža' latín na' diža' hebreo.

39 Na' to bene' mal ben' da' le'e yag cruz cuít Jesúsen' lecze gwzi'diže'ne', gože'ne':

—Še le' naco' ben' gwlej Diosen' cont yedenabi'o nación čechon', bosla cuino' na' lecze bosla neto'.

40 Na' ben' yeto gwđile' bene' lježen' gože'ne':

—¿Bi chžebo' Diosen'? Chio' ba da'cho le'e yag cruz cont gatcho can' da' le',

41 na' dan' gat chio' naquen licha cont si'cho castigw che xtoła'chon'. Perw benga, bitw bi doła' nape'.

42 Nach gože' Jesúsen':

—Jesús, šjajza'laže'go' neda' cate' žin ža nabi'o.

43 Na' gož Jesúsen' le':

—Da' li chnia' le', na'aža soaczo' len neda' gan' zoa Diosen'.

Can' goc caten' got Jesúsen'

(Mt. 27:45-56; Mr. 15:33-41; Jn. 19:28-30)

44 Na' cate' bžin guagwbiž goc choł doxen lo yežlion' bžinte do cheda šone.

45 Bitw bšeni' gwbižen'. Na' ca nac lache' dan' ze lo' yodao' blaona', bcheza' gacholen.

46 Nach Jesúsen' bosye'e zižje gwne':

—Xa', chon cuina' lo nao', bezi' spiritw čhia'na'.

Na' beyož gwne' ca' gote'.

47 Na' cate' ble'e xan soldadon' can' goquen', benxene' Diosen' na' gwne':
—Da' licze benga goque' bene' gwey to licha.

48 Na' bene' zan bene' besežag besele'ede' can' goc na' yogo'lole' besyeya'aque' chesebaže' lcho'e gosacde' da' juisyw ba goc.

49 Na' yogo' bene' ca' zjanombia' Jesúsen', na' len no'ol ca' zjanao' le' caten' beze'e Galilean', gosezeche' zito'le besele'ede' da' ca' goquen'.

Bosocuaše' Jesúsen'

(Mt. 27:57-61; Mr. 15:42-47; Jn. 19:38-42)

50 Na' zoa to bene' ciuda Arimatea gan' mbane Judean' na' le' José. Naque' txen len bene' ca' chesenabia' nación Israel, na' naque' to bene' güen bene' zej to licha.

51 Ba zoe' chbeze' batcan' solao nabia' ben' seła' Diosen'. Bitw bene' txen len bene' ca' gosechoglagüen' yesote' Jesúsen'.

52 Bena' gweyje' lao Pilaton' jaynabe' cuerp che Jesúsen'.

53 Na' beletje'ne' le'e yag cruzen' na' btobe' le' to lache' xen na' la' bcuaše'te' le' to lo' bloj da' nche'ene' le'e yej. Na' naquen to ba cobe ga nono na' yosocuaše'.

54 Na' yogo' da' ca' goc ža cate' chososiñi'e che ža che Dios. Na' ba bžin hor cate' cheyała' yosocueze' bite'teze žin o mandadw da' chesone'.

55 Na' no'ol ca' za'aclene' Jesúsen' cate' gwze'e distritw Galilean' ja'aclene' Josén' cont besele'ede' ba che Jesúsen' gan' gwxa cuerp che'na'.

56 Nach gosa'aque' na' gosone' to da' chła' zix da' yeseyebe' cuerp che Jesúsen'. Na' ža che Diosen' gosonita'cze can' ža ley chegaquen', bibi žin gosone'.

24

Jesúsen' bebane' ladjo bene' guat

(Mt. 28:1-10; Mr. 16:1-8; Jn. 20:1-10)

1 Bał dmigw ja'ac no'ol ca' da' yoble cho'a bloj gan' bosocuaše' Jesúsen' na' gosoxe' da' ca' ba gosone' da' chła' zix, na' yebał no'ole ja'aclene' legaque'.

2 Na' cate' besežine' na' besele'ede' ba bga'a yejen' dan' bosode'e cho'a blojen'.

3 Na' goso'e, na' bitw besyeželde' cuerp che Xancho Jesúsen'.

4 Šlac zjanite' chesyebande' che da' quinga, besele'ede' chope bene' zjazecha cuitgaquen' zjanyaze' lache' da' chactitchgua.

5 Na' no'ol ca' besežebe' na' bosocheque' yichjgaquen' gosone'e lo yole. Nach bene' ca' gose'e no'ol ca':

—¿Bixchen' cheyiljwle to bene' mban nga ladjo bene' guat?

6 Notoch no nła' nga. Ba bebane' ladjo bene' guat na' mbancze'. Le šjayza'laže' can' gwne' cate' ne' zoale Galilean'.

7 Gwne' le' naque' ben' gwseła' Diosen' golje' benach. Na' gwne' cheyała' gague' lo na' bene' mal ca' cont yesote' le' yosode'ene' le'e yag cruz, na' yeyon ža yebane' ladjo bene' guat.

8 Na' no'ol ca' jasyeze'ede' xtiže'na'.

9 Na' besyeya'aque' cho'a blojen' na' jasedixjue'ede' yogo' da' ca' len postlw ca' šnej na' len yezica'chle bene' ca' nita' txen len legaque'.

10 Na' no'ol ca' jasedixjue'ede' postlw ca' zjanaque' bene' quinga: María bene' Magdala, na' Juana, na' María xna' Jacobo, na' len yebałe no'ole.

11 Na' postlw ca' bitw gosejle'e che no'ol ca', gosacde' chesenazen'.

12 Perw na' Pedroa' la' gwzoža'te' na' la' gwza'seste' bžine' cho'a blojen' na' bcheque' na' ble'ede' lache' ca' zjachin' lo' yo. Na' beze'e bebanchgüede' che da' ca' ble'ede'.

Blo'elao Jesúsen' chop bene' ca' šlac zja'aque' Emaús

(Mr. 16:12-13)

13 Na' lecze ža dmiɡwna' chop bene' ca' gosaque' Jesúsen' txen ja'aque' yež dan' nzi' Emaús, do šnej mil metr zito' par Jerusalénna'.

14 Na' legacze' bosošalje' che yogo' da' ca' ba goquen'.

15 Ne' chesone' xbab na' ne' chesoe'te' diža' chen cate' Jesúsen' gwbigue' len legaque' na' gwza'lene' legaque' txen,

16 perw bitw gosache'ede' noxen' zejlen legaque'.

17 Nach gože' legaque':

—žBi dižan' choe'le šlac ngo'ole nezen'? žBixčhen' chacyaše'le?

18 Na' toe' le' Cleofas boži'e xtižen' gože'ne':

—žNacxe chaquen' gwza'o Jerusalén na' biņa' gacbe'edo' da' ca' ba goc lo' ciudan'? žTozo' le' zo' Jerusalén na' biņa' gacbe'edo'!

19 Na' Jesúsen' gože' legaque':

—žBi goquen' žale ca'?

Nach gose'ene':

—Dan' goc che Jesús bene' Nazaret. Goque' to bene' gwseļa' Dios cont be'e xtižen', na' Diosen' len beňachen' besyebede' yeļa' guac čhen' dan' blo'e na' diža' dan' be'e.

20 Perw na' bžoz gwnabia' čecho ca' len bene' ca' chesenabia' nación chechon' gosone' le' lo' na' bene' ca' gosečhoglagüe' che' cheyaļa' gate', na' bosode'e le' le'e yag cruz.

21 Ba goc šone ža na'a goc da' quinga. Na' neto' gwzoato' lez Diosen' gwseļe' le' cont yebeje' nación čecho lo' da' malen'.

22 Na' no'ol ca' zjanac txen len neto', baļe' goso'e diža' da' chebaneto', ja'aque' cho'a ban' be'e

23 na' bitw besyeželde' cuerp che'na'. Cate' besyela'aque' gosene' be-sele'eda'ogüede' angl bene' gose'e legaque' ba bebane' ladjo bene' guat ca'.

24 Na' lecze to chop bene' byo bene' ca' zjanaque' txen len neto' ja'aque' cho'a ban' na' bešele'ede' cayanen' gosena no'ol ca' naquen, perw bi bešele'ede' Jesúsen'.

25 Na' gož Jesúsen' legaque':

—Nyaše'chguaze le'e bi chejni'ile na' bi chejle'le yogo' dan' bosozoj bene' ca' gwseļa' Diosen' goso'e xtižen' cani'.

26 žČhaquele bi cheyaļa' gac dan' ba goca'? Cristo ben' gwlej Diosen' cont yedenabi'e, benen byen gwzaca'zi'e yogo' da' quinga ba goc, perw yeyoža' la'laon naque' bene' zaca' juisyw.

27 Na' be'e diža' len legaque' bsed blo'ede' legaque' yogo' dan' nyoj che'na' le'e Xtiža' Diosen', gwzolaoteque' len dan' bzoj da' Moisés na' len dan' bosozoj yezica'chle bene' gwseļa' Diosen' goso'e xtižen' cani'.

28 Na' besežine' gala'ze yežen' gan' zja'aquen', na' Jesúsen' bene' ca' chon bene' šejch yelate' zito'ch.

29 Perw bene' ca' gosone' byen yega'ane' len legaque', gose'ene':

—Yega'ančo' len neto', le ba čal' na' ba nac bagwže' par šejo'.

Na' gwyo'e cont yega'anlene' legaque'.

30 Na' šlac zjachi'e cho'a mesen' txen, Jesúsen' gwxi'e yetextilen' na' be'e yeļa' choxclen che Diosen' na' bžoxjen' bnežjuen' legaque'.

31 Cana'ch gosacbe'ede' le'na'. Na' šlac ne' nite' ca' con beñite'.

32 Nach gose' lježgaque':

—Leca bebe lažda'ochon' cate' be'lene' chio' diža' chanez na' bsd blo'ede' chio' can' nyojen che' le'e Xtiža' Diosen'.

33 Na' la' besyeya'actie' jaya'aque' Jerusalénna' na' besyežine' gan' zjandop zjanžag postlw ca' šnej len beñe' ca' yezica'chle.

34 Na' beñe' šnej ca' gose'e beñe' ca' za' besyežin:

—Da' licze ba beban Xanchon'. Ba blo'elagüe' Simónna'.

35 Nach beñe' ca' chop gose'e legaque' dan' goc šlac zjangüe'e nezen', na' gose'e legaque' besyeyombi'e le' cate' bzoخة' yetextilen' cont yesagüen'.

Jesúsen' blo'elagüe' beñe' ca' zjanaque' le' txen
(Mt. 28:16-20; Mr. 16:14-18; Jn. 20:19-23)

36 Ne' chesoe'te' dižan' ca', cate'cze gwzecha Jesúsen' gachol. Nach gože' legaque':

—Le soa binlo len xbab dan' yo'o lo' yichjlažda'olen'.

37 Perw leca besežebe' na' besyebande', gosacde' še chesele'ede' bxin che da' beñe' guata'.

38 Nach Jesúsen' gože' legaque':

—¿Bičen' chacle tole? na' ¿bičen' chonle xbab ca' lo' yichjlažda'olen'?

39 Le na'šc ni'a na' nga cont gacbe'ele nedan'. Le can neda' cont gacbe'ele. Šaca' naca' beñe' guat, bi nac žit bela' chia' ca' dan' chle'ele nga.

40 Beyož gwne' ca', blo'ede' legaque' ni'a ne'e ca'.

41 Na' legaque' bina' yeyož yesejle'e catec chesyebande' na' catec chesyebede'. Nach Jesúsen' gože' legaque':

—¿De late' da' gagua?

42 Nach bosonežjue'ne' late' yid beļ gagüe' na' late' chixe beser da' yože šina'ba'.

43 Gwxi'en na' gwdagüen' laogaquen'.

44 Nach gože' legaque':

—Ba gwnia' le'e cate' ne' zoalena' le'e cheyaļa' gac yogo'lol da' ca' bsi' Diosen' xneze zjanyoj chia' le'e ley dan' bzoj da' Moisés, na' le'e dan' bosozoj beñe' ca' goso'e xtiža' Diosen' cani', na' lecž ca' da' nyoj le'e Salmos ca'.

45 Nach ben Jesúsen' cont gosejni'ide' da' ca' zjanyoj che' le'e Xtiža' Diosen'.

46 Na' gože' legaque':

—Benen byen goc da' quinga cont goc can' nyojen žan neda' gata' na' yebana' ladjo beñe' guat yeyon ža, neda' naca' Cristo ben' gwlej Diosen' yedenabia'.

47 Na' le'e cheyaļa' güe'le xtiža'na' len beñe' že' yogo' nación. Solaotele güe'len Jerusalén. Güe'le xtižan' nale cheyaļa' yesyetiņje beñachen' xtola'gaquen' cont Diosen' yezi'xene' čhegaque'.

48 Le'e cheyaļa' güe'le diža' che da' quinga ba ble'ele dan' ba goc chia'.

49 Na' lecze sela' Spiritw che Xa' Diosen' yedesoan len le'e can' gwnen'. Na' le yega'an lo ciuda nga na'a cuezle gon Xa' Diosen' le'e yela' guac da' za' yaba.

Beyep Jesúsen' yaba
(Mr. 16:19-20)

50 Na' Jesúsen' gwčhe'e legaque' ja'aque' gan' chi' yež dan' nzi' Betania na' gwliis ne'e gwñabde' Diosen' gone' cont nite' mbalaz.

51 Na' ca beyoža' beyepe' yaban'.

⁵² Na' bene' ca' gosaque' le' txen besyega'ane' yešlož dao' gosonxene' Jesúsen' nach jaya'aque' Jerusalénna', chesyebchgüede'.

⁵³ Na' gwnita'teze' lo' yodao' blaona' chesonxene' Diosen'. Da' na'ze chzoja' ŋa'a.

DIŽA' GÜEN DAN' BZOJ SAN JUAN

Jesucristo ben' nzi' Xtiža' Dios golje' goque' beṇač

¹ Cate' gwxe yežlion' ba zoacze ben' nzi' Xtiža' Dios. Zoe' len Diosen' na' leceze naque' Dios.

² Cate' gwxe yežlion' ba zoacze' len Diosen'.

³ Len' bene' yogo' beṇač, yogo' angl, yogo' da' ca' beyac da' mal, yogo' beyixe' na' bite'teze da' dech. Bibi de da' gwxe da' bi ben ben' nzi' Xtiža' Dios.

⁴ Le' nse'e yela' mban. Na' ben' ba zjanape' yela' mban toli tocaṇe da' nonē', legaquen' ba yo'o be'ni' lo' yichjlažda'ogaquen'.

⁵ Ben' nzi' Xtiža' Dios bide' nse'e be'ni' che yichjlaždao' beṇačen', na' la'czla' beṇe' zan bi gosejnilaže'ne' na' bi gwoyo'o be'ni' čhen' lo' yichjlažda'ogaque', bi gosezaquede' yosocue'eje' be'ni' che'na'.

⁶ Gwzoa to beṇe' le Juan, na' Diosen' gwsele'ne'.

⁷ Juanna' ben' bzoe' beṇe' nis bedeye'e diža' che ben' nsa' be'nin', cont yogo' beṇač guac yesejnilaže'ne'.

⁸ Gague Juanna' nac beṇe' nsa' be'nin', san le' bedeye'e xtiža' ben' nsa' be'ni' che yichjlaždao' beṇačen'.

⁹ Ba bžin ža be'ni' da' nac da' dogualje ba blan' yežlio nga, na' blan' cont gwsejin' lo' yichjlaždao' note'teze beṇe'.

¹⁰ Ben' nzi' Xtiža' Dios zoe' yežlion' cate' gwxeten. Na' la'czla' len' bene' yežlion' ben' že' yežlion' bi gosache'ede' non' naque'.

¹¹ Golje' ladjo neto' beṇe' gualaž che', perw zan neto' beṇe' gualaž che' bi gwyejle'to' čhen'.

¹² San balteze chio' gwyejle'cho che', chio' gwyejnilaže'chone', bene' cont naccho xi'in Dios.

¹³ Na' gague lagüe goljcho nita' xaxna'cho zjanaque' beṇe' bela' čhen ba naccho xi'in Dios. Na' gague lagüe to beṇe' byo gwzoalene' to no'ole ba naccho xi'in Dios, na' gague lagüe beṇe' byon' goclaže' soa xi'ine' ba naccho xi'in Dios, san da' chejnilaže'chone', da'nana' non Diosen' chio' xi'ine'.

¹⁴ Jesucristo ben' nzi' Xtiža' Diosen' golje' goque' beṇač na' gwzoe' len neto'. Na' ble'eto' naque' beṇe' zaca' juisyw, le togue' naque' dogualje Xi'in Dios. Leca nži'ilaže'de' chio' beṇač na' bedezejni'ide' chio' diža' li čhe Diosen'.

¹⁵ Juanna' ben' bzoe' beṇe' nis be'e diža' che', gwne':

—Čhe bengan' bi'a diža' cate' gwnia: "Beṇe' za' za' zaca'che' ca neda', le ba zoacze le' cate' bina' soa' neda'."

¹⁶ Jesucriston' nži'ilaže'chgüede' yogo' chio' chejnilaže'chone' na' zoacze' chaclenchgüe' chio'.

¹⁷ Da' Moisésen' bzejni'ide' da' xozxta'o neto' beṇe' Israel ley čhe Diosen' na' člo'en yogo'cho napcho dola', na' Jesucriston' bedelo'ede' nži'ilaže' Diosen' chio' beṇač na' bedezejni'ide' chio' diža' li čhe Diosen'.

¹⁸ Nono na' soa beṇe' ba ble'ede' Diosen'. Toz ben' nac dogualje Xi'in Dios beṇe' tliša' ba bzejni'ide' chio' beṇač can' nac yichjlaždao' Diosen', le chacchgüe Diosen' le'.

*Juan ben' bzoe' beṇe' nis be'e xtiža' Jesúsen'
(Mt. 3:11-12; Mr. 1:7-8; Lc. 3:15-17)*

19 Bene' chesenabi'e naci3n Israel c3eton' bene' 3e' Jerusal3n gososele' to chope b3oz na' yebale bene' gosalje lo dia3a c3e da' Lev3 cont gosenabde' Juanna' non' naque'.

20 Na' Juanna' bi bedi'ide', be'e di3a' li go3e' legaue':

—Gage nedan' Cristo ben' chbezcho sela' Diosen' yedenabi'e naci3n chechon'.

21 Nach gose'ene':

—¿Nox naco'? ¿Naco' da' El3as ben' be' xti3a' Diosen' cani'?

Na' go3e' legaue':

—Bi naca' le'.

Nach gosenabde' le':

—¿Naco' ben' naquen yide' yedeye'lene' neto' xti3a' Diosen'?

Na' bo3i'en gwne':

—Bi naca'.

22 Nach da' yoble gosenabde' le':

—¿Non' naco'? cont ye'to' bene' ca' gosesele' neto'. ¿Bi 3a' togo' c3e cuino'?

23 Nach Juanna' go3e' legaue':

—Neda' naca' ben' ch3e zi3je to latje da3, 3ia': “Le gw3a' yichjla3da'olen' cont gwzenagle c3e Xanchon' cate' yide'”, can' gwna da' Isa3as ben' be' xti3a' Diosen' cani'.

24 Bene' ca' ja'ac lao Juanna', bene' fariseo ca' gosesele' legaue'.

25 Nach gose'ene':

—¿Bixchen' chzo' bene' nis 3e bi naco' Criston' neca naco' El3asen' na' neca naco' ben' chbezcho yedeye'e xti3a' Diosen'?

26 Nach Juanna' go3e' legaue':

—Neda' chzoa' bene' nis, na' gachol le'e ba zoa to bene' bi3a' gombia'le.

27 Len' za' gwlo'elag3e' na' zaca'che' ca neda', na' da' nacchg3e' bene' zaca' bitw zaca' gona xmandadoe' le3hja' no xe'le'.

28 Yogo' da' quinga goquen gan' nzi' Bet3bara dan' chi' ye3la'a yegw Jord3n gan' chzoa' Juanna' bene' nis.

Jes3sen' yeque'e xtola' benachen'

29 Na' beteyo Juanna' ble'ede' zej Jes3sen' gan' zoen' na' go3e' ben' chosozenag c3e':

—Le na' ben' za' nga, Diosen' ba gwsele'ne' cont yeque'e xtola' benachen'. Bena' zaca'lebe' ca xila' dao' ben' chot chio' bene' Israel cont Diosen' chezi'xene' xtola'chon'.

30 Che len' bi'a di3a', gwnia': “Ben' za' za' zaca'che' ca neda', na' le' ba zoacze' cate' bi3a' soa' neda'.”

31 Neda' bi gocbe'eda' non' naque' perw Diosen' bzejni'ide' neda', na' da'nan' zedezoa' bene' nis cont yogo' chio' bene' Israel gacbe'echo non' naque'.

32 Juanna' lecze gwne':

—Ble'eda' cate' betj Spiritw c3e Diosen' yaban' yaban' b3inen gan' zoa Jes3sen'. B3inen ca to ngolbex na' bega'an3en len le'.

33 Neda' bi gocbe'eda' 3e Jes3s nan' naque' ben' gwsela' Diosen', nach Dios ben' gwsele' neda' chzoa' bene' nis go3e'nda': “Le'edo' yetj Spiritw chia' na' yega'an3en len bene' ba mbeja'. Len' naque' bene' gon cont soa Spiritw chian' lo' yichjla3dao' bene' na' nabian' legaue'.”

34 Ba ble'eda' goc can' gwne' na' cho'a di3a' le bengan' Xi'in Dios.

Bene' nechw ca' gwlej Jes3sen' cont gosaque' le' txen

35 Beteyo Juan ben' bzoa bene' nis zeche' da' yoble len yehope bene' zjanaque' txen len le'.

36 Na' cate' ble'ede' gwde Jesúsén', nach gože' bene' ca':

—Le na' ben' gwsela' Diosen' ben' zaca'lebe' ca xila' dao' ben' chot chio' bene' Israel cont Diosen' chezi'xene' xtola'chon'.

37 Na' cate' bene' ca' chope, ben' zjanaque' txen len Juanna', gosende' can' gwnen' nach ja'aclene' Jesúsén'.

38 Nach beyechj Jesúsén' na' gwne'e legaque' zjana'ogüe'ne', na' gože' legaque':

—¿Bi chaclaže'le?

Na' gose'ene':

—Maestrw, ¿gan' zo'?

39 Nach gože' legaque':

—Le šo'o na' le'ele.

Nach ja'aclene'ne' na' besele'ede' gan' zoen', na' besyega'anlene' le' žana', le ba nac bagwže', ca do cheda tap.

40 Na ca nac bene' ca' chope' bosozenag xtiža' Juanna' na' gosa'ogüe' Jesúsén', toe' Andrés, bene' biše' Simón Pedro.

41 Na' Andrésén' za' gone' bichle da' za' gone' na' jel güiže' Simón bišen' na' gože' le':

—Ba bežaglaoto' ben' chesene' Mesías, ben' ba gwlezcho yide' yedenabi'e nación Israel chechon'. —Na' Mesías zeje diža' Cristo.

42 Nach Andrésén' gwche'e bene' bišen' gan' zoa Jesúsén'. Na' cate' Jesúsén' ble'ede' Simónna' gože'ne':

—Len' Simón xi'in Jonás. Perw yososi' bene' le' Cefas. (Na' Cefas zeje diža' Pedro.)

Jesúsén' gwleje' Felipe na' Natanael cont bsed blo'ede' legaque'

43 Beteyo Jesúsén' gwchoglagüen' yeyeje' Galilean' na' jañe'e Filipen' na' gože'ne':

—Yo'o len neda'.

44 Filipen' goque' bene' Betsaida gan' nac laž Andrésén' len Pedron'.

45 Nach Filipen' jañe'e Natanaelen' na' gože'ne':

—Bač ble'eto' ben' bzoj da' Moisésén' xtižen' le'e da' ca' gan' bzoje' ley chechon', na' lecze xtiže'na' bosozoj bene' ca' goso'e xtiža' Diosen' cani'. Len' Jesús bene' Nazaret, ben' nac xi'in José.

46 Nach Natanaelen' gože'ne':

—¿Bat benecho yesene' Nazaret na' choj bene' zaca'?

Nach gož Filipen' le':

—Yo'o cont le'edo'.

47 Na' Jesúsén' ble'ede' bač zej Natanaelen' gan' zoe'na' nach gwne':

—Na' za' to bene' Israel gualaž chechon' bene' naque' bene' güen. Ne late'ze bi naque' bene' gwxiye'.

48 Natanaelen' bende' xtiža' Jesúsén' na' gože'ne':

—¿Nac chac nombi'o neda?

Na' Jesúsén' gože'ne':

—Ble'eda' le' šlac zechao' xan yag yixgüigw cate' za' ne Filipen' le'.

49 Nach Natanaelen' gwne':

—Maestrw, len' naco' dogualje Xi'in Dios. Len' naco' ben' chbezto' sela' Diosen' yedenabi'o nación Israel chechon'.

50 Na' Jesúsén' gože'ne':

—¿Da' gwnia' ble'eda' le' xan yag yixgüigw nan' chejli'o chia'? Da' zaca'ch ca da' quinga za' le'edo'.

⁵¹ Da' li chnia', le'ele yaban' gan' zoa Diosen' gaquen ca to da' chyaljo na' bene' ca' zjanac angl che' chep chetj yesaque' yežlio gan' zoa' nga, le neda' naca' ben' gwseła' Dios golja' benach.

2

Gota' to yela' güešagna' yež da' nzi' Caná

¹ Beyon ža gota' to yela' güešagna' yež da' nzi' Caná gan' mbane distritw Galilea. Na' xna' Jesúsen' gwyeje' liž ben' gan' gota' yela' güešagna'na'.

² Na' lecze gosaxe' Jesúsen' len bene' ca' zjanaque' le' txen cont ja'aque' gan' chac yela' güešagnan'.

³ Na' bebiž vino dan' chese'ej bene' ca' že'na', na' xna' Jesúsen' gože' le':
—Bich bi vino čegaque' de.

⁴ Na' gož Jesúsen' le':

—¿Bixchen' žo' ca'? le bina' žin hor gwlo'a non' naca'.

⁵ Na' xne'ena' gože' bene' ca' cheson mandadon':

—Le gon bite'tez da' ne'.

⁶ Na' nita' xop yeso' de yej ga chož nis da' chosochin bene' Israel gualaž cheto' ca' par chesa' chesyib cuine' can' ža ley cheton'. Na' to to yej ca' chožen do xono' che'e o do ši che'e nis.

⁷ Nach Jesúsen' gože' bene' güen mandadw ca':

—Le yosša' yeso' yej ca' nis.

Na' gosegue'en nis goseža'ten.

⁸ Nach gože' legaque':

—Le gaše' laten' na'a na' le šjanežjon ben' yo'o lo ne'e lñin'.

Na' gosone' can' gwnen'.

⁹ Na' ben' yo'o lo ne'e lñin' con bnixen' bi nežde' gan' zan', con bene' ca' cheson mandadw na'ze gosenezde' nisen' beyaquen vino, le legaquen' gosaše' nisen'. Na' bena' bnixen' na' goxe' bene' byo ben' bšagnan',

¹⁰ na' gože'ne':

—Yogo'ze bene' chon lñi chdie' vino güen da' chzaca' la'ay cate' chzolao lñin', na' cate' ba zjane'eje' da' zil nach cho'e legaque' da' corrient. San le' bzago' vino šagüen' chdion' na'a ba cheyož lñin'.

¹¹ Da' nga ben Jesúsen' yež Caná distritw Galilea goquen yela' guac nechw da' bene' cont blo'e naque' bene' zaca'chgua, nach bene' ca' gwleje' cont gosaque' le' txen gosejnilaže'ne'.

¹² Gwde na' Jesúsen' gwyeje' Capernaum len xne'e na' len bene' biše' ca', na' len bene' ca' zjanaque' le' txen, na' besyega'ane' na' čhop šone ža.

Jesúsen' bebeje' bene' cheson ya'a chyo'o yodao' blaó

(Mt. 21:12-13; Mr. 11:15-18; Lc. 19:45-46)

¹³ Na' ba zoa gala' lñi che neto' bene' Israel da' nzi' pascw, nach Jesúsen' gwyeje' Jerusalén len bene' ca' zjanaque' le' txen.

¹⁴ Cate' bžine' chyo'o yodao' blaon' bene' zan že' chesote' go'ñ na' xila' na' ngolbew, na' zjachi' bene' chosoše'e mechw.

¹⁵ Jesúsen' ble'ede' can' chaca' na' bene' to tašjw de do na' bčhinen' cont bebeje' yogo' bene' ca' že' chyo'o yodaon', len xila' ca', len go'ñ ca', na' besłase' xmechw bene' chosoša' mechon' na' gwlo'oni'ane'e xmesgaquen'.

¹⁶ Na' gože' bene' ca' chesote' ngolbexen':

—Le yebej yogo' be qui nga. Bi gonle ya'a liž Xa' nga.

¹⁷ Nach bene' ca' zjanaque' le' txen jaseza'laže' can' nyoj Xtiža' Diosen' gan' žan: "Da' chi'chgua yichja' che ližon' chonten ga saca'zi'chgua."

¹⁸ Na' ben' chesenabia' nación Israel cheton' gose'ene':

—¿Bi yela' guac gono' da' le'eto' cont šejele'to' zaco' bebejo' bene' ca'?

¹⁹ Jesúsen' boži'e xtiža'gaquen' gwne':

—Le yochinj yodao' nga na' šone žaze yeyonan'.

²⁰ Nach bene' gwnabia' ca' gose'ene':

—Xopeyon iz byažjen gosone' yodao' nga, ¿chacdo' guac yeyonon' šone žaze?

²¹ Perw Jesúsen' bsacalebde' cuerp chen' yodao' cate' gwne' ca', na' legaque' gosone' xbab che yodao' na'zen' gwne' ca'.

²² Na' cate' bžin ža beyas bebane' ladjo bene' guat ca', bene' ca' zjanaque' le' txen jaseza'laže' can' gwnen' na' gosejle'e Xtiža' Diosen' dan' nyoj che' na' lecze gosejle'e xtiža' Jesúsen'.

Jesúsen' nezde' bin' yo'o lo' yichjlaždao' benachen'

²³ Šlac gwzoa Jesúsen' Jerusalénna' lo lni pascon' bene' zan besele'ede' yela' guac ca' dan' benen' na' gosejle'e naque' bene' gwsela' Dios.

²⁴ Perw Jesúsen' bi ben cuine' lo na'gaque', le nombi'e yichjlaždao' benachen'.

²⁵ Bi byažjde' no ye' le' xbab da' yo'o lo' yichjlaždao' bene' ca'. Le nezeczede' bin' yo'o lo' yichjlaždao' to to chio' benach.

3

Jesúsen' len Nicodemo

¹ Na' gwzoa to bene' fariseo bene' le' Nicodemo. Goque' to bene' gwnabia' che nación Israel cheton'.

² Gweyje' lao Jesúsen' šeže'le na' gože'ne':

—Maestrw, nezeto' Diosen' gwsela' le' cont chzejni'ido' neto', le nono gac gon yela' guac ca' dan' chonon' še bi zoa Diosen' len le'.

³ Na' gož Jesúsen' le':

—Da' li chnia' le', še non' bi galje yeto bi gac šjayzoe' gan' zoa Diosen' chnabi'e.

⁴ Nach gož Nicodemon' le':

—¿Nac gon to bene' galje' še' ba naque' bene' gole? ¿Guaquech yeyo'e lo' le'e xne'en' cont galje' yeto?

⁵ Na' Jesúsen' gozne':

—Chnia' le'e to da' zejen, še non' bi galje' len nis na' len Spiritw che Diosen', bi gac šjayzoe' gan' zoa Diosen' chnabi'e.

⁶ Bene' zjanaque' bela' chen chesenita' xi'ingaque' lecze bi' bela' chen. Na' Spiritw che Diosen' chnežjon yela' mban toli tocañe che bene' chesejnilaže' Diosen'. Da'nana' žacho chesalje' yeto.

⁷ Bi yebando' dan' gwnia' chonen byen yogo' bene' galje' yeto.

⁸ Cate' chechj be' chechjen gate'teze, na' chendo' cholyoyen perw bi nezdo' ga zan' na' neca nezdo' ga šejen. Ca'czen' naquen len yogo' bene' chon Spiritw che Diosen' cont chesalje' da' yoble. Bi chle'echo da' chon Spiriton' perw nachia' ba bocoben yichjlaždao'ogaque'.

⁹ Nach Nicodemon' gože'ne':

—¿Nacxe gac can' žo' nga?

¹⁰ Na' gož Jesúsen' le':

—Le' chsed chlo'edo' bene' Israel gualaž chechon' xtiža' Diosen', ¿bi chejni'ido' da' quinga?

¹¹ Da' li neto' chyixjue'eto' da' nezeto' na' choe'to' diža' che da' ba ble'eto' na' bi chejle'le.

¹² Ba bia' diža' che dan' chac yežlio nga na' bi chejle'ele. ¿Nac gac šejle'le še nia' le'e da' chac yaban'?

¹³ Toze neda' naca' ben' gwsela' Diosen' golja' benač za'a yaba na' noch no zoa no ba beyep yaba cont nezde' che Diosen'.

¹⁴ Na' can' goc latje daš cani' cate' gwlis da' Moisésen' bel de bronze bde'eba' to le'e yag, can' cheyala' gac yeselise' neda' to le'e yag, neda' gwsela' Diosen' golja' benač.

¹⁵ Na' gac chia' ca' cont note'teze bene' yesejnilaže' neda' bi cuiaye'e san gata' yela' mban che' toli tocañe.

Chaque Diosen' benačen'

¹⁶ Leca chaque Diosen' chio' benač, na' gwsela' Xi'ine' bene' tliša' cont note'tez bene' chejnilaže'ne' bi cuiaye'e, san gata' yela' mban che' toli tocañe.

¹⁷ Na' Diosen' gwsela' Xi'inen' yežlio nga gague cont gwnežjue' castigw che xtola' benačen', san cont gwnežjue' yela' mban chegaque' toli tocañe.

¹⁸ Note'tez bene' chesejnilaže' Xi'in Diosen' bene' tlišan', bi yesezi'e castigw che xtola'gaquen', perw bene' bi chesejnilaže'ne' ba nchoglaon chegaque' yesezaca'zi'e toli tocañe da' bi chesejnilaže' Xi'in Dios bene' tlišan'.

¹⁹ Na' can' naquen, bene' bi chesejnilaže' Xi'in Diosen' ba nchoglaon chegaque' yesezaca'zi'e toli tocañe. Nchoglaon yesezacazi'e, le ba bid Xi'in Diosen' nse'e be'ni' che yichjlaždao' benačen' perw na' chesyebchde' dan' nac choł clel ca be'ni' chen', dan' chesone' da' malen'.

²⁰ Yogo' bene' cheson da' mal chesegue'ede' be'ni' chen' na' bi chesazlaže' yosozenague' che' cont bi gwlo'elaon še chesone' da' mal.

²¹ San note'tez bene' cheson can' ža diža' li che Diosen', chesyebede' chosozenague' che Criston', le chlo'en zoacze Diosen' chaclene' legaque' cont chesone' can' ža diža' li chen'.

Juan ben' bzoa bene' nis be'che' diža' che Jesúsén'

²² Gwde na' Jesúsén' len bene' ca' zjanaque' le' txen ja'aque' yež dao' ca' zjachi' gan' mbane distritw Judean'. Na' šlac gosenite' na' bosozoe' bene' nis.

²³ Na' Juanna' lecze bzoe' bene' nis yež gan' nzi' Enón da' chi' gała'ze Salim, le na' dechgua nis. Na' ja'ac bene' gan' gwzoen' cont bzoe' legaque' nis.

²⁴ Caten' biña' yesyixjue' Juanna' ližyan' goc ca'.

²⁵ Nach gwche' to žaš len bene' ca' zjanaque' txen len Juanna' na' yeto chope bene' Israel gualaž cheto' che dan' chesezoa bene' nis.

²⁶ Nach ja'aque' lao Juanna' na' gose'ene':

—Maestrw, ben' gwzoa len le' yešla'a yegw Jordánna', ben' cho'o xtižen', bač chzoe' bene' nis na' yogo'ze bene' chja'aque' gan' zoe'na'.

²⁷ Nach Juanna' gože' legaque':

—Nono gaxcene' še bi gon Diosen' cont yesonxen bene' le'.

²⁸ Nezczele can' ba gwnian', bi naca' Cristo ben' chbezcho sela' Diosen' yedenabi'e chio', san naca' ben' gwsela' Diosen' cont bia' xtižen' žialaole.

²⁹ Cate' chac to yela' güešagna', toz bene' byo ben' chšagnan' chzi'e no'olen'. Perw še zoa bene' migw che' len le' ža'na, chebede' cate' ben' chšagnan' že' zoe' mbalaz. Can' chac len neda', chbechgüeda' bene' zan chosozenague' che Criston'.

³⁰ Len' cheyała' šejch yesonxen bene' le' na' neda' cheyała' šejch yesanlaže' neda'.

Bene' za' gan' zoa Diosen'

³¹ Ca nac Cristo ben' za' gan' zoa Diosen', le' naque' bene' zaca'ch ca yogo'lol bene'. Yezica'chle beňach zjanaque' bene' che yežlio ngaze na' che yežlio ngaze cheso'e diža'. Perw na' Cristo ben' za' gan' zoa Diosen' zaca'che' ca yogo'lol bene'.

³² Le' cho'e diža' che da' ca' ba ble'ede' na' diža' da' ba bende' gan' zoa Diosen', na' nono chzenag xtižen'.

³³ Na' note'tez bene' chosozenag xtiža' ben' za' gan' zoa Diosen', nacbia' bena' nezde' Diosen' cho'e diža' li.

³⁴ Na' bena' gwseła' Diosen', bena' za' gan' zoe'na', len' cho'e xtiža' Diosen', le' Spiritw che Diosen' zoan len le', na' cate' Diosen' chone' Spiritw chen' bi chyisen' late' güeje.

³⁵ Diosen' chacde' Xi'ine' Criston' na' ba bene' lo ne'e yogo'lol da' de yežlion'.

³⁶ Na' bene' ca' chesejnlaže' Xi'in Diosen' de yela' mban chegaque' toli tocaňe, san bene' cheson güedenag len Xi'in Diosen', bi gata' yela' mban chegaque', le' Diosen' gone' cont yezezaca'zi'e toli tocaňe.

4

Jesúsen' be'e diža' len to no'ole Samaria

¹⁻³ Na' goquen' bene' zanch chosozenague' che Jesúsen' ca bene' chosozenag che Juanna', na' bene' zanch chesezoa nis len Jesúsen' ca bene' chesezoa nis len Juanna', la'czla' gague cuin Jesúsen' bzoe' bene' nis, bene' ca' zjanaque' le' txen gosonen'. Nach cate' Jesúsen' gwneзде' bene' fariseo ca' gosache'ede' bene' zanch zjana'ogüe' le', nach beze'e distritw Judean' na' beyeje' distritw Galilean' len bene' ca' zjanaque' le' txen.

⁴ Na' benen byen zjaya'aque' nez da' chde Samarian'.

⁵ Ca' goquen' besežine' to yež da' nzi' Sicar lo distritw Samarian'. Yežen' chega'anen gala'ze gan' de yežlio dan' bnežjw da' Jacob da' xi'ine' José.

⁶⁻⁸ Na' žia to bej da' nacchgua sitjw da' nzi' Bej che da' Jacob. Ca do guagwbiz Jesúsen' ba chjaxaquede' ngüe'e nezen' nach gwchi'e cho'a bejen'. Na' bene' ca' zjanaque' le' txen ba zja'aque' lagüe yežen' zjasexi'e da' yesagüe' len le', cate' bžin to no'ole Samaria cho'a bejen' cont güe'e nis. Na' Jesúsen' gože'ne':
—Ben late' nis ye'eja'.

⁹ Na' no'ole Samarian' boži'en gože'ne':

—¿Nacxechen' le' naco' bene' Israel chnabdo' neda' nis ye'ejo'? le no'ole Samaria neda'.

(Na' ca nac bene' Israel gualaž cheto' ca', bi chesene lježe' len bene' Samaria ca'.)

¹⁰ Nach Jesúsen' gože'ne':

—Neda' ba goša' le': “Ben late' nis ye'eja'”, na' šaca' nezdo' da' chaclaže' Diosen' gone' le' na' šaca' chacbe'edo' non' naca' neda', ba gwnabdon' neda' na' ba bena' le' nis da' choň yela' mban toli tocaňe šaca'.

¹¹ Na' no'olen' gože'ne':

—Bene', bi noxo' bi gaše'don' na' bej nga naquen sitjw. ¿Gaxe si'o nis da' choň yela' mbanna' žo' ca'?

¹² ¿Chacdo' zaca'cho' ca da' xozxta'ocho Jacob ben' bocua'an neto' bej nga gan' güe'eje' len xi'ine' ca' na' len beyixe' che' ca'?

¹³ Gož Jesúsen' le':

—Note'tez bene' ye'ej nis che bej nga bia'cze bilde' da' yoble.

14 Na' note'tez bene' ye'ej nisen' gwnežjua'ne' neda', gwbatech bilde' da' yoble, le dan' gwnežjua'nen' gaquen lo' lažda'ogüe' ca to latje ga chaldi nis cont gata' yela' mban che' toli tocanē.

15 Na' no'olen' gože'ne':

—Bene', beñ neda' nisen' žo' ca' cont bich bilde' na' bich yida' dexian' nga.

16 Jesúsen' gože'ne':

—Beyej jel güiž bene' chio' na' le da nga.

17 Nach gože' Jesúsen':

—Notno bene' chia' zoa.

Na' Jesúsen' gože' no'olen':

—Ledo' can' gwnaon' nono bene' chio' zoa,

18 le gayo' bene' chio' ba gwnita' na' bene' zoaleno' na'a gague naque' bene' chio'. Da' li can' ba gwnaon'.

19 Na' gož no'olen' le':

—Bene', chache'eda' naco' to bene' chac chyixjue'ede' bi da' ža Diosen'.

20 Da' xozxta'o neto' bene' Samaria gosonxene' Diosen' lo ya'an zoa nga, na' le'e nacle bene' Israel žale Jerusalénna' cheyala' gonxenhone'.

21 Jesúsen' boži'en gože'ne':

—No'ole, gwyejle' chia', gwžin ža cate' bi gonen byen gonxenle Diosen' lo ya'a nga ne Jerusalénna'.

22 Le'e nacle bene' Samaria bi nombia'yane'le Dios ben' chonxenle. Neto' bene' Israel nombia'to' Dios ben' chonxento', na' ladjo' neto' bene' Israel choj ben' yebej benachen' lo da' malen'.

23 Chžin ža na' na'a ba gole', cate' bene' yesonxene' Xacho Diosen' can' cheyala'cze yesonxene' le', gate'tez nite', lo' yichjlažda'ogaquen' yesonxene' bene' naque' dogualje Dios, le Xacho Diosen' cheyiljue' bene' yesonxene' le' ca'.

24 Diosen' bi naque' bene' bela' chen, naque' spiritw. Da'nan' bene' yesonxen le', lo' yichjlažda'ogaque' cheyala' yesonxene' bene' nac dogualje Dios.

25 Nach no'olen' gože'ne':

—Nezda' yid ben' ba gwlej Diosen' cont yedenabi'e chio', ben' nzi' Mesías o Cristo, na' cate' le' yide' yedezejni'ide' chio' yogo' da' quinga.

26 Nach Jesúsen' gože' no'olen':

—Neda' choe'lena' le' diža' naca' ben' žo' ca'.

27 Ne' choe'lente Jesúsen' no'olen' dižan' cate' bene' ca' zjanaque' le' txen besyežine' cho'a bejen'. Na' besyebande' choe'lene' to no'ole diža', perw ne toe' bi gosenabde'ne' bi dižan' choe'lene' no'olen' o bixchen' chšajlene' le'.

28 Nach no'olen' bocua'an' gual'e nis chen' na' beyeje' lo yežen' jayeže' bene' gualaž che' ca':

29 —Le šo'o le na' to bene' ba gože' neda' yogo'te da' ba bena'. Žše bengan' Cristo ben' chbezcho yedenabi'e?

30 Na' besežaše' yežen' ja'aque' gan' chi' Jesúsen'.

31 Na' šlac zjajda no'olen', bene' ca' zjanaque' Jesúsen' txen gosata'yoede' le', chese'ene':

—Maestrw, gwdagw.

32 Na' Jesúsen' gože' legaque':

—Bi nezele de to yela' guagw chia'.

33 Na' gose' lježe':

—¿Gague ba bedesesan bene' da' gwdagüe'?

34 Na' gož Jesúsen' legaque':

—Len neda' naquen ca to yela' guagw chona' can' chazlaže' Dios ben' gwseła' neda' cont gac yogo' da' chnaláže'.

35 Le'e žale: "Ne' dech yetap bio' cont yedobe cosešen'." Na' neda' chnia', le na' na' le'ele to coseš da' chyažje yedob na'a.

36 De da' goncho na'a cont bene' yosozenague' che Diosen' na' gata' yela' mban chegaque' toli tocane. Na' bene' cheseyixjue'ede' xtiža' Diosen' na' lente bene' chesone' cont yosozenag bene' xtižen' txen yesenite' mbalaz.

37 Diža' nga naquen da' li, žan: "Bene' yoble chaz na' bene' yoble chelap."

38 Bač chseła' le'e šjaylaple gan' bi gozle, le le'e gonle cont yosozenag bene' xtiža' Diosen' dan' ba goseyixjue'e bene' yoble.

39 Na' ca nac bene' yež Sicar ga mbane Samaria, zane' gosejnilaže' Jesúsen' da' gosende' gwna no'olen': "Ba gože' neda' yogo' da' ba bena'."

40 Nachen' besežin bene' Sicaren' gan' chi' Jesúsen' gosata'yoede' le' yega'anlene' legaque', na' bega'ane' čhope ža.

41 Na' bene' zanch gosejnilaže' Jesúsen' cate' gosende' diža' da' be' cuine'.

42 Nach gose'e no'olen':

—Bač chejle'to' na'a, gague dan' bzenagto' xtižo' na'ze, san da' ba beneto' choe' cuine' dižan', na' nezeto' bengan' Cristo ben' gwlej Diosen' cont yebeje' benachen' lo da' malen'.

Jesúsen' beyone' xi'in to bene' gwnabia'

43 Na' cate' goc čhop ža, Jesúsen' len bene' ca' zjanaque' le' txen gosa'aque' jaya'aque' Galilea.

44 Le' cuin Jesúsen' ba gwne' note'teze bene' cho'e xtiža' Diosen', bi chesonla'ańcze bene' gualaž chen' le'.

45 Na' cate' besežine' Galilean' bene' gualaž chegaquen' bosolebe' Jesúsen' dan' ba besele'ede' yogo' da' güen da' bene' Jerusalenna' lo lnin', le lencze legaque' ja'aque' lnina'.

46 Na' gozej Jesúsen' yetni'a yež Caná dan' chi' distritw Galilea gan' bene' cont nisen' beyaquen vino. Na' yež Capernaum gwzoo to bene' gwnabia' bene' chon žin che rey, na' chacšenchgüe xi'ine'.

47 Xa bi'na' cate' bende' ba bežin Jesúsen' Galilean' zeze'e Judean', nach gwyje' lao Jesúsen' gwneyoede' le' šjeje' šjayene' xi'inen', le ba zoa gatbe'.

48 Na' Jesúsen' gože'ne':

—Še bi chle'ele yela' guac na' bichle da' zaca' yebanele, bi chejle'le chia'.

49 Nach ben' chon žin che reyen' gota'yoede' le' gwne':

—Bene', yo'ošca šlac biña' gat bi' čhian'.

50 Na' Jesúsen' gože'ne':

—Beyej ližo', bi gat bi' čhion'.

Nach gwyjele' bena' dan' gož Jesúsen' le' na' beze'e.

51 Ba zoa yežine' cate' jasešag xmoše' ca' le' na' gose'ene':

—Ba beyac bi' čhion'.

52 Na' gwñabde' legaque' bi hor gwzolao beša'alaže'be', na' gose'e le':

—Neje cheda to gwde guagwbiž bechojbe' da' lan'.

53 Na' xaben' gočbe'ede' ca hor na'czen' gož Jesúsen' le' bi gat bi' čhen'. Nach gwyejnilaže' Jesúsen', le' len yogo' bene' že' ližen'.

54 Da' nga goc yelá' guac gwchop da' ben Jesúsén' šlac beze'e Judean' na' bežine' Galilea.

5

Jesúsén' beyone' to bene' nat late' cuerp che'

1 Na' gwde to tiemp bžin ža goc yeto lni che neto' bene' Israel Jerusalénna', na' Jesúsén' gwyeye'.

2 Jerusalénna' gala'ze cho'a puert che ze'e da' nyechj ciudan' dan' nzi' Puert che Xila' žia to ga chož nis da' nzi' Betesda, na' ze gayo' chalšil cue'ej cuite gan' chož nisen'.

3 Na' bene' zan bene' güe' zjadie' chalšil ca', no bene' lchól, no bene' nxinj ni'e, no bene' natsi' late' güeje cuerp chegaquen'. Zjadie' chesebeze' batcan' ta nisen'.

4 Le tgüeje betj to angl na' bte' nisen', na' bene' nechw bene' cho'e lo' nisen' cheyož chta anglen' len, cheyacde' bite'tez yižgüe' che'ede'.

5 Na' cate' bžin Jesúsén' na' de to bene' ba goc šino'šonechoa iz chacšende'.

6 Na' Jesúsén' ble'ede' ben' na' gocbe'ede' ba chac sša de' ca', na' gože'ne':

—¿Chaclažo' yeyaco'?

7 Na' bene' güen' gože' Jesúsén':

—Bene', nono zoa no co' neda' lo' nisen' cate' chdan. Na' šlac zya'a cont šo'a, bene' yoble chyobde' chetje' lo' nisen'.

8 Nach gož Jesúsén' le':

—Gwyas na' botobe xta'on na' gwda.

9 Na' la' beyacte bena' na' botob xte'en na' gwzolao chde'. Perw na' goquen to ža che Dios cate' bi de lsens gon neto' bene' Israel žin.

10 Nach bene' gwnabia' che neto' bene' Israel gose'e bena' beyaquen':

—Ža che Dios na'a. Bi de lsens yeyoa' xta'ona'.

11 Na' gož ben' legaque':

—Bena' beyon neda' gože'nda': "Botobe xtaon' na' gwda."

12 Nach gose'ene':

—¿Non' gož le': "Botobe xtaon' na' gwda"?

13 Na' ben' beyaquen' bi gwñezde' non' beyon le', le Jesúsén' benite' ladjo bene' zan ca'.

14 Gwdechle Jesúsén' bedile' bena' beyaquen' lo' yodao' blaon' na' gože' le':

—Bač beyaco' na'a, na' cheyała' cuejyichjo' da' malen' bich gonon', cont bi gag chio' to da' malech.

15 Nach beza' bena' jatixjue'ede' bene' gwnabia' che nación Israel cheton' gože' legaque' Jesúsna' ben' beyon le'.

16 Da'nán' bene' gwnabia' ca' gwzolao gosebe'na'ogüe' Jesúsén' na' chesey-iljue' nacle yesone' yesote'ne' da' chone' yelá' guac ca' ža che Dios cate' bi de lsens gon neto' bene' Israel žin.

17 Na' Jesúsén' gože' legaque':

—Xan' zoacze' chelalde' bate'teze na' lecze ca' neda'.

18 Da'nán' goseyljwlaže'che' nacle yesone' yesote' Jesúsén', perw gague neche bi chone' can' ža ley gan' chgualan' che ža che Dios na'žen', san lecze da' gwne' Diosen' naque' Xe', le zejen toz ca' zaque' len Diosen'.

Yelá' chnabia' da' nape Xi'in Diosen'

19 Na' gož Jesúsén' legaque':

—Chnia' le'e to da' zejen, bibi chac gona' to gualaza'. Con da' chle'eda' chon Xan', lenna' chona', na' bite'teze da' chon Xan', lenna' chona', le neda' naca' Xi'ine'.

²⁰ Chaque Xan' neda' na' chlo'ede' neda' yogo' dan' chone'. Na' gwlo'ede' da' zaca'ch ca da' quinga da' gona' cont yebanele.

²¹ Ca Xa' Diosen' chosbane' bene' ladjo bene' guat ca', ca'cze chona' neda' naca' Xi'ine', chnežjua' yela' mban che note'tez bene' chbeja' cont gata' yela' mban chegaque'.

²² Na' Xan' bi chchoglagüe' che ne to bene' še nape' doła', san ba gwlo'e lo na' choglagua' che yogo' benach še non' nap doła'.

²³ Xan' chaclaže' yogo' bene' yesonxene' neda' lecze can' chesonxene' le'. Na' bene' bi chonxen neda', ne Xa' Diosen' bi chonxene', le le'na' gwsele' neda'.

²⁴ 'Chnia' le'e to da' zejen, bene' chosozenag xtižan' na' chesejnilaže' Dios ben' gwseła' neda', de yela' mban chegaque' toli tocañe. Na' bi yesezaca'zi'e toli tocañe da' bi chesejnilaže'ne'. Bich zjanaque' ca bene' guat len yichjlažda'ogaquen' da' bi chosozenague' che Diosen', san ba bocobe' yichjlažda'ogaquen' neche ba chesejnilaže'ne'.

²⁵ Chnia' le'e to da' zejen, gwžin ža cate' bene' zjanac ca bene' guat len yichjlažda'ogaque' yesende' xtiža' neda' naca' Xi'in Dios, na' bene' yosozenag chia' gata' yela' mban chegaque' toli tocañe, na' bach chzolao chac ca' na'a.

²⁶ Xa' Diosen' zoacze' toli tocañe na' chone' cont zjamban benachen', na' lecze ba bene' cont neda' naca' Xi'ine' zoa' toli tocañe na' chona' cont zjamban bene'.

²⁷ Na' lecze ba bene' neda' yela' chnabia' cont nia' non' nap doła', le ba gwsele' neda' golja' benach.

²⁸ Bi yebanele dan' chnia' nga, le gwžin ža cate' yogo'lol bene' guat že' lo' ba yesende' cate' yol güiža'ne'.

²⁹ Na' bene' ca' goson da' güen šlac gosebane' yesyechoje' na' yesebane' toli tocañe. Na' bene' ca' goson da' mal šlac gosebane' yesyechoje' na' yesezaca'zi'e toli tocañe.

Jesúsen' bzejni'ide' nape'yela' chnabia'

³⁰ Bibi gac gona' to gualaza'. Chzenaga' bin' ža Xan' cont nia' che benachen' noe' nap doła'. Na' dan' nia' gac che to to bene' naquen da' cheyala' gac, le bi chi'yichja' gac dan' chnalaža'; san chi'yichja' gac can' chnalaže' Xan' ben' gwseła' neda'.

³¹ Šaca' toz neda' chgua'a da' bali non' naca', bi naquen to da' šejle'le.

³² Perw zoa Xan' cho'e diža' li non' naca', na' nezda' diža' da' cho'e chia' naquen da' šejle'le.

³³ Bach gwseła'le bene' lao Juanna' cont jasenabde' le' nac nac chia', na' Juanna' be'e diža' li non' naca'.

³⁴ Perw neda' bi chyažjda' diža' da' güe' ne to benach chia'. San chnia' da' quinga cont le'e šejle'le chia' na' gata' yela' mban chele toli tocañe.

³⁵ Juanna' goque' ca to yi' da' chseni'chgua dan' bzejni'ide' le'e che Diosen', na' šlož daon' bebele dan' bsed blo'eden'.

³⁶ Na' de to da' choe' xtiža' da' zaca'ch ca diža' da' choe' Juanna' chia': chona' yogoloł da' ba gwlo'o Xan' lo na' gona', na' da' ca' chonan' choen' diža' le Xan' gwsele' neda'.

³⁷ Nach Xan' ben' gwseła' neda' lecze cho'e xtižan', la'czla' bina' yenele can' chnen' na' bina' le'ele can' naquen'.

³⁸ Xtižen' bina' šon' lo' yichjlažda'olen', le bi chejnilaže'le neda' naca' ben' gwsejen'.

³⁹ Chsedyane'le gan' nyoj Xtiža' Diosen', le chaquele gapple yeļa' mban toļi tocaņe neče chsedlen. Na' da' ca' chsedlen' zjanyojen chesoen' xtiža'.

⁴⁰ Perw bi chaclaže'le šejnilaže'le neda' cont gata' yeļa' mban chele toļi tocaņe.

⁴¹ Na' neda' bi chyažjda' yesena benachen' naca' bene' zaca'.

⁴² Nombi'a le'e na' nezda' bi chaquele Diosen'.

⁴³ Xan' ba gwsele' neda' chona' con da' že', perw bi chejle'le chia'. Na' cate' za'ac bene' cheson con bi da' ža xbab chegacze', nachle chejle'le chegaque'.

⁴⁴ Žnacxe gac šejle'le chia'? le chzelaže'le yesena bene' chonle güen, na' bi chzelaže'le gonle cont toz Diosen' ne' chonle güen.

⁴⁵ Bi gonle xbab neda' gwcuiša' le'e lao Xan'. Da' Moisésen' chcuiše' le'e lagüen', le chsedchguale dan' bzojen' chaquele cont soale binlo len Diosen', perw bi chejle'le xtižen'.

⁴⁶ Šaca' chejle'le xtiža' da' Moisésen', chia' neda'czen' chejle'le še ca', le xtiža' nedan' bzoje'.

⁴⁷ Na' da' bi chejle'le dan' bzoj da' Moisésen', žnacxe gonle šejle'le bi dan' žia' le'e?

6

Jesúsen' bguagüe' gayo' mil bene'

(Mt. 14:13-21; Mr. 6:30-44; Lc. 9:10-17)

¹ Gozde goc ca' Jesúsen' gwyetje' yešļa'a nisdao' che Galilea len bene' ca' zjanaque' le' txen. Na' nisdao' na' leczze nzin' Nisdao' Tiberias.

² Na' bene' zan zjanao' Jesúsen' da' ba besele'ede' yeļa' guac dan' chonen' cheyone' bene' güe' ca'.

³ Na' gwloe Jesúsen' to lo ya'a len bene' ca' zjanaque' le' txen na' gosebi'e.

⁴ Na' da' yoble ba zoa gaļa' lni che neto' bene' Israeļ da' nzi' pascw.

⁵ Na' cate' gwna' Jesúsen' ble'ede' bene' zan ba zjanao' le' na' gože' Felipen': —Gaxe si'cho da' yesagw yogo' bene' quinga?

⁶ Gwne' ca' yešque bi na Felipen', le Jesúsen' nezeczede' naquen' gone'.

⁷ Na' Felipen' gože'ne':

—Chop gayoa denario yetextilen' bi gaquen yesyechele to toe' ne late' güejen.

⁸ Na' yeto ben' naque' Jesúsen' txen le Andrés na' naque' bene' biše' Simón Pedro. Na' Andrésen' gože' Jesúsen':

⁹ —Nga zoa to bi' byo dao' na' de gayo' yetextil de cebada chebe' na' yehope beļ ya'a. Perw žbi de gon da' quinga? le bene' zanna' že' nga.

¹⁰ Nach Jesúsen' gože' bene' ca' zjanaque' le' txen:

—Le ye' yogo'lole' yesebi'e.

Dechgua yixye latjen', na' gosebe' bene' ca' lo yixyena', ca do gayo' mil bene' byo, bi cuent no'ole len bidao'.

¹¹ Nach gwxi' Jesúsen' yetextil ca', na' beyož be'e yeļa' choxcen che Diosen' bnežjuen' bene' ca' zjanaque' le' txen cont goseyisen' len bene' ca' zjachi' na'. Na' lecz ca' bene' len beļ ya'a ca'. Na' goso'e to toe' con ca'te'te' gosaclaže' gosagüe'.

¹² Na' beyož gosagüe' ca'te'te' goseljde', Jesúsen' gože' bene' ca' zjanaque' le' txen:

—Le yotobe da' ca' bega'aņ late' güeje cont bibi cuiayi'.

13 Nach bosyotobe' da' bixjw ca' dan' besyega'an̄ lao gayo' yetextil ca' de cebad, na' goquen šižinw žome.

14 Cate' bene' ca' besele'ede' yela' guac dan' benen' nach gosene':

—Da' li bengan' choe' xtiža' Dios na' naque' ben' ba gwlezcho sel̄a' Diosen' yežlio nga.

15 Na' cate' Jesúsen' gocbe'ede' ba zoa yeseče'exoxje' le' cont yesone' le' rey chegaque', nach gozze'e gozeje' ya'adaon' toze'.

Jesúsen' gwze'e lo nisdaon'
(Mt. 14:22-27; Mr. 6:45-52)

16 Cate' ba gwxin, bene' ca' zjanaque' Jesúsen' txen jaya'aque' cho'a nisdaon'.

17 Na' besyeyo'e to lo' barcw zjaya'aque' ciuda Capernaum. Ba goł na' Jesúsen' biña' yežine'.

18 Na' chas chata' chac nisdaon' le' chechjchgua be'.

19 Ba goc sša zjaya'aque' len barcon' lo nisdaon' cate' besele'ede' ba zjayda Jesúsen' cheze'e lo nisen' gała'ze gan' zej barcon'. Na' besežebe'.

20 Na' gože' legaque':

—Nedan', bi žeble.

21 Nach chesyebede' besyegüe'ene' lo' barcon'. Na' la' besyežintie' ga nac yo biž cho'a nisdaon' gan' zjaya'aquen'.

Bene' zan chesyeyiljue' Jesúsen'

22 Na' beteyo bene' zan bene' ca' besyega'an̄ yešla'a cho'a nisdaon' gosache'ede' nono Jesúsen' nla' na' gosache'ede' bibi barcw yoble gota'ch san toga dan' besyeyo'o bene' ca' zjanaque' Jesúsen' txen, na' zjanezde' Jesúsen' bi beyo'e len legaque' lo' barcon'.

23 Nach besežin barcw da' za'ac ciuda Tiberias gała'ze gan' gosagüe' yetextilen' caten' beyož be' Xancho Jesúsen' yela' choxc̄len che Diosen'.

24 Na' cate' gota'bia' nono Jesúsen' bežel gan' nite'na' nach besyeyo'e lo' barcw ca' ja'aque' Capernaum cont besyeyiljue' Jesúsen' do na'.

Yela' guagw da' chnezjon bene' yela' mban toli tocane

25 Na' cate' bene' zan ca' besyeželde' Jesúsen' yešla'ale nisdaon' nach gose'e le':

—Maestrw, žbatca' bla'o nga?

26 Na' Jesúsen' gože' legaque':

—Chnia' le'e to da' zejen, cheyiljwle neda' neche dan' gwdagwle ca beljele na'zen', gague neche chejle'le chia' lagüe ba ble'ele yela' guac ca' ba benan'.

27 Bi cheyala' cuocyichjle gata' da' ye'ej gagwle da' chbiayi', san cuocyichjle gata' da' goñ yela' mban chele toli tocane. Diosen' gwsele' neda' golja' benach na' neda' goña' to da' ye'ej gagwle cont gata' yela' mban chele toli tocane. Na' Xa' Diosen' ba blo'e naca' ben' ba gwsele'.

28 Na' gose'ene':

—¿Bi cheyala' gonto', cont yebe Diosen' neto'?

29 Na' gož Jesúsen' legaque':

—Da' nga gonle cont yebe Diosen' le'e, šejnilaže'le neda' naca' ben' gwsele'n'.

30 Na' gose'e Jesúsen':

—¿Bi yela' guac gono' še ca' cont le'eto' na' šejnilaže'to' le'? ¿Bi gono'?

31 Da' xoxxta'ocho ca' gosagüe' yela' guagw da' nzi' maná šlac gosenite' latje dašen', na' nyoj Xtiža' Diosen' chegaquen', zan: "Yela' guagw da' za' yaban' be'e legaque' gosagüe'."

32-33 Nach Jesúsen' gože' legaque':

—Chnia' le'e to da' zejen, gague da' Moisésen' bnežjue' da' xoxxta' ocho ca' yela' guagon', san Xa' Diosen' bnežjuen' legaque'. Na' bi nacho lenna' zan' yaba gan' zoe' na', san de to yela' guagw da' ba gwsela' Diosen' na' a da' za' yaban' na' betjen yežlion', na' chnežjon yela' mban che note'teze bene' chesagw len.

34 Nach bene' ca' gose'e le':

—Bene', beňšca neto' yela' guagon' žo' ca' gagwton' yogo' ža.

35 Nach Jesúsen' gože' legaque':

—Neda' naca' yela' guagw da' chnežjon bene' yela' mban toli tocanē. Note'teze bene' yosozenag chia' na' yesejnilaže' neda', guata' da' chyažje yichjlažda' ogaque' toli tocanē.

36 Na' ba gwnicza' le'e, la' czla' ba ble'ele neda' bi chejnilaže' le neda'.

37 Yogo' bene' chbej Xan' cont yesaque' neda' txen, chžin ža chesejnilaže' neda'. Na' note'teze bene' chaclaže' šejnilaže' neda', bi gwsia'ne' ca'ale, san gaclena'ne' cont šejnilaže'nda'.

38 Neda' za'a yaba na' betja' yežlion' gague cont gona' da' žan chia' san cont gona' can' chaclaže' Xan' ben' gwseła' neda'.

39 Len' chaclaže' bi gua'a latje cuiayi' ne toze bene' ba gwleje' cont yesaque' neda' txen. Nach cate' žin ža te che yežlion' cana' yosbangaca'ne' ladjo bene' guat še ba gosate'.

40 Xan' chaclaže' yogo' loł bene' yesejni'ide' non' naca' na' yesejnilaže' neda' cont gwnežjue' legaque' yela' mban toli tocanē, na' neda' yosbana' legaque' ladjo bene' guaten' še ba gosate' cate' žin ža te che yežlion'.

41 Na' zan bene' Israel gualaž cheto' legacze' besežeše' che dan' gwna Jesúsen': "Neda' naca' yela' guagw da' za' yaba."

42 Gosene':

—¿Gague bengan' Jesús xi'in José? Nombia'cho xaxna' bengā. ¿Bi dižan' cho'e že' ze'e yaba betje' yežlio?

43 Nach Jesúsen' gože' legaque':

—Bich žešele chia'.

44 Nono gac yesejnilaže' neda' še Xan' ben' gwsele' neda' bi gaclene' legaque' yesejnilaže', na' cate' žin ža te che yežlion' yosbana' legaque' še ba gosate'.

45 Le'e gan' bosozoj bene' ca' goseyixjue'ede' xtiža' Diosen' cani' žan: "Yogüe' Diosen' gwsed gwlo'ede' legaque'." Na' yogo' no yeseneze can' ža Xan' na' yosozenague' cont yesone' can' že'na', lecz yesejnilaže' neda'.

46 Bi nacho zoa bene' ba ble'ede' Xan'. Toza' neda' ba ble'eda'ne', le za'a gan' zoen'.

47 Chnia' le'e to da' zejen, bene' chesejnilaže' neda', de yela' mban chegaque' toli tocanē.

48 Neda' naca' yela' guagw da' chnežjon yela' mban toli tocanē che benachen'.

49 Da' xoxxta' ocho ca' gosagüe' yela' guagw da' nzi' maná šlac gosenite' latje dašen', na' bia'cze gosat yogüe'.

50 Neda' cho'a diža' che to yela' guagw da' za' yaban' na' bene' chagw len bi gate'.

51 Neda' naca' yela' guagw dan' za' yaban' dan' nsa' yela' mban toli tocanē. Bene' šejnilaže' neda', bane' toli tocanē. Na' yela' guagw da' chnežjua' cont gata' yela' mban che benachen' naquen cuerp chia'.

52 Nach bene' Israel gualaž cheto' ca' legacze' besežeše', gosene' che':

—¿Nacxe gone' gone' cuerp çhen' gagwchon?

⁵³ Jesúsen' gože' legaque':

—Chnia' le'e to da' zejen, Diosen' gwsele' neda' golja' benach, na' še bi chagwle cuerp çhian' na' še bi che'ejele xçhenan', bi de yela' mban chele toli tocanē.

⁵⁴ Bene' chesagw cuerp çhian' na' chese'eje' xçhenan' de yela' mban chegaque' toli tocanē, na' še ba gosate', cate' te che yežlion' yosbana' legaque' ladjo bene' guat ca'.

⁵⁵ Le cuerp çhian' naquen dogualje yela' guagw, na' xçhenan' naquen dogualje da' ye'ejele.

⁵⁶ Bene' ca' chesagw cuerp chia' na' chese'eje' xçhenan' de yela' mban chegaque' toli tocanē, na' zjanaque' txen len neda' na' neda' naca' txen len legaque'.

⁵⁷ Xa' Diosen' gwsele' neda' na' de yela' mban chia' da' naca' toze len le'. Na' ca'cze gac len bene' yesagw cuerp çhian', yesenite' toli tocanē dan' zjanaque' txen len neda'.

⁵⁸ Cuerp çhian' naquen yela' guagw da' za' yaba. Na' len bi naquen ca da' gosagw da' xozxta' ocho ca' latje dašen', le bene' gosagw len bia'cze gosate'. Na' bene' chesagw yela' guagw dan' žia' ca', yesenite' toli tocanē.

⁵⁹ Jesúsen' bsed blo'ede' da' ca' lo' yodao' che bene' Israel gualaž çheto' ca' da' zoa Capernaum.

Xtiža' Jesúsen' chnežjon yela' mban toli tocanē che bene' chosozenag çhen

⁶⁰ Na' zan bene' ca' zjanao' Jesúsen', cate' gosende' da'na' chzejni'ide' legaque', gosene':

—Zdebechgua naquen goncho dan' chzejni'iden'. ¿Noxen' gac gon can' žen'?

⁶¹ Gocbe'e Jesúsen' chesenie' che' dan' bzejni'ide' legaque' da' ca', na' gozne':

—¿Bi chazlaže'le can' ba gwnian'?

⁶² ¿Nacxe nale cate' le'ele neda' yeyepa' gan' gwzoa' cana'? neda' naca' ben' gwseła' Diosen' golja' benach.

⁶³ Spiritw çhian' chnežjon benachen' yela' mban, na' cuerp çhian' bi gac gonen ca'. Diža' dan' bach bia' len le'e zjazacan' len yichjlažda' olen' cont banle toli tocanē še šejle'le çhen.

⁶⁴ Perw ne' nita' balle bi chejle'le.

Jesúsen' gwne' ca' le gocbe'ede' cate' gosezolao bene' ca' gosedalene' le' noe' bi chesejle'e che' na' noe' gwdie'ne' lo' na' bene' ca' cheseque'ede' le'.

⁶⁵ Na' gozna' Jesúsen':

—Chac can' ba gwnian', nono gac šejnilaže' neda' še bi gaclen Xa' Diosen' le' cont šejnilaže'nda'.

⁶⁶ Beyož bzejni'i Jesúsen' legaque' da' ca', zan bene' ca' ba chosozenag xtižen' gobebejyichje' bich bosozenaguen'.

⁶⁷ Nach Jesúsen' gože' šižinw bene' ca' gwleje' cont gosaque' le' txen:

—¿Len le'e chaclaže'le yeyejle'?

⁶⁸ Na' gož Simón Pedron' le':

—Xanto', noch no zaca' gwzenagto' xtižen'. Tozo' le' cho'o diža' da' chnežjon yela' mban che bene' chzenague' çhen.

⁶⁹ Neto' chejnilaže'to' le' na' nezeto' naco' Cristo ben' gwlej Diosen' cont nabi'o, na' naco' dogualje Xi'in Dios, Dios ben' zoa toli tocanē.

⁷⁰ Na' Jesúsen' gože' legaque':

—Ba gwleja' le'e šižinwle cont zoale len neda' na' nezda' tole chzenagle che gwxiyen'.

71 Gwne' ca' che Judas Iscariote ben' naque' xi'in to bene' le' Simón, le gwneзде' Judasen' ba naquen gwdie' le' lo na' bene' ca' cheseque'e le', na' Judasen' naque' to bene' šiz̄inw ca'.

7

Bene' biše' Jesúsen' bi gosejnilaže' le'

1 Gwde na' Jesúsen' gw dacze' bsd blo'ede' ben' že' distritw Galilean'. Bich goclaže' šejche' Judean', le bene' gwnabia' che nación Israel cheton' že' na' cheseyiljue' nacle yesone' yesote'ne'.

2 Na' ba zoa gała' l̄ni che neto' bene' Israel da' nzi' L̄ni che Ranšw Yix.

3 Na' bene' biše' Jesúsen' gose'ene':

—Bitw yega'ano' nga. San gwyej Judean' cont bene' ca' chosozenag chio' yesele'ede' yela' guac dan' chonon'.

4 Note'teze bene' še chaclaže' yesacbe'e bene' naque' to bene' zaca', bi gone' yela' guac bagaše'ze. Še da' li chono' yela' guac, ben cont yesele'e yogo'lol bene' can' chonon'.

5 Bene' biše' Jesúsen' gose'ene' ca', le ne legaque' bi gosejnilaže'ne'.

6 Nach gož Jesúsen' legaque':

—Biña' žin ža ša'a, san le'e guac šja'acle bate'teze.

7 Bene' ca' bi zjanombi'e Diosen' bi gac yeseque'ede' le'e, san cheseque'ede' neda', le chzejni'ida'ne' chesone' da' xinj.

8 Le šja'ac l̄nin'. Neda' bi sa'a na'a, le biña' žin ža chia'.

9 Beyož gože' legaque' ca' bega'ane' Galilean' yeto čop ža.

Jesúsen' gwyeye' Jerusalén gan' yo'o l̄nin'

10 Nach gwde gosa'ac bene' biše' ca' zja'aque' l̄nin' gwza' Jesúsen' len bene' ca' zjanaque' le' txen zja'aque' l̄nin', perw bi ja'aque' can' nla'ze san bagaše'ze.

11 Na' bene' gwnabia' che nación Israel cheton' že' Jerusalénn'a besyeyiljue' le' lo l̄nin', chesene':

—¿Gaŋxe bena'?

12 Na' bene' ca' zjandop zjanžag lo l̄nin' šižize goso'e diža' che Jesúsen', na' gague toze ca gosene'. Bałe' gosene': "Naque' bene' güen", na' bałe' gosene': "Bi naque', chonlede' bene'."

13 Na' goso'e diža' šižize che Jesúsen', le yogo'ze bene' chesežebe' bi yesone bene' gwnabia' ca' legaque' še yesacbe'ede' cheso'e diža' güen che Jesúsen'.

14 Na' do gašje zej l̄nin' cate' gwyej Jesúsen' gan' zoa yodao' blao che neto' bene' Israel na' gwzolao chsed chlo'ede'.

15 Na' besyebane bene' gwnabia' ca', gosene':

—¿Nacxečhen' da' zan neze benga? le gague bi nseden'.

16 Na' Jesúsen' gože' legaque':

—Dan' chsed chlo'edan' bi naquen xbab čecza', san naquen xbab che bene' gwsela' neda'.

17 Note'tez bene' chesacclaže' yesone' can' chazlaže' Dios ben' gwsela' nedan', guacbe'ede' še dan' chsed chlo'edan' zan' che Dios o še naquen da' chaljlaže'za'.

18 Cate' to bene' chsed chlo'ede' xbab čecze', cheyiljue' nacle gone' cont gaxene'. San cate' to bene' chaclaže' gacxen bene' gwsela' le', nezecho xtižen' naquen da' li na' bi chziye'e.

19 'Da' Moisésen' bene' le'e ley dan' nsedlen' perw ne tole bi chonle can' žanna'. ¿Bixchen' cheyiljwle nacle gonle gotlenda'?

20 Bene' ca' že'na' gose'ene':

—Yo'o da' xigüen', nan' chol chñenošo'. ¿No chaclaže' got le'?

21 Jesúsen' gože' legaque':

—Toz yela' guac da' bena' ža che Dios cate' bi de lsens gon chio' bene' Israel žin, na' yogo'le chebanelo.

22 Da' Moisésen' bene' mandadw soacho señw dan' že' circuncisión (la'czla' bi gwzolao señon' len le' san len da' xozxta'ocho ca' bene' gwnita' cani'te), na' da'nan' chzoale bi' byo dao' ca' señwna' ža che Dios.

23 Can' naquen, la'czla' še naquen ža che Dios, chzoale no bi' byo dao' señw cate' chaquebe' xono' ža cont chonle can' ža ley dan' bzoj Moisésen', na' ¿bixchen' chža'ale neda' dan' ba beyona' to bene' güe' ža che Diosen'?

24 Bi cheyala' yosbaga'le bene' che da' chle'ele chone', le bi nezele še chazlaže' Diosen' can' chone', san le nabyane' cont nezele bi ža Diosen', nachen' gache'ele non' cheyala' yosbaga'le.

Jesúsen' gwne' ze'e gan' zoa Diosen'

25 Nach to chope bene' Jerusalén ca' gosene':

—¿Gague bengal ben' chesyeyiljue' cont yesote'ne'?

26 Le na' can' cho'e dižan' lao yogo' bene' na' bibi chese'e le'. ¿Gague ba cheson bene' gwnabia' checho xbab le naque' Cristo ben' chbezcho yedenabia'?

27 Perw nezecho ga bene' bengal, na' cate' yid Criston' nono yeseneze ga bene' le'.

28 Jesúsen' chsed chlo'ede' chalšil che yodao' blao cate' gosene' ca'. Nach gwne' žižje gože' legaque':

—Chaquele nombia'le neda' na' chaquele nezele ga bene' neda'. Perw gague con za'a to gualaza'. Da' li zoa bene' gwsele' neda', na' le'e bi nombia'lné'.

29 Neda' nombi'ane', le za'a gan' zoen' na' le' gwsele' neda'.

30 Na' da' gwne' ca' bal bene' gosaclaže'chgüe' yesezene' le', perw nono gwzen le' da' biña' žin ža gague' lo na'gaquen'.

31 Na' bene' zan gosejle'e Jesúsen' naque' bene' gwsele' Dios, na' gosene':

—Cate' yid Criston' ¿gonche' yela' guac da' zaca'ch ca da' chon bengal?

Bene' chesape' yodao' blaon' ja'aque' cont šjasexene' Jesúsen'

32 Bene' fariseo ca' gosende' diža' cheso'e bene' ca' che Jesúsen'. Da'nan' bosoxi'e len bene' ca' zjanac bhoz gwnabia' che nación Israel cheton' na' gosesele' bene' chesape' yodao' blaon' cont šjasexene' Jesúsen'.

33 Nach Jesúsen' bsd blo'echde' bene' ca' že'na', gwne':

—Soacha' yeto tiemp dao' len le'e nach yeya'a gan' zoa ben' gwsele' neda'.

34 Na' yeyiljwle neda' na' bi yeželele neda', le gan' soan' bi gac yidle.

35 Nach bene' gwnabia' che nación Israel cheton' gose' lježe':

—¿Gan' chacde' yeyeje' ga bi yeželechone'? ¿Yeyeje' gan' zjanaslas bene' gualaż checho ladjo bene' griego ca' na' gwsed gwlo'ede' legaque'?

36 ¿Bi zejen dan' gwnen': "Yeyiljwle neda' na' bi yeželele neda' na' gan' soan' bi gac yidle"?

Jesúsen' be'e diža' che Spiritw che Diosen'

37 Ža cate' zelao chesone' lnin' naquen ža xench, na' Jesúsen' zeche' chsed chlo'ede' na' gwne' žižje, gwne':

—Note'tezle še lo' yichjlažda'olen' nacle ca' bene' chbillaže', cheyala' šejnilaže'le neda' na' gona' le'e yela' mban toli tocañe, na' lenna' gaquen lo'

yichjlažda'olen' ca to nis da' gwbat cheyo'ojen cont bich gacle ca to bene' chbillaze'.

³⁸ Le'e chejnilaže'le neda', gac chele can' ža Xtiža' Diosen' da' nyojen, to da' güen juisyw gac lo' yichjlažda'olen' cont gacle ca to yežlio ga chaldí nis, gan' de zan yegw da' cheseyilen len.

³⁹ Na' dan' gwna Jesúsen' ca' be'e diža' che Spiritw che Diosen' da' yedesoan lo' yichjlaždao' note'tezcho chejnilaže'chone'. Na' caten' gwne' ca' Spiriton' bina' yedesoan lo' yichjlaždao' bene', le bina' gac yogo' da' cheyala' gac cont gachia' Jesúsen' naque' bene' zaca' juisyw.

Gosaque' chople neche Jesúsen'

⁴⁰ Bene' ca' chosozenag xtiža' Jesúsen' bałe' gosene':

—Da' li benga naque' ben' choe' xtiža' Diosen' ben' naquen yide'.

⁴¹ Na' yebale' gosene':

—Benga Criston' ben' naquen yedenabia'.

Perw yebale' gosene':

—¿Bixe nacho bene' Galilea ba gwlej Diosen' cont yedenabi'e chio'?

⁴² Xtiža' Diosen' da' nyojen žan Criston' ben' yedenabi'e choje' lo diaža che da' rey David na' gaque' bene' Belén gan' nac laž da' David.

⁴³ Can' goc bene' ca' gosaque' chople neche Jesúsen'.

⁴⁴ Na' bałe' gosaclaže' yesezene'ne', perw nono gwzen le'.

Bene' gwnabia' che nación Israelen' bi gosejle'e che Jesúsen'

⁴⁵ Na' bene' chesape' yodao' blaon' jaya'aque' gan' nita' bžoz gwnabia' ca' len bene' fariseo ca', le bene' can' gosesele' legaque' cont yesezene' Jesúsen'. Na' bene' ca' gose'e legaque':

—¿Bixchen' bi nche'elne'?

⁴⁶ Na' bene' chesape' yodao' blaon' gose'ene':

—Bina' yeneto' bene' cho'e diža' güen ca dan' choe' bena'.

⁴⁷ Nach bene' fariseon' gose'e legaque':

—¿Lente le'e ba gwxiye'e?

⁴⁸ Ne toz neto' nacto' bene' fariseo bina' šejle'to' xtižen' na' neca bene' gwnabia' chechon', ne toze' bina' šejle'e xtižen'.

⁴⁹ Perw bene' quinga že' nga bi zjanombi'e ley dan' bzoj da' Moisésen' na' ba zjambiaye'e, da'n'an' chesejle'e xtižen'.

⁵⁰ Na' Nicodemo ben' gwyej lao Ješusen' šeže'le naque' txen len bene' gwnabia' ca'. Na' Nicodemon' gože' legaque':

⁵¹ —Ley chechon' bi choen' latje choglaochó che to bene' ba ben da' mal še bina' güe'e diža' naquen' goc na' še bina' nezecho bi dan' bene'.

⁵² Nach yezica'chle bene' gwnabia' ca' gose'e le':

—¿Leno' le' ba beyaco' bene' Galilea? Bsed Xtiža' Diosen' da' nyojen na' nezdo' ne to bene' choe' xtiža' Diosen' ca' na' choje' Galilean'.

⁵³ Nach besyeya'ac to toe' jaya'ac ližgaque'.

8

No'olen' besyedole'de' len xtoe'

¹ Na' Jesúsen' gwyeje' ya'a da' nzi' Ya'a Olivos.

² Na' beteyo cate' gwyeji' gwyeje' yodao' blaon' da' yoble na' yogo' bene' ca' že' na' gosebigue' lagüen' na' gwchi'e na' gwzologüe' chsed chlo'ede' legaque'.

³ Nach bene' chososed chosolo'e ley dan' bzoj da' Moisésen' na' bene' fariseo ca' jasesane' to no'ole bene' besyedole'de' len xtoe'. Na' bosozeche' le' gachol bene' ca' chosozenag che Jesúsén'.

⁴ Na' gose'e Jesúsén':

—Maestrw, no'ole nga ba bedole'to' delene' xtoe'.

⁵ Na' ley chechon' da' bzoj Moisésén' žan cheyala' gotcho no'ol ca' cheson ca' gwchelchone' yej. Na' žbi žo' le'? žbix cheyala' gonechone'?

⁶ Gose'e Jesúsén' ca' da' gosaclaže' yesebeje' le' diža' da' yosochine' yesagüe' xya che'. Na' Jesúsén' con bcheque' bzoje' lo yon' len xbene'.

⁷ Na' bene' ca' gosone' byen gosenabchde' le' bi že'. Nach Jesúsén' bebe'šagüe' na' gože' legaque':

—Guaque con note'tezle bi de xtoła'le solaole gwchellene' yejen'.

⁸ Nach bcheque' da' yoble bzojche' lo yon'.

⁹ Na' bene' ca' zjanche' no'olen' cate' gosende' can' gož Jesúsén' legaque', zjanезде' lecze ba zjanoncze' da' xinj, nach tgüje tgüjeje' besyechoje' gwzolaotequen' len bene' golech na' bžinten len bene' xcuide'ch, nach bega'an yetoze no'olen' len Jesúsén' gan' že' bene' ca' chsed chlo'ede'.

¹⁰ Nach Jesúsén' bebe'šagüe' da' yoble na' ble'ede' noch no bene' ca' zjanla' na' gože' no'olen':

—No'ole, žganxe bene' ca' chosocuiš le'? žNe toe' bi ben le' castigw?

¹¹ Na' no'olen' gože'ne':

—Ne toe', bene'.

Na' Jesúsén' gože'ne':

—Ne neda' bi gona' le' castigw. Beyej na' bich gonon' da' malen'.

Jesúsén' nse'e be'ni' che yichjlaždao' benačh

¹² Jesúsén' gozo'e diža' da' yoble chzejni'ide' bene' ca' že' na', gwne':

—Neda' nsa'a be'ni' che yichjlaždao' benačhen'. Bene' zjanaque' neda' txen bich zjanaque' ca bene' yichjlaždao' lchol bene' cheson da' xinj, san lo' yichjlažda'ogaque' naquen ca to da' yo'o be'ni'. Da'n'an' ba de yela' mban chegaque' toli tocanē.

¹³ Nach bene' fariseo ca' gose'e Jesúsén':

—Cho'o diža' che cuino' naco' bene' zaca', na' da'n'an' bi naquen to da' yesejle' bene'.

¹⁴ Na' gož Jesúsén' legaque':

—La'czla' cho'a diža' che cuina', xtižan' naquen da' li. Neda' nezda' gan' gwza' na' gan' yeya'a, perw le'e bi nezele gan' za'a na' gan' yeya'a.

¹⁵ Le'e chosbaga'le neda' con can' chon benačhen' xbab, san neda' nono chosbaga' bi da' yosbaga'.

¹⁶ Perw na' šaca' bi da' yosbaga' bene', gonan' ca cheyala', le bibi de da' chona' to gualaza', san chona' dan' ža Xan' ben' gwseła' neda'.

¹⁷ Ley chechon' dan' chsedlen' žan cheyala' šejle'cho cate' chedił diža' da' chesoe' chope testigw.

¹⁸ Na' nac chopto' choe'to' xtiža': neda' cho'a diža' che cuina' na' Xan' ben' gwseła' neda' lecze cho'e diža' čhia'.

¹⁹ Na' gose'ene':

—žGaxe zoa xaon'?

Na' gwna Jesúsén':

—Ne neda' ne Xan' bi nombia'le. Šaca' nombia'le neda' lecze nombia'le Xan'.

20 Diža' ca' bsd blo'e Jesúsen' cate' ze' gała'ze gan' chesegüe'e mechw lo' yodao' blao che neto' bene' Israel. Na' nono gwzen le', le bina' žin ža gaque' lo na' bene' chesegue'ede' le'.

Jesúsen' gože' legaque' bi gac šjaya'aque' gan' yeyejen'

21 Nach Jesúsen' gože' legaque':

—Neda' yeya'a, na' yeyiljwle neda' perw bi gac yeyejle gan' yeya'an, le bina' yetinjele xtoła'len' cate' žin ža gatle.

22 Na' da' gwne' ca' bene' gwnabia' che nación Israel cheton' gosene':

—¿Yeyot cuinen' že' gan' yeyejen' bi gac šejcho?

23 Nach Jesúsen' gože' legaque':

—Le'e nacle bene' che yežlio nga na' chzenagle che dan' chnabia' yežlion', san neda' za'a yaba na' bi chzenaga' che dan' chnabia' yežlion'.

24 Da'nan' gwnia' bina' yetinjele xtoła'len' cate' žin ža gatle. Le še bi šejle'le neda' naca' doxen can' gwnian', gatle bina' yetinjele xtoła'len'.

25 Nach gose'e Jesúsen':

—¿Nox naco' le'?

Na' gož Jesúsen' legaque':

—Zan ni'a ba gwnia' le'e non' naca'.

26 Ne' dech da' zan da' nia' cont gwzejni'ida' le'e nable doła'. Perw bene' gwseła' neda' nezde' yogo'loł na' cho'e diža' li, na' neda' choe'lena' benachen' diža' da' ba benda' gwne'.

27 Bene' gwnabia' ca' bi gosejni'ide' choe'lene' legaque' diža' che X'e Diosen'.

28 Nach Jesúsen' gože' legaque':

—Cate' ba gwde gwliše neda' to le'e yag, neda' naca' bene' gwseła' Diosen' golja' benačh, cana'ch gache'ele le naca' ben' ba gwnia' le'e, na' gache'ele bibi chona' to gualaza', san con da' bzejni'i Xan' neda', lenna' žia'.

29 Xan' ben' gwsele' zoacze' len neda'. Na' bi chbejyichje'nda', le bate'teze chona' da' chazlaže'.

30 Na' šlac Jesúsen' choe'lene' bene' ca' dižan' nach bene' zan gosezolao chesejnilaže' le'.

Bene' ca' chnabia' da' malen' yichjlažda'ogaquen'

31 Nach Jesúsen' gože' bene' gualaž cheto' ca' bačh gosezologüe' chesejni-laže'ne':

—Še soacze gonle can' ba gwnian', gwlo'en da' li nacle txen len neda'.

32 Na' še soacze gonle can' ba gwnian', nachen' šejni'ile diža' li chian' na' gaclenen le'e cont yechojle lo na' da' chnabia' le'e.

33 Bał bene' ca' gose'e Jesúsen':

—Neto' nacto' diaža che da' Abrahanna' na' nono na' soa bene' nabia' neto'. ¿Bixchen' žo' yechojto' lo na' da' chnabia' neto'?

34 Na' gož Jesúsen' legaque':

—Chnia' le'e to da' zejen, yogo' bene' cheson da' xinj zjanaque' lo na' da' mal da' chnabian' legaque'.

35 Bene' zoa liž xan xšine' bi naque' xi'in ben' gan' chone' žinna', san šlož güeje zoe' txen len legaque' len bi da' chesone'. San bene' golje' txen len le', bate'teze zoe' len legaque'.

36 Neda' naca' dogualje Xi'in Dios na' guac gona' cont da' malen' bich nabi'an yichjlažda'olen' na' yechojle lo ne'en na' bich gaquen ca xanle.

37 Nezda' nacle diaža che da' Abrahanna', perw bia'cze cheyiljwlaže'le nac gonle cont gotle neda'. Na' chonle ca' da' bi chzenagle xtižan'.

38 Neda' cho'a diža' che da' ca' ba ble'eda' cate' zoa' cuit Xan', na' le'e lecze chonle da' ba benele gwna xalen'.

39 Nach bene' ca' gose'e Jesúsen':

—¿Bixchen' žo' ca'? Neto' nacto' diaža che da' Abraham.

Na' gož Jesúsen' legaque':

—Šaca' nacle dogualje diaža che da' Abraham, gonle can' ben da' Abrahanna' šaca'.

40 La'czla' ba bzejni'ida' le'e diža' li da' benda' gwna Diosen', bia'cze chey-iljwlaže'le nac gonle gotle neda'. Da' Abrahanna' bi bene' can' chonlen'.

41 Toz can' chonle len xalen'.

Nach bene' ca' gose'e le':

—Toz Diosen' naque' Xato' na' bi chzenagto' che nochle bene'.

42 Jesúsen' gože' legaque':

—Šaca' Diosen' naque' xale gaquele neda', le neda' gwza'a gan' zoa Diosen'. Bi za'a nga to gualaza', Diosen' gwsele' neda'.

43 ¿Bixchen' bi chejni'ile dan' chnia' le'e? Nežda' bi chejni'ile dan' bi chaclaže'le gwzenagle chia'.

44 Satanás dan' chnabia' da' xigüe' ca' naquen xale, nachen' chebele chonle can' chnalažen'na'. Len ba naquen güet bene' cate' gwxe te yežlion'. Na' bi chzenaguen che diža' li, le diža' li bi yo'on lo' yichjlažda'ogüen. Cate' chnen diža' güenlaže' chnen con can' nac cuinen, le naquen güenlaže' na' yogo' diža' güenlažen' zan' len len.

45 Na' neda', da' cho'a diža' li, bi chejle'le chia'.

46 Bibi da' mal nona' na' da'nan' ne tole bi gac gwlo'ele še bi da' mal ba bena'. Neda' zoateza' cho'a diža' li, ¿bixchen' bi chejle'le chia'?

47 Bene' ca' chon Diosen' legaque' cuent ca xi'ine' chosozenague' xtižen'. Na' le'e bi chzenagle chen' da' bi nacle xi'ine'.

Ba zoacze Criston' cate' golje da' Abraham

48 Nach bene' gwnabia' che nación Israel cheton' gose'e Jesúsen':

—Can' ba gwnacztó' nachia'cze naco' txen len bene' Samaria ca' na' yo'o to da' xigüe' lo' yichjlažda'oguoñ' chonen ga choł chñenošo'.

49 Jesúsen' gože' legaque':

—Bi yo'o da' xigüen' lo' yichjlažda'ogua', san chonxena' Xan' na' le'e chnele chia'.

50 Bi chyljua' no gonxen neda', perw zoa Xan' chaclaže' benachen' yesonxene' neda' na' Xan' choglagüen' chele nable doła' da' chnele chia'.

51 Chnia' le'e to da' zejen, note'teze bene' yosozenague' xtižan', guata'cze yela' mban che' toli tocañe.

52 Nach da' yoble bene' gwnabia' ca' gose'e le':

—Nach beyož gwnezeto' yo'o to da' xigüe' lo' yichjlažda'oguoñ' chonen ga choł chñenošo'. Ba got da' xozxta'ocho Abrahanna', na' len bene' ca' gosoe' xtiža' Diosen' cani' lecze ba gosate', na' chñenošo' žo' bene' chosozenag xtižon' gata' yela' mban che' toli tocañe.

53 ¿Chacdo' zaca'cho' ca da' xozxta'ocho Abrahanna' len bene' ca' gosoe' xtiža' Dios bene' ba gosat? ¿Noxen' chacdo' naco'?

54 Gož Jesúsen' legaque':

—Šaca' chonxen cuina' bibi zejen, perw Xan' ben' žale naque' Dios ben' chejnlaže'le chonxene' neda'.

⁵⁵ Le'e bi nombia' lne', san neda' nombi'ane'. Šaca' nia' bi nombi'ane' gaca' bene' güenlaže' can' naclena'. Perw neda' nombi'ane' na' chzenaga' xtižen'.

⁵⁶ Da' Abrahanna' ben' žale nac xozxta'ole bebechgüede' gwnežde' le'ede' ba za'a len benachen' na' zoe' mbalaz ba ble'eden'.

⁵⁷ Na' gose' bene' blao che nación Israel cheton' le':

—Biña' gacdo' šiyon iz. Chñenošo' žo' ba ble'edo' Abrahanna'.

⁵⁸ Jesúsen' gože' legaque':

—Chnia' le'e to da' zejen, ba zoacza' neda' cate' bina' galje Abrahanna'.

⁵⁹ Nach gosenize' yej da' yosochele' le', perw Jesúsen' bcuaše' na' beze'e yodaon'. Neca gosache'ede' cate' bedie' ladjogaque'.

9

Jesúsen' bene' cont ble'e to bene' golje' ncholé'

¹ Txen zej Jesúsen' len bene' ca' zjanaque' le' txen cate' besele'ede' to bene' byo golje' ncholé'.

² Na' gose'e Jesúsen':

—Maestrw, ¿non' nap doła' golje benga ncholé', še le' o še xaxne'en?

³ Na' Jesúsen' gože' legaque':

—Benga golje' ncholé' gague da' nape' doła' na' gague da' zjanap xaxne'en doła', san golje' ca' cont le'ele can' chon Diosen'.

⁴ Cheyala' goncho xšin Dios ben' gwseła' neda' šlac ne' de latje. Gwžin ža bich gala' gonchon.

⁵ Šlac ne' zoa' yežlion' chgua'a be'ni' lo' yichjlaždao' benachen'.

⁶ Beyož gwne' ca' gwcho'on xene' lo' yon' na' bene' late' gona' len xene' na' gwdebe' gonan' yejiao bene' lcholen'.

⁷ Nach gože' ben':

—Gwyey jaydib yejlaguon' cho'a yel da' nzi' Yel Siloé.

(Na' Siloé zeje diža' Nseła'.) Na' gwyeye' na' beyib yejlagüen' na' cate' beze'e zjayde' ba chle'ede'.

⁸ Na' bene' gualiž che' na' nochle bene' ba besele'e le' yogo' ža cate' ne' ncholen' gosene':

—¿Gague bengan' ba ble'echo chbe' chñabe' carida?

⁹ Na' bale' gosene':

—Le bengan'.

Na' yebale' gosene':

—Bi nac le' san yeto bene' yoblen', perw toz ca naque' len benga.

Perw ben' beyaquen' gože' legaque':

—Nedan'.

¹⁰ Na' gose'ene':

—¿Nac goquen' gwzolao chle'edo'?

¹¹ Na' gože' legaque':

—To bene' le Jesús bene' late' gona' na' gwdeben' yejlaguan' na' gože'nda': "Gwyey cho'a yel da' nzi' Yel Siloé na' jaydiben'." Na' gwyia' na' beyiban' na' gwzolao chle'eda'.

¹² Nach gose' bene' ca' le':

—¿Gaxxe bena'?

Na' gože' legaque':

—Bi nezda'.

Bene' fariseo ca' gosenabyože' nac goquen' ba chle'ede'

¹³ Nach goseche'e ben' goc lcholen' gan' že' bene' fariseo ca'.

14 **Nac** to ža **che** Dios **caten'** **Jesúsen'** **bene'** **gonan'** **dan'** **gwdebe'** **yejlao** **bena'** **cont** **ble'ede'** **na'** **bi** **de** **lsens** **gon** **neto'** **beñe'** **Israel** **žin** **ža** **che** **Diosen'**.

15 **Na'** **beñe'** **fariseo** **ca'** **lecze** **gosenabde'** **le'** **nac** **goquen'** **ba** **chle'ede'**. **Na'** **gože'** **legaue'**:

—**Gwdebe'** **gona'** **yejlaguan'** **na'** **jaydiban'** **na'** **na'a** **ba** **chle'eda'**.

16 **Nach** **bał** **beñe'** **fariseo** **ca'** **gosene'**:

—**Nezecho** **bi** **zoa** **Diosen'** **len** **bena'** **beyone'** **beñe'** **lchol'en'**, **le** **chone'** **da'** **bi** **cheyala'** **gone'** **ža** **che** **Diosen'**.

Na' **yebale'** **gosene'**:

—**¿Nac** **gon** **to** **beñe'** **güen** **da'** **xinj** **gone'** **yela'** **guac** **ca** **dan'** **ben** **benga'?**

Na' **legacze'** **besechoje'** **chop** **cuen**.

17 **Na'** **da'** **yoble** **gose'e** **ben'** **golje'** **nchole'**:

—**¿Bi** **žo'** **le'** **che** **ben'** **bene'** **cont** **chle'edo'?**

Na' **bena'** **gwne'**:

—**Naque'** **to** **beñe'** **choe'** **xtiža'** **Dios**.

18 **Na'** **beñe'** **gwnabia'** **che** **nación** **Israel** **cheton'** **bi** **gosejle'e** **golje** **ben'** **nchole'** **na'** **na'a** **bačh** **chle'ede'**. **Nach** **gosaxe'** **xaxne'ena'**.

19 **Na'** **gosenabde'** **legaue'**, **gose'ene'**:

—**¿Xi'inle** **benga** **ben'** **žale** **golje'** **nchole'?** **¿Nacxe** **goquen'** **chle'ede'** **na'a?**

20 **Xaxne'ena'** **gose'e** **legaue'**:

—**Nezeto'** **bengan'** **xi'into'**, **na'** **nezeto'** **golje'** **nchole'**.

21 **Perw** **bi** **nezeto'** **nac** **goquen'** **ba** **chle'ede'** **na'a**, **na'** **neca** **nezeto'** **non'** **ben** **cont** **ba** **chle'ede'**. **Ba** **zejczede'** **iz**, **le** **nabe** **cuine'** **cont** **güe'e** **diža'** **naquen'** **goc**.

22 **Xaxne'en** **gosene'** **ca'** **da'** **chesežebe'** **beñe'** **gwnabia'** **ca'**, **le** **beñe'** **gwnabia'** **ca'** **ba** **gosechoglagüen'** **bi** **yosolebe'** **lo'** **yodaon'** **note'teze** **beñe'** **güe'e** **diža'** **chejle'e** **Jesúsen'** **naque'** **Cristo** **ben'** **chesebeze'** **yedenabi'e**.

23 **Da'n** **an'** **xaxne'en** **gosene'**: “**Ba** **zejczede'**, **le** **nabe** **cuine'**.”

24 **Nach** **da'** **yoble** **gosaxe'** **ben'** **golje'** **nchole'** **na'** **gose'ene'**:

—**Be'** **diža'** **li** **lao** **Diosen'**, **le** **bi** **naquen** **can'** **gwnao'** **bače**. **Nezeto'** **ben'** **gwnao'** **beyon** **le'** **naque'** **beñe'** **güen** **da'** **xinj**.

25 **Na'** **ben'** **beyac** **yejlagüen'** **gwne'**:

—**Bi** **nezda'** **še** **naque'** **beñe'** **güen** **da'** **xinj** **o** **še** **bi** **naque'**. **Da'** **nezda'**, **goca** **beñe'** **lchol** **na'** **na'a** **ba** **chle'eda'**.

26 **Na'** **da'** **yoble** **gose'e** **le'**:

—**¿Bi** **bende'** **le'?** **¿Nac** **benen'** **chle'edo'?**

27 **Na'** **gože'** **legaue'**:

—**Ba** **gwnicza'** **le'e** **na'** **bi** **chzenagle**. **¿Bixčhen'** **chaclaže'** **le** **yenian'** **da'** **yoble'?** **¿Len** **le'e** **chaclaže'** **le** **gwzenagle** **che'?**

28 **Nach** **gosezi'** **diže'** **le'**, **gosene'**:

—**Le'** **naco'** **txen** **len** **le'**, **san** **neto'** **nacto'** **txen** **len** **da'** **Moisés**.

29 **Nezeto'** **Diosen'** **be'lene'** **Moisésen'** **diža'**, **perw** **benga** **bi** **nezeto'** **ga** **ze'e**.

30 **Na'** **ben'** **golje'** **nchole'** **gože'** **legaue'**:

—**¡Da'** **zaca'** **yebanecho**, **bi** **nezele** **ga** **za'** **benga**, **na'** **bene'** **cont** **chle'eda'**!

31 **Nezecho** **Diosen'** **bi** **chzenague'** **che** **beñe'** **cheson** **da'** **xinj**, **san** **chzenague'** **che** **note'tez** **beñe'** **chejnilaže'** **le'**, **beñe'** **cheson** **can'** **chnalažen'**.

32 **Na'** **gwzolaoten** **cate'** **gwxe** **yežlion'** **biña'** **yenecho** **zoa** **beñe'** **chac** **chone'** **cont** **chle'e** **beñe'** **golje'** **nchole'**.

33 **Šaca'** **bengan'** **bi** **ze'e** **gan'** **zoa** **Diosen'** **bibi** **gac** **gone'**.

34 **Beñe'** **fariseo** **ca'** **beselocchgüe'** **na'** **gose'e** **le'**:

—**Len'** **goljtio'** **naco'** **beñe'** **mal** **juisyw**, **¿chacdo'** **zaco'** **gwseddo'** **neto'?**

Na' besyebeje' le' lo' yodaon'.

Beñe' ca' zjanchoj yichjlažda' ogaque'

³⁵ Jesúsen' bende' diža' che ben' beyac yejlagüen' can' goc che' ba besyebeje' ne' lo' yodaon' nach jašague' ne' na' gože' ne':

—¿Chejnilažo' Xi'in Diosen' ben' gwsejen'?

³⁶ Na' gož ben' le':

—Beñe', gwna neda' non', cont šejnilaža' ne'.

³⁷ Jesúsen' gože' ne':

—Nedan' ben' ba ble'eczedeo' na' nedan' choe'lena' le' diža'.

³⁸ Nach bena' bzoa xibe' benxene' Jesúsen', gwne':

—Xana', chejnilaža' le'.

³⁹ Nach Jesúsen' gwne':

—Za'a yežlio nga cont gata'bia' non' nap doła' na' non' bi nap doła'. Zedeyena' cont beñe' ca' bi chesejni'i bich yesaque' ca beñe' lchoj, na' zedeyena' cont beñe' ca' chesacde' chesejni'ide' yesaque' ca beñe' lchoj len yichjlažda' ogaquen'.

⁴⁰ Nach ba|beñe' fariseo ca' nita' ga|a'ze caten' gwne' ca' na' gosende' xtižen', gose'e Jesúsen':

—¿Chacdo' len neto' nacto' ca beñe' lchoj?

⁴¹ Nach Jesúsen' gože' legaque':

—Šaca' nacle ca beñe' lchoj, bibi xto|a'le de, san žale chejni'ile, na' da'nan' napple do|a'.

10

Jempl che bene' güeye' xila' ca'

¹ Chnia' le'e to da' zejen, beñe' bi cho'o lo' le'ej che xilan' gan' nac cho'a puerten' san chepe' ga yoble cont cho'e, benan' naque' beñe' gwban.

² Ben' chsaljue' na' cho'e cho'a puerten', len' güeyoe' xilan'.

³ Na' ben' chap cho'a puert le'ej che xilan' chsaljue' puertan' cont cho'o ben' chyoeban'. Na' xila' ca' chosozenagba' xtiža' ben' chyoeban', le zjanombia'ba' ši'en cate' chaxe'ba' cho'e lagacba' cont chbeje'ba'.

⁴ Na' cate' ba gwleje' yogo'ba' lo' le'ejen', chbialagüe' laogacban', na' xila' che' ca' chesa'oba' le' da' zjanombia'ba' ši'en.

⁵ Bi chesa'oba' beñe' yoble, san chosyoxonjba' dan' bi zjanombia'ba' ši'en.

⁶ Jesúsen' be'e diža' che beñe' güeye' xila' ca' par bzejni'ide' beñe' ca' že'na', perw bi gosejni'ide' bi zejen dan' gože' legaquen'.

Jesúsen' zaca'lebde' ca to beñe' chyoe' xila' chen' bin|o

⁷ Nach Jesúsen' bsed blo'echde' legaque' yeto, gwne':

—Chnia' le'e to da' zejen, nedan' naca' ca cho'a puert gan' cheso'o xila' ca' lo' le'ej chegacban'.

⁸ Yogo' nochle beñe' ba goside' cate' za' yida' neda', beñe' bosozejni'ide' diža' güen|aže', guac nacho zjanaque' beñe' gwban. Perw beñe' chesejnilaže' neda' bi chosozenague' xtiža' beñe' ca'.

⁹ Neda' naca' ca cho'a puert che le'ej che xila' ca'. Na' note'tez beñe' yesejnilaže' neda', gata' yela' mban chegaque' to|l| tocane na' soacza' gaclena' legaque' bite'tez da' cheseyažjde'.

¹⁰ 'Beñe' ca' žia' beñe' gwban chesaclaže' yesone' cont beñe' ca' žia' zjanaque' xila' chia' yesebejyichje' xtižan' na' yosozenague' che legaque'. Na'

še yosozenague' che legaque', yesebiaye'e. Na' neda' za'a chnežjua' yela' mban toli tocanē che bene' chesejnilaže' neda' cont nite' güenchgua.

¹¹ Neda' binlo chgüia chña'a bene' chesejnilaže'nda' ca chon to bene' güeye' xila' bene' chyoe' xila' chen' binlo. Na' da' nzi'ida' legaque', da'nan' chzane cuina' gata' neche legaque'.

¹² Nita' bene' chesezi' laxjue' cont chosoyoe' xila' che bene'. Na' bene' chesezi' laxjue' chesebejyichje' xila' ca' cate' chesele'ede' za' beco'yo, le xila' ca' bi zjanachba' be chegaque'. Cheso'e latje chniz beco'yon' xila' ca' na' chesoslasba' legacba'.

¹³ Na' bene' bi zjanaque' xan xila' ca' chosoxonje' da' bi zjanži'ide' xilan', le bi zjanac xilan' be chegaque', san chosoyoeba' dan' chesezi' laxjuen'.

¹⁴ 'Neda' binlo chgüia chña'a bene' ca' chesejnilaže'nda', chona' ca chon to bene' chyoe' xila' chen' binlo. Na' nombi'a bene' ca' chesejnilaže' neda' na' legaque' zjanombi'e neda'.

¹⁵ Nombi'a legaque' ca Xan' nombi'e neda' na' neda' nombi'a Xan'. Na' da' nzi'ida' legaque' chzane cuina' gata' neche legaque'.

¹⁶ Nita' bene' yoble bene' bi zjanaque' bene' Israel bene' yesejnilaže' neda'. Na' cheyala' šjatoba' legaque' cont yosozenague' chia', nach yesaque' toze len yezica'chle bene' ba chesejnilaže' neda' na' toz neda' gwgüia na'a yogo'lole'.

¹⁷ 'Chzane' cuina' yesot bene' neda', na' techle yebana' da' yoble. Na' Xan' chacchde' neda' le chazlaže' da' chona' ca'.

¹⁸ Nono checa'a yela' mban chian' san chzanlaže' cuina' gata'. Guac zane cuina' yesote'nda' na' lecz guac yeyas yebana' ladjo bene' guaten', can' non Xan' mandaw gona'.

¹⁹ Na' da' yoble bene' nación Israel cheton' besechoje' chople neche xtiža' Jesúsen'.

²⁰ Zane' gosene':

—Yo'o da' xigüen' yichjlažda'ogüe', nan' chol chñenoše'. ¿Bixchen' chzenagle xtižen'?

²¹ Na' yebale' gosene':

—Bene' yo'o da' xigüen' yichjlažda'ogüen' bi gac gwšalje' ca'. ¿Guac gon da' xigüe' cont le'e bene' lchol?

Bene' gwnabia' che nación Israel besegue'ede' Jesúsen'

²² Na' cate' bžin ža gwyo'o lni dan' chesone' chjasyeze'ede' žan' beyož besyeyone' yodao' blao che Diosen', ba bžin tiemp zag Jerusalenna'.

²³ Na' Jesúsen' chde' chašil che yodao' blaon' gan' nzi' Chašil che Salomón.

²⁴ Na' bene' gwnabia' che nación Israel cheton' gosechje' Jesúsen' na' gose'ene':

—¿Bixchen' chono' cont chacžejlaže'to' še naco' Cristo ben' chbezto' seła' Diosen' cont yedenabi'e nación chechon'? Še len' Criston', gwnatega neto' zaca'lao.

²⁵ Na' gož Jesúsen' legaque':

—Ba gwnia' le'e na' bi chejle'le. Da' ca' ba bena' len yela' guac che Xan' chlo'en naca' bene' gwsele'.

²⁶ Perw bi chejle'le chia' da' bi nacle txen len bene' chesejnilaže' neda', can' ba gwnicza' le'e.

²⁷ Nombi'a bene' chesejnilaže' neda', na' žia' legaque' xila' chia'. Legaque' chosozenague' chia' na' chesone' con can' chzejni'ida'ne'.

28 Na' chnežjua' legaque' yela' mban toli tocaṇe na' gwbat yesebiaye'e na' nono gac yesyeca'a legaque' lo na'.

29 Xan' ba gwleje' bene' ca' chesejnilaže' neda' cont chgüia chna'a legaque'. Na' nono gac yesyeca'a legaque' lo na' Xan', le nape' la'zelagüe yela' chnabia' xen.

30 Neda' na' Xan' toz bene' nacto'.

31 Beyož gwne' ca' bene' gwnabia' ca' gosenize' yej cont yosocheḷenen'.

32 Na' gož Jesúsen' legaque':

—Da' zan da' güen ba ble'ele bena' len yela' guac che Xan'. ¿Che nonna' chaclaže'le gwchelle neda' yej?

33 Na' bene' gwnabia' ca' gose'e le':

—Gague che yela' guac ca' benon' gwchelto' le' yej san da' chneya'o che Diosen'. Con benachze le' na' chon cuino' ca Dios.

34 Na' gož Jesúsen' legaque':

—Nezeczela can' nyoj Xtiža' Diosen' dan' nsedle gan' žan: “Neda' ba gwnia', le'e nacle ca neda' Dios.”

35 Na' Xtiža' Diosen' da' nyojen gague da' te chen', na' lenna' žan Diosen' gwne' che bene' ca' bosozenag xtižen' cani' gosaque' ca le'.

36 Diosen' gwleje' neda' cont gaclena' benachen' že' yežlio nga na' ¿nacxechen' ža le'e chneya'a che Diosen' da' žia' naca' Xi'ine'?

37 Še dan' chonan' bi chlo'en yela' guac che Xa' Diosen', bi cheyala' šejle'le chia' šeca'.

38 Perw še chacbe'ele chona' da' zaca' len yela' guac che Diosen', cheyala' šejle'le len' gwsele' neda', la'czla' bi chaclaže'le šejle'le xtižan'. Na' še šejle'le che da' ca' chonan', nachen' nezele zoa Xan' len neda' na' neda' zoa' len le', le toz benen' nacto'.

39 Nach da' yoble gosaclačže' yesezene' Jesúsen' perw bitw bdoje'.

40 Jesúsen' beyeje' jayzoe' yešla'a yegw Jordanna' latje gan' gwzoo da' Juanna' šlac ne' chzoe' bene' nis.

41 Na' bene' zan ja'ac gan' gwzooen' cont bosozenague' xtižen' na' gosene':

—Da' Juanna' ne to yela' guac bi bene', perw yogo'lol dan' gwne' che benganaquen da' li.

42 Na' bene' zan gosejnilaže' Jesúsen' latje na'.

11

Can' goc cate' got Lázaro

1-2 Na' gwzoo to bene' gocšene bene' yež Betania le' Lázaro. Betania naquen laž María na' bene' bile' Marta, na' legaque' zjanaque' bene' zan Lázaron'. María nan' bzoe' to set zix' ni'a Xancho Jesúsen' na' bosbiže' ni'en len yiša' yichje'.

3 Na' bene' zan Lázaron' gosesele' diža' gan' zoa Jesúsen', chese'e le':

—Xanto', bene' xmigo' Lázaron' ba chacšende'.

4 Cate' gwneze Jesúsen' chacšene Lažaron', na' gwne':

—Ca nac yižgüe' chen', bi che'eden' cont yela' goten' gonen le' gan, san che'eden' cont gacbe'ele catec bene' zaca' nac Diosen' na' gacbe'ele naca' bene' zaca'chgua, neda' naca' dogualje Xi'in Dios.

5 La'czla' Jesúsen' chacde' Martan' len bene' na' len Lázaron',

6 cate' gwneзде' chacšene Lázaron', bega'anche' yechope ža gan' zoen'.

7 Nach gože' bene' ca' zjanaque' le' txen:

—Le šo'o šejcho distritw Judean' da' yoble.

8 Na' gose'ene':

—Maestrw, bi ža na'zen' beṇe' gwnabia' che naciṇ chchon' gosaclaže' yesote' le' yosochele' le' yej. ¿Da' yoble šejo' na'?

9 Jesúsen' gože' legaque':

—Lagüe žan' nsa' šižinw hor, na' beṇe' chda lagüe ža bi chčhegüe', le nseni' gwbižen' lo yežlion'.

10 Na' beṇe' chda ba goł chčhegüe', le nac chol.

11 Gwde gwne' ca' nach gože' legaque':

—Beṇe' xmigwcho Lázaron' ba chtase' na' ša'a šjaysbana'ne'.

12 Na' gose'ene':

—Xanto', še ba chtase' güeyacczede'.

13 Jesúsen' gwne' ca' dan' gwneзде' ba got Lázaron', na' beṇe' ca' zjanaque' Jesúsen' txen gosacde' še chtaszen'.

14 Nach Jesúsen' bochiḡgaten' bi zejenna' gwne' ca':

—Ba got Lázaron'.

15 Na' chebeda' bi gwzoa' na' šlac chacšende', cont gona' šejle'le chia'. Le šo'o šejcho gan' de'na'.

16 Nach ben' le' Tomás ben' bososi'e Tomás Cuaš gože' yezica'chle beṇe' ca' zjanaque' Jesúsen' txen:

—Le šo'o cont gatcho txen len Jesúsen' še yesote'ne'.

Jesúsen' že' chac chosbane' beṇe' guat

17 Na' ja'aque' Betanian' len Jesúsen', na' cate' besežine'na' beṇe' Betania ca' bosozende' le' ba goc tap ža bosocuaše' Lázaron'.

18 Betanian' chin' gala'ze Jerusalenna' ca do gašjw hor.

19 Na' beṇe' žan beṇe' gualaž chegaque' že' Jerusalenna' besežine' gan' zoa Martan' len Marían' cont yeso'e legaque' yela' chxenlaže' da' got beṇe' zangaquen'.

20 Nach Martan', cate' gwneзде' Jesúsen' ba bžine' cho'a yežen', na' gwze'e jašague'ne'. Na' Marían' bega'ane' yo'ona'.

21 Nach Martan' gože' Jesúsen':

—Xana', šaca' zo' nga caten' gocšene beṇe' zanan' bilja gote' šaca'.

22 Na' nezda' la'czla' ba gote', bite'tez da' nabdo' Diosen' gone', gonczen'.

23 Nach gož Jesúsen' le':

—Güeban beṇe' zanon'.

24 Nach Martan' gože'ne':

—Nezda' yebane' cate' yesyeban beṇe' guat ca' žan' te che yežlion'.

25 Na' gož Jesúsen' le':

—Neda' chac chosbana' beṇe' guat ca' le nsa'a yela' mban toli tocaṇe. Da'nan' beṇe' ca' yesejnilaže' neda', la'czla' yesate', guata' yela' mban chegaque' toli tocaṇe.

26 Na' note'tez beṇe' nite' chesejnilaže' neda', gwbat yesebiaye'e. ¿Chejli'o da' nga chnia' le'?

27 Na' gož Martan' le':

—Xana', chejli'a naco' dogualje Xi'in Dios. Chejli'a naco' Criston' ben' ba gwlezto' sela' Diosen' yežlion' yedenabi'e.

Jesúsen' gwcheže' gan' bosocuaše' Lázaron'

28 Beyož gwna Martan' ca' beyeje' jayeže' María bilen' šižize:

—Ba bla' Maestron' cho'a yežen' na' chnie' le'.

29 Na' Marían' cate' bende' dan' gož Martan' le' la' gwza'te' na' gwyeje' gan' zoa Jesúsen'.

30 Biña' žin Jesúsen' lagüe yežen' ca horen', ne' nga'ane' cho'a yežen' gan' jašag Martan' le'.

31 Na' bene' Jerusalén ca' nita' liž María, bene' cheso'e le' yela' chxenlaže' da' got bene' zanan', cate' besele'ede' gwza' Marian' nach gosa'aclene' le', gosacde' zeje' cho'a blojen' gan' ngaše' zjačeže'.

32 Na' Marían' cate' bžine' gan' zoa Jesúsen' na' ble'ede' le', la' bzoate xibe' lagüen', gože'ne':

—Xana', šaca' zo' nga caten' gocšene da' bene' zanan', bilja gote' šaca'.

33 Na' cate' ble'e Jesúsen' chbež Marían' na' lecze chesebež bene' Jerusalén ca' za'aclene' le', da' juisyw da' goque Jesúsen' na' bžaglagüe' lo' yichjlažda'ogüen'.

34 Na' gože' legaque':

—¿Ga bcuaše'lene'?

Na' gose'e le':

—Xanto', yo'o na' le'edo'.

35 Na' gwchež Jesúsen'.

36 Na' bene' Jerusalén ca' gosene':

—Le na' catequen' chacde' le'.

37 Na' bałe' gosene':

—Bengan' bene' ga ble'e bene' lchojen', na' šaca' gwzoe' nga caten' gocšene Lázarón', benlje' cont bi gote'.

Jesúsen' bosbane' Lázarón' ladjo bene' guaten'

38 Na' da' yoble da' juisyw da' goque Jesúsen' lo' lažda'ogüen'. Na' gwyeje' gan' bosocuaše' ben'. Naquen to bloj na' da' to yej cho'enna'.

39 Na' Jesúsen' gože' bene' ca':

—Le ca'a yejen'.

Na' Martan' bene' zan da' Lázarón' gože'ne':

—Xana', ba chla' ben' zigw, le bach goc tap ža gote'.

40 Na' gož Jesúsen' le':

—Ba gwnia' le' še šejnilažo' neda' na' le'edo' nac Diosen' bene' zaca' juisyw.

41 Nach bene' ca' goseque'e yejen'. Na' Jesúsen' gwne'e yabale na' gwne':

—Xa', choxcleno' ba bzenago' chia'.

42 Nežda' yogo' ni'a chzenago' chia', perw žia' ca' cont bene' ca' že' nga yesejle'e len' gwsejo' neda'.

43 Beyož boļ güiže' Diosen', gwne' zižje, gwne':

—Lázaro, bechoj.

44 Nach la' bechojte Lázarón' ndobyoy ni'a ne'en to cint de lache' na' to bay ndobe cho'alagüen'. Na' Jesúsen' gože' legaque':

—Le yozaše' lachen' na' le gwsane' yeyeje'.

Bosoxi'e yesezene' Jesúsen'

(Mt. 26:1-5; Mr. 14:1-2; Lc. 22:1-2)

45 Na' zan bene' Jerusalén ca' bene' ja'aclene' Marían' besele'ede' yela' guac da' ben Jesúsen' na' gosejnilaže'ne'.

46 Perw baļ bene' Jerusalén ca' ja'aque' lao bene' fariseo ca' na' jaseže' legaque' Jesúsen' bosbane' Lázarón'.

47 Nach bxož gwnabia' ca' che neto' bene' Israel len bene' fariseo ca' bosyotobe' yogo'loļ bene' ca' chesenabia' nación cheton'. Na' bosoxi'e gosene':

—¿Nac goncho? le yela' guac zan chon benga.

⁴⁸ Na' še naxho jayenna', yogo'ze bene' yesejnilaže'ne', na' yesid bene' nación Roma na' yeseque'e yodao' blao chechon' na' yosožiaye'e nación chechon'.

⁴⁹ Na' to bene' gwnabia' zoa ca horen' le' Caifás. Le' naque' b̄xoz blao lo izen'. Na' gože' legaque':

—Le'e gague bi nezele.

⁵⁰ Na' bi chache'ele napan chio' cuent toz ben' gat, clél ca cuiayi' yogo'cho lente nación checho nga.

⁵¹ Gague con ca gwnalaže'ze Caifásen' gwne' ca', san da' naque' b̄xoz blao iznan', Diosen' bene' ga gwne' ca' cont gwdixjue'ede' gat Jesúsen' neche nación cheton'.

⁵² Na' ca nac dan' gaten', gague gate' neche nación cheto' na'zen' san gate' cont yogo' bene' ba gwlej Diosen' yesaque' xi'ine' gate'teze nación, yesaque' txen yesejnilaže'ne'.

⁵³ Ca' goquen', žana' bene' gwnabia' ca' gosezolagüe' bosoxi'e nacle yesone' yesote' Jesúsen'.

⁵⁴ Na' da'nan' Jesúsen' bich gwdacze' con can' nla'ze gan' že' bene' gwnabia' che nación cheton'. Nach gwze'e distritw Judean' na' gwche'e bene' ca' zjanaque' le' txen to yež da' nzi' Efraín da' chi' gala'ze latje dašen', na' besyega'ane' na'.

⁵⁵ Na' ba zoa gala' lni pascw che neto' bene' Israel. Na' bene' zan bene' za'ac to to yež zja'aque' Jerusalénna' cate' za' gala'le lnin' cont yeson cuine' xilaže' can' ža ley cheton'.

⁵⁶ Na' besyeyiljue' Jesúsen' do gan' zoa yodao' blaon' na' cate' bi besyeželde'ne' na' gose' lježe':

—¿Bi chaquele? ¿Güide' lni nga, še bi yide'?

⁵⁷ Gosene' ca' le b̄xoz gwnabia' cheto' ca' na' bene' fariseo ca' ba gosechoguen' še note'tez bene' nežde' gan' zoa Jesúsen' cheyala' gwzende' legaque' cont yesezene' le'.

12

Marian' chgüe'e set zix ni'a Jesúsen' (Mt. 26:6-13; Mr. 14:3-9)

¹ Na' yeḡop ža za' gala' lni pascon', Jesúsen' gwche'e bene' ca' zjanaque' le' txen yež Betanian' gan' zoa Lázaron' ben' bosbane' ladjo bene' guaten'.

² Na' ba' bene' Betanian' bososini'e to xše' da' gwdagw Jesúsen' cont gosonx-ene'ne'. Na' Martan' bdi'e yela' guagw na' Lázaron' gwche'lene' bene' ca' cho'a mesen' txen len Jesúsen'.

³ Na' Marian', de ca do tya set zix che' da' zaca'chgua la'ay na' naquen dogualje da' bchoj lo yag yej da' nzi' nardo. Na' jabigue' gala'ze xni'a Jesúsen' na' gwlo'e set zixen' ni'ena' na' beyoža' bosbižen' len yiša' yichje'. Na' doxen yo'ona' gwla'chguan ze set zixen'.

⁴ Na' Judas Iscariote xi'in' to bene' le' Simón, le' naque' to bene' šižinw ca' zjanaque' Jesúsen' txen, na' len' ba naquen gwdie' Jesúsen' lo na' bene' ca' cheseque'ede' le'. Na' Judasen' gwne:

⁵ —¿Bixchen' bi bete' seten' na' gone' mechon' cont gaclenen bene' yaše'? le zacan' ca no laxjw mos da' gone' gan' tgüiz.

⁶ Judasen' gwne' ca' gague da' beyaše'de' bene' yašen' san da' goque' bene' gwban. Len' beḡue' mechw da' bosochin yogüe' na' gwlejlane' mechon'.

⁷ Nach Jesúsen' gože'ne':

—Bibi ye'ine', le ba bene' da' non gone' len neda' che ža cate' gaša'.

⁸ Bene' yaše' ca' nita'cze' len le'e bate'teze, san neda' bich soacza' yesša len le'e.

Bxoz gwnabia' ca' bosoxi'e yesote' Lázaron'

⁹ Na' bene' zan bene' Israel gualaž cheton' gosenezde' zoa Jesúsen' lagüe' yež Betanian' na' ja'aque', gague cont yesele'ede' Jesús na'zen' san da' gosaclaže' yesele'ede' lencze Lázaron' ben' bosbane' ladjo bene' guaten'.

¹⁰ Na' bxoz gwnabia' che nación Israel cheton' bosoxi'e lecze yesote' Lázaron',

¹¹ le bene' zan bene' Israel ba chesyecuase' len legaque' na' ba chesejnilaže' Jesúsen' dan' gosenezde' bosbane' Lázaron'.

Jesúsen' beyo'e ciuda Jerusalénna' da' yoble

(Mt. 21:1-11; Mr. 11:1-11; Lc. 19:28-40)

¹² Na' beteyo Jesúsen' len bene' ca' zjanaque' le' txen gosa'aque' Betanian' na' ja'aque' Jerusalén. Na' bene' zan chesežag Jerusalénna' da' ba zoa gała' lnin', na' zane' cate' gosenezde' žin Jesúsen' Jerusalénna',

¹³ besežaše' jaseleze' le' zjanoxe' no zin. Na' chesegüe'e lban' che', chesene': —jleca bene' zaca' benga! Mbalaz ben' za' nga nseła' Xancho Diosen' le' cont nabi'e. jMbalaz bene' naque' Rey che nación Israel chechon'!

¹⁴ Na' bžel to burr dao' be gwžia Jesúsen', na' goc can' nyoj Xtiža' Diosen' žan: ¹⁵ Le'e chonxenle Diosen' ciuda Jerusalénna', bi žeble; le na', ba za' Rey chelen' žie' to burr dao'.

¹⁶ Na' bene' ca' zjanaque' Jesúsen' txen gague cate gosejni'ide' chac con can' bosozoj ben' goso'e xtiža' Diosen' cani'. Beyož got Jesúsen' na' goc yogo' da' ca' gosaquen' cont bla'lagüe le Jesúsen' naque' bene' zaca' juisyw, cana'ch jasyeza'laže' diža' ca' da' zjanyoj che Jesúsen' na' gosejni'iden'.

¹⁷ Bene' ca' besele'e cate' Jesúsen' bol güiže' Lázaron' na' bosbane' le' cont bechoje' lo' ban' gosoe'lene' bene' ca' že' lo' ciudan' diža' can' goquen'.

¹⁸ Na' da'nan' bene' zan jaseleze' Jesúsen' da' ba gosende' diža' che yela' guac dan' bene' bosbane' Lázaron'.

¹⁹ Nach bene' fariseo ca' gose' lježe':

—Ba chle'ele bibi chac bi goncho. Yogo'ze bene' ba chosozenague' che'.

To chope bene' griego gosenabe' yesoe'lene' Jesúsen' diža'

²⁰ Na' zjalen to chope bene' griego bene' ca' ja'aque' gosonxene' Diosen' lo lnin'.

²¹ Na' bene' ca' besežine' gan' zoa Felipen' ben' nac bene' Betsaida ga mbane distritw Galilean', na' gose'ene':

—Si'xenšco', chaclaže'to' güe'lento' Jesúsen' diža'.

²² Na' Felipen' gwyeye' jane'e Andrésen' nach choptie' jaseže' Jesúsen' ca'.

²³ Nach Jesúsen' gože' legaque':

—Na'a ba bžin hor gac yogo'lol da' cheyala' gac cont la'lagüe naca' bene' zaca' juisyw.

²⁴ Žia' to da' zejen, še to trigon' bi yexinjen cate' lažon' lo yon', con chega'ancze tozen; perw še yexinjen na' yelan', da' zan trigon' gonen.

²⁵ Note'tez bene' con chi' yichje' gac güen čhegaque' yežlio nga, bene' ca' yesebiaye'e. Na' note'teze bene' chesene' bibi nonen še bi gac čhegaque' yežlio nga, šjasyezoe' len Diosen' toli tocaņe.

²⁶ Na' note'tez bene' chesaclaže' yesone' xšinan', cheyala' yesejnilaže' neda' na' yosozenague' čhia'. Na' gan' soa' neda' lecze na' yesezoa bene' ca' yeson xšinan'. Note'tez bene' yeson xšinan', Xan' gone' cont yesacxene'.

Jesúsen' gwdixjue'ede' yesot bene' le'

²⁷ 'Ba chžaglagua' lo' yichjlažda'oguan'. ¿Chaquele nabda' Xan' yosle' neda' lo' da' ca' ba zoa gac chia' na'a? Bitw gona' ca', le za'a cont gac chia' yogo' da' ca'.

²⁸ Nach bol güiže' Diosen', gwne':

—Xa', ben len neda' cont yesacbe'e bene' naco' bene' zaca' juisyw.

Beyož gwne' ca' na' gwne' Dios ben' zoa yaban', gwne':

—Ba bena' len le' cont chesacbe'e bene' naca' bene' zaca' juisyw na' za' goncha' ca' yeto.

²⁹ Na' zan bene' ca' že' na' gosende' dan' gwna Diosen' na' gosene' gwzion' gwne. Na' yebale' gosene':

—To angl gwne' le'.

³⁰ Na' Jesúsen' gwne':

—Diosen' gwne' neda' zižje gague cont nežda' neda' chzenague' chia' san cont neze le'e.

³¹ Ba bžin ža Diosen' chogbi'en' che bene' ca' bi chesejle'e chia'. Na' ba bžin ža Satanás dan' chnabia' da' xigüe' ca' na' dan' chnabia'te bene' ca' bi chosozenag che Diosen' solao nit yela' chnabia' chen.

³² Na' cate' yesejise' neda' to le'e yag, cana'ch gona' cont zan bene' že' doxen lo' yežlion' yesejnilaže' neda'.

³³ Gwne' ca' cont gosenežde' yesot bene' le' yosode'ene' to le'e yag cruz.

³⁴ Na' bene' ca' že'na' clele gosejni'ide' dan' gwnen' na' gose'e le':

—Ba beneto' can' ža Xtiža' Diosen' da' nyojen, na' nežeto' žan Cristo ben' seļa' Diosen' yedenabi'e nación chechon' soe' toli tocaņe. Na' le' žbixchen' žo' naco' bene' gwsela' Dios goljo' beñač na' žo' yesote' le' to le'e yag cruz še ca'? ¿Nox naco' šaca'?

³⁵ Nach Jesúsen' gože' legaque':

—Yešlož da'ozen' soa' len le'e, neda' nsa' be'ni' che yichjlažda'olen'. Le gwzenag chia' šlac ne' de latje šo' be'ni' chian' lo' yichjlažda'olen', cont bi cuiayi'lenle da' mal dan' chnabia' le'e. Ben' chda gan' nac choj bi chacbe'ede' gan' zeje'. Can' naquen len le'e.

³⁶ Le šejnilaže' neda' šlac ne' zoa' len le'e, cont šo' be'ni' chian' lo' yichjlažda'olen'.

Gwde gwna Jesúsen' ca' beze'e na' bcuaše'de' legaque'.

Zan bene' Israel bi gosejnilaže' Jesúsen'

³⁷ Na' la'czla' bene' Israel gualaž cheto' ca' besele'ede' ben Jesúsen' da' zan yela' guac, zane' bi gosejnilaže'ne'.

³⁸ Goc can' bzoj da' Isaíasen' ben' be' xtiža' Diosen' cani', gwne':

Xanto', nono chejle' diža' dan' chyixjue'eton',

na' nono chesacbe'e blo'o yela' guac chion'.

³⁹ Bi goc yesejle'e, le goc chegaque' can' ža yeto dan' bzoj da' Isaíasen', žan:

⁴⁰ Diosen' bene' cont bi gosejni'ide' na' cont zjanaque' bene' güedena.

Ba bene' cont chesele'ede' na' bi zjaņežde' bi zejen,

na' bi chesacbe'ede' lo' yichjlažda'ogaque' bi zejen dan' chlo'ede' legaque'.

Šaca' chesejni'ide' na' chesacbe'ede' bi zejen dan' chlo'eda' legaque',

ba besyetiņjde' na' ba beca' xtoļa'gaquen' šaca'.

⁴¹ Da' Isaíasen' gwne' ca' da' ble'ebande' nac Jesúsen' bene' zaca' juisyw nach be'e diža' che'.

⁴² Na' la'czla' zanch bene' Israel gualaž cheto' ca' bi gosejnilaže' Jesúsen', bia'cze bene' zan na' len no bene' gwnabia' cheto' gosejnilaže'ne', perw bi

goso'e diža' chesejnilaže'ne' le besežebe' bich yosoleb beṇe' fariseo ca' legaque' lo' yodaon'.

⁴³ Gosaclaže'che' yesenite' binlo len beṇachen' clel ca' yesenite' binlo len Diosen'.

Xtiža' Jesúsen' naquen da' žialao

⁴⁴ Nach Jesúsen' gwne' zižje gože' beṇe' ca' že'na':

—Beṇe' chesejnilaže' neda' gague neda'zen' chesejnilaže' san lente Xan' ben' gwsela' neda'.

⁴⁵ Na' beṇe' chne'e neda' chle'ede' beṇe' gwsela' neda'.

⁴⁶ Neda' za'a yežlio nga chgua'a be'ni' lo' yichjlaždao' beṇe' ca' chesejnilaže' neda', cont bi yesenite' yesonche' da' malen'.

⁴⁷ Na' note'tez beṇe' nezde' can' ba gwnian' na' bi chzenague' čhia', gague neda' gwnežjua' castigw che xtolen', le bi za'a yežlion' cont gwnežjua' castigw che xtoła' beṇachen', san za'a cont gwnežjua' yela' mban toli tocaṇe che beṇe' yesejnilaže' neda'.

⁴⁸ Perw de da' čhoglaon che beṇe' ca' bi chesejnilaže' neda' na' bi chosozenague' che dan' ba gwnian', xtižan' dan' ba bian', lenna' čhoglaon che beṇe' ca' zjanape' doła' cate' žin ža te che yežlion'.

⁴⁹ Gague bia' diža' to gualaza', san Xa' ben' gwsela' nedan' none' mandadw bin' cheyała' nia' na' bin' cheyała' gwsed gwlo'eda'.

⁵⁰ Na' nezda' dan' none' mandadw nia' nsan' yela' mban toli tocaṇe che beṇe' yosozenag čhen. Na' da' li, con can' ža Xan', can' choe'lena' le'e diža'.

13

Gwdib Jesúsen' ni'a beṇe' ca' zjanaque' le' txen

¹ Na' Jesúsen' ba nezde' ba bžin ža yeze'e yežlion' na' yeyeje' gan' zoa Xe' Diosen', na' gocde' yogo' beṇe' ba chejnilaže' le' lo' yežlio nga. Da'n'an' za' gala' lni pascon' bzejni'ide' beṇe' ca' zjanaque' le' txen, le chacyane'czede' legaque'.

² Bač gwlo'o Satanásen' xbab lo' yichjlaždao' Judas Iscariote, ben' nac xi'in to beṇe' le Simón, cont gwdie' Jesúsen' lo' na' beṇe' ca' chesegue'ede' le'. Na' ba zjanite' chesagüe' xše'.

³ Na' Jesúsen' nezde' Xen' ba bene' cont nape' la'zelagüe yela' chnabia', na' nezde' gan' zoa Diosen' gwze'e na' gan' zoe' nan' yeyeje'.

⁴ Da'n'an' gwžože'e cate' ba chesyedagüe' xše' na' gwlečhje' xe' da' nyaze' cha'le na' gwxi'e to lache' da' bčhej lsinen'.

⁵ Nach gwxi'e nis na' gwde'en to lo' ša' na' gwzologüe' gwdibe' ni'a beṇe' ca' zjanaque' le' txen ca to mos, na' bosbiže' ni'agaquen' len lachen' nčhej lsinen'.

⁶ Na' cate' ba zoa čhibe' ni'a Simón Pedro, Pedron' gože'ne':

—Xana', žle' čhibo' ni'an'?

⁷ Na' Jesúsen' gože'ne':

—Dan' chona' nga bi chejni'idon' na'a, perw gwžin ža cate' šejni'idon'.

⁸ Na' gož Pedron' le':

—Gwbat gua'a latje čhibo' ni'an'.

Jesúsen' gože'ne':

—Še bi čhiban', bich gaco' txen len neda'.

⁹ Na' Pedron' gože'ne':

—Xana', gague ni'a na'zen' čhibo' še ca', san doxena'.

¹⁰ Nach gož Jesúsen' le':

—Bene' noša' nazje', ni'e na'zen' chyažjen chibe', le doxen cuerp chen' naquen xilaže'. Can' nac le'e, nac lažda'olen' xilaže', la'czla' gague yogo'le.

¹¹ Jesúsen' gwnežde' non' gwde' le' lo na' bene' chesegue'ede' le'. Da'nan' gwne': "Gague yogo'le nac lažda'olen' xilaže."

¹² Na' cate' beyož gwdbibe' ni'a yogüe', nach beyaze' xe' dan' chaze' cha'le na' bebi'e da' yoble cho'a mesen'. Na' gože' legaque':

—¿Chejni'ile bi zejen dan' ba bena' nga len le'e'?

¹³ Le'e nsi'le neda' Maestrw na' Xanle, na' güenczen' žale, le can' naca'.

¹⁴ Na' neda' la'czla' naca' Xanle na' Maestrw chele, ba gwdbiba' ni'alen' ca to mos, na' can' cheyala' gaclen lježle ca to mos.

¹⁵ Ba gwdbiba' ni'alen' cont blo'eda' le'e cheyala' gonle can' ba benan'.

¹⁶ Chnia' le'e to da' zejen, note'teze mos bi naque' bene' blaoch ca xane', na' to bene' zej mandadw bi zaca'che' ca bene' gwseła' le'.

¹⁷ Še chejni'ile da' quinga na' gonle can' gwnian', nach soale mbalaz.

¹⁸ 'Bi žia' ca' che yogo'le. Nombi'a yichjlaždao' to to le'e ba gwleja' cont soale txen len neda'. Na' nezda' gac can' ža Xtiža' Diosen' da' nyojen žan: "Bene' gwdagw len neda' txen ba blej bšošje' neda'."

¹⁹ Chnia' le'e da' quinga cate' za' gac ca' cont cate' ba goc ca' soačhačhle šejle'le le naca' ben' gwseła' Diosen' can' ba gwnia' le'e.

²⁰ Chnia' le'e to da' zejen, bene' ca' chosolebe' note'tez bene' chseła', neda'czen' chosolebe' še ca', na' bene' chosolebe' neda' lecze chosolebe' Dios bene' gwsele' neda'.

Jesúsen' gwne' toe' gwdie' le' lo na' bene' ca' chesegue'ede' le'

(Mt. 26:20-25; Mr. 14:17-21; Lc. 22:21-23)

²¹ Beyož gwna Jesúsen' ca' ba gwzolao chacyaše'chgüede' lo' yichjlažda'ogüen', na' bochixgaten' gwne':

—Da' li chnia' le'e, to le'e gwdelenda' lo na' bene' chesegue'e neda'.

²² Na' bene' ca' zjanaque' le' txen con chesena' cho'alao lježe' chesone' xbab che noen' gwne' ca'.

²³ Na' toe' chi'e cuiten' dan' chaquechgüe' Jesúsen' le'.

²⁴ Nach Pedron' bene' señw len bena' cont gwñabde' Jesúsen' no chen' gwne' ca'.

²⁵ Nach gwbigue' bago gože' Jesúsen':

—¿Non' gon ca'?

²⁶ Na' gož Jesúsen' le':

—Bena' gwnežjua' late' yetextilen' cate' ba blo'ojan' lo' nis yela' guagon', le'na' gon ca'.

Nach blo'oje' late' yetextilen' lo' nis yela' guagon' na' bnežjuen' Judas Iscariote bene' nac xi'ın to bene' le' Simón.

²⁷ Na' beyož bnežjue' Judasen' yetextilen' la' gwyo'o gwyazte Satanás dan' chnabia' da' xigüe' ca' lo' yichjlaždao' Judasen'. Nach Jesúsen' gože' Judasen':

—Da' ba zoa gono' benen' bedao'nez.

²⁸ Na' ne to ben' zjachi' cho'a mesen' bi gosejni'ide' bixchen' gože' le' ca'.

²⁹ Bale' gosacde' da' noxe' Judasen' bols mechon' Jesúsen' gože' le' šjaxi'e da' cheseyažjde' lo' ınin' o šjanežjue' mechw da' chyažje no bene' yaše'.

³⁰ Nach cate' beyož gwdagw Judasen' pedas yetextil dan' bnežjw Jesúsen' le', la' bchojte'. Na' ba nac ba goļ gual.

To da' cobe da' non Jesúsen' mandadw goncho

³¹ Gwde bchoj Judasen', Jesúsen' gwne':

—Diosen' gwsele' neda' golja' bena_{ch} na' na'a ba nla'laon naca' bene' zaca' juisyw, na' neda' lecze ba chlo'a Diosen' naque' bene' zaca' juisyw.

³² Na' dan' chlo'a naque' bene' zaca', lecze le' gwlo'e naca' bene' zaca', na' la' gontien' na'a.

³³ Xi'inda'ogua', yešložga soa' len le'e. Na' yeyiljwle neda', na' chnia' le'e dan' goša' bene' gwnabia' che nación Israel chechon', bi gac sa'lenle neda' gan' yeya'an.

³⁴ Na' to da' cobe chžia' bia' gonle, gaque lježle tole yetole. Can' chacda' le'e, lecz can' cheyala' gaque lježle tole yetole.

³⁵ Na' yeseneze yogo'lol bene' nacle neda' txen še soacze gaque lježle tole yetole.

Jesúsen' gwne' Pedron' bi chebe' nombi'ene'
(Mt. 26:31-35; Mr. 14:27-31; Lc. 22:31-34)

³⁶ Na' Simón Pedron' gože' Jesúsen':

—Xana', ¿gan' yeyejo'?

Na' gož Jesúsen' le':

—Gan' yeya'an bi gac sa'leno' neda' na'a, perw techle yido' ga'oguo' neda'.

³⁷ Na' Pedron' gože' le':

—Xana', ¿bixchen' bi gac sa'lena' le' na'a? Gwzanlaže' cuina' gata' še chonen byen cont gaclena' le'.

³⁸ Na' gož Jesúsen' le':

—¿Chacdo' gwzanlaže' cuino' gato' cont gacleno' neda'? Da' li chnia' le', cate' cuež jean' ba goc šon' ni'a bi chchebo' nombi'o neda'.

14

Bene' chesejnilaže' Jesúsen' lecze zjanombi'e Xe' Diosen'

¹ Bich gacžejaže' le. Le šejnilaže' Diosen' na' lecze le šejnilaže' neda'.

² Da' zan yo'o da' že' gan' zoa Xa' Diosen'. Ba gwnia' le'e šaca' bibi latje de chele, san yeya'a šjayenšagua' yo'o che to tole.

³ Na' cate' yeyož šjayenšagua' yo'o chele ca', cana'ch yida' da' yoble yečhi'a le'e cont yedyezoale gan' šjayzoa' neda'.

⁴ Nezele gan' yeya'an' na' ba nezele nac gonle cont yežinle na'.

⁵ Na' gož Tomásen' le':

—Xanto', bi nezeto' gan' yeyejo'. ¿Nacxe gac nezeto' nac gonto' yežinto' na'?

⁶ Jesúsen' gože'ne':

—Neda' naca' nezen' na' nsa'a yogo' diža' li, na' toz neda' chac chnežjua' bene' yela' mban toli toca_{ne}. Ne toze bene' bi yežine' gan' zoa Xan' še bi šejnilaže' neda'.

⁷ Še nombia'yane'le neda', lente Xan' ba nombia'le še ca'. Na' ba_{ch} nombia'line' na'a na' ba ble'elne'.

⁸ Na' gož Felipen' le':

—Ben cont le'eto' Xaon', lezen' chnabeto' le'.

⁹ Jesúsen' gože'ne':

—Felipe, šša xen ba gwzoa' nga len le'e na' ¿bina' gombi'o neda'? Note'tez bene' ba ble'e neda' lencze Xan' ba ble'ede'. ¿Bixchen' chnabo' gona' cont le'ele Xan'?

¹⁰ ¿Bi chejli'o zoa' len Xan' na' le' zoe' len neda'? Diža' da' choa' len le'e bi choan' to gualaza'. Xa' nan' zoe' len neda' na' len' chone' cont choa' dižan' chaclaže' gua' na' chona' bi da' chaclaže' gona'.

11 Le šejle' chia' zoa' len Xan' na' le' zoe' len neda'. Na' še bi chejle'le xtižan', le šejle' chia' dan' ba ble'ele chona' yela' guac.

12 Na' chnia' to da' zejen, bene' ca' chesejnilaže' neda', da' ca' chonan' lecze legaquen yesone'. Na' da' zaca'ch ca da' ca' yesone', le yeya'a gan' zoa' Xan'.

13 Na' bite'te'ze da' nabele Xan' lagüe da' chejnilaže'le neda' naca' Xi'ine', gonan', cont gwlo'a nac Xan' bene' zaca' juisyw.

14 Bite'tez da' nable gona' lagüe da' chejnilaže'le neda', neda' gonan'.

Jesúsen' gwne' sele' Spiritw che Diosen'

15 Še chaquele neda', gonle can' nona' mandadw.

16 Na' nabda' Xan' cont sele' Spiritw chen' soan len le'e toli tocañe na' gacalen le'e. Na' Spiritw che Diosen' gwzejni'in le'e da' nac da' li.

17 Na' bene' bi chesejnilaže' Diosen', Spiritw chen' bi gac soan len legaque', le bi chesele'eden' na' neca chesejle'e še zoon. San le'e nombia'len, le zoon len le'e na' gwžin ža yedesoa lo' yichjlažda'olen' nabian' le'e.

18 Bi yocua'ana' le'e ca bi' güezebe. Güidcza' yeto gan' zoale nga.

19 Yešlož bene' ca' bi chesejnilaže' Diosen' bich yesele'ede' neda', perw le'e gwle'eczele neda'. Na' da' zoa' toli tocañe, da'nan' soale toli tocañe.

20 Na' cate' žin ža yedesoa Spiritw che Diosen' lo' yichjlažda'olen', cana'ch gache'ele neda' zoa' len Xan' na' le'e zoale len neda' na' neda' len le'e.

21 Bene' zjanezde' dan' nona' mandadw yesone' na' chesonen', bene' ca' chesacde' neda'. Na' bene' ca' chesacde' neda' lecze chaque Xan' legaque', na' neda' lecze soa' gacda' legaque' na' gona' cont yesombia'che' neda'.

22 Na' Judas (perw gague Judas Iscariote) gože'ne':

—Xanto', žbixchen' gono' cont neto' nezeto' zoaczo' len neto' na' bi gono' ca' len bene' bi chesejnilaže' Diosen'?

23 Na' Jesúsen' gože'ne':

—Bene' chesacde' neda' chosozenague' xtižan', na' Xan' lecze gacde' legaque' na' neda' len xan' yedesoa to' len legaque'.

24 Bene' bi chesacde' neda' bi chosozenague' xtižan'. Na' diža' dan' chnian' bi cho'an to gualaza' san cho'a diža' da' ža Xan' ben' gwseła' neda'.

25 Da' quinga ba gwnia' le'e šlac ne' zoa' len le'e.

26 Na' Xan' sele' Spiritw chen' soan lo' yichjlaždao' le'e chejnilaže'le neda' cont gacalen le'e. Na' Spiriton' gwzejni'in le'e yogo' da' cheyała' nezele na' gonon cont šjayza'laže'le yogo' dan' ba gwnia' le'e.

27 Na' hcua'ana' le'e na' chona' cont soa cuezle binlo len xbab chelen'. Chaclača' soa cuezle binlo len xbab chelen' can' zoa' neda'. Nono benach gac gone' cont soa cuezle binlo len xbab chelen' can' chac chona' neda'. Bi gacžejlaže'le, neca žeble.

28 Ba benele gwnia' yeya'a gan' zoa' Xan' na' yida' da' yoble gan' zoale nga. Na' ša chaquelenda' ca cheyała', nach chebele dan' yeya'a gan' zoa' Xan', le Xan' zaca'che' ca neda'.

29 Na' ba gwnia' le'e na'a bibi na' gac, cont soachachle šejnlaže'le neda' caten' gac ca'.

30 Bich gua'a diža' zan len le'e, le ba za' Satanás dan' chnabia' da' xigüe' ca' na' dan' chnabia'te bene' ca' bi chesejnilaže' neda', na' til'lenen neda', perw bi gonon neda' gan'.

31 Chona' con can' non Xan' mandadw cont neze benachen' chacda' Xan'. Le šo'o na'a, ba gole šejcho.

15

Jesúsen' zaca'lebe' ca to yag da' chbia uvas

1 'Neda' zaca'leba' ca to yag da' chbia uvas. Na' Xan' zaca'lebe' ca bene' chonši'i yaguen'.

2 Na' le'e chejnilaže'le neda' zaca'leble ca xoze' yaguen'. Na' to to xoze' yaguen' da' bibi chbian, chhoguen'. Na' to to xozen' da' chbia uvasen' chpe'en cont chbiachen da' zanch.

3 Na' le'e ba nacle ca to xozen' da' ba mpe'e, le baçh chzenagle xtižan' dan' ba be'lena' le'e.

4 Le soaçaçh len neda' cont soaçaça' len le'e. Can' nac xoze' yaguen' bibi chac cuian to gualazen še bi nca'an le'e yaguen', can' naquen len le'e, bi gacle can' chazlaže' Diosen' še bi soaçaçhle len neda'.

5 'Neda' zaca'leba' ca to yag da' chbia uvas na' le'e zaca'leble ca xozen'. Note'tezle še soaçaçhle len neda' lecze soaçaça' len le'e na' gacle can' chazlaže' Diosen', ca'aczen' nac che yag uvazen' dan' chbiachgua, le bibi gac gonle to gualazle.

6 Bene' bi zoaçaça' len neda', gac che' can' chac len xoze' yag da' bibi chbia, le cheseçhoguen' na' chesebižen na' chžin ža chosotoben' chesadoen' yi' cont cheseyēn.

7 Na' le'e še zoaçaçhle len neda' na' zoaçaçhle chzenagle xtižan', bite'tez da' chaclaže'le nabele Diosen', gonçzen'.

8 Chacxen Xan' cate' zoale chonçgual dan' chazlažen', na' še chonle ca', yesacbe'e bene' da' li chejnilaže'le neda' na' chzenagle chia'.

9 Ca Xan' chacde' neda', lecz ca' neda' ba chacda' le'e. Le soa le gon can' žia' cont gache'ele chacda' le'e.

10 Še gonle can' nona' mandadw, nachen' gache'ele chacda' le'e, le neda' chona' dan' non Xan' mandadw na' chacbe'eda' chacde' neda'.

11 'Ba gwnia' le'e ca' cont soale mbalaz ca mbalazen' zoa' neda'. Chaclaža' soale mbalaz juisyw.

12 Na' da' nga nona' mandadw gonle, gaque lježle tole yetole can' chacda' neda' le'e.

13 Nono zoa bene' chaquech lježe' ca bene' chzanlaže' cuine' gate' neche bene' migw che'. Na' can' chona' neda'.

14 Na' le'e nacle migw chia' še chonle con can' nona' mandadw.

15 Na' bich žia' nacle bene' güen žin chia', le to bene' güen žin bi neзде' yogo' da' chon xanen', san žia' nacle migw chia'. Le yogo'lol da' ba benda' gwna Xan' ba bzejni'idan' le'e.

16 Gague le'e gwlejle neda' naca' Xanle. Neda' gwleja' le'e cont chejnilaže'le neda'. Na' chseļa' le'e cont šjenle can' chazlaže' Xan', na' gague da' te che da' ca' gonlen'. Na' yogo'lol da' nabele Xan' gone' lagüe da' chejnilaže'le neda', gonçzen'.

17 Da' nga da' chona' mandadw gonle, gaque lježle tole yetole.

Bene' bi chesejnilaže' Diosen' chesegue'ede' bene' chosozenag che Jesúsen'

18 'Še bene' bi chesejnilaže' Diosen' chesegue'ede' le'e, le gon xbab ba chesegue'eczedē neda' cate' za' yesegue'ede' le'e.

19 Ša nacle txen len bene' ca' bi chesejnilaže' Diosen', nachen' yesacde' le'e can' chesaque' bene' lježen' šaca'. Perw ba gwleja' le'e cont chzenagle chia'. Da'nan' chesegue'ede' le'e da' bi nacle legaque' txen.

²⁰ Le šjasa'laže' dan' gwnia' le'e: "Note'teze mos bi naque' blaoch ca xanen'." Bosochi bososaca' bene' neda', na' lecz ca' yesonde' le'e. Na' balze bene' bosozenague' xtižan', lecze balze' yosozenague' xtiža'len'.

²¹ Na' da' bi zjanombi'e Diosen' ben' gwseła' neda', da'nan' yesonde' le'e yogo' da' ca', le cheseague'ede' le'e da' chzenagle chia'.

²² 'Ša neda' bi bedezejni'ida' legaue', bi zjanape' doła' da' cheseague'ede' neda' šaca'. Perw na'a bibi de da' yosode'ede' yesene' bi zjanape' doła'.

²³ Bene' chgue'ede' neda' lente Xan' chgue'ede'.

²⁴ Ba bena' yela' guac da' nono nochle na' gon, na' šaca' bi besele'eden' bi zjanape' doła' da' cheseague'ede' neda'. Perw ba besele'ede' da' ca' na' bia'cze cheseague'ede' neda' len Xan'.

²⁵ Na' chac can' nyoj Xtiža' Diosen' dan' chososed' gan' žan: "Besegue'ede' neda' la'czła' bibi da' mal bena'."

²⁶ 'Ba gwnia' le'e seła' Spiritw che Xa' Diosen' gaclenen le'e. Spiriton' san' gan' zoa Xan' na' gwzejni'in le'e diža' li chia' neda'.

²⁷ Na' lecz ca' le'e cheyała' güe'le xtižan', le ba gwzoale len neda' šlac ba gwdixjue'eda' xtiža' Xa' Diosen'.

16

¹ 'Ba gwnia' le'e yogo' da' ca' cont bi gacžejlaže'le.

² Le yesyebeje' le'e lo' yodao' chegaue' ca', na' gwžin ža cate' note'tez bene' yesote' le'e yesacde' chebe Diosen' dan' chesonen'.

³ Yesonde' le'e yogo' da' ca' le bi zjanombi'e Xan' neca neda'.

⁴ Žia le'e da' quinga cont cate' žin ža gac can' gwnian' nach šjaze'ele.

Da' chon Spiritw che Diosen'

'Bi gwnia' le'e yogo' da' ca' gac chele cate' za' gwzolao bzejni'ida' le'e xtiža' Diosen', le ne' zoacza' chaclena' le'e.

⁵ San na'a yeya'a gan' zoa Xan' ben' gwseła' neda', na' ne tole bi chnabele neda' gan' yeya'a.

⁶ Na' ba chacyaše'le dan' ba gwnia' yeya'a.

⁷ Perw da' li napen le'e cuent yeya'a, le še bi yeya'a, Spiritw che Xa' Diosen' dan' gaclenen le'e bi yedesoa lo' yichjlažda'olen'. Na' yeya'a nach sełan' len le'e.

⁸ Na' cate' yid Spiriton' gwzejni'in benachen' zjanape' doła', na' gwzejni'in non' nac bene' güen len Diosen', na' gwzejni'in gata' castigw toli tocañe che bene' bi chosozenague' chia'.

⁹ Spiriton' gwzejni'in legaue' zjanape' doła' da' bi chesejnilaže' neda'.

¹⁰ Na' gwzejni'in legaue' non' nac bene' güen len Diosen', le yeya'a gan' zoa Xa' Diosen' na' le'e bich le'ele neda'.

¹¹ Na' gwzejni'in legaue' gata' castigw che xtola'gaquen' toli tocañe, le Satañas dan' chnabia' da' xigüe' ca' na' dan' chnabia'te bene' ca' bi chesejnilaže' Diosen' ba nchoglaon chen gwnežjw Diosen' castigw chen toli tocañe.

¹² 'Ne' dech da' zan da' nia' le'e, perw naquen zdebe šejni'ilen na'a.

¹³ San cate' yedesoa Spiritw che Diosen' lo' lažda'olen' cont gwzejni'in le'e da' nac da' li, len gwsed gwlo'en le'e yogo' da' cheyała' nezele chia', le Spiriton' chnen diža' li. Bi güe'en diža' to gualazen, san güe'en bite'tez diža' da' chzene Xan' len, na' chixjue'en le'e bica' da' za' za'ac.

¹⁴ Spiriton' gonen cont gwlo'elaon naca' bene' zaca' juisyw, le gwzejni'in le'e xtiža'.

15 Xan' ba bene' cont ne zda' yogo' da' ne ze le', na' da' nan' gwnia' Spiriton' chixjue'en le'e xtižan'.

Jesúsen' gwne' šložze yesacyaše'de' na' techle yesyebede'

16 Šlož bi le'ele neda', na' te yešlož na' yezle'ele neda' da' yoble, le yeya'a gan' zoa Xan'.

17 Na' ba le bene' ca' zjanaque' Jesúsen' txen gose' lježe':

—¿Bi zejen dan' che'e chio' te yešlož na' bich le'echone' na' techle lecze yešlož na' yezle'echone' da' yoble? Na' ¿bi zejen dan' že' yeyeje' gan' zoa Xen'?

18 ¿Bi zejen dan' že' yešlož? Bi chejni'icho bin' že'.

19 Jesúsen' gocbe'ede' chesaclaže' yesenabde'ne' bi zejen, na' gože' legaque':

—¿Ba chnabe lježe bi zejen dan' gwnia': "Yešlož na' bich le'ele neda' na' techle lecze yešlož na' yezle'ele neda' da' yoble"?

20 Da' li chnia' le'e ba zoa cuežle na' yegüine'le šlac be ne' ca' bi chesejnilaže' Diosen' yesyebede'. Yeyaše'laže'le, perw šložzen' na' techle yebele.

21 Cate' chzan no'olen' chžaglagüe' šlac chaque' bes che yela' sanna'. Na' cate' ba golje bda'ona' bich chone' xbab che dan' bžaglagüen', le chbede' ba golje yeto benach yežlio nga.

22 Lecze ca' le'e ba chacyaše'le na'a, perw cate' yežagcho da' yoble soachle mbalaz na' nono gac yeca'a yela' chebe chelen' lo' yichjlažda'olen'.

23 Na' cate' ba bžin ža šjayzoa' da' yoble gan' zoa Xan', cana'ch bich yažjele bi nable gwzejni'ida' le'e. Da' li chnia' le'e, da' chejnilaže'le neda' bite'tez da' nabele Xan', gončen' le'e.

24 Ža na'aža bibi na' nabele Xan' ye'ine' chnablen da' chejnilaže'le neda'. Na' na'a le nabe Xan' bi da' nabelene' ye'ine' ca', na' gone' can' nabelenen' cont soale mbalaz juisyw.

Criston' ba bene' cont yenit yela' chnabia' che gwxiyen'

25 Da' zan ba gwnia' le'e len jempl. Gwžin ža cate' bich gwzejni'ida' le'e len jempl, san gua'a diža' da' šejni'ile cate' gwzejni'ida' le'e che Xan'.

26 Na' cate' ba bžin žana', cana'ch nabele Xan' bi da' nabelene' ye'ine' chnablen da' chejnilaže'le neda'. Na' bi yažjen nabda' Xan' gačlene' le'e.

27 Le cuince Xan' chacde' le'e dan' chaquele neda' na' chejle'le gwsele' neda'.

28 Gan' zoa Xa' Diosen' gwza'a na' ba bida' yežlio nga. Na' na'a yeza' yežlio nga na' yeya'a gan' zoa Xan'.

29 Nach gose'ene':

—Bač cho'o diža' da' chejni'ito' na' bi cho'o jemplw.

30 Ba chacbe'eto' nombi'o yogo' xbab che benachen'. Ba nezledo' bi chesaclaže' be ne' yesenezde' cate' bina' yesenaben'. Da'nan' bač chejle'to' zao' gan' zoa Diosen'.

31 Na' gož Jesúsen' legaque':

—¿Ba chejle'le na'a?

32 Ba bžin ža na' na'a ba gole' gaslasle. To tole ca'a xnez che chele na' gwcu'ane toza'. Perw bi zoa' toza', le zoa Xan' len neda'.

33 Ba gwnia' le'e ca' cont soa cuezle binjo'len xbab chele, le chejnilaže'lenda'. Yežlio nga saca'zi'le, perw bi gacžejlaže'le, neda' ba bena' cont yenit yela' chnabia' che gwxiyen' dan' zoa na'a chnabian' yežlio nga.

17

Jesúsen' gwnabde' Diosen' gaclene' bene' ca' zjanaque' le' txen

¹ Beyož gwna Jesúsen' da' ca' nach gwne'e yabale na' gwne':

—Xa', ba bžin hor gac chia' dan' ba bžio' bia' gac. Ben cont nacia' nedan' Xi'ino' naca' bene' zaca' juisyw cont neda' gona' ga gacia' le' naco' bene' zaca' juisyw.

² Ba beno' neda' yela' chnabia' lao yogo' benach cont chnežjua' yela' mban toli tocané che yogo' bene' ca' ba gwlejo' chesejnilaže' neda'.

³ Na' bene' ca' zjanape' yela' mban toli tocané zjanombi'e le', le tozon' zaco' gonxento' na' lecze zjanombi'e neda' Jesucristw bene' gwselo'.

⁴ Lo yežlion' ba bena' cont nacia' naco' bene' zaca' juisyw, le ba beyož bena' yogo' lo' da' gwlo' o lo' na' gona'.

⁵ Na' na'a Xa', ben cont la'laon naca' bene' zaca' juisyw cate' yela' a gan' zon', doxen can' blo'elaon cate' gwzoa' len le' cate' za' xete yežlion'.

⁶ Ba gwlejo' ba' benach chesejnilaže' neda', na' bach blo'eda' legaque' can' naco' na' can' chonon'. Zjanaque' xi'ino' na' beno' cont chesejnilaže' neda' na' chesone' can' zon'.

⁷ Na' ba zjanезде' yogo' lo' da' chona' na' yogo' diža' da' choa' zjanaquen chio' le'.

⁸ Le ba be'lena' legaque' diža' dan' ba bzejni'ido' neda' na' ba bosozenague' čen, na' ba chesacbe'ede' da' li gwza' a gan' zon', na' chesejle'e le' len' gwselo' neda'.

⁹ Čhnaba' gacleno' legaque'. Bi čhnaba' gacleno' yogo' benach, san gacleno' bene' ca' gwlejo' chesejnilaže'nda' le' ba zjanaque' lo' nao'.

¹⁰ Na' yogo' bene' chesejnilaže' neda' lecze chesejnilaže' le'. Na' ca'cze naquen, note'tez bene' zjanaque' xi'ino' lecze zjanaque' xi'ina', na' bene' ca' chesejnilaže'nda' chosolo'e naca' bene' zaca' juisyw.

¹¹ Na' na'a bich soa' yežlio nga, perw bene' quinga chesejnilaže' neda' nita'cze' yežlio nga, na' neda' ba zeza' gan' zo'na'. Xa', naco' la'zelagüe bene' laždao' xilaže', na' čhnaba' gwčhino' yela' chnabia' chio' cont gwcuas gwcuizo' da' malen' len legaque' cont nita'cze' yesaque' toze len lježgaque', ca chio' naccho toze.

¹² Šlac ba gwzoa len legaque', neda' ba bčhina' yela' chnabia' čhion' cont bcuas bcuiža' da' malen' len legaque'. Da'nana' ne toe' bi gwžiai', con toz ben' ba naquen cuiaye'e cont gac doxen can' ža Xtižo' dan' nyojen.

¹³ Na' na'a ba zeza' gan' zon', na' šlac ne' zoa' yežlio nga cho'a diža' quinga cont bene' qui nita'chgüe' mbalaz ca mbalazen' zoa' neda'.

¹⁴ Neda' ba be'lena' legaque' xtižon', na' bene' ca' bi chesejnilaže' le' chesegue'ede' legaque' dan' bi chesone' txen len legaque', ca' neda' bi naca' txen len bene' ca' bi chesejnilaže' le'.

¹⁵ Na' ca' nac bene' ca' chesejnilaže' neda', bi čhnaba' yeca'o legaque' lo' yežlio nga, san čhnaba' gacleno'ne' cont Satanás dan' chnabia' da' xigüe' ca' bi siye'en legaque'.

¹⁶ Legaque' bi zjanaque' txen len bene' bi chesejnilaže' le', ca neda' bi naca' txen len bene' bi chesejnilaže' le'.

¹⁷ Ben cont bene' ca' chesejnilaže' neda' yesaclaže' yesone' con da' žo', le ba zjanombi'e diža' li chio'. Yogo' da' ba bzejni'ido' legaque' naquen da' li.

¹⁸ Len' gwselo' neda' yežlion' cont ba bia' xtižon', na' lecze ca' chsel'a' legaque' yeso'e xtižan'.

¹⁹ Chzanlaže' cuina' chona' con da' žo' le' cont yesaclaže' yesone' con can' žo' da' zjanombi'e diža' li čhion'.

²⁰ Na' bi chnaba' gacleno' legacze', san lecze gacleno' bene' ca' yesejnilaže' neda' cate' yesende' diža' dan' yesoe' bene' quinga.

²¹ Xa', ben cont yogo'lole' yesaque' toze len lježgaque' na' yesaque' txen len chio', ca le' naco' toze len neda' na' neda' naca' toze len le'. Ben cont yeyož yesaque' toze len chio' na' len lježgaque' cont bene' ca' bi chesejnilaže' le' yesacbe'ede' len' gwseło' neda'.

²² Na' yeła' bala'an dan' nono' neda' ba bnežjuan' legaque' cont zjanaque' toze len bene' lježe' ca chio' naccho toze.

²³ Legaque' zjanaque' txen len neda' na' neda' naca' txen len le' cont yogo'cho gaccho toze. Gaccho toze cont bene' ca' bi chesejnilaže' le' yesacbe'ede' len' gwseło' neda' na' yesacbe'ede' chacdo' bene' ca' can' chacdo' neda'.

²⁴ Xa', chacdo' neda' cate' biņa' xe yežlio nga na' nono' neda' bene' zaca' juisyw. Na' chaclaža' bene' quinga gwlejo' chesejnilaže' neda' yedyesenite' len neda' gan' yedyesoan' cont yesele'ede' naca' bene' zaca' juisyw.

²⁵ Xa', naco' la'zelagüe bene' chon da' zej to licha. Na' ca nac bene' ca' bi chesejnilaže'nda', lecze bi zjanombi'e le', perw neda' nombi'a le', na' bene' ca' ba gwlejo' cont chesejnilaže' neda' zjaņezde' len' gwseło' neda'.

²⁶ Na' ba bzejni'ida' legaque' can' nacon' na' can' chonon', na' za' gwzejni'ichda' legaque', cont yesacbe'ede' chacdo' legaque' can' chacdo' neda', na' cont neda' soacza' len legaque'.

18

Judasen' bdie' Jesúsen' lo na' soldadw ca' (Mt. 26:47-56; Mr. 14:43-50; Lc. 22:47-53)

¹ Beyož gwna Jesúsen' da' ca', gwza'lene' bene' ca' zjanaque' le' txen ja'aque' šla'a Yegw Cedrón gan' gota' to le'ej ga goseže za'n yag olivos. Na' gos'o'e lo' le'ejen'.

² Na' Judasen' ben' ba naquen gone' Jesúsen' lo na' bene' ca' chesegue'ede' le' lecze nombi'e latjen', le zan ni'a Jesúsen' len bene' ca' zjanaque' le' txen ba besedobe' na'.

³ Ca' goquen' bžin Judasen' na' nche'e xonj soldadw na' yexonj bene' chesape' yodao' blaon' bene' gosesela' bxož gwnabia' ca' na' bene' fariseo ca' cont yesezene' Jesúsen'. Zjanxobe' no lintern na' zjanoxe' no yi' yech na' zjanałe' spada.

⁴ Jesúsen' ba nežde' yogo'lol' da' za' gac che', na' bchoje' jašague' legaque' na' gwne':

—¿Non' cheyiljwle?

⁵ Na' gose'ene':

—Cheyiljwto' Jesús bene' Nazaret.

Na' gož Jesúsen' legaque':

—Nedan'.

Na' Judasen' ben' ba naquen gone' Jesúsen' lo na'gaquen' zelene' legaque'.

⁶ Cate' Jesúsen' gože' legaque': "Nedan", la' besyebiga'te' cosxanle na' jasechaze' lo yon'.

⁷ Na' da' yoble Jesúsen' gože' legaque':

—¿Non' cheyiljwle?

Na' legaque' gose'ene':

—Cheyiljwto' Jesús bene' Nazaret.

⁸ Na' Jesús'en' gwne':

—Ba gwnia' nedan'. Na' še nedan' cheyiljwle, le güe' latje šjaya'ac bene' quinga.

⁹ Gwne' ca' cont goc can' ba gwdixjue'ede' caten' gwne': “Ne to bene' ca' ba gwlej Diosen' chesejnilaže' neda' bi yesebiaye'e.”

¹⁰ Na' Simón Pedron' no'e to spada na' goljen' gwдынen' mos che bꝥoz blaon' gwꝥhogtechgüe' nague' licha. Na' mosen' le' Malco.

¹¹ Na' Jesús'en' gože' Pedron':

—Bego'o spada chion' lo' ližen'. ¿Chacdo' bi cheyała' gac da' ba nžia bia' Xa' Diosen' gac chia'?

Goseche'e Jesús'en' lao ben' le' Anás

(Mt. 26:57-58; Mr. 14:53-54; Lc. 22:54)

¹² Nach soldadw ca' len xangaque' na' len bene' chesape' yodao' blao che nación Israel cheton' gosezene' Jesús'en' na' bosocheje'ne'.

¹³ Na' goseche'ene' da' nechw lao Anás ben' naque' xta'obi'in che Caifás. Na' Caifás'en' goque' bꝥoz blao che nación Israel cheton' lo' izen'.

¹⁴ Na' Caifásna' ben' gože' bene' gwnabia' cheton' napen legaque' cuent toz ben' gat clél ca cuiayi' yogüe'.

Pedron' bi gwchebe' naque' Jesús'en' txen

(Mt. 26:69-70; Mr. 14:66-68; Lc. 22:55-57)

¹⁵ Simón Pedron' len yeto bene' naque' Jesús'en' txen gosa'ogüe'ne'. Na' nombia' ben' nac bꝥoz blao ben' yeto. Da'nan' goc gwyo'e len Jesús'en' chyo'o che bꝥoz blaon'.

¹⁶ Na' Pedron' bega'ane' do cho'a puerten'. Nach ben' yeto, da' nombia' bꝥoz blaon' le', gwyeje' na' be'lene' diža' bi' no'olen' chap cho'a puerten' cont gwlo'obe' Pedron'.

¹⁷ Nach bi' no'olen' chape cho'a puerten' gožbe' Pedron':

—¿Gague leno' le' chzenago' dan' chsed chlo'e bengá?

Na' Pedron' gwne':

—Bi lena' neda'.

¹⁸ Bene' güen žin ca' na' bene' ca' chesape' yodao' blaon' ba gosebeque' to yi' ya'alj, le chac zag, na' zjazeche' cho'a yin' cont chesyeže'ede'. Na' Pedron' ze' len legaque' cho'a yin' cheže'ede'.

Gosenabde' Jesús'en' che dan' chsed chlo'eden'

(Mt. 26:59-66; Mr. 14:55-64; Lc. 22:66:71)

¹⁹ Na' ben' nac bꝥoz blaon' gwñabde' Jesús'en' che bene' ca' chosozenag che dan' chsed chlo'eden' na' che da' ca' chzejni'iden'.

²⁰ Na' Jesús'en' gože'ne':

—Ba bi'a diža' doxen latje lagüe. Zan ni'a bsed blo'eda' lo' yodao' checho ca' na' chyo'o yodao' blaon' gan' chesežag yogo' bene' gualaž chechon'. Bibi diža' gwnia' bagaše'ze.

²¹ ¿Bixchen' chñabdo' neda'? Gwñabe bene' ca' gosende' dan' bsed blo'edan'. Legaque' zjañezde' bi dižan' bia'.

²² Beyož gwna Jesús'en' ca', to ben' chape yodao' blaon' zie' na', na' gwdape' xaguen', gože'ne':

—¿Ca' choži'o xtiža' ben' nac bꝥoz blaon'?

²³ Jesús'en' gwne':

—Še bi da' mal ba gwnia', be' diža' che bi da' malen' ba gwnia', na' še gwnia' güen, ¿bixchen' chgapo' neda'?

²⁴ Nach Anásen' bdie' Jesúsen' ncheje' lao Caifásen' ben' nac b̄xoz blaon'.

Da' yoble Pedron' bi gwchebe' še naque' txen len Jesúsen'

(Mt. 26:71-75; Mr. 14:69-72; Lc. 22:58-62)

²⁵ Na' Pedron' zie' cho'a yin' cont cheže'ede' na' bene' ca' nita'na' gose'ene':

—¿Gague lenczo' len' chzenago' dan' chsed chlo'e benga?

Na' bi gwchebe', gwne':

—Bi lena' neda'.

²⁶ To xmos b̄xoz blaon' naque' biše' ljež ben' gwchog Pedron' naguen', na' le' gože' Pedron':

—¿Gague ble'eda' le' len Jesúsen' lo' le'ej gan' ze yag olivos?

²⁷ Na' Pedron' da' yoble bi gwchebe', na' la' gwchežte to jea.

Goseche'e Jesúsen' lao Pilaton'

Mr. 27:1-2, 11-14; Mr. 15:1-5; Lc. 23:1-5)

²⁸ Na' do cheni'las bene' gwnabia' ca' gosebeje' Jesúsen' gan' zoa Caifásen' na' goseche'ene' gan' zoa gobernador Pilato ben' chon yela' justis. Na' legaque' bi goso'e len Jesúsen' yo'o gan' zoa Pilaton', le can' nac costumbr cheton' bi chac yesagüe' xše' lni pascon' še yeso'e gan' že' bene' bi zjanac bene' Israel.

²⁹ Da'nán' Pilaton' bchoje' na' gože' legaque':

—¿Bi ben benga? ¿Bi xya chagwle che'?

³⁰ Na' bene' gwnabia' ca' gosene':

—Šaca' benga bi naque' bene' güen da' xinj bi bdeto'ne' lo naon'.

³¹ Na' gož Pilaton' legaque':

—Le yeche'e, na' le gon yela' justis che' can' ža ley chelen'.

Nach bene' gwnabia' che nación Israel cheton' gose'ene':

—Bi de šsens gotto' bene'.

³² Da' gosone' ca' goc can' gwna Jesúsen' caten' bzejni'ide' nac yesone' yesote'ne'.

³³ Nach Pilaton' beyo'e yo'ona' na' goxe' Jesúsen' na' gože'ne':

—¿Naco' le' Rey che bene' Israel ca'?

³⁴ Jesúsen' gože'ne':

—¿Con da' goljlažon' chnabo', še bene' yoble gose'e le' ca'?

³⁵ Pilaton' gože'ne':

—¿Chacdo' naca' neda' bene' Israel? Bene' Israel gualaž chio' na' b̄xoz gwñabia' chele ca' bosodie' le' lo na' nga. ¿Bi da' xinj benon'?

³⁶ Jesúsen' gože'ne':

—Yela' chñabia' chia' nža'le naquen len yela' chñabia' che bene' chesenabi'e yežlio nga. Šaca' yela' chñabia' chia' naquen che yežlio nga na' šaca' nabi'a nación ca' že' yežlio nga, bene' ca' chosozenag chian' gosedi'e' cont bi goca' lo na' bene' gwnabia' che nación Israel cheton' šaca'. Perw yela' chñabia' chian' bi naquen che yežlio nga.

³⁷ Nach Pilaton' gože'ne':

—¿Na' len' naco' rey še ca'?

Na' gwna Jesúsen':

—Da' li can' žon', naca' rey na' ba bida' yežlio nga cont gwzejni'ida' benachen' diža' li na' yogo' bene' chesone' txen len diža' li chosozenague' chia'.

³⁸ Nach gož Pilaton' le':

—¿Bi dan' diža' li?

Gosechoglagüen' yesote' Jesúsen'
(Mt. 27:15-31; Mr. 15:6-20; Lc. 23:13-25)

Beyož gwna Pilaton' ca' na' bezchoje' yeto ši'i gan' že' bene' gwnabia' che nación Israel cheton' na' gože' legaue':

—Bibi nla'lagüe še bi da' xinj non benga.

³⁹ Perw na' de costumbr chele gwsana' to bene' de ližya lo lni pascon'.
¿Chaclaže'le gwsana' benga naque' Rey che le'e bene' Israel?

⁴⁰ Nach bososye'e gosene':

—Bi gwsano' bena'. Barrabás na' gwsano'.

Na' Barrabásen' naque' to bene' gwban.

19

¹ Nach Pilaton' bene' mandaw goseyine' Jesúsen'.

² Na' soldaw ca' gosone' to corona de xis yeše' na' bosozoen' yichj Jesúsen' na' bosoguacue'ne' to lache' moradw ca da' chosočhin no rey.

³ Nach gosonle' che', gosene':

—¡Viva Rey che bene' Israel!

Na' gosegapa'chgüe' xague'.

⁴ Nach Pilaton' bchoje' da' yoble na' gože' bene' gualaž cheto' ca' že' na':

—Cueja'ne' da' yoble cont nezele bibi da' xinj chželda' še bi da' none'.

⁵ Na' bechoj Jesúsen' chyo'ona', na' zoa corona de xis yešen' yichje' na' ne' nyaze' lache' moradon'. Na' Pilaton' gože' legaue':

—Le na', nga ze ben'.

⁶ Na' bħoz gwnabia' ca' na' bene' chesape' yodao' blaon' cate' besele'ede' Jesúsen' na' bososye'e zan ni'a gosene':

—¡Bde'e le'e yag cruz! ¡Bde'e le'e yag cruz!

Nach Pilaton' gože' legaue':

—Le'e le' che'e na' le' gwde'e le'e yag cruzen', le' neda' bibi da' xinj cheželda' še bin' none'.

⁷ Na' bene' gwnabia' ca' che nación Israel cheton' gose'e le':

—De to ley cheto' da' žan cheyla' gate' da' že' naque' Xi'in Dios, le' con to benačzen' naque'.

⁸ Ba chžeb Pilaton' can' ba chaquen', na' cate' bende' xtiža'gaquen' bžebche'.

⁹ Na' beyo'e yo'o gan' zoe' da' yoble, nche'e Jesúsen', na' gože' Jesúsen':

—¿Ga bene' le'?

Na' Jesúsen' bi boži'e xtižen'.

¹⁰ Nach Pilaton' gože'ne':

—¿Bi choži'o xtižan'? ¿Bi neздо' napa' yela' chnabia' cont gwsana' le' na' napa' yela' chnabia' cont chogbi'an yosode'e le' le'e yag cruz?

¹¹ Jesúsen' gože'ne':

—Bibi yela' gwnabia' napo' šaca' Diosen' bi nonen' le'. Da'nan' bene' bdie' neda' lo naon' napche' doła' ca le'.

¹² Nach Pilaton' beyiljwlaže' nacle gone' gwsane' Jesúsen'. Perw bene' gwnabia' che nación cheton' bososye'e gosene':

—Še gwsano' benga, contr rey che nación Roman' chono' še ca', le' note'tez bene' že' naque' rey chone' contr rey César.

¹³ Nach Pilaton', beyož bende' xtiža'gaquen', gwleje' Jesúsen' chyo'ona' na' lecze bchoj le' na' gwchi'e gan' chone' yela' justisen', to latje da' nzi' Gan' Nagw Jej, na' diža' hebreo nzin' Gabata.

14 Do guagwbiž ža cate' za' solao lni pascon' Pilaton' gože' bene' gwnabia' cheto' ca':

—Le na', nga zoa rey chelen'.

15 Nach da' yoble gosezolagüe' bososye'e gosene':

—jCheyala' gate'! jBde'e le'e yag cruz!

Nach Pilaton' gože' legaque':

—¿Rey chele nga gona' mandadw yosode'e le'e yag cruz?

Nach bħoz gwnabia' ca' gose'ene':

—Gague rey cheto' bengä. Toze César naque' rey cheto'.

16 Nach Pilaton' bdie' Jesúsen' lo na'gaque' cont te'e le'e yag cruzen'. Nach gosa'aque' Jerusalénna' goseche'e Jesúsen' cho'a ciudadn'.

Bosode'e Jesúsen' le'e yag cruz

(Mt. 27:32-44; Mr. 15:21-32; Lc. 23:26-43)

17 Na' Jesúsen' zeje' no'e yag cruz chen' na' besežine' to latje nzi' Latje che Žit Yichj Bene' Guat, na' diža' hebreo nzin' Gólgota.

18 Na' soldadw che gobernadore'n bosode'ene' le'e yag cruzen', na' lecze bosode'e yečhope bene' le'e yečhope yag cruz cuiten' na' Jesúsen' gwyo'e gachol bene' ca' čhope'.

19 Na' gobernador Pilaton' bene' mandadw byoj diža' da' gwda' yichj yag cruz che Jesúsen'. Na' bosozojen' žan: "Jesús bene' Nazaret, Rey che bene' Israel".

20 Bosozojen' diža' hebreo, diža' griego na' diža' latín. Na' zan bene' Israel gualaž cheto' bosolaben', le gan' gwda' Jesúsen' le'e yag cruzen' naquen gala'ze ciuda Jerusalénna'.

21 Nach bħoz gwnabia' ca' na' yezica'chle bene' gwnabia' che nación Israel cheton' gose'e Pilaton':

—Bi gwzojo' "Rey che bene' Israel", san bzoj: "Le' gwne' naque' rey che bene' Israel."

22 Na' Pilaton' gwne':

—Da' bena' mandadw bosozoje', ba nyojenna'.

23 Nach soldadw ca', beyož bosode'e Jesúsen' le'e yag cruzen', goseque'e xałana' Jesúsen' na' besyele'en gosebejen' tap cuenle na' tgüejen gosezi' to toe'. Na' lecze goseque'e yeto xe' da' naquen to güelize, na' bibi dia chen de.

24 Na' gose' lježe':

—Bi gwzoxchon san gonchon rifa cont nezecho no yechelen.

Na' dan' gosone' ca' goc can' nyoj Xtiža' Diosen', žan: "Besyele'e xałanan' legacze', na' gosone' rifa lache' dan' chazan'."

25 Na' do gala'ze yag cruz che Jesúsen' zecha Marían' ben' nac xna' Jesúsen' na' bene' bile xne'ena', na' María bene' naque' no'ol che Cleofas na' María bene' naque' bene' Magdala.

26 Na' cate' Jesúsen' ble'ede' zecha xne'en gala'ze len to bene' naque' le' txen, bene' chaquechgüe Jesúsen' le', nach gože'ne':

—Bena' gaque' ca xi'ino'.

27 Nach gože' bena':

—Bži'ilaže' xna' nga ca xnao'.

Na' žana' gwque'ene' bene'ne' ca bene' lo' yo'o.

Can' goc caten' got Jesúsen'

(Mt. 27:45-66; Mr. 15:33-41; Lc. 23:44-49)

28 Gwde na' Jesúsen' ba nežde' bačh goc yogo' da' cheyala' gac. Nach cont goc can' ža yelate' Xtiža' Diosen' da' nyojen gwne':

—Chbilda' nis.

²⁹ Na' de late' vino zichj da' yože' to lo' xguag dao'. Na' to bene' bzaže' de' vino zichjen' to esponja bzoen' to lo' xis da' že' hisopo na' gwłisen' blapen' cho'a Jesúsen'.

³⁰ Na' beyož gwxop Jesúsen' vinon' na' gwne':

—Bač goc yogo' lol da' cheyala' gac.

Nach bcheque' yichjen' gote'.

To soldadw godoe' lanza cuit le'e Jesúsen'

³¹ Na' yeteyo gaquen ža che Dios na' ža lni xen, da' nan' bene' gwnabia' che nación četon' jaseñabde' Pilaton' gone' mandadw yeseyišjw soldadw che' ca' ni'a bene' ca' zjada' le'e yag cruzen' cont yob yesate' na' yesyeque'e legaque' le'e yag cruz ca', le bi gosaclaže' yeseda' ch bene' ca' le'e yag cruzen' ža che Dios.

³² Nach soldadw ca' ja'aque' jasedišjue' chope la'a ni'a ben' gwda' šla'a cuit Jesúsen'. Na' lecze ca' gosone' len ben' gwda' le'e yag cruzen' cuiten' yešla'a.

³³ Na' cate' besežine' gan' da' Jesúsen', besele'ede' ba gote' na' bich goseyišjue' ni'e ca'.

³⁴ Perw to soldadon' godoe' lanza cuit le'e Jesúsen', na' la' bchojten chen len nis.

³⁵ Neda' ble'eda' can' goquen' na' nežda' cho'a diža' li. Na' cho'a diža' li can' goquen' cont lencze le'e šejle'le.

³⁶ Na' goc da' ca' len Jesúsen' cont goc can' ža Xtiža' Diosen' da' nyoj che', žan: "Ne to žit yo'e bi yeseyišjue'."

³⁷ Na' yeto da' žan: "Yesene'e ben' ba bosožie' güe'."

Bosocuaše' Jesúsen'

(Mt. 27:57-61; Mr. 15:42-47; Lc. 23:50-56)

³⁸ Beyož goc yogo' da' ca', José bene' nac bene' ciuda Arimatea janabde' Pilaton' gwnežjue' lsens yeque'e cuerp che Jesúsen'. Na' Pilaton' be'e lsens. Nach Josén' gwyeye' na' beque'e cuerp che Jesúsen'. Josén' ba chejnlaže' Jesúsen' perw chejnlaže'ne' bagaše'ze da' chžebe' bene' gwnabia' četo' ca'.

³⁹ Na' len Josén' lecze gwyej Nicodemo ben' ba gwyej gan' zoa Jesúsen' šeže'le. Na' Nicodemon' no'e to da' chl'a' zix' da' none' len yal dan' že' mirra, na' len to bište dan' že' aloes, ca do šona roben'.

⁴⁰ Nach bosyočehe' cuerp che Jesúsen' to lache' xen na' len dan' chl'a' zixen', ca' chon neto' bene' Israel cate' chcuaše'to' bene' guat.

⁴¹ Na' gała'ze latje gan' bosode'e Jesúsen' le'e yag cruzen' gota' to le'ej ga goseze yag. Na' na' za' goseče'ene' to bloj cont yosočhinen' ca to ba, na' nono bene' guat na' šo' lo'enña'.

⁴² Ža caten' got Jesúsen' naquen ža caten' chososi'ne' che ža che Diosen'. Na' da' chesacbyende' yosocuaše'ne', da' nan' jase'lo'e Jesúsen' lo' bloj coba', le naquen gała'ze.

20

Jesúsen' bebane' ladjo bene' guaten'

(Mt. 28:1-10; Mr. 16:1-8; Lc. 24:1-12)

¹ Na' bal dmigw Maria bene' Magdalan' gwyeye' cho'a blojen' gan' bosocuaše' Jesúsen' na' ble'ede' ba bga'a yejen' dan' bosode'e cho'a blojen'.

² Nach beza'sese' beyeye' gan' zoa Simón Pedron' len yeto bene' naque' Jesúsen' txen, na' gože' legaque':

—Ba besyebeje' Xanchon' lo' blojen' na' bi nežeto' ga besyeyo'ene'.

³ Nach Pedron' na' ben' yeto gosa'aque' ja'aque' cho'a blojen'.

⁴ Choptie' goseza'sese' perw ben' yeto gwza'sesche' ca Simón Pedron' na' byobech bžine' cho'enña' ca le'.

⁵ Na' bcheque' gwne'e lo'enña' na' ble'ede' lache' ca' zjachin' lo yo perw bi gwyo'e.

⁶ La' bla'te Simón Pedron' na' le' gwyo'e lo' blojen' na' lecze ble'ede' lache' ca' gan' zjachin'na'.

⁷ Na' bay dan' bosoguzaje' yichjen' bi chin' gan' chi' lache' ca', san ndoben chin' šla'ale.

⁸ Nach lencze ben' yeto gwyo'e, le bina' šo'e la'czla' byobech bžine' cho'enña', na' ble'ede' can' naquen na' gwyejle'e.

⁹ Le bina' yesejni'ide' Xtiža' Diosen' da' nyojen žan cheyala' yebane' ladjo bene' guaten'.

¹⁰ Na' besyeya'aque' jaya'aque' yo'o gan' nite'na'.

María bene' Magdalan' ble'ede' mbancze Jesúsen'
(Mr. 16:9-11)

¹¹ Na' Marían' bega'ane' na' gwzeche' gała'ze cho'a blojen' chbeže'. Na' ne' chbeže'te' ca' bcheque' gwne'e lo' blojen'.

¹² Na' ble'ede' chope angl bene' zjanyaz lache' šiš zjachi'e lo' blojen', toe' chi' zej yichjle na' yetoe' chi' zej xni'ale gan' gota' cuerp che Jesúsen'.

¹³ Nach gose'e no'olen':

—¿Bixchen' chbežo' no'ole?

Na' boži'en gože' legaque':

—Ba besyeyo'e Xanan' na' bi nezda' gale jasesane'ne'.

¹⁴ Beyož gwna' Marían' ca' gwyechje' ble'ede' zecha Jesúsen' cožen', perw bi goche'ede' še naque' le'.

¹⁵ Na' gož Jesúsen' le':

—¿Bixchen' chbežo', no'ole? ¿Non' cheyiljo'?

Marían' bene' xbab še ben' chape' yaguen' nach boļ güiže' le', gože'ne':

—Bene', še len' beyo'one' ga yoble, gwna neda' gale jaysano'ne' cont yeyoa'ne'.

¹⁶ Jesúsen' gože'ne':

—¡María!

Na' Marían' gwyechje' da' yoble na' gože'ne':

—¡Raboni! —naquen to diža' hebreo na' zejen Maestrw.

¹⁷ Jesúsen' gože'ne':

—Bi goxo' neda', le bina' yeyepa' gan' zoa Xan'. Beyej len yezica'chle bene' ca' ba bosozenag xtižan' bene' ca' zjanaque' ca biše' zana', na' gožgaque' yeyepa' gan' zoa Xan' ben' lec naque Xale. Naque' Dios ben' chonxena' na' lecze naque' Dios ben' chonxenle.

¹⁸ Nach beza' María bene' Magdalan' na' jaydixjue'ede' yezica'chle bene' ca' chosozenag xtiža' Jesúsen' le' ba ble'ede' Xanchon'.

Bene' ca' zjanaque' Jesúsen' txen besele'ede' mbancze'
(Mt. 28:16-20; Mr. 16:14-18; Lc. 24:36-49)

¹⁹ Na' cate' ba goc choļže' dmigon', bene' ca' zjanaque' Jesúsen' txen zjandop zjanžague' lo' yo'o na' zjanseywtie' puert ca' da' besežebe' bene' gwnabia' che nación Israel cheton'. Nach Jesúsen' ble'e na' gwze' gachol legaque'. Na' gože' legaque':

—Le soa binlo len xbab da' yo'o lo' yichjlažda'ole.

²⁰ Beyož gwne' ca' na' blo'ede' legaque' taque' ca' na' cuít le'ena'. Na' besyebede' cate' besele'ede' le' naque' Xanchon'.

²¹ Na' gozne' da' yoble:

—Le soa binlo len xbab da' yo'o lo' yichjlažda'olen'. Can' gwseła' Xan' neda' yežlio nga bia' xtižen', lecze ca' neda' chseła' le'e güe'le xtižan'.

²² Beyož gwne' ca' blobe' legaque' na' gože' legaque':

—Le si' Spiritw che Diosen'.

²³ Bene' ca' yesyetinge xtoła'gaquen', naple yela' chnabia' ye'lene' ba gwnitlaon, na' naple yela' chnabia' cont ye'le bene' bi yesyetinge xtoła'gaquen' bitw nitlaon.

Tomás ble'ede' mban Jesúsén'

²⁴ Na' Tomás ben' bososi'e Tomás Cuaš lene' len bene' šižinw ca' ba goseda-lene' Jesúsén', na' bi gwzoe' cate' Jesúsén' bedyelo'elagüe' legaque' že' dmigon'.

²⁵ Na' bene' ca' yezica'chle gose'ene':

—Ba ble'eto' Xanchon'.

Na' Tomásen' gože' legaque':

—Bi šejli'a mbancze' še bi le'eda' yiž che claven' le'e taque' ca' na' gwzebe xbenan' gan' gwdebe clav ca' na' gwzebe na'an cuít le'en.

²⁶ Gozde' to xman zjanite' lo' yo'on da' yoble na' zoa Tomásen' len legaque'. Na' da' yoble nyeyjw puert ca', cate' bezla' Jesúsén' na' gozzeché' gachol legaque'. Na' gwne':

—Le soa binlo len xbab da' yo'o lo' yichjlažda'olen'.

²⁷ Nach gože' Tomásen':

—Gwna' lo' taca' quinga na' bzeben xbenon'. Na' bzebe naon' cuít li'a nga cont šejli'o. Na' bich gaco' bene' bi chejle', san šejli'o.

²⁸ Nach Tomásen' gože'ne':

—jXana' na' Dios chia'!

²⁹ Na' Jesúsén' gože' Tomásen':

—Tomás, ba chejli'o da' ba ble'edo' neda'. Mbalaz bene' ca' ba chesejle'e la'czla' bina' yesele'ede' neda'.

Da' quinga zjanyojen cont šejle'cho Jesúsén' naque' bene' gwseła' Dios

³⁰ Da' zan yela' guac ben Jesúsén' da' besele'e bene' ca' zjanaque' le' txen da' bi nyojen nga.

³¹ Perw zjanyoj da' quinga cont šejle'le Jesúsén' naque' Cristo ben' gwlej Diosen' cont nabi'e na' naque' Xi'in Dios, na' cont gata' yela' mban toli tocane chele da' chejnlaže'lene'.

21

Jesúsén' blo'elagüe' gaže bene' ca' zjanaque' le' txen

¹ Gwdechle yeto ža yoble Jesúsén' bozlo'elagüe' bene' ca' zjanaque' le' txen cho'a nisdao' da' nzi' Nisdao' Tiberias. Quinga goc:

² Txen nite' Simón Pedron' len Tomásen' ben' bososi'e Tomás Cuaš, na' Natanael bene' yež Caná gan' mbane Galilean', na' chope xi'in Zebedeo na' yechope bene' ca' zjanaque' Jesúsén' txen.

³ Na' Simón Pedron' gože' legaque':

—Ša'a gwxen bel da' yoble.

Na' gose'e le':

—Lecze sa' neto'.

Nach gosa'aque' ja'aque' cho'a nisdaon' na' goso'e to lo' barcw. Na' nocze no bel beseželde' že'na'.

⁴ Na' do ba zoa šeni' besele'ede' zecha Jesúsen' cho'a nisdaon', perw bi gosache'ede' še Jesús nan'.

⁵ Nach Jesúsen' gože' legaque':

—Bene' migw chia' čnono bel chdole'le'?

Na' gose'ene':

—Nono chdole'to'.

⁶ Nach gože' legaque':

—Le gwzala' yixjw bel chelen' cuit barcon' lichale na' senlba'.

Nach bosozala' yixjw bel čhegaquen', na' tantw be zan besedola', bi gosoede' yosyocuen' lo' barcon'.

⁷ Nach ben' chaquechgüe Jesúsen' le', gože' Pedron':

—Xancho nan'.

Na' cate' gože' Simón Pedron' Xancho nan', la' beyacwte Pedroa' xalanen', le gague bi nyaze' cha'len' chone' žinna', na' la' bxite'te' lo' nisen' cont byob bežine' gan' zoa Jesúsen'.

⁸ Na' yezica'chle bene' ca' zja'aclene' barcw daon' zjanxobe' yixjw gan' že' bel ya'a ca'. Bi naquen' zito' cho'a nisdaon', ca do yeto gayoa metrže.

⁹ Na' cate' besyežine' cho'a nisdaon' besele'ede' čhi' yi' ya'alj na' xoa bel ya'a lagüenna' na' len yetextil'.

¹⁰ Na' Jesúsen' gože' legaque':

—Le yeyoxe' ngale to čhope bel ya'a ca' za' gwxenle'.

¹¹ Na' Simón Pedron' gwyeye' jaxi'e yixjw belen' gan' čhi' barcon' na' bexoben' ga nac yo biž. Žen' to gayoa ši'iněyon bel xen, perw bi bcheza' yixjon' la'czla' be zan gwže' lo'enna'.

¹² Na' Jesúsen' gože' legaque':

—Le da gagwle xsil'.

Na' ne toe' bi besyeyaxjde' ye'ene': “čNo le'?”, le ba gosache'ede' naque' Xancho'.

¹³ Jesúsen' gwbigue' na' gwxi'e yetextilen' na' bnežjue' che to toe' na' lecz ca' bene' len bel ya'an.

¹⁴ Da'na' goc da' gwyon ni'a blo'elao Jesúsen' bene' ca' zjanaque' le' txen gwde bebane' ladjo bene' guaten'.

Jesúsen' be'lene' Simón Pedron' diža'

¹⁵ Na' cate' besyedagüe', Jesúsen' gože' Simón Pedron':

—Simón xi'in Jonás, čchaquechdo' neda' clel can' chesaque bene' quinga neda'?

Pedron' boži'en gože'ne':

—Xana', nezdo' chacda' le'.

Jesúsen' gože'ne':

—Bsed blo'e bene' ca' za' gwzolao chesejnilaže' neda', bene' ca' zjanac ca me' xila' chia'.

¹⁶ Na' da' gwchop ni'a gože' le':

—Simón xi'in Jonás, čchacdo' neda'?

Na' da' yoble gwna Pedron':

—Xana', le' nezdo' chacda' le'.

Jesúsen' gože'ne':

—Bgüia gwna' bene' ca' chesejnilaže' neda', bene' ca' zjanac ca xila' chia'.

¹⁷ Da' gwyon ni'a gož Jesúsen' le':

—Simón xi'in Jonás, čchacdo' neda'?

Na' Pedron' gocyaše'de' dan' gož Jesúsen' le' ca' da' gwyon' ni'a, na' gože' le':
—Xana', le' neze nle'edo' yogo'lol. Nezdó' chacda' le'.

Jesúsen' gože' le':

—Bsed blo'e beñe' ca' chesejnilaže' neda', beñe' ca' zjanac ca xila' chia'.

¹⁸ Da' li chnia' le', cate' goco' beñe' güego', cuino' gwyaz xalanon' na' gweyejo' con ga žan chio'. Perw cate' gaco' beñe' gole, gwli' naon' na' beñe' yoble chize' xalano' na' yeče'e le' ga bi chaclažo'.

¹⁹ Gože'ne' ca' cont gwneзде' can' gacxen Diozen' len da' gac che' cate' žin ža gate'. Na' gwde gwna Jesúsen' can' gac che' Pedron' nach gože'ne':

—Con gweyjnilaže' neda' na' bzenag chia'.

Can' gwna Jesúsen' che ben' chacchgüede'

²⁰⁻²² Na' yeto beñe' naque' Jesúsen' txen na'ogüe' legaque'. Na' beyechj Pedron' na' ble'ede' le' na' gože' Jesúsen':

—Xana', žnac gac che benga?

Jesúsen' gože'ne':

—Še chaclaža' ne' zoacze' cate' yida' yeto žbin' chaczejlažo'? Con gwzoateze gweyjnilaže' neda' na' bzenag chia'.

Ben' gwne' ca' naque' ben' chaquechgüe Jesúsen' na' ben' gwche' cuit Jesúsen' txen cate' gosagüe' xše' žen' cate' za' gac Jesúsen' lo' na' beñe' ca' chesege'ede' le'. Na' cana' bena' gwnabde'ne': “Xana', žnoxen' gwdie' le' lo' na' beñe' ca'?”

²³ Na' dan' gož Jesúsen' Pedron': “Še chaclaža' ne' zoacze' cate' yida' yeto žbin' chaczejlažo'?”, da'n'an' gwditj diža' len beñe' ca' chsejnilaže' Criston' gosene' bi gat bena'. Perw Jesúsen' gague gože'ne' bi gate', san gože'ne': “Še chaclaža' ne' zoacz benga cate' yida' yeto, žbin' chaczejlažo'?”

²⁴ Nedan' nezda' can' goc yogo' da' quinga na' da'n'an' ba bia' diža' chegaquen na' ba bzojan'. Na' lecze le'e nezceze choa' diža' li.

²⁵ Na' da' zanch da' ben Jesúsen' da' bi zjanyojen, le ša zjanyoj yogon' tgüeje tgüejen, libr zan juisyw yesaquen še ca'.

Da' na'ze chzoja' na'a.

DA' GOSON POSTLW CA'

Jesúsen' gwne' sele' Spiritw che Diosen'

¹ Teófilo, ca nac dan' bzoja' da' nechw, bzoja' yogo' loł da' ben Jesúsen', na' lecze bzoja' yogo' dan' bsed blo'ede' cate' gwzolaote' bsed blo'ede'

² žinten cate' beyepe' yaba. Šlac bsed blo'ede' gwleje' postlw che' ca', na' Spiritw che Diosen' bzejni'in Criston', na' Criston' gože' legaque' nac yesone'.

³ Nach gwde gosot beņe' mal ca' Jesúsen' na' gwde bebane' ladjo bene' guaten' nach jalo' elagüe' postlw che' ca'. Na' da' zan da' bene' cont gosenезде' mbanczen'. Na' gwdalene' legaque' choa ža na' bzejni'ide' legaque' can' chnabia' Diosen'.

⁴ Na' šlac ne' zoa Jesúsen' len postlw che' ca' gože' legaque' cbi yesyežaše' ciuda Jerusalénna'. Gwne':

—Le yega'an le cueze gac can' gwna Xa' Diosen' gac, ca dan' bzejni'ida' le'e.

⁵ Da' zaque' ben Juan da' bzoe' beņe' nis, perw yeto chope ža da' zaca'ch gac chele dan' yedesoa Spiritw che Diosen' lo' yichjlažda' olen' nabi'an le'e.

Jesúsen' beyepe' yaban'

⁶ Na' ža na'teze šlac ne' zjandop zjanžague' len Jesúsen' gose'ene':

—Xanto' žba bžin ža gono' cont yechoj naciön Israel chechon' lo na' beņe' zito' ca'?

⁷ Jesúsen' gože' legaque':

—Bitw naquen nezele bi ža bi hor gon Xacho Diosen' da' ca' toze' ba bžie' bia' gone'.

⁸ Perw na' cate' yedesoa Spiritw che'na' len le'e, gaclenen le'e len yela' guac chenna' cont güe'le xtižan' ciuda Jerusalén ni, na' doxen ga mbane distritw Judean', na' distritw Samaritan', na' doxen yežlion'.

⁹ Beyož gwna Jesúsen' ca', chesena'te beņe' ca' chesejnilaže' le', beyepe' yaba to lo' bejw na' bich besele'ede' le'.

¹⁰ Na' ne' chesena'te beņe' ca' le'e yaban' gan' besele'ede' beyepe', cate'cze gosache'ede' ba zjazeera chope angl len legaque' beņe' zjanyaz lache' šiš.

¹¹ Na' beņe' ca' chope gose'e legaque':

—Beņe' Galilea, žbixchen' chna'le le'e yaban'? Can' ble'ele beyep Jesúsen' yaban' caten' bechoje' ladjwlen', can' le'eczele yide' da' yoble.

Gosebeje' Matías cont goque' postlw laz Judasen'

¹² Na' nite' ya'a dan' nzi' Ya'a Olivos na' jaya'aque' Jerusalénna'. Jerusalénna' naquen gala'ze con ca'te' de lsens yesa'aque' ža che Dios can' ža ley che beņe' Israel ca'.

¹³ Na' cate' besyežine' Jerusalénna' postlw ca' šnej na' beņe' ca' zjanžague' gosegüe' gan' nite'na' lo' cuart zoa yichjen'. Postlw ca' šnej beņe' quinga: Pedro, Jacobo, Juan, Andrés, Felipe, Tomás, Bartolomé, Mateo, Jacobo xi'in Alfeo, na' Simón ben' chon txen partid dan' nzi' cananista, na' Judas ben' nac beņe' biše' Jacobon'.

¹⁴ Na' gosenita'teze postlw ca' šnej chosoł güiže' Diosen' txen len beņe' ca' zjanaque' biše' Jesúsen' na' len María xna' Jesúsen' na' len yezica'chle no'ol ca' zjanžag.

¹⁵ Na' ca hora' Pedroa' zeche' ladjo to gayoa galje beņe' chesejnilaže' Jesucriston' cont be'lene' legaque' dižan', na' gože' legaque':

16 —Beñe' migw, Spiritw che Diosen' benen cont rey David bzoje' na' be'e diža' che Judasen' ben' gwche' beñe' ca' gosezen Jesúsén' gan' jasešague' le'. Na' benen byen goc can' nyoj Xtíža' Diosen'.

17 Judasen' goque' txen len neto' na' bene' txen len neto' yogo'loł dan' gwyo'lo na'to' bento'.

18 Na' gosezi'e late' yežlio len mechw dan' gwxi' Judasen' bene' da' malen' bdie' Jesúsén' lo na' beñe' ca'. Perw na' blažoe' cosyichj gan' goładite' na' gošj li'ena', doxen xjaloen' bchoj.

19 Yogo' beñe' že' Jerusalénna' gosenezde' can' goc chen' na' da'nán' bososi'e yežlion' Acéldama na' xtíža'gaque'na' zejen Yežlio Chen.

20 Goc can' nyoj to salmo žan:

Liže'na' gaquen to yo'o daš, nono soa na'.

Na' lecze nyojen žan:

Na' te beñe' yoble yołane' žin dan' bene'.

21 'Na' nga nita' beñe' ba gosone' txen len chio' šlac gwdalen Xancho Jesúsén' chio'.

22 Ba gosone' txen gwzolaoten cate' da' Juan bzoe' le' nis bžinten caten' beyepe' yaban', na' cheyała' cuejcho toe' gone' txen len neto' postlw güe'to' diža' can' beban Xancho Jesúsén' ladjo beñe' guat ca'.

23 Na' gosebeje' chope beñe', toe' José ben' le Barsabás, na' lecz le' Justo, na' ben' yeto Matías.

24-25 Nach bosol güiže' Diosen' gose'ene':

—Xanto', le' nombi'o yichjlaždao' yogo'loł beñe'. Lao beñe' ca' chope blo'ešca neto' noe' ba gwlejo' cont gaque' postlw na' gone' xšinon' txen len neto'. Le ca nac Judasen', gwlejyichje' dan' ngo'o lo ne'e gone' na' ba zjayde' gan' naquen yeyeje' yela' güen da' mal che'na'.

26 Nach gosone' rifa cont gosenezde' non' ba gwlej Diosen' na' Matíasen' bchoje' na' gosone' le' cuent len postlw ca' yešnej.

2

Can' goc cate' bla' Spiritw che Diosen'

1 Na' bžin ža lni dan' že' Pentecostés, na' postlw ca' na' yogo'loł beñe' ca' ba gosejnilaže' Jesúsícrion' zjandop zjanžague' toze latje.

2 Na' zejzenez goc to sšag le'e yaban' ca' sšag che to be' bdono' gual na' nenxeje lo' yo'o gan' zjachi'ena'.

3 Na' besele'ede' gała'ze yichj to toe' gosezoa tgüeje yi' bel da' čala'nin.

4 Ca' goc jašo'o Spiritw che Diosen' lo' yichjlaždao' to toe', na' Spiriton' benen cont gosezolagüe' goso'e gwde gwdele diža' da' gosejni'i beñe' zito' ca'.

5 Na' ca tiempen' beñe' zan beñe' Israel že' Jerusalénna' beñe' chesonxene' Diosen', za'aque' doxen yežlion'.

6 Na' cate' gosende' chac sšaguen' gan' že' postlw ca', zan beñe' Israel ca' besežague', na' leca besyebande', le to to postlw ca' bosozejni'ide' legaque' len diža' da' chesejni'i to toe'.

7 Bi gosejni'ide' bin' chac na' besyebande' gosene':

—¿Gague beñe' distritw Galilea beñe' quinga?

8 ¿Nacxečen' to tocho chenecho cheso'e diža' can' chesoe' beñe' gualaž čecho diža'?

9 Bałcho naccho beñe' nación Partia, na' bałcho beñe' nación Media, na' bałcho beñe' nación Elam, na' bałcho beñe' distritw Mesopotamia.

Na' yebałcho bene' distritw Judea, na' yebałcho bene' distritw Capadocia, yebałcho bene' distritw Ponto, na' yebałcho bene' distritw Asia,

¹⁰ yebałcho bene' distritw Frigia na' bene' distritw Panfilia, na' yebałcho za'cho nación Egipto, na' yebałcho za'cho yež ca' zjachi' Africa do te ciuda Cirene. Na' chio' naccho cuent len bene' nación Roma, bałcho goljcho naccho bene' Israel na' yebałcho ben cuincho txen len bene' Israel.

¹¹ Na' bałcho naccho bene' yež ca' zjachi' Creta na' bene' distritw Arabia. Na' gate'tez bene' naccho, yogo'cho chenecho cheso' bene' distritw Galilea quinga xtiža'chon' da' chaccho, cheso'e diža' che da' zan da' ba ben Diosen' da' zaca' yebanecho.

¹² Na' yogo' bene' ca' besedobe' chosozenague' besyebande' na' gosacžejlaže' bin' chac, na' zane' gosene':

—¿Bi zejen dan' chaquen'?

¹³ Na' yebale' goseneye'e gosene':

—¡Bene' quinga chesezožde'!

Diža' dan' be' Pedroa' len bene' Israel ca' besežag

¹⁴ Na' Pedroa' gwzeche' lao ben' zjandop zjanžague' txen len postlw ca' yešnej na' be'e diža' zižje gwne':

—Le'e bene' Judea na' note'tezechle zoale ciuda Jerusalén ni, che'nda' gwzenagle chia' na' gonle xbab che da' za' ni'a le'e.

¹⁵ Bene' lježa' quinga bitw chesezožde' can' chaquele, le ne' nac tempran.

¹⁶ Ba chac can' bzoj da' Joel ben' be' xtiža' Diosen' cani' bzoje' dan' gwna Diosen', žan:

¹⁷ Cate' ba zoa žin ža cont yeyož yežlion',

neda' Dios gona' cont Spiritw čhian' yedesoa len bene' že' doxen yežlion'.

Na' gona' cont xi'inle ca' yeso'e xtiža'na',

na' bene' byo xcuide' ca' yesele'edagüede' bi da' gona',

na' güe'lena' bene' byo gol ca' diža' lo bišgal čhegaquen'.

¹⁸ Na' yogo' bene' ca' chesejnilaže' neda', bene' byo na' no'ole,

yedesoa Spiritw čhian' len legaque' cont yeso'e xtižan'.

¹⁹ Gona' cont yesele'e benačhen' da' zaca' yesyebande' le'e yaban' na' lagüe yežlion',

na' gona' yela' guac chia'na' len chen, len yi' na' len žen da' nac ca bejw.

²⁰ Bich gwseñi' gwbižen', na' bio'na' yeyaquen xna ca chen

cate' za' žin ža yida' da' yoble gwnežjua' castigw che yogo' bene' cbi chesejni-laže'nda', neda' naca' Xanle.

Žana' gaquen to ža žialao xen.

²¹ Nach note'tez bene' yesenabe' gaclena' legaque',

neda' naca' Xanle yebeja' legaque' lo da' malen'.

Can' gwna Diosen'.

²² Na' le'e bene' Israel gualaž chia', le gwzenag chia'. Jesúsen' ben' nac bene' yež Nazaret, Diosen' blo'ede' naque' bene' zaque'. Diosen' bene' cont Jesúsen' bene' yela' guac na' bichle da' zaca' yebanecho can' nezezelen'.

²³ Lo yela' neze che Diosen' bin' za' gac, bi'e latje gwzenle Jesúsen' na' bdelene' lo na' bene' mal ca' gosote'ne' bosode'ene' le'e yag cruzen'.

²⁴ Perw na' Diosen' bečhis bosbane'ne' ladjo bene' guat ca', le bi gwzoe yela' goten' nabian' le'.

²⁵ Quinga bzoj da' rey David xtiža' Jesúsen' cani'te, žan:

Nežda' Xana' Diosen' zoe' len neda' do ža do yel,

na' zoe' chaclene' neda' cont bi chžeba'.

²⁶ Da'na'na' zoa' mbalaz na' choa' diža' leca chebeda'.

Na' lezca chebeda' nežda' yečhis yosbane' neda' ladjo bene' guat ca' cate' ba gota'.

²⁷ Dios čhia', nežda' bi yocua'ano' neda' gan' že' bene' guat ca',

neca go'o latje gožo' cuerp čhia'na', neda' naca' xi'ino' na' nac lažda'oguan' xilaže'.

²⁸ Ba blo'edo' neda' can' soa cueza' mbalaz.

na' mbalaz soa' dan' soaleno' neda'.

Beyož gwna Pedroa' ca' nach gože' legaque':

²⁹ —Bene' Israel, nezecho da' xozxta' ocho rey David gote' na' bosocuaše' le'. Na' nombia'cho ba gan' bosocuaše' le'.

³⁰ Na' da' rey Davin' be'e diža' can' bzejni'i Diosen' le' na' gwnežde' gwlo'o Diosen' da' ba'li gague da' te bi gac can' gwne'. Gwnežde' gon Diosen' cont Criston' galje' lo diaža' če' na' nabi'e naciön Israelen' can' gwnabia' le'na'.

³¹ Diosen' bene' cont da' rey Davin' gwnežde' can' gaquen' na' da'nan' be'e diža' če' Criston' ben' ba gwse'la' Diosen' cont nabi'e. Gwne' Criston' yebane' na' bi yega'ane' gan' že' bene' guat ca' na' neca gožo' cuerp če'na'.

³² Na' Diosen' bečhis bosbane' Jesúsen' ladjo bene' guat ca', na' yogo' neto' choe'to' diža' nežeto' beyas bebane'.

³³ Na' Diosen' len ye'la' guac če'na' bene' cont beyep Jesúsen' gan' zoe'na' na' čhnabi'e txen len le'. Na' Diosen' bnežjue'ne' Spiritw če'na' can' gwne'. Na' Jesúsen' ba bene' ye'la' guac nga da' ba benele na' da' ba ble'ele.

³⁴ Gague da' rey Davin' beyep yaban', san da' David bzoje' če' Jesúsen' gwne':

Xancho Diosen' gože' Xanan':

“Gwche'edo' cuita' nga nabi'cho txen,

³⁵ na' gona' cont yogo' no chesegue'e le' yosozexjw yichje' yosozenague' čhio'.”

³⁶ 'Da'nan' yogo' čhio' bene' Israel cheya'la' nezecho Jesúsen' ben' betwle bda'ln'e' le'e yag cruz, Diosen' gwleje'ne' cont naque' Xančon' na' naque' Cristo, zeje diža' naque' ben' gwse'la' Diosen' nabi'e naciön chechon'.

³⁷ Na' cate' bene' ca' zjanžaguen' gosende' xtiža' Pedroa', da' juisyw da' gosacde' lo' lažda'ogaquen', nach gose'e Pedroa' na' len yezica'chle postlw ca': —Bene' gualaž, žbin' cheya'la' gonto'?

³⁸ Nach Pedroa' gože' legaque':

—To tole cheya'la' yetinjele xtola'le ca' na' soale nis dan' ba chejnlaže'le Jesucriston', na' Diosen' yezi'xene' čhele na' gone' le'e Spiritw če'na' soan lo' yichjlažda'olen'.

³⁹ Xancho Diosen' gone' note'tezle Spiritw če'na' can' ba gwne', le'e na' xi'inle ca' na' note'tez bene' zito', le čhnežjuen' yogo' bene' chbeje' cont yesaque' lo' ne'e.

⁴⁰ Nach Pedroa' be'lene' legaque' diža' zan, na' gwneyoede' legaque' gwne':

—Le yečoj ladjo bene' mal quinga bene' čbi zjanombia' Dios.

⁴¹ Ca' goquen' bene' ca' gosejle'e diža' dan' be' Pedroa' gosezoe' nis. Na' lo žana' šon' mil bene' gosejnlaže' Jesúsen' na' gosaque' txen len yezica'chle bene' chesejnlaže' le'.

⁴² Yogüe' gosenita'teze' bosozenague' dan' bososed bosolo'e postlw ca' legaque'. Na' gosaque' toze len yezica'chle bene' gosejnlaže' Jesúsen' na' gose'ej gosagüe' txen na' gosenite' bosol' güiže' Diosen' txen.

Can' gason bene' ca' gosejnilaže' Criston' da' nechw

⁴³ Na' yogo'ze bene' besyebande' can' gason postlw ca' da' zan da' güen da' zaca' yebanecho len yela' guac che Diosen'.

⁴⁴ Na' bene' ba chesejnilaže' Jesúsen' gosaque' toze na' gosone' toze yogo'loł da' zjade chegaque'.

⁴⁵ Na' gosote' yežlio na' bichle da' zjadede' na' mechw dan' besele'ede' čhen goseyisen' lao yogo'lole' con da' beseyaže je to toe'.

⁴⁶ Na' tža tža besedop besežague' yodao' blaona' na' lecze do laže' gose'ej gosagüe' txen liž to togaque' na' gosenite' mbalaz.

⁴⁷ Gosenita'teze' gosonxene' Diosen'. Na' gosazlaže' bene' yezica'chle can' gosone'na'. Na' tža tža Xancho Diosen' bene' cont gosanch bene' ca' gosejnilaže' Jesucriston'.

3*Beyac to bene' nxinj ni'e*

¹ Na' to ža Pedroa' na' Juan ja'aque' yodao' blaona' do cheda šone, hor cate' bene' Israel ca' chosoł güiže' Diosen' yogo' ža.

² Na' gwzoa to bene' nxinj ni'e ca' goljte' na' yogo' ža gosebec bene' le' cho'a puert che yodao'na', puert dan' nzi' Puert Xdan, cont gwñabe' mechw lao bene' ca' chja'ac yodao'na'.

³ Nach cate' bžin Pedroa' len Juan yodao'na' na' ben' nxinj ni'ena' boł güiže' legaque' yosonežjue'ne' mechw.

⁴ Nach Pedroa' len Juanna' gosebeze' na' goseña'chgüe' le' na' Pedroa' gože'ne':

—Gwña' neto'.

⁵ Na' bena' bene' xbab yosonežjue'ne' mechw.

⁶ Perw Pedroa' gože'ne':

—Bibi mechw chia' de da' goña' le', perw zoa to da' gona' gaclena' le': len yela' guac che Jesucriston' bene' naque' bene' yež Nazaret, chona' mandadw gwzoža' na' gwda.

⁷ Na' Pedroa' bexo'e ne'e licha na' bsože'ene', na' gocte gwzeche' na' ni'ena' la' besyeyacten da' gual na' lecz ca' bečj ni'e ca'.

⁸ Na' cate' gocbe'ede' ba besyeyac ni'en', bxite' yela' chbe che'. Na' gwyo'e chašil che yodao'na' len legaque' chxite' na' cho'e yela' choxclen che Diosen'.

⁹ Na' bene' ca' že' chašilen' besele'ede' can' chde' chxite' cho'e yela' choxclen che Diosen'.

¹⁰ Na' besyeyombi'e le' naque' ben' chbe' chñab mechw yogo' ža cho'a puert che yodao'na', puert dan' nzi' Puert Xdan, na' leca besyebande' da' ba beyac ni'ena'.

Pedroa' be'e xtiža' Diosen' chašil yodaon'

¹¹ Na' gosenite' chašil da' nzi' Chašil che da' Salomón dan' ze gan' zoa' yodao'na'. Na' ben' beyac ni'ena' bi bsane' Pedroa' len Juanna'. Nach yogo' bene' že' yodaon' besežagsese' chašila' cont jasene'e ben' beyaquen', le besyebanchgüede'.

¹² Na' cate' Pedroa' ble'ede' ba zjanžag bene' zan gan' nite'na' nach be'lene' legaque' diža', gože' legaque':

—Le'e bene' gualaž chia' bene' Israel, žbixčhen' chebanele? žČhaquele len yela' guac četon' bento' cont beyac bengä? žše chaquele beyaque' dan' chonchguato' can' chazlaže' Diosen'? Bi naquen ca'.

13 Dios ben' gosonxen da' xoxxta' ocho Abraham, Isaac na' Jacob, blo'e nac Xi'ine' Jesúsen' bene' zaca' juisyw. Perw le'e bdele Jesúsen' lo' na' justis ca' cont gosote'ne' na' bzonle cate' Pilaton' goclaze' gwsane'ne'.

14 Can' benle len Jesúsen' la'czla' naque' bene' laždao' xilaže' juisyw na' naque' la'zelagüe bene' chon da' güen. Nach gwnable bosan Pilaton' to bene' güetw bene' na' bi gwnable yosane' Jesúsen'.

15 Na' ca nac Jesúsen' ben' bxe yela' mban toli tocane, le'na' betwle, perw na' Diosen' bechis bosbane' le' ladjo bene' guat ca'. Neto' ble'eto'ne' na' choe'to diža' ba bebane' ladjo bene' guat ca'.

16 Na' chle'ele benga cbi goc se'e na' nombialne', na' na'a ba beyac ni'ena' len yela' guac che Jesúsen' ben' chejnilaže'to'. Le da' chejnilaže'to' Jesúsen', da'nan' besyeyacšagüe' ni'a benga na' ba chle'ele can' beyaquen'.

17 Bene' migw, nezda' le'e na' bene' gole blao chele ca' betwle Jesúsen' lagüe bi gwejni'ile Diosen' gwsele'ne'.

18 Na' da' benle ca', goc can' gwna Diosen' gac, da' bene' mandadw bosozoj da' bene' ca' goso'e xtižen' cani', bosozoje' che Criston' ben' gwlej Diosen' cont nabi'e. Bosozoje' che' gosene' yosochi yososaca' bene' le'.

19 Da'nan' le yeyonšca xbab chele na' le yetinje xtoła' len' cont Xancho Diosen' gwnitlagüen' na' gone' ga soale mbalaz.

20 Nach Xancho Diosen' sele' Jesúsen' yežlio nga yetni'a, ben' gwleje' cani'te cont naque' Cristo checho.

21 Perw chonen byen yega'an Jesucriston' yaban' na'a, na' cate' žin ža gon Diosen' cont yežlio nga yeyaquen da' cobe, cana' yide' yeto. Ca' gosena bene' gwleje' cani' cont goso'e xtižen'.

22 Da' Moisésen' be'lene' da' xoxxta' ocho diža', gože' legaque': "Xancho Diosen' sele' yeto bene' gualaż chechon' cont güe'lene' le'e xtiže'na' can' gwsele' neda'. Che bena' gwzenagle bite'tez ne'.

23 Na' Diosen' gone' yesebiayi' yogo' bene' ca' cbi yosozenague' che bena' selen', na' bich yesenite' txen len bene' ca' chesonxene' le'." Can' gož Moisésen' da' xoxxta' ocho ca'.

24 Lecz ca' yogo'lol bene' goso'e xtiža' Diosen' cani', gwzolozen len da' Samuel na' yogo' bene' ca' gosedeč, goso'e diža' che da' ca' ba chac tiemp na'a.

25 Le'e nacle xi'in diaža che da' bene' ca', na' dan' gož Diosen' legaque' gone', na' dan' gože' yezica'chle xoxxta'ole ca', lecz naquen che le'e. Gože' da' Abrahamna': "To bene' galje lo diaža chio' gone' cont bene' že' doxen yežlion' nite' mbalaz."

26 Da'nan' cate' Diosen' bosbane' Xi'ine' Criston' ladjo bene' guat ca', zgua'tec gwsele'ne' lao chio' bene' Israel da' goclaze' gaclene' chio' cont to tocho yetinjecho xtoła'chon'.

4

Pedroa' na' Juanna' nite' lao bene' gwnabia' ca'

1 Ne' chesoe'lente Pedroa' na' Juanna' bene' ca' diža' cate' besežin bal bxož che bene' Israel ca', na' bene' gwnabia' che ben' chesape' yodao' blao čegaque'na' na' bene' saduceo ca' bene' cbi chesejle'e še yesyeban bene' guat ca'.

2 Bene' ca' cheseže'e che dan' chososed chosolo'e Pedroa' len Juanna', le chesene' nezecho gwžin ža cate' yesyeban bene' guat ca' da' beban Jesúsen'.

³ Na' bene' blao ca' gosezene' Pedroa' len Juanna' na' goseyixjue' legaque' ližya do yel, le ba chxin na' bi goła' yesone' yela' justis čhegaquen' ca cheyala' že' na', san bosocuezen' beteyoch.

⁴ Na' ca nac bene' ca' gosende' chesoe' Pedroa' na' Juanna' xtiža' Diosen', zane' gosejnilaže' Criston', na' txen len bene' ca' ba gosejnilaže' ne' cana', gosac do gayo' mil bene' byo cbi cuent no'ole.

⁵ Na' beteyo bene' gwnabia' che bene' Israel ca', bene' gole blao ca' na' bene' bososed bosolo'e ley dan' bzoj da' Moisés, besedop besežague' ciuda Jerusalénna'

⁶ len Anás ben' naquech bxož blao, na' len Caifás, na' Juan, na' Alejandro na' nochle bene' zjanaque' biše' ljež ben' naquech bxož blaon'.

⁷ Na' gosone' mandadw jaxexi'e Pedroa' na' Juanna' na' cate' ba zjazie' laogaquen' gosenabde' legaque':

—¿No ben' lsens čhele cont beyonle bene' nxinjen'? o ¿no yela' guac čhe bchinle beyonlene'?

⁸ Na' Spiritw che Diosen' dan' yo'o lo' yichjlaždao' Pedroa' benen cont gože' bene' ca':

—Le'e bene' gwnabia' na' bene' gole bene' blao čhe nación Israel čhechon',

⁹ chnable nac bento' da' güen beyonto' bena' nxinj ni'ena'.

¹⁰ Le'e na' yogo' bene' gualaž cheyala' nezele Jesucriston' ben' naque' bene' Nazaret bene' yela' guac čhe' cont beyacšagüe' benga. Le'e betwle Jesucriston' bda'ln'e' to le'e yag cruz, perw Diosen' bečhis bosbane'ne' ladjo bene' guat ca'.

¹¹ Bi gwyejle'le čhe Jesucriston', da'n'an' zaca'leble ca' bene' cheson yo'o bene' bi chesazlaže' yej güen da' ba naquen yej squin čhe yo'ona'.

¹² Toze Jesucriston' guac gone' chio' yela' mban toli' točane, na' noch no zoa doxen lo' yežlion' bene' gac gone' yela' mban toli' točane čhe chio' benach.

¹³ Besyebane bene' gwnabian' can' boži'i Pedroa' na' Juanna' xtiža'gaquen' sin cbi besežebe', le nachbia' zjanaque' bene' yixe' na' bi zjansedteque'. Nach gosacbe'ede' legaquen' ba gosedalene' Jesúsen'.

¹⁴ Na' dan' zecha ben' beyaque' ni'ena' txen len Pedroa' na' Juanna', bi besyežele bene' gwnabian' bi yesene' čhegaque'.

¹⁵ Nach bene' gwnabian' besyebeje' postlw ca' chy'ole šlac bosoxi'e legacze' nacle yesone'.

¹⁶ Na' bene' gwnabian' gose' lježgaque':

—¿Bi goncho len bene' quinga? Yogo' bene' že' ciuda Jerusalén ni zjanezde' gosone' to yela' guac xen na' bi gac ye'cho bene' bi gosone' yela' guaquen'.

¹⁷ Letečhoze goncho cont cbi gaslas diža' dan' cheso'ena'. Da'n'an' cheyala' ye'cho legaque' gata' castigw čhegaque' še yesoe'che' xtiža' Jesúsen'.

¹⁸ Nach gosaxe' Pedroa' na' Juanna' da' yoble na' gose'e' legaque' bich yeso'e' diža' čhe Jesúsen' na' noch no yososed yosolo'ede'.

¹⁹ Nach Pedroa' na' Juanna' bosyoži'e xtižen' gose'e' legaque':

—Le gon xbab čhe da' nga, čhačaquele chačlaže' Diosen' gwzenagto' čhele o še chačlaže' gwzenagto' čhe le'?

²⁰ Bi gac cuezto' bich güe'to' diža' čhe da' ba ble'eto' na' ba beneto'.

²¹⁻²² Na' da' zan da' gose' bene' gwnabia' ca' legaque' cont yosošebe'ne'. Perw na' bi beseželde' nacle yesone' legaque' castigw, le bene' zan chesonxene' Diosen' dan' beyac bena' len yela' guac čhe Diosen'. Ba gwdie' čhoa iz na' ca goljte' bi goc se'e. Nach bososane' Pedroa' na' Juanna'.

Gosenabde' Diosen' gaclene' yeso'e xtiže'na' sin cbi yesežebe'

²³ Na' Pedroa' len Juanna' cate' bososan bene' gwnabian' legaque' jaya'aque' gan' nita' yezica'chle bene' chesejnilaže' Criston' na' gosoe'lene' legaque' diža' yogo'lol' can' gose' bꝑoz gwnabia' ca' na' bene' gole blao ca' legaque'.

²⁴ Na' cate' gosende' dan' gose' Pedroa' len Juanna' legaque', toze can' gosone' xbab na' bosol' güiže' Diosen', gosone':

—Xanto' Dios, len' beno' yaban' na' yežlion' na' nisaon'. Len' beno' beṇaḥ na' be ca' chesaš na' bica'chle da' zjade, na' len' chnabi'o doxen.

²⁵ Na' le' beno' cont da' rey David bzoje' diža' quinga dan' gož Spiritw ḥion' le', žan:

Bene' ca' cbi zjanaque' bene' Israel chesase' contr le', Xanto' Dios, perw bicze gac can' chesone' xbaben'.

²⁶ Bene' gwnabia' che nación ca' na' che yež ca' txen zjanaque' chesone' contr le' Xanto' Dios, na' contr Xi'ino' Criston' ben' gwselo' cont ṇabi'e.

²⁷ Na' Xanto' Dios, naquen da' li rey Herodes na' Poncio Pilato na' bene' cbi zjanaque' bene' Israel gosaque' txen len bene' Israel ca' lo ciuda nga. Na' yogüe' gosone' txen cont gosote' Xi'ino' Jesús'en' ben' nac bene' laždao' xilaže' juisyw, ben' gwlejo' cont ṇabi'e.

²⁸ Gosone' can' gwḥogbi'o gac dan' bžio' bia' cani'te.

²⁹ Na' na'a Xanto', gwṇa can' cheson bene' gwnabia' ca', le chesacłaže' yosošebe' neto' bene' güen žin ḥio'. Na' goclen neto' cont bi žebto' güe'to' xtižo'na'.

³⁰ Na' cate' güe'to' xtižo'na' blo'ešca yeļa' guac che Xi'ino' Jesús'en' bene' laždao' xilaže' juisyon' cont gac yeļa' guac, na' yesyeyac no bene' chesacšene na' gac bichle da' yesyebane bene'.

³¹ Na' cate' beyož bosol' güiže' Diosen', Diosen' bene' gwxo' gan' zjandop zjanžague'na' na' Spiritw che'na' gwzoachguan len legaque', nach goso'e xtiža' Diosen' sin cbi besežebe'.

Gosone' dan' zjade chegaque' toze

³² Na' yogo' bene' ca' gosejnilaže' Criston' toz ca gosac yichjlažda'ogaque'. Na' yogo' bi da' zjade chegaque' gosonen' toze, na' nono gwna: “Chia' da' nga”, o “Chia' da' na’”, le naquen che yogo'lol' gaque'.

³³ Na' postlw ca' len yeļa' guac xen che Diosen' bosozejni'ide' bene' Jesús'en' bebane' ladjo bene' guat ca'. Na' Diosen' goclenḥgüe' legaque' len bi dan' gosone'.

³⁴ Na' bibi goc falt bi da' beseyažje bene' gosejnilaže' Criston', le bene' zjanape' no yežlio o no yo'o gosoten'. Na' mechw dan' besele'ede' che to ton

³⁵ bosonežjuen' postlw ca', na' postlw ca' goseyisen' len bene' beseyažjden'.

³⁶ Can' ben to bene' Chipre bene' le José. Naque' xi'in diaža che da' Levin' na' postlw ca' bososi'ene' Bernabé, zeje diža' ben' cheyonxenlaže' bene'.

³⁷ Joséna' bete' to yežlio che' na' mechw dan' ble'ede' chen bnežjuen' postlw ca'.

5*Da' mal dan' goson Ananías na' Safira*

¹ Na' zoa to bene' le Ananías na' no'ol che'na' Safira, na' gosote' to yežlio chegaquen'.

² Perw na' legacze' bosoxi'e yosonežjue' late'ze mechw dan' besele'ede' čhen na' yese'e postlw ca' doxenenna'. Nach gwyej Ananiasen' na' bnežjue' postlw ca' mechon'.

³ Nach Pedroa' gože'ne':

—Ananías, žbixchen' bzenago' che Satanás dan' chnabia' da' xigüe' ca' na' chacdo' xoayago' Špiritw che Diosen'? Chi'o neto' chono' doxen mechon' dan' ble'edo' che yežlion', len ba gwlo'ošagüe'le laten' par cuinle.

⁴ Čhio' yežlion' cate' bina' goton', na' čhio' mechon' dan' ble'edo' cate' beton' na' zaco' cont beno' da' chaclažo' len len. žBixchen' benle da' malen' nac ca'? Gague contr neton' ba benle benlaže'le, san contr Diosen'.

⁵ Nach Ananiasen' cate' bende' xtiža' Pedroa' to gwbižze' na' gote'. Na' yogo' bene' ca' gosende' diža' can' goquen' besežebchgüe'.

⁶ Na' besežin to čhope bene' xcuide' gan' gwbiž da' Ananiasen' na' bosyočhele' cuerp čhen' to lache' na' besyeyo'ene' ga bosocuaše'ne'.

⁷ Na' gwde do šon hor gote' cate' bžin no'ol čhe'na' na' gwyo'e lo' yo'on sin cbi nežde' bin' ba goc che bene' čhen'.

⁸ Na' Pedroa' gože'ne':

—žTo ca'te' ble'ele che yežlion'?

Na' Safiran' gože'ne':

—To ca'te'ten'.

⁹ Nach Pedroa' gože' no'olen':

—žBixchen' goco' toze len bene' chion' chaquele gonle Diosen' prueba še lede' can' že' bi cheyala' xoayagcho? Cho'a puert nga zjazeera bene' ba bosocuaše' bene' čhio'na' na' na'a yeso'e le'.

¹⁰ Na' la' gwbižte Safiran' lao Pedroa' na' gote'. Na' cate' goso'o bene' xcuide' ca' lo' yo'ona' besele'ede' ba gote' nach goso'ene' jasecuaše'ne' cuit da' bene' čhe'na'.

¹¹ Na' yogo' bene' chesejnilaže' Criston' besežebe' can' goquen' na' lecze besežeb yezica'chle bene' gosende' diža' can' goquen'.

Gosone' da' zan yela' guac

¹² Na' postlw ca' gosone' da' zan yela' guac na' bichle da' besele'e bene' da' zaca' yesyebande'. Na' bene' ca' chesejnilaže' Xancho Jesucriston' chesedop chesežague' txen čašil che yodao' blaona' gan' nzi' Čašil che da' Salomón.

¹³ Na' yezica'chle bene' ca' že' Jerusalénna' gosapchgüe' legaque' bala'añ, la'czla' besežebe' yesaque' txen len legaque'.

¹⁴ Perw na' zane' gosejnilaže' Xančhon' na' gosaque' txen, zan bene' byo na' no'ole.

¹⁵ Na' cate' no' bene' gosacšende' goseyixjue' legaque' tnez do lo cam do lo yagla', gosebeze' te Pedroa' cont yesechele' bxin čhe' na' yesyeyacde' še bi yižgüen' chese'ede'.

¹⁶ Na' bene' ca' že' yež da' zjachi' gala'ze ciuda Jerusalénna' ja'aque' zjanče'e bene' chesacšene' na' bene' zjajo'o zjanyaz da' xigüe'. Na' yogo' lole' besyeyacde'.

Bene' saduceo ca' goseyixjue' Pedroa' len Juanna' ližya

¹⁷ Nach ben' nacch bxož blao na' yezica'chle bene' saduceo bene' cbi chesejle' yesyeban bene' guat, besegue'ede' postlw ca'.

¹⁸ Na' gosezene'ne' na' goseyixjue' legaque' ližya.

¹⁹ Na' to angl bene' za' gan' zoa Xancho Diosen' bžine' ližyan' šeže'le na' gwsaljue' puert ca' na' bebeje' legaque'. Na' gože' legaque':

20 —Le šja'ac yodao' blaona' na' le güe' diža' len ben' chesežagna' naquen' yesone' cont gata' yela' mban čhegaque' toli tocañe.

21 Nach dan' gosende' can' gož anglen' legaque', ja'aque' yodao' blaona' cate' gwyeni' na' bososed bosolo'ede' ben' zjanžag na'.

Na' ben' nac bχoz blao len beñe' gole blao ca' chesenabia' nación Israelen' besedobe' cont bosoxi'e, nach gosone' mandaw šjasexi'e postlw ca' gan' zjade' ližyan'.

22 Na' cate' ben' chesap yodaon' besežine' ližyan' gague no postlw ca' zjanla' na' jaya'aque' lao beñe' gwnabia' ca' jasyedixjue'ede'.

23 Gose'e beñe' ca':

—Nyeyjwčhač ližyan' na' lecze na' nita' soldaw ca' cho'a puerta' chesapen' perw cate' gwsaljwto' puerten' gague no postlw ca' že' lo' ližyan'.

24 Na' ben' nach bχoz blao na' beñe' gwnabia' che ben' chesap yodaon' na' bχoz gole blao ca' cate' gosende' rsonna' besyebande', gosene':

—¿Nac gac da' nga na'a?

25 Na' šlac chesacžejlaže', bžin to beñe' gože' legaque':

—Beñe' ca' gwdixjwle ližyan' zjaze' chašil che yodao' blaona' chososed chosolo'ede' beñe'.

26 Nach beñe' gwnabia' che ben' chesap yodaon' len beñe' gop ca' jasa'aque' jasexi'e postlw ca' diža' šagüe'. Bi gosone' znia len legaque' da' besežebe' beñe' chosozenag xtiža' postlw ca' še yosožie' legaque' yej.

27 Na' cate' besežin postlw ca' lao beñe' gwnabia' ben' nita' chosoxi'a, nach ben' nach bχoz blao gože' legaque':

28 —Ba bento' mandaw bi güe'le diža' che Jesúsen' na' bich gwsed gwlo'ele beñe' xtižen', na' ba gwdisle xtiže'na' doxen ciuda Jerusalénna'. Na' ba chosbage'le neto' žale betwto'ne'.

29 Nach Pedroa' na' postlw ca' gose'e legaque':

—Nacchen da' žialao xen gwzenagto' che Diosen' clal ca' che beñe'.

30 Le'e betwle Jesúsen' bda'ln'e to le'e yag cruz, perw Dios ben' chonxencho na' ben' gosonxen da' xozxta' ocho ca' bechis bosbane'ne' ladjo beñe' guat ca'.

31 Na' na'a Diosen' ba bnežjue'ne' yela' bala'an xen na' yela' gwnabia' xen cont chnabi'e na' chnežjue' yela' mban toli tocañe che beñe' chesejnilaže'ne'. Na' le'na' chazlaže' gaclene' yogo' chio' beñe' Israel yetinjecho xtoła'chon' nach yezi'xene' chechon'.

32 Neto' nezeto' can' ben Diosen' len Jesúsen' na' choe'to' diža' čhen, na' lecze Spiritw che Diosen' choen' diža' che Jesúsen' lo' yichjlažda'oton', le Diosen' ba gwsele' Spiritw čhen' zoan lo' yichjlaždao' beñe' chosozenag che'.

33 Na' beseža'achgua beñe' gwnabia' ca' cate' gosende' can' gož Pedroa' legaque' na' gosaclaže' yesote' postlw ca'.

34 Perw gwzoa to beñe' fariseo len legaque' beñe' le Gamaliel. Čsed chlo'ede' beñe' ley dan' bzoj da' Moisésen' na' gosapčgua beñe' le' bala'an. Na' Gamalielen' gwzeche' na' beñe' mandaw yesechoj postlw ca' chyole šlac güe'lene' beñe' ca' že'na' diža'.

35 Na' gože' beñe' ca' že'na':

—Beñe' gualaž, cheyala' goncho xbab nac goncho len beñe' quinga cont goncho da' nac güen.

36 Le yosa'laže' can' goc cate' bchoj ben' le Teudas gwne' naque' beñe' zaque'. Na' do tap gayoa beñe' bosozenag che' na' gosaque' le' txen. Perw na' bžin ža gosot beñe' le' na' besyeyaslas ben' gosaque' le' txen, gague bi gocch yesone'.

³⁷ Na' gwdechle ca tiempen' bosochēle' bał bene' že' to to yež, bchoj to bene' distritw Galilea ben' le Judas na' bene' zan gosaque'ne' txen. Na' ľecze bžin ža gosote'ne' na' bene' ca' gosaque' le' txen ľecze besyeyaslase'.

³⁸ Na' da'nān' žia' le'e can' chacda' cheyała' goncho, jaseye bene' quinga, bibi gonecho ľegaque'. Le še chososed chosolo'ede' xbab čhegacze', yeniten.

³⁹ Na' še dan' chososed chosolo'ede' naquen čhe Dios, bibi gac goncho cont cbi gaslasen. Cheyała' gwsaca'cho cont bi tilľencho Diosen'.

⁴⁰ Na' gosazlaže' bene' gwnabia' ca' can' gož Gamalielen' ľegaque'. Nach gosaxe' postlw ca' na' goseyine' ľegaque' na' gosone' mandadw bich yososed yosolo'ede' che Jesúsen' bate'tezechle. Nach bososane' ľegaque'.

⁴¹ Na' ca nac postlw ca', cate' besyechoje' gan' gota' yela' güexian', chesyebede', le Diosen' be'e latje bosochi bososaca' bene' ľegaque' neče dan' chososed chosolo'ede' čhe Jesúsen'.

⁴² Na' yogo' ža bososed bosolo'ech postlw ca' čhe Jesucriston' do liž bene' na' cate' chja'aque' yodao' blaona'.

6

Bene' ca' chesejnilaže' Criston' gosebeje' gaže bene' goson žin bixjw

¹ Na' ca tiempen' zej chanch bene' ca' chesejnilaže' Jesucriston' na' bene' ca' cheso'e diža' griego gwzolao chesežeše', chesene' no'ol güezeb ca' nčixē ľegaque' bi chesezi'e lebe len no'ole güezeb ca' cheso'e diža' hebreo cate' chesyise' dan' chese'ej chesagw to togaque'.

² Nach postlw ca' šiziw bosyotobe' yezica'chle bene' ca' chesejnilaže' Jesucriston' na' gose'e ľegaque':

—Bi naquen güen neto' gwsanto' bich gwsed gwlo'eto' bene' xtiža' Diosen' cont čhísto' dan' yese'ej yesagw bene'.

³ Da'nān' bene' migw, le cuej gaže bene' ľježle, bene' zoachgua Spiritw čhe Diosen' len ľegaque', bene' zjanac bene' sina' na' bene' cheson da' güen, na' le gon lo na'gaque' yesyise' dan' yese'ej yesagw bene' ca'.

⁴ Na' neto' soateze soato' yol güižto' Diosen' na' gwsed gwlo'eto' bene' xtižen'.

⁵ Na' gosazlaže' yogo' bene' ca' na' gosone' can' gose' postlw ca' ľegaque', na' gosebeje' to bene' le Esteban bene' chejnilaže' chgua Diosen' na' zoachgua Spiritw čhe Diosen' len le'. Na' ľecze gosebeje' Felipe, na' Prócoro, na' Nicanor, na' Timón, na' Parmenas, na' Nicolás bene' ciuda Antioquía ben' bene' txen len bene' Israel.

⁶ Na' bosozoe' ľegaque' lao postlw ca' na' postlw ca' bosol güiže' Diosen' čhegaque' na' gosexoā na'gaquen' yičhj bene' ca' cont gosezi' lo ne'e žin dan' yesonen'.

⁷ Na' bene' zanch gosende' xtiža' Xancho Jesucriston', na' zan bene' Jerusalénna' gosejnilaže'ne' na' ľecze zan bxož ca' bosozenague' na' gosejle'e xtiže'na'.

Gosezene' Esteban

⁸ Na' Estebanna' gwzoachgua yela' guac čhe Diosen' len le' na' Diosen' goclenchgüe' le'. Da'nān' bene' yela' guac na' bichle da' zaca' yesyebane bene' lao bene' ca' že' na'.

⁹ Na' zoa to yodao' dan' chesene' Yodao' čhe Bene' ca' Bich Zjanaque' Esclavos. Bene' ca' chesedop chesežag yodao'na' za'aque' ciuda Cirene na' ciuda Alejandría na' distritw Cilicia na' distritw Asia. Na' bał bene' ca' gwzolao gosacyože' len Estebanna',

¹⁰ perw na' bi besyezelde' nac yosyoži'e xtižen', le Spiritw che Diosen' bnežjon le' yela' sina' na' bzejni'in le' bin' gwne'.

¹¹ Nach gosego'oyele' to chop bene' cont goso'e diža' güenlaže' che', gosene' Estebanna' gwneye'e che da' Moisésen' ben' bzoj ley che bene' Israel ca'. Na' lecze gosene' Estebanna' gwne' diža' ya' che Diosen'.

¹² Na' bene' ca' gosacyože' che Estebanna' bosota bosone' bene' lo ciuda na' bene' gole blao che bene' Israel ca' na' bene' ca' chososed chosoło'ede' ley dan' bzoj da' Moisésen' cont gosaque' toze. Na' ja'acese' gan' zoa Estebanna' na' gosezene'ne' na' goseche'ene' gan' že' bene' ca' chesenabia' nación Israelen'.

¹³ Na' goseyiljue' bene' goso'e diža' güenlaže' bene' gosene' che':

—Benga bicze šize zoe' chne' diža' bya' che yodao' blao che Diosen' nga na' ley dan' bzoj da' Moisés.

¹⁴ Ba beneto' že' Jesús ben' naque' bene' yež Nazaret yochinje' yodao' blaona' na' yoše'e costumbr checho dan' ben da' Moisés mandadw na'ocho.

¹⁵ Na' yogo' bene' ca' zjachi' gan' chesone' yela' justisen' gosene'e cho'alao Estebanna' na' besele'ede' chactiten ca' cho'alao angl.

7

Choe' Estebanna' diža'

¹ Nach ben' nacch bꝛoz blaona' gože' Estebanna':

—¿Naquen can' chesena bene' quinga?

² Na' Estebanna' gože' legaque':

—Le'e bene' gole na' note'teze bene' gualaž, le gwzenag chia' len to chop da' nia' le'e. Diosen' ben' nac la'zelagüe bene' zaca' blo'elagüe' da' xozxta'ócho Abraham cate' gwzoe' distritw Mesopotamia cate' za' šjasoe' ciuda Harán.

³ Na' Diosen' gože'ne': “Bchoj lažo' na' gwlejiyichj bene' biše' lježo' na' gwyej jasoa latje gan' gwlo'eda' le'.”

⁴ Beyož gož Diosen' Abrahanna' ca', nach Abrahanna' bchoje' gan' že' bene' Caldea ca' na' jasoe' Harán. Na' bžin ža got da' xe'na' na' gwdechle Diosen' gwche'e da' Abrahanna' gan' zoacho nga.

⁵ Diosen' bi bnežjue' da' Abrahanna' yežlio gaquen che', ne late' da'ozen', san gwne' gaquen che xi'in diaža che' cate' ba gote', la'czla' nono xi'ine' na' soa cate' gož Diosen' le' ca'.

⁶ Nach Diosen' gwne' šjasenite' laž bene' zito' tap gayoa iz ga yesaque' esclavos na' yesežaglaochgüe'.

⁷ Nach Diosen' lecze gože'ne': “Neda' gwnežjua' castigw che nación gan' yesone' xi'in diaža chio' ca' esclavos na' gona' cont yesyechoje' naciónna' na' yeside' yesonxene' neda' nga.”

⁸ Nach Diosen' gože' Abrahanna' gone' güen len xi'in diaža che'na'. Na' bene' mandadw soa Abrahanna' to seřw dan' že' circuncisión, le' na' len bene' byo ca' zjanaque' diaža che', cont gacbia' le chesejle'e che dan' gwna Diosen'. Da'na'na' cate' golje xi'ine' Isaaquen' bzo'e'be' seřw to xmanzebe', na' lecze can' ben da' Isaaquen' cate' gol je xi'ine' Jacob. Na' ca'cze ben da' Jacoben' len da' xi'ine' ca' šižinw, bene' ca' gosac šižinw diaža che bene' Israel.

⁹ Na' xi'in da' Jacoben' ben' le José, bene' biše' ca' gosacxi'ede' le' na' gosote'ne' gosezi' bene' nación Egipto le'. Perw Diosen' gwzoe' len Josén'.

¹⁰ Na' goclene'ne' len yogo'loł da' bžaglagüe'. Na' Diosen' bene' cont da' faraón ben' chnabia' Egipton' bebede' Josén' na' gocbe'ede' naque' bene' sina'.

Na' da'nan' faraónna' gwleje' le' cont goque' gobernador che nación Egipton' na' bene' lo ne'e ližen' na' yežlio che'na'.

11 Na' goc gwbin doxen Egipton' na' lecze can' goc gan' nzi' distritw Canaán na' da' xoxxta' ocho ca' bi beseželde' da' yesagüe' na' besežaglaochgüe'.

12 Perw na' bžin ža da' Jacoben' bende' diža' de trigw Egipton' na' gwsele' da' xoxxta' ocho ca' jasexi'en da' nechw.

13 Na' bechop ni'a ja'aque' cate' ben Josén' ga besyeyombia' bene' biše' ca' le', nach gwneze faraónna' can' nac diaža che Josén'.

14 Na' Josén' bene' mandadw šjasexi'e xagaque' Jacoben' na' yogo'lo' biše' lježe' ca', zjanaque' ca do gayonšino' bene'.

15 Can' goc gwey Jacoben' jasoe' Egipton' na' Egiptona' gote', na' lecz na' gosat xi'ine' ca' bene' ca' gosac xoxxta' ocho.

16 Na' gwdechle besyeyo'e žit benat chegaquen' na' jasecuaše'ne' to lo' bloj ba da' gosone' yež gan' nzi' Siquem. Da' Abrahanna' gwxi'e ban' cani'te che xi'in da' Hamor gwduxjen' mechw.

17 'Na' cate' ba zoa žin tiemp gwnežjo Diosen' legaque' yežlio can' gože' Abrahanna', ba zej chan bene' Israel ca' že' laž bene' Egipto ca'.

18 Na' ca' chac beža' rey che Egipton' na' rey coben' bi gwneze' can' goclen Josén' nación chen'.

19 Na' rey nga gw diljwlaže' bi da' mal bene' len da' xoxxta' ocho bene' Israel ca' na' bene' mandadw šjasecho'on xi'ingaque'na' cont yesatbe'.

20 Na' ca' tiempen' golje da' Moisésen' na' bebe Diosen' lebe', na' xaxna'be' bososcha'ogüe'be' šone bio'.

21 Perw na' bžin ža jasecho'on šaze'be' na' xi'in faraónna' to no'ole beželde'be' na' beyo'ebe' liže' boscha'ogüe'be' ca' xi'ine'.

22 Ca' goquen' bsd da' Moisésen' tcho'a yela' sina' che bene' Egipto ca' na' bene' da' zaca' na' be'e diža' da' zaca'.

23 Na' čhoa ize da' Moisésen' cate' gwnan šjane'e bene' Israel gualaž che' ca'.

24 Na' jale'ede' to bene' Egipto chči chsaque' to bene' Israelen'. Nach da' Moisésen' betue' bene' Egipton', boži'e da' malen' bende' bene' gualaž che'na'.

25 Bene' xbab godce' yesache'e bene' gualaž che' chaclen Diosen' le' cont yosle' legaque' lo' na' bene' Egipto ca', perw bi gosache'ede'.

26 Na' beteyo gosedič chopze bene' Israel. Na' bžin da' Moisésen' godce' gone' cont yesenite' binlo, na' gože' legaque': "čBixčen' chdil len lježle le'e nacle bene' gualažže?"

27 Nach ben' nap doła'na' bžigue' da' Moisésen' ca'ale gože'ne': "čNo gwna le' gaco' bene' gwnabia' cont gono' yela' justis četo'na'?"

28 čLez chaclažo' goto' neda' can' beto' bene' Egipton' neje?"

29 Na' cate' bene da' Moisésen' can' gož bena' le' nach bxonje' jasoe' nación gan' nzi' Madián la'czla' naque' bene' zito' len bene' ca'. Na' bšagne'e na' gwnita' chope xi'ine'.

30 Na' goc čhoa iz zoe' na', cate' to angl bene' gwseła' Dios blo'elagüe' le' latje dašen' gala'ze Ya'a Sinaí, yo'o anglen' to lo' yi' bel chdoljen to lo' yag xis yeše'.

31 Na' cate' ble'e da' Moisésen' can' chaquen' bebande' nach gwbigue' yelate' cont ble'ešagüe'de' na' bende' cho' güiž Xancho Diosen' le', che'ene'.

32 "Neda' naca' Dios ben' chonxen Abraham, ben' chonxen Isaac, na' ben' chonxen Jacob." Nach da' Moisésen' gw xize' catec bžebe', gague cheyaxjde' ne'e.

33 Na' gož Xanchon' le': "Gwlečhj xelo'na' cont gapo' neda' bala'an, le latje gan' zechao'na' naquen chia'.

34 Neda' ba ble'eda' yela' yaše' yela' zi' da' chde nación chia' Israelen' bene' že' Egipton' na' ba benda' ca chesonyaše'. Da'na'na' gaclena' legaque'. Beda na'a cont seła' le' Egipton'."

35 'Diosen' gože'ne' ca' la'czła' bene' Israel ca' chi gosezi'e che', gose'e Moisésen': "¿No gwna le' gaco' bene' gwnabia' cont gono' yela' justis cheto?" Diosen' gwsele' da' Moisésen' cont gwnabi'e da' xozxta'ocho ca' na' cont bebeje' legaque' lo na' bene' Egipto ca', na' angl che Diosen' ben' ble'e da' Moisésen' lo' yi' bel gwzoe' goclene'ne'.

36 Na' da' Moisésen' bebeje' legaque' Egipton' gan' bene' zan yela' guac na' bichle da' zaca' yebane bene', na' lecž ca' bene' cate' besežine' Nisdao' Xnan' na' šlac gosenite' latje dašen' čhoa iz.

37 Na' da' Moisésnan' gože' da' xozxta'ocho ca': "Xancho Diosen' sełe' yeto bene' gualaż chechon' cont gü'lene' le'e xtiže'na' can' gwsele' neda'. Che benan' gwzenagle."

38 Da' Moisésen' gwzoe' len da' xozxta'ocho ca' latje dašen', na' lo Ya'a Sinaín' to angl bene' gwseła' Diosen' gože' le' diža' da' zjansa' yela' mban, na' bzoje' dižan' par chio'.

39 'Perw na' da' xozxta'ocho ca' zan las bi bosozenague' che da' Moisésen', bosozoe'ne' to šla'ale. Gosaclaže' šjaya'aque' Egipton'.

40 Na' šlac zej da' Moisésen' lo Ya'a Sinaí, gose'e bene' biše' Aarónna': "Ben da' le'echo da' šejnilaže' cho na' da' cuialao laocho tnez. Le ca nac Moisésen' ben' bebej chio' Egipton', nono neze bin' ba goc che'."

41 Nach gosone' to me' go'n dao' de oro na' gosote' no beyixe' gosonxene' me' daon', na' gosone' lni che' bena' gosone' len ni'a na'gaque'.

42 Da'n'an' Diosen' gwlejyichje' nación Israelen' na' be'e latje gosejnilaže' gwbiž, bio', na' beljw. Na' da' nga nyojen len dan' bosozoj da' bene' ca' goso'e xtiža' Diosen' cani', žan:

Le'e bene' Israel, gague nedan' benxenle' caten' betwle beyixe' latje dašen' lao čhoa iz.

43 Benle no da' benxenle, na' bia'le yodao' da' chacte chedobe gan' benxenle dan' nzi' Moloc,

na' bia'le beljon' benxenle dan' nzi' Renfán.

Na' dan' ba gwlejyichjle neda', da'n'an' cueja' le'e gan' zoalen' na' seła' le'e nación zito' do gan' nzi' Babilonia.

44 'Na' šlac chesaše' latje dašen', da' xozxta'ocho ca' gosone' to yodao' da' chacte chedobe gan' že' yej ta'a gan' nyoj ley čhegaque'na'. Na' gosonen' con can' gož Diosen' da' Moisésen' na' con can' blo'ede' le'.

45 Nach cate' da' Josué gwče'e legaque' gan' ben Diosen' cont goseque'e yežlio che bene' zito' ca', lecze goso'e yodao' da' chacte chedobe. Na' ne' bosochine' yodaon' bžintem tiemp che da' rey David.

46 Na' Diosen' bebede' da' rey Davin', na' da' Davin' goclaže' gone' to yodao' che Diosen', Dios ben' lecze benxen da' Jacoben' cani'te.

47 Perw na' da' xi'ine' Salomón benen'.

48 Na' Diosen' ben' chnabia' doxen, bi nacho zoe' lo' yo'o da' chon benachen', san chac can' gwna Diosen' dan' bzoj to bene' be' xtiže'na' cani', žan:

49 Neda' zoa' yaba chnabia',

na' guac gona' con bi chazlaža' lo yežlion'.

Na' čchaquele gonle to liža'na'?

Neda' bi chyažjda' yo'o ga yezi'laža'.

⁵⁰ Neda' bena' yogo'te da' zjade.

⁵¹ 'Dan' bi chzenagle, dan' bi chejle'le lo' lažda'olen' nacchguale bene' güedenag can' gosac da' xoxzta'ocho ca'. Bicze chzenagle che Spiritw che Diosen'.

⁵² Da' xoxzta'ocho ca' lecze bosochi bososaque' bene' ca' gosote xtiža' Diosen' cani, na' gosote legaque' caten' gosote diža' can' sela' Diosen' Xi'ine' ben' nac bene' güen juisyw. Na' cate' bide', le'e bdelne' lo' na' bene' ca' gosote'ne' na' le'e naple doła' dan' gosote'nen'.

⁵³ La'czła' nombia'le ley dan' bosonežjw angl ca' da' Moisésen', bi chzenagle chen.

Gosote' Estebanna'

⁵⁴ Na' cate' Esteban' gože' legaque' ca', beselocchgüe' gosagwxetje laye'.

⁵⁵ Perw na' Esteban' gwzoachgua Spiritw che Diosen' len le', bcos lagüen' gwne'e yabale na' ble'ede' chac to be'ni' gual gan' zoa Diosen' na' ble'ede' zecha Jesúsen' cuít Diosen' chnabi'e txen len le'.

⁵⁶ Nach Estebanna' gwne':

—Le na'šc nła'xeje yaban' na' nła' Jesúsen' ben' golje' beñač zeche' cuít Diosen' chnabi'e txen len le'.

⁵⁷ Nach bene' ca' zjanžaguen' leca beseloque' na' bososya'adie' na' bososejyw naggaque'na' na' to ši'ize ja'acese' gan' ze Estebanna'.

⁵⁸ Nach gosebeje' Estebanna' cho'a yež na' bosožie'ne' yej. Na' bene' ca' bosožie' le' yejen' bosonežjue' xagaque' da' zjandobe' to bene' xcuide' bene' le Saulo cont gapen'.

⁵⁹ Na' šlac chosožie' Estebanna' yej, Esteban' bol güiže' Diosen', gwne':

—Xana' Jesús, bezi' neda' yaban'.

⁶⁰ Nach bzoa xibe' lo' yon' na' gwne' zižje, gwne':

—Xana' bi gono' cuent xtoła' bene' quinga dan' chesote' neda'.

Na' beyož gwne' ca', gote'.

8

Saulo bchi bsaque' bene' chesonxen Jesucriston'

¹⁻² Na' ca nac Saulon', gwyazlaže' dan' gosote' da' Estebanna'.

Na' bene' ca' chesejnilaže' Jesucriston' ciuda Jerusalénna' jasecuše' da' Estebanna', na' gosebežchgüe' che'. Na' gwde gosote' da' Estebanna' gosezologüe' bosochi bososaque' bene' ca' chesedop chesežag chesonxene' Jesucriston' Jerusalénna', na' yogo' bene' ca' chesonxen Jesucriston' besyeyasłase', ja'aque' yež ca' zjachi' do distritw Judean', do distritw Samaria, perw gague len postlw ca'.

³ Na' Saulon' gwzologüe' cheje' liž to to bene' ca' chesonxen Jesucriston' chjaxobe' no bene' byo na' no no'ole cont chče'e legaque' ližya.

Bene' ciuda Samaria gosende' diža' güen che Jesucriston'

⁴ Na' bene' ca' chesonxen Jesucriston' ben' besyeyasłase' ja'aque' doxen, jasedixjue'ede' xtiža' Jesucriston'.

⁵ Na' ben' le Felipe bžine' ciuda Samaritan' na' be'e diža' che Jesucriston'.

⁶ Na' cate' gosende' xtižen' na' besele'ede' yela' guac dan' bene' len legaque', bene' zan besedobe' bosozenague' che'.

7 Bebeje' da' xigüe' ca' zjayo'o zjanyaz yichjlaždao' bene' zan, na' cate' besyechojen chososya'adian. Na' zan bene' natzi' late' güeje cuerp chegaque'na' beyone' legaque', lecze beyone' no bene' nxinj ni'e.

8 Na' besyebechgüe bene' ca' že' ciudan'.

9 Na' lo ciudan' zoa to bene' guaža' bene' le Simón. Da' zan da' bene' da' besyebane bene' Samarian' gwziye'e legaque' gože'ne' naque' bene' zaque'.

10 Na' šlac bene' da' ca', yogo' bene' lo ciudan' bosozenague' che' tcho'a, no bene' gole ca' lente no bi' xcuide' ca', gosene' che':

—Le bengan' nse'e yela' guac xen che Diosen'.

11 Zan iz bosozenague' che', le gwziye'e legaque' len yela' guaža' che'na'.

12 Perw cate' Felipen' gwdixjue'ede' diža' güen che Jesucriston' len legaque' na' bzejni'ide' legaque' che yela' chnabia' che Diosen', zane' gosejle'e che' na' gosezoe' nis, bene' byo na' no'ole.

13 Na' lencze Simón gwyejle'e che' na' gwzoe' nis na' gwzolaogüe' gwdalene' Felipen', na' bebande' ca' nac yela' guac ca' dan' chon Felipen' na' yezica'chle da' zaca' yebanecho.

14 Na' postlw ca' nite' ciuda Jerusalénna' gosende' bene' ca' že' ciuda Samaria ba chosozenague' xtiža' Diosen', nach gosesele' Pedroa' len Juanna' Samarian'.

15-16 Na' cate' besežine'na' bosol güiže' Diosen' gosenabde'ne' soa Spiritw chen' lo' yichjlaždao' bene' Samaria ca', le ca hora' bina' soan lo' lažda'ogaque' la'czla' ba gosezoe' nisen' dan' chesejnilaže' Xancho Jesús'en'.

17 Nach gosexo'a na' postlw ca' yichjgaque' cont gwzoa Spiriton' lo' yichjlažda'ogaquen'.

18 Na' ble'e Simón can' cheson postlw ca' chesexo'a ne'e yichj bene' cont chzoa Spiriton' len legaque', na' bšabde' legaque' mechw.

19 Gože' legaque':

—Le gon cont neda' gac xo'a na'a yichj note'teze bene' na' soa Spiriton' len legaque' can' chon le'e.

20 Nach Pedroa' gože'ne':

—Cuiayo'o len xmechon' dan' chono' xbab guac si'o len mechw da' chon Diosen'.

21 Bi zaco' gono' da' nga chonto', le yichjlažda'oguo' naquen mal lao Diosen'.

22 Da' cheyala' gono', betinje da' malen' chono' na' gwñab goclen lao Diosen' cont yezi'xene' chio' ca' nac xbaben' yo'o lo' yichjlažda'oguo'.

23 Nacbia' da' mal dan' yo'o lo' yichjlažda'oguo' chnabi'an le' na' ngo'on le' nez malen'.

24 Nach Simónna' boži'e xtižen' gože' le':

—Le nab goclen lao Xancon' cont ne to da' mal dan' bačh gwnao' nga bi gac chia'.

25 Na' Pedroa' len Juanna' cate' beyož goseyxjue'ede' xtiža' Diosen' lo' ciuda Samarian' na' beyož goso'e diža' can' ba goclen Xancho Jesucriston' legaque', nach jaya'aque' Jerusalénna'. Na' šlac zjaya'aque'na' goseyxjue'ede' xtiža' Xancho Jesucriston' len bene' ca' že' yezica'chle yež ca' gan' mbane distritw Samaria.

Felipe na' bene' Etiopía

26 Nach Xancho Diosen' gwsele' to angl bene' gože' Felipe:

—Gwey gan' xoa nez dan' chetj Jerusalénna' na' chden latje dašen' chžinen yež dan' nzi' Gaza.

²⁷ Nach Felipe gwlo'e nezen', na' šlac zeje' ble'ede' to bene' nación Etiopía zeyo'e to lo' carret zeze'e gwyeje' Jerusalénna' jenkene' Diosen'. Le' naque' to bene' blao na' ba none' le' capar cont gone' xšin no'ole gwnabia' che bene' Etiopía ca', šo'o lo' ne'e mechw che'. Na' no'ole gwnabian' le' Candace.

²⁸ Na' ben' yo'o lo' carreten' chlabe' libr dan' bzoj da' Isaíasen' ben' be' xtiža' Diosen' caní'.

²⁹ Nach Spiritw che Diosen' gožen Felipen':

—Jayxen carreten' na' gwyejlene' txen.

³⁰ Nach gwza'ses Felipen' cont jayxene' carreten' na' cate' bžine' gała'ze bende' chlab ben' libr dan' bzoj da' Isaíasen'. Nach gože'ne':

—¿Chejni'ido' dan' chlabo'na'?

³¹ Na' bene' Etiopían' boži'e xtižen' gože' Felipen':

—¿Nacxe gac šejni'ida' da' ngan', le' gague no' nla' no' gwzejni'ide' nedan'?

Nach gota'yoede' Felipen' cont gwyo'e lo' carreten' gwche'lene'ne'.

³² Na' gan' chlabe'na' nyojen žan:

Ca to xila' be nxob bene' cont gote'ba',

na' ca to xila' dao' be bi chosya'a cate' chšibe'ba',

can' bene', bibi gwne' caten' gosezi' gosebague'ne'.

³³ Na' gosone' le' ca to bene' bibi zaca'.

Na' bi gosone' yela' justis che' ca cheyala' gaquen.

Na' nono diaža che' nita', le' goseque'e yela' mban che' lo' yežlio nga.

³⁴ Nach bene' Etiopían' gože' Felipen':

—Benšca goclen gwna neda' no' chen' ža ben' bzoj Xtiža' Diosen' ca', ¿che cuinen' že' ca' o še che bene' yoble?

³⁵ Nach Felipen' gwzologüe' bzejni'ide' bi zejen dan' chlab bene' Etiopían', gože' le' diža' güen che' Jesusen'.

³⁶ Na' ca' chac, besežine' ga žia nis, nach bena' gože' Felipen':

—Nga žia nis, ¿cbi gac soa' nisen' na'a?

³⁷ Nach Felipen' gože'ne':

—Še chejnilažo' Jesucriston' do yichj do lažo', guac so' nisen'.

Nach gwne':

—Chejli'a Jesucriston' naque' xi'in Diosen'.

³⁸ Nach bene' mandadw bcueze' carreten' na' betj Felipen' len bene' Etiopían' jasežo'e lo' nisen' cont Felipen' bzoe'ne' nis.

³⁹ Na' cate' besyechoje' lo' nisen', Spiritw che Diosen' la' beche'eten Felipen' ga yoble, na' bich ble'e bene' Etiopían' le'. Na' mbalaz beza' ben' beyo'e lo' carreten'.

⁴⁰ Nach Felipen' bžine' yež dan' nzi' Azoto na' gwzologüe' gwduxjue'ede' diža' güen che' Jesucriston' to to yež da' zjachi' gała'ze ga gwdie' bžinte' Cesarean'.

9

Diosen' bocobe' yichjlaždao' Saulon'

(Hch. 22:6-16; 26:12-18)

¹ Na' Saulon' con chdacze' cho'e diža' can' chaclaže' gote' bene' chesejnilaže' Xancho Jesucriston' na' chdacze' cheyljwlaže' nacle gone' gote' legaue'. Na' da'nan' Saulon' gwyeje' lao bxoz blao che bene' Israelen',

² na' gwnabde'ne' gwzoje' to yiš da' goxe' yosolab bene' že' to to yodao' nita' ciuda Damasco cont yeseņezde' nape' yela' gwnabia' sene' bene' ca'

ba chesejnilaže' Jesucriston' na' gwčheje' legaque' cont che'e legaque' ciuda Jerusalénna' la'czla' bene' byo o la' no'ole.

³ Cate' beyož bnežjue'ne' yišen' gwlo'e nez, na' ba zoa žine' ciuda Damascon' cate' zejzenez to be'ni' da' za' yaban' gwyečhen le'.

⁴ Na' gwbiže' lo yon'. Na' bende' che' to bene' le':

—Saulo, žbixchen' chčhi chsaco' neda'?

⁵ Na' Saulon' boži'e xtižen' gože' le':

—žNo le' bene'?

Nach bena' gože'ne':

—Nedan' Jesús ben' chčhi chsaco'. Na' dan' chgue'edo' neda', chone zi' kuino' can' chac che to go'ñ be chlibe lo ya dan' zoa lo carroš cheba'.

⁶ Na' do chaž chžebze' gože' le':

—Xana' Jesús, žbin' chaclažo' gona'?

Nach Xanchon' gože'ne':

—Beyas na' gwyej ciuda Damascon' na' zoa to bene' ye'e le' da' cheyała' gono'.

⁷ Na' bene' ca' zja'aclen Saulon' benit bečhoł gosac lo' yichjlažda'ogaque'na' catec besežebe' dan' goquen', le gosende' ši'i bene' perw nono besele'ede'.

⁸ Nach beyas Saulon', perw cate' bexa' lagüen' con bich ble'ede'. Nach bene' ca' nžague'na' gosoxe' ne'e goseče'ene' Damascon'.

⁹ Na' šone ža gwzoe' sin cbi ble'ede' na' bi güe'ej gwdagüe'.

¹⁰ Na' zoa to bene' chejnilaže' Xancho Jesucriston' Damascon' bene' le Ananías, na' Ananíasen' ble'edagüede' Xanchon'. Na' Xanchon' gože'ne':

—Ananías.

Na' boži'e xtižen' gwne':

—Nga zoa', Xana'.

¹¹ Nach Xanchon' gože'ne':

—Gwzoža' na' gwyej liž Judas dan' zoa cay dan' chesene' Nez Licha, na' nabo' to bene' le Saulo, to bene' ciuda Tarso. Ba choł güiže' neda'.

¹² Na' ba bena' cont ble'edagüede' le' gwyo'o gan' zoe'na' na' gwxo'a nao' yejlagüe'na' cont yele'ede'.

¹³ Nach Anaiásen' boži'e xtižen' gože' le':

—Xana', ba benda' bene' zan cheso'e xtiža' bena', ca nac da' mal juisyw ba bene' Jerusalén len bene' ca' ba gwlejo' cont zjanaque' lo nao'.

¹⁴ Na' chesene' ze'e nga noxe' yiš che bxož gwnabia' ca' cont sene' yogo'loł neto' chejnilaže'to' le'.

¹⁵ Nach Xancho Jesucriston' gože' Ananíasen':

—Gwyej, le ba gwleja' Saulon' cont šjazejni'ide' xtiža' len bene' cbi zjanac bene' Israel na' len rey chegaque' ca', na' lente le'e nacle bene' Israel.

¹⁶ Na' gwlo'eda'ne' ca nac da' yaše' da' zi' da' gac che' dan' gwzenague' chia'.

¹⁷ Nach Ananíasen' gwyeje' gan' zoa Saulon' na' gwyo'e lo' yo'ona' na' gwxo'a ne'e yejla'o Saulon', gože'ne':

—Bene' migw Saulo, Xancho Jesúsben' ben' blo'elagüe' le' tnez gan' za'ona' ba gwsele' neda' zedena'a le' cont yele'edo' na' soa Spiritw che Diosen' len le'.

¹⁸ Nach la' besyeyinjte da' ca' že' lo yejlagüen', zjanaquen ca yid bdi'ej, na' la' bele'etede'. Nach gwzože'e cont gwyeje' gan' gwzoe' nisen'.

¹⁹ Ca beyoža' gwdagüe' na' beyaclaže'. Na' bega'añe' Damascon' yeto čhop ža len bene' ca' chesejnilaže' Xanchon'.

Saulon' be'e xtiža' Diosen' Damascon'

²⁰ Na' la' gwzolaote gwyeye' to to yodao' be'e diža' che Jesús'en', gwne' len' naque' Xi'in Diosen'.

²¹ Na' yogo' bene' ca' chesende' xtiže' dan' cho'ena' besyebande' na' chese' lježe':

—¿Gague bengan' chda choñit cholane' bene' ca' chesejnilaže' Jesús'en' ciuda Jerusalénna'? na' ¿gague da' na'czen' bide' nga' na'a cont gwcheje' bene' ca' na' šjasane' legaque' lao bꝑox gwnabia' ca'?

²² Na' Saulon' tža tža Diosen' goclene'ne' cont be'e diža' che Jesús'en' tcho'a, gwne' Jesús'en' naque' ben' gwsela' Diosen' cont nabi'e. Na' bene' Israel ca' že' Damascon' bi beseželde' bin' yesene', le gosacbe'ede' dan' che'e legaque' naquen' da' li.

Saulon' bi goque' lo na' bene' ca' chesegue'ede' le'

²³ Na' cate' ba goc sša choe'len' Saulon' bene' Damasco ca' xtiža' Jesucriston' nach bosoxi'a bene' Israel ca' yesote'ne'.

²⁴ Na' gosenite' chesape' to to cho'a puert che ze'ena' dan' nyechj ciudan' cont yesezene' Saulon' yesote'ne' bate'teze choje', perw na' Saulon' gocbe'ede' ba zjachi'na'ogüe'ne'.

²⁵ Na' bene' ca' chesejnilaže' Jesucriston' besyeletje'ne' le'e ze'e dan' nyechj ciudan' šeže'le besyegüe'ene' to lo' žome cont goc bechoje' lo ciudan'.

Gwyej Saulon' Jerusalénna'

²⁶ Nach beze'e beyeje' Jerusalén. Na' cate' bežin Saulon' ciuda Jerusalénna' goclaže' gone' txen bene' ca' chesejnilaže' Jesucriston', perw yogo'le'e be-sežebe' le', bi gosejle'e še da' li ba chejnilaže' Jesucriston'.

²⁷ Nach Bernabé gwche'e Saulon' ja'aque' gan' že' postlw ca' na' be'lene' legaque' diža' can' goc ble'e Saulon' Xancho Jesús'en' šlac ngüe'e nez zeje' Damascon' na' can' goc Xanchon' be'lene' Saulon' diža'. Na' lecze gož Bernabén' legaque' Saulon' ba be'e xtiža' Jesús'en' Damascon' sin cbi bžebe'.

²⁸ Nach postlw ca' gosejle'e can' goc che Saulon', na' gwzoloao gw dalen Saulon' bene' ca' chesejnilaže' Jesucriston' Jerusalénna'.

²⁹ Na' sin cbi bi chaž chžebe' gwzolažüe' chzejni'ide' bene' Israel ca' diža' che Xancho Jesús'en', con bene' chesac diža' griego. Bene' byen bzejni'ide' legaque' xtiža' Diosen', perw na' legaque' gosaclaže' yesote'ne'.

³⁰ Na' cate' bene' ca' chesejnilaže' Jesucriston' Jerusalénna' gosacbe'ede' ba zjachi'na'ogüe' yesote'ne', nach goseche'ene' ja'aque' ciuda Cesarea na' besyesele'ne' ciuda Tarso.

³¹ Na' bene' ca' chesedop chesežague' chesonxene' Jesucriston' doxen distritw Judean', distritw Galilean' na' distritw Samaritan' gosenite' binlo, noch no bosochi bososaca' legaque', na' gosenita'chache' gosejnilaže' Xancho Jesús'en' na' bosoznague' che' do yichj do laže'gague'. Na' Spiritw che Diosen' benen cont gosacchaj laže'gague' na' benen cont gwyane'.

Beyac ben' le Eneas

³² Ca nac Pedroa' cheje' to to yež gan' že' bene' ca' ba gwlej Diosen' cont zjanaque' lo ne'e chjane'e legaque'. Na' to ža gwyeye' jane'e bene' ca' že' yež dan' nzi' Lida.

³³ Na' yež Lidan' jati'e to bene' le' Eneas. Ba chac xono' iz de' che'ede', natzi' late' cuerp che'na'.

³⁴ Nach gož Pedroa' le':

—Eneas, Jesucriston' cheyone' le'. Gwyas na' btob xcamo'na'. Nach la' gwyaste bena'.

³⁵ Na' yogo'lol bene' že' Lidan' na' bene' že' yež dan' nzi' Sarón besele'ede' bena' ba beyacde' na' gosebejyichje' costumbr čhegaque' cont gosejnilaže' Xancho Jesucriston'.

Dorcás bebane' ladjo bene' guat ca'

³⁶ Na' ca tiemp na', to ciuda dan' nzi' Jope zoa to no'ole le' Tabita, na' diža' griego le' Dorcas. Na' chejnilaže' Jesucriston' na' zoe' chone' da' güen na' chaclene' no bene' yaše' bene' chyažj chchine'.

³⁷ Perw na' gocšene Dorcasen' na' gottechgüe', na' bosoguzje'ne' na' gošoe'ne' to lo' cuart da' zoa yichj yo'o cha'te.

³⁸ Na' gała'ze chega'an yež Lidan' len Jopen', na' bene' ca' chesonxen Jesucriston' Jopen' gosenezde' Pedroa' zoe' Lidan'. Nach gosesele' čhope bene' jasata'yoede' Pedroa' gose'ene':

—Benšca goclen yo'o len neto' netec na'a.

³⁹ Na' Pedroa' la' gwza'te' gwyeje' len bene' ca'. Na' cate' besežine' Jopen', goseče'ene' lo' yo'o gan' xoa bene' guaten', na' la' gosebiga'te' yogo' no'ol güezebe lagüe'na' chesebeže' chosolo'ede' le' lache' dan' ben da' Dorcasen' šlac gwbane', no vestidw na' no camis.

⁴⁰ Nach Pedroa' bešaše' yogo'lol bene' ca' chyo'ole na' bzoa xibe' boł güiže' Diosen'. Na' beyečhje' chne'e cuerp čhe no'olen', na' gože'ne':

—Tabita, gwyas.

Nach la' bexa'te' yejlao da' Dorcasen' gwne'e Pedroa' na' la' bebe'te'.

⁴¹ Nach Pedroa' bexue' ne'ena' bsože'e le', nach goxe' no'ole güezeb ca' na' yezica'chle bene' ca' zjanaque' lo' na' Diosen' na' blo'ede' legaque' ba beban Dorcasen'.

⁴² Na' yogo'lol bene' Jopen' gosende' can' goquen', na' bene' zanch gosejni-laže' Xancho Jesucriston'.

⁴³ Na' Pedroa' bega'ane' Jopen' zan ža, gwzoe' liž to bene' le' Simón, bene' chonšagüe' yid.

10

Pedroa' na' Cornelio

¹ Na' ciuda Cesareana' zoa to bene' le' Cornelio, naque' xan to gayoa soldadw, na' bosozoa la soldadw čhe' ca' Bene' Italia.

² La'czla' Cornelion' čbi naque' bene' Israel, benxene' Diosen', na' lecze ca' goson bene' lo' yo'o čhe', chesezoe' chesape' Diosen' bala'an. Na' Cornelion' chaclenteze' bene' Israel bene' chyažj chchine', na' zoateze' choł güiže' Diosen'.

³ Na' goc čhe', to ža do cheda šone ble'edagüede' to angl bene' gwseła' Diosen' gwyo'e gan' zoe'na', na' anglen' gože'ne':

—Cornelio.

⁴ Nach Cornelion' chna'chgüe' lao anglen' na' do chžebe' gože'ne':

—čBixen' Xana'?

Nach gož anglen' le':

—Diosen' nezde' can' zo' choł güižo'ne' na' chnežjo' dan' cheseyažje bene' yaše', na' Diosen' chaclaže' gaclene' le'.

⁵ Da' nga gono' na'a, gwseła' bene' šjasexi'e to bene' zoa ciuda Jopen' bene' le' Simón na' lecze le' Pedro.

⁶ Zoe' liž to bene' chonšagüe' yid. Bena' lecze le' Simón, na' liž ben' zoan cho'a nisdao'. Na' Simón Pedroa' ye'e le' bin' cheyała' gono'.

⁷ Cate' beza' anglen' Cornelion' goxe' čhope mos čhe' na' to soldadw bene' chaclen le', na' soldadoa' lecze chonxene' Diosen'.

⁸ Na' Cornelion' bzejni'ide' legaque' yogo'lo_lte can' goquen' nach gwsele' legaque' Jopen'. Na' gosegüe'e nez zja'aque'.

⁹ Na' beteyo gala'ze ba zja'aque' za' yesežine' ciuda Jopen' cate' Pedroa' gwloe' yichjo'o che yo'o gan' zoe'na' ca do guagwbiž cont jel güiže' Diosen'.

¹⁰⁻¹¹ Na' šlac choe'lene' Diosen' diža' gwdonchgüe', con goclaže' gagüe' cate. Na' šlac chac dan' gagüe'na', ble'edagüede' le'e yaban' chetj to lache' xen na' nchej tap squinen na' chetjen gan' zoe'na'.

¹² Na' lo'en_na' zjaže' yogo' cuen beyixe' že' yežlion', be žia tap ni'a na', na' be chososa' le'eban' lo yo, na' len be žia xil be chaš le'e yaba.

¹³ Nach bende' gož Diosen' le':

—Gwyas Pedro na' betw be ca' gwdagw.

¹⁴ Nach Pedroa' gože'ne':

—Bi gagua' legacba' Xana'. Ne tni'a bina' gagua' be zban zjanac ca', le cbi de lsens len ley cheto'na' gagwto' ben' zjanac ca'.

¹⁵ Nach Diosen' gože' le' da' gwchope:

—Ben' bač gwnia' gago' bi nao' be zban zjanacba'.

¹⁶ Da' gwyon ni'a gož Diosen' le' ca' nach la' begüete lachen' le'e yaban'.

¹⁷ Šlac chaczejlaže' Pedroa' bi zejen dan' ble'edagüeden', besežin be_ne' ca' gwsele' Cornelion' cho'a puert liž Simón ben' chonšagüe' yiden', le ba gosenabe' gan' zoa liže'na'.

¹⁸ Nach zižje gosenabe' še le na' zoa to be_ne' lecze le Simón Pedro.

¹⁹ Na' Pedroa' ne' chone' xbab che dan' ble'edagüede', cate' gož Spiritw che Diosen' le':

—Simón, šone be_ne' chesyeyiljue' le'.

²⁰ Gwzoža' na' beyetj cont šejleno' legaque', na' bi gaczejlažo' la'czla' bi zjanaque' be_ne' Israel, le neda' gwsele' legaque'.

²¹ Nach Pedroa' beyetje' jašague' be_ne' ca' gwsele' Cornelion', nach gože' legaque':

—Nga zoa', nedan' Simón Pedro. ¿Bičen' cheyiljwle neda'?

²² Nach gose' be_ne' ca' le':

—To xan soldadw be_ne' le Cornelio gwsele' neto'. Le' zejcz'e chone' da' güen na' chonxene' Diosen' na' yogo'lo_l be_ne' Israel ca' cheso'e xtiže' ca be_ne' šagüe' naque'. To angl che Diosen' gože' le' yedenabe' šejo' liže'na' cont gwzenague' chio' še bin' yo'one'.

²³ Nach gwlo'o Pedroa' legaque' yo'o na' besyega'anlene' le' tže'. Nach beteyo Pedroa' gwyase' gweyjlene' legaque' na' gwche'e to chope be_ne' Jopen' be_ne' chesejnilaže' Jesucriston'.

²⁴ Na' beteyo cate' besežine' ciuda Cesarean', Cornelion' bač ntobe' biše' lježe' len xmigüe' ba zjažie' liže'na' chesebeze' le'.

²⁵ Na' cate' bžin Pedroa' liž Cornelion' la' bchojte Cornelion' bšague'ne' na' bzoa xibe' lagüe'na' benxene'ne'.

²⁶ Na' Pedroa' bsože'e le', gože'ne':

—Bezoža'. Lecze be_nač neda'.

²⁷ Na' ne' choe'lente' le' dižan' ca' cate' gwyo'o Pedroa' lo' yo'on na' ble'ede' be_ne' zan ba že' lo yo'ona'.

²⁸ Nach gože' legaque':

—Nezeczele ley che neto' be_ne' Israel žan bi cheya_la' šo'to' liž be_ne' bi zjanaque' be_ne' Israel, na' žan bi cheya_la' gonto' txen len le'e bi nacle be_ne'

Israel. Perw ba_{ch} bzejni'i Diosen' neda' ne to bene' cbi cheya_{la}' gona' xbab che' naque' bene' zban par šo'a liže'na'.

²⁹ Da'nan' cate' bene' quinga bedesexi'e neda', bi goczejlaža' še nacle gona', san ba bida' do yichj do laža', na' na'a chaclaža' nezda' ¿bixchen' gwñio' neda'?

³⁰ Nach Cornelion' gože'ne':

—Na'a chac tap ža do cheda šone zoa' sin cbibi nagua', na' cho_l güiža' Diosen' liža' nga, cate'cze ble'eda' to bene' byo lagua'na' nyaze' to lache' da' chgo'oten be'ni'.

³¹ Nach gože' neda': “Cornelio, ca nac da' gwñabdo' Diosen', ba_{ch} bzenague' chen, na' nezde' chnežjo' da' chyažj da' chchine' bene' yaše'.

³² Na' na'a gwse_{la}' to chope bene' šjasexi'e to bene' zoa ciuda Jopen' bene' le Simón Pedro. Zoe' liž to bene' lecze le Simón, to bene' chonšagüe' yid. Liž ben' chonšagüe' yiden' zoan ga_{la}'ze cho'a nisdao'. Na' cate' la' Pedroa' ližo' nga nach güe'lene' le' diža'.”

³³ Nach la' gwse_{la}'tia' bene' ca' bedesexi'e le', na' choxclenteco' ba_{ch} bido'. Na' nezce Diosen' yogo'to' nita'to' nga gwzenagto' yogo'lo_lte dan' ba ben Diosen' mandadw nao'.

Pedroa' be'e diža' liž Cornelion'

³⁴ Nach Pedroa' gwzola_güe' be'e dižan' gwne':

—Da' li ba_{ch} nezda' nono n_{la}' bene' nacho nzoa Diosen' le' to šla'aze.

³⁵ Gate'teze bene' nación con bene' chesonxen Diosen' do yichj do laže' na' chesone' da' güen, Diosen' chbede' lega_{que}'.

³⁶ Diosen' gwduxjue'ede' neto' bene' Israel guac soato' bin_{lo} len le' še šejnilaže'to' Xi'ine' Jesucriston' bene' naque' Xan yogo'lo_l bene'.

³⁷ Nezele dan' ba goc doxen distritw Judean' dan' gwzolao distritw Galilean' gwde gwduxjue'e da' Juanna' xtiža' Diosen' na' bzoe' bene' nis.

³⁸ Nezele Diosen' gwleje' Jesúsen' ben' naque' bene' yež Nazaret cont chaclene' chio' ben_{ach}, na' be'ene' Spiritw che'na' na' yela' chnabia'. Na' gwda Jesúsen' bene' da' güen na' beyone' yogo'lo_l bene' ca' chsaca'zi' Satanás dan' chnabia' da' xigüe' ca', le Diosen' zoe' len le'.

³⁹ Neto' nezeto' na' choe'to' diža' che yogo' da' güen da' ben Jesúsen' na' dan' bsd blo'ede' distritw Judean' na' ciuda Jerusalénna'. Na' choe'to' diža' can gosote'ne' bosode'ene' to le'e yag cruz.

⁴⁰ Perw na' Diosen' bechis bosbane'ne' ladjo bene' guat ca' beyon ža na' ben Diosen' cont Jesúsen' blo'elagüe' neto'.

⁴¹ Gague yogo'lo_l bene' besele'ede' Jesúsen' caten' bebane' ladjo bene' guat ca', perw Diosen' gwleje' neto' cont choe'to' xtiže'na' na' bene' cont ble'eto'ne'. Na' neto' güe'ej gwdagwento'ne' txen gwde bebane' ladjo bene' guat ca'.

⁴² Jesúsen' bene' mandadw chixjue'eto' ben_{achen} Diosen' bzoe' le' gone' yela' justisen' len yogo' bene' zjamban na' len yogo' bene' ba gosat.

⁴³ Na' da' ca' bosozoj yogo' bene' goso'e xtiža' Diosen' cani'te zjanyojen chesenan note'tez bene' yesejnilaže' Jesucriston', Diosen' yezi'xene' xtola'ga_{que}'na'.

Spiritw che Diosen' gwyo'on lo' yichjlaždao' bal bene' bi zjanaque' bene' Israel

⁴⁴ Ne' cho'ete Pedroa' diža'na' cate' Spiritw che Diosen' gwyo'on lo' yichjlaždao' yogo' bene' ca' chosozenag diža' dan' cho'ena'.

⁴⁵ Na' bene' Israel ben' chesejnilaže' Jesucriston', bene' ca' zja'ac len Pedroa' liž Cornelion', besyebande' dan' gwyo'o Spiritw che Diosen' lo' yichjlaždao' bene' ca' cbi zjanaque' bene' Israel.

⁴⁶ Gosache'ede' gwyo'o Spiritw che Diosen' lo' yichjlaždao' bene' ca' že' liž Cornelion', le gosende' gosonxen bene' ca' Diosen' goso'e diža' da' bi gosejni'ide' na' lecze gosonxene' Diosen' len xtiža'gaque'na'.

⁴⁷ Nach Pedroa' gože' bene' Israel ca' nžaugen':

—Bibi de da' gwžon yesezoa bene' quinga nisen', le nachbia' ba zoa Spiritw che Diosen' len legaque' can' zoan len chio'.

⁴⁸ Nach Pedroa' bene' mandadw gosezoe' nis da' chesejnilaže' Jesucriston'. Na' gosata'yoede' le' cont bega'ane' yeto chop ža.

11

Pedroa' gože' bene' Jerusalén ca' can' goquen'

¹ Na' postlw ca' na' yezica'chle bene' ca' že' distritw Judean' ben' chesejnilaže' Jesucriston' gosende' xtiža' bene' ca' bi zjanaque' bene' Israel lecze ba chosozenague' xtiža' Diosen'.

² Nach Pedroa' beze'e gwyejche' ciuda Jerusalénna' gan' nita' bene' Israel ben' chesejnilaže' Jesucriston' na' legaque' gosenelagüe' che',

³gose'ene':

—¿Bixchen' ba gwyejo' gan' že' bene' cbi zjanaque' bene' Israel na' jatagwleno' legaque'? Malen' ba beno'.

⁴ Nach Pedroa' gwzologüe' be'lene' legaque' diža' tcho'a yogo' dan' goc che', gože' legaque':

⁵—Šlac zoa' ciuda Jopen' choj güiža' Diosen', ble'edagüeda' ca to lache' xen nchej dapte squin ca' chetjen le'e yaban' zan' gan' zoa'na'.

⁶ Na' gwña'yaña' na' ble'eda' lo'enna' že' beyixe' ca' chaš yežlion' be žia tap ni'a na', na' ble'eda' be chososa' le'eban' lo' yo, na' be žia xil be chaš le'e yaba, na' bal be ca' zjanacha' be zña.

⁷ Na' benda' gož Diosen' neda': "Gwyas Pedro, na' betw be ca' gwdagw."

⁸ Nach boži'an gwnia': "Xana', bi gagua' legacba'. Ne tni'aze biña' gagua' be zban zjanac ca', le bi de lsens len ley cheto'na' gagwto' ben' zjanac ca'."

⁹ Na' da' gwchop ni'a Diosen' gwne': "Be bačh gwnia' gago' bi nao' zjanacba' be zban."

¹⁰ Šon ni'a gože' neda' ca' nach begüe lachen' le'e yaban'.

¹¹ Za' beyož ble'edagüeda' da'na' cate' besela'ac šone bene' byo gan' zoa'na' bene' za'ac ciuda Cesarean' chesyeyiljue'nda'.

¹² Na' Spiritw che Diosen' bzejni'in neda' cheyala' ša'alena' legaque' sin cbi gacžejlaža', na' gwchi'a bene' lježcho quinga xop, gwyejto' Cesarean' bžinto' liž ben' le Cornelio na' gwyo'oto' ližen'.

¹³ Nach Cornelion' be'lene' neto' diža' can' blo'elao to angl le' liže'na' na' anglen' gože'ne': "Gwsela' bene' šja'ac ciuda Jopen' šjasexi'e to bene' le Simón Pedro.

¹⁴ Bena' ye'e le' len bene' lo' yo'o chio' nac gonle cont gata' yela' mban chele toli tocanē."

¹⁵ Nach cate' gwzologua' bia' dižan' len bene' ca' že' liž Cornelion', Spiritw che Diosen' gwyo'on lo' yichjlažda'ogaque'na' can' gwyo'on lo' lažda'ochon' cana'.

¹⁶ Nach jaysa'laža' xtiža' Xancho Jesucriston' can' gwne': "Da' zaque' ben Juan da' bzoe' bene' nis, perw da' zaca'che' gac chele cate' yedesoa Spiritw che Diosen' lo' yichjlažda'olen' nabi'an le'e."

17 Na' ba ben Diosen' cont zoa Spiritw che'na' lo' yichjlažda'ogaquen' dan' gosejnilaže' Xancho Jesucriston' can' ba bene' len chio' chejnilaže'chone', na' ĵnox naca' neda' gwžona' gon Diosen' dan' chaclaže' gone'?

18 Na' ca beyož bosozenague' xtiža' Pedroa' bich bi gosene' che Pedroa' dan' gwyeye' liž Cornelion', san gosoe' yela' chožcled che Diosen', gosene':

—Na'a ba nezecho ľecze len bene' ca' bi zjanaque' bene' Israel chazlaže' Diosen' yesyetingde' xtoľa'gaque'na' cont gwnežjue' yela' mban čhegaque' toľi tocañ.

Bene' ca' chesonxen Jesucriston' ciuda Antioquia gan' mbane Siria

19 Na' gwde gosot bene' Israel ca' Estebanna', gosezolagüe' bosochi bososaca'chgüe' yezica'chle bene' ca' chesejnilaže' Jesucriston', nach bene' ca' chesejnilaže'ne' gosasľase'. Baľe' ja'aque' do distritw Fenicia, na' yež ca' zjachi' to lo' yežlio da' žia lo' nisdaon' gan' nzi' Chipre na' do ciuda Antioquia ga mbane distritw Siria. Na' gan' zja'auen' bososed bosolo'ede' con bene' zjanac bene' Israel xtiža' Jesüsen', bi bososed bosolo'eden' bene' cbi zjanaque' bene' Israel.

20 Perw na' to čhope bene' Chipre na' bene' ciuda Cirene ľecze bosoxonje' ja'aque' ciuda Antioquían', na' gosezolagüe' goseyixjue'ede' diža' güen che Xancho Jesucriston' len bene' ca' cbi zjanaque' bene' Israel.

21 Na' Xanchon' goclene' ľegaque' len yela' guac che'na' na' bene' zan gosebejyichje' da' ca' chesejnilaže' na' gosejnilaže' Xanchon'.

22 Na' cate' bene' ca' chesejnilaže' Jesucriston' ciuda Jerusalenna' gosende' can' ba chac ciuda Antioquían', nach bosose'e Bernabén' cont gwyeye' Antioquían'.

23 Na' cate' bžin Bernabén' Antioquían', ble'ede' da' li ba goclenchgua Diosen' bene' ca', na' bebechgüede'. Nach gwneyoede' ľegaque' nita'čhače' yosozenague' che Xanchon' do yichj do laže'.

24 Bernabén' naque' to bene' güen, na' chejnilaže'chgüe' Jesucriston' na' Spiritw che Diosen' zoachguan len ľe'. Na' zanch bene' Antioquían' gosejnilaže' Jesucriston'.

25 Gwde na' Bernabén' gwze'e zeje' ciuda Tarson' jaydiljue' Saulon', nach cate' beželde' ľe', gwče'ene' Antioquían'.

26 Na' gosonite' Antioquían' tgüiz gosone' txen len bene' Antioquia ca' chesedop chesežag chesonxene' Jesucriston' na' bososed bosolo'ede' bene' zan. Na' Antioquia na'tequen' gwzolaos bososi'e bene' ca' chesejnilaže' Jesucriston' bene' cristian' da' chosozenague' che Criston'.

27 Šlac nita' Bernabén' na' Saulon' lo' ciuda Antioquían', besežin baľ bene' Jerusalén ben' chosozende' bene' bi dan' ba gož Diosen' ľegaque'.

28 Na' cate' bene' ca' besežinna', toe' bene' le Agabo gwzeche' lao bene' ca' zjandop zjanžag chesonxen Jesucriston' be'e diža' can' ba bzejni'i Spiritw che Diosen' ľe', gwne' doxen yežlion' gata' to gwbin juisyw. Na' cate' bžin ža gwnabia' ben' le Claudio doxen gan' mbane nación Roman', cana' goc gwbinna' can' gwna Agabon'.

29 Nach bene' ca' chesedop chesežag chesonxene' Jesucriston' Antioquían' bosoxi'e yosotobe' mechw cont yeseselen' yesaclene' bene' ľježgaquen' chesonxen Jesucriston' gan' mbane distritw Judean'. Na' bosoxi'e to toe' yosonežjue' gaca'te' da' gac yosonežjue'.

³⁰ Na' gosone' can' bosoxi'ena' nach goseselē' Saulon' len Bernabén' distritw Judean' jasenežjue' mechon' beñe' ca' chosogüia cheseñe'e beñe' chesejnilaže' Jesucriston' ciuda Jerusalénna'.

12

Gosote' Jacobon' na' goseyixjue' Pedroa' ližya

¹ Na' ca tiempa' rey Herodes bchi bsaque' bał beñe' ca' chesonxene' Jesucriston'.

² Nach bene' mandadw gosote' Jacobo beñe' biše' Juanna' len spada.

³ Na' gocbe'e rey Herodesen' chesyebe beñe' Israel ca' dan' bene' mandadw gosote' Jacobon', nach bene' mandadw gosezene' Pedroa' cate' gola' lni cate' chesagüe' yetextil dan' bibi levadura nchixen.

⁴ Nach Herodesen' gwđixjue'ene' ližya na' gwsele' šino'to soldadw beñe' gosape' ližyan', tap güje' do ža do yel. Herodesen' bene' xbab cueje'ne' ližyan' te lñin' cont gone' yela' justis che' lao beñe' že' lo ciudan'.

⁵ Soldadw ca' gosapchgüe' Pedroa' šlac de' ližyan', perw na' ca nac beñe' ca' chesejnilaže' Jesucriston', gosenabchgüede' Diosen' gaclene' Pedroa'.

Diosen' bebeje' Pedroa' ližyan'

⁶ Na' to že' ca gwxeze ngüia Herodesen' cueje' Pedroa' ližyan' cont gone' yela' justis che', Pedroa' de' chtase' ladjo chope soldadw na' ncheje' chope gden, na' lecze nita'te soldadw beñe' chesape' cho'a puert ližyan'.

⁷ Cate'cze zejzenez to angl beñe' gwseła' Xancho Diosen' bžine' lo' ližyan' gan' de Pedroa' na' gwyeni'chgua lo' ližyan'. Anglen' bte' cuit le'e Pedroa' bosbane'ne', gože'ne':

—Netec na'a gwyas.

Na' la' besyeyežte gdenna' zjanchej na' Pedroa'.

⁸ Nach gož anglen' le':

—Bego'o xpanto' na' bolej xelon'.

Nach ben Pedroa' ca'. Nach gož anglen' le':

—Bechele xadon' chio' na' beyo'o len neda'.

⁹ Nach bechoj Pedroa' zena'ogüe'ne' perw bi gocbe'ede' še da' li anglen' chon ca' len le', con godde' še chle'edagüede'.

¹⁰ Beyož besyedie' chop cuen gan' nita' soldadw ca' chesape' ližyan', besyežine' gan' zoa puert zaguanna' dan' nac de ya gan' chesechoje' cont chja'aque' la cay, con to gualazze puerten' byaljon cont besyechoje', na' cate' ba gos'a'aque' late' nach anglen' bocua'ane' Pedroa' toze'.

¹¹ Cana'ch gocbe'e Pedroa' da' li ba bechoje' ližyan', nach gwne':

—Ba cheyache'eda' da' licze Xana' Diosen' ba gwsele' angl che'na' na' bosle' neda' lo' na' Herodesen' na' bosle' neda' lo' yogo' da' ca' chesaque beñe' Israel gualaž chia' ca' yesonde' neda'.

¹² Na' ne' chonte Pedroa' xbaden' ca', gwze'e gweyje' liž María xna' Juan ben' lecze le Marcos. Na' liž Marían' zjandop zjanžag beñe' zan chosol güiže' Diosen'.

¹³ Nach bsīže' cho'a puert zaguanna' na' la' bchojte to bi' no'ole le Rode jana'be' non'.

¹⁴ Na' cate' bžimbe' cho'a puerten' beyombia'be' ši'i Pedroa', na' tantw bebebe' bi gwsaljwbe' puerten' san beyejesbe' gan' že' beñe' ca' jayežbe' legaque' ba bla' Pedroa'.

¹⁵ Nach gose'ebe':

—¿Gague chactonto'na'?

Perw lebe' nezczebe' le'na'. Nach legaque' gose'ebe' naquen bxin che'.

16 Perw Pedroa' ne' chsižcze' cho'a puerten'. Nach ja'aque' gosesaljue'. Cate'cze besele'ede' le'na' besyebande'.

17 Nach Pedroa' bene' señw len ne'e cont gosenite' šize bosozenague' be'e diža' can' goc bebej Xancho Diosen' le' ližyan'. Nach lecze gože' legaque' cheyała' yosozende' Jacobon' na' yezica'chle beñe' lježgaque' can' ba goquen'. Nach beze'e zjayde' ga yoble.

18 Nach cate' gwyeni', yela' güeban juisyw gwnita' soldadw ca' na' goso'e diža', gosene':

—¿Bixen' goc len Pedroa'?

19 Nach rey Herodesen' bene' mandadw jasyediljue' Pedroa' na' gwnabde' soldadw gop ca' nac goquen' bele'. Perw soldadw ca' bibi rson bosonežjue'. Nach bene' mandadw gosote' soldadw ca'. Nach gwza' Herodesen' distritw Judean' jazoe' ciuda Cesarea.

Got rey Herodesen'

20 Ca horan' Herodesen' chža'achgüe' beñe' ciuda Tiro na' beñe' ciuda Sidón ca'. Perw na' beñe' ca' beseyažjde' yesezi'e da' yese'ej yesagüe' gan' chnabia' rey Herodesen'. Da'na'na' bosocode' ljež beñe' Tiro na' beñe' Sidón ca' cont jasenežjue' mechw che ben' nac lo ne'e gan' mbane Herodes, ben' le' Blasto. Gosone' ca' cont Blaston' gwne' chegaque' lao reyen', le gosaclaže' gwzenag rosen' chegaque' cate' šja'aque' lagüe'na' šjasenabe' yesenite' binlo len le'.

21 Nach rey Herodesen' bžie' bia' to ža gwtobe' legaque' cont güe'e diža' laogaque'na'. Na' cate' bžin žan', reyen' gwyaz xalane' dan' nac xdan dan' chaze' cate' chone' yela' justis, nach gwchi'e xišne'e gan' chnabi'e na' be'e diža' lao bene' ca' že' žana'.

22 Nach beñe' ca' bososye'e, gosene':

—Diosen' choe' diža', gague beñachen'.

23 Na' lo hora' gwsela' Xancho Diosen' to angl ben' ben cont gocšene reyen' gwže'e bzoga' lo' le'e na' gote'. Goc che' ca' dan' be'e latje gosonxen beñe' le' gualaz da' yesonxene' Diosen'.

24 Perw ca nac xtiža' Xancho Jesucriston' gos gwlałjchguan.

25 Na' Bernabén' len Saulon' beyož gosone' yogo' da' cheyała' yesone' ciuda Jerusalénna', nach besyeya'aque' jaya'aque' ciuda Antioquían'. Na' goseche'e to beñe' le' Juan na' lecze lie' Marcos.

13

Bernabén' na' Saulon' ja'aque' jasedixjue'ede' xtiža' Jesucriston' yež zito'

1 Na' len beñe' ca' chesedop chesežag chesonxene' Jesucriston' ciuda Antioquían' zjančixe beñe' cheseyixjue'ede' beñe' yoble bi da' che' Diosen' legaque', na' zjalen beñe' chososed chosolo'ede' xtiža' Diosen'. Na' legaque' zjalie' Bernabé, na' Simón ben' zjansi'e beñe' gasj, na' Lucio beñe' ciuda Cirene, na' Saulo, na' Manaén. Na' Manaénna' bgole' txen len rey Herodes ben' gwnabia' distritw Galilea.

2 Na' to ža beñe' ca' chesejnilaže' Jesucriston' gosone' gwbas zjandop zjanžague' chesonxene'ne' cate'cze gož Spiritw che Diosen' legaque':

—Le cuej Bernabén' len Saulon' cont yesone' xšina' con gate'teze seła' legaque'.

³ Nach bene' ca' bosol güižche' Diosen' sin cbi zjane'ej zjanagüe', nach goşoxa na'gaque' yichj Saulon' len yichj Bernabén', gosone' ca' cont gosegüe'e xşin Diosen' lo' na'gaque'. Gwdena' bosose'e legaque'.

Postlw ca' goso'e xtiža' Jesucriston' Chipre

⁴ Nach Spiritw che Diosen' gwselan' Bernabén' len Saulon' yež gan' nzi' Seleucia. Na' Seleuciana' goso'e lo' barcon' cont besežine' Chipre. Na' Chipren' naquen to yežlio dao' dan' chi' lo' nisaon'.

⁵ Besežine' yež dan' nzi' Salamina gan' mbane Chipren' na' gosezologüe' goseyxjue'ede' xtiža' Diosen' lo' yodao' che bene' Israel ca'. Na' zjanche' Juan ben' lecze le Marcos cont chaclene' legaque'.

⁶ Na' ca' gosaše' gosodie' doxen Chipren' besežine' yež gan' nzi' Pafos. Na' Pafosna' besežague' to bene' guaža' le Barjesús. Naque' bene' Israel na' chxoayague' že' chzende' bi dan' che' Diosen' le'.

⁷ Barjesúsen' naque' xmigw gobernador ben' le Sergio Paulo. Sergio Paulon' naque' to bene' chejni'ichgüe'. Na' le' goxe' Bernabén' na' Saulon', le goclaže' yosozende' le' xtiža' Diosen'.

⁸ Na' Barjesúsen' lecze bososi'ene' Elimas, diža' griego zejen bene' guaža'. Le' goclaže' bi šejle' Sergio Paulo xtiža' Diosen' dan' choe' Bernabén' na' Saulon'.

⁹ Na' Spiritw che Diosen' zoachguan len Saulon' ben' lecze le Pablo, nach bcos lagüen' gwna'chgüe' Elimasen'.

¹⁰ Nach gože'ne':

—Naco' xi'in Satanás dan' chnabia' da' xigüe' ca', yela' güexoayag chio' na' yela' bene' mal chio'. Bi chazlažo' bite'teze da' güen. ¿Bičhen' cbi chbezo' chžono' yosozenag bene' diža' li che Xanto' Diosen'?

¹¹ Da'nan' Xanto' Diosen' gone' castigw chio' na' cholo' to tiemp, bi gac le'edo' gwbiža'.

Nach la' gwčholtie', gwde ca to bejw lo' yejlagüe'na', nach gwzologüe' chgan chtobe' cheyljue' no goxe' ne'e cont cue' nez.

¹² Gobernadores' ble'ede' can' goquen' na' gwyejle'e xtiža' Xancho Jesucriston', na' bebanchgüede' can' ža dižan'.

Pablon' na' Bernabén' ja'aque' Antioquian' gan' mbane distritw Pisidia

¹³ Nach Pablon' len bene' ca' nžague'na' gosa'aque' yež Pafosen', goso'e lo' barcon' cont besežine' yež gan' nzi' Perge gan' mbane distritw Panfilia. Na' Juan ben' lecze chese'e Marcos gwlejiychje' legaque' beyeje' Jerusalénna'.

¹⁴ Na' Pablon' len Bernabén' gosa'aque' yež Perge na' besežine' ciuda Antioquian' gan' mbane distritw Pisidia. Na' cate' bžin ža che Dios nach ja'aque' yodao' che bene' Israel ca' dan' zoa na' na' jasechi'e.

¹⁵ Na' ca' beyož blab to bene' libr gan' nyoj ley che Diosen' len dan' bosozoj bene' ca' goso'e xtiža' Diosen' cani', bene' ca' chesenabia' lo' yodao'na' gosesele' to bene' gan' chi' Pablon' len Bernabén' na' gože' legaque':

—Bene' migw, še de bi diža' da' chaclaže'le güe'le neyoele bene' quinga, guac nalen na'a.

¹⁶ Nach Pablon' gwzechede' bene' señw len ne'ena' cont yosozenag bene' ca' zjachi'na', na' gože' legaque':

—Le gwzenag le'e bene' Israel na' nochle chonxenle Diosen'.

¹⁷ Dios ben' chonxen chio' bene' Israel gwleje' da' xozxta'ochi ca' na' goclene' legaque' cont yesaque' to yež xen šlac gosonite' nación Egipto gan' gosaque' bene' zito'. Nach Diosen' bebeje' legaque' Egipton' len yela' guac chen'.

18 Na' Diosen' gwdape' yela' chxenlaže' čhoa iz len da' xozxta'ocho ca' šlac gosaše' latje dašen'.

19 Diosen' bonite' gaž yež da' zjachi' gan' nzi' Canaán cont bnežjue' da' xozxta'ocho ca' yežlio čhegaquen'.

20 Nach gwde na' Diosen' gwleje' tgüeje tgüeje juez cont gosenabi'e nación Israelen' lao tap gayoa yogaše iz bžinte tiemp čhe da' Samuel ben' be'e xtiža' Diosen' cani'.

21 Nach tiemp čhe da' Samuelen' da' xozxta'ocho ca' gosenabde' Diosen' gone' to rey bene' nabi'e legaque'. Na' Diosen' bnežjue' legaque' rey Saúl na' gwnabi'e legaque' čhoa iz. Saúl nan' goque' xi'in ben' le' Cis, na' goque' diaža čhe da' ben' le Benjamín ben' gwzoa cani'te.

22 Nach bžin ža Diosen' beque'e yela' gwnabia' čhe Saúlen' na' bzoe' ben' le David cont gwnabi'e. Na' gwne' čhe rey Davin': "Chbeda' David xi'in Isai nga, le chaclaže' chone' can' chazlažan' na' chzenague' bite'tez da' chapa'ne'."

23 Nach na'a Diosen' ba gwsele' yeto bene' golje' lo diaža čhe da' rey Davin', ben' le Jesús. Ba gwsele' le' cont gone' chio' bene' Israel yela' mban toli tocañe can' gwne' cani'.

24 Na' cate' biña' solao Jesúsen' gwsed gwlo'ede' bene', da' Juanna' gwdixjue'ede' len yogo' bene' Israel gualaž čhechon' cheyala' yesyetinjde' xtola'gaque' na' yesezoe' nis.

25 Na' cate' beyož ben Juanna' dan' yo'o lo ne'e gone', nach gože' bene' ca' chosozenag čhe': "¿Chonle xbab naca' neda' ben' chbezle sela' Diosen'? Bi naca' bena'. Za' yid bena', na' da' nacchgüe' bene' zaca', bi zaca' gona' mandadw čhe' lečhja' no xele'."

26 Bene' migw, chio' naccho xi'in diaža čhe da' xozxta'ocho Abraham, na' nochle le'e chonxenle Diosen' t xen len neto' bene' Israel, xtiža' Diosen' dan' žan gone' chio' yela' mban toli tocañe naquen par chio'.

27 Bene' ciuda Jerusalén ca' len bene' gwnabia' čhegaque' ca' bi gosejli'e gwsela' Diosen' Jesúsen', na' bi gosejni'ide' da' ca' zjanyoj čhe' le'e libr dan' bosozoj bene' ca' goso'e xtiža' Diosen' cani' la'czla' chosolaben' lo' yodaon' yogo' ža čhe Dios. Na' dan' bi gosejni'ide', da'nan' gosechoglagüen' yesote' Jesúsen', nach goc can' nyoj čhe'.

28 Na' la'czla' gosenezde' bibi da' mal non Jesúsen' cont yesote' le', gosenabde' Pilaton' gone' mandadw yesot soldadw čhe' ca' le'.

29 Na' goc čhe Jesúsen' yogo' dan' nyoj čhe' le'e Xtiža' Dios dan' bosozoj bene' ca' gosenita' cani'. Na' beyož gote'na' nach besežin bene' besyeletje' cuerp čhe'na' le'e yag cruzen' na' bosocuaše'ne'.

30 Na' gwdena' Diosen' bečhis bosbane' le' ladjo bene' guata'.

31 Na' bene' ca' zjanaque' Jesúsen' t xen cate' gwze'e distritw Galilea cont gwyeje' ciuda Jerusalén, legaque' besele'ede' Jesúsen' yezan ža gwde bebane' ladjo bene' guata', na' legaque' cheso'e diža' čhen' len yezica'chle bene' Israel.

32 Na' lencze neto' chyixjue'eto' le'e diža' güen cont nezele ba chac da' güen dan' gož Diosen' da' xozxta'ocho ca' cani'.

33 Ba benen' len chio' naccho xi'in diaža čhe da' bene' ca', dan' bosbane' Jesúsen' ladjo bene' guaten'. Na' goc can' nyojen čhe' le'e libr dan' nzi' Salmos, na' salmo gwchopen' žan: "Le' naco' xi'ina'; na'aža ba blo'a zoaczo'."

34 Na' Diosen' lecze bene' cont nyojen ga yoble čhe' dan' bosbane' le' ladjo bene' guaten' na' gwbat gožo' cuerp čhen', žan: "Gona' güen len le' doľoľ can' goša' rey Davin'."

³⁵ Na' nyoj yeto salmo žan: "Bi go'o latje gožo' cuerp čhian' neda' naca' ben' chacchgüedo' na' ben' chon xšinon'."

³⁶ Nezecho da' rey Davin' gwnabi'e bene' Israel ca' gwnita' ca tiemp čhen' can' gwinalaže' Diosen' na' beyožen' gote' na' bgaše' len yezica'chle da' xozxta'ocho ca' na' lecze gožo' cuerp čhen'.

³⁷ Perw na' Diosen' bosbane' Jesúsen' ben' nyoj Xtižen' žan ca', na' bi gožo' cuerp čhen'.

³⁸ Na' cheyala' nezele bene' migw, Jesúsen' ben' choa' diža' che', chezi'xene' xtola' note'tez bene' chejniłaže'ne'.

³⁹ Bi beyaccho bene' güen len Diosen' da' bi benyane'cho can' ža ley dan' bzoj da' Moisésen', perw note'tezcho chejniłaže'cho Jesúsen', len' ba cheyone' chio' bene' güen.

⁴⁰ Le gwsaca' cont bi gac čhele can' bosozoj bene' ca' goso'e xtiža' Diosen' cani', žan:

⁴¹ Cheyala' gonle xbab, le'e chnelaole chia', na' cheyala' yebanele, le gwžin ža cuiayi'le.

Neda' Dios gona' to da' yebanele šlac mbanle,
to da' bi šejle'le la'czla' še no čixjue'e le'e can' gaca'.

⁴² Beyož bzejni'i Pablon' bene' ca' že'na' nach besyechoje' lo' yodaon'. Nach bene' ca' ba goson cuine' bene' Israel gosata'yoede' Pablon' len Bernabén' yeside' ža che Dios xmanña' yeto cont yosozejni'ide' legaque' yelate' che da' ca' ba bosozejni'ide'.

⁴³ Nach bene' žan bene' Israel len žan bene' ca' ba goson cuingaque' bene' Israel zja'aclene' Pablon' len Bernabén'. Nach Pablon' na' Bernabén' goseneyoede' legaque' cont nita'che' yesejniłaže'che' Diosen' ben' chaclen legaque'.

⁴⁴ Na' cate' bežag xmanña' ža che Dios yogo'lołcze bene' lo' ciudan' besežag cont bosozenague' xtiža' Diosen'.

⁴⁵ Na' gwnita' bene' Israel bene' bi gosejle' che Jesúsen', na' cate' be-sele'ede' ba nac bene' žan chosozenague' che Pablon' na' gosacxi'ede' le' na' gosnelagüe' che' na' gosezi'diže' le'.

⁴⁶ Perw na' Pablon' len Bernabén' bi besežebe' san gose'e bene' ca' že'na':
—Ba bento' can' gwinalaže' Diosen' na' zgua'tec bzejni'ito' le'e nacle bene' Israel gualaž četo'. Na' na'a dan' bi chaclaže'le gwzenagle, chonle cont bi gon Diosen' le'e yela' mban toli tocaņe. Da'nan' na'a gwzejni'ito' bene' ca' bi zjanac bene' Israel.

⁴⁷ Gonto' ca' neče Xanto' Diosen' bač bene' mandadw gonton', le nyojen žan:

Bač nzoa' le'e cont co'ole be'ni' čhian' lo' yichjlaždao' bene' ca' bi zjanac bene' Israel,
cont bene' ca' že' doxen yežlion' yesacbe'ede' guac nitlao xtola'gaque'.

⁴⁸ Na' bene' ca' bi zjanac bene' Israel chesebede' beyož gosende' can' gwna Pablon', na' gosene' güenchgua nac xtiža' Diosen'. Na' yogo' bene' ca' ba gwlej Diosen' cont gata' yela' mban čegaque' toli tocaņe, legaque' gosejle'e xtiža' Diosen' dan' be' Pablon' len Bernabén'.

⁴⁹ Can' goc bene' ca' že' doxen distritwna' gosende' xtiža' Xancho Jesu-criston'.

⁵⁰ Perw bal' bene' Israelen' goso'e diža' len no'ol blao ca' gosonxen Diosen' na' len bene' gwnabia' blao ca' lo' ciudan', na' bosose'e xbab čegaquen' cont

gwzolao gosone' contr Pablon' len Bernabén' na' bich gosó'e latje yesenite' doxen distriton'.

⁵¹ Nach Pablon' len Bernabén' cate' besyeya'aque' ciuda Antioquían' gosebibe ni'agaque' cont bežib yo bište dan' žianna'. Gosone' ca' cont bosolo'ede' bene' ca' chesyebelj legaque' malen' chesone' chosolague' legaque'. Nach jaya'aque' yež Iconio.

⁵² Na' mbalazchgua gwnita' bene' ca' chesonxen Jesucriston' ciuda Antioquían', na' Spiritw che Diosen' gwzochguan len legaque'.

14

Pablon' len Bernabén' besežine' yež Iconio

¹ Na' goquen' Pablon' len Bernabén' besežine' yež Iconion' na' ja'aque' yodao' che bene' Israel. Na' cate' gosó'e xtiža' Jesucriston', bene' zan bene' Israel ca' na' len zan bene' cbi zjanac bene' Israel gosejle'e che'.

² Perw na' gwnita' bene' Israel ca' bene' bi gosejle'e che Jesucriston', na' legaque' gosenelagüe' che bene' ca' chesejnilaže' Jesucriston' na' gosone' cont bene' ca' bi zjanac bene' Israel gosezolagüe' besegue'ede' Pablon' len Bernabén'.

³ Perw na' Pablon' len Bernabén' besyega'ane' sša Iconion' cheso'e xtiža' Xancho Jesucriston' sin cbi besežebe'. Na' Xanchon' blo'e le diža' lin' cheso'e chesene' Diosen' chacde' benachen', le be'e legaque' yela' guac cont gosone' da' zaca' yebanecho cont gosaclene' bene'.

⁴ Na' bene' ca' že' lo yežen' gosaque' chople, bale' gosede'e bene' Israel ca' ben' bi gosejnilaže' Jesucriston' na' yebale' gosede'e Pablon' len Bernabén'.

⁵ Nach bene' Israel ca' gosone' yela' güexi'a len bene' ca' cbi zjanac bene' Israel na' len justis čegaque' cont yesone' contr Pablon' len Bernabén' na' yosochele' legaque' yej.

⁶ Perw cate' gwneze Pablon' len Bernabén' dan' chesaclaže' yesone' len legaque', bosyoxonje' jaya'aque' yež Listra na' yež Derbe na' yezica'chle yež ca' zjachi' distritw dan' nzi' Licaonia.

⁷ Na' lecz goseyixjue'ede' xtiža' Xancho Jesucriston' len bene' ca' že' na'.

Bosožie' Pablon' yej šlac zoe' Listran'

⁸ Na' yež Listran' besežague' to bene' golje' nxinj ni'e ca', cate' gocte' bidao' bi goc se'e.

⁹ Con chi'teze' chzenague' choe' Pablon' dižan'. Nach Pablon' gwne'e le' na' gočbe'ede' bena' chejle'e Diosen' nape' yela' guac cont yeyone' ni'en'.

¹⁰ Nach Pablon' bol' güiže'ne' gože' le' zižje:

—Gwzoža'.

Na' la' gwzoža'te' na' gwzolao chde'.

¹¹ Na' že' bene' zan chesene'e can' goquen' na' legaque' bososye'e gosene' diža' Licaonia:

—Xancho bene' ca' chejnilaže'cho ba gosetje' nga chesone' yela' guac, na' chle'etecho legaque' ca' benach.

¹² Gosene' Bernabén' naque' xangaque' ben' zjansi'e Júpiter, na' Pablon' naque' xangaque' ben' zjansi'e Mercurio. Gosene' ca' le Pablon' choe'che' dižan'.

¹³ Na' yodao' gan' chesonxene' xangaque' Júpiteren' zoan cho'a yež. Na' bxož che Júpiteren' jaxi'e go'n be ba zjanone' xdan zjanžie' legacba' corona

vej. Nach bꝛoza' gwꝓe'e beꝓe' zan cho'a yeꝓen' gan' zoa puert ꝓe ze'e dan' nyeꝓj yeꝓen' na' goclaꝓe' yesote' go'nen' yesonxene' postlw ca'.

14 Na' Pablon' len Bernabén' cate' gosache'ede' can' yeson beꝓe' ca', goseꝓeza' xagaque' dan' bi gosaclaꝓe' yesonxen beꝓe' ca' legaꝓe'. Nach gosodie' gachoꝓ beꝓe' ca' gose'e legaꝓe' ziꝓje:

15 —Beꝓe', ꝓixchen' chonꝓe ca'? Lecz beꝓaꝓ neto'. Za'to' cont chyꝓjue'eto' le'e cheyala' gwꝓa' yiꝓjlaꝓda'olen' na' cueꝓjiꝓjle costumbr quinga dan' bibi zaca' na' gonxenꝓe Dios ben' zoa toli toꝓane. Le' bene' yaban', yeꝓlion', nisdaon', beꝓaꝓ, be ca' chesaš na' bite'tezechle da' chle'echo le'e yaban', lo yeꝓlion' na' lo' nis.

16 Cani' Diosen' bi bꝓone' gon beꝓachen' bite'tez da' mal da' žan yesone'.

17 Perw zoacze' chone' da' güen len yogo' beꝓaꝓ cont yeseneꝓde' zoe' naꝓe'. Dios. Chone' cont chac yejw cont chac dan' chazcho na' chata' da' che'eꝓ chagwcho cont zoacho mbalaz.

18 Na' la'czla' Pablon' len Bernabén' gosene' yogo' da' ca', cane' gosezoede' bosožone' yesot beꝓe' Listra ca' go'ꝓna' yesonxene' legaꝓe'.

19 Nach besežin baꝓ beꝓe' Israel beꝓe' nita' yeꝓ Iconio na' ciuda Antioꝓúa dan' chi' distritw Pisidian', na' beꝓe' ca' gosego'oyele' beꝓe' Listra ca' cont gosaꝓe'ne' txen bosoꝓe'le' Pablon' vej. Na' cate' gosone' xbab baꝓ gote' nach gosexobe' le' cho'a yeꝓa' na' bosyocua'ane' le' na'.

20 Perw na' beꝓe' ca' chesonxene' Jesucriston' besedobe' gan' de Pablon', nach Pablon' beyase' beyeje' lo ciudan' da' yoble. Nach beteyo beza' Pablon' len Bernabén' jaya'aꝓe' yeꝓ Derben'.

21 Nach cate' besežine' Derben' bosozende' beꝓe' ca' že' na' diža' güen ꝓe Jesucriston', na' beꝓe' zan gosone' txen len legaꝓe' goseꝓe'e ꝓe Jesucriston'. Na' gwdena' gosa'aꝓe' ja'aꝓe' da' yoble Listran' na' Iconion' na' Antioꝓúan'.

22 Na' to to yeꝓ gan' ja'aꝓe' gosone' ꝓaꝓ ꝓaꝓe' beꝓe' ca' chesonxene' Jesucriston' na' gose'e legaꝓe' yesenite' yesonxene' le' do yiꝓj do laže', na' gose'e legaꝓe' da' zan da' gac da' saca'zi'cho šlac chbezcho yeyeꝓe' yaban' gan' zoa Diosen' chnabi'e.

23 Na' to to yeꝓ ga besyedi'e gosebeje' beꝓe' yosogüia yesene'e yezica'chle beꝓe' ca' chesonxene' Jesucriston'. Na' Pablon' len Bernabén', cate' za' yesa'aꝓe' to to yeꝓ, gosone' gwbas na' bosꝓ güiže' Diosen' gosenabe' gaclen Xancho Jesucriston' beꝓe' ca' ba chesejnilaže' le'.

Pablon' len Bernabén' jaya'aꝓe' Antioꝓúa gan' mbane distritw Siria

24 Cate' gosa'aꝓe'na' Pablon' len Bernabén' besyedi'e distritw Pisidia na' besežine' distritw Panfilian'.

25 Na' goseꝓjue'ede' xtiža' Jesucriston' yeꝓ Perge na' beyožen' jaya'aꝓe' yeꝓ Atalia.

26 Nach Atalian' besyeyo'e lo' barcw jaya'aꝓe' ciuda Antioꝓúan' gan' mbane distritw Sirian'. Le beꝓe' Antioꝓúan' gosesel'e Pablon' na' Bernabén' cana'te na' gosenabe' Diosen' šejlene' legaꝓe' na' gaclene' legaꝓe' cont yosozejni'ide' beꝓe' xtiže'na'. Na' na'a besyēžine' ba beyož gosone' dan' gosego'o beꝓe' ca' lo na'gaꝓe' yesone'.

27 Na' bosyotobe' beꝓe' ca' chesonxene' Jesucriston' na' gose'ene' yogo'loꝓ can' ben Diosen' len legaꝓe' šlac zja'aꝓe', can' goclene' legaꝓe' cont zan beꝓe' bi zjanac beꝓe' Israel ba gwzolao chesejnilaže' Jesucriston'.

28 Na' besyega'ane' Antioꝓúan' šša len beꝓe' ca' chesonxene' Jesucriston'.

15

Gosone' yela' güxi'a len bene' ca' že' ciuda Jerusalénna'

¹ Na' šlac Pablon' len Bernabén' ne' nite' ciuda Antioquían' besežin to chope bene' za'ac distritw Judean' na' gosezolagüe' bosozejni'ide' bene' ca' česonxen Jesucriston' na'. Gose'ene' yogo'lol bene' byo cheyala' yesezoe' señw dan' že' circuncisión can' že' ley dan' bzoj da' Moisésen' cont gata' yela' mban chegaque' toli tocañe.

² Na' Pablon' len Bernabén' gosacyože' len bene' ca' za'ac distritw Judea dan' chosozejni'ide' ca'. Nach bene' ca' chesonxene' Jesucriston' Antioquían' gosečhoglagüen' šja'ac to chope' Jerusalén len Pablon' na' Bernabén'. Šja'aque' šjaseñe'e postlw ca' že'na' na' len bene' ca' chosogüia chesene'e lježgaquen' cont yesone' yela' güxi'a len legaque' che dan' chosozejni'i bene' ca' za'ac distritw Judean'.

³ Nach bene' ca' chesedop chesežag chesonxene' Jesucriston' Antioquían' gosesele' legaque' Jerusalénna'. Na' bene' ca' zja'aquen' gosedi'e distritw Fenicia na' distritw Samaria. Na' yež ca' gan' že' bene' chesonxene' Jesucriston', bene' ca' zja'aquen' gose'e legaque' zan bene' bi zjanac bene' Israel ba gosebejyichje' da' ca' gosejnilaže' do cana' cont chesejnilaže' Diosen'. Nach bene' ca' že' distritw Fenicia na' distritw Samaria besyebechgüede' gosende' dižan'.

⁴ Na' cate' Pablon' len Bernabén' besežine' Jerusalénna', bene' ca' chesedop chesežag chesonxene' Jesucriston', na' postlw ca' na' len bene' ca' chosogüia chesena' lježgaquen' besežague' bosoguape' legaque' tiox. Nach Pablon' len Bernabén' gose'e legaque' yogo'lol can' ba goclen Diosen' legaque'.

⁵ Nach nita' to chope bene' Fariseo bene' ba chesonxene' Xancho Jesucriston', na' tgüeje tgüeje' gosezie' gosene':

—Note'tez bene' byo gonxene' Jesucriston' cheyala' soe' señw dan' nzi' circuncisión na' cheyala' gone' can' že' ley dan' bzoj da' Moisésen'.

⁶ Nach besedobe postlw ca' len bene' ca' chosogüia chesena' lježgaque', na' bosoxi'e še naquen can' chesena bene' ca'.

⁷ Ba chac sša cheso'e dižan' cate' gwžoža' Pedron' gože' legaque':

—Bene' migw, nezele ba goc zan iz Diosen' gwleje' neda' jatixjue'eda' diža' güen che Jesucriston' len bene' ca' bi zjanac bene' Israel cont gosejle'e che'.

⁸ Na' Diosen' nombi'e yichjlaždao' yogo'lol bene', na' cont nezecho chacde' bene' ca' bi zjanac bene' Israel can' chacde' chio' naccho bene' Israel, nacha' gwsele' Spiritw čhen' gwyo'on lo' yichjlaždao' bene' ca' can' ba gwyo'on lo' yichjlažda'ochon'.

⁹ Toz ca' chon Diosen' len chio' na' len legaque', note'tezcho ba beya' beyibe' lažda'ochon' dan' chejle'cho che Jesúsriston'.

¹⁰ Ba chonle contr Diosen' dan' chaquele gwchile bene' ca' bi zjanac bene' Israel cont yesa'ogüe' costumbr che chio' bene' Israel. Nezele catec zdebe zjanaquen, ne chio' ne xozxta'ocho ca' bi goc yesone' yogo' can' že' diža' gol čheto' ca'.

¹¹ Bi cheyala' goncho ca', le nezecho note'tez naccho, Xancho Jesúsén' chone' yela' mban čecho toli tocañe dan' chacde' chio', gague neče dan' choncho can' že' ley che Moisés.

¹² Beyož gwna Pedroa' ca' nach bich bi gosena bene' ca', san yogüe' gosenite' šize bosozenague' xtiža' Pablon' len Bernabén'. Goso'e diža' can' bnežjo Diosen' legaque' yela' guac cont gosone' da' zaca' yebanecho gan' že' bene' ca' bi zjanac bene' Israel.

13 Na' beyoż goso'e diżan' nach postlw Jacobo be'e diżan', gwne':

—Beñe' migw, le gwzenag diża' nga gua'a.

14 Simón Pedro nga ba bzejni'ide' chio' can' ben Diosen' da' nechw len beñe' bi zjanac beñe' Israel cont blo'e chacde' legaque', ba gwleje' bale' cont zjanaque' lo ne'e.

15 Na' dan' goc ca' chotiñen da' ca' bosozoj beñe' goso'e xtiża' Diosen' cani', le nyojen žan:

16 Tena' yida' da' yoble na' gona' cont nabia' xi'in diaža che da' rey David,

la'czla' na'a nono xi'in diaža che' chnabia',

na' gona' cont soa toe' da' yoble nabi'e.

17 Gona' ca' cont yogo' beñe' bi zjanac beñe' Israel guac yeseyiljue' nac yesone' yesenite' binlo len neda'.

Note'tez beñe' nación guac yosoł güiže' neda'.

18 Can' gwna Xancho Diosen' cani'te,

bene' cont goseneze beñe' can' gaquen'.

19 Na' lagüe nyoj Xtižen' žan ca', chacda' neda' bi cheyala' gonecho zed beñe' ca' bi zjanac beñe' Israel beñe' ba chesebejyichje' costumbr gole chegaque' na' chesonxene' Diosen'.

20 Con gwzojcho ye'gacchone' bi yesone' txen len bi dan' cheson beñe' dan' chesene' naquen che l'gua'a lsaca' dan' chesonxene', neca yesata'lene' no no'ol cbi nac no'ol chegaque' o beñe' byo cbi nac beñe' chegaque', neca yesagüe' be chesote' chosošoque' do lba'ba', neca yesagüe' chen che beyixe'.

21 Nabcho bi yesone' da' ca', le cani'te nita' beñe' to to yež chosozejni'ide' ley chechon' dan' bzoj da' Moisésen' dan' žan bi goncho da' ca', na' chosolabe' leyna' yogo' ža che Dios.

22 Nach postlw ca' len beñe' chosogüia chesene'e yezica'chle beñe' chesonxene' Jesucriston', na' len beñe' chesedop chesežag, gosazlaže' can' gwna Jacobon', na' bosoxi'e choj chope beñe' lježe' šja'aque' ciuda Antioquían' txen len Pablon' na' Bernabén'. Na' gosebeje' Judas ben' lecze gože'ne' Barsabás, na' Silas, ben' zjanac beñe' blao len legaque'.

23 Na' bosozoje' to cart da' gosoxe' beñe' ca' žan:

“Neto' postlw, len beñe' chosogüia chesene'e yezica'chle beñe' chesonxene' Jesucriston', na' len yogo' beñe' chesedop chesežag len neto', chguapto' le'e tiox le'e zoale Antioquían' na' distritw Siria na' distritw Cilicia. Bi nacle beñe' Israel perw ba nac lježcho chonxencho Jesucriston'.

24 Ba nezeto' to chope beñe' besechoj nga ja'aque' gan' zoalen' gosone' šejlaže'le len dan' bosozejni'ide', na' chacle tole dan' chesene' cheyala' soale señw dan' že' circuncisión na' cheyala' gonle yogo' bichle dan' ža ley dan' bzoj da' Moisésen'. Bi nezeto' gosa'aque' na' gague mandadw che neto' gose'e le'e ca'.

25 Da'nán' gwzoato' txen bento' yela' güexi'a gwlejto' chope beñe' quinga chselá'to' gan' zoalen', txen len postlw Pablon' na' len Bernabén', beñe' ca' chaquehgüeto'.

26 Nezeto' Pablon' len Bernabén' zan las ba ša' yesate' dan' cheso'e xtiża' Xancho Jesucriston'.

27 Na' chselá'to' Judasen' len Silasen' cont yosozejni'ide' le'e diža' cho'a yogo' dan' bzojto' le'e cart nga.

28 Chazlaže'to' can' bzejni' Spiritw che Diosen' neto', na' da'nán' bi gonto' mandadw bichle da' zdebe gonle san da' quinga chaqueto' chonen byen cbi gonlen.

29 Bi gagwle yela' guagw dan' ba bosožie' lo l' gua'a l'sacan' chesonxenen', na' bi gagwle be ca' chesote' chosošoque' do l'ba'ba', bi gagwle chen che beyixe', na' bi gata'lenle no'ol cbi nac no'ol chele o bene' byo ben' cbi nac bene' chele. Na' še gwzenagle che da' quinga ba gwnato' bi gonle, güenna' chonle še ca'. Da' na'ze chzojto' le'e cart nga. Diosen' gaclenšque' le'e."

30 Can' goquen' bene' ca' chesonxene' Jesucriston' Jerusalenna' gosesele' bene' ca' chope len Pablon' na' len Bernabén' gosa'aque' zja'aque' ciuda Antioquían'. Na' cate' besežine' Antioquían' bosotobe' bene' ca' chesonxene' Jesucriston' na' bosonežjue' legaque' carten' gosesele' bene' Jerusalén ca'.

31 Na' cate' bene' Antioquía ca' bosolaben' besyebede' ca' consejon' nyoj le'e carta'.

32 Na' Judasen' len Silasen' lecze gosaque' bosozende' bene' bin' ba gwna Diosen'. Nach gosoe'lene' bene' Antioquía ca' diža' zan gosone' čhač laže'gaque' na' gosaclene' legaque' cont gosonxenche' Jesucriston'.

33 Gosenite' Antioquían' zan ža, nach cate' bžin ža šjaya'aque', bene' Antioquía ca' gose'e legaque': "Nayežagcho", na' lecze gose'e legaque' yesyežine' Jerusalenna' to šagüe' to güen.

34 Na' Silasen' bečhoglaže' yega'ane' Antioquían'.

35 Na' Pablon' len Bernabén' gosenita'cze' Antioquían' na' txen len yezan bene' bosozejni'ide' bene' xtiža' Xancho Jesucriston'.

Pablon' gwyeye' da' yoble gan' ba jatixjue'ede' xtiža' Diosen'

36 Nach cate' ba goc sša nite' Antioquían', Pablon' gože' Bernabén':

—Šejcho da' yoble yogo' yež ca' gan' ba jatixjue'echo xtiža' Xancho Jesucriston' šjana'cho nac cheson bene' ca'.

37 Nach Bernabén' goclaže' šja'aque' na' yeseče'e Juan ben' lecze le Marcos.

38 Perw Pablon' gwne' bi gonen güen yeseče'ene' dan' gwlejyichj Marcosen' legaque' cate' besežine' distritw Panfilian' na' bi benlene' legaque' xšin Diosen'.

39 Cate' gota'bia' ne toe' bi goclaže' gac can' ža ben' yeto, nach besyele'e. Bernabén' gwze'e gwče'e Marcosen' na' goso'e lo' barcw ja'aque' Chipren'.

40 Na' Pablon' gwleje' Silasen' cont che'e le'. Na' bene' ca' chesonxene' Jesucriston' Antioquían' bosol güiže' Xancho Diosen' gosenabe' gaclene' legaque' gate'tez šja'aque'. Nach Pablon' len Silasen' gosa'aque'.

41 Na' ja'aque' to to yež ca' zjachi' distritw Sirian' na' len distritw Cilician' gosone' čhač laže' bene' ca' chesedop chesežag chesonxene' Jesucriston'.

16

Timoteon' gwzolažüe' chonlene' Pablon' na' Silasen' txen

1 Na' Pablon' len Silasen' besyežine' yež Derben' nach gwdena' besyežine' yež Listran'. Na' Listran' zoa to bene' chonxene' Jesucriston' le' Timoteo. Xna' Timoteon' naque' bene' Israel na' chonxene' Jesucriston', na' xen' naque' bene' griego.

2 Na' bene' ca' chesonxene' Jesucriston' yež Listran' len yež Iconion' cheso'e diža' che Timoteon' chesene' zoacze' chone' da' güen.

3 Da'nán' Pablon' gwñabe' šejlen Timoteon' legaque', nach gwčhi'ene' gan' bosozoe' le' señw dan' že' circuncisión. Bene' ca' le yogo' bene' že' na' gosenezde' xa Timoteon' bi naque' bene' Israel na' Timoteon' bina' soe' señon', na' lecze Pablon' goclaže' yega'ane' güen len bene' Israel ca'. Cate' beyož bzoe'ne' señua' na' gosa'aque'.

4 Na' to to yež ga besežine' bosozende' bene' ca' chesonxene' Jesucriston' can' nac yela' güexi'a che postlw ca' len bene' chosogüia chesene'e lježgaque' Jerusalenna' che da' ca' cheyala' yesone'.

5 Na' bene' ca' chesedop chesežag chesonxene' Jesucriston' gosenita' chache' gosejnilaže' ne' na' gwyanche' tža tža.

Pablon' ble'edagüede' to bene' distritw Macedonia chata'yoede' le' šje' laže'

6 Nach Spiritw che Diosen' bi ben' latje šjasedixjue'e Pablon' len Silasen' len Timoteon' xtiža' Diosen' yež ca' zjachi' distritw gan' nzi' Asia. Da'nan' gosodie' yež ca' zjachi' distritw ca' gan' nzi' Frigia na' Galacia.

7 Besežinte' gala'ze distritw gana' nzi' Misia na' gosone' xbab yeso'e distritw da' nzi' Bitinia, perw lež na' bi be' Spiritw che Jesusen' latje šja'aque'.

8 Nach gosodie' gala'ze distritw Misian' na' besežine' ciuda dan' nzi' Troas dan' chi' cho'a nisdan'.

9 Nach že'na' Pablon' ble'edagüede' zecha to bene' distritw Macedonia lagüe', che'e le': "Yo'o Macedonia cont gacleno' neto'."

10 Neda' Lucas gwzoa' len legaque' na' da' ble'edagüe Pablon' bene' Macedonian', nach gwnežeto' chaclaže' Diosen' šjazeneto' bene' Macedonia ca' diža' güen che Xancho Jesucriston'. Nach bsin'i'a cheto' cont gwza'to' gweyjo' distritw Macedonian'.

Pablon' len Silasen' ja'aque' Filipos

11 Na' cate' gwza'to' ciuda da' nzi' Troas dan' chi' cho'a nisdan' gwo'oto' to lo' barcw zejto' liča gan' chi' to yežlio lo' nisen' dan' nzi' Samotracia, nach beteyo bžinto' yežen' dan' nzi' Neápolis.

12 Nach gwza'to' Neápolis bžinto' ciudan' nzi' Filipos gan' mbane distritw Macedonia na' bega'anto' to chop ža. Filipos naquen ciuda blaoch che distriton' gan' že' bene' Roma.

13 Na' cate' bžin ža che Dios bchojto' ciudan' na' gweyjo' cho'a yegw gan' chaqueto' chjaseł güiže' Diosen', nach gwche'to' na' be'lento' no'ol ca' ba zjandoben' diža' güen che Jesucriston'.

14 Toe' le Lidia naque' bene' Tiatira na' chote' lache' güen da' nac color moradw, na' chonxene' Diosen' do yichj do laže'. Xancho Diosen' bene' cont bzenague' che dan' bzejni'i Pablon' le'.

15 Nach le' len bene' lo' yo'o che' gosezoe' nis. Gwdena' gota'yoede' neto' gwne':

—Še chejle'le da' li ba chonxena' Xancho Jesucriston', le šo'o soale ližan'.

Nach gweyjo' jasoato' ližen', le bene' byen.

16 Na' to ža zejto' gan' chosol güiže' Diosen' cate' bežagto' to no'ol güego' no'ole esclava. Yo'o nyaz da' xigüen' yichjlažda'oben' chonen cont chac chneya'abe', na' gan xen chombe' par xambe' ca' chneya'abe'.

17 Na' lebe' na'obe' neto' len Pablon' gate'tez zejto', na' chosya'abe' žabe':

—Bene' quinga chesone' xšin Diosen' ben' chnabi'e doxen, na' cheseyixjue'ede' le'e can' gata' yela' mban chele toli tocanē.

18 Ba chac zan ža chombe' ca' cate' goque Pablon' zed, na' gwyečhje' gože' da' xigüen' yo'o lo' yichjlažda'oben':

—Len yela' chnabia' che Jesucriston' chnia' le' bechoj lo' yichjlaždao' bi'nga.

Na' la' bechojte da' xigüen' lo' yichjlažda'oben'.

19 Na' gwdena' cate' gosache'e xambe' ca' ba bechoj da' xigüen' lo' yichjlažda'oben' na' bich bi gan yesone' len lebe', nach gosezene' Pablon' len Silasen' na' jasesane' legaque' lagüe ya'a gan' že' bene' ca' chesenabia' ciudan'.

20 Na' cate' besežine' gan' že' justis ca', gose'e legaque':

—Beñe' Israel quinga chesaše' chesebeque' da' zed lo' ciuda nga.

21 Na' chosolo'ede' costumbr da' bi de lsens gao' chio' naccho beñe' Roma.

22 Nach bene' ca' lo' ciudan' gosase' contr Pablon' len Silasen', na' beñe' gwnabia' ca' gosone' mandadw gosele'chje' xagaque' cont goseyine' legaque' xis.

23 Beyož goseyinchgüe' legaque' nach bosoži'e legaque' ližya, chese'e ben' chape' ližyan' gwna'yañe' legaque' cont bi yesyechoje'.

24 Beyož gose'e le' ca', nach bži'e legaque' lo' quart ližyan' dan' zoa la'zelaoze gan' nac biže'te na' bchide' ni'agaquen' len yag dan' nzi' cepo.

25 Ca' gosenita' Pablon' len Silasen' ca' do chel, chosol güiže' Diosen' na' chesole' no himno chesonxene' Diosen', na' yezica'chle beñe' ca' zjade ližyan' chosozenague'.

26 Nach zejzenez leca gwxo' na' bsesechguan len yo'o ližyana'. Na' to ši'ize yogo' puert che ližyana' beseyaljon na' besyeyež yogo' gden ca' dan' zjanchej ni'a na' beñe' ca' že' lo' ližyan'.

27 Bosbanen ben' chape' ližyan' na' cate' ble'ede' ba zjanyaljo puert ca', la' goljte spada chen' cont yeyot cuine', le bene' xbab ba bosyoxonj yogo' beñe' ca' zjade ližyan'.

28 Nach Pablon' gože'ne' zižje:

—Bibi gone cuino'. Nga zoacze yogo'to'.

29 Nach ben' chap ližyan' gwnabe' to yi', na' gwyo'osese' zjane'e gan' de Pablon' len Silasen'. Do chxizze' bzoa xibe' lao beñe' ca', le chžebchgüe'.

30 Na' la' bebejte' legaque' lo' quart gan' zjayo'en', che'e legaque':

—¿Bi cheya'la' gona' cont gata' yela' mban chia' toli tocanē?

31 Nach gose'e le':

—Gwyejnilaže' Xancho Jesucriston', le' na' beñe' lo' yo'o chio', na' gata' yela' mban chele toli tocanē.

32 Nach ben' chape' ližyan' gwche'e legaque' ližen' na' gosoe'lene' le' len beñe' lo' yo'o chen' xtiža' Xancho Jesucriston'.

33 Nach ca' hora' ben' chap ližyan' gwdibe' lo' güe' che Pablon' na' che Silasen', na' gwdena' jasoe' nis len beñe' lo' yo'o che' ca'.

34 Nach ben' chape' ližyan' beche'e Pablon' len Silasen' liže' bgüe'ej bguagüe' legaque'. Mbalaz zoe' ba chejnilaže' Diosen' txen len beñe' lo' yo'o che'.

35 Cate' ba gwyeni' beñe' gwnabia' ca' gosesele' xa'ag jaseže' ben' chap ližyan' yosane' beñe' ca' šjaya'aque'.

36 Nach le' gože' Pablon':

—Beñe' gwnabia' ca' bačh gosesele' rson yosana' le'e. Guac yeyejle to šagüe' to güen.

37 Nach Pablon' gože' xa'ag ca':

—Ba goseyine' neto' latje lagüe ya'a sin cbi gosone' yela' justis cheto' še bi nonto' na' gosegüe'e neto' ližya, len nacto' beñe' nación Roma. ¿Na' chesone' xbab yososane' neto' šižize? Bi gac, san yesid cuine' yesyebeje' neto'.

38 Nach xa'ag ca' jasyeyeže' beñe' gwnabia' ca' can' gož Pablon' legaque'. Na' beñe' ca' besežebe' cate' gosenēzde' Pablon' len Silasen' zjanaque' beñe' nación Roma.

39 Nach beñe' gwnabia' ca' ja'aque' gan' zjade Pablon' len Silasen' na' gosata'yoede' legaque' yesyezi'xene' can' ba goquen', na' diža' šagüe' gose'e legaque' yesyechoje' yesyeya'aque' lo' ciudan'.

⁴⁰ Nach bechoj Pablon' len Silasen' ližyan' na' ja'aque' liž Lidian' da' yoble, na' da' yoble gosone' čhačh laže' beņe' ca' chesonxene' Jesucriston' na' beyožen' besyeya'aque'.

17

Beņe' Tesalónica ca' gosone' contr Pablon'

¹ Cate' Pablon' na' Silasen' gosa'aque' ciuda Filipos nach ja'aque' yež da' nzi Anfipolis na' len yež da' nzi Apolonia na' besyežine' to ciuda da' nzi' Tesalónica gan' zoa to yodao' čhe beņe' Israel.

² Na' Pablon' ca costumbr čhe' gwyeje' yodao' ža čhe Dios. Na' ca' goc, šoņe ža čhe Dios be'lene' legaque' diža'.

³ Bzejni'ide' legaque' gože'ne' beņe' ca' goso'e xtiža' Diosen' cani' bosozoje' xtiža' Criston'. Gosene' ben' seļa' Dios yedenabi'e, cheyaļa' yosoči yososaca' beņe' le' na' yesote'ne' na' techle yeyas yebane' ladjo beņe' guat ca'. Gože' beņe' Tesalónican':

—Jesūsēn' ben' choa' diža' čhe', le'na' Criston' ben' gwseļa' Dios cont ņabi'e.

⁴ Nach bal beņe' Israel gosejle'e xtiža' Pablon' len Silasen' na' gosaque' txen len legaque', na' lecze zan beņe' griego beņe' chesonxen Diosen' na' zan no'ole blao lecze gosejle'e.

⁵ Perw gwnita'ch beņe' Israel beņe' bi chesejle'e xtiža' Diosen'. Legaque' gosacxi'ede' Pablon' len Silasen' na' bosyotobe' xonj beņe' mal beņe' chesaš lagüe ya'a na' gosaque' txen gosone' cont gwche' žaš doxen ciudan'. Nach beņe' že' lo ciudan' ja'aque' liž ben' le' Jasón chesacde' yesyebeje' Pablon' len Silasen' liže'na'.

⁶ Cate' besežine' liž Jasónna', noch no beņe' ca' nita'. Nach cate' bi besyeželde' Pablon' len Silasen', na' gosoxe' Jasónna' len yebaļ beņe' chesonxene' Jesucriston' na' goseče'e legaque' lao beņe' ca' chesenabia' ciudan', na' bososye'e gosene':

—Beņe' ca' nita' liž benga chesaše' chesebeque' da' zed doxen, na' ņa'a ba besele'e gan' zoacho nga.

⁷ Jasón ni ba blebe' legaque' ližen', na' bi chesone' can' ža ley čhe César ben' nac la'zelagüe beņe' gwnabia' chechon' chi' ciuda Roman', na' chesene' zoa yeto rey beņe' le' Jesús beņe' ņabi'e chio'.

⁸ Na' cate' gosende' diža'na', beņe' lo ciuda ca' len beņe' gwnabia' čhegaque' ca' gosebecche' žaš.

⁹ Nach Jasónna' len beņe' lježe' ca' bosozie' mechw cont beņe' gwnabia' ca' bososane' legaque', con še bich yesyežin Pablon' na' Silasen' lo ciudan', chesene'.

Pablon' len Silasen' ja'aque' yež Berea

¹⁰ Nach že'na' beņe' ca' chesonxene' Jesucriston' lagüe ciuda Tesalónican' bosyose'e Pablon' na' Silasen' cont ja'aque' yež gan' že' Berea. Na' cate' besyežine' nach ja'aque' lo' yodao' čhe beņe' Israel ca'.

¹¹ Na' beņe' Israel ca' že' Berean' zjanacche' beņe' šagüe' clēl ca beņe' Israel ca' že' Tesalónican' na' besyebede' bosozenague' xtiža' Jesucriston' dan' bosozejni'i Pablon' len Silasen' legaque'. Na' tža tža besyeyiljue' gan' nyoj da' ca' bosozejni'i beņe' ca', cont yesenežde' še le can' žan.

¹² Na' zane' gosejle'e xtiža' Xancho Jesucriston' na' lecze zan beņe' griego ca' na' zan no'ole blao.

13 Nach bene' Israel ca' že' Tesalónican' bene' ca' cbi chesejle' che Jesucriston', gosende' diža' ba zoa Pablon' len Silasen' Berean' chosozejni'ide' xtiža' Diosen'. Nach gosa'aque' ja'aque' Berean' na' gosone' cont bene' Berea ca' lecz gosone' contr Pablon'.

14 Perw na' bene' Berea ca' chesejnilaže' Jesucriston' la' bososa'te' Pablon' gwyje' cho'a nisdao'. Na' ca nac Silasen' len Timoteon', legaque' besyega'ane' Berean'.

15 Na' to chop bene' Berean' ja'aque' jasesane' Pablon' ciuda dan' nzi' Atenas. Na' cate' besyeya'aque' jaya'aque' Berean' Pablon' gwsele' rson len legaque' cont Silasen' len Timoteon' lecz šja'aque' cate gan' zoe'na'.

Pablon' bsed blo'ede' bene' Atenas ca'

16 Na' Pablon' šlac zoe' ciuda Atenasen' chbeze' žin Silasen' len Timoteon', gocchgüe' tole lo' yichjlažda'ogüe' da' ble'ede' da' zan l gua'a lsaca' da' chesejnilaže' bene' ca'.

17 Da'n'an' bzejni'ide' bene' Israel ca' lo' yodao' chegaque'na' len yezica'chle bene' ca' chesonxene' Diosen'. Na' yogo' ža gwyje' ga chac ya'a je'e xtiža' Diosen' len bene' ca' že'na'.

18 Nach bene' ca' že'na' gwzolao chesoe'lene' le' diža'. Bale' chesejle'e dan' bzejni'i to bene' le' Epicuro, na' yebale' chesejle'e dan' bosozoj bene' ca' chesene' estoico. Na' bale' gosene':

—¿Bin' chon ža benga?

Na' yebale' gosene':

—Chacljede' gwzejni'ide' chio' che no bene' cobe bene' šejnilaže'cho.

Gosene' ca' le Pablon' ba bzejni'ide' legaque' xtiža' Jesús'en' na' ba be'e diža' Jesús'en' bebane' ladjo bene' guat.

19 Nach goseche'e Pablon' to latje dan' nzi' Areópago gan' chesedobe bene' blao chegaque' cate' chosoxi'e bi da' chesone'. Nach gose'e Pablon':

—Che'neto' gwzejni'ido' neto' bi da' coben' dan' chsed chlo'edo'.

20 Bina' yenetó' diža' can' nac dan' cho'o nga na' chaclaže'to' nezeto' bi zejen yogo' da' ca'.

21 Ca nac bene' Atenas ca', de costumbr chegaque' yogo' ža con chesaše' cheso'e diža' o chosozenague' che bi da' cobe da' de, na' lecz ca' cheson no bene' zito' že' Atenas.

22 Nach Pablon' gwzeche' gachol'legaque' gan' chesone' yela' güexi'a na' gože' legaque':

—Le'e bene' Atenas, chache'eda' leca chejnilaže'le zan l gua'a lsaca'.

23 Cate' gwdia' tnez ble'eda' gan' chonxenle' zan l gua'a lsaca', na' ble'eda' to latje gan' nyojen žan: "Che Xancho ben' nono nombia'." Na' ca nac ben' chonxenle' sin cbi nombia'line', che benan' chyixjue'eda' le'e.

24 Dios ben' ben yežlion' na' yogo' da' de lagüe yežlion', len' chnabi'e yaban' len yežlion'. Bi chyažjde' yo'o da' chon benačhen' cont soe' len chio'.

25 Bibi chyažje Diosen' gwnežjo benačhen' le', na' bibi gac yesone' yesaclene' le'. Diosen' cho'e yela' mban che yogo'lol' bene', cho'e legaque' biš grasyw na' cho'e legaque' yogo' bi da' zjanape'.

26 Diosen' bene' bene' nechon', na' toz ca nac yogo' benač xi'in diaža che'. Na' bsi'e xneze bat nita' to toe' na' ga yesenite'.

27 Diosen' bnite' yogo' benačhen' lo yežlion' cont yeseyiljue' nacle yesone' yesombi'ene' na' yesonxene'ne'. Na' da' li Diosen' bi zoe' zito' len to to chio'.

²⁸ Le' chone' cont zoacho mbancho na' chdacho. Nac da' li can' gosena to chope bene' poeta chele ben' goso'e diža' xdan, gosene': "Naccho diaža che Diosen'."

²⁹ Na' dan' naccho diaža che Diosen' bi cheyała' goncho xbab nac Diosen' ca no l' gua'a lšaca' de oro, de plata o de yej. Chesaljšaže' beňachen' chesone' da' ca'.

³⁰ Cani' Diosen' be'e latje goson benachen' con ca gwna xbab chegaque' yela' cbi chejni' i chegaque', perw na'a Diosen' chone' mandadw yogo' lo' bene' že' doxen yežlion' yesebejyichje' da' malen' chesonen'.

³¹ Diosen' chaclaže' cuejyichjcho da' malen', le ba mbeje' Jesucriston' gone' yela' justis che yogo' beňach na' gwnežjue' castigw che yogo' bene' cbi chesejniłaže' le', na' Diosen' zejzce' to liča dan' gone' ca'. Na' Diosen' ba nžie' bia' bat gone' yela' justis che beňach. Na' dan' bosban Diosen' Jesucriston' ladjo bene' guaten', nezecho Jesucristwnan' gone' yela' justis che beňachen'.

³² Cate' bene' Atenas ca' beyož gosende' gwna Pablon' yesyeban bene' guat ca', bałe' gosezi'diže' le' na' yebałe' gose'ene':

—Na' gwzenagto' xtižon' yeto ža yoble.

³³ Can' goc beza' Pablon' latje gan' že' bene' ca'.

³⁴ Perw bał bene' Atenas ca' gosaque' Pablon' txen na' gosonxene' Jesucriston'. Na' bene' ca' gosaque' Pablon' txen len to bene' byo le Dionisio na' yeto no'ole le Dámaris. Na' Dionisio' naque' txen len bene' gwnabia' ca' ben' cheson yela' güexi'a gan' nzi' Areópago.

18

Ca goc šlac zoa Pablon' Corinto

¹ Gwde goc da' ca', Pablon' beze'e ciuda Atenasen' na' gwyeje' ciuda gan' nzi' Corinto.

² Cate' bžine' Corinton' bežague' to bene' Israel le' Aquila bene' naque' bene' distritw Ponto, na' len no'ol che' ben' le Priscila. Za' besyežingale' Corinton' zeya'aque' nación Italia, le rey Claudio, ben' chnabia' ca hora' doxen gan' mbane naciónna', bene' mandadw besyežaš yogo' bene' Israel ca' že' ciuda Roma. Nach Pablon' gwyeje' jane'e Aquilan' len Priscilan'.

³ Xšingaque' naquen chesone' yo'o de lache', na' toze ca nac xšin Pablon'. Nach bega'ane' gosenite' txen na' gosone' žinna' txen.

⁴ Na' yogo' ža che Dios Pablon' gwyeje' yodao' che bene' Israel ca' jazejni' ide' legaque' che Jesucriston', cont bał bene' Israel len bał bene' bi zjanac bene' Israel yesejniłaže'ne'.

⁵ Nach Silasen' len Timoteon' gwde gosa'aque' distritw Macedonian' be-sežine' gan' zoa Pablon', na' cana'ch Pablon' bsane' xšinen' cont gota'ch latje gwđixjue'ede' xtiža' Jesusen' na' bzejni'ide' bene' Israel ca' Jesucristwnan' naque' bene' chesebeze' seła' Diosen' yedenabi'e.

⁶ Perw bene' Israel ca' beseže'e Pablon' na' bosožie' yela' ya' che'. Nach Pablon' gwšibe' xe'na' cont blo'e chbejyichje' legaque', gwne':

—Bibi doła' napa' dan' cuiayi'le toli' tocañe. Le'e naple doła'. Na' na'a šjased šjalo'eda' bene' ca' bi zjanac bene' Israel.

⁷ Nach bechoje' lo' yodao'na' na' beze'e bežine' liž to bene' le Justo. Justo na'na' zoe' chonxene' Diosen' na' liže' zoan cuit yodao'na'.

⁸ Na' to bene' le' Crispo naque' bene' gwnabia' che yodaon'. Na' Crispon' len yogo' bene' lo' yo'o che' gosaque' txen chesejle'e che Xancho Jesucriston'.

Na' yezan bene' Corinto gosejle'e cate' gosende' xtiža' Jesucriston' da' choe' Pablon' na' gosezoe' nis.

⁹ Na' goc to že' Pablon' ble'edagüede' Xancho Jesucriston', che'ene':

—Bi žebo' Pablo. Gwzoateze be' xtižan' na' bi so' šize.

¹⁰ Neda' zoa' len le' na' bi gona' latje no gone le' da' mal, le bene' zan že' lo ciuda nga bene' chesonxene' neda'.

¹¹ Ca' goquen' bega'an Pablon' Corinton' tgüiz yogašje bsed blo'ede' legaue' xtiža' Diosen'.

¹² Na' ca tiempen' ben' le Galión naque' gobernador distritw gan' nzi' Acaya. Nach bene' Israel ca' nita' ciuda Corinto bene' cbi chesonxen Jesucriston' gosaque' toze gosone' contr Pablon'. Na' goseche'ene' jasesane'ne' gan' chon gobernadores' yela' justisen'.

¹³ Na' cate' besežine'na' gose'e gobernadores':

—Benga chde' chgo'oyele' bene' lo' yežen' yesone' bi da' cobe cont yesonxene' Diosen' na' da' chzejni'ide' goncho, bi zéjen to li len ley chechon'.

¹⁴ Bač zoa' ne Pablon' cate' gobernador Galiónna' gože' bene' Israel ca':

—Ca nac xya dan' chagwle nga, šaca' naquen to da' xinj o to da' malchgua, gonan' yela' justis.

¹⁵ Perw naquen che diža', na' che bene', na' che ley chelen'. Da'nan' le gwye' nacle gonle. Bi co'ō lo na' gona' yela' justis che dan' nac ca'.

¹⁶ Nach bešaše' legaue' gan' chone' yela' justisen'.

¹⁷ Nach bene' ca' bi zjanac bene' Israel gosenize' Sóstenes ben' ba nac bene' gwnabia' che yodaon', gosot goseyine' le' lao gobernador Galiónna', perw bena' bibi cuent bene' legaue'.

Pablon' beyeje' Antioquían' da' yoble

¹⁸ Na' bega'anč Pablon' ciuda Corinton' yezan že beyož goc da' ca', na' cate' beze'ena' gože' bene' ca' chesonxen Jesucriston': “Nayežagcho”, nach beze'e txen len Priscilan' na' Aquilan'. Ja'aque' to yež da' nzi' Cencrea gan' bšib yichj Pablon' da' bač beyož bene' to da' gwlo'o cho'e lao Diosen' gone'. Na' beyožen' Pablon', Aquilan' na' Priscilan' besyeyo'e lo' barcw da' zej nación Siria.

¹⁹ Na' cate' besyěžine' ciuda Efeson' besyechoje' lo' barcon', na' Priscilan' len Aquilan' besyega'ane' Efeson'. Na' Pablon' gwyeje' yodao' che bene' Israel ca' je'lene' bene' ca' ba zjandob na' xtiža' Dios.

²⁰ Na' bene' ca' že' lo' yodaon' gosata'yoede' le' yega'anche' len legaue', perw bi goclaže'.

²¹ Nach gože' legaue':

—Nayežagcho, le chonen byen soa' lni dan' šo' ciuda Jerusalénna', perw güidchza' deña'a le'e yeto še Diosen' gože' latje.

Nach beze'e ciuda Efeson' na' beyo'e lo' barcon' zeyeje'.

²² Cate' bežine' ciuda Cesarean' bechoje' lo' barcon' na' gwyeje' Jerusalénna' na' bguape' tiox bene' ca' chesedop chesežag chesonxene' Jesucriston'. Nach beze'e beyeje' ciuda Antioquían'.

²³ Gwde to tiemp zoe' Antioquían', nach gwze'e da' yoble gwyeje' to to yež dan' nita' distritw Galacia na' Frigia, bene' chach laže' bene' ca' chesonxene' Jesucriston'.

Apolos gwduxue'ede' xtiža' Diosen' ciuda Efeson'

²⁴ Na' ca tiemp na' bžin to bene' Israel ciuda Efeson' bene' le Apolos. Naque' bene' ciuda Alejandria. Le' chac cho'e diža' güen lao yogo' bene', na' ba nsede' binlo doxen Xtiža' Diosen' dan' nyoj.

²⁵ Apolosen' chejle'e dan' bzejni'i Juanna' che Xancho Jesúsen' na' nezde' can' bzoe' bene' nis caten' besyetinjde' xtoła'gaquen'. Na' Apolosen' be'e diža' do yichj do laže' bzejni'ide' binlo che Jesúsen', la'czla' con dan' bsed blo'e da' Juan na'zen' nezde'.

²⁶ Nach Apolosen' gwzolao be'e diža' che Xancho Jesucriston' lo' yodao' che bene' Israel ca' sin cbi chaž chžebe'. Na' cate' Priscilan' na' Aquilan' gosende' can' chzejni'i Apolosen', legaque' gosebejže' le' na' bosozejni'ichde' le' che Jesucriston' da' ca' bina' nezde'.

²⁷ Gwdena' cate' Apolosen' bene' xbab šeje' distritw gan' nzi' Acaya, bene' Efeso ca' chesonxen Jesucriston' gose'e le' chone' güen dan' šeje' na' bosozoje' to cart da' bežue' che bene' ca' chesonxen Jesucriston' distritw Acaya cont bene' ca' bosolebe' le'. Na' Diosen' nži'ilaže' bene' Acaya ca' na' ba goclene' zane' cont chesejnilaže' Xancho Jesucriston'. Na' cate' bžin Apolosen' Acayan' be'lene' legaque' diža' da' goclenchguan' legaque'.

²⁸ Bzejni'ide' yogo'loj bene' gože'ne' clelen' cheson bene' Israel gualaž chen' bi chesejle'e che Jesúsen'. Bzejni'ide' legaque' can' nyoj Xtiža' Diosen' žan Jesúsen' naque' Cristo ben' chesebeze' yedenabi'e.

19

Šlac gwzoa Pablon' ciuda Efeson'

¹ Na' šlac zoa Apolosen' ciuda Corinto, Pablon' beze'e bedie' yež ca' zjachi' do ya'adao' na' bežinte' ciuda Efeson'. Efeson' bežague' baļ bene' chesonxene' Jesucriston'.

² Na' gože' legaque':

—žZedesoa Spiritw che Diosen' lo' yichjlažda'olen' caten' gwzolao chejni-laže'le Jesucriston'?

Nach gose'e le':

—Bi nezeto' še zoa Spiritw che Diosen'.

³ Nach Pablon' gože'e legaque':

—žBi dižan' chejle'le da' gwzoale nisen' še ca'?

Nach gose'e le':

—Gwzoato' nis can' bzejni'i da' Juanna'.

⁴ Nach gož Pablon' legaque':

—Da' Juanna' bzoe' bene' nis cate' besyetinje xtoła'gaque' na' lecze gože' legaque' cheyla' yesonxene' bena' za' seļa' Diosen'. Na' da' gwne' ca' be'e diža' che Jesucriston'.

⁵ Beyož bosozenague' can' gwna Pablon' nach gosezoe' nisa' da' yoble cont bosolo'e da' li chesejnilaže' Xancho Jesúsen'.

⁶ Nach Pablon' gwžoaxo ne'ena' yichj to toe' na' Spiritw che Diosen' gwžoan lo' yichjlaždao' to toe', nach gosen'e diža' da' cbi chesejni'ide' na' goseyixjue'ede' bi dan' gož Diosen' legaque'.

⁷ Na' yogo' bene' ca' zjanac ca do šižinue'.

⁸ Na' do šone' bio' Pablon' bsed blo'ede' bene' ca' chesedop chesežag lo' yodao' che bene' Israel ca' dan' zoa Efeson'. Bi bžebe', na' bzejni'ide' legaque' na' gwneyoede' legaque' yeson cuingaque' lo' na' Diosen' cont nabi'e legaque' len xbab chegaquen'.

9 Na' bchoj bał bene' güedenag bene' cbi chesejle'cze', na' lao bene' ca' že' yodao'na' gosene' diža' ya' che xtiža' Jesucriston' dan' chzejni'i Pablon'. Da'nan' Pablon' bechoje' gan' že' bene' ca' na' bebeje' ben' ba chesonxene' Jesúcriston' na' gwche'e legaque' gan' zoa to yo'o xen che to bene' le' Tiranno na' bzejni'ide' legaque' yogo' ža.

10 Na' gwzoa Pablon' chop iz bzejni'ide' bene' ca', na' can' goc, yogo' bene' že' distritw Asia gosende' xtiža' Xancho Jesúsén', bene' zjanac bene' Israel lente bene' bi zjanac bene' Israel.

11 Na' Diosen' bchine' Pablon' cont bene' yela' guac da' besyebanchgüe bene'.

12 Na' jasesane' no bay no lache' da' ba bchelen Pablon' gan' zjade bene' güe' na' la' chesyeyactede' bi yižgüe' chese'ede', na' bene' ca' yo'o nyaz da' xigüe' yichjlažda'ogaque'na' ľecze besyechojen.

13 Ľecze chesaš bał bene' Israel chesyebeje' da' xigüe' da' zjajo'o lo' yichjlaždao' bene' na' gosacłaže' yosochine' la Xancho Jesúsén' cont yesyebeje' da' xigüe' ca', nach gose'e da' xigüen':

—Len yela' chnabia' che Jesúsén' ben' choe' Pablon' xtiže'na' chonto' mandadw yechojle.

14 Na' zoa to bxoz gwnabia' che bene' Israel le' Esceva, na' nita' gaže xi'ine'. Na' bene' quingan' bosochine' la Jesúsén' gosacłaže' yesyebeje' da' xigüen'.

15 Nach goc to šlas chesone' ca' cate' to da' xigüen' boži'in xtižen', gožen legaque':

—Nombi'a Jesúsén' na' ba benda' diža' che Pablon', perw bi nombi'a le'e cont šejli'a xtiža'len'.

16 Nach bena' yo'o nyaz da' xigüen' bxite' gwnize' bene' ca' betlate' legaque' na' gwcheze' xałana'gaque'. Nach bosyoxonje' liž bena' ga'alyide'na' bedo chen zjanaque' dan' bene' legaque' ži'.

17 Na' goslas diža' can' goquen' gosenezete yogo' bene' že' Efeson', bene' Israel lente bene' cbi zjanac bene' Israel. Nach yogüe' besežebe' na' gosacbe'ede' Xancho Jesúsén' naque' bene' zaque'.

18 Nach bene' zan ba chesejle'e xtiža' Xancho Jesúsén', na' zane' go-xoadole' lao bene' ca' chesedop chesežag chesonxene' Jesucriston' cheso'e diža' che da' malen' ba gosone'.

19 Na' bene' ca' gosac bene' guaža' na' bene' güene ya'a bosyotob libr chegaquen' na' gosoxen' bosozeyen' lao bene' ľježe' bene' chesonxene' Jesucriston'. Na' besyebeje' cuent ca do gaca'te' zaca' libr ca' na' bžinen šiyon mil mechw plata, na' to to mechw plata ca' zacan' do tža žin.

20 Can' goc, bene' zan gosende' xtiža' Xancho Jesucriston', na' gwyanch bene' bosozenague' che'.

21 Nach gwde goc da' ca' Pablon' bene' xbab yeyeje' Jerusalénna', na' goclaže' yedie' šjayne'e bene' ca' že' yež gan' mbane distritw Macedonia len Acaya. Nach bene' xbab yeyož yeyeje' Jerusalénna' ľecze cheyała' šjeje' ciuda Roma.

22 Na' gwleje' chope bene' chesonlene' le' xšin Diosen' na' gwsele' legaque' distritw Macedonian', zjale' Timoteo na' Erasto, perw na' le' bega'anche' distritw Asian' yeto chope ža.

Bene' ca' besegue'ede' Pablon' gosebēcchgüe' da' zed ciuda Efeson'

23 Na' gwche' to da' zed gual ciuda Efeson', ľe nita' bene' beseže'e xtiža' Jesúsén' dan' bsd blo'e Pablon'.

24 Quinga goc: gwzoa to bene' le' Demetrio bene' chon yodao' dao' de plata da' naquen ca nac yodao' gan' zoa xonax Diana ben' chesonxene'. Na' bene' ca' gosonlene' žin'na' gosonchgüe' gan, le gwda'ochguan.

25 Nach btobe' bene' ca' goson žin txen len le' na' nochle bene' goson žin dan' nac ca', na' gože' legaque':

—Nezele ca nac žin dan' nlancho choncho nga, chonlenchon gan xen.

26 Na' ba beneczele na' ba ble'eczele can' chon to bene' le Pablo chsed chlo'ede' bene' lo ciuda Efeso checho nga na' lecze chsed chlo'ede' zan bene' že' doxen distritw Asia nga, che'e legaque' bibi zaca' l gua'a lsaca' da' cheson benachen' cont chesejnilažen'. Na' bene' zan ba chosozenague' che' na' chesebejyichje' dan' chejnilaže'cho.

27 Le gonšc xbab nacle goncho, le xož yesene' che žin dan' choncho nga, na' gague lezen, san lecž xož yesone' cont yodao' che xonax Diana chechon' yega'anen ca to da' bibi zaca' na' len yela' chze na' yela' zaca' che xonaxen'. Na' nezele ca nac xonax Diana chechon', yogo'cze bene' distritw Asia nga na' bene' gate'tezechle chesonxene' le'.

28 Beyož gosende' xtiža' Demetrijon' beselocchgüe' na' bososye'e gosene':

—Leca bene' zaca' xonax Diana che chio' bene' Efeso.

29 Nach gwche' da' zed doxen lo ciudan', na' gosaque' toze' jasenize' chope bene' distritw Macedonia bene' gosaque' txen len Pablon', toe' le Gayo na' yetoe' Aristarco. Na' gosexobe' legaque' besežine' gan' chesedobe yogo' bene' lo ciudan'.

30 Na' Pablon' goclaze' šo'e gan' zjandobe bene' ca' cont güe'lene' legaque' diža', perw bene' ca' chesonxene' Jesucriston' lo ciudan' bi goso'e latje šo'e.

31 Ba|bene' zjanaque' bene' gwnabia' distritwna' zjanac xmigw Pablon' na' lecze gosesele' rson gose'e Pablon' bi šeje' gan' zjandobe bene' ca'.

32 Na' bene' ca' zjandoben' gosone' sšag juisyw. Gwde gwdele bososya'a to toe'. Na' bene' zan bi zjanezde' bičen' zjandobe'na'.

33 Bene' Israel ca' bosožigue' to bene' le Alejandro lao bene' ca' že'na' cont be'lene' legaque' diža', na' bosozejni'ide' le' bin' cheyała' ne'. Na' Alejandron' gwłis ne'e cont gwnabe' nite' šize yosozenague' diža' dan' güe'e laogaquen' gwžo'e rson che bene' ca' chesejnilaže' Jesucriston'.

34 Perw cate' besele'ede' le' gosacbe'ede' lecze naque' bene' Israel, na' besyezolagüe' da' yoble bososye'e, gosene':

—Bene' zaca' juisyw xonax Diana che chio' bene' Efeso.

Ca do chop hor bososye'e ca' da' bi chesonxen bene' Israelen' xonax chegaquen'.

35 Na' bene' güezoj chegaquen' cane goc bebecžie' legaque'. Na' gože'ne':

—Le'e bene' gualaž, yogo' bene' že' doxen yežlion' zjanezde' naquen checho gapši'icho yodao' che xonax Dianan'. Naque' bene' zaque', le l gua'a lsaca' chen' blažon' le'e yaba.

36 Na' nono gac na da' yoble. Da'nan' le soa šize na' bich gonle da' bi zejen.

37 Na' ca nac bene' quinga nche'ele nga, bibi na' yesebane' lo' yodao' checho ca' na' neca nacho chosožie' yela' ya' che xonax Diana chechon'.

38 Na' Demetrio nga len yezica'chle bene' lježe', še chac bi chac chegaque' len bene' yoble, nita' bene' gwnabia' chechon' cont yesone' yela' justis chegaquen', con šja'aque' yeso'e legaque' part še ca'.

39 Na' še bichle da' chnabe gac, cheyała' goncho to yela' güexi'a cont choglaon.

40 Perw ca nac žaš da' nga chac na'a, xož baga'cho choncho contr gobiern can' že'cho nga, na' bibi de ye'gacchone' še yeseñabe' bixçhen' goc žaš da' nga chac na'a.

41 Beyož gože' legaque' ca' bene' mandadw besyežaše'.

20

Pablon' gweyjeche' distritw Macedonia na' nación Grecia

1 Nach cate' beyož gwche'ži da' zeden', Pablon' goxe' beñe' Efeso ca' chesonxen Jesucriston' cont ja'aque' gan' zoe'na' na' bene' çaçh laže'gaque' cont yesenite' yesejnilaže' Jesucriston'. Nach gože' legaque': "Nayežagcho", na' goseyela' lježe' na' beze'e beyeje' da' yoble distritw Macedonia.

2 Na' gwddie' to to yež da' zjachi' gala'ze Macedonian' bene' çaçh laže' beñe' ca' chesonxene' Jesucriston', na' beyožen' gweyjeche' nación da' nzi' Grecia.

3 Na' gwzoe' Grecian' šon bio'. Na' cate' bžin ža yeze'e, ba zoa yeyo'e lo' barcon' yeyeje' distritw Siria gan' nac laže' cate' gwnežde' zjachi'nao' bene' Israel ca' le'. Da'nan' bene' xbab yeza' ni'e yedie' gan' mbane distritw Macedonia na'le.

4-5 Na' xonj bene' ja'aque' ciuda da' nzi' Troas gan' gosebeze' Pablon' len neda' Lucas, na' gosa'aclene' neto' distritw Asia. Quinga zjale beñe' ca': Sópater, beñe' yež Berea, na' Aristarco len Segundo ben' zjanac beñe' ciuda Tesalónica, na' Gayo beñe' yež Derbe, na' Timoteon' na' çhope beñe' za'ac distritw Asia, Tíquico len Tróximo.

6 Na' gwde ĩnin' cate' chesagüe' yetextil da' bibi levadura nçixen, neda' len Pablon' gwza'to' Filiposen' na' goc gayo' ža cate' bžinto' ciuda Troas gan' ba nita' beñe' ca' chesebeze' neto', nach gwzoato' na'ze gaže ža.

Can' goc šlac zoa Pablon' Troas

7 Na' cate' bžin ža dmigw besedobe beñe' ca' chesonxene' Jesucriston' lo' ciuda Troasen' na' gweyeto' güe'ej gwdagwto' txen len legaque', na' Pablon' bežjni'ide' legaque' xtiža' Diosen'. Na' dan' ba zoa yeza' Pablon' ca gwxeze nach be'e diža' bžinte do chel.

8 Na' yogo'to' ndop nžagto' to lo' yo'o de šon cuia, yo'oto' lo' cuarten' dan' zoa yichjen cha'te, na' zjaze da' zan yi' lámpara.

9 Na' to bi' güego' lebe' Eutico žiabe' cho'a ventan. Na' Pablon' toñ zej diža' dan' cho'ena' na' gwtas bi'na' gan' žiabe' cho'a ventanna'. Na' šlac chtasbe' blažo'be' lo' yo che'ele. Nach cate' besyecose'be' bi' guat besyecose'.

10 Nach Pablon' betje' bžine' gan' jasyedixjue'eben' na' bcheque' lao bi' guata' gwdele'be'. Nach gože' beñe' ca':

—Bi žeble, mbanczbe'.

11 Nach Pablon' begüe' da' yoble na' gosagüe' na' bezolagüe' cheyo'e diža' len legaque'. Ne' choe'te dižan' ca' cate' gwyeni'. Nach beze'e.

12 Nach bi'na' blažo' cho'a ventanna', beñe' ca' že'na' besyeche'ebe' besye-behgüede' dan' mbanczbe'.

Gosa'aque' ciuda Troasen' na' ja'aque' ciuda Mileto

13-14 Nach bxi'ato' len Pablon' neto' bebialaoto' beyeje'to' lo' barcw bežinteto' ciuda gan' nzi' Asón' na' Pablon' gwyazlaže'che' begüe'e nez bela'te' Asónna' cont gwyo'e lo' barcon' txen len neto'. Nach gweyeto' ciuda gan' nzi' Mitilene.

15 Bezsa'to' Mitilenen' na' beteyo bežinto' gala'ze to yežlio da' chi' lo' nisaon' gan' nzi' Quío. Na' gwde yeto ža bežinto' gan' chi' yeto yežlio lo' nisaon' da' nzi'

Samos. Na' bechojto' lo' barcon' gwyejto' yež dan' nzi' Trogilio gan' bega'anto' tže' bezi'laže'to'. Nach beteyo bezyo'oto' lo' barcon' na' bežinto' ciuda Mileto.

16 Ca' bento' bi' gwdeto' ciuda Efeson', le Pablon' bi' goclaze' šede' yež ca' zjachi' do distritw Asian'. Chacbyende' yob žine' Jerusalenna' še gala' soe' na' ža lni dan' nzi' Pentecostés.

Pablon' bšajlene' bene' chosogüia chesene'e bene' ca' chesonxen Jesucriston' Efeson'

17 Na' šlac zoato' ciuda da' nzi' Mileto Pablon' goxe' bene' Efeson' bene' chosogüia chesene'e yezica'chle bene' ca' chesonxene' Jesucriston'.

18 Na' cate' besela'aque' Pablon' gože' legaue':

—Nezele can' bena' caten' gwzoo' distritw Asia gan' zoa lažlen', bena' da' güen šlac gwzoo' len le'e gwzolaotia' ža nechw žan' bžina' na'.

19 Gwzoo' bena' xšin Diosen' na' bi' benxen cuina'. Zan ni'a gwchežchgua' chele. Na' da' zan da' bosochi bososaca' bene' Israel ca' neda'.

20 Bzejni'ida' le'e yogo' dan' byažje šejni'ile, neca bezi'laža', bzejni'ida' le'e do gan' chdop chžagle na' len liž to tole.

21 Bzejni'ida' bene' zjanac bene' Israel gualaž chia' lente bene' cbi zjanac bene' Israel can' chaclaze' Diosen' yesyetinje xtoła'gaquen' na' yesejnilaže' Xancho Jesucriston'.

22 Na' na'a yeya'a Jerusalén, le Spiritw che Diosen' chonen byen yeya'a, na' bi' nezda' bin' gac chia' yežina' na'.

23 Con nezda' to to yež gan' ba bedia' Spiritw che Diosen' ba bzejni'in neda' doła' gata' ližya na' gac bichle da' saca'zi'a.

24 Perw bi' chi' yichja' che da' ca' saca'zi'a. La'czla' še yesote' neda', chzanda' yela' mban chia'. Toze da' chi' yichja' ša'lao gona' yogo' dan' gwlo' Xancho Jesucriston' lo na' gona', na' soa' mbalaz lo' yichjlažda'oguan' šlac chonan', le Xanchona' gwleje' neda' cont chyixjue'eda' diža' catequen' nži'ilaže' Diosen' benachen'.

25 'Ca nac le'e, ba bzejni'ida' le'e che yela' chnabia' che Diosen', perw na'a ne tole bich le'ele neda'.

26 Da'nan' chnia' le'e bibi doła' napa' še nole cuiayi'.

27 Bač bzejni'ida' le'e yogo' dan' chaclaze' Diosen' nezele, bibi bcuaša'.

28 Da'nan' cheyała' cuec yichjle che yogo'lol dan' ba bzejni'ida' le'e na' lecze ca' le gwsed le gwlo'e yezica'chle bene' chesedop chesežag chesonxene' Xancho Jesucriston' cont yosozenague' che dan' ba bzejni'ida'. Le gon ca' le Spiritw che Diosen' ba gwlejen le'e cont gwzejni'ile yezica'chle bene' chesonxene'ne'. Jesucriston' bnežjw cuine' bedelalj xchene' beque'e xtoła'chon' cont bozoe' chio' bin'lo len Diosen' da' yoble.

29 Nezda' cate' bich zoa' len le'e yesela'ac bene' yese'nde' yesexoyague' le'e cont cuejyichjle bich gwzenagle che Jesucriston'.

30 Ladjw le'e yesechoj bene' yososed yosolo'ede' diža' güenlaže' gualaz da' yososed yosolo'ede' diža' li. Yesone' ca' cont ga'ole dan' yososed yosolo'e legaue'.

31 Da'nan' le gwsaca' cont nono yesexoyag le'e. Na' le gon xbab, le šon izen' ba gwzoo' bzejni'ida' le'e na' gwneyoeda' le'e do ža do yel gwchežtia' chele.

32 'Na' na'a bene' migw, Diosen' gaclene' le'e na' xtiže'na' gwzejni'ichen can' chacde' le'e. Na' xtiže'na' gaclenen le'e cont šjayzoalenle Diosen' txen len yezica'chle bene' ba gwlej Diosen' zjanaque' lo ne'e.

³³ Bi chzelaža' bi da' de che bene', neca chzelaža' xmechwague' na' neca xagaque'.

³⁴ Nezczele can' bena' žin cont bžel da' byažjda' len da' beseyažje bene' ca' gosenite' len neda'.

³⁵ Na' bena' žinna' ca' cont blo'eda' le'e cheyała' gaclencho bene' še bi cheseyažjde'. Na' šjasa'laže'le can' gwna Xancho Jesúsen': "Mbalazech zoacho caten' chnežjwcho bi dan' chnežjwcho bene' clcl ca caten' chesone' chio' bi dan' chesone' chio'."

³⁶ Na' beyož be' Pablon' dižan' nach bzoa xiben' txen len yogo' bene' ca' na' bosol güiže' Diosen'.

³⁷ Na' yogo'lole' gosebeže' che Pablon' na' goseyele' le' na' bosonope' ne'ena'.

³⁸ Nach gosa'aque' len neto' bžinteto' gan' beyo'oto' lo' barcon'. Da' juisyw gosacde' dan' gože' legaque' bich yesele'ede' le'.

21

Pablon' beyeje' Jerusalén

¹ Beyož bze diža' lježto' len bene' ca' nach beyo'oto' lo' barcon' na' zjaydato' liča bžinteto' gan' chi' to yežlio lo' nisdaon' da' nzi' Cos, na' beteyon' bežinto' gan' chi' yeto yežlio lo' nisdaon' da' nzi' Rodas, nach bezsa'to' bežžinto' ciuda Pátara.

² Na' cate' bežinto' Pátaran' bželetto' yeto barcw dan' chzan' šejen distritw Fenicia, na' beyo'oto' lo'enña'.

³ Na' ba zjaydato' lo' barcon' cate' ble'eto' yežlio dan' chi' lo' nisdao' dan' nzi' Chipre, chin' šlja'a rovesle. Nach bedeto' zjaydato' gan' mbane distritw Siria. Nach cate' bežžinto' ciuda gan' nzi' Tiro besyeletje' yoa' da' zonsa' barcon' na' neto' bechojto' lo' barcon'.

⁴ Na' jaydiljwto' bene' ca' chesonxene' Jesucriston' Tiron' na' bega'anlento' legaque' to xman. Na' Spiritw che Diosen' bzenen legaque' cont gosata'yoede' Pablon' bi šeje' ciuda Jerusalénna'.

⁵ Perw na' cate' ba gwde to xman beza'to', na' yogüe' len xi'ingaque' len xo'olgaque' gosa'aque' len neto' cho'a yežen' na' bzoa xibto' len legaque' bol güižto' Diosen' cho'a nisdaon'.

⁶ Beyožen' bze diža' lježto' na' gwdeła' lježto', nach beyo'oto' lo' barcon' na' legaque' besyeya'aque' zjaya'ac ližgaque'.

⁷ Na' beza'to' ciuda Tiron' bežinto' gan' že' ciuda Tolemaida. Nach beyetjto' lo' barcon' jayna'to' bene' ca' chesonxene' Jesucriston' lo' ciuda Tolemaidan' na' bega'anlento' legaque' tža.

⁸ Na' beteyo beza'lento' Pablon' na' bežinto' Cesarean' na' jayga'anto' liž Felipe ben' naque' txen len bene' ca' yexop ben' chesaclene' postlw ca' len žin bixjw da' gota'. Na' Felipen' zoateze' cho'e diža' che Jesucriston'.

⁹ Felipen' nita' tap xi'ine' no'ol güego' na' chosozende' bene' bi dan' ba gož Diosen' legaque'.

¹⁰ Zan ža ba gwzoato' liž Felipen' cate' bla' to bene' distritw Judean' bene' le' Agabo, lecze chaque' chzende' bene' bi dan' ba gož Diosen' le'.

¹¹ Nach Agabon' gwnabe' xpant Pablon' na' bchejen' ni'a ne'e, na' gože' neto': —Spiritw che Diosen' ba bzenen neda' bene' Israel ca' že' Jerusalénna' yosocheje' ni'a na' ben' nac che' bant nga na' yesone' le' lo' na' bene' ca' bi zjanac bene' Israel.

12 Cate' beyož beneto' can' gwna Agabon', neto' len bene' Cesarea ca' gota'yoeto' Pablon' bi šeje' Jerusalénna'.

13 Nach Pablon' gwne':

—Bi cuežle chia' o gonle ga soayaša'. Chzane cuina' yosocheje' neda' na' yesote' neda' Jerusalénna' dan' chyixjue'eda' xtiža' Xancho Jesúsen'.

14 Na' cate' goche'eto' bibi gac gonto' cont cbi šeje' ciuda Jerusalénna', nach bich bi gožto'ne', con gwnato':

—Gac con can' ža Xancon'.

15 Nach bsini'ato' beza'to' zjaydato' Jerusalén.

16 Na' to chope bene' Cesarean' bene' chesonxen Jesucriston' gosa'aque' txen len neto', na' goseche'e neto' liž to bene' le Mnasón. Bena' ba goc sša chonxene' Jesucriston'. Naque' bene' Chipre, perw ba zoa liže' Jerusalénna'. Na' ba bosoxi'e soato' liže'na'.

Pablon' bežine' Jerusalénna' jane'e Jacobon'

17 Na' cate' bežinto' ciuda Jerusalénna' bene' lježto' ca' že'na' besyebede' bosoguape' neto' tiox.

18 Na' beteyo gwyejlento' Pablon' jana'to' Jacobon', na' bžinto'na' ba zjan-dop zjanžag yogo' bene' blao ben' chosogüia chesene'e yezica'chle bene' ca' chesonxene' Jesucriston' na'.

19 Nach Pablon' bguape' legaque' tiox na' beyožen' be'lene' legaque' diža' doxen can' ba ben Diosen', le zan bene' bi zjanac bene' Israel ba chesonxene' Jesucriston' gan' ba gwyeje' je'lene' legaque' xtiža' Diosen'.

20 Na' cate' bosozenague' dan' gož Pablon' legaque', nach goso'e yela' choxclen che Diosen' na' gose'e Pablon':

—Bene' migw, nezdo' zan mil bene' Israel gualaž checho ca' ba chesonxene' Jesucriston' na' yogüe' chesacde' chonen byen goncho yogo' da' ca' zjanyoj le'e ley chechon' dan' bzoj Moisés.

21 Na' zane' ba zjanende' chsed chlo'edo' bene' Israel gualaž chechon' nita' laž bene' zito' bich cheyala' yesone' can' ža le'e ley chechon' na' bi yesezoa' xi'ingaque' ca' señw dan' že' circuncisión.

22 ¿Nacxe ye'to' legaque'? le zane' yesežag nga cate' yesende' bač zo' nga da' yoble.

23 Güen goncho quinga: nita' tap bene' nga bene' zoa to da' zjango'o cho'en lao Diosen' na' chesaclaže' yesone' can' gosenen'.

24 Na' cheyala' chi'o legaque' yodao' blaon' na' gono'ne' txen chixjo' beyixe' ca' gwnežjwle bxozen' gote' cont yexi' yeyachle can' ža leyna'. Na' yeyožen' gac yosošib yichjagaque' can' zjango'o cho'en. Gono' ca' len legaque' cont yogo' bene' yesacbe'ede' bi chzo' ley chechon' to šla'ale can' chesenen', san chono' can' žanna'.

25 Na' ca' nac bene' ca' bi zjanac bene' Israel bene' ca' chesonxene' Jesucriston' yež yoble, ba bzojto' legaque' can' nac yela' güexi'a chechon', gožto'ne' bi yesagüe' yela' guagw dan' chesene' naquen che l'gua'a lsacan' chesejnilaže' bene', na' bi yesagüe' chen, na' bi yesagüe' be chat chosošoque' lba'ba', lecze bi yesata'lene' no'ole bi nac xo'olgaque' o bene' byo bi nac bene' chegaque'.

Gosezene' Pablon' yodao' blaona'

26 Beteyo gwza' Pablon' gwche'e bene' ca' tap cont yesyexi' yesyeyache' yodao' blaona' can' ža' ley chegaque'na'. Nach Pablon' gwyo'e gana' zoa bxozen' gwdixjue'ede' le' bi ža yanen' yeyož yesaque' xi'laže' cont yosonežjue' beyixe' ca' gote' che to to legaque'.

²⁷ Baĉh zoa gac gaže ža chesone' can' ža leyna' cont chesyexi chesyeyache', nach gozej Pablon' lo' yodao' blaona'. Na' baĉ bene' Israel ca' za'ac distritw Asian' besele'ede' le' lo' yodaon' na' gosego'oyeĉe' bene' že' do na' cont yesezene' Pablon'.

²⁸ Bososya'adie', gosene':

—Le'e bene' gualaž, le gon txen sencho benga. Chde' doxen chsed chlo'ede' contr yež Israel chechon', na' contr ley chechon' dan' bzoj da' Moisésen', na' contr yodao' checho nga. Na' na'a ba none' yeto da' mal juisyw contr yodao' dan' nac che Dios chechon', ba gwlo'e bene' bi zjanac bene' Israel lo'enna'.

²⁹ Gosene' ca' neče da' besele'ede' Pablon' lo' ciudan' chdalene' to bene' ciuda Efeso le' Trófimo, na' gosacde' še Pablonan' gwĉhe'e le' lo' yodao'na', la'czla' bi bene' ca'.

³⁰ Na' gosonchgüe' to žašyey. La' besedobte bene' zan cho'a yodaon' na' goso'e lo' yodaon' goseniže' Pablon', besyebeje' le' na' la' bosyoseyjwte' puert ca'.

³¹ Na' ba zoa yesote' le' cate' gwneze ben' yo'o lo' ne'e soldadw che nación Roma ben' že' lo' ciudan'. Cate' gwnezde' ba chac to žašyey juisyw doxen ciudan',

³² nach btobe' soldadw ca' len bene' gwnabia' chegaque' ca', na' gosa'aque' zja'acse'e gan' chi' da' zeda'. Na' cate' bene' ca' chesote' Pablon' besele'ede' ba besežin soldadw ca' len bene' gwnabia' chegaque' ca', la' gosebezte' bich goseyine' Pablon'.

³³ Cate' ben' yo'o lo' ne'e yogo' soldadon' bžine' gan' že' bene' ca', na' bene' mandadw gosoxe' soldadw che' ca' Pablon' na' bosocheje' le' chope gden. Nach gwnabde' bene' ca' že'na' no nac Pablon' na' bi bene'.

³⁴ Na' bene' ca' že'na' bososya'adie', gwde gwdele chesena to toe'. Na' gwde cbi gwyejni'i ben' yo'o lo' ne'e soldadw ca' bin' chac catec sšag chesone', nach bene' mandadw goseče'e Pablon' cuartel.

³⁵⁻³⁶ Nach yogo' bene' ca' zjana'ogüe' legaque' chesosye'e zjambeque' to žaš juisyw. Na' cate' besežine' cho'a nepe' che cuartelen' goselen soldadw ca' Pablon' neče dan' chesaclaže' bene' ca' yeseniže' le', na' yogo' bene' ca' chesosye'e, chesene':

—Le gote'.

Pablon' be'lene' bene' zan ca' diža'

³⁷ Baĉh cheso'e lo' cuartelen' cate' Pablon' gože' ben' yo'o lo' ne'e soldadw ca':

—¿Gono' latje gua' to chope diža'?

Nach bena' gože'ne':

—¿Chaco' diža' griego?

³⁸ ¿Bi naco' bene' nación Egipto ben' gwda btob tap mil bene' güet bene' bat ngaze na' gwĉhe'e legaque' latje dašen' gan' chesone' contr gobiernen'?

³⁹ Nach Pablon' gože'ne':

—Gague benan' neda'. Neda' naca' to bene' Israel na' ciuda blao gan' mbane distritw Cilician' dan' nzi' Tarso nac laža'. Ben goclen beĉ latje güe'lena' bene' quinga diža'.

⁴⁰ Nach bena' bnežjue' latje. Nach Pablon' gwzeche' lo' nepen' bene' señw len ne'e cont bene' ca' že'na' gosenite' šize bosozenague' che'. Nach gwzologüe' be'e diža' len legaque' diža' hebreo.

—Beṇe' gole len beṇe' xcuide', le gwzenag diža' dan' gua' laole nga.

² Na' cate' gosacbe'ede' chṇe' legaque' diža' hebreo gosenite' šize. Nach Pablon' gože' legaque':

³—Neda' naca' beṇe' Israel. Golja' ciuda Tarso gan' mbane distritw Cilicia, perw gwcha'ogua' ciuda Jerusalén ni. Na' bseda' len maestrw blao ben' le Gamaliel. Bzejni'ide' neda' doxen can' ža ley che da' xoxxta'ocho ca'. Na' godca' chonchgua' can' chazlaže' Diosen', cayaṇen' chaque le'e za'acle nga Na'a.

⁴ Na' bchi bsaca' zan beṇe' ca' chesejnilaže' Jesucriston', goclaža' gotto' legaque'. Na' gwxena' no beṇe' byo na' no no'ole chesonxene' le' na' gwche'egaca'ne' ližya.

⁵ Bxoz ben' naquech beṇe' blao na' nochle beṇe' gole blao ca' chesenabia' nación Israel chechon' zjaṇezde' can' bena'. Legaque' gosone' yiš dan' beṇa' gwy'a' ciuda Damascon' gan' godca' sena' baltez beṇe' chesonxen Jesucriston' cont che'egaca'ne' Jerusalén ni par gonto'ne' castigw.

*Pablon' cho'e diža' can' goc che' cate' Diosen' bocobe' yichjlažda'ogüe'
(Hch. 9:1-19; 26:12-18)*

⁶ Na' šlac zya'a ciuda Damascon' ca do guagwbiz cate' to be'ni' gual da' za' yaba gwyechjen neda'.

⁷ Na' gwbiṇa' lo yon' benda' to beṇe' gože' neda': "Saulo, Saulo žbixchen' chchi chsaco' neda'?"

⁸ Nach boži'a xtižen', goša'ne': "žNo le' beṇe'?" Nach gwne': "Nedan' Jesús bene' Nazaret na' neda' chchi chsaco'."

⁹ Beṇe' ca' zya'alena'na' besežebchgüe' besele'ede' be'nin', perw bi gosejni'ide' dan' gož Jesúsen' neda'.

¹⁰ Nach goša'ne': "žBin' cheyala' gona' Xana'?" Nach Xana' Jesúsen' gwne': "Beyas na' gwyejteze ciuda Damascon', na' cate' žino'na' to beṇe' ye'e le' dan' cheyala' gono'."

¹¹ Na' gwčhola' catec gwṇa'chgua' be'nin', nach beṇe' ca' zya'alena' txen gosoxe'de' taca' cont bžinto' Damascon'.

¹² Na' to beṇe' le Ananías zoe' ciuda Damascon' ben' chonxene' Diosen' do yichj do laže' na' chzenague' che yogo' ley dan' bzoj Moisésen'. Na' yogo'loḷ beṇe' gualaż checho ca' že'na' cheso'e xtiža' Ananíasen' naque' beṇe' chon da' güen.

¹³ Ananíasna' bide' gan' zoan' na' cate' ble'e nach gože' neda': "Saulo, bele'e." Na' beyož gwne' ca' la' bele'eteda' na' ble'eda' le'.

¹⁴ Nach gože' neda': "Dios ben' chonxencho na' ben' benxen da' xoxxta'ocho ca', len' ba gwleje' le' cana'te cont nezdo' can' chaclaže' gono', na' ba ble'edo' Xi'ine' ben' nac la'zelagüe beṇe' chon da' güen, na' ba bendo' xtiže'."

¹⁵ Nachen' go'o xtižen' len beṇe' zan beṇe' že' lo yežlion' gwzejni'igacdo'ne' da' ca' ba bendo' na' ba ble'edo'."

¹⁶ Na' lecz gož Ananíasen' neda': "žBičhen' cuezo'? Yo'o so' nis. Na' nabdo' Xancho Jesucriston' cont yeya' yeyibe' yichjlažda'oguoṇ' len da' malen'." Can' gože' neda'.

Diosen' gwleje' Pablon' cont be'e xtižen' len beṇe' ca' bi zjanaque' beṇe' Israel

¹⁷ Na' gwdena' beyeda' ciuda Jerusalén ni na' gwy'a' lo' yodao' blaon' jel güiža' Diosen', na' šlac choḷ güiža'ne' ble'edagüeda' Xancho Jesucriston'.

¹⁸ Na' Xanchon' gože' neda': "Bi šedo' chojo' ciuda Jerusalén ni, le bi yosozenag beṇe' quinga xtižo' dan' go'o čhian'."

19 Nach goša'ne': "Xana', legaque' zjanezde' neda' gwya'a to to yodao' jet jatina' bene' ca' chesonxene' le' na' bseyjwgaca'ne' ližya.

20 Na' lecz naca' bene' ca' txen cate' gosote' Esteban ben' be' xtižon', na' neda' gwna'a xadon che bene' ca' gosot le'.

21 Nach Xancho Jesucriston' gože' neda': "Bchoj na' sela' le' zito' go'o xtižan' len bene' ca' bi zjanac bene' Israel."

Pablon' len ben' yo'o lo ne'e soldadw ca'

22 Bene' ca' zjandoben', nga zelao bosozenague' xtiža' Pablon', beseže'e da' be'e diža' che bene' zito' bene' bi zjanac bene' Israel, nach gosezolagüe' chososye'e, chesene':

—Le got bena'. Bich cheyała' bane'.

23 Bososya'adie' na' beselocchgüe' bosozala' xagaque' ca'ale na' gosaše' bište yon' bosozalen' lo be'.

24 Cate' ble'e ben' yo'o lo ne'e soldadw ca' can' chesonen' nach bene' mandadw gosego'o soldadw ca' Pablon' lo' cuartelen' na' yeseyine'ne' cont güe'e diža' bi da' malen' ba bene'. Goclaže' nezde' bichen' bene' lo ciudan' chososya'adie' che'.

25 Na' ba zjancheje' Pablon' cont yeseyine' le' cate' gože' to soldadw ben' zena' bene' chnabi'e lao to gayoa soldadw:

—Can' ža ley, bi de lsens chinle neda' sin cbi nezele še bin' nona', le neda' naca' bene' nación Roma.

26 Beyož gože' bene' gwnabia' che soldadon' ca' la' gwyejte ben' lao ben' yo'o lo ne'e yogo' soldadw ca', ježe'ne':

—Gwsaco' bin' gondo' ben' ba bdołan', le naque' bene' nación Roma.

27 Nach ben' yo'o lo ne'e soldadw ca' gwyeje' lao Pablon' gože'ne':

—Gwna neda' žle bene' nación Roma le'?

Nach Pablon' gože'ne':

—Bene' nación Roma neda'.

28 Nach ben' yo'o lo ne'e yogo' soldadw ca' gože' Pablon':

—Mechw xen gwxaqueda' cont naca' cuent len bene' nación Roman'.

Nach Pablon' gože'ne':

—Neda' golja' naca' bene' nación Roma.

29 Nach bene' ca' ba nita' cont yeseyine' Pablon' la' besyecuašte' cuiten', na' ben' yo'o lo ne'e yogo' soldadw ca' lecze bžebe' dan' ba bcheje' Pablon' cont yeseyine'ne'.

Gosesele' Pablon' gan' chosoxi'a bene' ca' chesenabia' Israelen'

30 Nach beteyo ben' yo'o lo ne'e soldadw ca' gwseže' gdenna' nchej Pablon'. Na' bene' mandadw besedobe bžox gwnabia' ca' len yogo' bene' gole blao ca' chesenabia' nación Israelen' cont nezde' bi dan' chosocuiše' Pablon'. Na' cate' ba besedobe bene' ca' nach gwleje' Pablon' na' gwsele' le' gwzeche' laogaquen'.

23

1 Nach Pablon' gwne'e bene' gole blao ca' chesenabia' nación Israelen' na' gože' legaque':

—Bene' migw, ža na'aža nezda' lo' lažda'ogua' ba bena' can' chazlaže' Diosen'.

2 Nach Ananías ben' nacch bžox blao bene' mandadw len bene' ca' zjaze cuit Pablon' yesebaže' cho'ena'.

3 Na' Pablon' gože'ne':

—iDiosen' gone' le' castigw, bene' güexoayag! Chi'o nga cont gono' yela' justis chia' can' ža ley chechon' na' chono' contr ley beno' mandadw yesebaže' choa'.

⁴ Bene' ca' že' gala'ze gose'e Pablon':

—Bi cheyala' yoži'o xtižen' ca', le naque' bꝁoz blao che Dios.

⁵ Nach Pablon' boži'en gwne':

—Bene' migw, bi gwnezda' še benga bꝁoz blaon'. Nezda' Xtiža' Diosen' dan' nyojen žan: “Bi yoži'ile diža' zi' len bene' gwnabia' chelen'.”

⁶ Pablon' goche'ede' bene' ca' chesenabia' nación Israelen' zjanaque' chople. Bałe' chesejle'e can' chsed chlo'e bene' ca' zjansi'e saduceo na' yebałe' can' chsed chlo'e bene' ca' zjansi'e fariseo. Nach Pablon' gože' bene' ca' že'na':

—Bene' migw, naca' bene' fariseo, na' naca' xi'in bene' fariseo. Na' zoa' nga chonle yela' justis chia' neče chejli'a yesyeban bene' guat ca'.

⁷ Beyož gwne' ca' bene' fariseo ca' len bene' saduceo ca' ben' zjandop zjanžag na' gosezolagüe' chosošaše', na' besechoje' chople.

⁸ Le bene' saduceo ca' chesene' bi yesyeban bene' guat ca' na' bi chesejle'e nita' angl o nochle spiritw yoble. Na' bene' fariseo ca' chesejle'e yesyeban bene' guat ca' na' chesejle'e nita' angl na' nita' nochle spiritw.

⁹ Yogo' ben' že'na' chesosye'e chosošaše'. Nach to chope bene' zjansed ley dan' bzoj Moisésen', ben' zjanac bene' fariseo, gosezože'e gosone' Pablon' txen, gosene':

—Bibi da' mal non benga. Še no spiritw o no angl ba gwñelen le', bi cheyala' goncho contr le', le contr Diosen' goncho še ca'.

¹⁰ Leca gwche' to žaš xen na' ben' yo'o lo ne'e yogo' soldadw ca' bžebe' še yosozoxj yosotine' Pablon'. Nach bene' mandadw besežin soldadw che' ca' cont jasyeleje' Pablon' ladjo bene' ca' na' besyechene' cuartelen' da' yoble.

¹¹ Nach že' beteyon' Xancho Jesucriston' bžine' gan' de Pablon' na' gože'ne':

—Bi žebo' Pablo. Can' ba bi'o xtižan' Jerusalén ni, lec ca' cheyala' go'o xtižan' ciuda Roma.

Bosoxi'e yesote' Pablon'

¹² Na' beteyo bał bene' Israel besedobe' na' bosoxi'e yesote' Pablon'. Na' gosechogbi'en, gosene':

—Diosen' gone' chio' castigw še ye'ej gagwcho sin cbiņa' gotcho Pablon'.

¹³ Nde čhoa bene' bosoxi'e yesote' Pablon'.

¹⁴ Nach ja'aque' gan' že' bꝁoz gwnabia' ca' len bene' gole bene' blao ca' chesenabia' nación Israelen' na' gose'e legaque':

—Bač gwchogbia'to' gon Diosen' neto' castigw še ye'ej gagwto' sin cbiņa' gotto' Pablon'.

¹⁵ Na' le yotobe lježle le gon yela' güexi'a gwꝁe cont nabele ben' yo'o lo ne'e yogo' soldadw ca' cueje' Pablon' yide' laolen', gwde'ele za' yeyiljwožechle bi da' xinj ba none'na'. Na' neto' cue'na'oto'ne' tnez gotto'ne' cate' za' le'e gan' nita'len'.

¹⁶ Na' zoa to bi' byo bi' nac xi'in bene' zan Pablon' na' lebe' benebe' da'na' chesacde' yesonde' le'. Na' gwyejbe' cuartelen' jazenebe' Pablon'.

¹⁷ Nach Pablon' goxe' to bene' chnabi'e to gayoa soldadw na' gože'ne':

—Ben goclen gwche' bi' nga lao bene' gwnabia' chelen'. De to da' ye'be' le'.

¹⁸ Bene' gwnabia' che soldadon' gwche'e bi'na' lao ben' yo'o lo ne'e yogo' soldadw ca' na' gože' le':

—Pablo ben' de ližya goxe' neda' na' gwñabe' goclen lagua' cont zedesana' bi' nga laguon', že' de to da' ye'be' le'.

19 Nach ben' yo'o lo ne'e yogo' soldadw ca' bexue' na'be' gwche'ebe' to šļa'ale gwnabde'be':

—¿Bi che'ndo' nao' neda'?

20 Nach bi'na' gožbe' le':

—Bene' blao che bene' Israel gualaž četo' ca' ba bosoxi'e yesenabe' cuejo' Pablon' gwxe na' yosode'ede' selo'ne' gana' chesežag bene' gwnabia' čhegaquen' cont yeseyiljwož'e' bi da' xinj non Pablon'.

21 Perw bi šejli'o čhegaque'. Nde čhoa bene' ca' yesebe'na'ogüe' Pablon' tnez cont yesote' le' na' ba gosečhogbi'en bibi yese'ej yesagüe' šlac biņa' yesote'ne'. Na' ba chesebeze' gwzenago' čhegaque' cont cuejo' Pablon'.

22 Nach ben' yo'o lo ne'e soldadon' bose'e bi'na' na' gože'be':

—Gwsaco' bi go'o diža' che rsonņa' ba bedesano' lagua' nga.

Gosesele' Pablon' lao gobernador ben' le Félix

23 Nach ben' yo'o lo ne'e yogo' soldadw ca' goxe' čhope bene' gwnabia' ben' chesenabia' to gayoa güeje soldadw na' bene' mandadw yososiņi'a čhegaque' cont šja'aque' ciuda Cesarea do cheda ga šeže'le na' yeseče'e čop gayoa soldadw bene' yesa'ac ni'aze na' gayonši bene' yesebia cabayw na' yečop gayoa soldadw bene' yesoxe' lanza.

24 Lecze gože' legaque' chyažje cabayw be cuia Pablon', le le'na' yeseče'e gana' zoa gobernadore' ben' le Félix, na' yesape' Pablon' cont bibi gac čhe' tnez.

25 Nach bzoje' to cart čhe gobernadore' da' bgoxe' legaque', žan:

26 “Señor Gobernador: Neda' Claudio Lisias chzoja' le' gobernador Félix, nacteco' bene' blao, chguapa' le' tiox.

27 Bene' Israel ca' ba gosezene' benga na' ba bosoxi'e yesote'ne', perw cate' gwnežda' naque' bene' nación Roma, gwy'a len soldadw čhia' ca' jasla'ne' lo na'gaquen'.

28 Na' cont nežda' bichen' chosocuiše' le', gwčhi'ane' gan' chosoxi'a bene' gwnabia' čhe nación Israelen'.

29 Nach gwnežda' chosocuiše' le' čhe bize da' chesac čhe' len ley čhegaque'na', na' bi načo bi da' mal ba none' cont yesote' le' o cont gate' ližya.

30 Perw na' ba gwnežda' ba bosoxi'a bene' Israel ca' yesote' le', da'nan' la' chsel'a'tia'ne' laguo' le' na' lecze bena' mandadw len bene' ca' chosocuiš le' šja'aque' laguo' na' yesene' bin' chesac čhegaque' len le'. Si'xenšco' yogo' da' quinga čhneyoeda' le'. Claudio Lisias.”

31 Nach soldadw ca' gosone' can' ben bene' gwnabia' čhegaquen' mandadw, besyebeje' Pablon' na' šeže'le gosegüe'e nez len le' besežine' yež da' nzi' Antípatris.

32 Na' cate' gwyeni' besyebi'i soldadw ca' ja'ac ni'aze' jaya'aque' cuartelen' na' bene' ca' gosebia cabayon' ja'aclene' Pablon'.

33 Na' cate' besežine' ciuda Cesarean' bosonežjue' gobernadore' carten' zjanoxe'na' na' lecž gosone' Pablon' lo ne'e.

34 Na' gobernadore' cate' beyož blabe' carten' gwnabde' Pablon' ga bene' naque'. Na' cate' gwnežde' naque' bene' distritw Cilicia,

35 nach gože'ne':

—Gwzenaga' bin' nao' cate' yesela'ac bene' ca' chosocuiš le'.

Nach bene' mandadw bososeyjue' Pablon' lo' yo'o gan' chbe' rey Herodesen' cate' chone' yela' justis.

24

Pablon' be'e diža' lao gobernador Félix

1 Cate' bačh goc gayo' ža zoa Pablon' ciuda Cesarean', nach bžin Ananías ben' nac bꝛoz blaoch che bene' Israelen' na' nche'e to chope bene' gole blao chegaque' na' len to bene' le Tértulo ben' chac chne' lao bene' gwnabia'. Na' ja'aque' lao gobernadore' gosagüe' xya che Pablon'.

2 Na' cate' jasexi'e Pablon', Tértulon' gwdagüe' xya che', gože' gobernador Félixen':

—Si'xeno', señor gobernador, za'to' laguo' nga. Binło juisyw zoa nación chechon' na' da' zan da' šagüe' ba chac da' chnabi'o neto'.

3 Gate'tez zoato' žato' choꝛcleno' can' chono'na', señor gobernador, catec chbeto' can' chnabi'ona'.

4 Na' cont bi goneto' le' bichle zed, chata'yoeda' le' gwzenago' šlož dao' dan' zedenato' na'a.

5 Ben' ba goxo' laguo' nga, nezeto' naque' to bene' chbecchgua da' zed. Chde' doxen yežlion' chone' cont neto' bene' Israel chacto' chople. Na' naque' bene' blao len bene' ca' chesene' bene' nazareno lagüe chesejnilaže' Jesús ben' nac bene' yež Nazaret.

6 Na' goclaže' gone' da' mal juisyw lo' yodao' četon' na' da'nan' gwzento'ne' cont čogbia'to' che' con can' ža ley četon'.

7 Perw na' gwyaz Lisiasen' ben' nac bene' gwnabia' che soldadw ca' na' beque'ene' lo' na'ton'.

8 Na' gože' neto' cheyała' yidto' laguo' nga cont gwcuisto'ne'. Guac nabdo' Pablon' cuino' cont nezdo' nac da' li can' chcuisto'ne' nga.

9 Nach bene' Israel ca' za'aclene' Tértulon' gosaque' toze len le' gosene' le' can' naquen.

10 Nach gobernadore' bene' señw len Pablon' cont ne', na' Pablon' gwzomagüe' gwne':

—Nezda' ba goc zan iz chono' yela' justis che nación ni, na' da'nan' chbeda' gwzoa' rson čhian' laguon'.

11 Na'a chac šižinw ža gwya'a Jerusalénna' jenxena' Diosen'. Na' guac nabdo' bene' ca' besele'e neda' še leca' naquen.

12 Bi nacho besele'ede' chacyoža' len no bene' lo' yodao' blaon' ne lo' yodao' yoble o gate'teze lo' ciudan'.

13 Na' bibi gac yeson bene' quinga cont yosolo'e napa' doła' ca dan' chosocuiše' neda'.

14 Bi gwcuša' diža', da' li chonxena' Diosen' ben' gosonxen da' xozxta'oto' ca', la'czla' chonxena'ne' can' cheson bene' ca' zjanao' da' cobe dan' bi chesazlaže' bene' quinga, na' chejli'a che yogo'loł Xtiza' Diosen' dan' nyoj le'e ley četon' na' da' ca' bosozoj bene' ca' goso'e xtiža' Diosen' cani'.

15 Na' zoa' lez yosban Diosen' bene' ca' ba gosat, bene' güen lente bene' mal. Lencze bene' gualaž čhia' can' nite' lez gon Diosen' ca'.

16 Da'nan' zoa' čhi' yichja' chona' can' chaclaže' Diosen' neche nezda' lo' yichjlažda'ogua' bibi doła' napa' lao Diosen' ne lao benačen'.

17 'Ba goc zan iz zoa' zito' na' za' bela'a Jerusalénna' na'a cont bnežjua' mechw da' toba' da' gaclenen bene' yaše' ca', na' lecz ca' jasana' yelaten' lo' yodao' blaon'.

18 Ca' goquen' zoa' lo' yodao' blaon' ba bexi beyacha' can' cheyała' gacto' cont chnežjwto' bi dan' chnežjwto' lao Diosen', cate' to chope bene' Israel za'ac Asia besele'e gan' zoa'na'. Na' bi nacho mbeca' žaš, neca ndop nžaga' bene' zan.

19 Na' bene' ca' za'ac distritw Asian' cheyała' yesid cuine' yosocuiše' neda' laguo' nga še bi da' mal chesacde' chona'.

20 Na' bene' quinga nita' nga guac yesene' še bi da' mal nona' caten' bosodie' neda' lao bene' ca' chesenabia' nación Israelen'.

21 Še toz dan' bi chesazlaže' dan' goše'gaca'ne' caten' zjandob bene' ca' chesenabia' gwnia': "Ca nac yela' justis chia' dan' chonle na'aža, chonlen dan' chejli'a gwžin ža yesyeban bene' ca' ba gosat."

22 Gobernador Félixen' ba nezde' can' chosozejni'i bene' ca' ba chesejle' che Jesucriston', na' cate' bende' can' gwna Pablon', bich goclaže' gone' yela' justis che' ca hora', gwne':

—Cate' yid Lisiasen' ben' nac bene' gwnabia' che soldadw ca', cana' yeyož gwzenaga' can' nac dan' chagwle xya nga.

23 Nach bene' mandadw beče' xan soldadon' Pablon' gan' die' ližyan' na' be'e latje gon Pablon' con bi chaclaže' gone', na' be'e latje jaseña' bene' migw chen' le' jasesane' bi dan' byažjde'.

24 Nach beza' gobernador Félixen' ciuda Cesarean', perw cate' gwde to chope ža bežine' da' yoble nche'e no'ol che' ben' le Drusila. Na' Drusilan' naque' no'ole Israel. Nach gubernadore' bene' mandadw gosaxe' Pablon' da' yoble na' bzenague' be' Pablon' diža' gwne' yogo'lo! bene' cheyała' yesejnilaže' Jesucriston'.

25 Nach Pablon' be'lenche' le' diža' can' cheyała' gaccho bene' güen lao Diosen', na' can' gwsaca'cho cont bi goncho da' mal, na' lecze be'lene' le' diža' can' gon Diosen' cate' žin ža gone' justis che yogo' benač na' gwnežjue' castigw che yogo' bene' bi chesejnilaže' le'. Na' gobernador Félixen' bžebe' na' gože' Pablon':

—Da' na'ze gwzenaga' na'a, guac yeyejo'. Na' cate' nlatja' guaxcza' le' yeto.

26 Gobernadore' gocde' še gwnežjo Pablon' le' mechw cont yosane' le'. Da'n'an' goxe' Pablon' güeltze be'lene' le' diža'.

27 Ca' chac gwde chop iz nach yeto bene' yoble bene' le Porcio Festo gwdie' blane' xlatje'. Na' Félixen' goclaže' yega'ane' binlo len bene' Israelen' cate' ba bechoje' gobernador, da'n'an' bene' mandadw bega'an' Pablon' ližyan'.

25

Pablon' bzoa rson che' lao gobernador Feston'

1 Na' cate' bžin Feston' ciuda Cesarean' gan' nabi'e, gwzoe' šone ža na' gwze'e gwyeye' Jerusalenna'.

2 Nach bžox gwnabia' ca' len nochle bene' blao che bene' Israel ca' ja'aque' jaseñe' le' cont bosocuiše' Pablon'.

3 Na' gosata'yoede' Feston' gone' mandadw šjasesane' Pablon' Jerusalén. Gosata'yoede' le' gone' ca' le gosaclaže' yesebe'na'ogüe' Pablon' cont yesote'ne' tnez.

4 Na' gobernador Feston' boži'e xtiža'gaque', gwne':

—Yega'anche' Cesarean' gan' die' ližyan' le neda' bich chžeda' ša'a na'.

5 Na' le cuej no bene' gwnabia' chele seła'le legaque' len neda' cont yosocuiše' le' lagua' gw'zoga gona' yela' justis še bi da' xinj ba none'.

6 Nach gwzoa gubernadore' len legaque' Jerusalenna' do xono' o do ši ža na' gwdena' beze'e beyeje' Cesarean'. Na' beteyo gwchi'e gan' chone' yela' justisen' na' bene' mandadw gwyej Pablon' lagüen'.

7 Nach cate' bžin Pablon' lagüen' ba nita' bene' Israel ca' za'ac Jerusalénna' na' la' gosechjte' le' na' gosezolagüe' bosocuiše' le' chesene' da' zan da' mal juisyw ba bene', perw bi blo'elaon še diža' li cheso'e.

8 Nach Pablon' bzoa rson che', gwne':

—Bibi doła' napa' len ley che neto' bene' Israel ne len yodao' blao cheton' na' ne len rey César ben' chnabia' doxen nación Roman'.

9 Na' Feston' goclaže' yega'ane' binlo len bene' Israel ca', da'n'an' gože' Pablon':

—¿Bi che'ndo' sao' Jerusalén gona' yela' justis chion' na'le che yogo' da' ca' chosocuiš bene' quinga le'?

10 Nach Pablon' gwne':

—Rey Césaren' ba nzoe' le' cont gono' yela' justis, na' cheyala' gac yela' justis chia' laguo' nga. Ca nac bene' Israel quinga, le' nezczedo' bibi da' xinj na' gona' len legaue'.

11 Šaca' ba gwdapa' doła' o bichle da' ba bena' da' cheyala' gata', bi žia' bi gata'. Perw bibi nona' ca nac dan' chosocuiše' neda' nga, na' nono zaca' gwde neda' laogaue'na'. Da'n'an' chnaba' tia' lao rey Césaren' cont gone' yela' justis chian'.

12 Nach Feston' bene' yela' güexi'a len bene' gwnabia' che' ca' bi yesone' len Pablon' nach gože'ne':

—Ba gwñabo' tio' lao rey César na' lagüe' nan' šejo'.

Gobernador Feston' bdie' Pablon' lao rey Agripan'

13 Na' cate' ba gwde yeto chope ža, rey Agripa len no'ol che' ben' le Berenice besežine' Cesarean' bedesequape' Feston' tiox.

14 Na' cate' gwneze gobernador Feston' nite' yezan ža, nach be'lene' rey Agripan' diža' che Pablon', gože'ne':

—Zoa to bene' nyixjw Félixen' ližya nga cate' bechoje'.

15 Na' cate' gwy'a a Jerusalénna' bžoz gwnabia' ca' na' nochle bene' blao che bene' Israel ca' goseñabe' choglaguan' cont gaque' castigw.

16 Perw na' goše'gaca'ne' bi de costumbr che chio' bene' nación Roma gwdecho bene' yesaque' castigw še bi yesyedillagüen' len bene' ca' chosocuiš le' cont yosozoa rson chegaue'.

17 Nach cate' besela'aque' nga beteyo la' gwche'tia' gan' chona' yela' justis na' bena' mandadw gosebeje' Pablon'.

18 Na' cate' bosocuiš bene' ca' le', ne toz da' mal dan' chacda' yosobague'de' le' bibi gosene'.

19 Dan' chac chegaue', bi chejnilaže' Pablon' can' chesejnilaže' legaue', na' cheso'e diža' che to bene' ba got, bene' le Jesús, na' Pablon' že' mbancze'.

20 Cate' bich bi bežellaža' gona' ca dan' chesac chegaquen' na' goša' Pablon' še chaclaže' yodia'ne' Jerusalén cont gac yela' justis chen' che da' ca' chosobague'de' le'.

21 Nach Pablon' gwñabe' šeje' gone' yela' justis che' lao rey César Augusto, na' bena' mandadw beyeyjue' šlac gac gwdia'ne' lao rey Césaren'.

22 Nach rey Agripan' gože' Feston':

—Chaclaža' gwzenaga' can' choe' ben' dižan'.

Nach Feston' gože' le':

—Gwxe gwzenago' che' šeca'.

23 Nach beteyo gosacxenchgua rey Agripan' len Berenice cate' goso'e gana' chi' gobernadore'n, na' lecz zjachi' bene' ca' chesenabia' soldadw ca' na' yogo'

no bene' blao che ciudan'. Na' gwdena' Feston' bene' mandadw jasexi'e Pablon'.

²⁴ Na' Feston' gwne':

—Rey Agripa, na' len yogo' le'e že'le nga len neto', ca nac benga ze laole nga, yogo' bene' Israel bene' že' Jerusalén len bene' že' Cesarea nga ba gose'e neda' benga naque' bene' mal na' yogo'cze' chesene' bi cheyala' bane'.

²⁵ Na' ba gwnabyoža' na' gota'bia' bibi none' da' zaca' choglaguan' che' gate'. Na' ba gwnabe' tie' lao rey César gone' yela' justis che', na' ba gwcheba' gwdia'ne' ciuda Roma na'ale gan' zoa rey Césaren'.

²⁶ Na' chacžejlaža', le bibi chežellaža' gwzoja' reyen' yapa'ne' bin' none'. Da'nan' bach gwleja'ne' laole nga, na' chbechgüeda' chbeja'ne' laguo' le' rey Agripa, cont yeyož gwzenagcho che' na' gata' bi da' gwzoja'.

²⁷ Chacda' bi naquen to licha seła'ne' Roman' sin cbi gwzoja' še bin' none'.

26

Pablon' bzoe' rson che' lao rey Agripan'

¹ Nach rey Agripan' gože' Pablon': —Guac nao' bi da' gaclenen le'.

Nach Pablon' gwłis ne'en lao bene' ca' gwzolagüe' bzoa rson chen', gwne':

² —Chbechgüeda' rey Agripa, ba gosone' latje gua' diža' laguo' nga na'a ca nac dan' chosocuiš bene' Israel gualaž checho ca' neda'.

³ Le' nombi'o costumbr che chio' bene' Israel na' neздо' can' chesacyož bene' gualaž checho ca' legacze'. Da'nan' chata'yoeda' le' gapšco' yela' chx-enlaže' gwzenago' chia' nga.

Quinga ben Pablon' cate' bina' šejnilaže' Criston'

⁴ Yogo' bene' Israel gualaž chechon' zjaņezde' can' ba gwzoa' chonxena' Diosen' cate' ne' nactia' bidao', caten' gwzoa' laža' lente caten' gwzoa' ciuda Jerusalén.

⁵ Na' še chese'nde' yeso'e diža', lecze zjaņezde' goca' txen len bene' ca' zjans'i'e fariseo cate' nactia' bi' xcuide' na' bene' fariseo ca' chesonche' yogoloł costumbr gole can' nyoj ley chechon' clcl can' cheson yezica'ch bene' Israel gualaž checho ca'.

⁶ Na' legaque' chesagüe' xya chia' neche chejli'a gwžin ža cate' Diosen' yosbane' bene' guat ca' can' gože' da' xozxta'och ca'. Neche da'nan' zoa' nga na'aža cont gac yela' justis chian'.

⁷ Bene' zan lo šižinw cue' chio' bene' Israel nite' chesebeze' batcan' yosban Diosen' bene' ca' ba gosat, can' že' gone'. Da'nan' chesonxene' le' do ža do yel. Lecz neda' zoa' lez gac ca', na' da'nan' bal' bene' Israel gualaž chechon' chosocuiše' neda' nga rey Agripa.

⁸ Na' le'e chi'le chzenagle chia', žbixchen' chaquele nono šejle' dan' yosban Diosen' bene' ca' ba gosat?

Cana' Pablon' bgue'ede' bene' chesejnilaže' Criston'

⁹ Cana' neda' godca' cheyala' gue'eda' bene' ca' chesonxen Jesús ben' nac bene' Nazaret, na' da' zan benchgua' contr legaque'.

¹⁰ Bene' zan bene' chesejle' che Jesús'en' Jerusalénna' gwduxjua' ližya, gw-dapa' yiš dan' bosozoj bxoz gwnabia' ca' cho'en diža' napa' yela' gwnabia' cont gona' ca'. Na' cate' gosechoglagüe' yesote' no bene' ca', goca' toze can' bosoxi'e yesone'.

11 Na' zan las gwy'a to to yodao' jasaca' legaque' cont yesebejyichje' bich yesonxene' Jesúsen'. Na' catec bgue'eda' legaque' gwy'a yež zito' jalagšiba' legaque'.

Da' yoble Pablon' cho'e diža' can' goc che' cate' Diosen' bocobe' yichjlažda'ogüe'

(Hch. 9:1-19; 22:6-16)

12 'Can' goc to ža cate' zya'a ciuda Damascon', noxa' yiš che bꝛoz gwnabia' ca' dan' žan gwꝓhi gwsaca' bene' ca' chesonxene' Jesúsen'.

13 Ca do guagwbiž zya'a ngua'a nezen' señor rey, cate'cze ble'eda' to be'ni' juisyw da' za' le'e yaba, chseni'chen ca gwbižen', na' gwyečhen neda' len bene' ca' zya'alena' txen.

14 Na' yogo'to' gwbižto' lo yon', na' neda' benda' to bene' chne' diža' hebreo gwne': "Saulo, Saulo žbixčhen' chči chsaco' neda'? Dan' chondo' neda', chone zi' cuino' ca chon to go'ŋ be chlibe lo ya dan' zoa lao carroš cheban'."

15 Nach bol güiža'ne', goža'ne': "¿No le' bene'?" Nach Xana' Jesúsen' boži'en, gwne': "Neda' Jesús na' neda' chči chsaco'."

16 Beyas, le bač blo'elagua' le' na' ba gwleja' le' gono' xšina' na' go'o diža' che da' nga ba ble'edo' na' che bichle dan' za' le'edo' da' za' gwlo'eda' le'.

17 Na' na' sela' le' gan' že' bene' ca' bi zjanac bene' Israel. Na' bi goŋa' latje no got le', ne bene' Israel gualaž chio' ca' na' ne bene' bi zjanac bene' Israel.

18 Chsel'a' le' gan' že' bene' bi zjanac bene' Israel na' gwzejni'ido'ne' cont yesebejyichje' da' malen' zjanone' na' yesone' da' güen. Chaclaža' yesyechoje' lo na' Satanás dan' chnabia' da' xigüe' ca' na' yosozenague' che Diosen' cont nitlao xtola'gaque', na' lecze chaclaža' yesaque' txen len nochle bene' chesejnilaže' neda' bene' ba zjanac lo na' Diosen'."

Pablon' bsed blo'ede' bene' xtiža' Criston'

19 'Ca' goc chia' rey Agripa, bzenaga' ca dan' gož Jesúsen' neda' zoe' yaban' caten' ble'edagüeda'ne' tnez.

20 Zgua'tec jazejni'ida' bene' ca' že' ciuda Damasco xtiže'na' na' gwdechle jazejni'ida' bene' ca' že' Jerusalenna' len bene' že' doxen distritw Judean', goše'gaca'ne' cheyała' yesebejyichje' xtola'gaque' na' yosozenague' che Diosen' na' yesone' da' güen cont gacbia' ba gosebejyichje' da' malen'. Can' bzejni'ida' bene' Israel gualaž checho ca' lente bene' ca' bi zjanac bene' Israel.

21 Na' neche dan' chona' ca', bene' gualaž checho bene' chesegue'ede' neda' gosezene' neda' yodao' blaon' na' gosaclaže' yesote' neda'.

22 Perw na' Diosen' zoe' chaclene' neda', na' da'nan' zoacza' cho'a xtižen' ža na'aža len yogo'lolle že'le nga, le'e nacle bene' blao lente le'e bi nacle bene' blao. Bi nacho bichle chzejni'ida' bene' da' bi bzoj da' Moisésen' len yezica'chle ben' goso'e xtiža' Diosen' cani'.

23 Gosene' Criston' ben' za' sela' Diosen' saca'zi'e na' gate' na' gaque' bene' nechw yebane' ladjo bene' guat ca'. Na' lecz gosene' le'na' gwzende' bene' Israel len bene' bi zjanac bene' Israel can' cheyała' yesone' cont šo' be'ni' che' lo' yichjlažda'ogaque'.

Pablon' goclaže' šejnilaže' rey Agripan' Jesucriston'

24 Ca' cho'e dižan' cate'cze gobernador Feston' gwne' zižje gože'ne':

—jChactonton' Pablo! Dan' ba bsdteco' nan' bač chactonto'.

25 Nach Pablon' gože' gubernadoren':

—Bi chactonta' señor gobernador, san diža' lin' cho'a, diža' da' zaca' gwzenago'.

²⁶ Na' rey Agripa nga nombi'e da' quinga choa' diža' čhen, da'n'an' bi chžeba' choa' diža' lagüe' nga. Nežda' chache'ede' choa' diža' li, le dan' goc čhe Jesúsen' bi nacho goquen bagaše'ze.

²⁷ Le' rey Agripa, čhejli' o da' ca' bosozoj bene' ca' gosoe' xtiža' Diosen' cani'? Nežda' chejli'on.

²⁸ Nach rey Agripan' gože' Pablon':

—Čhacdo' bedao' co'oyelo' neda' cont šejnilaža' Jesucriston'?

²⁹ Nach Pablon' gože'ne':

—Čhnaba' lao Diosen' žin ža cate' le' len yezica'chle bene' že' nga šejnilaže'le Jesucriston' can' chejnilaža'ne', še yob o še ne' chžach, perw čbi gata'le ližya can' dia' neda'.

³⁰ Beyož gwna Pablon' ca' bežoža' rey Agripan' len no'ol čhen' Berenice, na' len gubernador Feston' na' len bene' ca' gosebe' len legaue'.

³¹ Nach cate' ba besyeyo'e ga yoble, rey Agripan' na' gubernador Feston' gose' lježe':

—Bi nacho ba non benga da' zaca' gate' o da' zaca' čhixjwchone' ližya.

³² Nach rey Agripan' gože' Feston':

—Šaca' bi gwnabe' tie' lao rey Césaren' cont gac yela' justis čhe'na' guac yosančhone'.

27

Gosesele' Pablon' ciuda Roman'

¹ Na' cate' bosoxi'e yesesele' Pablon' distritw Italia gan' chi' ciuda Roman', nach gwlo'e Pablon' len yezica'chle pres ca' lo na' to xan soldadw bene' le Julio. Na' Julion' naque' txen len soldadw ca' ben' zjansi'e Batallón čhe Augusto. Na' neda' Lucas gwzoa' len Pablon'.

² Nach gwyo'oto' to lo' barcw da' za' ciuda da' nzi' Adramitio cont žinen distritw Asia, beza'to' ciuda Cesarean'. Na' za'len Aristarcon' neto'. Naque' bene' ciuda Tesalónica dan' chi' distritw Macedonia.

³ Nach ža beteyo bžinto' ciuda da' nzi' Sidón. Na' xan soldadw ben' le' Julio bencze' güen len Pablon', be'e latje gwyeje' gan' že' bene' migw čhe' ca' cont bosonežjue' le' bi dan' byažjde'.

⁴ Na' cate' bechojto' ciuda Sidónna' beza'to' bedeto' gala'ze gan' nla' yežlio dan' chi' lo' nisdao' dan' nzi' Čhipre. Čhečhjchgua be' clele ca horen', na' yežlion'a' bcue'ejen neto' len be'na'.

⁵ Na' beyož gwdeto' lo nisdao' dan' de gala'ze gan' zjambane distritw Cilicia na' distritw Panfilia, nach bžinto' ciuda dan' nzi' Mira dan' chi' gan' mbane distritw Licia.

⁶ Na' ciuda Miran' xan soldadon' bželde' yeto barcw da' za' ciuda Alejandría da' za' šej distritw Italia, na' bene' mandadw gwyo'oto' lo'en txen len Pablon'.

⁷ Nach gwza'to' zejto' lo nisen' da' yoble. Zan ža zejto' šolaže', cane bžinto' gwdeto' ciuda gan' nzi' Gnido. Na' dan' ne' chečhj ben' clele gan' zejton', da'n'an' bi goc šejto' liča, nach gwca'ato' zejto' čhcue'ej cuinto' len yelate' yežlio dan' nga'an lo' nisdaon' dan' nzi' Creta, gan' bitec gwyečhj be', na' gwdeto' gala'ze gan' zoa to ya'a da' nzi' Salmón.

⁸ Na' zejto' gala'ze ga zoa yo biž hcue'ej cuinto', cane bžinto' gan' nzi' Buenos Puertos gala'ze yež dan' nzi' Lasea.

⁹ Goc zan ža zejto' ca' na' bačh chžebto' šjažiyai' cuinto' lo' nisdaon', le ba bžin tiemp zag cate' čhečhjchgua be'. Nach Pablon' gwneyoede' bene' ca' yesebeze' na'ze.

10 Gože' legaque':

—Le'e bene' le'e chsa'le barcon', ba chache'eda' can' zejcho nga cane chac chzan', xož cuiayi' barcon' len yoa' chelen', na' lente chio' yo'ocho lo' barcon' xož cuiayi'cho.

11 Nach xan soldadw ca' bzenagche' che xan barcon' na' che ben' chsa' len ccl ca che Pablon'.

12 Le bi nac latje güen cho'a nisdao' gan' zoaton' ga'anto' tiemp zaguen', na' gwyan bene' ca' gosacde' cheyała' sa'to' šejto' še gonen žinto' Fenice gana' soato' šlac te da' zaguen'. Fenice naquen to yež ga chac cho'o barcw gan' mbane Creta na' bi chactec zag, le šla'ale nla' ga chla' gwbiž na' šla'ale ga chxoa gwbiž.

To be' gual gwyechjen lo nisdao'n

13 Cate' gwzolao chechj to be' gol dan' za' che'elle na' bene' ca' chososa' barcon' gosacde' guac šja'acche' gan' gosaclače', nach gozsa'to' zejto' lo nisen' da' yoble to lcue'ej che Cretan'.

14 Gague goc sša cate' ba chac to be' gual da' nzi' Noreste chechjchguan clelan gan' zej barcon'.

15 Na' chžiga'chguan barcon'. Bibi goc yesone' cont šejchto'. Na' btoblaže'to' gwžiga' ben' barcon' len neto' con can' chechjenna'.

16 Nach bžinto' to lcue'ej yežlio da' nga'an lo' nisen' dan' nzi' Claudia, gan' bitec chechj be'. Na' barcw cha'o gan' yo'oton' nxoben to barcw dao' da' chon žin choslan bene' cate' chac bi da' chac che barcw xenna'. Na' cane goc bocueto' barcw daon' lo' da' cha'ona'.

17 Beyoža' bchejto' barcw cha'ona' do gual cont gwlo'oto' fuers chen. Na' besežebe' gaga' barcon' to latje gan' nac yox da'na' nzi'in Sirte, nach bosoletje' lache' xen dan' chonen cont chžiga' ben' barcon'. Nach con zejto' lo nisen' con gan' gwyej barcon'.

18 Beteyo ba chož nisen' lo' barcon' da' chechjchgua ben', nach gosešaše' yoa' dan' nsa' barcon' gwzolao bosozala'sazen' lo' nisen'.

19 Na' ža gwyone' goclento' legaque' bzala'to' xšinlaz barcon' lo' nisen'.

20 Zan ža bi blo'elao gwbižen' na' šeže'le bibi beljw ble'eto', do ža do yel goc yejw na' gwyechj be', na' bich gwzoato' lez yelato'.

21 Bačh goc sša bi chagwto', nach Pablon' gože' bene' ca':

—Le'e bene', chac quinga dan' bi bzenagle chia' caten' gwnia' le'e bi sa'cho Cretan', na' dan' bi bzenagle chia', ba gwžiai' yoa' che barcon' len xšinlazen.

22 Perw na'a bi soayaše'le, ne tole cbi cuiayi' yela' mban chele, san barcw ngazen' cuiayi'.

23 Neda' chonxena' Diosen' na' ba ben' cuina' lo' ne'e, na' le' ba gwsele' to angl bene' blo'elagüe' neda' nže'e.

24 Nach angla' gože' neda' diža' nga: “Bi žebo' Pablo. Cheyała' žino' lao rey César ben' chi' ciuda Roma, na' da'n'an' yelao', bibi gac chio', na' lez yosla Diosen' yogo' bene' ca' že' lo' barcon'.”

25 Na' dan' gwna anglen' ca', bene', le yebe. Nežda' Diosen' gone' gac dołol can' gož anglen' neda'.

26 Da' gac checho yecho'onen chio' yo biž da' nga'an late' lo' nisen'.

27 Na' cate' ba goc žta'gwbiž zejto' lo nisen' nžiga' ben' neto' nile nale lo nisdao'n dan' nzi' Adria, nach ca do chel bene' ca' zjansa' barcon' gosacbe'ede' ba zejto' gala'ze yo biž.

²⁸ Nach beseletje' to plom lo' nisen' cont boso'ochixe' ca do gaca'te' sitjw nac nisen'. Beyož bosochixen'na' gosenezde' goquen šino'tchoa metr. Nach gosezdie' yelate' na' bosozchixen' da' yoble na' ca horen' goquen gažechoa metr.

²⁹ Na' besežebe' šjati'i barcon' yej lo' nisen', nach beseletje' tap ya xen dan' že' ancla, bosochjejen' xan barcon' cont gosoxen' len, na' do chesežebe' chesebeze' batcan' šeni'.

³⁰ Nach bene' ca' zjansa' barcon' gosaclače' yosyoxnje'. Besyeletje' barcw dao' dan' ncu'a' xina' barcon', con bosode'ede' yeseletje' ancla ca' dan' ncu'a' lagüen'.

³¹ Nach Pablon' bol güiže' xan soldadw ca', gože'ne':

—Še bene' quinga bi yesyega'ane' lo' barcw nga, bi yelacho.

³² Nach soldadw ca' gosechogue' don' zjanca' barcw daon' bososanen' lo' nisa'.

³³ Do šbal Pablon' gwzolaogwneyoede' yesagw bene' ca' že' lo' barcon', gože' legaque':

—Ba chac žta'gwbiž zoale bi chtasle na' bi che'ej chagwle.

³⁴ Chata'yoeda' le'e le gagw cont soale binlo, le ne tole ca cuiayi'.

³⁵ Beyož gwne' ca' bežue' to yetextil, be'e yela' choxclen che Diosen' lao yogo' neto' že'to' lo' barcon' na' gwxi'e to pedasen' gwdagüen'.

³⁶ Nach yogo'to' bebeto' na' lecz gwzolaoto' gwdagwto'.

³⁷ Chop gayoa gayonšino'to' nacto' že'to' lo' barcon'.

³⁸ Na' beyož gwdagwto' ca' beljeto', nach trigon' da' ne' nga'anch lo' barcon', gosebejen' bosozalen' lo' nesdaon' cont barcon' bich goctequen zi'i.

Goxj barcon'

³⁹ Cate' gwyeni' bi zjanombi'e yežlion' gan' besežinen', perw besele'ede' de to latje ga žia nisen' šize na' cho'enna' nac laše' lo' yox. Nach gosaque' toze gosaclače' yesone' cont žin barcon' šjačhen' laše' lo' yoxen'.

⁴⁰ Na' gosechogue' do che ancla ca', gosebejyichjen' lo' nisen'. Lecze goseseže' do dan' bosochjeje' yag dan' chsa' barcon' licha na' goselise' lache' dan' zoa yichj barcon' cont bžiga' ben' len, nach zja'aque' cho'a yo bižen'.

⁴¹ Na' gosedie' ga chedił nesdaon' len yeto da' yoble, na' jačhaz lagüe barcon' lo' yoxen', bich goc tan. Na' nisen' gwzolaogwzoxjen barcon' catec fuers nsan'.

⁴² Nach soldadw ca' gosaclače' yesote' pres ca' cont bi yeseyele' nisen' na' yosyoxnje'.

⁴³ Perw xan soldadw ca' goclacže' yosle' Pablon', da'nan' bžone' yeson soldadw ca' can' chesaclače' yesonen'. Bene' mandadw len pres ca' še noe' chac chyela' nisen' zgua'tec legaque' yesexite' lo' nisen' cont yesyechoje' yo biž.

⁴⁴ Na' bene' mandadw bene' ca' bi chac yeseyela' nis yosochine' no yagla' o bichle xšinlaz barcon' cont yesyežine' lo' yo. Na' can' gosone' na' yogüe besyežine' lo' yo bižen'.

28

Dan' goc che Pablon' šlac zoe' Malta

¹ Cate' bechojto' lo' nesdaon' bžinto' yo bižen', bene' ca' že'na' gose'e neto' ba bžinto' gan' nzi' Malta, naquen to yež dan' chi' to lo' yežlio da' nga'anen lo' nesdaon'.

² Na' bene' ca' že'na' gosaque' bene' šagüe' len neto', bosoxene' to yi' xen na' goxe' yogo'to' gan' nite'na', le ba chac yejw na' chacchgua zag.

³ Nach Pablon' btobe' xonj xis bcue'en lo yin', cate' bchoj to bel' be nac venen lo xis ca' gwdi'inba' ne'e gola'ditban'.

⁴ Na' besele'e bene' Malta ca' nala'dit bel'en' na' Pablon', na' gose' lježe':

—Benga naclje' bene' güet bene'. Da'nan' la'czla' bele' lo' nisen', Diosen' bi güe'e latje banche'.

⁵ Nach Pablon' con gwzib ne'ena' lo yin' na' bexope bel'en', na' bibi godce'.

⁶ Yogo' bene' ca' chesebeze' batcan' solao gata' ne'en yi o batca' gate'. Gosebeze' sša na' besele'ede' bibi godce'. Nach gosone' xbab yoble, gosene' naque' to bene' šejnilaže'cho.

⁷ Na' bene' gwnabia' che doxen Malta le' Publio na' yežlio che' zjaden gała'ze latje gan' bžinton', na' blebe' neto', gwzoato' ližen' šone ža.

⁸ Na' xa Publion' chacšenchgüede' yo'e da' la' na' che'ede' yiž chen. Nach Pablon' gwoy'e gan' de'na' bol' güiže' Diosen', nach gwxo'a ne'en yichj bene' güen' na' beyaque'.

⁹ Beyožen' jasexi'e yezica'chle bene' lagüe yeža' bene' chese'ede' yižgüe' na' gwnabde' Diosen' yeyone' legaque', na' lecze besyeyaque'.

¹⁰ Na' da' zan da' güen goson bene' ca' len neto'. Na' cate' bžin ža beza'to' bosyoži'e lo' barcon' yogo' da' ca' chyažjeto'.

Pablon' bžine' ciuda Roman'

¹¹ Bega'anto' Malta šon bio', nach gwza'to' zejto' lo nisen' yo'oto' to lo' barcw da' za' ciuda Alejandria' da' gwlezen latjen' šlac gwde da' zaguen'. Na' mben le'e barcon' l'gua'a lsaca' che bene' ca' le' Cástor na' Pólux.

¹² Na' bžinto' ciuda dan' nzi' Siracusa gan' bega'anto' šone ža.

¹³ Nga gozza'to' cont bžinto' yež da' nzi' Regio. Na' bega'anto' tža. Nach gwzola' chehj be' dan' za' che'elle, na' beza'to' da' yoble beteyo bežžinto' ciuda da' nzi' Puteoli na' bechojto' lo' barcon'.

¹⁴ Nga bežagto' bene' lježto' chesonxene' Jesucriston' Puteoli na' gosenabe' gwzoato' len legaque' to xman. Na' gwdena' gwza' ni'ato' zejto' Roman'.

¹⁵ Na' cate' za' žinto' ciuda Roman' goseneze bene' lježto' že' Roman' ba zoa žinto', na' bale' bedeseleze' neto' latje gan' nzi' Šone Tiend na' yebale' lagüe ya'a dan' nzi' Che Apio. Cate' ble'e Pablon' legaque' be'e yela' choxcien che Diosen' na' gwbede' lo' yichjlažda'ogüe'.

¹⁶ Na' cate' bžinto' Roman', xan soldadw ca' bene' yezica'chle pres ca' lo' na' bene' gwnabia' che soldadw ca' nita' na', perw be'e latje gwzoa Pablon' toze' ga yoble na' con gwzoa to soldadw gwdape' le'.

Pablon' be'e xtiža' Jesucriston' Roman'

¹⁷ Beyon ža bžinto', Pablon' goxe' bene' blao che bene' Israel ca' že' ciuda Roman'. Na' cate' beyož besedobe'na' gože' legaque':

—Bene' migw, bene' gualaž checho ca' že' ciuda Jerusalén gosezene' neda' gosone' neda' lo' na' bene' gwnabia' che nación Roman', la'czla' bibi bena' contr bene' gualaž ca' na' ne' contr costumbr che da' xozxta'ochon'.

¹⁸ Nach bene' gwnabia' che nación Roman' gosenabyože' na' gosaclaže' yososane' neda' cate' gosache'ede' bibi nona' da' zaca' yesote'nda'.

¹⁹ Nach bene' gualaž ca' že' Jerusalénna' bosožoncze' yososane' neda'. Da'nan' gwñaba' tia' lao rey Césaren' cont gac yela' justis chia'. Perw bi nacho gagua' xya che bene' gualaž checho da' gosonde' neda' ca'.

²⁰ Da'nan' zoa' nga bač goxa' le'e cont le'eda' le'e na' güe'lena' le'e diža'. Na' ncheja' gden ni' neche dan' zoa' lez yosban Diosen' bene' ca' ba gosat, cacze zan chio' bene' Israel zoacho lez.

21 Nach bene' ca' gose'ene':

—Bibi cart na' la' laoto' nga dan' za' distritw Judean' da' bosozoj bene' Jerusalén ca' güen' diža' še bin' chac len le', na' nono bene' gualaž na' la' bene' ne mal chio'.

22 Perw chaclaže'to' yeneto' go'o diža' che dan' chejli'o che Jesúsen', le nezeto' doxen chesene' che le'e chejle'le che'.

23 Na' bosozie' bia' to ža cont šjasene'e le' da' yoble, na' cate' bžin žan' bene' zan ja'aque' gan' zoen'. Nach Pablon' be'lene' legaque' diža' do ža. Be'e diža' che dan' cheya'la' gwzenagcho che Diosen' ben' chnabia' doxen, na' bzejni'ide' legaque' da' ca' zjanyoj le'e ley dan' bzoj Moisésen' na' len dan' bosozoj yezica'chle bene' goso'e xtiža' Diosen' cani' che Jesucriston', cont yesejle'e che'.

24 Na' ba' bene' ca' gosejle'e xtižen' da' be'e na' yeba'le' bi gosejle'en'.

25 Dan' bi gosone' toz ca yesone' xbab, gwzola' besyeya'aque'. Nach Pablon' gože' legaque':

—Dan' gož Spiritw che Diosen' da' Isaíasen' dan' bzoje' che da' xoxxta' ocho ca' naquen da' li, žan:

26 Gwyej gož bene' gualaž chio' ca' xtižan':

Da' li yenele, perw na' bitw šejni'ile bi zeje dan' yenelen'.

Na' da' li le'ele, perw bi gacbe'ele bi zejen dan' le'elen'.

27 Nacle bene' güedenag na' bačh natcze yichjlažda'olen'.

Bi chazlaže'le gwzenagle dan' chenele na' dan' chle'ele;

con nacle bene' güedenag.

Šaca' bi nacle bene' güedenag, šejni'ile bi zejen dan' chenele na' dan' chle'ele.

Nach yetinjle xto'la'le cont yeca'an na' yocoba' yichjlažda'olen'.

28 Che'nda' nezele ba gwzolaon na'a Diosen' chsele' bene' cheseyixjue'ede' xtižen' len bene' bi zjanac bene' Israel cont yosozenague' che' na' gata' yela' mban chegaque' toli tocaņe.

29 Beyož gwna Pablon' ca', bene' Israel ca' besyežaše' chesacyožchgüe' che dan' gwnen'.

30 Na' chop iz nya' gwzoa Pablon' ciuda Roman' to yo'o ga chyixjue', na' blebe' yogo'lol bene' jasene'e le'.

31 Na' bzejni'ide' legaque' Diosen' chnabi'e doxen, na' lecz bzejni'ide' che Xancho Jesucriston'. Nono bžon gwzejni'ide' bene', na' be'e xtiža' Diosen' con can' goclaze'.

CART DAN' BZOJ POSTLW SAN PABLO CHE BENE' CA' ŽE' ROMA

¹ Neda' Pabło chzoja' le'e. Chona' bite'tez dan' ža Xancho Jesucriston'. Diosen' gwleje' neda' cont naca' postlw che', na' gwsele' neda' cont chyixjue'eda' diža' güen che'.

² Diosen' ba gwzologüe' bzende' beňachen' diža' güen che', bene' cont gwnita' bene' goso'e xtižen' cani' na' bozozojen'.

³ Na' diža' güen che Diosen' chzejni'in chio' che Xi'ine' Xancho Jesucriston'. Len' golje' beňach lo diaža che da' rey David.

⁴ Na' Spiritw che Diosen' blo'en Xancho Jesucriston' naque' dogualje Xi'in Dios na' nape' yela' guac, le Jesucriston' bebane' ladjo bene' guat ca'.

⁵ Na' neto', da' chejnilaže'to' Xancho Jesucriston', Diosen' bene' da' güenchgua len neto', le gwleje' neto' na' gwsele' neto' chyixjue'eto' xtižen'. Na' gwsele' neto' chyixjue'eton' cont šanch bene' yesejnilaže'ne' na' yosozenague' che'. Na' Xancho Jesucriston' soe' blaoch cate' bene' že' yogo' nación yosozenague' che Diosen'.

⁶ Can' naquen, Diosen' ba gwleje' le'e cont nacle lo na' Jesucriston'.

⁷ Chzoja' da' nga par yogo' le'e že'le Roman' le'e ba mbej Diosen' cont nacle lo ne'e. Diosen' chacde' le'e. Na' chñaba' lao Xacho Diosen' len Xancho Jesucriston' yesaclene' le'e na' yesone' cont soa cuezle binlo len xbab da' yo'o lo' yichjlažda'olen'.

Pablon' goclaze' šjane'e bene' ca' chesejnilaže' Jesucriston' ciuda Roma

⁸ Zgua'tec ni'a le'e Jesucriston' zoe' chaclene' neda' cont choa'yela' choxclen che Diosen' par yogo' le'e, le bene' ca' že' doxen lo yežlion' cheso'e diža' can' chejnilaže'le Criston'.

⁹ Nezcze Diosen' yogo' ni'a cate' choł güiža'ne' chñaba' gaclene' le'e. Naque' ben' chejnilaža' do yichj do laža' na' chona' xšinen' choa' diža' güen che Xi'ine' Jesucriston'.

¹⁰ Chñaba' lao Diosen' gone' latje yedeňa'a le'e še ca' chnalaže' gona', le ba chac sša zelaža' yida'.

¹¹ Chaclaža' yedeňa'a le'e na' gwzejni'ichda' le'e cont soačhačhle šejnilaže'le Diosen'.

¹² Na' le'e len neda' soacho gončhačhlaže' lježcho dan' chejnilaže'cho Jesucriston'.

¹³ Bene' migw, che'nda' nezele zan ni'a ba goclaza' yida' yedeňa'a le'e, perw biňa' gac yedeňa'a le'e. Chaclaža' yida' gona' xšin Diosen' gan zoale cont šanle gwzenagle che Jesucriston' ca ba goc yezica'chle yež ga ba gwya'a.

¹⁴ Nežda' cheyała' gua' diža' güen che Jesucriston' len yogo'loł bene', bene' že' ciudan', na' bene' že' yixe', na' bene' chesac letr na' bene' cbi chesac letr.

¹⁵ Da'nan' che'nchgüeda' gua' xtižen' len le'e že'le Roman' can' ba bian' ga yoble.

Diža' güen che Jesucriston' nsan' yela' guac che Diosen'

¹⁶ Bi cheto'eda' gua' diža' güen che Jesucriston', le xtižen' nsan' yela' guac che Diosen' cont bene' chesejle' chen gata' yela' mban chegaque' toli tocané. Nsan' yela' guac len neto' bene' Israel, na' lecze len le'e bi nacle bene' Israel.

17 Na' diža' güen che Jesucriston' chzejni'in chio' še bene' yesejnilaže' Jesucriston', Diosen' gone' legaque' bene' güen, na' bi de bichle da' gac goncho cont gaccho bene' güen len le'. Can' nyoj Xtiza' Diosen' žan: "Diosen' že' bene' chejnilaže' le' naque' bene' güen len le' na' gata' yela' mban che' toli tocanē."

De xtola' benachen'

18 Diosen' zoe' yaban' na' ba blo'ede' benachen' toli tocanē yesesaca'zi' yogo' bene' cbi chesejnilaže' le' na' chesone' da' xinj. Na' da' chesone' da' xinjen' bi chesaclaže' yesombia' bene' yoble diža' li che Diosen'.

19 Na' Diosen' gone' yesezaca'zi'e, le ba zjanezde' zoe' da' ba blo'ede' legaque' can' ba benen'.

20 Bi chle'echo can' nac Diosen', na' bi chle'echo can' zoe' chnabi'e, perw nezecho de yela' guac che' can' bene' bxie' yežlion', na' yogo' benach chesele'ede' da' ca' ba bene'. Da'nan' bibi de da' yosode'e benachen' yesene' bi zjanezde' še zoe'.

21 La'czla' zjanezde' zoa Diosen', bi chesonxene' le', nēca cheso'e yela' choxcen che'. Xbab čegaquen' bibi zacan' na' zjančoļ yichjlažda'ogüen' yela' bi chejle' čegaquen'.

22 Chesene' zjanaque' bene' sina' perw chesone' xbab da' bibi zaca'.

23 Chosozoe' Diosen' to šla'ale la'czla' naque' la'zelagüe' bene' zaca' na' zoe' toli tocanē. Na' gualaz le', chesejnilaže' no l gua'a lsaca' che benach bene' te che, na' no l gua'a lsaca' che be zoa xil, che be žia tap ni'a na'ba' na' che no be xigüe'.

24 Da'nan' Diosen' ba gwlejjichje' legaque' cont chesone' da' xinj can' ža lo' lažda'ogaquen', na' bale' ba chesonchgüe' da' nac yela' zto' len cuerp čegaquen' toe' len yetoe'.

25 Diosen' gwlejjichje' legaque' cont chesone' yela' zto', le legaque' gosebejjichje' diža' li che Diosen' na' chesejle'e che da' güenlaže'. Chesejnilaže' da' ca' ben Diosen' na' bi chesejnilaže' Dios ben' cheyala' šejnilaže'cho na' gonxencho toli tocanē. Ca'czen' gacšca.

26 Da'nan' Diosen' gwlejjichje' legaque' cont chesone' yela' zto' con da' žan lo' yichjlažda'ogaque'. Can' chac, nita' no'ole bene' bich chesone' can' cheyala' yeson no'olen', san cheseque'e ljež no'olgaque' cont chesone' len legaque' da' bi cheyala' yesone'.

27 Na' nita' bene' byo bene' bitw chese'nde' yesenitalene' no'ole, san chesezelaže' ljež bene' byogaque' nach cheseca'alježe' cont chesone' yela' zto'. Na' dan' ba chbiayi' cuerp čegaquen', naquen castigw da' cheyala' yesezi'e yela' güen da' xinj chen'.

28 Bi chesaclaže' benachen' yosozenague' che Diosen', da'nan' ba gwlejjichje' legaque' len xbab mal čegaquen'. Da'nan' nite' chesone' da' bi cheyala' yesone'.

29 Chesonchgüe' yogo' da' xinj. Bene' byo chesatalene' no'ole bi nac no'ol čegaque', na' no'olen' chesatalene' bene' byo bi nac bene' čegaque'. Chesexi'e bene'. Chesezelaže' bi da' de che bene'. Zjanaque' bene' xi'a juisyw, chesegue'e lježe', chesot lježe', chesedile', cheseziye'e, zjanacchgüe' bene' güedenag, na' chja'aque' chjaseleje' diža' che bene'.

30 Chesene' mal che bene' yoble, chesegue'ede' Diosen', na' bibi bala'an chesezoe' bene' yoble. Chesa'laže'. Chesonxen cuine' cheso'e diža' zjanaque' bene' güen. Chesaljlaže' bichle da' mal da' yesone'. Bi chosozenague' che xaxne'e.

³¹ Bi chesejni'ide'. Bi chesone' da ba gosene' yesone'. Bi chesacde' bene' yoble. Bi chesyezi'xen che lježe' na' bi chesyeyaše' lježe'.

³² Zjaņezde' Diosen' že' toli tocaņe yesezaca'zi' ben' cheson da' ca'. Na' la'czla' zjaņezde' can' že', con nita'cze' chesone' da' xinjen' na' chesyebede' cate' bene' yoble chesone' can' cheson ļegaquen'.

2

Diosen' zejcz'e to licha da' chone' castigw che xtoļa'chon'

¹ Še nacho che bene' yoble da' xinjen' chone', bibi zaca' ye'cho Diosen' gague bi xtoļa'cho de, note'tez naccho. Cate' chnecho che da' chon bene' yoble, na' cheyechjen chio', le toz can' choncho len da' cheson ļegaque'.

² Nezecho še choncho da' xinj ca' nac da' ca' ba gwian', Diosen' gone' cont saca'zi'cho che xtoļa'chon' na' zejcz'e to licha da' gone' ca'.

³ ĶChaquele Diosen' bi gone' da' saca'zi'cho cate' chnecho che da' xinj da' chon bene' yoble na' chontecho can' chesone'na'? Bi cheyaļa' gaguecho bi gone' da' saca'zi'cho, le goncen'.

⁴ ĶBi chache'ele Diosen' nacchgüe' bene' šagüe' na' bene' xenļaže' len chio' napcho doļa' na' chone' ca' cont gache'echo da' xinjen' choncho na' yetinjechon?

⁵ Le'e bi chetinjele xtoļa'len' nacle bene' yid, na' chonle cont Diosen' ža'ache' le'e na' gonche' ga saca'zi'le cate' žin ža' chogbi'e che benachen'. Cana' gwlo'e zejcz'e to licha can' chogbi'en saca'zi' to to benach che xtoļa'gaquen'.

⁶ Na' cana' to tocho saca'zi'cho o gone' ga gac güen checho con ca' nac da' ba bencho.

⁷ Na' še cheyljwlaže'cho nac goncho cont šjayzoacho len Diosen' toli tocaņe, na' cont yebe Diosen' chio', na' cont gone' gacchcho bene' zaca', soacho goncho da' güen bite'teze da' gwžaglaacho. Nach Diosen' gone' cont bancho toli tocaņe.

⁸ Na' še zoacho choncho con da' chazlaže'cho na' bi chzenagcho diža' li che Diosen', san zoacho chzenagcho che da' malen', Diosen' ža'ayichje' chio' na' gone' ga saca'zi'cho toli tocaņe.

⁹ Yogo' benach bene' chon da' xinj saca'zi'e na' žaglagüe', zgua'tec žaglao neto' bene' Israel na' tech yezica'chle bene'.

¹⁰ Yogo'cho še choncho da' güen, Diosen' gone' cont šjayzoacho mbalaz len le' na' gone' cont gacxencho, na' gone' cont soacho binlo len xbab dan' yo'o lo' yichjlažda'ochon'. Zgua'tec gone' ca' len neto' nacto' bene' Israel, na' techle gone' ca' len le'e bi nacle bene' Israel.

¹¹ Toz ca' chon Diosen' len yogo'loļ benach.

¹² Bene' bi zjanombi'e ley dan' bzoj da' Moisésen' na' chesone' da' xinj, Diosen' gone' yesebiaye'e gague lagüe dan' bi zjanombi'e leyna', san lagüe dan' zjaņezde' chesone' da' xinj. Na' bene' zjanombi'e leyna' na' chesone' da' xinj, Diosen' gone' ga yesebiaye'e da' bi chesone' can' žanna'.

¹³ Gague con yenecho can' ža' leyna' cont Diosen' ne' naccho bene' güen len le', san goncho can' žanna', nach Diosen' ne' naccho bene' güen len le'.

¹⁴ Bene' bi zjanac bene' Israel na' bi zjanombi'e ley dan' bzoj Moisésen', tgüje lo' lažda'ogaquen' chonen cont chesone' da' güen can' ža' leyna' cheyaļa' yesone', na' la'czla' bi zjanombi'e leyna' dan' zoa yichjlažda'ogaquen' chžian bia' yesone' da' güen, naquen ca' to ley len ļegaque'.

15 Nacbia' zjanezde' lo' lažda'ogaque' cheyała' yesone' da' ca' nžia bia' leyna' yesone', le chesone' late' güejen. Na' zjanezde' lo' yichjlažda'ogaquen' še da' chesone' naquen güen o še naquen mal.

16 Can' gac caten' žin ža Diosen' gone' lo' na' Jesucriston' čhoglagüen' che to tocho ca nac xbab chechon' da' ba bencho na' bichle da' ba bencho bagaše'ze še naquen güen o še naquen mal. Can' chnia' cate' chyixjue'eda' diža' güen che Jesucriston'.

Bene' Israel bi chesone' can' ža' leyna'

17 Na' le'e nacle bene' Israel gualaž chia', šeca chonle xbab zoale binlo len Diosen' da' nsedle ley dan' bzoj Moisésen', na' šeca cha'laže'le dan' nombia'le Diosen'.

18 Nezele bin' chazlaže' Diosen' na' chacbe'ele bin' nac da' güen na' bin' nac da' mal, le nsedle xtižen'.

19 Chaquele zaca'le cont co'ole be'ni' lo' yichjlaždao' bene' bi nombia' Diosen'.

20 Na' chaquele guac gwzejni'ile bene' cheson clele nac cheyała' yesone', na' chaquele guac gwsed gwlo'ele bene' cobe xtiža' Diosen', le nombia'le diža' li chen' na' len nsan' doxen da' cheyała' nezele.

21 Le'e chsed chlo'ele bene' yoble, žbixchen' bi chsed chlo'e cuinle? Le'e žale bi cheyała' no cuan, žbixchen' chbanle?

22 Le'e žale nono gata'len no'ole bi nac no'ol che', na' no'olen' bi gata'lene' ben' bi nac bene' che', žbixchen' chonle da' che'le bene' bi gone'? Le'e chgue'ele l gua'a lsaca' da' chesejnilaže' bene' žbixchen' chjalanle bi da' de lo' yo'o gan' že' l gua'a lsaca' ca'?

23 Cha'laže'le da' nsedle ley da' bzoj Moisésen', perw chzoale Diosen' to šla'ale da' bi chonle can' ža leyna'.

24 Chac can' nyoj Xtiža' Diosen' žan: "Da' chonle da' xinj, bene' bi zjanac bene' Israel chesene' mal che Diosen'."

25 Še choncho can' ža leyna' zaca'czen dan' ba gwzoacho señw lo' cuerp chechon' da' zejen chio' bene' Israel naccho yež che Diosen'. Perw še bi choncho can' ža leyna', bibi zejen da' ba gwzoacho señw dan' nzi' circuncisión.

26 Bene' bi naque' bene' Israel bi zoe' señua', na' še chone' can' ža ley che Diosen', Diosnan' ne' naque' txen len chio' zoacho señua'.

27 Na' bene' cheson can' ža leyna', la'czla' bi zjanaque' bene' Israel na' bi zjazoe' señw dan' nzi' circuncisión lo' cuerp chen', chesone' cont nacbia' de xtola' le'e nsedle leyna' perw bi chonle can' žanna'.

28 Bi nacho nacccho dogualje bene' Israel da' na'ocho costumbr che nación chechon' na' dan' zoa señw lo' cuerp chechon'.

29 Naccho dogualje bene' Israel gague dan' choncho can' ža leyna' da' nyojen, san da' chejnilaže'cho Diosen' do yichj do laže'cho na' ba be'cho latje bocobe Spiritw che Diosen' yichjlažda'ochon'. Da'n'an' Diosen' güe'e diža' güen checho, la'czla' še notno chne güen checho.

3

1 žBi da' güen da' chga'an che chio' bene' Israel da' goljcho lo' diaža che da' xozxta'ochon' še ca'? žBi da' güen da' chga'an da' ba zoacho señw da' nzi' circuncisión?

2 Da' xen da' chga'an. Na' da' blaoch da' chga'an, Diosen' bnežjue' da' xozxta'ocho ca' Xtižen' da' nyojen par yogo' benač.

³ Na' la'czla' zan bene' gualaż checho bi gosejle'e chen, bi nacho Diosen' bi gone' güen can' gwne' gone' len chio' naccho nación che'na'.

⁴ Goncze' con can' ze'na'. Yogo' ni'a Diosen' chne' diža' li, la'czla' še žin ža cate' yogo'lol bene' yesene' diža' güenlaže'. Chac can' nyoj Xtiža' Diosen' žan: Le' gwlo'edo' benachen' le cho'o diža' li.

Na' ca nac bene' ca' cheson xbab bi chono' can' žon', yesacbe'ede' chonczo' can' žo'na'.

⁵ Bal bene' chesene' cate' choncho da' xinj chlo'en ca bene' güen nac Diosen', na' chesene' Diosen' bi zeje' to li še chone' cont saca'zi'cho che da' xinj dan' chonchon'.

⁶ Clelen' chesone' xbab. Šaca' Diosen' bi chone' da' zej toli, bi gac gone' yela' justis che chio' benach. Perw gonczen'.

⁷ Na' nita' bal bene' chesone' xbab clele, chesene': "Cate' choe'cho diža' güenlaže' chlo'en ca bene' güen juisyw nac Diosen' da' cho'e pur diža' li. Da'n'an' bi cheyala' ne' napcho doła' cate' chonlaže'cho."

⁸ Lecze chesonlaže' bal bene' chesene' neda' bzejni'ida' guaque goncho da' mal cont gac da' güen. Da' cheyala'cze gon Diosen' cont sacazi' note'tez bene' ža ca'.

Yogo'cho napcho doła' lao Diosen'

⁹ ¿Bixen' ša? ¿Naquech chio' bene' Israel bene' güen ch ca bene' bi zjanac bene' Israel? Bi naccho ca'. Ba bzejni'ida' toz ca nac che chio' bene' Israel len che bene' bi zjanaque' bene' Israel, yogo'cho de xtoła'cho.

¹⁰ Na' Xtiža' Diosen' nyojen žan: Nono zoa bene' zej to licha, ne toe'.

¹¹ Nono nla' bene' chejni'i cont gwzenague' che Diosen', nono nla' bene' cheyljue' le'.

¹² Yogo' benach ba zjanque'e nez mal. Yogüe' ba zjanaque' ca to da' bibi zaca'. Ne to nono zoa bene' chone' da' güen.

¹³ Len xtiža'gaquen' chesexoayague' bene'.

Ca zban chla' cho'a ba che bene' guat še bi nyeyjon binlo, ca' zban chla' xtiža'gaquen'.

Na' ca venen che bel znia nac xtiža'gaquen' da' cheso'e.

¹⁴ Pur diža' mal diža' bya' ze' cho'agaquen'.

¹⁵ Con bize da' chosode'ede' cont chesote' bene'.

¹⁶ Gate'teze chja'aque' zjanse'e yela' yaše' yela' zi' ca nac da' chesone'.

¹⁷ Bi chesezoe' binlo len lježe'.

¹⁸ Bi chesežebe' Diosen' len bi da' mal chesone'.

¹⁹ Na' nezecho Diosen' bene' chio' bene' Israel ley chen'. Da'n'an' ne tocho bi chac nacho bibi xtoła'cho de, le bi choncho can' žanna'. Nachen' Diosen' že' si'cho castigw che xtoła'chon', con can' že' che yogo' benach, le yogüe' bi chesone' can' ža ley chen'.

²⁰ Bi nacho zoa bene' naque' bene' güen len Diosen' da' chone' yogo' da' ža ley na', le notno chon ca'. Leyna' chlo'en chio' naccho bene' güen da' xinj.

Bene' šejnilaže' Jesucriston' gague' bene' güen len Diosen'

²¹⁻²² Na' na'a Diosen' ba blo'e can' goncho cont gaccho bene' güen len le', na' bich bi že' che da' ca' ža ley na' cheyala' goncho, san že' cheyala' šejnilaže'cho Jesucriston' cont gaccho bene' güen len le'. Doxen Xtiža' Diosen' dan' nyojen cani'te chzejni'in cheyala' šejnilaže'cho Jesucriston' cont gaccho bene' güen. Na' toz can' chon Diosen' len yogo'lol benach.

23 Le yogo'cho ba bencho da' xinj, na' ne tocho bi naccho bene' güen can' chaclaže' Diosen' gaccho.

24 Perw na' Diosen' nži' ilaže' de' chio', na' gague bi chzi'e par že' naccho bene' güen len le', le Cristo Jesúsen' ba bñitlagüe' xtoła'chon'.

25 Diosen' gwsele' Jesucriston' bnežw cuine' gosote'ne' neche xtoła' benach. Na' note'teze bene' yesejnilaže'ne' nitlao xtoła'gague'. Diosen' gwsele'ne' cont nacia' zeje' to licha da' gwdape' yela' chxenlaže' bezi'xene' xtoła' bene' ca' gwnita' cani' bene' gosejnilaže'ne'.

26 Na' lecze gwsele'ne' cont nacia' zeje' to licha da' že' che yogo' chio' chejnilaže'cho Jesúsen' naccho bene' güen.

27 Bi cheyala' gonxen cuincho güe'cho diža' naccho bene' güen. Šaca' choncho doxen dan' ža leyna' zaca' gonxen cuincho güe'cho diža' naccho bene' güen, perw nono chon can' ža leyna'. Con da' chejnilaže'cho Jesucriston', da'nan' zaca' cont yecaccho bene' güen len Diosen'.

28 Can' naquen, note'tez bene' chejnilaže' Jesucriston', Diosen' že' naque' bene' güen len le' da' chejnilaže'ne', gague lagüe dan' chone' can' ža leyna'.

29 ¿Chaquele Diosen' naque' Dios che chio' naccho bene' Israel ngaze? Lecze naque' Dios che bene' bi zjanac bene' Israel.

30 Le toze Diosen' zoa na' len' že' che yogo'cho naccho bene' güen len le' con še chejnilaže'cho Jesucriston', na' toz can' chone' len chio' zoacho seřw dan' že' circuncisión na' len bene' cbi zjazoa seřwna'.

31 ¿Chaquele choncho leyna' ca to da' bibi zaca' da' žacho cheyaccho bene' güen len Diosen' cate' chejni'laže'cho Jesucriston'? Bi chonchon ca to da' bibi zaca', san chlo'echo naquen da' zaca'chgua.

4

Can' ben da' Abraham

1 Na' le'e bene' gualaž chia' len le'e bi nacle bene' Israel, da' xozxta'oto' Abraham ¿bixe nacho che'?

2 Šaca' Abrahanna' bene' doxen can' ža leyna', zaca' gonxen cuine' da' naque' bene' güen, san bi bene' doxen can' žanna' na' bibi gota' da' zaca' gonxen cuine' lao Diosen'.

3 Quinga ža Xtiža' Diosen' da' nyojen: "Abrahanna' gweyjnilaže' Diosen' na' da'nan' Diosen' gwne' naque' bene' güen len le'."

4 Cate' to bene' chone' žin, chone' gan laxjue' na' xan žinna' bi chone' to goclen cate' chnežjue' laxjuen'.

5 San to goclen chon Diosen' že' che chio' chejnilaže'chone' naccho bene' güen len le', le bi choncho da' güen. Choncho da' xinj, na' Diosen' chñitlagüe' da' xinj chechon' še chejnilaže'chone'.

6 Lecz da' Davin' be'e diža' ca mba chzoa ben' chñitlao Diosen' xtołen' na' bibi cuent chone' še ba ben ben' da' güen o ba bene' da' mal.

7 Bzój Davin' da' nga žan:

Mba zoacho še ba bezi'xen Diosen' che da' xinj da' ba bencho.

Mba zoacho še ba bñitlagüe' xtoła'chon'.

8 Mba zoacho še Diosen' že' checho bibi xtoła'cho de.

9 ¿Chaquele neto'zen' zoato seřw dan' že' circuncisión gac soato' mba can' gwnen'? Gague neto'zen'. Lencze le'e bi zoale seřw dan' že' circuncisión guac soale mba. Nezecho Diosen' gwne' da' Abrahanna' naque' bene' güen len le' da' gweyjnilaže'ne'.

10 Gwne' che da' Abrahanna' naque' bene' güen len le' cate' bina' soe' señw dan' že' circuncisión, gague beyož gwzoen'na' gwne' ca'.

11 Na' gwdechle gwzoe' señwna' cont gwnezde' Diosen' bnitlagüe' xtole' da' ba chejnilaže'ne'. Na' da'nana' Abrahanna' naque' xozxtao' yogo' bene' chesejnilaže' Diosen' cont nitlao xtoła'gauen' la'czła' bi zjazoe' señwna'.

12 Na' lecze naque' xozxtao' neto' bich bi xtoła'to' de da' chejnilaže'to' Diosen', neto' zoato' señw dan' že' circuncisión. Perw gague naque' xozxta'oto' da' zoato' señwna', san da' chejnilaže'to' Diosen' can' gwejnilaže' da' Abrahanna' le'.

Diosen' bene' güen len da' Abrahanna' da' gwejnilaže'ne'

13 Diosen' gože' da' Abrahanna' gone' cont le' len bene' za' yesalje lo diaža' chen' yesac chegaque' doxen yežlion'. Gož Diosen' da' Abrahanna' ca' da' gwejnilaže'ne'. Da'nana' gwna Diosen' naque' bene' güen gague da' bene' can' za leyna'.

14 Šaca' ža Diosen' con bene' yeson doxen can' ža leyna' yesac chegaque' yežlion', bibi zaca' šejnilaže'cho Diosen' šeca', na' bibi zejen da' gwne' gone' güen len bene' za' yesalje lo diaža che da' Abrahanna'.

15 Na' leyna' nsan' castigw che benachen', le bi chesone' can' žanna. Šaca' bibi ley de da' gwžian bia' bi da' cheyala' gon chio' benač, bibi xtoła'cho de šeca'.

16 Can' naquen, note'teze bene' chesejnilaže' Diosen', none' legaque' ca xi'in diaža che da' Abrahanna', na' Diosen' gone' cont legaque' yesac chegaque' yežlion' can' gože' da' Abrahanna'. Gague neto'zen' nombia'to' ley da' bzoj da' Moisésen' gac čheto' yežlion'. Na' nacczen da' li gon Diosen' güen len note'tez bene' chejnilaže'ne'. Na' gone' ca' cont gacbia' to goclen chone' len bene' ca' chesejnilaže'ne' can' gwejnilaže' da' Abrahanna' le'. Na' da' non Diosen' cuent Abrahanna' naque' ca xozxtao' yogo' chio' chejnilaže'chone',

17 chac can' gože' da' Abrahanna' gwne': "Ba nzoa' le' gaco' xozxtao' bene' še' nación zan." Dios ben' gwejnilaže' da' Abrahanna' nape' yela' guac cont yosbane' bene' guat, na' chac chone' cont gac da' bina' gac.

18 Abrahanna' bi gwnezde' nac gac can' gwna' Diosen' gac, san con gwzoe' gweyjele' che Diosen' na' gwzoe' lez gon Diosen' cont nita' bene' zan xi'in diaža' che'.

19 Gwzoacze' gweyjele'e can' gož Diosen' le' la'czła' ba naque' bene' gole par soa xi'ine', le ba zejgale' to gayoa iz, na' no'ol che' Sara naque' bene' güiž.

20 Gwzoateze' gwejnilaže' Diosen' na' bi gocžejlaže' len da' gož Diosen' le' gone', san gwzoačače' gwejnilaže'ne' na' benxene'ne'.

21 Abrahanna' gwnezde' Diosen' nape' yela' guac cont gone' can' gwnen'.

22 Da'nana' Diosen' gwne' naque' bene' güen da' gwejnilaže'ne'.

23 Na' dan' nyojen žan Diosen' gwne' naque' bene' güen da' gwejnilaže'ne', gague nyojen ca' che Abraham na'zen'.

24-25 Lecze nyojen che yogo'cho, le Diosen' lecze že' naccho bene' güen len le' da' chejnilaže'chone'. Cont gwnitlagüe' xtoła'chon' Diosen' gwsele' Xancho Jesucriston' bnežw cuine' gosote' le'. Na' Dios ben' chejnilaže'cho bečhis bosbane'ne' ladjo bene' guat ca' cont beyone' chio' bene' güen.

5

Zoacho binlo len Diosen' da' chejnilaže'cho Jesucriston'

¹ Na' ca nac chio', da' ba chejnilaže'cho Xancho Jesucriston', Diosen' ba gwne' naccho bene' güen len le', na' lecze da'nan' ba zoacho binlo len le'.

² Da' chejnilaže'cho Jesucriston', Diosen' zoacze' nzi'ide' chio'. Na' chebecho nezecho gone' soacho mbalaz juisyw can' zoa le' cate' šjayzoacho txen len le'.

³ Na' lecze chebe chezaque'cho cate' chzaca'zi'cho, le nezecho še gonxenlaže'cho cate' chzaca'zi'cho, nach gwyo gwčhejechcho cate' de bichle da' saca'zi'cho.

⁴ Na' še chonxenlaže'cho cate' chzaca'zi'chon', chlo'en zoachachcho chejnilaže'cho Diosen'. Na' še zoachachcho chejnilaže'chone', nezecho šjayzoacho txen len le'.

⁵ Na' dan' zoacho lez šjayzoacho txen len Diosen', bi nacho naquen to da' güenlaže' chaquecho gac checho ca'. Le Diosen' ba gwsele' Spiritw čhen' zoan len chio' na' čhnen lo' lažda'ochon' žan chacchgüe Diosen' chio'.

⁶ Chio' benach naccho bene' güen da' xinj na' bibi chac goncho cont yezoacho binlo len Diosen', perw bžin ža cate' Diosen' gwsele' Criston' bnežjw cuine' gote' neče chio' napcho doła'.

⁷ Nono zoa bene' gwnežjw cuine' yesot bene' le' neče bene' yoble, la'czla' še nac ben' bene' güen, o še gwchojlja tgüej bene' yeyaxjde' gwnežjw yela' mban che' yesote'ne' gualaz to bene' šagüe'.

⁸ San Diosen' blo'ede' chacchgüede' chio' da' gwsele' Criston' gote' neče chio' la'czla' zoacho choncho da' xinj.

⁹ Na' dan' got Criston' neče chio', Diosen' že' naccho bene' güen da' chejnilaže'cho le'. Na' Criston' lecze gone' cont bi saca'zi'cho cate' žin žan' Diosen' chogbi'e che yogo'lol bene'.

¹⁰ Cana' bi gwzoacho binlo len Diosen'. Perw Xi'ine' Criston' bnežjw cuine' gote' neče chio' cont bozoe' chio' binlo len Diosen'. Na' na'a ba zoacho binlo len le' na' nezecho zoacze Criston' chone' cont žin ža šjayzoacho len Diosen'.

¹¹ Na' lecze chebecho nombia'cho Diosen', le Xancho Jesucriston' ba bozoe' chio' binlo len le'.

Adánna' gwleque' da' mal yežlio nga, san Jesucriston' gwleque' da' güen

¹² Yela' güedenag che bene' nechw ben' le Adán gwxe da' malen' yežlio nga, na' da' malen' nsan' yela' got. Can' goc, gwzolao chesat yogo' benachen', le yogo'lole' chesone' da' mal.

¹³ Benachen' gwzolao chesoncze' da' xinjen' cate' gwzoate da' Adán, la'czla' bina' gata' ley dan' bzoj da' Moisésen'. Na' gan' bibi ley de, nono chon xbab še cheson bene' da' xinj.

¹⁴ Perw na' gwzolaon len da' Adánna' na' len bene' gwnita' caten' gwbane', bžinten len bene' gwnita' caten' gwban Moisésen', yogo'lole' gosate' can' chesat bene' ža na'aža. La'czla' legaque' bi gosone' güedenag len to da' gož Diosen' legaque' can' ben Adánna', bia'cze yogüe' gosone' da' xinjen'. Adánna' gwleque' yela' goten', san Jesucriston' ben' ba naquen sela' Diosen', len' bxie' yela' mban toli tocanē.

¹⁵ jNža' xen ca dan' gwxe caten' Adánna' bene' da' xinjen' na' ca dan' gwxe cate' Diosen' gwsele' Jesucriston'! Yogo' chio' benach gatcho lagüe da' ben Adánna' da' xinjen', san yogo' chio' benach guac soacho mba da' nzi'i Diosen' benachen' na' gwsele' Xi'ine' Jesucriston' cont chaclene' note'tezcho.

¹⁶ Toz Adánna' bi bzenague' che Diosen' na' da'nan' Diosen' gwne' yezezaca'zi' yogo'cze benachen' toli tocanē che xtoła'gaquen'. Nach Diosen' gwsele' toz bene' güen cont bnitlagüe' xtoła' note'tezcho chejnilaže'chone' na' beyonde' chio' bene' güen la'czla' da' zan da' xinj ba bencho.

17 De yela' got che chio' beṇaḥ neḥe da' xinj da' ben toz ben' gože' Adán, san mbalaz juisyw chac che chio' beṇaḥ neḥe da' güen da' ben Jesucriston' bnežjw yela' mban che' neḥe yogo'cho. Diosen' nži'ide' chio', nachen' bibi chḥixjue' chonze' chio' ca bene' güen še chejnilaže'cho Jesucriston', na' none' chio' yela' mban toli tocaṇe cont ṇabia'cho txen len Jesucriston'.

18 Can' naquen, da' ben toz Adánna' da' xinj, Diosen' gwḥogbi'en saca'zi' yogo' beṇaḥen' che xtoḷa'gaquen'. Na' neḥe da' güen da' ben toz Jesucriston' da' bnežjw cuine' gosote'ne', da'nán' ṇitlao xtoḷa' note'tezcho chejnilaže'chone', cont none' chio' ca bene' güen.

19 Len da' xinj dan' ben Adánna' cate' bene' güedenag len Diosen', gwxe da' xinj da' chon yogo' chio' beṇaḥ. Na' da' bzenag Jesuscriston' che Diosen' na' bnežjw cuine' cont ṇitlao xtoḷa' beṇaḥen', da'nán' note'tezcho chejnilaže'chone' none' chio' ca bene' güen.

20 Cate' Diosen' bnežjue' ley chen' da' bzoj Moisésen' na' gwcha'o gwxenḥ da' xinj da' goson beṇaḥen', le bi bosozenague' chen. Perw na' la'czla' gwcha'o gwxen da' malen', gwcha'o gwxenḥ yela' ži'ilaže' che Diosen' len chio' beṇaḥ.

21 Can' chac, de yela' got che yogo' chio' beṇaḥ da' naccho bene' chon da' xinj, ca'ze Diosen' nži'ide' yogo' chio' beṇaḥ cont note'tezcho gaccho bene' güen len le' na' gata' yela' mban checho toli tocaṇe še šejnilaže'cho Xancho Jesucriston'.

6

Bi cheyala' soacho goncho da' xinj san soacho goncho can' chazlaže' Criston'

1 ¿Nacxen' cheyala' goncho na'a ba nezecho nži'ilaže' Diosen' chio'? ¿Goncho da' malen' cont yezi'xenchcze Diosen' che chio'?

2 Gague can' goncho. Cate' gwzolao chejnilaže'cho Criston' bich goclaže'cho ṇabia' da' malen' chio'. Da'nán' guac naḥo ba gotcho len da' xinjen' cont bich gonchon.

3 ¿Bi chache'ele can' zejen da' gwzoacho nis? Zejen da' chejnilaže'cho Jesucriston' ben' got neḥe chio', baḥ naccho ca to bene' guat len da' xinjen' cont bich gonchon.

4 Na' dan' gwzoacho nis lecze guac naḥo bgaše'cho can' bosocuaše' Criston'. Na' con can' beḥis bosban Xancho Diosen' Criston' ladjo bene' guaten' len yela' guac xen che', ca'czen' bene' len chio', ba bocobe' yichjlažda'ochon' cont soa cuezcho goncho da' güen.

5 Na' can' žacho ba gotcho len da' xinjen' dan' chejnilaže'cho Criston', lecze guac naḥo beḥis bosban Diosen' chio' can' beḥis bosbane' Criston', le ba bocobe' yichjlažda'ochon'.

6 Cana' ne' chnabia' da' malen' chio' len yogo' da' choncho. perw na'a da' chejnilaže'cho Criston' ben' got neḥe chio', ba none' chio' ca to bene' guat len da' xinjen' cont bich gonchon na' cont da' mal dan' yo'o lo' yichjlažda'ochon' bich soan ṇabian' chio'.

7-8 Bene' ba got bich zoe' chone' da' xinj, na' ca' nacczen len chio' chejni-laže'cho Criston', bich che'necho ṇabia' da' malen' chio' na' bich zoacho chzenagcho chen. Na' chejle'cho gone' cont soacho bancho len le' na'a na' toli tocaṇe.

9 Na' nezecho Criston' beyas bebane' ladjo bene' guaten' na' gwbat gate' da' yoble le bich soe yela' gotten' le'.

10 Na' cate' gosote' Criston', tni'aze bnežjw yela' mban che' neche xtoła'chon'. Bich chyažjen gwnežjw cuine' da' yoble, san ba zoalene' Diosen' chone' con bi da' chazlaže' Diosen'.

11 Nach dan' gote' neche xtoła'chon', cheyała' soacho goncho cont da' mal dan' yo'o lo' yichjlažda'ochon' bich nabian' chio', na' cheyała' soacho txen len Xancho Jesucriston' cont goncho dan' chazlaže' Diosen'.

12 Da'nan' bi güe'cho latje nabia' da' malen' cuerp chechon' dan' nac da' gat na' goncho bi da' xinj da' selažen'.

13 Bi cheyała' gon cuincho lo na' da' gwxiyen' cont goncho da' mal len cuerp chechon'. Cheyała' gon cuincho lo na' Diosen' cont goncho da' güen. Guac nacho Diosen' bechis bosbane' chio' ladjo bene' guaten' da' bocobe' yichjlažda'ochon'.

14 Bich nabia' da' malen' chio', le nezecho Diosen' chbede' chio' gague neche da' choncho can' ža ley dan' bzoj da' Moisés, san dan' naque' bene' šagüe'.

Bene' chzenag che da' malen' naque' ca bene' zoa xan, bene' chnabia' le' cont gonche' da' malen'

15 ¿Gontezcho da' xinjen' da' nezecho nži'i Diosen' chio' na' nezecho bi chone' cuent še ba bencho da' ža leyna' cheyała' goncho? Bitw goncho ca'.

16 Nezecho še ba chzenagcho che to bene' cont goncho bite'tez že', choe'cho latje chnabi'e chio'. Na' ca'cze naquen len chio' še chzenagcho che da' malen' na' chontezchon, ba chnabia' da' malen' chio' še ca'; na' bi gac šjayzoalencho Diosen' toli tocane še ca' choncho. San še zoacho chzenagcho che Diosen', nachen' zejzcho choncho da' güen na' šjayzoalencho Diosen' toli tocane.

17 Na' choa' yela' choxcen che Diosen' na'a ba chzenagle do yichj do laže'le xtiža' Diosen' da' ba bzejni'ito' le'e, na' bich chzenagle che da' malen' can' benle cana'.

18 Diosen' ba bebeje' le'e lo' da' malen' na' ba ben cuinle lo ne'en cont soale gonle da' güen.

19 Ba bzejni'ida' le'e bia' diža' che bi da' chac che chio' benach cont šejni'ile. Nachen' chnia' le'e, con can' gwzoale bentezle da' nac da' yela' zto' len cuerp chelen', na' benchgualle da' malen', lecze can' cheyała' gon cuinle lo na' Diosen' gonle da' güen cont chazlaže' Diosen' can' chonlen'.

20 Caten' ne' zejcho choncho da' malen' bi chzenagcho che Diosen' neca choncho da' güen.

21 Na' bibi banez na' le'echo che da' mal ca' ba bencho, san na'a ba cheto'echo chen. Bene' ca' ne' chesonteze' da' malen' gata' castigw chegaque' toli tocane.

22 Na' chio', Diosen' ba bebeje' chio' lo da' malen' na' yo'ocho lo ne'ena'. Da'nan' zejch choncho da' güen can' chazlaže' Diosen' na' šjayzoacho len le' toli tocane.

23 Še zoacho choncho da' xinjen', gata' castigw checho toli tocane cate' gatcho. San Diosen' chondadze' chio' to da' güen juisyw, chio' chejnilaže'cho Xancho Jesucriston', chone' cont šjayzoacho len Diosen' toli tocane.

7

Naccho ca to bene' ba got len ley da' bzoj Moisésen'

1 Bene' migw, da' nga žia' le'e, le nombia'le ley dan' bzoj Moisésen'. Nezczecho con bene' ca' zjamban cheyała'cze yosozenague' che leyna'.

² Ca to no'ole nšagna', šlac mban bene' che' cheyała' soalene' le', le can' chon leyna' mandadw gone'. Na' še ba got bene' chen', cana' ba bele' len leyna' da' chon mandadw soalene' bene' chen'.

³ Še no'olen' soalene' bene' yoble šlac ne' mban bene' chen', nape' doła' len leyna' da' chzoa xtoe'. Perw na' še ba got bene' chen', leyna' žan ba guac yošagna'lene' bene' yoble na' bi nacho chone' da' xinj yošagne'e.

⁴ Bene' migw, can' naquen len chio' chejnilaže'cho Criston'. Ba belacho len leyna' da' žan saca'zi'cho che xtoła'chon' toli tocanē. Na' ba gwnitlao xtoła'chon' dan' bnežjw Criston' yela' mban chen' gosote'ne' le'e yag cruzen'. Da'nan' ba zoacho txen len Criston' ben' beban ladjo bene' guaten', na' zoacho cont goncho can' chazlaže' Diosen'.

⁵ Cana' zoacho chzenagcho che da' malen' dan' yo'o lo' yichjlažda'ochon'. Na' cate' gwnezecho can' ža ley dan' bzoj da' Moisésen', nachle be'laže'cho bencho da' malen', na' da' malen' nsan' castigw checho toli tocanē cate' gatcho.

⁶ Perw na'a ba belacho len ley da' žan cheyała' si'cho castigw toli tocanē, le Criston' beque'e xtoła'chon'. Na' ba chaclaže'cho goncho can' chazlaže' Diosen', na' chonchon gague cont na' Diosen' naccho bene' güen len len', san chonchon dan' ba bocobe Spiritw chen' yichjlažda'ochon'.

Bi güe'cho latje nabia' da' malen' chio'

⁷ Bi cheyała' goncho xbab nac to da' mal ley dan' bzoj da' Moisésen'. Leyna' bzejni'in neda' bi dan' bi cheyała' gona' cont gocbe'eda' chona' da' xinj. Na' gwnezda' naquen mal chzelaža' bi da' de che bene', le leyna' žan: "Bi selaže'le bite'teze da' de che bene'."

⁸ Na' cate' gwnezda' can' ža leyna', nachle da' mal dan' yo'o lo' yichjlažda'oguan' benen gwzelaže'cha'. Da' li cate' bi nezecho can' ža leyna', bi nezecho še choncho da' xinj.

⁹ Neda' gwzooa' to tiemp bi gocbe'eda' bi cheyała' selaža'. Perw cate' bžin ža gwnezda' nžian bia' bi cheyała' selaža', nachle bzenagcha' che da' mal da' yo'o lo' yichjlažda'oguan' na' gwzelaže'cha'. Da'nan' gwnezda' cheyała' sia' castigw che xtołan' toli tocanē.

¹⁰ Leyna' nyojen cont gwzenagcho chen na' gata' yela' mban checho toli tocanē, perw da' bi bzenaga' chen, bzejni'in neda' gata' castigw chia' toli tocanē.

¹¹ Can' goc, cate' bembia' leyna', da' malen' da' yo'o lo' yichjlažda'oguan' gwxoayaguen neda' cont bencha' da' malen', nach gwchoglaon chia' gata' castigw che xtołan' toli tocanē.

¹² Ley dan' bzoj Moisésen' nacczen che Dios, na' to to da' nžian bia' goncho naquen güen na' zejen to liča.

¹³ ¿Nachó leyna' da' naquen güenchguan' chonen cont saca'zi'cho che xtoła'chon' toli tocanē? Bi nac len. Da' mal da' yo'o lo' yichjlažda'ochon' bi ben' latje goncho can' cheyała' goncho, na' da'nan' gwchoglaon checho saca'zi'cho che xtoła'chon' toli tocanē. Leynan' da' nac da' güen chlo'en chio' Diosen' chgue'echgüede' da' mal da' choncho.

¹⁴ Nezecho leyna' naquen che Spiritw che Diosen' na' naquen güen, san chio' yo'o da' malen' lo' yichjlažda'ochon' na' zoacho choncho da' xinj.

¹⁵ Bi choncho da' güen da' chaclaže'cho goncho, san da' xinj da' chgue'echo len' choncho. Bi chache'echo bixchen' choncho ca'.

¹⁶ Na' dan' chgue'echo da' mal dan' chonchon', zejen chache'echo nac leyna' güen.

¹⁷ Gague chion' choncho da' xinj da' bi chaclaže' cho goncho, san da' mal dan' yo'o lo' yichjlažda'ochon' chžigan' chio' cont chonchon.

¹⁸ Nezecho bi naccho beñe' güen, le yo'o da' malen' lo' yichjlažda'ochon'. Chaclaže' cho goncho da' güen perw bi chac gonchon.

¹⁹ Bi choncho da' güen da' chaclaže' cho goncho, san choncho da' xinj da' bi che'necho goncho.

²⁰ Da'nan' chnia', gague chion' choncho da' xinj da' bi chaclaže' cho goncho, san da' mal dan' yo'o lo' yichjlažda'ochon' chžigan' chio' cont chonchon.

²¹ Can' chac checho, cate' che'necho goncho da' güen, da' mal dan' yo'o lo' yichjlažda'ochonan' chžonen gonchon.

²² Lo' yichjlažda'ochon' chbecho goncho can' ža ley che Diosen',

²³ perw chache'echo, yo'o yeto da' yo'o lo' yichjlažda'ochon' chžonen goncho da' güen, na' lenna' chnabian' chio' cont choncho da' xinj'en'.

²⁴⁻²⁵ ¡Nyaše' chac checho! Lo' yichjlažda'ochon' chaclaže' cho goncho can' ža ley che Diosen', perw da' mal dan' yo'o lo' yichjlažda'ochon' chnabian' chio' len cuerp chechon' cont choncho da' xinj'en'. ¿Non' soe da' mal dan' yo'o lo' yichjlažda'ochon' cont bi nabian' cuerp chechon' len xbab chechon'? Le dan' chnabia' da' malen' chio' da'nan' si'cho castigw toli tocañe. Choχcien Diosen' len' soede' da' mal dan' yo'o lo' yichjlažda'ochon' cont bich nabian' chio', le ba chejnilaže' cho Xancho Jesucriston'.

8

Spiritw che Diosen' chonen chio' yela' mban toli tocañe

¹ Na' na'a da' ba naccho txen len Cristo Jesús'en', bich gata' castigw checho toli tocañe, le ba chzenagcho che Spiritw che Diosen' cont choncho da' güen na' bich chzenagcho che da' malen' dan' yo'o lo' yichjlažda'ochon'.

² Cate' ne' zoacho chontezcho da' malen' nchoglaon checho si'cho castigw che xtoła'chon' toli tocañe, perw na'a Spiritw che Diosen' ba beñen chio' yela' mban toli tocañe da' chejnilaže' cho Cristo Jesús'en' na' Spiritw chen' chnabian' yichjlažda'ochon'. Da'nan' bich saca'zi'cho toli tocañe.

³ Ley da' bzoj Moisés'en' bi gwzoen yebejen chio' lo' da' malen', le yo'o da' malen' lo' yichjlažda'ochon'. Nach Diosen' gwsele' Xi'ine' Jesucriston' golje' yežlion', goczze cuerp chen' ca cuerp che chio' beñe' güen da' xinj. Na' Jesucriston' bnežjw cuine' neche xtoła'chon' cont da' malen' bich nabian' chio' len xbab da' yo'o lo' yichjlažda'ochon'.

⁴ Diosen' gwsele'ne' cont soacho goncho da' güen can' ža ley chen' cheyała' goncho. Le bich chzenagcho che da' malen' dan' yo'o lo' yichjlažda'ochon', san ba zoacho choncho da' güen lagüe dan' chzenagcho che Spiritw che Diosen'.

⁵ Še chzenagcho che da' mal dan' yo'o lo' yichjlažda'ochon', con da' malzen' chebecho choncho; san še chzenagcho che Spiritw che Diosen', chebecho choncho da' ca' chazlaže' Diosen'.

⁶ Le še zoacho chebecho da' malen', nachle si'cho castigw toli tocañe, na' še chebecho da' ca' chazlaže' Spiritw che Diosen', guata' yela' mban checho toli tocañe na' soa cuezcho binjo len xbab dan' yo'o lo' yichjlažda'ochon'.

⁷ Choncho ze beñe' chgue'e Diosen' cate' chebecho da' malen', le cate' chebecho da' malen' bi chazlaže' cho neca chac gwzenagcho che ley chen'.

⁸ Na' še zoacho chzenagcho che da' mal dan' yo'o lo' yichjlažda'ochon', bi chebe Diosen' chio'.

⁹ Na' chio', da' ba bedesoa Spiritw che Diosen' lo' lažda'ochon', bi zoacho chzenagcho che da' malen' da' yo'o lo' yichjlažda'ochon', san zoacho chzenagcho che Spiritw che Diosen'. Na' bene' bi zoa Spiritw che Criston' lo' lažda'ogüen', gague da' li chejnlaže' Criston'. (Spiritw che Criston' lecze naquen Spiritw che Dios.)

¹⁰ Perw na' še ba zoa Criston' len chio', Diosen' že' naccho bene' güen len le' na' lecze šjayzoacho len le' toli tocane la'czla' yesat cuerp chechon' neche da' malen' dan' de yežlion'.

¹¹ Diosen' bechis bosbane' Cristo Jesúsen' ladjo bene' guaten', na' lecze gwžin ža cate' Diosen' yečhis yosbane' chio' len cuerp checho quinga da' chesat, le Spiritw chen' zoan lo' lažda'ochon'.

¹² Da'nan' bene' migw, chonen byen gwzenagcho che Spiritw che Diosen'. Bi cheyala' gwzenagcho che da' mal dan' yo'o lo' lažda'ochon'.

¹³ Le še soacho gwzenagcho che da' mal dan' yo'o lo' lažda'ochon', saca'zi'cho toli tocane. Na' še gwzenagcho che Spiritw che Diosen' cont bi gwzenagcho che da' malen', nach gata' yela' mban checho toli tocane.

¹⁴ Na' note'tezcho še chzenagcho che dan' chzejni' Spiritw che Diosen' chio', naccho xi'in Dios.

¹⁵ Diosen' bene' chio' Spiritw chen' caten' gwque'e chio' ca xi'ine'. Da'nan' bich chžebcho Diosen' can' chžebcho to bene' znia cate' choncho xšinen'. Bich chžebcho Diosen', san chol güižchone', che'chone': "Xa".

¹⁶ Na' lecze Spiritw chen' chnen lo' lažda'ochon' cont nezecho naccho xi'in Dios.

¹⁷ Na' da' naccho xi'in Dios, gwžin ža cate' yogo' da' de che Criston' gaquen checho txen len le'. Na' can' bzanlaže' cuin Criston' gwdi gwxaque', can' cheyala'cze zanlaže' cuincho saca'zi'cho bi da' gac checho cont Diosen' gone' ga gacchgua güen checho txen len le' yaban'.

¹⁸ Yežlio nga de da' chzaca'zi' chzaca'yaše'cho. Perw chacda' bibi zaca'czen cue' yichjcho che da' ca' chac checho, le gwžin ža leca mba juisyw gac checho cate' šjayzoacho len Diosen'.

¹⁹ Diosen' bene' benačh, bene' beyixe', len bica'chle da' zjade. Na' yogo'cho len bichle da' ca' bene' zoacho lo' juisyw chbezcho batcan' gon Diosen' gacchgua mba che chio' naccho xi'ine'.

²⁰ Na' yogo' da' ca' ben Diosen' bich zjanacšagüen'. Na' gague con to gualzen zjanaquen ca', san Diosen' bžie' bia' zjanaquen ca'. Perw za' yeyonšagüe' Diosen' legaquen len beyixe' ca' na' len chio' benačh. Na' txen chbezcho gone' cont gac checho binlo.

²¹ Yogo'cze da' ca' bene' yesebiayin', na' chesebezen batcan' žin ža cate' gone' cont yeyac cuerp che chio' naccho xi'in Diosen' da' cobe na' da' zaca'chgua can' nac che Criston', le canan' lecze yesyeyacšagüe' da' ca' cont bich te chegaquen.

²² Nezecho ža na'aža yogo' da' ca' ben Diosen' chesežaglaon ca to no'ole bene' chzan.

²³ Na' gague da' ca'ze chesežaglaon, san lencze chio' benačh chžaglaoch na' chbezgüe'cho. Ba ben Diosen' chio' Spiritw chen' cont nezecho gwžin ža gaquech güen checho. Na' chbezgüe'cho lo' lažda'ochon' chbezcho batcan' gon Diosen' cuerp cob chechon' cont gwlo'e ba nque'e chio' ca xi'ine'.

²⁴ Cate' Diosen' bene' yela' mban checho toli tocane gwzolao chbezcho gone' cuerp cobe chechon', na' lenna' ne' chbezcho. Nono zoa ne' chbeze' gac da' nezde' ba goc.

²⁵ Na' še bina' le'echo da'na' chbezcho gac, cheyała' cuezcho gaquen sin cbi chjaxaque'laže'cho.

²⁶ Na' Spiritw çe Diosen' chaclenen chio', le bi nezecho can' cheyała' goncho yol güižcho Dios, san Spiritw çe Diosen' chacbe'en cate' con chebanecho na' cate' bi cheželecho diža' da' güe'lencho Diosen', nach chñen gualazcho len diža' da' bi chejni'icho.

²⁷ Na' Dios ben' chña' chgüie' yichjlaždao' yogo'cze bene', chejni'ide' bin' chaclaže' Spiritw chen' cate' chñen gualazcho, le ba gwleje' chio' naccho lo ne'e. Na' con da' chaclaže' Diosen' chñab Spiriton' lagüen'.

Diosen' de'e chio' na' da'nan' nono soe chio'

²⁸ Na' nezecho bite'tez dan' chac, Diosen' chone' cont gac güen çe chio' chaquechone', le ba gwleje' chio' cont naccho lo ne'e can' gwnalaže'.

²⁹ Cate' bina' galjcho Diosen' gwnezde' šejnilaže'chone' na' bsi'e xnezen' gac yichjlažda'ochon' güen can' nac yichjlaždao' Xi'ine' Jesucriston'. Bsi'e xnezen' gac Jesucriston' bene' blao lao yogo'cho na' chio' gaccho ca biše' lježe' bi' xcuide'ch.

³⁰ Can' naquen, cani'te Diosen' bsi'e xnezen' gac yichjlažda'ochon' güen can' nac yichjlaždao' Jesucriston' na' gwleje' chio' cont naccho lo ne'e. Lecze beyone' chio' bene' güen len le' na' bene' cont gacchgua güen çechecho txen len Jesucriston' yaban'.

³¹ ĴCatec güenna' chon Diosen' len chio' ba bsi'e xnezen' gac çechecho yogo' da' ca! Len' de'e chio', nachen' notno soe chio'.

³² Diosen' bi bžone' saca'zi' Xi'ine' Jesucriston', san gwsele'ne' cont yeque'e xtoła'chon'. Da'nan' nezecho yebede' gone' chio' yogo' bite'tez da' yažjecho.

³³ Diosen' ba gwleje' chio' naccho lo ne'e, na' beque'e xtoła'chon'. Na' notno soe gwcuiš chio' lagüen', le ba gwne' bibi xtoła'cho de.

³⁴ Nono zoa no gac gon cont na Diosen' de xtoła'cho. Criston' bzanlaže' cuine' gosote'ne' cont beque'e xtoła'chon', na' beyas bebane' ladjo bene' guat ca', chi'e chnabi'e txen len Diosen'. Na' len' chñie' gualaz chio' lao Diosen'.

³⁵ ĴDe da' gwžon cont Criston' bich gacde' chio'? ĴGwžon no da' mal da' gac çechecho? ĴGwžon no yela' yaše' yela' zi' da' gac çechecho? ĴGwžon no yela' xi'a çe bene' chgue'e chio'? ĴGwžon no yela' chbil chdon çechecho? ĴGwžon cate' bi de xałana'cho? ĴGwžon še bi da' xož gac çechecho? ĴGwžon še za' no bene' gote' chio'? Bibi de da' gwžon cont Criston' bich gacde' chio'.

³⁶ Chac can' nyojcze Xtiža' Diosen' žan:

Ķanto' Dios, da' chejniłaže'to' le' nita' bene' chesacłaže' yesote' neto' do ža do yel.

Chesone' xbab nacto' ca to xila' be yesote'.

³⁷ Na' la'czła' yogo' da' mal ca' za'ac len chio', bi chac chop laže'cho, san chebechgüecho le nezecho zoacze Criston' chacde' chio'.

³⁸ Neda' nezda' bibi de da' gac gwžon cont Diosen' len Criston' bich yesacde' chio'. Yela' goten' bi gonen, ne yela' mbanna', ne no angl, ne no da' xigüe', ne no bene' gwnabia', ne da' chac çechecho na'a o bichle da' za'za'.

³⁹ Ne da' de le'e yaban', ne da' de gabilen', ne bichle da' ben Diosen' bi gac yosožonen cont Diosen' bich gacde' chio'. Ba blo'ede' catec chacde' chio' dan' gwsele' Ķancho Jesucriston' beque'e xtoła'chon'.

9

Diosen' gwque'e bene' Israel ca' ca xi'ine'

1-2 Neda' naca' txen len Criston' na' choa' diža' li, bi chonlaža', chnia' chacyaše' chgüeda' na' chacchgüeda' lo' lažda' oğua' che bene' gualaž chia' bene' bi chesejnilaže' Criston'. Spiritw che Diosen' chaclenen neda' cont nežda' diža' lin' choa'.

3 Chacda' gwzanda' cuina' cuiaya'a šeca' da' cuejiže' Diosen' neda' cuit Criston' gonen cont bene' gualaž chia' ca' yesejnilaže' Criston'. Chacda' legaque', le gosaljje' zjanaque' bene' Israel ca neda'.

4 Diosen' gwque'e xozxtao' neto' bene' Israel ca xi'ine', na' gwzoe' len legaque' lo' be'ni' juisyw. Na' gwne' gaclene'ne', na' bnežjue' legaque' ley da' bzoj Moisésen'. Na' blo'ede'ne' naclen' yesonxene'ne', nach gože' legaque' bichle da' güen da' gone' len legaque'.

5 Bene' gole blao bene' za' che'elte gosaque' xozxtao' neto' bene' Israel. Na' lo diaža chegaque'na' golje Criston' ben' gwseła' Diosen'. Criston' lezce naque' Dios na' chnabi'e yogo'te benač, yogo'te beyixe' na' yogo'lol bichle da' de yežlio nga na' gate'teze. Cheyala' gonxenčhone' toli tocane. Na' can' gonšcaczcho.

6 Na' bi cheyala' goncho xbab bi ben Diosen' can' gwne' gone' güen len neto' bene' Israel. Gague yogo' neto' goljto' lo diaža che da' Israelen' na Diosen' nacto' bene' Israel, le gague yogo'to' chejnilaže'to'ne'.

7 Na' gague yogo' neto' goljto' lo diaža che da' Abrahanna' nacto' dogualje xi'in diaža che', le gague yogo'to' chejnilaže'to' Diosen' can' gwyejnilaže' da' Abrahanna' le'. Quinga gož Diosen' Abrahanna' cani', gwne': "Xi'in diaža che da' Isaaquen' gona' cuent lo diaža čhion'."

8 Na' dan' gwne' ca' zeje diža' Diosen' chbeje' bene' zjanaque' xi'ine' gague da' gosaljje' lo diaža che bene' Israelen', san bene' chesejle'e gon Diosen' gac chegaque' can' že' con can' gwyejle' da' Abrahanna', legacze' zjanaque' xi'ine' na' zjanaque' xi'in diaža che da' Abraham.

9 Quinga gož Diosen' Abrahanna' gone', gwne': "Cate' žin tiempen' bžia' bia' yida', cana' ba zoa to bi' che no'ol čhio' Sara ni."

10 Na' gague da' na'zen', san lez ca' Diosen' be'e diža' che xi'in da' Rebecan' bin' gosac choptebe' xi'in da' xozxta'oto' Isaac.

11-12 Cate' bina' yesalje bi' cuaš ca' na' bibi na' yesombe' cont nacho zjanacbe' bi' güen o bi' mal, Diosen' blo'ede' chbeje' note'tez bene' chaclaže' cont gone' güen len legaque'. Le Diosen' gože' Rebecan': "Bin' galje da' nechw gwzexjw yichjbe' cont bin' za' cože'ben' nabia'be' lebe'." Gwne' ca' cont nezecho chbeje' bene' gac güen chegaque', gague lagüe da' chesone' bi da' güen, san cont gac can' chnalazen'.

13 Na' ga yoble nyoj Xtiža' Diosen' žan: "Gocda' Jacob na' bgue'eda' Esaú."

14 Bi cheyala' goncho xbab Diosen' cbi chone' da' zej to licha dan' chone' ca'. Zejzce' to licha.

15 Chone' can' gože' Moisésen' cani'te, gwne': "Yeyaše'laža' con non' chazlaža' yeyaše'laža', na' ži'ilaže'da' con non' chazlaža' ži'ilaže'da'."

16 Diosen' chbeje' bene' cont yeyaše'laže'de' le', gague can' chaclaže' benačhen', na' gague da' chesone' bi da' chesone', san Diosen' cheyaše'laže'de' con non' chbeje' yeyaše'laže'de'.

17 Na' Xtiža' Diosen' nyojen can' gože' bene' gwnabia' che Egipton', gwne': "Neda' bena' naco' rey cont chlo'eda' bene' yela' guac čhia' da' chona' len le'. Chonan' cont yeseneze bene' že' doxen lo yežlion' zoa' chnabi'a'."

18 Can' naquen, Diosen' cheyaše'laže'de' con non' chazlaže' yeyaše'laže'de', na' lecze beṇe' zjanaque' beṇe' güedenag, lecze chazlaže' gone' legaque' beṇe' güedenag.

19 Na' da' chon Diosen' ca', guacte gonle xbab ṇale: "Con can' ba nžia Diosen' bia' chon chio' beṇaḥ. ¿Bixchen' že' de xtoła'chon' še ca'?"

20 Perw ¿no nac chio' beṇaḥ gacyožlencho Diosen'? Ca to no yeso' xguague bi gac yen' beṇe' ben len: "¿Bixchen' beno' neda' quinga?"

21 Beṇe' güen yeso' xguaguen' guac gone' con can' chazlaže' len gonan'. Chac chone' ton da' nac xdanchgua na' len gona' na'ze gone' yeto da' gon žin len bite'teze.

22 Na' bi nacho chon Diosen' con can' chazlaže' len chio' beṇaḥ yogo' ni'a, nžie' bia' gwnežjue' castigw toli tocaṇe che beṇe' ca' bi chosozenag che', na' nape' yela' guac cont gone' ca'. Perw chzoede' sša chape' yela' chxenlaže' len legaque' na' gague la' sela'te' legaque' lo yi' gabilen' la'czła' zjazaque' yesebiaye'e.

23 Chone' ca' le nžie' bia' gone' da' güen juisyw len note'tezcho chejni-laže' chone', chion' chion' cheyaše'laže'de'. Cani'te gwleje' chio' gac da' mba juisyw checho cate' šjajzoacho len le'.

24 Chion' ba gwleje' gac güen checho bałcho naccho beṇe' Israel na' bałcho bi naccho beṇe' Israel.

25 Can' ža le'e libr dan' bzoj Oseas ben' be' xtiža' Diosen' cani', žan: Beṇe' ca' bi zjanaque' yež chia', neda' Dios nia' legaque' yež chia', na' bene' ca' bi godca', yapegaca'ne' chacda' legaque'.

26 Na' yež gan' gož Diosen' bene' ca': "Bi nacle yež chia'", na'teze Dios ben' zoa toli tocaṇe ye'e legaque' xi'ine'.

27 Na' Isaías ben' be' xtiža' Dios cani' gwne' quinga che da' xoxxtao' neto' beṇe' Israel: "La'czła' chio' beṇe' Israel šancho ca yox da' chi' cho'a nisdao', bał gacho šjajzoacho len Diosen'.

28 Le Diosen' gone' can' ba nchoglagüen' len chio' beṇaḥ, na' bedao'nez gone' doxen can' ba ngüie' gone'."

29 Gac can' ža yeto da' bzoj Isaíasen' cani', žan:

Šaca' Xancho Diosen' ben' nape yela' guac xen bi bocua'ane' to chope beṇe' lo nación Israel chechon', ba gwžiyai'cho can' gosac che beṇe' Sodoma na' beṇe' Gomorra ca'.

Beṇe' Israel beṇe' bi chesejnilaže' Criston'

30 Quinga ba goc, beṇe' bi zjanaque' beṇe' Israel bi besyeyiljue' nacle yesone' cont Diosen' ne' zjanaque' beṇe' güen len le', perw bale' ba chesejnilaže' Criston' na' da'nan' ba zjanaque' beṇe' güen len Diosen'.

31 Na' zan beṇe' Israel gualaž cheto' zjanao' to ley da' chžian bia' naclen' yesone' cont yesaque' beṇe' güen len Diosen'. Perw bi zjanaque' beṇe' güen len le', le bi chesone' doxen can' žanna'.

32 Na' bi goc yesaque' beṇe' güen len Diosen', le gosacde' yesone' da' güen cont yesaque' beṇe' güen len le' na' bi gosacbe'ede' con bene' yesejnilaže'ne' yesaque' beṇe' güen len le'. Goc chegaque' ca chac che beṇe' jati'i to yej.

33 Quinga nyoj Xtiža' Diosen' chegaque':

Gan' nzi' Sión sela' to beṇe',
na' bena' zaca'lebe' ca to yej da' chego' beṇe' na' ca to yej xen da' šjati'i beṇe'
na' bixe',
le beṇe' zan bi yesejnilaže' ben' sela'.
Na' note'teze' yesejnilaže' bena' selan', gwbat yesyetinjde' che dan' gosejni-laže'ne'.

10

1 Bene' migw, lo' lažda'ogua' che'nchgüeda' bene' Israel gualaž chia' yesejni-laže' Jesucriston' cont gata' yela' mban čegaque' toli' tocane, nachen' chol güiža' Diosen' chnaba' gaclene' legaque'.

2 Nežda' da' zan da' chesone' chesacde' yebe Diosen' legaque', perw bi chesache'ede' bin' chazlaže' Diosen'.

3 Bi chesejni'ide' cheyała' yesejni-laže' Criston' cont yesaque' bene' güen, san chesyeyiljue' bi da' güen da' yesone' chesacde' cont yesaque' bene' güen len le'. Da'nan' bi chesejni-laže' Jesucriston' can' chaclaže' Diosen' yesone'.

4 Le yogo' bene' chesejni-laže' Criston' ba besyeyaque' bene' güen len Diosen'. Na' chio' chejni-laže' chone' ba nezecho nono gac gonyane' can' ža ley dan' bzoj Moisésen', neca gac yeyaque' bene' güen da' na'ogüe' lezen.

5 Da' Moisésen' bzoje' can' cheyała' gon bene' cont gague' bene' güen len Diosen', gwne': "Note'teze bene' chone' cayanen' ža ley na', nachen' guac bane' toli' tocane."

6-7 Na' chio' ba naccho bene' güen len le' da' chejni-laže' chone', na' bich choncho xbab nacho: "¿No gac cue yaban' na' no gac yetj gan' že' bene' guaten?" šaca' nacle goncho šjaxi'cho Criston' cont gaclene' chio'.

8 San diža' güen da' chyixjue'eto' žan: "Ba nombia'cho diža' da' chaclenen chio'. Choncho xbab che len na' choe'cho diža' can' žan." Len na' diža' da' chyixjue'eto' bene' cont yesejni-laže' Jesucriston'.

9 Che'to' bene': "Še güe' len le' bene' diža' cont yesenezde' chejni-laže' le Jesucriston' na' chzenagle che' da' naque' Xanle, na' še šejle' le lo' yichjlažda'ole Diosen' bechis bosbane' Jesucriston' ladjo bene' guaten', nachen' gata' yela' mban chele toli' tocane."

10 Le cheyała' šejle'cho lo' yichjlažda'ochon' cont yeyaccho bene' güen len Diosen' na' lecze cheyała' güe'lencho bene' diža' che dan' chejni-laže'cho Criston' cont gata' yela' mban checho toli' tocane.

11 Xtiža' Diosen' nyojen žan: "Note'tez bene' yesejni-laže' Diosen', gwbat yesyetinjde' che da' gosejni-laže'ne'."

12 Balcho naccho bene' Israel na' balcho bi naccho bene' Israel, toz can' chon Diosen' len yogo'cho, le Xancho Jesucriston' naque' Xan yogo'lo' bene', na' cheyaše'laže'de' note'tezcho chnabcho gaclene' chio'.

13 Can' gwne': "Note'tez bene' yesenabe' gaclena' legaque', neda' naca Xanle yebeja' legaque' lo da' malen'."

14 Na' žnacxe yeson bene' yesenabe' goclen lagüen' še bi chesejni-laže'ne'? Na' žnacxe yesone' yesejni-laže'ne' še bi na' yesende' xtižen'? Na' žnacxe yesende' xtižen' še nono zoa no güe'lene' legaque' xtižen'?

15 na' žnacxe yeson bene' yesejixjue'ede' xtiža' Diosen' še Diosen' bi sele' legaque' yesejixjue'eden'? Chac can' nyoj Xtiža' Diosen' žan: "Chbechgüecho caten' za'ac bene' chesejixjue'ede' diža' güen chosozejni'ide' guac soacho binlo len Diosen'."

16 Perw gague yogo' bene' gualaž cheto' chosozenague' diža' güen che Diosen'. Chac can' gwna Isaiás ben' be' xtiža' Diosen' cani', gwne': "Xana', nono chzenagtec diža' dan' chzeneto'ne'."

17 Bia'cze cheyała'cze yesene bene' diža' güen da' chzejni'in che Criston' cont yesejni-laže'ne'.

18 Na' chnaba': žbi na' yesene bene' Israel gualaž cheton' diža' güen da' chzejni'in che Criston'? Bač gosenden'. Chac can' nyoj Xtiža' Diosen' žan: Bene' že doxen lo yežlion' ba gosende' xtižen';

ba zej xtižen' doxen.

19 Na' chnaba' da' yoble: ¿bi gosejni'i bene' Israel gualaž cheton' diža' dan' chzejni'in che Criston'? Ba gosejni'iczd'en'. Le da' Moisésen' bzoje' da' gwna Diosen' chegaque', žan:

Neda' Dios gona' güen len bene' bi zjanac bene' nación chia', na' gue'ele legaue'.

Na' gona' güen len bene' nación ca' bene' bi chesejni'i, na' ža'ale.

20 Nach Isaiásen' ben' be' xtiža' Diosen' cani' bi bžebe' gwdixjue'ede' da' nga gwna Diosen', žan:

Bene' bi besyeyiljw neda', besyeželde' neda'.

Na' bene' bi gosenab neda', blo'elagua' legaue'.

21 Na' Diosen' gože' bene' Israel gualaž cheton', gwne': "Yogo' ni'a chneyoeda' le'e cont gwzenagle chia', na' zoachahle chonle güedenag len xtižan'."

11

Bal bene' Israel yesejnilaže' Jesucriston'

1 Bi cheyala' goncho xbab Diosen' bechojlaže' nación Israel cheto' to ši'ize. Neda' naca' bene' Israel, golja' lo diaža che da' Abraham na' naca' diaža' che da' Benjamín.

2 Biŋa' yechojlaže' Diosen' neto' nacto' diaža che ben' gože' Israel, le gwleje' neto' cani'te cont nacto' nación che'. Le gon xbab can' nyoj dan' gwna Elias ben' be' xtiža' Diosen' cani', gwdagüe' xya che da' xozxta'oto' ca', gože' Diosen':

3 "Xana', bene' gualaž chia' quinga ba gosote' bene' ca' goso'e xtižon', na' ba bosyočinje' mes de yej ca' gan' cheyala' yesonxene' le'. Yetoga neda' zoa' chzenaga' chio' na' lencze neda' chese'nde' yesote'."

4 Nach Diosen' boži'e xtižen' gože'ne': "Ne' nita' gaže mil bene' ba gwleja' bene' biŋa' yosozoa xibe' yesonxene' l' gua'a lsaca' dan' nzi' Baal."

5 Na' ca'cze naquen ža na'aža, neto' bene' Israel chejnilaže'to' Criston' bi nacto' bene' žan, perw Diosen' ba gwleje' neto' cont chonxento'ne', le nži'ilaže'de' neto'.

6 Diosen' gwleje' neto' cont chonxento'ne' da' nži'ilaže'de' neto'. Bi gwleje' neto' lagüe' da' nonto' bi da' güen. Šaca' gwleje' neto' lagüe' da' nonto' bi da' güen, bi naquen con to goclen da' chon Diosen' neto' lo yela' bene' šagüe' che' cate' chbeje' neto' še ca', san naquen to goclenze.

7 Zan bene' nación Israel cheton', la'czla' chesonchgüe' da' chesacde' cheyala' yesone', bi chesyēželde' naclen' yesone' cont yesaque' bene' güen len Diosen'. Perw Diosen' gwleje' balto' cont šejnilaže'to'ne' na' none' neto' ca to bene' güen. Na' bene' yezica'chle zjanaque' güedenag len Diosen'.

8 Chac chegaque' can' nyoj Xtiža' Diosen' žan: "Diosen' bene' cont zjanaque' ca bene' bicze nte. Na' ža na'aža zjanaque' ca to bene' bi chle'e len yejlagüen', na' ca to bene' bi chene len nagenen'."

9 Na' da' Davin' gwne' chegaque':

Yogo' da' de da' chesyebede' yesaquen ca to da' yeben legaue',

na' yesaquen ca to ga šjaselažoe' yesaque' castigw.

10 Yesechol' yichjlažda'ogaquen', na' yedote yesezaca'zi'e can' chzaca'zi' ben' nlegw cože' no'e yoa' zi'i.

Diosen' gwleje' bal bene' bi zjanac bene' Israel cont chesejnilaže'ne'

11 Nezczecho zan bene' Israel gualaž cheton' bi chesejnilaže' Criston'. Na' chnaba', ¿zjanaque' ca bene' gwyo'o yaja' ni'e? ¿še zjanaque' ca bene' gwbiže'

na' gote'? Zjanaque' ca to bene' con gwyo'o yeja' ni'e na'ze. Da' bi chesejle'e che Criston' de latje cont le'e bi nacle bene' Israel chzenagle xtižen'. Da'nan' legaque' gwžin ža yesezelaže' gon Diosen' güen len legaque' ca ba chone' len le'e bi nacle bene' Israel.

12 Da' yoble chnia', da' bi chesejnilaže' bene' gualaž četo' ca' Criston', chac ca' cont yezica'chle bene' že' yežlion' yesenite' mba con še yesejnilaže'ne'. Na' da' bchoj nación Israel četon' lo na' Diosen', de latje cont le'e bi nacle bene' Israel soale mba lo na' Diosen'. Perw gwžin ža cate' yogo'te bene' gualaž četo' yesenite' yesejnilaže' Diosen', na' cana'ch gac mba juisyw.

13 Na' le'e bi nacle bene' Israel, che'nda' nezele Diosen' gwsele' neda' cont güe'lena' le'e xtižen' le'e bi nacle bene' Israel. Na' chona' con ga zelao čzaque'da' cont bene' yosozenague' che Diosen'.

14 Le chačlaža' gona' cont bene' gualaž chia' ca' yesezelaže' gon Diosen' güen len legaque' can' chone' len le'e chejnilaže'lene', na' gata' yela' mban čegaque' toli tocaņe.

15 Diosen' ba bnite' zan bene' Israel gualaž četon' ca'ale to tiemp cont le'e bi nacle bene' Israel gwbiga'le len le'. Na' gwžin ža cate' gon Diosen' yesyebiga' yezan bene' gualaž četo' len le'. Na' leca mba gac cate' yesyebigue' len Diosen'.

16 De costumbr che neto' nacto' bene' Israel cate' chonto' yetextil, na' chnežjwto' Diosen' to blol dao' cuazin' cont chlo'eto'ne' doxenen naquen che'. Na' lecze še načo to loe yaguen' naquen che Diosen', zejen lecze zoze' yaguen' naquen che'. Na' da' xozxta'oto' ca' ben' gosejnilaže' Diosen' cani' zjazaca'lebbe' ca blol dao' cuazina' na' ca' loe yaguen'.

17 Nación Israel četon' zaca'leben ca zoze' yag da' ba nčog xan yaga' to lao yag olivo güen na' ba bniten' šla'ale. Na' le'e bi nacle bene' Israel zaca'leble ca zoze' yag olivo da' ze do yiçe', da' ba gwčogue' lagüen na' ba bozoen' yag güen cont beyaquen toze. Nach guac načo loe yag güenna' ba noxen' le'e na' niže' čenna' chac banleņe.

18 Bi gaquele naquechle bene' güen ca bene' Israel gualaž četo' da' chac chele ca'. Gague le'e chnežjwle yela' mban che loe yaguen', san loe yaguen' čonen le'e yela' mban.

19 Le'e bi nacle bene' Israel, šeca che'lja lježle: "Diosen' bene' bene' Israel ca yag da' gwčogue' xozen' cont goc bozoe' chio' gualaz legaque'."

20 Da' li can' žalen'. Perw da' bi gosejnilaže' Criston', Diosen' bene' len legaque' ca zoze' yag da' ba gwčog xan yaguen' len, na' ba bozoe' le'e lagüe da' chejnilaže'le Criston'. Da'nan' bi ga'laže'le, san le gwsaca' cont soačhačle šejnilaže'lene'.

21 Da' bi gosejnilaže' Criston', Diosen' bene' cont gwdi gwxaca' bene' Israel gualaž četo' ca' bene' zjazaca'lebe' ca zoze' yag güenna', na' lecze ca' gone' saca'zi'le še bi soačhačle šejnilaže'lene'.

22 Le gonšč xbab can' nži'ilaže' Diosen' chio' chejnilaže'chone' na' can' chone' cont saca'zi' bene' ca' bi chesejnilaže'ne'. Nachen' cheyała' soačhačle šejnilaže'lene' cont bi gone' saca'zi'le can' ba bene' len bene' Israel gualaž četon' bi gosejnilaže'ne'.

23 Na' Diosen' yebede' si' lo ne'e bene' Israel gualaž četo' ca' cate' yesejnilaže'ne', le nape' yela' guac cont yozoe' legaque' binlo len le', nach yesaque' ca zoze' yag da' bezyone' toze len yag čen da' yoble.

24 Le'e nacle ca zoze' yag olivo da' ze yiçe', Diosen' gwčogue' le'e na' bozoe' le'e lo zoze' yag güen la'cžla' bi nacle dogualje xozen'. Na' naquechxe

yebede' yozoe' bene' Israel gualaž cheto' ca' le'e yaguen' da' yoble bene' ca' zjazaca'lebe' ca dogualje xoze' yaguen'.

Bene' zan bene' Israel yesyeyaque' lo na' Diosen'

²⁵ Bene' migw, che'nda' šejni'ile da' nga da' nono na' neze cont bi ga'laže'le gaquele zaca'chle clel ca bene' Israel gualaž cheto' ca'. Diosen' be'e latje zane' zjanaque' bene' güedenag len xtižen' šlac yesejnilaže' bene' bi zjanaque' bene' Israel ben' ba bsi'e xneze yesejnilaže'ne'.

²⁶ Nach gwžin ža yogo' bene' Israel gualaž cheto' ca' yesenita' yesaque' lo na' Diosen'. Gac can' nyoj Xtiža' Diosen' žan:

To bene' choj lo ciuda Sión yebeje' le'e lo da' mal da' chonle,
le'e za'le lo diaža che da' Jacob.

²⁷ Na' cate' žin ža yeca'a xtoła'len',
cana'ch ba goc can' ba gwnia' gona'.

²⁸ Dan' bi chesejle' zan bene' Israel gualaž cheton' diža' güen che Diosen', da'nan' ba bzoe' šla'ale nación cheton' na' ba gwleje' le'e bi nacle bene' Israel cont chejle'le che'. Perw na' Diosen' ne' chacde' bene' ca', le gwleje' da' xoxxta'oto' ca' cont yesaque' nación che'.

²⁹ Na' Diosen' bi chetiñjde' che bene' mbeje' yesaque' nación che', neca chetiñjde' che goclen da' chone' len benačhen'.

³⁰ Cana'te le'e bi bzenagle che Diosen' na' da' bi gosaclaže' bene' Israel gualaž cheton' yosozenague' che', nach beyaše'laže' Diosen' le'e na' goclene' le'e cont chzenagle che'.

³¹ Na' da' bi chosozenag bene' Israel gualaž cheto' ca' che Diosen' na'a, chac ca' cont žin ža gwlo'e Diosen' ne' cheyaše'laže'de' legaque' can' cheyaše'laže'de' le'e.

³² Diosen' ba gwchoglagüe' che yogo' benačhen' de xtoła'gaque' da' bi chosozenague' che', na' ba bene' ca' cont lecze gwlo'ede' cheyaše'laže'de' yogo'cze'.

³³ Leca bene' sina' Diosen'. Nezczede' yogo'loł. Gwbat šejni'icho da' nžie' bia' gac o da' nžie' bia' gone' lo yela' sina' che'.

³⁴ Nyoj Xtižen' žan: "Nono neze yogo' xbab che Xancho Diosen'; nono nape yela' sina' cont gwzejni'ide' le' can' cheyała' gonen'.

³⁵ Na' nono cheyała' gon xbab yebi'i Diosen' güen len le' še bi da' ba be'ene'."

³⁶ Yogo'loł da' de naquen che Dios. Bene' benačh, beyixe' na' bica'chle da' zjade. Na' lagüe yogo'loł da' bene' zoe' blao. Len' gacxene' toli tocaņe. Can' gacšca.

12

Cheyała' gon cuincho lo na' Diosen'

¹ Bene' migw, Diosen' ba cheyaše'laže'de' chio'. Da'nan' chneyoeda' le'e le gon doxen cuinle lo na' Diosen' na'a mbanle. Le gonen do yichj do laže'le. Na' le gac bene' laždao' xilaže' le can' chazlaže' gonxenchone'.

² Bi goncho ca cheson bene' bi zjanombia' Diosen'. San cheyała' nabecho Diosen' gwše'e xbab chechon' cont yebecho goncho dan' chazlažen'. Na' chaclaže' goncho da' güen, da' chebede' na' yogo' da' zej to liča.

³ Diosen' nži'ilaže'de' neda' na' ba gwsele' neda' cont chyixjue'eda' xtižen'. Da'nan' chnia' bi cheyała' gonxen cuincho, san cheyała' gacbe'echo Diosen' ba goclene' chio' cont chejnilaže'chone' na' non'e' grasyw checho cont goncho bi da' goncho.

4 Can' nac cuerp chechon', zan cuen naquen na' gague toze žin da' cheson to to cuenen.

5 Lecze can' naquen len chio', bene' zan naccho chejnilaže'cho Criston' na' yogo' chion' naccho txen len le' na' len lježcho zaca'lebcho ca toze cuerp.

6 Diosen' none' grasyw chechon' gwde gwdele da' gon to tocho. Še ba none' checho chixjue'echo bi da' gože' chio', nach cheyała' chixjue'echon na' šejle'cho gaclene' chio' gonchon.

7 Na' še Diosen' ba none' checho gaclencho bene', cheyała' gaclencho legaque'. Na' še ba none' checho gwsed gwlo'echo bene', cheyała' gwsed gwlo'echone'.

8 Na' še Diosen' ba none' checho neyoecho bene' cont yesone' da' güen, cheyała' neyoechone'. Na' še ba none' checho gwnežjwcho da' chyažje bene', cheyała' gwnežjwchon do yichj do laže'cho. Na' še ba none' checho gaccho bene' blao na' güia na' ljež chio' chonxenchone', cheyała' cue' yichjcho güia na'cho legaque'. Na' še ba none' checho yeyaše'cho no bene' yaše', no bene' gole o no bene' güe', cheyała' yebecho gaclenchone'.

Da' cheyała' gon chio' chejnilaže'cho Jesucriston'

9 Cheyała' gague ljež benačcho do yichj do laže'cho, na' cheyała' gue'echo da' malen' na' soaczcho goncho da' nac da' güen.

10 Ca chaque biše' goljcho, ca'cze cheyała' gaguecho note'teze bene' lježcho na' gonchone' bene' xench ca cuincho.

11 Bi gaccho bene' xagüed, san goncho da' non Diosen' chio' goncho do yichj do laže'cho, le chonxencho Xancho Jesucriston' len dan' chonchon'.

12 Cheyała' yebecho da' nezecho šjayzoacho len Diosen'. Cheyała' gwyo gwchejcho cate' chyi chzaca'cho. Na' lecz cheyała' yol güižcho Diosen' zan ni'a yogo' ža.

13 Cheyała' gaclencho bene' lježcho bene' chesejnilaže' Diosen' še bi da' cheseyažjde' na' gwlebhchone' ližcho še zjanaque' bene' zito'.

14 Cheyała' nabcho lao Diosen' gac güen che bene' chosochi chososaca' chio'. Nabcho gac da' güen chegaque', gague da' mal.

15 Cheyała' yebecho txen len bene' chesybe na' cuežcho txen len bene' chesebež.

16 Yogo'cho cheyała' goncho toze xbab. Bi cheyała' ga'laže'cho, san yol güižcho bene' yaše' bene' bibi chac na' bi gon cuincho bene' sina'.

17 Še bi da' mal chone bene' chio', bi nacho lecze da' mal yebi'icho len le'. Cheyała' cue' yichjcho goncho da' güen cont yesena bene' le naczten güen dan' chonchon'.

18 Cheyała' goncho bi da' gac goncho cont soacho binlo len yogo'lol bene'.

19 Chacda' le'e, nachen' chnia' cheyała' gwdecho to šla'ale bite'teze da' chesone bene' chio'. Diosen' gwyoecze' nac gone' len bene' chosochi chososaca' chio'. Xtizen' nyojen žan: "Xancho Diosen' že': Neda' yoži'a che da' mal da' chesone', na' neda' gwnežjua'ne' castigw."

20 Na' lecze žan: "Še chbil chdon bene' chgue'ede' chio', cheyała' güe'chone' da' ye'ej gagüe'; le še goncho güen len le', guacbe'eljede' chone' da' mal."

21 Bi güe'cho latje nabia' da' malen' chio' na' yebi'icho mal len bene' chonde' chio' mal, san yebi'icho güen len legaque' cont yesyetinjde' che da' malen' chesonen'.

13

¹ To tocho cheyała gwzenagcho che justis bene' chesenabia', le Diosen' bnite' legaque' chesenabi'e.

² Še bi chzenagcho che bene' chesenabia', bi choncho da' nžia bia' Diosen' goncho, na' lecze chyiljwze xtoła'cho na' gaccho castigw da' bi chzenagcho chegaquen'.

³ Bi cheyała' žebcho bene' ca' chesenabi'e še zoacho choncho da' güen, san še zoacho choncho da' xinj, nachen' žebcho yesone' chio' castigw. Na' cont bi žebcho legaque', con soacho goncho da' güen da' yesyebede'.

⁴ Justis ca' chesone' xšin Dios cont soacho güen. Perw še choncho da' xinj, cheyała' žebcho legaque', le zjanape' yela' chnabia' cont yesone' castigw che note'teze bene' cheson da' mal, le Diosen' none' lo na'gaquen' yosonežjue' castigw che bene' cheson da' mal.

⁵ Da'nan' cheyała' gwzenagcho chegaque' cont bi si'cho castigw na' lecze cont gacbe'echo lo' yichjlažda'ochon' choncho can' cheyała' goncho.

⁶ Lecze da'nan' cheyała' chixjwcho no che bien na' bichle da' cheyała' chixjwcho, cont bene' ca' chesenabia' guac yesone' da' yo'o lo ne'e yesone', na' cheyała' gwzenagcho chegaque', le Diosen' ba bzoe' legaque' cont chesone' dan' cheyała' yesone'.

⁷ Chixjwcho še bi da' čala'cho che bene'. Še čala'cho che bien, chixjwchon. Še čala'cho che impuestw, chixjwchon. Na' gapcho bala'an' bene' cheyała' dap bala'an'. Na' gonxencho bene' cheyała' gaxcen.

⁸ Cheyała' chixjwcho doxen bi da' čala'cho che bene', na' lecze cheyała' gague yogo' ljež benačcho, le še chaquecho legaque', ba choncho da' non ley che Diosen' mandaw goncho.

⁹ Leyna' žan: "Bi gata'lenle no'ole bi nac no'ol chele o bene' byo bi nac bene' chele, bi gotle bene', bi cuanle, bi güe'le diža' güenlaže' che bene' lježle, bi selaže'le bite'teze da' de che bene'." Na' dech da' ža leyna'. Na' yogo'cze da' nžia bia' leyna' goncho, bačh chonchon še chzenagcho che dan' žanna': "Le gague ljež benačle ca chaque cuinle."

¹⁰ Še chaque lježcho, bibi da' mal gonechone'. Da'nan' choncho doxen can' nžia bia' leyna' še ba chaque lježcho.

¹¹ Caten' gwzolaacho chejnilaže'cho Criston' gwnezecho gwžin ža yide' da' yoble. Na' na'a ba za' bagwze yide' da' yoble. Da'nan' bich cheyała' gaccho ca bene' čhtas, bene' bi chon xbab.

¹² Yežlio nga zaca'leben ca ga nac čol, le že'chgua bene' cheson da' xinj; san gan' zoa Diosen' naquen ca ga yo'o be'ni'. Nach cheyała' cuejyichjcho bich goncho da' xinj na' goncho con da' chazlaže' Diosen', le ba zoa yide Criston' yedyexi'e chio'.

¹³ Cheyała' goncho da' güen, le ba yo'o be'ni' che Criston' lo' yichjlažda'ochon'. Bi cheyała' goncho txen lo' ĩnin' ga chbe' žaš, bi cheyała' gaccho borrašw, bi cheyała' gata'lencho no'ole bi nac no'ol checho o bene' byo bi nac bene' checho o goncho bichle da' nac da' yela' zto', na' bi cheyała' tilen lježcho o gue'echo bene'.

¹⁴ Cheyała' gon cuincho lo' na' Xancho Jesucriston' na' cue' yichjcho goncho da' chazlaže' cont da' malen' da' yo'o lo' yichjlažda'ochon' bi nabian' chio'.

14

Toz Diosen' nezde' še bene' lježcho nape' doła'

¹ Še zoa to beñe' ba chejnilaže' Criston' na' biña' šejni'ide' nac cheyała' gone', con zoe' chacžejaže', le gwlebe' gaque' txen len le'e, perw bi gacyožlen'ne' che xbab chen'.

² Nita' beñe' chesejnilaže' Diosen' chesacde' bi zjanape' doła' da' chesagüe' bite'teze yela' guagw, na' lecz nita' beñe' yoble biña' yesejni'ide' bite'teze da' ye'ej gagwcho naquen güen lao Diosen'. Da'nan' chesacde' bi cheyała' yesagüe' bela' na' chesagüe' yix'e' cuanze.

³ Ben' chagw bite'teze yela' guagw bi cheyała' gue'ede' ben' bi chagüe' bela', na' ben' bi chagw bela' bi cheyała' ne' che ben' chagüe' bela', le Diosen' ba none' chopte' ca xi'ine'.

⁴ ĆNoxe nac chio' gwlaže' checho še nac chon ben' ba gwlej Diosen' ca xi'ine'? Diosen' naque' Xan xi'ine' ca', na' len' ne' che to tocho še choncho da' güen o še choncho da' xinj. Na' lecze len' gone' cont soacho goncho da' güen.

⁵ Nita' beñe' cheson xbab nchoj to ža xen da' zaca'ch len Diosen' ca yezica'chle ža ca', na' lecze nita' beñe' chesacde' toz ca zaca' yogo' ža ca'. To tocho cheyała' soacho do yichj do laže'cho goncho da' chejni'icho cheyała' goncho.

⁶ Beñe' cheson xbab de ža da' zaca'ch ca ža ca' yezica'chle, chesebeje' žan' cont chesonxene' Dios. Na' beñe' chesacde' toz can' zaca' ža ca', lecze chesonxene' Diosen' chesone' xbaben' ca'. Na' ben' chesagw bite'tez yela' guagw, chesonxene' Xancho Diosen' cate' chesagüen', le cheso'e yela' choxclen che Diosen' che dan' chese'ej chesagüen'. Na' ben' bi chesagw bela', chosožone' yesagüen' da' chesonxene' Diosen' na' lecze cheso'e yela' choxclen che'.

⁷ Ne tocho bi yo'o lo na'cho gwžiacho bia' can' soa cuzcho šlaque mbancho, na' neca yo'o lo na'cho gwžiacho bia' nac gatcho.

⁸ Šlac mbancho zoacho cont goncho da' chaclaže' Xancho Jesucriston', na' še gatcho lecze cate' chaclaže' len' gatcho. Can' naquen, mbancho o gatcho, yo'ocho lo na' Xancho'.

⁹ Cuiñ Xancho Criston' gote' na' beyas bebane' ladjo beñe' guat ca' cont naque' Xan yogo' beñe' chesejnilaže'ne' beñe' zjamban na' beñe' ba gosat.

¹⁰ Bi cheyała' nacho che beñe' lježcho zjanape' doła' še bi da' chesone', na' bi cheyała' gue'e lježcho. Yogo'czecho techo lao Criston' cont le' chogbi'en checho še de xtoła'cho o še bibi de.

¹¹ Nyojcze Xtiza' Diosen' žan:

Xancho Diosen' že':

Da' li naca' Dios, zoa' mbana',
na' yogo' beñe' yedesezoa xibgaque' laguan',
na' yogüe' yesene' toz neda' zaca' yesonxen benach.

¹² Can' naquen, yogo'czecho yodecho cuent lao Diosen' che bite'teze da' ba bencho šlac mbancho.

Bi goncho da' gwžigan' beñe' lježcho gone' da' mal

¹³ Da'nan' chnia', bi cheyała' necho che beñe' lježcho neče bi da' chesone'. Da' cheyała' yechoglaže'cho goncho, cuejyichjcho bi da' choncho še len chžigan' note'teze beñe' lježcho gone' da' xinj o še len chonen ca šjabix šjalažoe'.

¹⁴ Xancho Jesucriston' bzejni'ide' neda' cont nezda' bi napcho doła' še gagwcho bite'teze yela' guagw. Perw še beñe' chone' xbab gape' doła' lagüe da' gagüe' to da' gagüe', naquen mal gagüen' še ca'.

¹⁵ Še beñe' lježcho chaque' tole lagüe da' chagwcho to da' chone' xbab naquen mal len Diosen', bi chaquechone' še chagwtezchon. Criston' bnežjw

cuine' gote' neče bene' lježchon', na' chio' bi cheyała' gagwcho bi da' gonen cont gac choplaže' bene' lježchon' cuejyichje' Criston' na' cuiaye'e.

¹⁶ Še choncho bi da' chaquecho naquen güen, perw na' bene' lježchon' chesacde' naquen mal, bi gonchon cont bi yesene' choncho da' xinj.

¹⁷ Še ba choe'cho latje chnabia' Diosen' chio' len xbab chechon', dan' che'ej chagwchon' bi naquen da' žialao xen len chio'. Da' nac da' žialao xen, goncho da' zej to licha, soacho binlo len Dios na' len bene' lježcho, na' soacho mbalaz da' yo'o Spiritw che Diosen' lo' lažda'ochon'.

¹⁸ Še choncho da' zej to licha, na' zoacho binlo len Diosen' na' len lježcho, na' zoacho mbalaz da' yo'o Spiriton' lo' lažda'ochon', da' li chzenagcho che Criston'. Nachen' chebe Diosen' can' chonchon', na' lecze yezica'chle bene' chesene' choncho güen.

¹⁹ Da'nan' cheyała' yeyiljwlaže'cho can' goncho soacho binlo tocho yetocho na' can' gaclen bene' lježcho ca' cont yesenita'čhače' yesejnilaže' Criston'.

²⁰ Diosen' ba bnitlagüe' xtola' bene' lježcho na' bi cheyała' gagwcho da' gonen gac choplaže' no bene' lježcho na' gone' da' chacde' naquen mal. Nežda' de latje gagwcho bite'teze yela' guagw, perw naquen mal gagwchon še len chonen choplaže' bene' lježcho.

²¹ Güenczen bi gagwcho bela' neca ye'ejcho vino na' neca goncho bichle da' goncho še len chonen cont bene' lježcho chacchoplaže' o gone' da' xinj o cuejyichje' bich šejnilaže' Criston'.

²² Še nezecho zoacho binlo len Diosen' da' chejnilaže'chone' na' chaquecho bi napcho doła' len bica' da' choncho, chopzcho len Diosen' nezecho. Mbalazen' zoacho še nezecho lo' yichjlažda'ochon' bi napcho doła' len bica' da' choncho.

²³ Na' de xtola'cho še chagwcho to yela' guagw na' chacžejlaže'cho chaquecho bilja cheyała' gagwchon, le bite'teze da' choncho še chaquecho naquen mal gonchon, napcho doła' chonchon še ca'.

15

Cheyała' cue'yichjcho bene' lježcho

¹ Bałcho ba zoachachcho chejnilaže'cho Criston' na' nezecho de latje ye'ej gagwcho bite'teze. Perw cheyała' gapcho yela' chxenlaže' len bene' bina' yesejni'išagüe'de', na' bi goncho con da' žan checho.

² To tocho cheyała' goncho bi da' güen da' chazlaže' bene' lježcho ca' goncho, cont gaclenen legaque' yesejnilaže'che' Diosen'.

³ Goncho ca', le ne Criston' bi bene' con da' gwnazen che', san goc che' can' nyoj Xtiža' Diosen', žan gože' Xe' Diosen': "Bene' besegue'ede' le' na' gosene' diža' bya' chio', lencze chia' neda' gosene'."

⁴ Na' Xtiža' Diosen' da' bosozoj bene' cani' chzejni'in chio' cont gwyo gwčhejcho šejnilaže'cho Diosen' cate' chzaca'zi'cho. Na' še goncho xbab can' žan'na', na' gaclenchen chio' cont soacho lez gwžin ža gon Diosen' güen len chio'.

⁵ Diosen' chone' chio' yela' chxenlaže' cont chyo chčhejcho cate' chzaca'zi'cho. Na' chnablaža' lecze gone' gac yichjlažda'ole toze tole yetole, con can' chazlaže' Cristo Jesúsen'.

⁶ Na' gone' ca' cont toze can' nale gonxenle Dios ben' nac Xa Xancho Jesucriston'.

Diosen' chaclaže' bene' bi zjanac bene' Israelyesonxene' le'

⁷ Da'nan' cheyała' le'e to to bene' lježcho binlo ca Criston' chle'ede' to to chio' binlo, chio' chejnilaže' chone'. Goncho ca' cont gacxen Diosen'.

⁸ Can' goc len Cristo Jesúsén', bzexjw yichje' ben cuine' ca to bene' güen žin cont goclene' neto' bene' Israel. Blo'ede' diža' li be' Diosen' cate' gože' da' xoxxta'oto' ca' gone' güen len legaque'.

⁹ Na' lecze bid Criston' cont le'e bi nacle bene' Israel lecze gonxenle Diosen' da' ba beyaše'laže'de' le'e. Chac ca nyoj Xtiža' Diosen' dan' žan: Da'nan' gua' yela' choxcen chio' gan' že bene' bi zjanac bene' Israel, gola' gonxena' le'.

¹⁰ Na' ga yoble žan:

Le'e bi nacle bene' Israel, le yebe txen len neto' bene' gwlej Diosen' nacto' nación che'.

¹¹ Na' lecze žan:

Yogo' le'e bi nacle bene' Israel, le gonxen Xancho Diosen'.

Yogo'lolle le güe' diža' che yela' gwnabia' che'.

¹² Na' da' Isaías ben' be' xtiža' Diosen' cani' bzoje' da' nga žan:

To bene' gualaž yide', bene' galje' lo diaža che da' Isai.

Le' nabi'e bene' že' to to yež na' to to nación,

na' bene' ca' bi zjanac bene' Israel yesebeze' gaclene' legaque'.

¹³ Diosen' chone' cont chebecho dan' nezecho šjayzoacho len le'. Na' chnaba' gonšque' cont soale mbalaz juisyw na' soa cuzle binlo len xbab da' yo'o yichjlažda'olen' da' zoale chejnilaže'le Criston'. Gonšque' ca' cont Spiritw che Diosen' gaclenen le'e soachachle yebele da' nezele šjayzoale len le'.

¹⁴ Bene' migw, nezda' ba nacle bene' šagüe' bene' chon da' güen, na' nezda' chejni'ichgüele na' chac chneyoe lježle.

¹⁵ Pero le'e cart nga ba beyaxjda' gwdila' le'e cont gonchle xbab, le Diosen' beži'ilaže'de' neda' gwleje' neda'.

¹⁶ Gwleje' neda' cont chyixjue'eda' xtižen' len bene' bi zjanac bene' Israel. Na' Diosen' yebede' da' ba goclena' legaque' cont bale' gosejle'e xtižen' na' gosaque' lo ne'e cate' Spiritw chen' benen lažda'ogaquen' xilaže'.

¹⁷ Chbeda' chona' xšin Diosen' da' ba goclén Cristo Jesúsén' neda' chona'.

¹⁸ Bi cheyaxjda' gua' diža' che bi da' ba ben bene' yoble, san choa' diža' che da' ba ben Criston', le chaclene' neda' choa' xtižen' na' bichle da' chona' cont zan bene' ca' bi zjanac bene' Israel chosozenague' che'.

¹⁹ Spiritw che Diosen' goclénen neda' cont bena' yela' guac na' bichle da' besyebane bene' gate'teze gwya'a be'lena' legaque' xtiža' Diosen', gwzolagua' Jerusalén na' bžintia' gan' nzi' Ilirico. Na' ba gwdixjue'eda' xtižen' doxen gan' gwseljle' neda'.

²⁰ Na' ba bena' byen ba bia' diža' güen da' chzejni'in che Criston' gan' nono na' šejnilaže'ne', le bi chaclaža' tia' gwłana' xlatje bene' ba chosozejni'ide' xtiža' Diosen'.

²¹ Da'nan' chac can' nyoj Xtiža' Diosen' žan:

Bene' ca' biña' yesende' xtižen' yesombi'ene', na' bene' ca' biña' yesenezde' che' yesejni'ide' che'.

Pablon' šejje' Roma

²² Da' chzejni'ida' bene' ga yoble xtiža' Criston', da'nan' bi goc yida' gan' zoalen' la'czla' zan ni'a ba goclaza' yida'.

²³ Cana'te zelaža' yedena'a le'e, perw na'ach ba beyož bena' da' gwlo'o Diosen' lo na' gona' do nga.

²⁴ Nach cate' ša'a España cana' chacda' tia' yedena'a le'e. Na' mbalaz soa' yeyož le'eda' le'e na' gaclenle neda' cate' ša'a Españan'.

²⁵ Na'a ša'a Jerusalén šjasana' mechw da' gaclenen bene' lježcho ca' že' na' bene' ca' ba gwlej Diosen' chesejnilaže'ne'.

²⁶ Le bene' lježchon' že' yež ca' zjachi' distritw Macedonia na' Acayan' bosotobe' mechw da' gaclenen bene' lježcho ca' chesejnilaže' Diosen' Jerusalén ben' zjanac bene' yaše'.

²⁷ Bene' ca' bosotoben' besyebede' bosonežjue' mechon', na' naquen to goclen da' cheyala' yesone' len bene' Israel gualaž čheto' ca', le la'czla' legaque' bi zjanaque' bene' Israel, ba zjanone' čhegaque' yogo' da' güen da' ba bzejni'i Diosen' neto' bene' Israel, na' da'nan' cheyala'cze yesaclene' bene' gualaž čheto' ca' len da' cheseyazjde'.

²⁸ Cate' bačh beyož bena' lo na' bene' Jerusalén ca' mechon' bdooben', cana'ch sa'a ša'a Españan' na' tia' na'a le'e.

²⁹ Na' nezda' Criston' gaclene' neda' la'a gan' zoalen' cont güe'lena' le'e diža' güen che' da' gaclenen yichjlažda'olen' na' soachguacho mba.

³⁰ Bene' migw, nezda' chaquele Xancho Jesucriston' can' chacda'ne' neda', na' Spiritw čhe Diosen' chonen cont chaque lježcho tocho yetocho. Da'nan', bene' migw, chnaba' gacle neda' txen yoł güižcho Diosen' cont gaclene' neda'.

³¹ Nabechone' bi gaca' lo na' bene' gualaž čheto' ca' bene' bi chesejnilaže' Criston' Judean', na' lecze nabechone' cont bene' lježcho ca' že' Jerusalén bene' yo'o lo na' Diosen' yesazlaže' ca dan' güe'gaca'ne'.

³² Nach še Diosen' gone' latje, mbalaz yedena'a le'e na' yeyaclaža' soa' na' len le'e.

³³ Dios ben' chon chzoa chbezcho binlo len xbab da' yo'o lo' yichjlažda'ochon' gaclene' yogo'le len xbab čhelen'. Ca'ščacze gac.

16

Pablon' chguape' tiox bal bene' že' Roma

¹ Chneyoeda' le'e le gon txen len bene' zanchó Febe cate' le'e gan' zoalen'. Ba benchgüe' xšin Diosen' len bene' ca' chesedop chesežag chesonxene' Jesucriston' lo yež Cencrea.

² Le gwlebe' ca cheyala' gonle len ljež chio' yo'ochó lo na' Diosen'. Na' le gaclene' še bi da' chyažjde', le len' ba goclene' bene' zan na' lecze ba goclene' neda'.

³ Le gwguap tiox Priscila len bene' čhe' Aquila. Legaque' ba gosone' žin čhe Cristo Jesusen' txen len neda'.

⁴ Besezanlaže' cuingaque' yesate' cont bososle' neda' lo na' yela' goten'. Choa' yela' choxclen čhegaque' can' gosonen'. Na' lecze yogo' bene' ca' bi zjanac bene' Israel bene' chesedop chesežag chesonxene' Jesucriston' cheso'e yela' choxclen čhegaque'.

⁵ Le gwguap tiox bene' ca' chesedop chesežag liž Priscilan' na' Aquilan' chesonxene' Jesucriston'. Na' le gwguap tiox bene' xmigua' Epeneto. Chacda'ne', le naque' bene' nechw bene' Acaya gwyejnilaže' Criston'.

⁶ Nach le gwguap tiox María no'olen' ba benchgua xšin Diosen' gan' zoalen'.

⁷ Na' le gwguap tiox bene' gualaž čheto' Andrónico len Junias. Legaque' byobch gosejnilaže' Criston' clél ca neda' na' txen gota'to' ližya. Lecz ca' postlw ca' yezica'chle cheso'e diža' güen čhegaque'.

⁸ Le gwguap tiox beṇe' xmigua' Amplias, le chacda'ne' da' ba chejnilaže' Xancho Criston'.

⁹ Na' le gwguap tiox Urbano ben' chon xšin Criston' txen len chio', na' lece Estaquis, le chacda'ne'.

¹⁰ Lecze le gwguap tiox xmigua' Apeles. Da' zan ba bene' blo'e chejnilaže' Criston' do yichj do laže'. Na' le gwguap tiox beṇe' ca' že' liž Aristóbulo.

¹¹ Na' le gwguap tiox beṇe' gualaž chia' Herodión na' lece beṇe' ca' že' liž Narciso, con noe' chesejnilaže' Criston'.

¹² Le gwguap tiox no'ole xmigwcho Trifena len Trifosa, no'ol ca' cheson xšin Xancho Jesucriston'. Na' lece le gwguap tiox beṇe' zanchó Pérsida. Chaquechone' da' ba benchgüe' xšin Xancho'.

¹³ Na' le gwguap tiox Rufo. Naque' beṇe' blao len chio' chejnilaže'cho Xancho Jesucriston'. Na' lece le gwguap tiox xṇe'ena', le ba none' neda' ca' xi'ine'.

¹⁴ Le gwguap tiox Asíncrito, Flegonte, Hermas, Patrobas na' Hermes len bene' lježcho zjanita' len legaue'.

¹⁵ Na' le gwguap tiox Filólogo na' Julia na' len Nereo na' beṇe' zanen', na' Olimpás na' yogo' beṇe' lježcho nita' len legaue'.

¹⁶ Na' cate' chežagle txen le gwnopa' na' lježle cate' chguap lježle tiox cont nacbia' chaque lježle. Na' beṇe' ca' chesedop chesežag chesonxene' Criston' yogo'te yež gan' ba gwy'a chosoguape' le'e tiox.

¹⁷ Beṇe' migw, chṇeyoeda' le'e le gwsaca' cont bi gwzenagle che beṇe' zjanac bene' güetil, beṇe' chesaclaže' gonle' da' xinj, le bi chesone' txen len dan' ba bsedle che Diosen'.

¹⁸ Bi chosozenague' che Xancho Jesucriston' san chosozenague' che da' mal da' yo'lo lo yichjlažda'ogaquen' na' chesone' con can' žanna'. Na' cheso'e diža' xdan chosopede' beṇe' chesejle'daze cont chesežoayague' legaue'.

¹⁹ Yogo'ze beṇe' zjanezde' chzenagle che beṇe' chosozejni'ide' le'e, na' danan' chbeda'. Perw chaclaža' gacle beṇe' sina' cont gwzenagle che da' nac da' güen, gague gwzenagle che da' nac da' mal.

²⁰ Nach Dios ben' chon cont chzoa chbezcho binlo lece yob gone' cont Satanásen' dan' chnabia' da' xigüe' ca' bi soen ṇabi'an chio'. Na' Xancho Jesucriston' soašque' gaclenšcacze' le'e.

²¹ Timoteo ben' chon len neda' xšin Criston' nga chguape' le'e tiox, na' lece ca' cheson beṇe' gualaž cheto' Lucio na' Jasón na' Sosípater.

²² Neda' Tercio chzoja' cart nga con can' ža Pablon', na' lece chguapa' le'e tiox, le naccho txen chejnilaže'cho Xancho'.

²³ Lecze Gayo chguape' le'e tiox. Neda' Pablo zoa' liže' na' lece liže' nga chesežag beṇe' ca' chesonxen Criston'. Na' lece Erasto ben' nac lo ne'e mechw che ciudan' chguape' le'e tiox na' len beṇe' biše' Cuarto.

²⁴ Soašca Xancho Jesucriston' gaclenšque' yogo'le. Na' ca'šcacze gac.

Chonxene' Diosen'

²⁵ Le gonxench Diosen'. Len' nape' yela' guac cont gaclene' le'e soachachle šejnilaže'lene' can' ža diža' güen da' chyixjue'eda' chzejni'ida' beṇe' che Jesucriston'. Na' chzejni'ida' xtiža' Diosen' da' nono ṇa' neze cate' za' xete yežlion',

²⁶ perw na'a Diosen' ba bzejni'ide' chio' bi zejen da' ca' none' mandaw bosozoj beṇe' ca' bosozoj Xtižen' cani'. Na' Dios ben' zoa toli tocaṇe chaclaže' šej diža' chen' yogo' yež cont yogo' chio' beṇač šejnilaže'cho Jesucriston' na' gwzenagcho che'.

²⁷ Toze Diosen' zaque' gonxen chio' benach, na' tozen' napchgüe' yela' sina'. Na' da' gwsele' Xancho Jesucriston' chaclene' chio', da'nan' chac chonxenchone' toli. Ca'šcacle gac.

CART NECHW DAN' BZOJ POSTLW SAN PABLO CHE BEÑE' CA' ŽE' CORINTO

Pablon' chzoje' beñe' chesedop chesežague' chesonxene' Jesucriston' Corinto

¹ Neda' Pablo chzoja' cart nga. Diosen' gwleje' neda' par naca' postlw che Jesucriston', le can' gwnalaže'. Na' chguapa' le'e tiox txen len beñe' migw checho Sóstenes ben' lecze chejnilaže' Jesucriston'.

² Chzoja' cart nga par le'e chdop chžagle chonxenle Diosen' lo ciuda Corinto. Da' chejnilaže'le Jesucriston', da'nan' Diosen' ba gwleje' le'e cont yo'ole lo ne'e, can' gwleje' yogo' ben' chosoļ güiže' Xancho Jesucriston' na' zjanaque' le' txen gate tezechle, le lecze naque' Xangaquen'.

³ Chnaba' lao Xacho Diosen' na' lao Xancho Jesucriston' yesaclene' le'e na' yesone' cont soa cuezle binlo len xbab da' yo'o lo' yichjlažda'ole.

Diosen' chaclene' chio' chejnilaže'cho Criston'

⁴ Yogo' ni'a choa' yeļa' choxcen che Diosen' par le'e can' chaclene' le'e lagüe chejnilaže'le Jesucriston'.

⁵ Na' da' chejnilaže'lene' chaclenchgüe' le'e cont chejni'ile yogo' da' ba bejn'i' Diosen' le'e na' cont choe'le diža' chen.

⁶ Na' ba chonle cont nacbia' xtiza' Criston' da' chejle'le naquen da' li.

⁷ Spiritw che Diosen' chonen cont chac chonle yogo' da' ca' chyažjen gonle šlac chbezcho yid Xancho Jesucriston' yeto.

⁸ Na' Diosen' gaclene' le'e soachachle gonle can' chazlažen' cont bibi doļa' gaple caten' yid Xancho Jesucriston' yeto.

⁹ Diosen' zoacze' chone' can' ba gwne' gone', na' le'na' gwleje' le'e cont nacle txen len Xi'ine' Jesucriston' ben' nac Xancho.

Nža' nža'te chesena beñe' chesonxen Jesucriston' Corinton'

¹⁰ Beñe' migw, le'e chejnilaže'le Jesucriston'. Da'nan' chñeyoeda' le'e, le gon txen len lježle na' bich gacle chople o šon taple len da' chonle xbab na' len da' žale.

¹¹ Chnia' ca' beñe' migw, le beñe' nita' liž Cloé ba gose'e neda' chdile chšašle.

¹² Chnia' chdile chšašle, le balle žale: "Naca' txen len da' chsed chlo'e Pablon'." Na' yeballe žale: "Naca' txen len da' chsed chlo'e Apolosen'." Na' yeballe žale: "Naca' txen len da' chsed chlo'e Pedron'." Na' yeballe žale: "Naca' txen len da' chsed chlo'e Criston'."

¹³ ¿Chaquele bid Criston' neche to chopzle? ¿Chaquele nedan' Pablo bnežjw cuina' gota' le'e yag cruz neche le'e? ¿Zsoale nis cont blo'ele chejnilaže'le neda'? Gague can'.

¹⁴ Choa' yeļa' choxcen che Diosen' bi bzoa' le'e nis, san Crispo na' Gayo na'zen' bzoa' nis.

¹⁵ Da'nan' noch no zoa len le'e beñe' yesene' bzoa' legaque' nis, le bi chaclaža' no yesena gwzoe' nis cont blo'e chejnilaže' neda'.

¹⁶ Na' neda' lecze bzoa' nis beñe' ca' že' liž Estéfanas, na' bi za'laža' še zoa nochle beñe' bzoa' nis.

¹⁷ Nezda' Criston' bi gwseļe' neda' cont gwzooa' beñe' nis san cont chixjue'eda' diža' güen chen'. Na' bi cheyljua' no diža' da' chaque beñachen' diža' sina' choa' cate' chyxjue'eda' diža' güen chen', le še beñe' yesone' xbab

che yela' sina' chia', nach bi yesone' xbab che dan' ben Criston' bnežjw cuine' gosote'ne' le'e yag cruzen', na' lenna' nsan' yela' guac che Diosen'.

Criston' bedelo'ede' yela' guac che Diosen' na' yela' sina' che'

¹⁸ Bene' ca' yesebiaye'e lagüe bi chesejnilaže' Jesucriston', chesacde' bibi zaca' xtiža' Criston' da' choe'cho che'cho legaque' bnežjw cuine' neche' xtoła'gaque' le'e yag cruzen'. San chio' chejnilaže'chone', chio' ba de yela' mban checho toli tocanē, nezecho diža' nan' naquen da' zaca'chgua, le nsan' yela' guac che Diosen'.

¹⁹ Chac can' nyojen žan:

Neda' gona' cont nachia' gague da' li zjansina' bene' ca' chesene' zjanaque' bene' sina'.

Na' gona' cont bene' ca' chesejni'i da' zan yežlio nga, bibi de gon ca dan' chesejni'ide'.

²⁰ Chacljele žchixe bene' ca' zjansed yela' sina' che benachen'? na' žchixe bene' chososed chosolo'ede' ley che Diosen'? na' žchixe bene' chac chesene' diža' xdan diža' sina' che dan' chac yežlio nga? Quinga nac chegaque', Diosen' ba blo'e yela' sina' chegaquen' bi naquen da' sina'.

²¹ Diosen' naque' bene' sina' na' ba bene' cont yela' sina' che benachen' bi chaclenen legaque' yesombi'ene'. Le Diosen' chazlaže' con bene' yesejle' xtiže' dan' choe'to' gata' yela' mban chegaque' toli tocanē, la'czla' yezica'chle bene' chesacde' bibi zaca' xtižen' dan' choe'ton'.

²² Bene' Israel gualaž cheto' chesenabe' yesele'ede' yela' guac cont yesejle'e bin' ža Diosen', na' bene' chesac diža' griego cheseyiljue' no diža' da' chesacde' naquen da' sina'.

²³ San neto' chyixjue'eto' xtiža' Criston' can' bnežjw cuine' gosote'ne' le'e yag cruzen'. Na' bene' Israel gualaž cheto' ca' bi chesazlaže' da' chyixjue'eto' na' bitw chesejle'en. Na' bene' bi zjanaque' bene' Israel lecze chesacde' bibi zaca' dižan' chyixjue'eton'.

²⁴ Perw chio' ba gwlej Diosen' naccho xi'ine', la'aczla' še naccho bene' Israel o še bi naccho bene' Israel, nezecho Diosen' blo'e yela' guac chen' na' yela' sina' chen' dan' gwsele' Criston' bnežjw cuine' neche' chio'.

²⁵ Bene' ca' bi chesejnilaže' Diosen' chesacde' bi nac Diosen' bene' sina' lagüe da' be'e latje got Criston' le'e yag cruzen', na' chesacde' chlo'en bibi yela' guac nap Diosen'. Perw gague can', san xbab che Diosen' naquen da' sina'ch ca xbab che benachen', na' nape' yela' guac xench ca benachen'.

²⁶ Bene' migw chia', le gon xbab can' nacle cate' Diosen' gwleje' le'e cont nacle xi'ine'. Gague zanle nacle bene' sina' len xbab che benachen', gague zanle nacle bene' chnabia', gague zanle goljle lo diaža che bene' blao.

²⁷ Diosen' ba gwleje' chio' naccho xi'ine' la'czla' bibi yela' sina' che yežlio nga napcho, na' chesaque benachen' bibi chac goncho; nach Diosen' chaclene' chio' len yela' guac che' na' yela' sina' che' cont bene' zjanac bene' sina' len xbab che benachen' yesacbe'ede' na' yesacde' zto'.

²⁸ Diosen' ba gwleje' chio' naccho xi'ine', zanchi naccho no bene' yixe', no bene' chesegue'e benach, na' gwleje' chio' cont gwlo'ede' bene' zjanaque' blao len benachen' bibi zjazaque' len le'.

²⁹ Diosen' bene' cont nono gac gonxen cuine' lagüen'.

³⁰ Diosen' ba none' chio' txen len Cristo Jesús'en, na' Criston' nse'e yela' sina' che Diosen' na' naque' la'zelagüe bene' güen bene' laždao' xilaže'. Na' dan' naccho txen len Criston', chone' chio' yela' sina' chen', na' yela' bene' güen chen', na' yela' bene' laždao' xilaže' chen', na' ba beque'e xtoła'chon'.

³¹ Da'nan' Xtiža' Diosen' nyojen žan: "Bi cheyała' gonxen cuincho san gonxencho Xanchon'."

2

Pablo be'e xtiža' Criston' ben' gosote' le'e yag cruz

¹ Bene' migw, cate' bedetixjue'eda' xtiža' Diosen' len le'e, bitw bia' diža' zdebe da' bi gwyejni'ile na' gague bia' diža' xdan cont gaquele naca' bene' sina'.

² San beçhoglaža' be'lena' le'e diža' che Jesucriston' can' bnežw cuine' gosote'ne' le'e yag cruz neçe xtoła'chon', na' bi be'lena' le'e bichle diža'.

³ Na' cate' gwzoa' len le'e goche'eda' bibi chac gona', na' leca bžeba' na' goła' gwxiža' bena' xbab še bi gwzenagle xtižan'.

⁴ Na' diža' da' be'lena' le'e gague bian' len yela' sina' che benachen' cont co'oyela' le'e gwzenagle chia', san Spiritw che Diosen' goclenen neda' len yela' guac chen na' benen cont bzenagle.

⁵ Goclaža' šejnilaže'le Criston' gague neçe yela' sina' che benachen', san neçe da' gwša' Diosen' xbab chelen' len yela' guac chen'.

Spiritw che Diosen' chonen yela' chejni'i

⁶ Na' len bene' ba zjayolagüe' chosozenague' che Diosen' choe'cho diža' sina' da' za' che Diosen', bi zan' che yežlio nga ne che bene' blao o bene' gwnabia' zjanita' na'a, le te che bene' ca' na' te che yela' sina' chegaquen'.

⁷ Diosen' ba bzejni'ide' neto' to yela' sina' da' nono gwyejni' cani', to da' bi'e xnezen' gac cate' bina' xe yežlion', le cana'te bi'e xnezen' yid Criston' yeque'e xtoła'chon' cont soacho mbalaz toli tocañe.

⁸ Na' ne toze bene' gwnabia' bene' že' yežlio nga bi gosejni'ide' yela' sina' che Diosen', le šaca' gosejni'iden', bi bosode'e Xancho Jesucriston' ben' nac bene' zaca' juisyw le'e yag cruzen' še ca'.

⁹ Na' Xtiža' Diosen' da' nyojen žan: Nono zoa bene' ba ble'ede' da' güen da' gon Diosen' len bene' ca' chesacde' le'. Nono na' yende' diža' can' gone', neca na' yesone' xbab lo' lažda'ogüen' can' gaquen'.

¹⁰ Perw Diosen' ba bene' cont Spiritw chen' bzejni'in chio' can' gone', le Spiriton' chejni'in tcho'a yogo' da' chon Diosen', na' nezen da' ngaše' len benachen'.

¹¹ Can' naquen len benachen', nono neze bi xbab chon bene' yoble, con to tocho nezecho bi xbabn' choncho. Na' ca'cze naquen len Diosen', con Spiritw che' na'zen' nezen bi xbab chone'.

¹² Na' Diosen' ba bene' chio' Spiritw chen' cont nezecho yogo' da' güen da' chon Diosen' len chio' lagüe nži'ilaže'de' chio'. Da'nan' bi choncho xbab can' cheson bene' bi chosozenag che Diosen'.

¹³ Na' cate' choe'lento' le'e xtiža' Criston', gague choe'to' diža' len yela' sina' cheton', san choe'to' diža' da' bzejni'i Spiritw che Diosen' neto', na' bene' ba yo'o Spiritw che Diosen' lo' yichjlažda'ogaquen', legacze' chesejni'ide' da' chsed chlo'eto'ne'.

¹⁴ Na' bene' bi yo'o Spiritw che Diosen' lo' yichjlažda'ogaque' bi chesejle'e che diža' da' chon Spiritw che Diosen' neto' da' choe'to' len legaque', san chesacde' naquen to da' bibi zaca'. Na' bi chesejni'ide', le bi yo'o Spiriton' lo' yichjlažda'ogaque' cont gaclenen legaque' yesejni'iden'.

¹⁵ Na' cate' yo'o Spiritw che Diosen' lo' yichjlažda'ochon' chacbe'echo che bite'teze še naquen da' zaca', perw bene' bi yo'o Spiritw chen' lo' lažda'ogaquen', bi zaca' yesene' še da' choncho naquen da' zaca'.

¹⁶ Na' Xtiža' Diosen' da' nyojen žan: "Nono zoa chejni'i xbab che Diosen' cont gwzejni'ide' Diosa'." Perw Diosen' ba bene' chio' Spiritw che' cont šejni'icho xbab che Criston'.

3

Gaccho txen len nochle bene' cheson xšin Diosen'

¹ Bene' migw, bi goc gua' xtiža' Diosen' len le'e can' chona' len bene' chosozenag che Spiritw che Diosen', le ne' chzenagle che xbab chezle. Da'nan' zaca'leble ca bidao'.

² Cate' gwzolao be'lena' le'e xtiža' Diosen' žinten ža na'aža, biña' šejni'ile da' ca' chaclaže' Diosen' šejni'ile. Da'nan' ba bsd blo'eda' le'e da' bi naquen zdebe šejni'ile.

³ Chzenagle che xbab chezle na' da'nan' bi chac šejni'ile xtiža' Diosen' da' naquen zdebe. Da' chgue'e lježle na' chdiłe chšašle, nacia' chzenagle che xbab chezle ca' cheson bene' bi chesejnilaže' Criston'.

⁴ Chnia' chonle ca bene' bi chesejnilaže' Diosen', le balle žale: "Nacto' txen da' chsed chlo'e Pablo", na' yeballe žale: "Nacto' txen da' chsed chlo'e Apolos."

⁵ Le gon xbab chia' neda' Pablo na' che Apolosen', con nacto' bene' güen xšin Dios. Na' Diosen' bene' cont gwzejni'laže'le Xancho Criston' cate' be'lento' le'e xtižen', na' lecze gwleje' to to neto' cont gonto' con da' chnalaže'.

⁶ Neda' zaca'leba' ca to bene' goz, le be'lena' le'e xtiža' Diosen' da' nechw, na' Apolosen' zaca'lebe' ca' bene' chyilen, le bsd blo'ede' le'e gwdechle. Na' toz Diosen' chone' cont chac cosešen'. Ca'cze goc len le'e, Diosen' bene' cont gwyejle'le xtižen' da' be'lento' le'e.

⁷ Bitec bi zaca' neda' da' be'lena' le'e xtiža' Diosen' da' nechw, na' neca Apolosen' da' bsd blo'echde' le'e, san Diosen' zaca'chgüe' da' bene' cont gwyejle'le xtižen'.

⁸ Bene' chyixjue'ede' xtiža' Diosen' da' nechw na' bene' chyixjue'eden' da' gwchope txen chesone' xšin Diosen'. Na' Diosen' gone' cont to toe' yesenite' mbalaz con can' gosone' xšine'na'.

⁹ Neto' chzejni'ito' le'e xtiža' Diosen', guac nacho nacto' bene' goz go'on che Diosen' na' le'e nacle yežlio gan' chac žinna'.

Na' le'e chdop chžagle chonxenle Criston' lecze zaca'leble ca to yo'o che Diosen'.

¹⁰ Na' guac nacho neda' naca' to bene' chac chon yo'o na' neda' bxia' len yo'ona', le Diosen' goclene' neda' cont bxia' xšinen' gan' zolen'. Na' na'a nita' bene' yoble chosozejni'ide' le'e, na' guac nacho chesebeque' ze'en. Na' note'teze bene' chacde' gone' xšin Diosen' cheyla' gonyane' xbab še xšinen' gone' txen len lene yo'o dan' ba gwlecan'.

¹¹ Na' nono gac cuec bichle lene yo'o, le ba gwlecan', na' Jesucristo bene' chejnilaže'cho, len' nacho naque' lene yo'ona'.

¹² Na' bite'teze ze'e da' chozoa bene' lo' lene yo'ona', chchejen con nac nonen', še nonen' de oro, de plata, de yej da' zaca', de yag o de yix o de dod. Na' ca'cze nac bite'teze da' choncho chaquecho chonchon par Diosen', chchejen še naquen da' zaca'.

¹³ Na' cate' žin ža yid Criston', gone' cont gacia' che da' ben to tocho še naquen da' zaca' o še bitw naquen. Na' yogo' da' bencho da' bi naquen da'

zaca', Diosen' yonitlagüen' len yi' che'na' can' chac che to yo'o de yag, de yix o de dod cate' cheyen.

14 Na' še bencho da' naquen da' zaca', lenna' bi yeniten, na' Diosen' gone' cont soacho mbalaz da' benchon.

15 Na' še dan' benchon' bi naquen da' zaca', da' ca' benchon' yesebiayin' lo yi' che Diosen' na' bitec soacho mbalaz, con nacchguaze gac yechojcho bi şeycho.

16 ¿Ba beyanlaže'le chio' chdop chžagcho chonxencho Jesucriston' yogo'cho txen zaca'lebcho ca to yodao' gan' chesonxene' Diosen'? ¿Ba beyanlaže'le zoa Spiritw che Diosen' len chio'?

17 Na' še no gone' cont chio' chdop chžagcho chonxencho Criston' cuejyichjo diža' li chen', Diosen' gwnežjue' castigw toli tocanē che bene' gon ca', le Diosen' zoe' len chio' na' naccho lo ne'e.

18 Bi siye' cuinle. Note'tezle še chaquele nacle bene' sina' len yela' sina' che yežlio nga, cheyala' gache'ele yela' sina' chelen' bi gaclenen le'e len Diosen'. Na' cheyala' gacle ca to bene' bibi chejni'i cont Diosen' gone' le'e yela' sina' chen'.

19 Bene' bi chesejnilaže' Diosen', yela' sina' chegaquen' bi naquen da' zejen len Diosen'. Na' Xtiža' Diosen' nyojen žan: "Bene' ca' chesacde' zjanaque' bene' sina', Diosen' gone' cont yela' sina' chegaquen' gwžiyayin' legaque'."

20 Na' yeto gan' nyojen žan: "Xancho nan' neзде' da' yesede che xbab che bene' sina' ca'."

21 Da'n'an' bi cheyala' ga'laže'le da' nacle txen len note'teze bene' chsed chlo'ede' le'e, le yogo'lol bi da' de zjanaquen chele cont yesaclenen le'e.

22 Neda', len Apolosen', na' len Pedron', gwseła' Diosen' neto' cont chaclento' le'e. Na' yežlio nga na' yela' mbanna', na' yela' goten', na' da' de na'a na' da' gata' bate'teze, yogo' da' ca' zjaden cont yesaclenen le'e.

23 Na' nacle lo na' Criston' na' Criston' naque' lo na' Diosen'.

4

Da' yo'o lo na' postlw ca' yesone'

1 Cheyala' gache'ele neto' ba gwđixjue'eto' xtiža' Diosen' len le'e nacto' bene' güen xšin Diosen'. Diosen' ba bzejni'ide' neto' da' nono gwneze cani' cont gwsed gwlo'eton' bene'.

2 Na' chonen byen gonto' con can' ngüe'e lo na'to' gonto'.

3 Na' ca' naca' neda', bibi nonen len neda' še no justis che yežlio nga o še le'e nale bi chona' can' cheyala' gona'. Na' neca chnia' che cuina' še chona' can' cheyala' gona'.

4 Lo' lažda'ogua' chacda' bibi doła' napa' len bite'tez da' chona', perw gague da'n'an' na Diosen' chia' bibi xtoła' de. Xancho Jesucriston' ne' še chona' can' cheyala' gona' o še bi chonan'.

5 Da'n'an' bi cheyala' žialaole nale che note'teze bene' še chone' can' cheyala' gone' o še bi chone'. Caten' yid Xancho Criston' yeto, canan' gone' cont nezecho da' nono neze na'a, na' gone' cont gache'echo can' nac xbab da' yo'o lo' yichjlaždao' beñachen'. Na' cana' na Diosen' še nocho chon güen.

6 Bene' migw, ba be'lena' le'e xtiža' Apolosen' na' xtiža' cate' bzejni'ida' le'e, cont soale gonle can' ža Xtiža' Diosen', le bi cheyala' ga'laže'le da' nacle txen len to bene' chsedde' le'e na' gue'ele yetoe'.

7 Na' ¿bixchen' chaquele zaca'chle ca yezica'chle bene'? Diosen' bene' yogo' da' de chele, na' da' beñ Diosen' yogo' da' de chele, bi cheyala' ga'laže'le.

⁸ Chacļjele bibi chyažjele na' chacļjele ba nacle bene' zaca'chgua len Diosen' na' guac nabia'le ca no rey, na' chaquele bi chyažjele neto'. Yebeto' šaca' da' li nacle ca no rey can' chaquelen' cont soato' mbalaz txen len le'e.

⁹ Chacda' Diosen' ba bene' cont bene' že' yežlion' yesele'ede' neto' postlw ca bene' zjanac la'zelagüe bene' bibi zaca', ca bene' nchoglaon chegaque' yesate'. Na' benachen' len angl ben' že' gan' zoa Diosen' chesene'e can' chac cheto' ca to bene' chne'e to da' yežejde'.

¹⁰ Na' da' chonto' xšin Criston' da'nan' bene' zan chesacde' bibi zaca'to', perw le'e, dan' ba chejnlaže'le Criston' chaclaže'le yesacde' nacle bene' sina'. Chesacde' bibi chac gon neto', perw le'e chaclaže'le yesacde' guac gonļe bite'teze. Chesonxen bene' le'e na' chesegue'ede' neto'.

¹¹ Ža na'aža zan ni'a chdeto' gwbin chbiļ chdonto', bibi xalana'to' de, chesebaže' bene' neto' na' bibi ližto' de.

¹² Len ni'a na'to' chonto' žin cont chacbanto'. Cate' chesezi'diža' bene' neto', con chnabto' nite' mbalaz, na' cate' chosoči chososaque' neto', chyo chchejto' bi da' chesonde' neto'.

¹³ Cate' chesene' cheto', chol güižto' legaque' diža' šagüe'. Na' ža na'aža nita' bene' zan chesonde' neto' ca to no beb dao' o to no da' naquen zban da' ba becho'onen.

¹⁴ Chzoja' da' nga gague cont gaquele zto' san cont gwzejni'ida' le'e, le nacle ca xi'ina' na' chacda' le'e.

¹⁵ Na' la'czļa' bene' zan yesaclaže' yososed yosolo'ede' le'e che Criston', bi yesenita' zane' yesacde' le'e ca xale. Perw neda' naca' ca xale, le neda' gwžialagua' gwđixjue'eda' le'e diža' güen che Jesucriston' cont chejnlaže'lene'.

¹⁶ Na' da'nan' chneyoeda' le'e gonļe can' chonan'.

¹⁷ Da'nan' chsela' Timoteon' gan' zoalen'. Lecze ba nona'ne' ca xi'ina', le bzejni'ida'ne' cont chejnlaže' Xancho Jesucriston', na' zoacze' chone' can' cheyala' gone'. Na' chsela'ne' cont šjaysede' laže'le can' gwzoa gwleza' šlac bzejni'ida' le'e che Criston', na' da' bzejni'ida' le'e naquen lebe len da' chzejni'ida' bene' gate'teze chesedop chesežague' chesonxene' Criston'.

¹⁸ Na' balļe cha'laže'le chaquele bich yida' gan' zoalen'.

¹⁹ Perw chacda' yob yida' gan' zoalen' še Diosen' goņšque' latje. Na' cate' yida', cana'ch yedena'a bene' ya'laže' ca' še yesone' can' chesenen'.

²⁰ Cate' Diosen' chnabi'e yichjlaždao' bene', dan' chesonen' chlo'en yela' guac chen', gague xtiza'gaque' na'zen' gwlo'en še chnabi'e yichjlažda'ogaque'.

²¹ ¿Nac chaclaže'le gona'? ¿Yida' gan' zoalen' na' gona' le'e castigw, še yida' gwlo'a chacda' le'e na' yedeya' diža' šagüe' len le'e? Le gon xbab naquen chaclaže'le yedeyena'.

5

To bene' gwzoalene' xna'zie' ca xo'ole'

¹ Chesene' to le'e zoalenļe xna'zile ca xo'olle. Da' nga naquen to yela' zto' xen, ne bene' ca' bi chesonxen Diosen' bi chžinlaže' yesone' ca'.

² Na' la'czļa' tole chonļe da' malen' nac ca', chaquele güenchgua chonļe lao Diosen'. Cheyala' yegüine'le na' cheyala' yebejle ben' chon ca' len le'e.

³ La'czļa' bi zoa' na' len le'e, zoaccho txen na' ba gwchoglagua' can' cheyala' gonļe len ben' chon da' malen', can' gonļe la'czļa' ca zoa' len le'e.

⁴ Nach cate' ndop nžagle chonxenļe Xancho Jesucriston', le gon xbab naccho txen, na' zoacze Xancho Jesusen' chaclene' le'e len yela' guac chen'.

5 Nach le cuej ben' ca' ale na' le gone' lo na' Satanás dan' chnabia' da' xigüe' ca' cont gonen can' chaclažen' len le'. Le gon ca' cont še yoša'šca yichjlažda'ogüe' na' bi cuiaye'e toli tocane cate' žin ža yid Xancho Jesüsen' yeto.

6 Bi cheyała' gaquele chonchguale güen lao Diosen'. ¿Bi chacbe'ele chcha' da' malen' cate' cho'echo latje, can' ža diža' dan' chesone': "Late'ze levadura da' chosočhine' cate' chesone' yetextil chonen cont cheyas doxen cuzin'?"

7 Bene' İsrail gualaž cheto' bi chesagüe' yetextil da' nchixen levadura lo lni pascw cheto' na' bi cheso'e latje yega'an ne late'ze levaduran' lo' ližgaque' lo lnin'. Na' ca'cze chio' chejnilaže'cho Criston' bi cheyała' güe'cho latje šo' da' malen' yichjlažda'ochon'. Cheyała' cuejyichjcho yogo' da' malen' cont gaccho ca to bene' cobe, le Criston' bnežjw cuine' gote' cont bocobe' yichjlažda'ochon', na' len chio' Criston' zaca'lebe' ca to be gosot bene' İsrail gualaž cheton' lo lni pascon'.

8 Da'nan' cheyała' cuejyichjcho bite'teze da' mal, cont gaccho ca to bene' cobe, soacho do yichj do laže'cho na' goncho da' zej to li.

9 Cana' bzoja' to cart gwnia' bi cheyała' soacho binlo len bene' chosoza xtoe' na' bene' cheson bichle da' nac da' yela' zto' len cuerp čegaque'.

10 Gwnia' bi gac soacho binlo len bene' cheson da' nac yela' zto', na' bene' chesezelaže' bi da' de che bene', na' bene' cheseque'e da' de che bene' na' bene' chesonxene' l gua'a lsaca'. Na' can' gwnia' bi gac soacho binlo len legaque', cho'a diža' che ljež chio' chejnilaže'cho Criston'. Le šaca' choa' diža' bi gac soacho binlo len note'tez bene' cheson ca', bich gac bi goncho lo yežlio nga še ca'.

11 San da' žia' cheyała' goncho, bi soacho binlo len to bene' lježcho bene' chejnilaže' Criston' še nzoa xtoe' o še chone' bichle da' nac da' yela' zto' len cuerp che', o še chzelaže' da' de che bene', o chejnilaže' l gua'a lsaca', o chzi'diže' bene', o naque' bene' borrašw o bene' gwban. Neca cheyała' gagwlencho bene' lježcho bene' cheson ca'.

12 Bi naquen čecho chogbi'acho che bene' bi chesejnilaže' Criston' še da' chesone' naquen güen o naquen mal, san chio' chdop chžagcho chejnilaže'cho Criston' cheyała' chogbi'acho che lježcho še chesonteze' da' mal.

13 Na' Diosen' chogbi'e che xtoła' bene' ca' bi chesejnilaže' Criston', san le'e, le yebej bena' gwnia' chon da' malen' ladjwle.

6

Bene' Corinto chesejnilaže' Criston' chesagüe' xya che lježgaque' lao justis ca'

1 Chebanda' chele can' chonle da' chagwle xya tole yetole na' chjana'le bene' bi chozoenag che Diosen' cont chesone' yela' justis chele. Cheyała' nabe lježle le'e ba gwlej Diosen' nacle lo ne'e cont legaque' yesone' yela' justis chele.

2 ¿Bi nezele žin ža cate' chio' naccho lo na' Diosen' goncho yela' justis che yezica'chle bene' že' yežlio nga? Na' še goncho yela' justis čegaque', guac goncho yela' justis che bi da' dao' da' bitec zjazaca'.

3 Na' lecze žin ža goncho yela' justis che angl ca'. Na' naquechxe goncho yela' justis che bi da' cheson bene' lo yežlio nga.

4 Na' cate' gagwle xya che lježle, bi šejle lao bene' bi chesejnilaže' Criston' cont yesone' yela' justis chele, le xbab čegaquen' bi naquen da' zaca'chgua len chio' chejnilaže'cho Criston'.

5 Žia' ca' cont yeto'ele che dan' chonle na' bich gonle ca'. ¿Ne tole bi nacle bene' sina' cont gon yela' justis che lježle cate' bi chac chele?

6 ¿Da'nan' chjtagwle xya che lježle len justis ca' bene' bi chesejnilaže' Criston'?

7 Da' chacyož len lježle na'zen' chlo'en leca clelen' chonle. Mbalazech zoale šaca' chdele ca'ale še bi da' chone bene' lježlen' le'e. Yejni'a güe'le latje yeseque'e bi da' de chele.

8 Perw le'e chca'ale bi da' de che lježle na' da' zan da' chone lježle.

9 ¿Bi nezele bene' ca' zjanaque' bene' mal lao Diosen' bi yesyežine' yaban' gan' zoa Diosen' chnabi'e? Bi güe'le latje no gonle le'e. Nita' bene' chosozaotxe' na' bene' cheson bichle da' yela' zto' da' nac ca'. Na' nita' bene' chesonxen l' gua'a lsaca'. Na' nita' bene' chesata'lene' no'ole bi nac no'ol chegaque' o bene' byo bi nac bene' chegaque', na' nita' bene' byo bxej.

10 Nita' bene' chesebane' na' bene' chesezelaže' bi da' de che bene', na' bene' borrašw, na' bene' chesezi'diža' lježgaque' na' bene' cheseziye'e bene' yoble cont yeseque'e da' de chegaque'. Na' ne to bene' chon da' mal dan' zjanac ca' bi yesyežine' yaba gan' zoa Diosen' chnabi'e.

11 Balle benle da' mal dan' zjanac ca', perw na'a da' chejnilaže'le Xancho Jesúsen', Spiritw che Diosen' ba benen cont beyac lažda'olen' xilaže', na' benen cont nacle lo na' Diosen' na' cont nacle bene' güen len le'.

Cheyla' goncho da' güen len cuerp chechon'

12 Da' li can' chesena bene', de latje goncho bite'teze, perw nezecho gague yogu' da' gonchon' naquen güen. Na' la'czla' še de latje goncho bite'teze, bi cheyla' güe'cho latje nabia' bi dan' gonchon' chio'.

13 Na' da' li can' chesena yebale', chesene': "Nsa' le'echon' par yela' guagw na' decze yela' guagw par gagwchon žinten lo' le'echo." Perw na' le'echon' len yela' guagon', chopten žin ža te chegaquen. Na' cuerp chechon' bi nsa'chon cont gata'len xtocho o goncho bichle yela' zto' nac ca'. San nsa'chon cont gonxencho Xancho Jesucriston'. Na' Xancho Jesucriston' lecce chaclene' chio' len cuerp chechon'.

14 Diosen' bosbane' Xancho Jesucriston' ladjo bene' guat ca', na' lecce žin ža cate' yosbane' chio' ladjo bene' guat ca' len yela' guac chen'.

15 ¿Bi nezele naccho txen len Criston' na' cuerp chechon' zjanaquen che'? Na' bi cheyla' goncho cuerp chechon' da' nac che Criston' lo na' no'ole zle'.

16 Note'tezle še chata'le len no'ole bi nac no'ol chele o bene' byo bi nac bene' chele, cuerp chelen' gaquen toze len cuerp chen', can' ža Xtiza' Diosen' da' nyojen žan: "Bene' ca' chope yesaque' toze cuerp."

17 Perw note'tezcho cate' chon cuincho lo na' Xancho Jesucriston', yichjlažda'ochon' chaquen toze len yichjlažda'ogüen'.

18 Da'nan' bi cheyla' gata'lencho no'ole bi nac no'ol checho o bene' byo bi nac bene' checho o goncho bichle yela' zto' da' nac ca'. Yezica'chle da' mal ca' bitec chosožiyain' cuerp chechon', perw da' ca' zjanac ca' chosožiyain' cuerp chechon'.

19 ¿Bi chacbe'ele Spiritw che Diosen' zoan lo' yichjlaždao' to tocho ca' zoa to bene' liže'? le Diosen' ba gwsele' Spiritw chen' zoan lo' yichjlaždao' chio' chejnilaže'cho Criston', na' bi gac goncho con bi žan checho.

20 Na' da' zaca' xen da' ben Xancho Criston' cont bechojcho lo na' gwxiyen'. Da'nan' cheyla' goncho can' chazlaže' Diosen' len cuerp chechon' na' len yichjlažda'ochon', le chopten zjanaquen che'.

7

Pablon' cho'e diža' che yela' güešagna'

1 Na' che dan' chñabele neda' le'e cart chelen', še bene' byon' bi chaclaže' si'e no'olen' gaque' xo'ole', güenna' chone'.

2 Perw na' že'chgua bene' chesedalene' no'ole bi nac no'ol chegaque', na' bene' cheson bichle da' nac da' yela' zto' len cuerp chegaquen', na' da'nan' yejni'a gwšagna'le na' to to bene' byo soa xo'ole' na' to to no'ole soa bene' che'.

3 Na' to to bene' byo cheyala' gone' da' naquen gone' len no'ol che' na' to to no'ole cheyala' gone' da' naquen gone' len bene' che'.

4 No'olen' bi gac ne' to gualaze' nac gone' len cuerp chen' na' neca bene' byon' bi gac ne' to gualaze' nac gone' len cuerp chen', san cheyala' yosozenag che lježe'.

5 Na' le'e nšagna'le bi gwžonle gonlen lježle da' cheyala' gonle len cuerp chelen', perw še naquen yela' güexi'a che choptele guaccze bi gonlen to term dao' cont soatezle yoł güižle Diosen'. Na' te termen' yezoalen lježle da' yoble, le Satanás dan' chnabia' da' xigüe' ca' co'oyelan' le'e gonle da' mal še leca žan soalen lježle.

6 Ba gwnia' yogo' da' ca' cont nezele de latje soa xo'olle, perw gague nacho chon Diosen' mandadw gwšagna'le.

7 Chebeda' šaca' soa yogo'le can' zoa' neda' nono xo'ola' zoa. Perw nža'le grasyw da' non Diosen' to tocho che bi da' goncho.

8 Na' le'e nac to gualazle, chacda' güench bi gwšagna'le, na' lecze le'e ba got bene' chele bi yošagna'le, san soale to gualazle can' zoa' neda'.

9 Perw še leca žan soalenle no'ole o soalenle bene' byo, yejni'a gwšagna'le cont bi nabia' yela' chzelažen' le'e.

10 Na' le'e no'ole le'e nšagna'le, chona' mandadw bi yela'ale len bene' chelen'. Na' gague neda'ze žia' ca', le naquen da' chon Xancho Criston' mandadw.

11 Na' še no'olen' yele'e len bene' che', cheyala' soa to gualaze' bi yeque'e bene' yoble o cheyala' yeyeje' šjayzoalene' bene' che' da' yoble. Na' lecze le'e bene' byo le'e nšagna'le, bi yela'ale len xo'ollen'.

12 Na' le'e bene' yezica'chle, nia' can' chona' xbab cheyala' gonle, la'czla' Xanchon' bibi gwne' che da' ca'. To to le'e bene' byo še ba nšagna'lenle no'ole bi chejnilaže' Criston' na' chaclaže' soalencze' le', bi cheyala' yela'ale len le'.

13 Na' to to le'e no'ole še ba nšagna'lenle bene' bi chejnilaže' Criston' na' chaclaže' soalene' le', bi yela'ale len le'.

14 Bi naquen mal lao Diosen' soalenle bene' chele o no'ol chele bene' bi chejnilaže' Criston', le Diosen' chi' yichje' choptele dan' chejnilaže'lene' tole. Šaca' bi naquen ca', xi'inle ca' zjanache' ca' xi'in bene' bi chesejnilaže' Diosen', perw gague can', le lente legabe' chi' yichj Diosen' dan' chejnilaže'lene' tole.

15 Perw še bene' chele o no'ole chele bi chejnilaže' Criston' na' bich chaclaže' soalene' le'e, le yela'a, le Diosen' chaclaže' soacho binlo len lježcho.

16 Na' le'e no'ole še gonle güen len bene' chele na' le'e bene' byo še gonle güen len no'ol chelen', guacte gonen cont yesejnilaže' Criston'.

17 To tocho cheyala' soacho goncho da' non Xancho Diosen' lo na'cho goncho cate' gwleje' chio' naccho xi'ine'. Chona' mandadw yesone' ca' gate'teze chesedop chesežague' chesonxene' Criston'.

18 Še ba zoale señw dan' že' circuncisión cate' gwlej Diosen' le'e nacle xi'ine', bi gonle cont yenit señon'. Na' še bina' soale señon' cate' gwlej Diosen' le'e nacle xi'ine', bi nable yosozoe' le'e señon'.

19 Bibi nonen len Diosen' še nsa'cho señw che circuncisión o še bi nsa'chon. Da' naquen da' zeje, cheyała' goncho con bi chaclaže' Diosen'.

20 Con can' naccho caten' gwlej Diosen' chio' naccho xi'ine', ca'tezecen' cheyała' soa cuezcho.

21 Še nacle esclavo cate' Xancho Diosen' gwleje' le'e, bibi sa'laže'le che dan'. Perw še guata' latje chixjwle cont chojle lo na' xanlen', le chixjon na' yechojle.

22 Na' la'czła' še nacle esclavo che bene' cate' Xancho Criston' gwleje' le'e, Criston' ba naque' Xanle na'a, gague benachen'. Na' chio' biña' gaccho esclavo che bene', nac Criston' Xancho, na' guac nacho naccho esclavo che'.

23 Da' zaca' xen da' ben Xancho Criston' cont bechojcho lo na' gwxiyen'. Da'nan' bi cheyała' goncho xbab no benach naque' xancho.

24 Bene' migw, da' yoble žia' le'e, con can' naccho cate' gwlej Diosen' chio' naccho xi'ine', can' soa cuezcho, le lao Diosen' chzoa chbezcho.

25 Na' can' cheyała' gac che no'ol güego' ca', Xancho Criston' bi bene' mandadw can' gac chegacbe', perw neda' nia' can' chacda' cheyała' gac, na' ba beyaše' beži'ilaže' Xanchon' neda', na' da'nan' diža' da' choa' zaca'czen gwzenagle chen.

26 Ba za' da' saca'zi'cho na'a, na' da'nan' chacda' güenchen soa cuezcho con can' ba zoacho.

27 Le'e nšagna'le, bi yela'ale len xo'olle, na' le'e biña' soa xo'olle, bi čhiljw xo'olle.

28 Perw bi nacho naquen mal še gwšagna'le, na' neca naquen mal še no no'ol güego' gwšagna'. Con da' zan da' zed de yežlio nga che bene' zjanšagna', na' chaclaža' bi gac chele ca'.

29 Bene' migw, chaclaža' nia' le'e da' nga: Bich chega'an yezan iz cont goncho dan' ngüia Diosen' goncho. Da'nan' le'e zoa xo'olle cheyała' soale gonle xšin Diosen' ca bene' nono xo'ole' zoa.

30 Na' še de da' yegüine'le, cheyała' soale gonle xšin Diosen' ca bene' bi chegüine'. Na' še zoale mbalaz, cheyała' soale gonle xšine' ca bene' bi zoa mbalaz. Na' še si'le bi da' si'le, cheyała' soale gonle xšin Diosen' ca bene' bibi gwxi'e.

31 Na' še bi da' chčinle da' de yežlio nga, bi cheyała' cue' yichjle che len, le da' te che yogo' da' chle'echo yežlio nga.

32 Na' chaclaža' bi cue' yichjle che da' ca' chac yežlio nga. Bene' nono xo'ole' zoa nlatje' gone' xbab che xšin Xancho Diosen' na' che bi da' chaclaže' Xanchon' gone'.

33 Perw bene' nšagne'e chi' yichje' che da' chac yežlio nga, le chone' xbab che bi da' chaclaže' xo'olen' gone', na' gague gac gone' xbab che toz Diosen'.

34 Na' lecze nža' can' chac che no'ole nšagna' na' che no'olen' bi nšagna'. No'ole bi nšagna' mbec yichje' che xšin Xancho Diosen' na' chon cuine' lo ne'e do yichj do laže'. Na' no'ole nšagne'e chbec yichje' che da' chac yežlio nga na' bi da' chaclaže' bene' che' gone'.

35 Ba gwnia' ca' gague cont gwžona' gwšagna'le san cont gaclena' le'e. Con chaclaža' gaguele Xancho Diosen' do yichj do laže'le sin cbi gwžonen gonle can' chazlaže'.

36 Na' še to bene' chacde' cheyała' güe'e latje gwšagna' xi'ine' no'ole, na' še no'olen' ba ngole' na' chaclaže' gwšagne'e, nacczen güen gone' can' ba gwčhoglaže' gone' na' güe'e latje gwšagna' xi'inen'. Bi naquen mal gwnežjue' xi'ine' no'olen' bene' chnabe' le'.

³⁷ Perw še zoa to bene' chacde' güen ch nono si' xi'ine' no'olen' na' bi nacho chonen byen gwšagna'be', nacczen güen gone' can' chazlažen' na' bi gwnežjue' bi' chen' gwšagna'be'.

³⁸ Can' naquen, bene' chnežjue' bi' chen' chšagna'be' chone' güen, na' bene' bi chnežjue'be' chone' güen ch.

³⁹ Na' note'te ze no'ole nšagna', cheyała' soe' len bene' che'. Perw še ba got bene' che', guac yeque'e bene' yoble, con še bene' chejnilaže' Xancho Criston'.

⁴⁰ Perw chacda' neda' soache' mbalaz še yega'ane' to gualaze', na' chacda' xbab chian' naquen toze len xbab che Spiritw che Diosen'.

8

Yela' guagw da' chosožia bene' lao l gua'a lsaca' chesejnilaže'

¹ Na' gwñable nac cheyała' goncho len yela' guagw da' chosožie' lao l gua'a lsacan' chesejnilaže'. Da' li yogo'cho chejni'icho bibi zjazaca' l gua'a lsaca' ca'. Na' cate' choncho xbab che da' chejni'icho, con chonxen cuincho, perw cate' chaque lježcho, cheyiljwlaže'cho nacle goncho cont gaclen lježcho.

² Na' še chaquecho ba gwyejni'icho to da' zejen, cheyała' gacbe'echo bibi de da' chejni'icho ca cheyała' šejni'ichon.

³ Perw cate' chaquecho Diosen', nachle Diosen' nombi'e chio'.

⁴ Gwñable še guac gagwcho yela' guagw da' chosožia bene' lao l gua'a lsacan' chesejnilaže'. Nezecho l gua'a lsaca' ca' bibi zjazacan', na' toz Diosen' zaque' šejnilaže'chone'.

⁵ Da' li de da' zan da' chesena benachen zjanaquen xanguaque' da' chesejnilaže'. Na' la'czła' nita' bene' chesejnilaže' da' de yaba na' yežlion' chesene' da' ca' zjanaquen xanguaque',

⁶ chio' nezecho toze Xacho Diosen' zaque' gonxencho, na' le' bene' cont gwxe yogo'te da' zjade na' zoacho cont gonxencho. Na' nezecho toze Jesucriston' naque' Xancho, na' le' bene' yogo' benach, beyixe' na' bichle da' zjade, na' le' chone' yela' mban checho.

⁷ Gague yogo' bene' lježcho bene' chesejnilaže' Criston' chesejni'ide' da' nga nezecho. Bale' zjayolagüe' chesone' xbab bene' zaca' l gua'a lsaca' ca', na' cate' chesagüe' yela' guagw da' ba bžia bene' lao l gua'a lsacan', chesacde' chesagüe' da' naquen che l gua'a lsacan'. Da'n'an' lo' yichjlažda'ogaque' chesacde' malen' chesone', le' biña' yesejni'išagüe'de' naquen' naquen.

⁸ Na' yela' guagon' bibi zaca' gonen cont yebe Diosen' chio', neca chžonen yebede' chio' še bi gagwcho to yela' guagw o še gagwchon'.

⁹ Perw bal bene' biña' yesejni'išagüe'de' gague bi nonen len Diosen' še bin' ye'ej gagwcho. Na' neche legaque' cheyała' gwsaca'cho can' goncho cont bi goncho ca yeselažoe' lo da' malen' neche dan' che'ej chagwchon'.

¹⁰ Le'e nezele nono nac l gua'a lsaca' ca', na' da'n'an' guac cue'le ye'ej gagwle ga chesone' lni che l gua'a lsacan' sin cbi bi doła' gapple. Na' bene' biña' šejni'ide' cate' le'ede' che'ej chagwle da'na', nach gacde' lecze guac gone' ca', perw lo' yichjlažda'ogüe' gacde' da' malen' chone'.

¹¹ Na' guacte gwžiai'cho bene' lježcho yela' chejni'icho checho, la'czła' Criston' bnežjw cuine' gote' neche le'.

¹² Cate' choncho cont bene' lježcho chesone' to da' ža yichjlažda'ogaque' naquen da' mal, choncho contr Criston' še ca'.

¹³ Da'n'an' chnia' še dan' chagua' bela' chonen cont bene' lježa' lažoe' lo da' mal, gwbatech gagua'ba' cont ca lažoe' lo da' malen'.

9

Pablon' že' naque' dogualje postlw

¹ Nezele neda' naca' postlw na' guac naba' gonele neda' ca chonle len yezica'chle postlw ca'. Neda' ble'eda' Xancho Jesúsén' na' bena' xšine' gan' zoale na' da'nan' chejnilaže'lene'.

² Na' la'czla' še yezica'chle bene' bi chesejle'e naca' postlw, perw le'e chejle'le chia', le da' chejnilaže'le Xancho' ben' gwseła' neda', chlo'en da' li naca' postlw.

³ Quinga choži'a xtiža' bene' ca' chesene' bi gwseła' Diosen' neda' naca' postlw:

⁴ Guac naba' yeson bene' da' ye'ej gagua' šaca' chaclaža' gona' ca'.

⁵ Na' guac gwšagna'lena' no'ole chejnilaže' Criston', na' yechi'ane' gan' šjena' xšin Diosen', can' chon Pedron', na' can' cheson yezica'chle postlw ca' na' can' cheson bene' biše' Xancho'.

⁶ ¿Bixchen' neda' len Bernaben' lao yogo' postlw ca' chonto' žin len ni'a na'to' cont si'to' da' ye'ej gagwto' na' chixjwto' bichle gastw cheto' da' de šlac chyixjue'eto' xtiža' Diosen'?

⁷ Nono soldaw zoa bene' nacho cuinze' chyixjue' gastw che'. Na' nono gaz yag uvas še bi gagüe' uvasen' cate' chbian. Na' lecze ca' nono bene' chyoe šib xila' ca' nacho bi che'eje' late' xiže'ba' cate' chsien'.

⁸ Na' dan' žia' nga bi naquen con xbab cheza', le lez can' ža ley dan' bzoj da' Moisésén'.

⁹ Quinga bzoje' le'e ley: "Bi gwseyjwle cho'a go'n ca' šlac chosolej chosošjba' trigon' cont choj xen." Na' gague da' chi' yichj Diosen' che go'n ca' bene' cont byojen žan ca'.

¹⁰ San že' ca' chzejni'iczde' chio' che bene' ca' cheson xšin Diosen'. Da'nan' že' bene' chgua'ane' go'n na' bene' chonšagüe' trigw cheyała' yesenite' lez yesezi'e late' gūjeje cosešen'.

¹¹ Na' ca neto' ba bzejni'ito' le'e xtiža' Diosen', le gon xbab žnaquen da' zcha'och ca' da' cheyała' gonle šaca' gonle da' ye'ej gagwto' na' bichle da' chyažjeto'?

¹² Naquen da' cheyała'cze gonle dan' choe'le da' cheseyažje yezica'chle bene' chososed chosolo'ede' le'e, perw nacchen da' cheyała' gonle gonle neto' da' chyažj chchine neto' clcl ca' legaque'.

Perw bi gwñabto' gonle neto' da' chyažj chchineto'. Chyo chchejlaže'to' bite'teze da' chac cheto' cont bibi gwžon šanch le'e gwzenagle diža' güen che Criston'.

¹³ Nezele bene' cheson mandaw lo' yodao' che neto' bene' Israel chesacbane' len da' chosonežjw bene' Israel gualaž cheton' che yodaon', chosyocua'ane' late' gūjeje beyixe' ca' chesote' lao Diosen' chesagüe'ba'.

¹⁴ Na' ca'czen' non Xancho Criston' mandaw, bene' chosozenag xtižen' cheyała' yosonežjue' da' cheseyažje ben' cheseyixjue'ede' diža' güen chen'.

¹⁵ Perw neda' bi gwñaba' gonle da' chyažj chchinda', na' gague chzoja' da' nga cont gonle ca'. Yejni'acle gata' clcl ca' naba' gonle da' chyažjda', le chebechgüeda' dan' bibi gan chona' chyixjue'eda' xtiža' Criston'.

¹⁶ Bi gac nia' chona' to goclen cate' chyixjue'eda' diža' güen che Jesucriston', le Diosen' gwleje' neda' chyixjue'edan' na' chonen byen gona' can' že'na'. Nyaše'chguaze naca' neda' še bi chixjue'edan'.

17 Šaca' chona' to da' ža xbab chia' chyixjue'edan', guac nia' zaca'czen sia' bi da' gonle neda' ca laxjua'. Perw chona' da' gwlo'o Diosen' lo na' gona', na' gague chona' to da' ža xbab chezan'.

18 Na' še nable bi hcua'anen len neda' da' chyixjue'eda' xtiža' Diosen', nach nia' hcua'anen da' chbehgüeda' bibi laxjua' chzia' chyixjue'eda' xtižen', la'czla' zaca'cza' si' laxjua'.

19 Bi naca' xmos bene', perw chzexjw yichja' chon cuina' ca xmos yogo'te bene' cont šanch bene' yesejnilaže' Criston'.

20 Cate' zoa' len bene' Israel gualaż cheton', chona' can' cheson legaque' na' chona' ca nac costumbr che ley dan' bzoj Moisés cont yosozenague' cate' güe'lena' legaque' xtiža' Diosen', la'czla' nezda' bi chonen byen ga'oguan' cont soa' binlo len Diosen'.

21 Na' cate' zoa' len bene' bi zjanombia' ley dan' bzoj Moisésen', bi na'ogua' costumbr da' non leyna' mandadw, le chaclaža' yosozenag bene' ca' bi zjanombia' leyna' cate' choe'lena' legaque' xtiža' Diosen'. Perw bi nacho chzoa' ca'ale dan' ža Diosen', le chzenaga' can' ža Criston'.

22 Na' cate' zoa' len bene' chesacde' da' zan bi de lsens goncho, bi chona' da' ca' chesacde' naquen mal goncho, la'czla' nezda' bi naquen mal. Chona' ca' cont gac gwzejni'ichda' legaque'. Chon cuina' lebe len yogo'lo' bene' cont gaclena' legaque' na' bale' yesejnilaže' Criston'.

23 Chi' yichja' yosozenague' diža' güen che Criston' cont soa' mbalaz txen len yezica'chle bene' chosozenague' xtiža' Criston'.

24 Nezecho cate' chosoxonj zan bene' cont choj to bene' gon gan, yogüe' chesa'acse', la'czla' tozen' gon gan na' si'e premio. Na' ca chesa'aces bene' ca' do yichj do laže', ca' to to chio' cheyala' soacho gwzenagcho che Diosen' do yichj do laže'cho cont gone' soacho mbalaz cate' yežincho gan' zoen'.

25 Bene' güitj ca' chosochejlaže' bi chesone' con can' ža cuerp chegaquen' cont chesaque' bene' gual, le chesaclaže' yesone' gan cate' yeseyitje' na' yesezi'e premio, la'czla' dan' chesezi'en naquen to da' te che. Na' chio', chzenagcho che Diosen' cont si'cho to da' güen da' bi te chen.

26 Da'nan' bi gona' ca to bene' chxonj, to bene' bi nezde' ga cheyala' yežine', o ca to bene' chdi'e' len ponet, bene' bi nezde' ga cuaže'.

27 Bi chzenaga' che da' mal cate' žan gona' da' mal len cuerp chian', san chona' con ga zelao choeda' cont chona' can' chazlaže' Diosen'. Le nezda' še gwzenaga' che da' malen', bi yebe Diosen' neda' la'czla' ba gwduxjue'eda' xtižen' len bene' yoble.

10

Cheyala' na'yañe'cho cont bi goncho da' malen'

1 Bene' migw, chaclaža' nezele Diosen' gwzoe' len yogo'lo' da' xozxtao' neto' bene' Israel cate' besyechoje' Egipto, le yogüe' gosenite' xan to bejw gan' gwyo'o Diosen', na' Diosen' bene' cont yogüe' gosodie' nisdao' da' nzi' Nisdao' Xna.

2 Na' yogüe' gosaque' txen len da' Moisésen' cate' gwche'e' legaque' gan' gwzialao bejon' laogaque' na' cate' gosodie' nisdao'n'.

3 Na' yogüe' gosagüe' toze yela' guagw da' bnežjw Diosen' legaque'.

4 Na' yogüe' gose'eje' toze nis da' bnežjw Diosen' legaque'. Na' nis da' gose'eje' bchojen lo yej, na' guac nacho Criston' goque' yej gan' bchoj nisen', le Criston' gweyjlene' legaque'.

5 Na' la'czla' Diosen' goclene' yogüe', zane' bi gosone' cont yebe Diosen' legaque', na' da'nan' gosebiaye'e latje dašen'.

6 Na' yogo' da' goc chegaque' chzejni'in chio' bi cheyala' selaže'cho goncho bi da' mal can' goson legaque'.

7 Da'nan' chnia' le'e, bi šejnilaže'cho l' gua'a lsaca' can' goson bal' da' xozxta'oto' ca'. Le nyoj Xtiža' Diosen' žan: "Gosebi'e gose'ej gosagüe' na' gosenite' gosone' l'ni."

8 Na' lecze bi cheyala' gata'lencho no'ole bi nac no'ol checho o bene' byo bi nac bene' checho. Can' goson zan da' xozxta'oto' cani', na' da'nan' šonechoa mile' gosate' yela' güen da' xinj chegaquen' lao toze ža.

9 Bi cheyala' goncho Xancho Criston' prueba še gone' can' ba gwnen'. Cani' bal' da' xozxta'oto' ca' bi gosejle'e Diosen' gaclene' legaque' can' gwnen', na' Diosen' gwsele' bel' znia gosotba' legaque'.

10 Na' lecze bi cheyala' bixjwcho len Diosen' can' goson bal' da' xozxta'oto' ca' cani', na' Diosen' gwsele' to angl che' bene' betue' legaque'.

11 Yogo' da' ca' gosac chegaque' zjanyojen le'e Xtiža' Diosen' cont chozzejni'in chio' nac cheyala' goncho zoacho na'a, le ba zoa yeyož yežlion'.

12 Da'nan' note'tezcho še chaquecho ba zoachachcho chejnilaže'cho Jesu-criston', cheyala' na'yan'cho naquen' goncho cont bi lažo'cho lo da' malen'.

13 Bite'teze da' mal da' žan goncho o da' chac checho, bi nacho zdebechle chac checho can' chac che note'teze bene'. Diosen' zoacze' chaclene' chio' can' žen', bi cho'e latje gac checho da' bi soecho. Na' chzejni'ide' chio' nac goncho cont soecho bi goncho da' malen'.

14 Da'nan' bene' migw ben' chacda', le cuejyichj yogo' bi da' cheson bene' chesejnilaže' l' gua'a lsaca' ca'.

15 Ba chejni'ile na' guac gonle xbab che da' quinga chzejni'ida' le'e cont šejni'ile choa' diža' da' zaca'.

16 Na' da' ca' che'ej chagwcho chjayze'echo bi zejen len chio' da' got Criston', choe'cho yela' choxcen che Diosen' cate' che'ej chagwchon. Na' dan' che'ejcho zejen chio' chejnilaže'chone' naccho txen len Criston' can' blalj xchene' cate' gosote'ne'. Na' dan' chagwcho late' güeje, zejen naccho txen len cuerp che Criston'.

17 Na' can' nac toze yetextil da' chzoxjcho chagw yogo'cho late' güejen, lecze ca' yogo' chio' chejnilaže'cho Criston' naccho toze len lježcho, le toze yetextilen' chagwcho txen.

18 Le gon xbab can' cheson bene' Israel gualaž cheto' ca', chesote' beyixe' cate' chesonxene' Diosen', na' note'tez bene' chesagüe' xpela' ben' chesoten' zjanaque' txen chesonxene' le'.

19 Bi chaclaža' gonle xbab žia' l' gua'a lsaca' ca' zjanaquen da' zaca' o yela' guagw da' chjasežia bene' laogaquen naquen nža'le len bite'teze yela' guagw.

20 Gague can', le cate' bene' chosožie' bi da' chosožie' lao l' gua'a lsacan' dan' chesejnilažen', chosožien' lao da' xigüe' ca', gague lao Diosen', na' bi chaclaža' gacle txen len da' xigüe' ca'.

21 Bi gac ye'ej gagwcho da' che'ej chagwcho chjayze'echo bi zejen da' got Xancho Criston' na' lecze ye'ej gagwcho gonxencho da' xigüe' ca'. Bi gac ye'ej gagwcho chopten.

22 Ža'a Diosen' chio' še goncho ca'. Na' bi naccho bene' gual ca' Diosen' cont soecho bi da' gone' gac checho.

Bi goncho da' chaque bene' lježcho naquen mal

²³ Chesene': "De latje goncho bite'teze", perw nezecho gague yogo' da' choncho naquen güen, na' la'czla' še de latje goncho bite'teze, gague yogo' da' choncho chaclenen chio'.

²⁴ Ne tocho bi cheyala' goncho da' naquen güen len chio'ze, san goncho xbab še naquen güen len bene' lježcho.

²⁵ Bite'teze bela' chesote' lagüe' ya'a le gagon' na' bi nable še bosožien' lao l gua'a lšacan' chesejnilaže', cont bi gaczejlaže'le še naple doła' gagwlen.

²⁶ Le Xtiža' Diosen' nyojen žan: "Che Xancho Dios yežlio nga, benač, beyixe' na' yogo'te da' zjade lo yežlion'."

²⁷ Na' cate' bene' bi chesejnilaže' Criston' chesaxe' chio' gagwcho ližgague', še šejcho nach guac gagwcho bite'teze da' yesone' gagwcho sin cbi nabcho še bosožien' lao l gua'a lšacan', le Diosen' bi che'nde' gaczejlaže'cho še napcho doła' che'ej chagwchon.

²⁸ Perw še no ye' chio': "Da' nga bosožie' lao l gua'a lšacan'", bi gagwchon cont bene' gwna ca' bi gadde' lenczcho chejnilaže'cho l gua'a lšacan', o gadde' napcho doła' chagwchon.

²⁹ Bi nacho naquen da' mal len Diosen' gagwchon, con naquen da' mal len ben' gwna ca'.

Na' chñable žbixčhen' cheyala' cuejyichjcho bich goncho bi da' choncho še bene' lježcho chesacde' napcho doła' chonchon?

³⁰ Na' chonle xbab žbixčhen' ža bene' lježcho choncho da' mal chagwcho to yela' guagw še choe'cho yela' choxclen che Diosen' neche len?

³¹ Quinga naquen, cate' che'ej chagwcho o bite'teze da' choncho, cheyala' gonchon cont gaxen Diosen'.

³² Na' bi cheyala' goncho bite'teze da' choncho še gonen cont bene' yoble yeselažoe' lo da' mal, la'czla' še zjanaque' bene' Israel gualaž cheton', o še bene' bi zjanaque' bene' Israel, o še ljež chio' chdop chžagcho chonxencho Diosen'.

³³ Can' chona' neda', bite'teze da' chona' cheyiljwlaža' nacle gona' cont to to bene' soe' mba. Na' bi cheyiljwlaža' nacle gona' da' gaclen cuina' san da' gaclen bene' zan cont gata' yela' mban chegague' toli točane.

11

¹ Neda' chona' con can' ben Criston', na' chñeyoeda' le'e gonle can' chonan'.

Can' cheyala' yeson no'ol ca' cate' chdop chžagcho chonxencho Diosen'

² Na' na'a chnia' le'e chonle güen zoale chjayze'ele neda' na' chonle ca ba bzejni'ida' le'e.

³ Na' chaclaža' šejni'ile da' nga. Yogo' bene' byo cheyala' yosozenague' che Criston', le Criston' naque' blaoch ca legaque', na' yogo' no'ole cheyala' yosozenague' che bene' che', le bene' chen' naque' blaoch ca no'olen'. Ca'cze chon Criston', chzenague' che Xe' Diosen', le lecze naque' blaoch ca le'.

⁴ Note'teze bene' byo še nzoa xłape' cate' choł güiže' Diosen' šlac ndop nžagle txen o cate' chyixjue'ede' bi da' ža Diosen', naquen da' yela' zto', le zejen bi nac Criston' bene' blaol len le'.

⁵ Na' note'teze no'ole še choł güiže' Diosen' o chyixjue'ede' xtiža' Diosen' sin cbi gwcuše' yichje' cate' chdop chžagle txen, naquen yela' zto' par bene' che', le naque' blaoch ca le'. Na' no'olen' chon ca' naque' lebe len no'ol ca' nšibdi yichjagae', no'ole ca' bibi yela' zto' zjanombi'e.

⁶ Na' še no'olen' bi chaclaže' gwcuše' yichje' can' ba gwnian', yejni'a gwšib doxen yichjen'. Da'n'an' še chaquele zto' gwšiblen, nach gwcuše'czlen can' cheson yezica'chle no'ol ca'.

⁷ Na' le'e bene' byo, bi cheyała' gwcuase' yichjen' cate' yol güižle Diosen' o cate' chixjue'ele bi da' ba gwna Diosen' le'e, le Diosen' gwleje' le'e cont gwlo'ele bene' nacchgüe' bene' zaca'. Na' le'e no'ole, Diosen' gwleje' le'e cont gwlo'ele nac bene' che tole bene' zaca'.

⁸ Diosen' bi bene' bene' byo len žit costiy che no'olen', san gwleje' žit costiy che bene' byo nechon' benen' no'ole.

⁹ Na' Diosen' bi bene' bene' byon' cont gaclene' no'olen', san bene' no'olen' cont gaclene' bene' byon'.

¹⁰ Da'nan' no'ol ca' cheyała' yosocuaše' yichjgaque' cont yosolo'e nac bene' byon' blaoch ca legaque', le angl ca' chosocuaše' laogaque' lao Diosen'.

¹¹ Perw naccho txen len Xancho Jesucriston' la'czła' še naccho bene' byo o še no'ole, na' bi cheyała' yeson no'olen' xbab bi cheseyažjde' bene' byo na' neca bene' byo yesone' xbab bi cheseyažjde' no'olen'.

¹² Naquen da' li Diosen' gwleje' žit costiy che bene' byo na' benen' no'ole, na' lecze naquen da' li yogo' bene' byo zoa no'ole gwxañ le', na' Diosen' bene' yogo' benač len bica'chle da' zjade.

¹³ Le gon xbab chele na' gacbe'ele bi chazlaže'cho cate' to no'ole choł güiže' Dios sin cbi hcuaše' yichje', le can' nac costumbr chechon'.

¹⁴ Na' lecze bi chazlaže'cho še bene' byo bi gwšib yichjen' na' con chosožien' ca cheson bene' bxej.

¹⁵ Perw no'olen' xdanchgua nac yiša' yichjgaquen' cate' žian' da' toñe, na' Diosen' none' yiša' yichjgaquen' gaquen to da' gwcuasen' yichjen'.

¹⁶ Še nole chaquele gwšaše' che da' nga ba gwnia', cheyała' nezele neto' postlw bi choe'to' latje yesone' nža'le gate'teze chesedop chesežag bene' chesejnilaže' Diosen'.

Bi chjasyeze'ede' Criston' cate' chese'ej chesagüe'

¹⁷ Na' de yeto da' nia' le'e, le bi chonle güen cate' chdop chžagle chonxenle Criston' na' bi chaclenen le'e, san chonen mal.

¹⁸ To da' bi chonle güen, chesene' cate' chdop chžagle chonxenle Criston' bi chonle txen len lježle, na' chacda' nacljan' li can' chesenen'.

¹⁹ Na' ca'ljan' cheyała'cze gac da' bi chon lježle txen, le chlo'en non' chejni-laže' Criston' do yichj do laže' na' non' gague da' li chejni-laže'ne'.

²⁰ Na' cate' chežagle chagwle txen, bi chonle xbab bnežjw cuin Xancho Jesucriston' neche xtoła'chon', la'czła' chdop chžagle cont šjayze'elen.

²¹ To tole che'ej chagwle da' chyob chdoxe'le, neca chbez lježle. Da'nan' balle ne' chdonle cate' chedagwle na' yeballe che'ej chagwxattele na' chože'le.

²² Yejni'a yega'an ližle ye'ej gagwle clcl ca gagwle lao bene' yaše' bene' bi de chegaque'. Da' chonle ca', nacia' chgue'e lježle bene' cheyała' yesaque' txen len le'e da' chonxenle Diosen', na' chonle cont chesaque' tole da' bi de chegaque'. Na' naquen malchgua da' chonle ca', bi gac ni'a chonle güen.

Chjayze'echo bnežjw cuin Xancho Criston' neche xtoła'chon'

(Mt. 26:26-29; Mr. 14:22-25; Lc. 22:14-20)

²³ Xancho Jesúsen' bzejni'ide' neda' can' šjayze'echo da' bnežjw cuine' neche xtoła'chon'. Na' neda' ba bzejni'ida' le'e can' goquen', že' cate' Judasen' bdie'ne' lo na' ben' besegue'ede' le', Xancho Jesúsen' bexue' to yetextil.

²⁴ Na' be'e yeła' choxclen che Diosen' na' beyož be'e yeła' choxclen che' na' bzoxjen', na' gwne': "Le gagw yetextil nga. Lenña' naquen cuerp chia' da' chnežjua' neche xtoła'le. Na' quinga gonle šjayze'ele bi zejen len le'e dan' gwnežjw cuina' yesote' neda'."

25 Na' lecze ca' bene' cate' beyož gosagüe' xše', beꝁue' to vas nis uvas na' gwne': "Dan' yože lo vas nga zejen da' cobe dan' gwna Diosen' gone' gaclene' le'e. Na' lalje xchenan' cont gac can' gwne' gonen'. Na' bate'teze ye'ejle ca da' nga chona' che'ejle na'a, le šjayze'e bi zejen len le'e dan' gwnežjw cuina' yesote' neda'."

26 Nachen' yogo' ni'a cate' chagwcho yetextilen' na' cate' che'ejcho nis uvasen' chjayze'echo can' bene'na', na' chyixjue'echo can' bnežjw cuine' gote' neche xtola' benachen'. Na' can' gonchczcho ślac biᅇa' yide' da' yoble.

Naquen' goncho cate' chjayze'echo yela' got che Xancho Jesúsen'

27 Can' naquen, še chagwcho yetextilen' na' che'ejcho nis uvasen' cont chjayze'echo yela' got che Xancho Jesúsen' perw še bi chonxenchone' cate' choncho ca', napcho doła', le chonchon ca da' bibi zaca' cuerp che' dan' bnežjue' na' xchene' da' blalje' neche xtola'chon'.

28 Da'nan' cheyala' gonyane'cho xbab še choncho can' chazlaže' Diosen' cate' za' gagwcho yetextilen' na' ye'ejcho nis uvasen' cont šjayze'echo yela' got che Xancho Jesúsen'.

29 Le še ye'ej gagwcho sin cbi gonxencho Xancho Jesúsen' da' bnežjw cuine' gote' neche xtola'chon', Diosen' gone' chio' castigw.

30 Na' zanle bi zoale güen na' chacšenele na' bał bene' ba gosate' da' bi gose'ej gosagüen' do laže'.

31 Na' še gacbe'echo na' goncho byen soacho binlo len Xancho Diosen', bi gone' chio' castigw cate' che'ej chagwchon.

32 Na' cate' napcho doła' can' che'ej chagwchon, Xancho Diosen' chone' chio' castigw cont yetinjecho da' malen' choncho na' bi si'cho castigw tołi tocanē can' yesezi' bene' bi chesejnilaže'ne'.

33 Da'nan' bene' migw chia', cate' chdop chžagle txen che'ej chagwle, le cueze lježle na' ye'ej gagwle txen.

34 Na' še chbił chdonle, yejni'a yega'an ližle ye'ej gagwle, clēl ca gon Diosen' le'e castigw can' chonē caten' chdop chžagle. Na' che bichle da' chaclaža' gwzejni'ida' le'e, cate' yida' gan' zoalena' nach nia' can' gonlen'.

12

Spiritw che Diosen' chaclenen to tocho cont choncho bi da' choncho

1 Na' bene' migw, chaclaža' nezele ca chon Spiritw che Diosen' chaclenen to to chio' chejnilaže'cho Jesucriston'.

2 Nezele cate' biᅇa' šejnilaže'le Criston' gwyejle'le diža' güenlaže' na' da'nan' gwyejnilaže'le l gua'a lsaca' da' bibi biš grasyw nye'.

3 Na' da'nan' chaclaža' šejni'ile da' nga na'a. Note'teze bene' že': "Chgue'eda' Jesúsen'", bi zoa Spiritw che Diosen' len le', perw bene' že': "Jesúsen' naque Xana'", že' ca' da' zoa Spiritw che Diosen' chaclenen le'.

4 Toz Spiritw che Diosen' zoa, perw nža' nža' da' chaclenen to tocho choncho o nezecho.

5 Toz Xancho Jesucriston' chonxencho la'czla' nža' nža' ca chon to tocho xšinen'.

6 Na' la'czla' nža' nža' da' chon to tocho, toz Diosen' chone' cont to tocho chac choncho xšinen'.

7 Nacbia' zoa Spiritw che Diosen' len chio', le chonen cont to tocho chac choncho da' chaclenen yogo'cho.

⁸ Diosen' ba nsi'e xnezen' chon Spiritw chen' cont bałcho chac chzejni'icho bene' yoble xbab sina' chen', na' ľecze Spiriton' chonen cont yebałcho nezecho to da' nezecho na' chzejni'ichon bene'.

⁹ Na' ľecze toz Spiritw chen' chonen cont bałcho chejnilaže' chguacho Diosen' na' chac bite'teže da' chnabechone'. Na' da' chaclen Spiriton' chio', bałcho chac choncho cont chesyeyaque bene' chesacšene.

¹⁰ Na' ľecze Spiritw nan' chonen cont bałcho chac choncho yela' guac, na' balcho chac chyixjue'echo bi da' ba gwna Diosen' chio'. Na' Spiritw che Diosen' chonen cont bałcho chacbe'echo che da' chesena bene' o da' cheson bene' še zan' che Diosen' o še zan' che da' xigüe' ca', na' Spiriton' chonen cont bałcho choe'cho gwde gwdele diža' da' bi nsedcho, na' yebałcho chac che'cho bene' ľježcho bi zeje diža' ca'.

¹¹ Toz Spiritw che Diosen' chaclenen yogo'cho cont choncho yogo' da' chaclažen' gon to tocho.

Yogo' chio' chejnilaže'cho Criston' naccho toze can' nac cuerp chechon'

¹² Cuerp chechon' nsan' zan part, perw zjangoden' txen na' naquen toze. Na' ľecze ca' chio' chejnilaže'cho Criston' naccho toze len ľe' na' len bene' ľježcho ca'.

¹³ Bał chio' naccho bene' Israel na' yebał chio' bi naccho bene' Israel. Bałcho naccho esclavo na' yebałcho bi naccho. Perw yogo'czcho gwzoacho nis par blo'echo ba ben Spiritw che Diosen' cont naccho txen len Criston', na' ľecze toze Spiritw che Diosen' zoan ľo' yichjlaždao' yogo'cho.

¹⁴ Cuerp chechon' nsan' zan part, na' nža' can' nac to to parten'.

¹⁵ Ni'acho guac nan: "Bi naca' toze len cuerpen', ľe bi naca' ne'en." Perw ľa'czła' še nan ca', naquen toze len cuerpen'.

¹⁶ Na' nagcho guac nan: "Bi naca' toze len cuerpen', ľe bi naca' yejlagüen'." Perw ľa'czła' še nan ca', naquen toze len cuerpen'.

¹⁷ Šaca' doxen cuerp chechon' naquen yejlaoch, bi gac yenecho. Na' šaca' doxen cuerpen' naquen nagcho, bi gac ľe'echo.

¹⁸ Perw Diosen' bžie' bia' nsa' cuerp chechon' zan part da' cheson žin con can' gwyazlaže'.

¹⁹ Na' bi nya' cuerp chechon' šaca' nsan' toze part.

²⁰ San cuerpen' nsan' zan part da' naquen txen cont naquen toze cuerp.

²¹ Da'n'an' yejlaochon' bi gac yen' na'chon': "Bi chyažjda' ľe'." Na' neca gac ye' yichjchon' ni'achon': "Bi chyažjda' ľe'."

²² Na' ľa'czła' bał part cuerp chechon' chaquecho bitec naquen da' gual, perw chyažjchon.

²³ Na' ľa'czła' bał part cuerp chechon' chaquecho bitec bi zacan', perw chi' yichjchon, da'n'an' cheyacw xacho. Na' part che cuerp chechon' da' bi chaclaže'cho le'e bene', chcuasē'chon len xacho.

²⁴ Perw part da' nsa' cuerp chechon' da' naquen xdan, bi chcuaše'chon. Na' Diosen' none' cont chi' yichjcho che part ca' da' bi zjanaquen xdan.

²⁵ Na' none' cuerp chechon' toz cont to to parten' chapši'i ľježen lebze na' chesonen žin txen.

²⁶ Na' še guecho chac, bi zoa güen doxen cuerp chechon' še ca'. Na' še to parten' chaquecho xdan o chac chonen güenchgua, doxencho chebecho.

²⁷ Na' chio' chejnilaže'cho Criston', yogo'cho ngode'cho txen len ľe' na' yogo'cho txen naccho cuerp chen', na' guac naccho to tocho naccho ca to part güeje cuerp chen'.

28 Na' ca nac chio' chdop chžagcho chonxencho Criston', da' nechw Diosen' gwleje' neto' nacto' postlw, na' da' gwchope gwleje' bal bene' cont cheseyixjue'ede' da' ba gož Diosen' legaue'. Na' da' gwyone gwleje' yebal bene' chososed cheselo'ede' xtižen'. Na' lecze gwlej Diosen' bene' cheson yela' guac, na' gwleje' bene' cheson cont cheseyaque bene' chesacsene, na' gwleje' bene' chesaclene' bene' yoble cate' bi da' cheseyažjde'. Na' gwleje' bene' chesenabia' chio' chdop chžagcho chonxencho Criston', na' gwleje' bene' chac cheso'e gwde gwdele diža' da' bi zjansede'.

29 Gague yogo'cho naccho postlw. Gague yogo'cho chac chyixjue'echo bi da' ba gwna Diosen'. Gague yogo'cho chac chsed chlo'echo bene' xtižen', na' gague yogo'cho chac choncho yela' guac.

30 Gague yogo'cho chac choncho cont cheseyaque bene' chesacsene. Gague yogo'cho chac choe'cho gwde gwdele diža' da' bi nsedcho. Gague yogo'cho chac chozejni'icho bi zejen diža' ca'.

31 Le yeyilwlaže' gaclen Spiritw che Diosen' le'e cont gac gonle da' ca' zjanacch da' zaca'.

Na' de yeto da' zaca'ch naquen' cheyala' soa cuezcho.

13

Cheyala' gague lježcho

1 La'czla' še chaccho gwde gwdele diža' da' chesac benachen' na' da' chesac angl ca', perw še bi chaque ljež benachcho, bibi zaca'cho. Zaca'lebcho ca ya da' chonen sšag cate' chososižen' o ca platiy da' chososiž bene' güecuež.

2 Na' la'czla' še ba goclen Spiritw che Diosen' chio' cont chac chyixjue'echo bi da' ba gwne' chio', bibi zaca'cho še bi chaque ljež benachcho. Na' la'czla' še nezecho yogo'lol da' nono na' neze, na' la'czla' še chejni'icho yogo'lol da' naquen da' zaque', bibi zaca'cho še bi chaque ljež benachcho. Na' la'czla' še leca chejnilaže'cho Diosen' cont chone' bite'teze da' zdebe cate' chnabechone' gonen', bicze bi zaca'cho še bi chaque lježcho.

3 Na' še gwnežjwcho bene' yaše' yogo' bi da' de checho na' gwnežjw cuincho yosozey bene' chio', bi gaclen chio' lao Diosen' še bi chaque lježcho.

4 Še chaque lježcho, chapcho yela' chxenlaže' len legaue', na' choncho güen len legaue', bi chgue'echo legaue' še chac güen chegaue', na' bi chonxen cuincho len xtiža'cho, na' bi cha'laže'cho.

5 Na' cate' chaque lježcho bi choncho nacteze len legaue', bi choncho xbab che cuinzcho, bi chbixjwcho, na' bi chgo'olaže'cho.

6 Na' cate' chaque lježcho bi chbecho še chon bene' lježcho da' mal, san chbecho še chone' da' zej to li.

7 Na' cate' chaque lježcho, chapcho yela' chxenlaže' bite'teze da' chesonde' chio', na' choncho xbab güen che yogo'lol bene', na' zoacho lez yesone' güen yogo' las, na' chyo chchejlaže'cho bite'teze da' chesone bene' chio'.

8 Gwbat te che da' cheyala' gague ljež benachcho. Perw gwžin ža cate' noch no chixjue'e bi da' ba gož Diosen' le', na' gwžin ža cate' bich yesoe' bene' gwde gwdele diža' da' bi zjansede', na' gwžin ža cate' bich yažje bichle da' šejni'icho.

9 Biṇa' nezecho na'a yogo' da' ža' nezecho, na' biṇa' gac chixjue'echo binlo yogo'lol da' ba gož Diosen' chio'.

10 Perw gwžin ža cate' gon Diosen' cont yogo' da' de gaquen can' cheyala' gaquen. Cana' te che da' bi naquen ca cheyala' gaquen.

¹¹ Cate' goccho bidao' be'cho diža' can' chesoe' note'teze bidao' diža', bencho xbab can' cheson note'teze bidao' xbab, na' gwyejni'icho can' chesejni' i bidao'. Na' na'a ba gwcha'ocho na' ba gwlejiyichjo bich choncho can' cheson bidao'.

¹² Na'a bina' nezecho binlo da' nac che Diosen'. Zaca'lebcho ca bene' chne'e to lo spejw da' bitec chlo'e binlo. Perw gwžin ža cate' le'echo binlo na' nezecho doxen da' nac che Diosen', na' canan' gombia'chone' binlo ca binlo nombi'e chio'.

¹³ Nachen' da' quinga šone non Diosen' mandadw goncho toli tocanē: šejnilaže'chone', soacho lez gone' ga gacch güen checho, na' gaquecho Diosen' na' ljež benachcho. Na' da' zejechen goncho lao da' ca' šone, gaquecho Diosen' len ljež benachcho.

14

Bene' ca' chesoe'lene' Diosen' diža' da' bi žjansede'

¹ Cheyala' cue' yichjle gaquele Diosen' na' len ljež benachle, na' lecze cheyala' selaže'le gaclen Spiritw che Diosen' le'e gonle con bi da' chaclažen' gonle. Na' lao da' ca' chaclenen bene' bi da' chesone', da' zaca'chen da' cheseyixjue'ede' bi da' ža Diosen'. Lenna' cheyala' selaže'chgualē gonle.

² Bałcho chon Spiritw che Diosen' cont chac choe'lencho Diosen' gwde gwdele diža' da' bi nsedcho. Na' cate' choe'lenchone' dižan' nac ca', bi choe'lencho benachen' diža', le notno chejni' i xtiža'chon', con naquen diža' da' chon Spiritw che Diosen' choe'lenchone' la'czla' bi chejni'ichon.

³ Perw bene' chyixjue'ede' bi da' ba gwna Diosen', chaclene' bene' yoble yesenita'chache' yesejnilaže' Diosen', na' yesenite' mbalazech, na' chesyey-acxenlaže' še bi da' chesac chegaque'.

⁴ Cate' choe'cho gwde gwdele diža' da' bi nsedcho, yichjlažda'ocho na'zen' chaclenen. Perw še chyixjue'echo bi da' ba gwna Diosen', chaclenen yogo' chio' chdop chžagcho chonxencho Criston'.

⁵ Yebeda' šaca' yogo'le gac güe'lenle Diosen' gwde gwdele diža' da' bi nsedle, perw yebechda' juisyw šaca' yogo'le gac chixjue'ele bi da' ye' Diosen' le'e. Lenna' zejechen clēl ca güe'lenchone' gwde gwdele diža' šlac ndop nžagcho chonxencho Diosen'. Le še nono zoa no gwzejni' i bi zejen gwde gwdele diža' dan' chon Spiriton' nacho, bitw gaclenen bene' ljezcho yesenita'chache' yesejnilaže'ne'.

⁶ Bene' migw, nezda' bi gaclenen le'e še güe'lēna' Diosen' gwde gwdele diža' da' bi chejni'ile caten' yedēna'a le'e. Perw gaclenen le'e še gwzejni'ida' le'e bi da' ba bzejni' i Diosen' nēda'. Na' gaclenczen še gwzejni'ida' le'e bichle da' nezda' che Diosen', o bi da' ba gože' nēda' cont chixjue'eda' le'e, o še gwsed gwlo'eda' le'e bi zeje tixžen'.

⁷ Ca nac bžejo, bi mbanen perw zoa š'in cate' chcuež bene' len, na' lecze ca' arpan' cate' chyin bene' len. Na' še toz nota da' chcuež ben' len bžejoa' o toz nota da' chyin ben' cate' chyine' arpan' bate'teze, nono gacbe'e bin' chosocueže' še bi yosoše'e güeltze nota dan' chosocuežen'.

⁸ Cate' zoa to bene' chcueže' trompeta cont cheseneže soldadw ca' naquen' yesone', še bi gwcuēžen' binlo, bi yesejni'ide' cheyala' šja'aque' lo gwdile.

⁹ Ca'cze naquen len chio', še güe'lencho Diosen' diža' da' bi chesejni' i bene', bi gaclenen legaque', le len legaque' naquen ca che bene' chšalj toze'.

¹⁰ Nezecho bene' že' doxen yežlion' gwde gwdele diža' da' chesaque', na' to to benach chesejni'ide' dižan' goljelene'.

11 Na' še chio' bi chaccho diža' da' chac yeto bene', nezecho naque' bene' zito' len chio' na' naccho bene' zito' len le'.

12 Na' dan' chi' yichjle gaclen Spiritw che Diosen' le'e cont gac gonle bi da' chaclaže'le gonle, ca'czen cheyała' cue' yichjle gaclenen le'e gonle da' gaclen lježe cont yogo'le soachachle šejnilaže'le Diosen'.

13 Na' še Spiritw che Diosen' gonen cont güe'lencho Diosen' gwde gwdele diža' da' bi nsedcho, cheyała' nabcho lecze gaclenen chio' gwzejni'icho bene' bi zeje diža' dan' choe'lencho Diosen'.

14 Le cate' Spiriton' chonen cont chol güiža' Diosen' len diža' da' bi nseda', con nezda' lo' yichjlažda'ogua' choe'lena' Diosen' diža', perw bi chona' xbab chen, le bi chejni'idan'.

15 Quinga cheyała' goncho cate' chol güižcho Diosen', cheyała' güe'lenchone' bite'teze diža' da' chon Spiritw chen' chio' la'czla' še bi chejni'ichon, na' lecze cheyała' güe'lenchone' diža' da' chejni'icho. Na' cheyała' gołcho bite'teze da' chon Spiritw che Diosen' gołcho la'czla' še bi chejni'ichon, na' lecze cheyała' gołcho da' chejni'icho.

16 Le še chonxencho Diosen' o choe'cho yela' choxcen che' len diža' da' bi chejni'i bene' yoble, bene' bi chesejni'i dižan' choe'chon' bi gac yesonxene' Diosen' txen len chio'.

17 La'czla' še choe'cho yela' choxcen che Diosen' binlo, perw bi chaclenen bene' yoble še bi chesejni'ide' xtiža'chon'.

18 Choa' yela' choxcen che Diosen' da' choe'lencha'ne' gwde gwdele diža' da' bi nseda' clcl ca le'e.

19 Perw cate' ndop nžagcho chonxencho Criston' yejni'a gua' gayo'ze diža' da' yesejni'i bene' cont gwzejni'ida' legaque', clcl ca gua' ši mil diža' da' bi yesejni'ide'.

20 Bene' migw, bi cheyała' šo'cho xbab che bidao' biña' šejni'i, san šo'cho xbab che bene' chejni'i. Perw len da' malen' cheyała' gaccho ca bidao' bi' biña' gon da' mal.

21 Xtiža' Diosen' nyojen žan: "Neda' Dios gona' cont bene' zito' yesoe'lene' bene' Israel quinga xtiža', perw ne ca'cze bi yosozenague' chia'." Can' ža Xancho Diosen'.

22 Da'nan' nezecho Diosen' chchine' gwde gwdele diža' da' choe'lenchone' cont bene' bi yesejnilaže'ne' yesacbe'ede' zoacze' len chio'. Na' chio' chejni-laže'chone', Spiritw che Diosen' chonen cont bene' chesejixjue'ede' chio' bi da' ba gož Diosen' legaque'. Can' chone' chzejni'ide' chio'.

23 Le gon xbab nac gac še šlac ndop nžag yogo'cho txen chonxencho Criston' yogo'cho güe'lencho Diosen' gwde gwdele diža' da' bi nsedcho, na' yesela' bal bene' bi chesejni'i naquen' choncho chonxenchone' o bene' bi chesejnilaže'ne', legaque' yesene' chactontcho.

24 Perw še bene' ca' bi chesejnilaže' Diosen' o bene' ca' bi chesejni'i naquen' chonxenchone' yesela'aque' šlac yogo'cho chzejni' lježcho bi da' ba gož Diosen' chio', nach yesacbe'ede' zjade xtole' cate' yesende' xtiža' yogo'cho, na' yesyetinjide' da' malen' chesonen'.

25 Le yesacbe'ede' Diosen' nomb'e xbab da' chesone' lo' yichjlažda'ogüen', nach yosozoa xibe' yesonxene' Diosen' na' yesene': "Da' licze zoa Diosen' len bene' quinga."

Cheyała' gonxencho Diosen' binlo na' bi gonchon nacteze

26 Bene' migw, cate' chežagle chonxenle Diosen' quinga gonle: Balle de to da' golle gonxenle Diosen', na' balle de da' gwsed gwlo'e lježe, na' balle de da'

ba gož Spiritw che Diosen' le'e, na' baŕle de gwde gwdele diža' da' güe'le da' bi nsedle, na' yebaŕle chaclaže'le čixjue'ele bi zejen gwde gwdele dižan' ba gwna bene' lježlen'. Naquen güen gonŕe yogo' da' ca' con še gonŕen ga gaclenen lježle.

²⁷ Na' še nole güe'lenŕe Diosen' gwde gwdele diža' da' bi nsedle, le güen', perw do čhopzle o še šonzle na' tgüeje tgüejle, na' tena' choj bene' yozejni'ide' bi zejen diža' dan' ba be'le.

²⁸ Na' še nono zoa no yozejni'i bi zeje dižan', bi cheyaŕa' güe'le dižan' zižje gan' ndop nžaglen', con lo' lažda'ole na'zen' güe'lenŕe Diosen' diža', še ca'.

²⁹ Na' še čixjue'ele bi da' ba gwna Diosen', lecze do čhopzle o šonzle chojle čixjue'elen šlac ndop nžagle na' yezica'chle bene' yosozenague' na' yesone' xbab še dan' žalen' naquen lebze len Xtiza' Diosen' dan' nyoj.

³⁰ Na' še šlac tole choe'le diža', Diosen' gwzejni'ide' yetole to da' čixjue'ele, cheyaŕa' cuezle na' güe'le latje čixjue'e ben' yeto dižan'.

³¹ Yogo'le guac čixjue'ele da' gož Diosen' le'e, perw gonŕen tgüeje tgüejle cont yogo'le šejni'ichle na' gaclenen le'e.

³² Na' le'e chyixjue'ele bi da' ba gwna Diosen', cheyaŕa' čixjue'elen con baten' naquen güen čixjue'elen.

³³⁻³⁴ Le Diosen' chaclaže' gwsa'le binŕo da' chonŕe caten' chdop chžagle chonxenŕne' na' bi gonŕen nacteze.

Na' caten' chdop chžagle chonxenŕe Criston', cheyaŕa' gwžonŕe yesoe' no'ol ca' diža' šlac ndop nžagle, can' chesežone' gate'teze chesedop chesežague' chesonxene'ne'. Cheyaŕa' yesenita' no'ol ca' yosozenague', le can' ža leyna'.

³⁵ Na' še bi da' chesaclaže' no'ol ca' yesenezde', guac yesenabde' bene' čhegaque' cate' yesyežin ližgaque', le naquen da' yela' zto' še no no'ole güe'e diža' šlac ndop nžagcho.

³⁶ Le gon xbab, gague le'e gocle bene' nechw bene' gwyejnilaže' xtiza' Criston', na' bi nacho nezechle ca bene' chesedop chesežag ga yoble chesonxene'ne'.

³⁷ Še nole chaquele chac chyixjue'ele bi da' ba gwna Diosen' o še chaquele chaclen Spiritw che Diosen' le'e len bichle da' chonŕe, nachen' cheyaŕa' gache'ele da' quinga chzoja' le'e naquen da' non Xancho Criston' mandadw goncho.

³⁸ Na' note'teze bene' bi chejle'e še Xancho Criston' bene' cont bzoja' da' quinga, bi zaca' šejle'cho che' bite'teze da' že'.

³⁹ Na' quinga naquen bene' migw, le cuec yichjle gaclen Spiritw che Diosen' le'e cont čixjue'ele bi da' na Diosen', na' bi gwžonŕe yesoe' bene' gwde gwdele diža' da' chnežjw Spiritw che Diosen' yeso'e.

⁴⁰ Perw binŕo gonŕe yogo' da' chonŕe cate' chdop chžagle na' bi gonŕen nacteze.

15

Beban Criston' ladjo bene' guaten'

¹ Bene' migw, chaclaža' gonŕe xbab che diža' güen che Criston' da' ba be'lena' le'e. Ba bzenagle čhen na' zoačahčhle chejle'len.

² Na' nezele šjayzoale len Diosen' še soatezle gwzenagle che diža' güen čhen'. Na' še bi gwzenagle čhen, bibi zejen da' žale chejle'len'.

³ Diosen' bzende' neda' da' quinga da' zjanaquen la'zelagüe' da' zejen na' bach gwdixjue'edan' le'e. Criston' bnežjw cuine' gote' cont beque'e xtoła'chon' con can' nyoj Xtiža' Diosen'.

⁴ Nach bosocuaše'ne', na' beyon ža beyas bebane' ladjo bene' guat ca' con can' nyoj Xtiža' Diosen'.

⁵ Nach jaylo'elagüe' Pedron' na' gwdechle jaylo'elagüe' yezica'chle postlw ca'.

⁶ Beyoža' jayezlo'elagüe' gwdele gayo' gayoa bene' to ši'ize, bene' chesonx-ene' le'. Na' zan bene' ca' ne' zjamban, la'czla' bale' ba gosate'.

⁷ Nach jayzlo'elagüe' Jacobo. Gwde na' jayzlo'elagüe' yogo' postlw ca'.

⁸⁻⁹ Zbezte bedyelo'elagüe' neda', zaca'leba' ca' bi' golje cate' biña' žin ža, le cana' bchi bsaca' bene' ca' chesedop chesežag chesonxene' Criston'. Na' da'nan' chacda' bicze zaca' yososi'e neda' postlw.

¹⁰ Perw Diosen' nži'ilaže'de' neda' na' gwleje'nda' naca' postlw che', na' choncha' xšinen' clcl ca' bene' lježa' ca' yezica'chle. Na' nežda' gague chonan' neda', san Diosen' chaclene' neda' cont chonan'.

¹¹ Da'nan' bibi nonen še xtiža' nedan' ba bzenagle o še xtiža' nochle postlw ca', le toze can' chyxjue'eto' che Criston' na' can' nac dan' ba chejle'le chen'.

Yesyeban bene' guat ca'

¹² Yogo' neto' chyxjue'eto' beban Criston' ladjo bene' guat ca'. Da'nan' žbixchen' ža balle bi yesyeban bene' guat ca'?

¹³ Šaca' naquen diža' li dan' žale bi chosban Diosen' bene' guat ca', zejen bi beban Criston' še ca'.

¹⁴ Na' šaca' Criston' bi bebane' ladjo bene' guat ca', bibi zaca' xtižen' da' be'lento' le'e na' bibi zejen da' chejnilaže'lene' še ca'.

¹⁵ Ba be'lento' le'e diža' güenlaže' gwnato' Diosen' bosbane' Criston' ladjo bene' guaten' šaca' naquen diža' li dan' žale bi chosbane' bene' ba gosat.

¹⁶ Le šaca' bi chosbane' bene' ba gosat, lecze bi bosbane' Criston'.

¹⁷ Šaca' naquen da' li Diosen' bi bosbane' Criston', bibi zejen da' chejni-laže'chone' na' bi nacho beque'e xtoła'chon'.

¹⁸ Šaca' naquen da' li bi bosbane' Criston', ba gosebiayi' yogo' bene' ba gosat bene' gosejnilaže' Criston' še ca'.

¹⁹ Na' šaca' da' zoacho lez šjajzoalencho Criston' cate' yeza'cho yežlio nga naquen da' güenlaže', yela' zi' xench chac che chio' chejni'ilaže'cho Criston' clcl ca' che yezica'chle bene' še ca'.

²⁰ Perw na' da' li Diosen' bosbane' Criston' ladjo bene' guat ca', na' da'nan' nezecho žin ža yosbane' yezica'chle bene' chesejnilaže'ne' še ba gosate'.

²¹ Gwxex yela' goten' yežlio nga da' gwzoa' to bene' bene' da' mal, na' lecze ca'czen' goc, to bene' bene' cont žin ža yebancho ladjo bene' guat.

²² Le gwxex yela' goten' cate' Adanna' bene' da' malen', da'nan' yogo' benachen' chesate'. Nach Criston' bene' cont yogo' bene' yesaque' txen len le' yesenite' toli tocaņe.

²³ To tocho yebancho ladjo bene' guaten' cont soalencho Criston' con caten' ba bsi'e xnezenna'. Criston' gwžialagüe' bebane' ladjo bene' guat ca' na' cate' yide' da' yoble chio' chejnilaže'chone' lecze yebancho ladjo bene' guat še ba gotcho.

²⁴ Nach te che yežlio nga. Na' Criston' gwnitlagüe' yela' chnabia' che yogo' bene' cheseque'ede' Diosen' na' yeque'e yela' chnabia' che yogo' da' xigüe' ca'.

Na' yeyožen' Criston' gone' lo na' Xe' Diosen' yogo' da' nłane' chnabi'e na' yogo' non' chnabi'e.

²⁵ Diosen' b'zie' bia' zoa Criston' chnabia'che' ca' yogo' bene' ca' na' bichle da' ca', na' Diosen' gone' cont žin ža cate' gwlej gwšoše' bene' ca' na' bichle da' ca' bi cheson txen len le'.

²⁶ Na' cate' yeyož gwlej gwšoše' yogo' bichle da' bi chon txen len le', nach gwcueze' yela' goten'.

²⁷ Diosen' ba nsi'e xnezen' cont yogo' lo da' zjade zjanaquen lo na' Criston'. Perw bi nacho zejen Diosen' naque' lo na' Criston', san Diosen' nsi'e xnezen' cont yezica'chle bene' na' bica'chle da' zjade yesaquen lo na' Criston'.

²⁸ Nach cate' ba ben Diosen' cont yogo' da' zjade ba zjanaquen lo na' Criston', nach Criston' gwlo'e lecze le' naque' lo na' Xe' Diosen'. Can' gac cont yogo' beňach na' yogo' angl yesache'ede' Diosen' naque' Xangaque', na' lecze yesache'e da' xigüe', beyixe' na' bichle da' zjade.

²⁹ Nita' bene' chesezoe' nis gualaz bene' ba gosat. Na' bibi zejen da' chesone' ca' šaca' bi žin ža yesyeban bene' guat ca'.

³⁰ Na' neto' yogo' ža nita' bene' chesaclaže' yesote' neto' da' choe'to' xtiža' Criston', na' bibi zejen zoa chbezto' ca' šaca' bi yesyeban bene' guat ca'.

³¹ Bene' migw, choa' diža' li chnia' chbechgüeda' ba chejnlaže'le Xancho Jesucriston', na' lecze ca' choa' diža' li chnia' yogo' ža chzanlaže' cuina' gac bi da' gac chia'.

³² Guac nacho bež znia' ba gwdillena' Efeso nga ga ba gosadabaga'chgua bene' neda'. Na' bibi zejen ba bchejda' yogo' da' ba gosonde' neda' šaca' bi yesyeban bene' guat ca'. Na' šaca' bi yesyeban bene' guat ca', vejni'a goncho can' ža dižan' žan: "Ye'ej gagwtezcho, le gwxezen' gatcho."

³³ Bi güe'le latje yesonlede' le'e. Da' li can' ža to diža' da' de, žan: "Bene' chejlen bene' cheson da' mal lecze solao gone' can' chesone'na'."

³⁴ Le yeyon xbab šagüe' na' cuejyichje xbab mal dan' chonlen', le balle bina' šejni'ile che Diosen'. Chnia' ca' da' chaclaža' gaquele zto' che da' malen' chonle.

Cuorp che bene' yesyeban ladjo bene' guat ca'

³⁵ Balle nabljale nac gac yesyeban bene' guat ca' o nac gac cuerp chegaquen' cate' yesyebane'.

³⁶ Nchol yichjlažda'olen' še chaquele bi gac yesyebane' ladjo bene' guat ca'. Nezecho to to xoa' dao' da' chazcho cheyala' yexinjen cont la' yel dao'.

³⁷ Na' caten' chazcho, bi chazcho yel daon', san chazcho xoa', nach chexinjen cont la' yel daon'. Na' can' chac len bi da' chazcho, con xsen' chazcho na' chla' yag dao' čhen.

³⁸ Diosen' chone' cont chla' yag dao' dan' chazchon', bi chla' yag yoble da' bi gozcho.

³⁹ Na' gague toze ca' nac cuerp che chio' beňach len cuerp che be žia tap ni'a na'ba'. Nža' cuerp che beňach na' nža' cuerp che be žia xil, na' lecze nža' cuerp che be chesaš lo' nis.

⁴⁰ Nža' cuerp che beňach, nža' cuerp che beyixe', na' nža' da' ca' chle'echo le'e yaban', gwbiž, bio' na' beljw ca'. Na' nža' yela' xdan che gwbiž, bio' na' beljw ca', na' nža' yela' xdan che beňach na' che beyixe' ca' chesaš lo' yežlion'.

⁴¹ Na' nža' ca' chseni' gwbiž, nža' ca' chseni' bio' na' lecze nža' ca' chseni' to to beljw ca'.

⁴² Nach cate' yesyeban bene' ca' ba gosat, cuerp chegaquen' bi gaquen ca' cuerp da' gosape' cate' gosebane'. Cuorp chegaque' da' bosocuaše' lo' ban' ba beyožen', perw cuerp cobe chegaquen' gague da' te čhen.

⁴³ Bibi zaca' cuerp che bene' guat ca', zjanaquen cuerp šen, na' cheyožon', da'nan' chcušaš'chon lo' ba. Perw bene' gosejnilaže' Criston', cate' yesyebane' ladjo bene' guat ca' yesyeyac cuerp chegaque' da' güen juisyw na' da' gual.

⁴⁴ Cuerp chegaquen' zjanaquen de bela' chen cate' chosocuašen' perw cate' yesyebane' ladjo bene' guat ca' nža' ba zjanac cuerp chegaquen', le yesyeyaquen cuerp cobe da' yeson con can' ža Spiritw che Diosen'. Nezecho cuerp chechon' da' de na'a naquen de bela' chen, na' lecze cheyala' nezecho žin ža cate' yeyaquen da' cobe na' gonen con can' ža Spiritw che Diosen'.

⁴⁵ Xtiža' Diosen' nyojen žan Adán bene' goc bene' nechw gwzoe' gwbane' cani'. Na' na'a zoa Criston' zaca'lebde' ca Adánna', le Criston' chone' yela' mban toli tocañe.

⁴⁶ Na'a cuerp chechon' bi naquen to da' chzenag che Spiritw che Diosen', perw žin ža yeyaquen da' cobe na' gwzenaguen che Spiriton'.

⁴⁷ Diosen' bene' bene' nechw len bište yo cont gwzoe' lo yežlio nga, perw Xancho Criston' ben' zaca'lebde' ca bene' nechon' ze'e yaba.

⁴⁸ Na' chio' benač, cuerp chechon' naquen ca cuerp che bene' nechon' da' ben Diosen' len bište yo, da'nan' naccho che yežlio nga. Na' chio' chejnilaže'cho Criston', žin ža cate' cuerp chechon' yayaquen da' cobe can' nac cuerp che Criston' bene' za' yaba.

⁴⁹ Na'a šlac zoacho yežlion' naccho ca bene' ben Diosen' len bište yo, perw cate' žin ža šjayzoacho yaban', gaccho ca Cristo ben' za' yaba.

⁵⁰ Bene' migw, chnia' le'e bi gac yežincho yaba gan' zoa Diosen' len cuerp chechon' de bela' chen. Da' te che cuerp checho quinga, da'nan' bi gac šjayzoalenchon len Diosen' toli tocañe.

⁵¹ Chnia' le'e to da' nono gwneze cani', gague yogo'chon' gatcho, perw yogo'chon' yeža' can' gaccho.

⁵² Bedao'nez, ca bedaon' chžode' yejlaochon', yeža' can' gaccho cate' cuež trompeta che Diosen'. Cuež trompetan' na' yesyeban yogo' bene' ba gosat bene' gosejnilaže' Criston'. Na' cuerp chegaquen' yesyeyaquen da' cobe da' bi yesat na' lecze ca' chio' ne' mbancho yeža' cuerp chechon'.

⁵³ Le cuerp chechon' da' mbanecho yežlio nga da' te chen. Naquen da' chat, na' cheyala' yayaquen da' cobe da' bi gat, da' bi gožo' na' da' bi te che.

⁵⁴ Cate' ba beyac cuerp chechon' da' cobe da' bi gat na' bi te chen, cana' ba goc can' nyoj Xtiža' Diosen' gan' žan: "Diosen' gwzoede' bcueze' yela' goten', na' chone' yela' mban toli tocañe.

⁵⁵ Bich soe yela' goten' chio' da' yoble. Gwbatech gatcho šo'cho lo' ba."

⁵⁶ De yela' got checho na'a le chio' benač choncho da' mal. Da' neze chio' benač can' ža ley che Diosen' cheyala' goncho na' bi chzenagcho gonchon, da'nan' chnabia' da' malen' chio'.

⁵⁷ Chožclen Diosen' gwsele' Xancho Jesucriston' beque'e xtoła' chio' chejnilaže'chone'. Da'nan' bi soe yela' goten' chio', san de yela' mban toli tocañe checho.

⁵⁸ Da'nan' bene' migw chia', chacda' le'e na' chneyoeda' le'e le soachač len toze xbab. Na' le gonchgua xšin Xancho', le nezcecho cate' choncho xšinen' chejnilaže'chone', gague da' chondadzchon'.

16

Bene' Corinto chosotobe' mechw cont yesaclene' bene' Jerusalén ca'

¹ Nach nia' naquen' gonle cate' gwtoble mechw da' gaclenen bene' ca' chesejnilaže' Diosen' Jerusalénna'. Le gon can' bena' mandadw yeson bene'

ca' chesedop chesežag chesonxene' Criston' to to yež da' zjachi' distritw Galacia.

² Yogo' ža dmigw to tole cheyała' cuejle late' güeje mechw según gaca'te' benle gan lagüe' xman. Na' co'ošagüe'le mechon' cont den cate' yida' gan' zoale na' gague za' gwtoblen cate' yedena'a le'e.

³ Nach cate' la'a gan' zoalen', cana' gwzolja' cart da' yesože' bene' ca' chaclaže'le šjasesane' xmechwlen' Jerusalénna'.

⁴ Na' še chonen byen ša'a, cuina' čhi'a legaque' Jerusalénna'.

Pablon' chone' xbab šjane'e bene' Corinto ca'

⁵ Na' yida' gan' zoale cate' yeyož yedia' Macedonia, le cheyała' šjajna'a bene' lježcho ca' nita' na'.

⁶ Na' chacda' yega'anlena' le'e do tbio' do čop bio' o še yega'ana' doxen tiemp zag, nach gaclenle neda' cate' yeza' ša'a gate'teze ša'a.

⁷ Bi chaclaža' yedena'a le'e na'a, le con teza' še ba za'a, na' chaclaža' soa' šša len le'e cate' yida' še Xancho Diosen' gonšque' latje.

⁸ Chaclaža' yega'ana' Efeso nga žinch ža gala' lni dan' že' Pentecostés.

⁹ Le bene' zan že' nga bene' chesaclaže' yosozenague' che Criston' na' lecze že' bene' zan bene' bi chesaclaže' chixjue'eda' xtižen'.

¹⁰ Na' še la' Timoteon' gan' zoalen', le gwlebe' na' le gwzenag che' cont bi žebe' gwsed gwlo'ede' le'e, le can' chona' xšin Xancho Diosen', lecz can' chonen'.

¹¹ Ne tole bi cheyała' gonle xbab bibi zaca' da' chsed chlo'ede', san soale güen len le' na' gaclenle' cate' yeze'e cont yeyede' gan' zoa' nga to šagüe' to güen, le chbeza'ne' txen len yezica'chle bene' lježcho ca'.

¹² Na' ca nac Apolosen', gota'yoeda'ne' lecze šejlene' Timoteon' gan' zoalen', txen len yezica'chle bene' lježcho ca' yesaclene' le'. Perw bi chaclaže' šeje' na'a, na' šeje' cate' soe' to latje.

Yeto čope diža' da' choe'len Pablon' bene' Corinto ca'

¹³ Le soa le na' can' chonlen', na' le soa len toze xbab šejnilaže'le Criston'. Bi žeble, san le soačahč gonle can' chazlaže' Diosen'.

¹⁴ Na' le gague lježle bite'teze da' chonle.

¹⁵ Bene' migw čhia', nezele bene' ca' že' liž Estéfanos gosaque' bene' nechw gosejnilaže' Criston' distritw Acayan' na' ba gosaclenchgüe' yezica'chle bene' lježcho bene' chesejnilaže'ne'.

¹⁶ Da'n'an' chneyoeda' le gwzenag chegaque' na' gonle can' chesenen', na' le gwzenag che nochle bene' cheson xšin Diosen' na' chesaclene' bene' lježcho ca' can' chesone'na'.

¹⁷ Chebeda' ba besela' Estéfanos, Fortunato, na' Acaico gan' zoa' nga. Legaque' ba gosaclene' neda' cont bich chacyaše'da' dan' bi zoale nga len neda'.

¹⁸ Ba gosone' cont beyaclaža' can' ba gosoncze' len le'e cana', na' da'n'an' cheyała' güe'cho yela' choxcen chegaque' che dan' ba gosonen'.

¹⁹ Bene' ca' chesedop chesežag chesonxene' Criston' doxen distritw Asian' chosoguape' le'e tiox. Na' Aquila na' Priscila na' bene' ca' chesežag ližgaque' chesonxene' Criston' lecze chosoguapchgüe' le'e tiox.

²⁰ Nach yogo' bene' lježcho že' nga chosoguape' le'e tiox. Na' cate' chdop chžagle txen, le gwnopa' na' lježle cate' gwguap lježle tiox cont gabcia' chaque lježle.

²¹ Cuincza' neda' Pablo chzoja' late' dao' le'e cart nga chguapa' le'e tiox.

²² Na' še ne' nchixe balle bi chaquele Xancho Jesucriston', Diosen' gone' cont cuiaye'e toli tocanē. Xancho Jesucristo, yidšco' da' yoble.

²³ Gaclenšca Xancho Jesucriston' le'e.

²⁴ Chacda' yogo'le da' naccho txen chejnilaže'cho Cristo Jesúsēn'. Da' na'zen' žia' le'e.

CART GWCHOPE DAN' BZOJ POSTLW SAN PABLO ĆHE BEÑE' CA' ŽE' CORINTO

Postlw Pablo chzoje' bene' chesonxen Jesucriston' ciuda Corinto

¹ Neda' Pablo naca' postlw ĉhe Jesucriston', le can' chaclaže' Diosen'. Chzoja' cart nga ĉhe le'e ĉhdop ĉhžagle chonxenle Diosen' lo ciuda Corinto, na' ĉhe note'tezechle bene' že' doxen distritw Acaya bene' ba gwlej Diosen' cont zjanaque' lo ne'e. Neda' len bene' migw ĉhecho Timoteo ĉhguapto' le'e tiox.

² Na' ĉhnabeto' Xacho Diosen' na' Xancho Jesucriston' yesaclene' le'e na' yesone' cont soa cuezle binlo len xbab da' yo'o lo' yichjlažda'olen'.

Da' ca' gwdi gwxcaca' Pablon'

³ Cheyala' soacho gonxencho Diosen', le naque' Xa Xancho Jesucriston', na' Jesucriston' lecze chonxene' le'. Xacho Diosen' cheyaše' cheži'ilaže'de' chio' na' len' cheyoe'xene' chio' cate' ĉac bi da' ĉac ĉhecho.

⁴ Ba cheyoe'xene' neto' len yogo' da' ĉzaca'zi'to' cont ĉac cheyoe'xento' yezica'ĉhle bene' cate' bi da' ĉeseyi ĉhezaque'. Can' cheyoe'xen Diosen' neto', lecze can' cheyoe'xento' bene'.

⁵ Leca ĉhyi ĉzaca'to' can' gwdi gwxcaca' Criston', na' ca'cze leca cheyoe'xen Diosen' neto' da' ĉhejnilaže'to' Criston'.

⁶ Da' zan da' ĉac ĉeto' da' ĉhsed ĉhlo'eto' xtiža' Diosen', perw zaca'czen' cont cheyoe'xento' le'e len da' ĉzaca'zi'le na' ĉaclenen le'e cont šjayzoale len Diosen'. Na' cheyoe'xen Diosen' neto' cate' bin' ĉac ĉeto', cont lecze neto' cheyoe'xento' le'e len bi da' ĉac ĉele. Na' cheyoe'xento' le'e cont ĉzoele cate' ĉzaca'zi'le can' lecze ĉzaca'zi' neto'.

⁷ ĉhbezto' gwyo gwĉhejle da' ĉac ĉele, le nezeto' caten' ĉzaca'zi'le can' ĉzaca'zi' neto', Diosen' lecze cheyoe'xene' le'e can' cheyoe'xene' neto'.

⁸ Bene' migw, chaclaža' nezele can' gwdi gwxcaca'to' caten' gwzoato' distritw Asia. Gwdi gwxcaca'ĉguato', con bich bi goc gonto' na' bento' xbab gatzeto'.

⁹ Da' li bento' xbab lo' yichjlažda'oto' ba za' yela' goten'. Na' goc ĉeto' ca' cont gocbe'eto' bi soeczeto' gwyo gwĉhejto' dan' ĉzaca'zi'ton' san cheyala' šejnilaže'to' Diosen' cont gone' ĉaĉh laže'to', Dios ben' ĉhosban bene' guat ca'.

¹⁰ Na' caten' bento' xbab gatzeto' catec da' gosonde' neto', Diosen' bosle' neto' cont bi gotto' na' ne' ĉhoslacze' neto' na'a. Na' zoato' lez yoslache' neto' bate'teze.

¹¹ Zoato' lez yoslacze' neto' con še gaclenle neto' yoł güižlene' ĉeto'. Na' še zanle gonle ca', nach lecze zanle güe'le yela' ĉoxclen ĉhe' cate' ba goclene' neto'.

Pablon' gwžede' šje' ciuda Corinto

¹² ĉhbeda' choa' diža' can' chonto', le nezeto' lo' lažda'oto' chonto' güen len le'e do yichj do laže'to' na' lecze len note'tezechle bene'. Bi nacho chonto' güen neĉhe da' nacto' bene' sina', san da' nži'ilaže' Diosen' neto', da'nana' ĉaclene' neto' chonto' güen len yogo'lol bene'.

¹³ Cart quinga ĉhzojto' le'e, bi gonle xbab še naquechle zejen, san šejni'ilen con can' nyojen, na' zoa' lez šejni'ilen binlo.

¹⁴ Na' zoa' lez žin ža cate' gacbe'eyane'le cont yebele güe'le diža' nacle neto' txen, can' ba ĉacbe'ele late' dao' na'a. Na' cate' žin ža yid Xancho Jesúsen' da'

yoble, yebele güe'le diža' nacle neto' txen na' neto' yebet' güe'to' diža' nacto' le'e txen.

¹⁵ Cana' godca' yedena'a le'e cont da' yechop ni'a soacho txen, le bena' xbab yebele yedena'a le'e.

¹⁶ Godlaža' tia' yedena'a le'e caten' gwy'a Macedonia na' lecze godlaža' yedia' gan' zoalna' cate' beza' Macedonian'. Na' godca' yeyoža' gaclenle neda' yeya' a Judean'.

¹⁷ Do laža' godca' gona' ca', gague chona' con can' žan chia' ca cheson bal bene' bi chesejnilaže' Diosen', to chesene' yesone' to da' yesone' na' to chesene' bi yesonen'.

¹⁸ Ca Diosen' chone' con can' že', lecze ca' neto' chnato' do laže'to' cate' chnato' to da' gonto'.

¹⁹ Na' lecze Jesucriston' bene' naque' Xi'in Diosen', toz can' naque' bate'teze, na' nac da' li yogo' can' gwnen', con can' gwđixjue'eto' xtižen' len le'e, neda', Silvano na' Timoteo.

²⁰ Na' yogo' da' güen da' ba gwna Diosen' gone', nezecho gonon' da' gwsele' Jesucriston'. Da'n'an' len yela' chaclen che Jesucriston' chonxencho Diosen' che'chone': "Gacšca ca'."

²¹ Na' Diosen' chone' cont neto' na' le'e zoačhačcho chejnilaže'cho Criston'. Na' bene' chio' Spiritw che'na' cont gac goncho xšinen'.

²² Na' lecze zoa Spiriton' lo' yichjlažda'ochon' cont nezecho Diosen' ba gwque'e chio' ca xi'ine' na' cont nezecho yogo' da' güen da' gwne' gone', žin ža cate' gonon'.

²³ Da' bina' yida' da' yoble Corinto gan' zoalen' yedena'a le'e can' gwnia' gona', bina' yida' cont bi yedetiła' le'e che da' malen' chonle. Diosen' nombi'e yichjlažda'ogua' na' nezde' choa' diža' li chnia' ca'.

²⁴ Nezeto' gague neto' ye'to' le'e da' ni da' na' šejle'le. Ba zoačhačhle chejnilaže'le Criston', na' neto' con chaclento' le'e cont soachle mbalazch.

2

¹ Ca' goquen' bečoglaža' bi yedena'a le'e, le gocbe'eda' šaca' bedena'a le'e gocyäše'cho.

² Na' šaca' bena' cont gocyäše'le, nono zoa no yeyon cont yezoa' mbalaz, le ba bena' cont gocyäše'laže'le še ca'.

³ Bzoja' carten' ca' cont cate' yida' gan' zoalna' bich gonle da' mal da' gonon gacyäše'da', le cheyala' gonle cont yebeda'. Na' zoa' lez lecze mbalaz soa le'e cate' gonle soa' neda' mbalaz.

⁴ Bzoja' le'e do chegüine'laža', da' gwzoachgua' gocyäše'da' che dan' chonlen', na' gwchežchgua' chele. Na' da' bzoja' carten' ca', gague gwzelaža' yegüine'le, san gwzelaža' gacbe'ele leca chacda' le'e.

Gwne' cheyala' yesyezi'xene' che bene' ben da' malen'

⁵ Da' li gocyäše'da' can' ben bena' ben da' malen', perw gague neda'zen' gocyäše'da'. Yogo'czle ba gocyäše'laže'le late' güeje can' ba goquen'. Chnia' gocyäše'le late' güeje cont bi nia' benche' chio' zi'ch ca cheyala' nia'.

⁶ Ndop nžagle txen gwčhoglaole castigw che', na' da' na'zen' cheyala' si'e.

⁷ Bich güe'ln'e' castigw, san yezi'xenle che' na' le gon čhač laže' cont soede' yela' chacyaše'laže' čhen' na' bi cuejyichje' Diosen'.

⁸ Da'n'an' chneyoeda' le'e le gon cont gacbe'ede' chaquelene'.

⁹ Ba bzoja' le'e cana' cont gwnezda' naquen' chonle, še chzenagle chia' len yogo' dan' gwnia' gonle.

¹⁰ Na' na'a chaclaža' nezele note'teze bene' chezi'xenle che', lecze neda' chezi'xena' che'. Na' cate' chezi'xena' che bene', še zoa da' cheyala' yezi'xena', chezi'xenan' lao Criston', na' ba bezi'xena' che bena' cont chaclena' le'e.

¹¹ Na' chezi'xenho che bene' cont Satanás dan' chnabia' da' xigüe' ca' bi soen gonen chio' gan, le nezecho can' chaclažen' siye'czen chio'.

Pablon' goclaže' yežague' Titon'

¹² Cate' bžina' Troas gan' gwdixjue'eda' diža' güen che Criston', nacia' Diosen' ba bene' cont bene' že' na' gosaclaže' bosozenague'.

¹³ Perw benchgua' xbab che bene' migw checho Titon' da' bi bžine' na'. Da'n'an' goša' bene' ca': "Nayežagcho", na' beza' beya'a distritw Macedonian'.

Zoacho mbalaz da' nombia'cho Criston'

¹⁴ ChoχcLen Diosen', none' cont Jesucriston' ba bebeje' chio' lo na' gwxiyen' na' mbalaz cheche'e chio' soacho len le'. Na' gate'teze zoacho, Diosen' chone' cont chesacbe'e bene' naquen da' güen juisyw nombia'cho Criston'.

¹⁵ Diosen' chebede' choncho cont chesacbe'e bene' naquen da' güen juisyw yesejnilaže' Criston'. Na' bale' chesejnilaže'ne' na' de yeła' mban čhegaque' toli tocaņe, na' yebaļe' bi chesejnilaže'ne' na' chesebiaye'e.

¹⁶ Na' bene' ca' chesebiayi' bi chesyebede' can' chonchon', le che'chone' yesebiaye'e. Na' bene' chesejnilaže'ne' chesyebede', le ba goclenchone' cont ba de yeła' mban čhegaque' toli tocaņe. Perw chio' bi chaccho to gualazcho gwlo'echo bene' ca' güenna' naquen yesejnilaže' Criston'.

¹⁷ Bene' zan chosoše'e diža' da' cheso'e che Diosen' cont chesyebe bene' len xtiža'gaque' na' chosonežjue' legaque' mechw. Neto' bi chonto' ca', san do laže'to' choe'to' diža' lao Diosen' da' nacto' Criston' txen, le Diosen' gwsele' neto' choe'to' xtižen'.

3

Da' cobe da' gwna Diosen' gone' cont gaclene' benachen'

¹ Bi gonle xbab chonxen cuinto' choe'to' diža' quinga. Nezele chonto' xšin Diosen' do laže'to', na' bi chyažjen goxe'to' cart cont nezele nac nacto', na' neca chyažjen gwzojle cart da' goxe'to' cate' šejto' ga yoble.

² Chaqueto' le'e da' gwdixjue'eto' xtiža' Criston' len le'e cont gwyejnilaže'lene'. Na' yogo'ze bene' guac yesele'ede' can' ba boša' yichjlažda'olen' na' guac yeseņezde' can' chonto' xšin Diosen'.

³ Gwyejnilaže'le Criston' caten' be'lento' le'e xtižen', na' Spiritw che Diosen' bocoben yichjlažda'olen'. Na' da' nacia' becobe yichjlažda'olen' zaca'chen ca no cart da' nyoj to le'e yiš o ca ley che Diosen' da' nyoj to le'e yej.

⁴ Cheyaxjeto' žato' ca' le Criston' zoe' chaclene' neto' cont nezeto' chonto' can' chazlaže' Diosen'.

⁵ Nezeto' bi chac bi gonto' to gualazto', na' nezeto' gague neche bi da' ba ben neto' bchoj xšin Diosen' güen, le Diosen' chone' cont chac bite'teze da' chac.

⁶ Na' Diosen' ba bene' cont chac chyixjue'eto' da' coben' da' gwne' gone' gaclene' chio' benačh. Na' da' coben' bi naquen ca ley che' dan' byoj cani' chzejni'in chio' benačh cuiayi'cho yeła' güen da' mal čhechon', san na'a Spiritw chen' chonen yeła' mban toli tocaņe che chio' chejnilaže'chone'.

⁷ Cate' Diosen' bnežjue' da' Moisésen' ley che' dan' byoj le'e yej ta'a ca', bene' cont bene' Israel ca' gosacbe'ede' ley čhen' naquen da' zaca'. Na' cana' catec goctitechgua cho'alao Moisésen', bi goc yeseņa' bene' Israel ca' cho'alagüen',

la'czla' gwdechle bega'a yela' chactiten' šolaže'. Na' ley nan' con bzejni'in benachen' cuiayi'cho yela' güen da' mal chechon'.

⁸ Da'nan' nezecho leca zaca'ch da' chon Spiritw che Diosen' na'a cont gata' yela' mban checho toli tocaņe.

⁹ Diosen' blo'e yela' zaca' che ley chen' la'czla' bzejni'in chio' benach si'cho castigw da' bi choncho can' žanna'. Na' zaca'ch xtiža' Diosen' da' de na'a da' chzejni'in cheyone' chio' bene' güen.

¹⁰ Da' naquen da' zaca'chgua cani', bičh naquen da' zaca' na'a, le ba de yeto da' zaca'chgua da' xench.

¹¹ Na' da' blo'e Diosen' yela' zaca' che da' ben žin šložze cani', cheyała' gache'echo leca da' xench zaca' da' coben' da' bi te che.

¹² Na' da' nezeto' gague da' te che da' cobe da' ba gwduxw Diosen' cont chaclene' benachen', da'nan' bi chedi'ito' chyixjue'eto' xtižen' sin cbi chžebto'.

¹³ Da' Moisésen' bcuaše' cho'alagüen' len to lache' bxin cont bene' Israel ca' bi besele'ede' chenit late' güeje yela' chactit che cho'alagüen'. Perw na'a gague hcuaše'to' yela' zaca' che da' chon Diosen'.

¹⁴ Bene' Israel gualaž cheto' ca' bi gosejni'ide', ne ža na'aža bi chesezejni'ide' cate' chosolabe' ley dan' byoj cani' nyoj da' ca' gwna Diosen' gone' gaclene' legaque'. Con bene' ca' chesejnilaže' Criston' chesejni'ide' bi zejen.

¹⁵ Ža na'aža cate' bene' Israel gualaž cheto' ca' chosolabe' da' ca' bzoj Moisésen', zjanaquen ca to da' ngaše' len legaque' yela' bi chejle' chegaquen'.

¹⁶ Perw note'teze' cate' chesejnilaže' Xancho Criston', da' ca' zjanyoj bich chesaquen ca to da' ngaše' len legaque'.

¹⁷ Xancho Criston' naque' toze len Spiritw che Diosen'. Na' cate' ba zoa Spiritw che Xancho' lo' yichjlaždao' bene', bačh zoe' binlo len Diosen'.

¹⁸ Yogo' chio' chejnilaže'cho Criston', yela' zaca' juisyw che Xancho Criston' bich ngašen' len chio', na' ba zejech cheyaquechcho bene' güen can' nac le', le zoa Spiritw che Xancho Criston' lo' lažda'ochon' chocoben xbab chechon'.

4

¹ Diosen' beyaše' beži'ilaže'de' neto' na' gwleje' neto' cont chyixjue'eto' xtižen'. Da'nan' bi cheche'eto' chyixjue'eton'.

² Na' bibi chonto' bagaše'ze ca no da' nac da' yela' zto'. Bi chonleto' bene' na' neca choša'to' xtiža' Diosen' cont yesyebe bene' chosozenag xtiža'ton'. San chle'ecze Diosen' chyixjue'eto' xtižen' con can' naquen cont yogo' bene' yesene xtiža'ton' yesenezde' lo' lažda'ogaquen' choe'to' diža' li.

³ Con bene' ca' ba zjambiyi' yela' bi chejle' chegaquen', legacze' bi chesejni'ide' diža' güen dan' choe'lento' legaque'.

⁴ Le bene' bi chesejle' xtiža' Diosen' chosozenague' che Satanás dan' chnabia' da' xigüe' ca' latje da' yosozenague' che Diosen', na' Satanásen' chonen cont nchoj yichjlažda'ogaquen'. Da'nan' diža' güen che Criston' bi chšenin' lo' yichjlažda'ogaquen' ca to be'ni' cont yesenezde' Criston' naque' bene' zaca' juisyw. Cayane' nac yichjlaždao' Diosen' nac yichjlaždao' Criston', na' toz can' chesone'.

⁵ Na' ca nac diža' da' chyixjue'eto', chyixjue'eton' gague cont gwzenagle che neto', san cont gwzenagle che Jesucriston' ben' naque' Xancho. Na' da' chaqueto' Jesucriston', zoato' chonto' bite'teze da' chaclenen le'e.

⁶ Na' Dios ben' gwne' gata' be'ni' yežlio nga gan' goc choj, ba gwlo'e be'ni' chen' lo' yichjlažda'ochon' cont nombia'cho Jesucriston' ben' nac bene' zaca'

juijyiw, na' cate' ba nombia'chone' chacbe'echo can' nac yela' bene' zaca' che Diosen'.

Pablo cho'e xtiža' Diosen' lagüe' da' chejnilaže'ne'

7 Cwerp checho quinga da' chesat zjazaca'leben ca to che'e nis da' naquen de gona'. Perw Diosen' ba gwlo'e be'ni' chen' lo' yichjlažda'ochon' na'a šlac ne' mbancho len cuerp checho quinga cont gache'echo bibi chac goncho še bi gone' yela' guac xeñ chen' cont gac bi da' goncho.

8 Na' neto', da' zan da' chyi chzaca'to', perw bi chbejyichjto' xšin Diosen'. Zan ni'a bi chežellaže'to' nacle gonto', perw nezeto' Diosen' chaclene' neto'.

9 Chosolagšibe' neto', perw Diosen' bi chbejyichje' neto'. Chosoči chososaque' neto', perw Diosen' bi cho'e latje yesote' neto'.

10 Gate'teze chejto', con yogo' ni'a chosoči chososaca' bene' neto' na' chesaclaže' yesote' neto' can' gosote' Jesúsen'. Na' Diosen' cho'e latje chac cheto' ca' cont nacia' zoacze Jesúsen' chaclene' neto' šlac mbanto' len cuerp cheto' quinga.

11 Na' šlac ne' mbanto', yogo' ža nita'cze bene' chesaclaže' yesote' neto' lagüe' da' chyxjue'eto' xtiža' Jesúsen'. Na' chac cheto' ca' cont nacia' zoacze Jesúsen' chaclene' neto' šlac mbanto' len cuerp cheto' quinga da' yesat.

12 Can' chac, tža tža chesaclaže' yesote' neto', san le'e ba de yela' mban chele toli tocañe.

13 Xtiža' Diosen' nyojen žan: "Chejnilaža' Diosen' na' da'nan' choa' diža' che'." Na' ca ben' bzoj da'na' gwyejnilaže' Diosen', ca'czen' chejnilaže'to'ne' na' da'nan' choe'to' xtižen'.

14 Le nezeto' Dios ben' bosban Xancho Jesúsen' ladjo bene' guat ca' lecze žin ža yosbane' chio' še ba gotcho, na' neto' txen len le'e šjayzoacho gan' zoe'na'.

15 Neche le'e bžaglaoto' yogo' lo' da' ba goc cheto'. Le chaclaže'to' gac zancho gaclenchgua Diosen' chio' cont šejnilaže'cho Xancho Jesúsen', na' lecze gac zancho güe'cho yela' choxcen che' catec bene' zacan' naque'.

16 Da'nan' bi chjaxaque'laže'to'. La'czla' tža tža zej chaxo'ch cuerp cheto' quinga, lecze tža tža Diosen' chocobche' yichjlažda'oto'.

17 Job te che bite'teze da' dao' da' chžaglaochi yežlio nga. Na' da' ca' chyi chzaca'cho chesaclenen chio' cont soacho mbalaz juijyoch cate' šjayzoacho len Diosen' toli tocañe, na' lenna' da' zaca'ch ca bite'tezchle.

18 Nachen' bi chi' yichjcho che da' chle'echo yežlio nga, san chi' yichjcho che da' bi chle'echo. Le yesede che da' ca' zjade yežlio nga da' chle'echo, na' da' ca' bi chle'echo, gague da' yesede chegaquen, nita'czen toli tocañe.

5

1 Cwerp chechon' zaca'leben ca to yo'o da' bi chzibia'. Na' nezecho še ba byinjen, Diosen' ba none' to yo'o güen checho yaban' da' soa toli tocañe; na' lenna' gague naquen to da' ben beñach.

2 Na' šlac ne' zoacho mbancho yežlio nga, chbežyaše'cho lo' lažda'ochi zelaže'chguacho šjayzoacho lo' yo'o da' non Diosen' checho yaban'.

3 Chona' xbab cuerp cobe da' gone' zaca'leben ca to xacho da' chyažjen chazcho cate' yežincho yaba.

4 Da' li chio' ne' chžaglaochi len cuerp checho quinga chbežyaše'cho lo' lažda'ochon'. Gague da' chaclaže'cho gatcho, san chaclaže'cho yeža' cuerp checho quinga da' te chen len to da' soa toli tocañe.

5 Na' Diosen' gwleje' chio' cont šjayzoacho len le' na' gwsele' Spiritw chen' zoan lo' yichjlažda'ochon' cont nezecho dech da' gone' checho.

6 Da'nan' bi chaczejlaže'cho, le nezecho šlac mbancho len cuerp checho quinga biṇa' šjayzoacho len Xancho Criston'.

7 Na' la'czla' biṇa' le'echo da' ca' gone' checho, zoacho chejnilaže'chone'.

8 Na' da'nan' bi chaczejlaže'cho, le chaclaže'cho cuejyichjcho cuerp checho quinga cont šjayzoacho len Xancho Criston'.

9 Nachen' zoacho choncho da' chazlaže' cont yebede' chio' šlac ne' mbancho na' cate' ba gotcho.

10 Le to tocho cheyała' techo lao Criston' gan' chone' yeła' justisen' cont chogbi'en checho na' gone' soacho mbalaz o saca'zi'cho con can' ba bencho šlac mbancho, še bencho da' güen o da' mal.

Benachen' guac yesenite' binlo len Diosen'

11 Na' dan' nezeto' yogo'cho yodecho cuent lao Xancho Criston' che yogo'lo da' ba bencho, da'nan' chṇeyoeto' bene' yosozenague' che'. Diosen' nezde' do laže'to' chṇeyoeto' bene' yosozenague' che', na' zoa' lez lecze le'e chacbe'ele lo' lažda'olen' zoato' chonton' do laže'to'.

12 Bi nacho chonxen cuinto' da' yoble dan' chnia' ca', san chnia' ca' cont yebele can' chonton' na' nezele naquen' yoži'ile xtiža' bene' ca' chesenelagüe' cheto'. Bene' ca' chesa'laže' da' ba zjansede' na' da' zjanaque' no zjanaque'. Bibi xbab chesone' che can' nac yichjlažda'ogaquen'.

13 Še chaquele chactontto' can' ba benton', le gon xbab bento' con can' gwna Diosen'. Na' še chaquele zoašagüe' cze yichjlažda'oto', le gon xbab chonto' bi da' chonto' cont chaclento' le'e.

14 Leca chaque Criston' chio' na' da'nan' chonto' xšinen'. Na' nezecho toz Criston' bnežjw cuine' gote' neche yogo'cho, na' da' naccho txen len le' guac nacho yogo'cho ba gotcho len le'.

15 Bnežjw cuine' gote' neche yogo' chio' benač, cont soa cuezcho goncho can' chazlaže' na' bich soa cuezcho goncho con ca žan checho. Gote' na' bebane' ladjo bene' guaten' neche chio'.

16 Neto' cate' biṇa' šejnilaže'to' Criston' goqueto' bibi zaque', le bento' xbab zaca' bene' še no naque' lo yežlio nga o še bi da' de che'. Perw na'a bich chonto' xbab' ca' che Criston' o che note teze bene'.

17 Na' note'tezcho še naccho Criston' txen, Diosen' ba bocobe' yichjlažda'ochon'. Na' bich chebecho da' ca' bebecho cana' na' bich choncho can' bencho cana'. Zoacho ca bene' cobe.

18 Diosen' bozoe' chio' binlo len le' na' bene' cont beyaccho ca bene' cobe cate' gwyejnilaže'cho Criston'. Na' gwlo'e lo na'cho ye'cho bene' can' yesenite' binlo len Diosen'.

19 Ye'cho legaue' Diosen' gwsele' Criston' cont note'teze bene' yesejnilaže' le' yesenite' binlo len Diosen', na' Diosen' bich gone' cuent che da' xinj dan' ba gosone'. Can' cheyała' ye'cho bene' cont yesenite' binlo len Diosen'.

20 Criston' gwsele' chio' ca cuine' na' Diosen' chaclaže' neyoecho bene' ca cuincze Criston' chṇeyoede' legaue', ye'chone': "Le soa binlo len Diosen'."

21 Criston' bibi da' mal bene'. Perw na' Diosen' bene' cont Criston' gwxa'aca'zi'e neche xtoła'chon' cont none' chio' bene' güen da' chejnilaže'chone'.

6

1 Neto' chonto' xšin Diosen' txen len le'. Da'nan' chṇeyoeto' le'e, le gon can' chazlaže' Diosen' cont gwlo'ele naquen to da' zaca'chgua da' beyaše' beži'ilaže'de' chio'.

2 Nyoj can' gwne':

Cate' bžin ža goc da' bžia' bia', cana' bzenaga' chio'.

Na' cate' bžin ža benan', cana'chen' goclena' le'.

Na' dan' nyojen ca' zejen na'a bač bžin žan' chaclen Diosen' beñachen', le ža na'aža chnežjue' yela' mban toli tocañe che beñe' chesejnilaže' Jesucriston'.

³ Bi chonto' bite'teze da' gwžon cont beñe' bi yesejnilaže'ne', le chaclaže'to' bibi gata' da' yeseñelagüe beñe' che xšin Diosen' da' chonto'.

⁴ Da'nan' bite'teze da' chonto' chlo'eto' chonto' xšin Diosen' ca cheyala'. Chyo chchejto' cate' chosochi chososaca' beñe' neto', cate' chzaca'zi' chzaca'yaše'to', na' cate' za'ac bichle da' mal len neto'.

⁵ Zoa cate' goseyine' neto', cate' goseyixjue' neto' ližya, na' cate' gosebeque' žaš che xtiža'ton'. Zan las bento' žin gual, na' gwlejto' bišgal na' gwbił gwdonto'.

⁶ Na' da' chi' yichjto' chonto' xšin Diosen' can' chazlažen', bitw bi da' yela' zto' chonto'. Chzejni'ito' beñe' len yela' chejni'i che Diosen', napt'o' yela' chxenlaže' len yogo'loł beñe' na' chonto' güen len yogo'lole'. Chonto' con can' chzejni'i Spiritw che Diosen' neto', na' do laže'to' chaqueto' yogo'loł beñe'.

⁷ Zoato' chzejni'ito' beñe' diža' li, na' chonto' yogo'loł da' chonto' len yela' guac che Diosen'. Na' da' zoato' chonto' da' zej to liča, chaclenen cont soeto' tülento' da' malen' na' cont bi gwzenagto' che gwxiyen'.

⁸ Zoato' chonto' xšin Diosen' can' chazlaže' cate' chesonxen beñe' neto' na' cate' chesegue'ede' neto', cate' chesene' güen cheto' na' cate' chesene' mal. Choe'to' diža' li, cate' beñe' chesejle'e cheto' na' cate' beñe' chesacde' chonlaže'to'.

⁹ Bał beñe' bi chesejle'e chonto' da' zaca', perw yebale' zjanezde' chonto' da' zaca'. Zan las chonto' xbab gatczto', perw ne' mbanto'. Na' la'czla' yogo' da' ca' chac cheto', biña' yesote' neto'.

¹⁰ Da' zan da' chac cont gacyaše'to', perw chbeto' lo' lažda'oton'. Nga'anyaše'to', perw chonto' cont beñe' zan nite' mbalaz. Na' la'czla' bibi de cheto', yogo'loł bi da' de naquen cheto' da' nacto' Criston' txen.

¹¹ Le'e beñe' Corinto, bač be'lento' le'e yogo' diža' da' yo'o lo' lažda'oton', le chacchgüeto' le'e.

¹² Nži'ilaže'to' le'e, perw le'e bitec nži'ilaže'le neto'.

¹³ Chata'yoeda' le'e ca chon to beñe' len xi'ine', le gaque neda' ca chacda' le'e.

Spiritw che Diosen' zoan lo' yichjlaždao' chio' chejnilaže'chone'

¹⁴ Bi cheyala' gaccho txen len beñe' bi chesejnilaže' Criston'. Še Diosen' ba none' chio' beñe' güen len le', bičh gac goncho txen len beñe' cheson da' malen'. Chio' yo'o be'ni' che Criston' lo' yichjlažda'ochon' bi cheyala' goncho txen len beñe' bi yo'o be'ni' chen' lo' yichjlažda'ogaque'.

¹⁵ Criston' bi chac gone' txen len Satanás dan' chnabia' da' xigüe' ca', na' ca'cze beñe' chejnilaže' Criston' bi cheyala' gone' txen len beñe' bi chejnilaže' Criston'.

¹⁶ Nezecho bi gac še' l gua'a lsaca' da' chesejnilaže' beñe' lo' yodao' gan' chejnilaže'cho Diosen', na' ca'cze bi chac soa Diosen' len chio' chejni-laže'chone' še zoa bichle da' chejnilaže'cho. Chac can' gwna Diosen': Soa' len legaque' na' talena' legaque'.

Neda' Dios naca' ben' yesejnilaže' na' legaque' yesaque' yež chia'.

¹⁷ Da'nan' cheyala' goncho can' gwna Xancho Diosen':

Le yechoj len beñe' bi chesejnilaže' neda' na' bi gacle toze len legaque'.

Na' bi gonle da' xinjen'.

Nachen' yebeda' soa' len le'e.

¹⁸ Na' gaca' Xale, na' le'e gacle xi'ina'.

Can' za Xancho Dios ben' nape la'zelagüe yela' guac xen.

7

¹ Le'e bene' chacda', ba nezecho can' gwna Diosen' gone' güen len chio'. Da'nan' cheyala' cuejyichjcho bich goncho bite'teze da' xinj da' gwchenen cuerp chechon' o yichjlažda'ochon'. Na' cheyala' gapcho Diosen' bala'an gwzenagcho che' tža tža na' šejch gaccho bene' güen can' chaclaže'.

Ba bža' xbab che bene' Corinto ca'

² Le gague neto'. Ne tole bibi beneto'. Ne tole bi bzejni'ito' clele, na' ne tole bi gwziye'to'.

³ Gague žia' ca' cont tila' le'e, le can' ba gwnia' cana', chacda' le'e na'a šlac mbancho na' lecz ca' gacda' le'e cate' ba gota'.

⁴ Nezda' lo' lažda'ogua' gonle can' chazlaže' Diosen', na' chbeda' choelena' bene' diža' ca güenna' chonle. Ba beyacxenlaža' da' gwnezda' chonle güen, na' zoa' mbalaz la'czla' da' zan da' chac chia'.

⁵ Cate' bežinto' Macedonian' bibi latje gota' cont yezi'laže'to' len da' gwdi gwxcaca'to'. Gwnita' bene' bosošašlene' neto' na' lecze bžebo'to' lo' yichjlažda'oto' goqueto' nac gacto'.

⁶ Na' Dios ben' cheyoe'xene' bene', beyoe'xene' neto' da' bela' Titon'.

⁷ Na' beyacxenlaže'to' gague da' bele'e na'zen' san da' bedeye'e diža' chebede' can' chonlen'. Na' be'e diža' zelaže'le yedena'to' le'e da' yoble. Na' že' chegüine'le che dan' ba goquen' na' chi' yichjle gonle can' gwnian'. Nachen' leca bebedda' gwnezda' da' ca'.

⁸ Chache'eda' gocyaše'le can' gwnia' le'e carten' bzoja' le'e. Na' gwdechle betinjda' da' bena' cont gocyaše'le, perw na'a bich chetinjda' da' gwsela' carten', le šložzen' gocyaše'le.

⁹ Chbeda' na'a, le goclenen le'e cont begüine'laže'le che da' xinjen' benle na' betinjle chen, can' goclaže' Diosen'. Na' can' goquen' bi bchojen mal dan' gocyaše'len'.

¹⁰ Cate' ba bencho da' xinj, Diosen' chaclaže' yegüine'cho che dan' benchon' na' yetinjchon. Na' chone' yela' mban toli tocane che chio' chetinjje xtola'chon', na' leca mbalazch soacho še ba betinjjecho xtola'chon'. Perw bene' zan cate' chesegüine'laže' bi chesyetinjde' xtola'gaquen', nach yesebiaye'e.

¹¹ Chebe Diosen' can' begüine'len', le goclenen gwzelaže'le benle can' gwna Diosen'. Goclaže'le gwlo'ele bich chonle txen len ben' ben da' xinjen', san bža'ale che da' xinjen' benen'. Bžeble yedeyena' le'e castigw na' gwzelaže'le gonle ca yebeda'. Nach be'le castigw che ben' ben da' xinjen'. Nacbia' bich bi xtola'le de can' benla'.

¹² Na' ca nac carten' bzoja' le'e, gague gwche' yichja' che ben' ben da' xinj na'ze, o che ben' bende' ca', san gwche' yichja' che le'e cont gacbe'ele lao Diosen' ne' chaquele neto' na' ne' chaclaže'le gonle can' che'to' le'e.

¹³ Na' na'a ba beyacxenlaže'to' da' bzenagle cheto'.

Na' lecze chebehgüeto' ca mbalaz zoa' Titon', le yogo'le benle ga bezoa' Titon' binlo len xbab da' yo'o lo' yichjlažda'oguen'.

¹⁴ Goša' Titon' nezda' gonle güen. Na' bi cheto'eda' da' goša'ne' ca', le ca da' li zjanac yogo' da' chzejni'ito' le'e, lecz ca' da' li bchoj dan' gožto' Titon', na' nacbia' be'to' diža' li.

¹⁵ Na' ba chacchde' le'e cate' chjayze'ede' da' bzenagle che' na' da' bžeble caten' gwnezele benle da' xinjen'.

¹⁶ Da'nan' chebeda' na' nezda' yeyož gonle can' chazlaže' Diosen'.

8

Besezande' da' gota' chegaque' gosaclene' bene' yoble

¹ Bene' migw, chaclaže'to' nezele can' ba goclen Diosen' to cuen to cuen bene' ca' chesedop chesežag chesonxene' Criston' to to yež gan' mbane distritw Macedonian'.

² Gocchgua yela' yaše' yela' zi' chegaque', perw Diosen' bene' cont gwnit'chgüe' mbalaz lo' yichjlažda'ogaquen' na' besyebchgüede' bosotobe' mechw xen cont gosaclene' bene' yoble.

³ Nezda' na' choa' diža' bosonežjochgüe' da' beseyažje bene' yoble la'czla' bibi gota' chegaque', na' con xbab chegaczen' gosone' ca'.

⁴ Goseneyoede' güe'to' latje yosonežjue' mechw cont yesaclene' bene' ca' chesejnilaže' Diosen'.

⁵ Na' gosonche' can' bento' xbab yesone', le zgua'tec goson cuingaque' lo' na' Xancho Criston' na' lecze goson cuine' lo' na' neto' dan' gosacclaže'chgüe' yesone' can' chazlaže' Diosen'.

⁶ Da'nan' ba gota'yoeto' Titon' yeyede' yeto gan' zoale cont gaclene' le'e yeyož gwtoble mechw dan' goclene' le'e gwzolaobtole cana'.

⁷ Güenchgua chonle chejnilaže'chguale Criston' na' choe'chguale xtižen', da' zan da' chejni'ile che Diosen', chonchguale xšinen', na' chaquechgüele neto'. Lece le gon güenchgua na' le gwtobe da' cheseyažje bene'.

⁸ Bi chona' byen gwnežjwle mechon', san chaclaža' gonle xbab še chaquele Diosen' na' še chaque lježle do laže'le can' goson bene' Macedonian' da' chesacde' Diosen' na' lježgaque'.

⁹ Nezele leca nži'ilaže' Xancho Jesucriston' chio'. Da' chacde' chio' bcua'ane' yogo'loł da' šagüe' da' de che' gan' zoe' len Diosen' na' bide' golje' bene' yaše' yežlio nga, bedeyene' cont yogo' dan' de che' gaquen checho naccho txen len le'.

¹⁰ Nachen' gwzejni'ida' can' chacda' naquen güen gonle. Godgüiz goclaže'le gaclenle bene' yaše' ca' na' gwzolaole btole mechon' do yichj do laže'le.

¹¹ Na' chacda' güen yeyož gwtoblen na'a do yichj do laže'le can' gwzolaole, na' gwnežjwle con ca zelao saque'le.

¹² Note'tezcho še do laže'cho chaclaže'cho gwnežjwcho bi da' gwnežjwcho, Diosen' yebede' la'czla' late'ze da' de da' gwnežjwchone'. Bi chnabe' gwnežjwchone' da' bi de checho.

¹³ Bi žia' gonle cont bich bi yega'an chele na' gata' che bene' yoble.

¹⁴ Con chaclaža' gata' da' chyažje yogo'le. Šlac na'a de che le'e, cheyała' gaclenle bene' ca' cheseyažjde'. Čhixe še gwžin ža cate' gata' chegaque' na' le'e chyažjele? Cana'chen' yesaclene' le'e cont gata' da' chyažje yogo'le.

¹⁵ Nach gac can' nyoj Xtiža' Diosen' žan: "Bene' botobe' da' zcha'o, bitw nacho becho'onen che', na' bene' botobe' late'ze, gata'cze da' byažjde'."

Titon' na' bene' lježe' ca'

¹⁶ Choxcen Diosen' bene' cont Titon' zelaže'chgüe' gaclene' le'e con can' zelaža' neda'.

¹⁷ Na' cate' goša'ne' yedene'e le'e da' yoble cont gaclenche' le'e, bebede', le' to gualaze' bene' xbab yeyede' gaclenche' le'e.

18 Na' chsel'a'to' yeto bene' lježcho len Titon'. Na' to cuen to cuen bene' ca' chesedop chesežag chesonxen Jesucriston' cheso'e diža' che benga chsel'a'to', chesene' binlo chyixjue'ede' diža' güen che Jesucriston'.

19 Nachen' lecze gosebeje' le' cont sa'lene' neda' cate' ša'a gan' že' bene' lježcho ca' šjasana' mechw dan' chtobcho. Na' gwnežjwcho mechon' cont gaxen Xancho Jesucriston' na' cont gwlo'ele chbele chaclen bene' lježle.

20-21 Yo'o yichjto' gonto' da' nac güen lao Xancho' na' lao benačhen', le mechw xenna', na' bi chaclaže'to' yesene' chonto' clele len len.

22 Na' lecze chsel'a'to' yeto bene' lježcho len legaue'. Zan n'a ba ble'eto' chone' xšin Diosen' do yichj do laže' na' na'a leca žan yide' gan' zoalen' da' nezde' zelaže'chguale gonle can' chazlaže' Diosen'.

23 Na' ca nac Titon', chone' xšin Diosen' txen len neda' cont chaclento' le'e. Na' bene' ca' yečhope, zjanite' chesone' cont Criston' chaxcene', na' bene' ca' chesedop chesežag chesonxene' Jesucriston' gosebeje' legaue' na' chesesele' legaue'.

24 Da'nan' chnia' le gon güen len legaue' cont bene' ca' chesonxene' Criston' to to yež yesenezde' chaquele legaue', na' le gwlo'e chonle güen can' gwnato' cate' be'to' diža' güen chele.

9

Bosotobe' mechon'

1 Bi chonen byen gwzoja' le'e n'a' cheyała' gwnežjwle mechw da' gaclen bene' chesejnilaže' Criston' ga yoble.

2 Nezda' chaclaže'le gaclenle legaue'. Na' ba be'lena' bene' Macedonia ca' diža' cont yesenezde' le'e zoale distritw Acaya chaclaže'le gaclenle bene' yaše' ca' na' gwzolaole btoble mechon' godgüiz. Da'nan' bene' ca' že' zan yež distritw Macedonia lecze ba chesone' ca'.

3 Perw bia'cze chsela' bene' ca' len Titon' cont diža' dan' ba bia' chele catec güenna' chonle bi gaquen ca da' güenlaže'. Chaclaža' yeyož gwtoble mechua' cont ba den cate' yida'.

4 Le še sa'len no bene' Macedonia neda' cate' yedena'a le'e da' yoble, na' yeto'eda' chele še biña' gata' mechua', na' lecze le'e yeto'ele da' bi benle can' gwnia' gonle.

5 Da'nan' godca' güen yesebialao bene' lježcho ca' šone yeside' gan' zoalen' cont yesaclene' le'e yeyož gwtoble mechw dan' gwnale gwnežjwle. Nachen' gwnežjwlen do yichj do laže'le, gague gwnežjwche'elen.

6 Le gon xbab can' chesene': "Bene' chaz late'ze, late'ze chelape', na' bene' chaz da' zča'o, da' zča'o chelape'."

7 Da'nan' to tole cheyała' gwnežjwle gaca'te' da' chebele gwnežjwle, na' bi gwnežjwche'elen, san gwnežjwlen do laže'le, le chebe Diosen' bene' zoa mbalaz chzande' bi da' chnežjue'.

8 Diosen' nape' yela' guac cont chaclenchgüe' chio' len bite'teze da' chyažjecho. Na' chac chone' cont chata' yogo'lo' da' chyažjecho bate'teze neche gac gwnežjwcho da' chyažje bene' yoble na' goncho bichle da' güen.

9 Quinga nyoj Xtiža' Diosen' che bene' chzande' da' de che', žan:

Ba bnežjue' da' beseyaže zan bene' yaše'.

Na' bi ganlaže' Diosen' da' güen dan' benen'.

¹⁰ Diosen' chone' cont chata' no xoa' biñ na' bichle da' chazcho; chone' cont chata' da' che'ej da' chagwcho. Lecze le' gone' cont gata' bichle da' chyažjele na' cont čha'o xenchen, na' gone' cont šejchle gonchle da' güen.

¹¹ Bite'teze da' chac čhele, Diosen' gone' cont gata' da' zcha'o da' gwnežjwle bene' yoble. Nach cate' šjanežjwto' bene' yaše' ca' dan' ba btoble, yeso'e yela' choxcen čhe Diosen'.

¹² Le da' gwnežjwle da' cheseyažje bene' chesejnilaže' Jesucriston' ga yoble, bene' zan yeso'e yela' choxcen čhe Diosen'.

¹³ Na' cate' bene' yaše' ca' yesezi'e mechon' chtoble, gwlo'en chzenagle diža' güen čhe Criston' do yichj do laže'le. Nach legaue' yeso'e yela' choxcen čhe Diosen' da' gwseła'le da' zcha'o mechw da' gaclenen legaue'. Lecze yeso'e yela' choxcen čhe' da' chaclene' yogo' bene' chesejnilaže' Criston'.

¹⁴ Na' do chesacde' le'e yosoł güiže' Diosen' yeseñabe' gaclenche' le'e, le nacbia' ba nži'ilaže' chgua Diosen' le'e.

¹⁵ Choxcen Diosen' gwsele' Xancho Jesucriston' len chio'. Bibi diža' de da' nacho catec zaca' goclenna' da' bene' len chio' gwsele'ne'.

10

Diosen' gwleje' Pablon' cont bzejni'ide' bene'

¹ Chesena bal' bene' chžeba' tila' le'e cate' zoa' len le'e na' con cate'ze zoa' zito' chzoja' cart chdila' le'e. Bi naquen ca', san chneyoeda' le'e diža' šagüe' ca' Criston' gwneyoede' bene' diža' šagüe' da' goque' bene' xenlaže' na' bene' šagüe'.

² Chneyoeda' le'e gonle da' güen cont bi tila' le'e caten' yedetila' bene' chesacde' chona' con can' žan čhia'.

³ Na' la'czla' zoato' lo yežlion' na' nacto' benačhze, cate' chdillento' da' malen' bi chdillenton' ca' benačhze.

⁴ San Diosen' none' neto' yela' guac cont chzoeto' chlej chšoštjo' yogo' da' chon gwxiyen', le bi soeto' tillenton' to gualazto'.

⁵ Can' chac, Diosen' chaclene' neto' chonto' cont chosozexjwyichj bene' chosozenague' čhe Criston' na' chesebejyichje' xbab mal čhegaquen' na' bichle da' cheseza'laže' da' chžonen yesombi'e Diosen'.

⁶ Na' cate' yeyož gata'bia' še yogo'le gwzenagle čhe Diosen', cana' ngüiato' gonto' castigw čhe nole bi chzenagle čhe'.

⁷ Le gon xbab čhe dan' chle'ele chonto'. Še nole chaquele nacle txen len Criston', le yeyon xbab lecze neto' nacto' txen len le'.

⁸ Na' bi yeto'eda' güe'cha' diža' yelate' can' ba bian', le chebeda' gwseła' Xancho Criston' neto' cont bzejni'ito' le'e diža' da' goclennen le'e, gague da' bžiyain' le'e.

⁹ Bi chaclaža' no gacde' še chzoja' cart quinga cont gwšeba' le'e.

¹⁰ Bene' ca' chesenelagüe' čhia' chesene' cate' zoa' zito' chzoja' cart znia ca' čhe no bene' gwnabia', na' chesene' bi chac bi gona' cate' zoa' len le'e na' bi choa' diža' da' zaca' gwzenagle.

¹¹ Bene' ca' chesenelagüe' čhia' cheyała' yesenezde' can' žato' le'e cart da' chzojto' le'e cate' zoato' zito', lecč ca' gonto' cate' yedesoato' len le'e.

¹² Bi chaclaže'to' gonlebeto' bene' ca' chesonxen cuingaue'. Chesacde' güenchgua chesone', le to toe' con chesena' lježe' cont chesene' chesonche' güenčh clal ca' cheson bene' lježe', na' bibi zejen chesone' ca'.

¹³ Neto' bi gonxen cuinto'. Con güe'to' diža' čhe da' ca' goclenn Diosen' neto' bento' gan' ba gwsele' neto', le lecze gan' zoalen' ba gwsele' neto'.

14 Da'nan' bi chonlaže'to' cate' choe'to' diža' che da' ba bento' gan' zoalen', le nacto' bene' nechw bzejni'ito' le'e diža' güen che Criston'. Šaca' bi bento' žin gan' zoalen' chonlaže'to' choe'to' dižan' ca', perw benton'.

15 Na' bi güe'to' diža' che da' ben bene' yoble, bi nato' neto' benton'. Zoato' lez šejnilaže'chle Criston' cont gaclenle neto' gonchto' xšin Diosen' gan' zoalen'.

16 Na' chaclaže'to' chixjue'eto' diža' güen che Criston' ga naquen zito'ch ca gan' zoale na'. Chaclaže'to' chixjue'eton' ga nono na' chixjue'eden' cont güe'to' diža' che xšin Diosen' da' ba bento' na' bi güe'to' che da' ba ben bene' yoble.

17 Bi cheyała' gonxen cuincho, san cheyała' gonxench Xancho Dios.

18 La'czła' še to bene' ne' chone' güen, bi naquen da' šejle'cho. Perw še Xancho Diosen' ne' chone' güen nachen' nezecho da' li chone' güen.

11

Pablon' na' bene' ca' cheson cuingaque' postlw

1 Chaclaža' gwzenagle yeto chop diža' güen da' gua' che cuina' la'czła' še chaquele naquen diža' da' bibi zaca'. Le gwzenag chia'.

2 Neda' bzejni'ida' le'e xtiža' Criston' da' nechw cont gwyejnilaže'lene', na' Diosen' chone' cont chacda' le'e do yichj do laža'. Na' chaclaža' gaquele toze Criston' cont zaca'le gona' le'e lo ne'e, gacle ca to no'ol güego', no'ole napši'i cuine' da' chadde' toz bene' byo bene' si' le'.

3 Chxožda' yeseziye' bene' le'e cont bich šejnilaže'le Criston' do laže'le na' bich gaquele toz le'. Can' gwziye' belen' da' no'ole nechon', no'olen' gože' Eva, da' nacha' be xigüe'.

4 Cate' chesela'ac bene' gan' zoale na' chosozejni'ide' le'e che Jesús'en nža'le can' ba bzejni'ito' le'e, o chosozejni'ide' nža'le che Spiritw che Diosen' o che diža' güen chen', la' chzenagtele chegaque'. Da'nan' chxožda' yeseziye'e le'e.

5 Ba nonle bene' ca' ca postlw chele na' chonxenle legaque'. Na' neda' zaca'cha' ca legaque'.

6 La'czła' bi choa' diža' xdan ca chesoe' legaque', ba ble'eczele yogo' dan' ba bento' na' nezzele chejni'ito' xtiža' Diosen' binlo.

7 ¿Chaquele malen' bena' bibi laxjua' gwxia' cate' be'lena' le'e diža' güen che Diosen'? Ben cuina' ca to bene' bibi zaca' da' bibi laxjua' gwxia' cont bena' ga zoachle mbalaz.

8 Gwxia' mechw da' goson bene' ca' chesedop chesežag chesonxene' Criston' ga yoble cont be'lena' le'e xtiža' Diosen'.

9 Na' cate' gwzoa' len le'e, la'czła' bi gota' da' byažjda', bi gwñabdan' le'e. Bene' ca' zeya'ac Macedonia gosone' da' byažjda' cont bi benda' le'e zed, na' bate'teze gwbatech gonda' le'e zed gonle da' chyažj chchinda'.

10 Chebeda' chac chnia' bibi gan chona' chyxjue'eda' xtiža' Diosen' len le'e o len bene' že' yež yoble ga mbane distritw Acayan'. Na' can' nezda' chaclen Criston' neda' choa' diža' li, can' nezda' gwbat gonda' le'e zed cont gonle da' chyažj chchinda'.

11 Perw gague da' bi chacda' le'e bi gonda' le'e zed. Diosen' nezde' chacda' le'e.

12 Na' gonchcza' can' chona' bibi laxjua' chzia' cont bi žel bi yosode'e bene' ca' yesene' toz can' chesone' len da' chon neto', le can' chesaclaže' yesene'.

13 Legaque' bi zjanaque' dogualje postlw. Con chosozejni'ide' diža' güenlaže' na' chesonlede' le'e cont gaquele gwsela' Criston' legaque'.

14 Bi yebanele can' chesonen', le ca'czen' chziye' Satanásen' chio', cheyon cuinen ca to angl bene' chactitchgua cont gaguecho naquen to angl güen bene' za' gan' zoa Diosen'.

15 Na' ca'czen' cheson bene' ca' chosozenag chen, chesonlede' le'e cont gaguele chosozejni'ide' diža' güen. Perw žin ža yezezaca'zi'e toli tocanę yela' güen da' mal chegaquen'.

Da' ca' gwdi gwxaca' Pablo da' naque' postlw

16 Da' yoble žia' le'e, bi gaguele chona' xbab da' bibi zaca' can' chon bene' bi chejni'i. Perw la'czla' še chaquele chona' xbab da' bibi zaca', le gwzenag chia' šlac gua' to chope diža' güen che cuina'.

17 Gua' diža' güen che cuina' la'czla' nezda' Xancho Criston' bi be'e diža' güen che cuine'. Guan' ca bene' chon xbab da' bibi zaca', bene' bi chejni'i.

18 Bene' zan cheso'e diža' güen che cuingaque' che bi da' ba gosone' o bi da' ba goc chegaque', na' ca'czen' gona' neda'.

19 Ba non cuinle bene' sina' na' da'na'ljan' chbele chzenagle che bene' cheson xbab da' bibi zaca'.

20 Chzenagle che bene' ca' ba gosone' le'e ca xmosgaque'. Choe'le latje cheseziye'e le'e cont chnežwle legaque' bi da' de chele na' chontezle bi da' chesene'. Chesonxen cuingaque' na' chesebaže' le'e cont chzenagle chegaque', na' bia'cze choe'le latje chosozejni'ide' le'e.

21 Chonljale xbab bžebto' le'e dan' bi beneto' le'e ca'.

Na' da' yoble gua' diža' ca bene' chon xbab da' bibi zaca', le bite'teze diža' güen da' cheyaxje bene' güe'e che cuine' note'teze naque', lecce cheyaxjda' gua' dižan' nac ca' che cuina'.

22 Chesonxen cuingaque' da' gosalje' gan' že' bene' chesaque' diža' hebreo. Nezczele lecce goljelena' bene' chesaque' diža' hebreo. Na' chesonxen cuingaque' da' zjanaque' bene' Israel. Nezczele lecce bene' Israel neda'. Na' chesonxen cuingaque' da' gosalje' lo diaža che da' Abraham. Na' nezczele lecce diaža che da' Abrahanna' neda'.

23 Chesene' Criston' gwsele' legaque' cont yesone' xšine'. Nezczele Criston' gwsele' neda' na' ba bencha' xšinen' ca legaque'. Si'xenle dan' choa' diža' ca bene' chon xbab da' bibi zaca', ca bene' bi chejni'i. Ba bencha' žin gual ca legaque', zan ni'ach ba goseyin justis ca' neda' da' choa' xtiža' Diosen' clcl ca da' ba goc che legaque'. Na' zan ni'ach bene' ca' chesegue'ede' neda' ba goseyixjue' neda' ližya clcl ca dan' ba goc che bene' ca' chosozejni'ide' le'e. Na' zan ni'a ba bela' cbi gota'.

24 Gayo' ni'a goseyin bene' Israel gualaž chia' neda' tašjw de yid togaljechoa ni'a güeje.

25 Šone ni'a bene' justis ca' goseyine' neda' xis. Na' tni'a bosotacue' neda' yej yelate'ze ca gosote' neda'. Na' cate' zya'a yež zito' to lo' barcw, šon ni'a bočinj nisdaon' barcon', na' canę bžina' yo biž. Na' lo šon ni'an beyinjenna', tni'a gwdeļa' nisdaon' tža tyel.

26 Zan ni'a ba gwya'a yež zito' jatixjue'eda' xtiža' Criston'. Zan ni'a cane goc gwdia' yegw ca'. Zoa cate' goca' lo na' bene' gwban. Zoa cate' bene' Israel gualaž chia' gosaclaže' yesote' neda', na' zoa cate' bene' bi zjanaque' bene' Israel gosaclaže' yesote' neda'. Na' zan ni'a do lo ciuda, do ga nono bene' že' na' do lo nisdaon' yelate'ze bi gota'. Na' yogo' ža chaš bene' chesonlaže' chesene' zjanaque' chio' txen na' chxožda' yosožiaye'e xšin Diosen' dan' chonan'.

²⁷ Zan ni'a ba bena' xšin Diosen' benten ga jaxaque'chgüeda', na' zan ni'a bchejda' bi gwtasa'. Nombi'a yela' chbil chdon, le zan ni'a bi gota' da' ye'ej gagua'. Na' lecze zan ni'a beyaga' bi gota' xa' da' byažjda'.

²⁸ Da' zanch da' ba gwdi gwxaca' da' bi choa' diža', na' lecze yogo' ža chi'chgua yichja' nac chac che le'e chdop chžagle chonxenle Criston' to to yež.

²⁹ Note'tezle cate' bi zoachäle len Criston' o bi chzoale gonle can' chazlaže' Diosen', chacyaše'chgüeda' cacze nacho nedan' chona' ca'. Na' lecze cate' bene' chese'go'oyele' le'e cont chonle da' mal, leca chacda' lo' yichjlažda'ogua' na' chža'a dan' ba chonle can' že'na'.

³⁰ Na' da' chonen byen güe'cha' diža' che cuina', nach gua' diža' che da' ca' chlo'en bi chac bi gona' to gualaza'.

³¹ Dios bene' cheyala' gonxencho toli tocane nezde' choa' diža' li. Len' naque' Xa Xancho Jesucriston' na' chonxen Jesucriston' le'.

³² Na' yeto da' goc chia', cate' gwzoa' ciuda Damasco, bene' goc gobernador šlac gwnabia' rey Aretas bnite' bene' gosape' cho'a puert da' zoa le'e ze'e da' nyechj ciudan' cont yesezene' neda' cate' yechoja'.

³³ Perw bene' lježcho ca' gosegüe'e neda' to lo' žome xen na' besyeletje' neda' to cho'a ventan le'e ze'e da' nyechje ciudan' cont bi gosezene' neda'.

12

Da' ble'edagüe' Pablon'

¹ Bi chazlaža' güe'cha' diža' güen che cuina', san gua' diža' che da' ca' da' ba ble'edagüe'da' na' da' ca' ba bzejni'i Xancho Criston' neda'.

²⁻³ Ba chejnilaža' Criston' cate' goc chia' quinga ba goc žta' iz. Diosen' bene' neče gwya'a yaban' gan' zoen'. Bi nezda' še gwya'a len cuerp chia', Dios nan' nezde'.

⁴ Con nezda' bžina' gan' zoa Diosen' na' benda' bene' ca' že' na' cheso'e diža' zaca' da' bi chac nia', diža' zaca' da' bi de latje güe' benach yežlio nga.

⁵ Šaca' žan gonxen cuina', yejni'a gonxen cuina' che da' ca' ba blo'e Diosen' neda', perw bi žan gonxen cuina' che bi da' ba bena' neda'. Con gua' diža' che da' ca' ba goc chia' da' chosolo'en bi chac bi gona' to gualaza'.

⁶ Šaca' žan gonxen cuina', da' zan da' güen ba bena' da' gac gua' diža' chen, diža' da' naquen da' li, gague da' güenlaže'. Perw bi gua' diža' che bi da' güen da' ba bena', le bi chaclaža' no gonxenč neda' ca' cheyala'. Yejni'a yesone' xbab še zaca' con ca nac da' chesele'ede' chona' na' can' chesende' choa' xtiža' Diosen'.

⁷ Cont bi ga'laža' che da' ble'edagüe'da' na' da' ba bzejni'i Xancho Criston' neda', Diosen' be'e latje chžaglagua' len to da' zoa cha'an ca cha'a yeše' lo cuerp chia' nga, na' leca chaclaže' Satanásen' gacda' tole da' chac chia' ca'.

⁸ Šone ni'a ba gwnabda' Xancho Criston' yequ'e dan' chžaglagua' len cuerp chian'.

⁹ Nach Xanchon' gože' neda': "Bi yeca'a dan' chžaglaguon', san soacza' gaclena' le'. Lezen da' chyažjdo'. Cate' bi chac bi gono', canan' gacbe'edo' chaclena' le' cont gono' bi da' cheyala' gono'." Da'n'an' chbeda' güe'cha' diža' che da' ca' chosolo'en bi chac bi gona' še Criston' bi chaclene' neda' len yela' guac chen'.

¹⁰ Na' da'n'an', cont gacxen Criston', chbeda' bite'teze da' chac chia' da' chlo'en chyažjda' gaclene' neda'. Chbeda' cate' chesezi'diža' bene' neda', cate' bi de da' chyažjda', cate' bene' chosolagšibe' neda', na' cate' bichle da'

chžaglagua', le cate' chac chia' ca', cana'ch chaclench Criston' neda' len yela' guac chen'.

Pablon' gwche' yichje' che bene' chesonxen Criston' Corinto

11 Ba bia' diža' benxen cuina' ca chon bene' bi chejni'i. Le'e cheyala' güe'le diža' chia' naca' bene' zaca', perw bi chonle ca'. Da'nan' benen byen bia' dižan' ca'. Da' juisyw chonxenle bene' ca' ba nonele ca postlw chele. Na' neda' ne late'ze bi chyažjen cont gaca' bene' zaca' ca legaque'. Žia' ca' la'czla' chache'eda' bibi zaca' šaca' bi zoa Diosen' len neda'.

12 Ba ble'ele naca' dogualje postlw, le cate' gwzoa' len le'e, Diosen' blo'e zoa yela' guac chen' len neda' na' bene' cont goc bichle da' zaca' yesyebane bene', na' goclene' neda' bchejda' yogo' da' goc chia' šlac bena' xšinen' gan' zolan'.

13 Toze ca güenna' bena' len le'e na' can' bena' len bene' yež yoble ga chesedop chesežague' chesonxene' Criston', con da' bi bia' latje gonle da' chyažj chchinda'. Le si'xen da' malen' bena' bi benda' le'e zed.

14 Chaclaža' yida' dena'a le'e da' gwyone ni'a. Na' bi gonda' le'e zed cate' yida'. Bi chaclaža' gonle neda' bi da' de chele, con chaclaža' gwzenagle chia' na' gon cuinle lo na' Criston'. Ca no bidao' bi cheyala' gwnežjwbe' bi da' chyažje xaxna'be', lan xaxna'be' cheyala' gwnežjue' da' chyažje lebe', ca'czen' naquen len le'e na' len neda'.

15 Chbeda' chzanda' bite'teze da' de chia' na' lente cuina' cont gaclencha' le'e, la'czla' šlac neda' chaquechda' le'e, le'e bi chaquetecle neda'.

16 Na' balle, la'czla' chache'ele bi benda' le'e zed len da' byažj bchinda', žale gwziya'a le'e.

17 ¿Bi nezele bi gwziya'a le'e cate' gwsela' note'teze bene' ca' ba gwsela' gan' zoale na'?

18 Gwneyoeda' Titon' bedene'e le'e na' gwsela' yeto bene' lježcho len le'. ¿Bi nezele bi gwziye' Titon' le'e? Le' len neda', toz can' chonto', na' toz can' chaclaže'to' gaclento' le'e.

19 ¿Chaquele ba bia' diža' quinga cont nezele bibi da' xinj chonto'? Gague da'nan' ba bia' dižan' ca'. Ba gwnia' yogo' da' ba gwnia' cont chaclena' le'e gonchle xbab can' chazlaže' Diosen', le chacda' le'e. Diosen' nezde' yogo' da' ba gwnia' le'e, na' naca' Criston' t xen chzejni'ida' le'e.

20 Con chžeba' cate' yedena'a le'e še gata'bia' bi chonle güen can' chaclaža' gonlen', na' še ba chonle da' mal, bi šo'laže'le can' gona' len le'e. Chacda' chixe še chdile chšašle na' chgue'e lježle o chloc lježle o chazlaže'le gac güen che cuinzle. Chixe še chne che lježle, še chhitjle diža', še cha'laže'le o še de da' zed chele.

21 Chžeba' cate' yedyena'a le'e še gata'bia' zanle bina' cuejyichjle da' malen' ba benle, na' bina' yetinjle che da' yela' zto' chonle, che da' nzoa no xtole, o da' chata'lenle no bene' bi nac bene' chele o no'ole bi nac xo'olle. Na' Diosen' gone' yeto'eda' chele na' yegüine'da' chele še naquen ca'.

13

Pablon' že' gone' castigw che no chon da' malen'

1 Na'a gac šone ni'a yedena'a le'e. Cate' gagwcho xya che note'teze bene', guata'bia' nape' dola' še yotilen can' chesena chope o šone bene' cheso'e diža' can' goquen'.

² Goša' le'e šlac gwzoa' len le'e caten' bedena'a le'e da' gwchope, bi yeyaše'da' bene' ca' goson da' xinjen' še bi yesyetingde', na' gona' castigw che yogo' nochle chon da' xinjen'. Na' da' yoble žia' ca' na'a šlac zoa' zito' len le'e.

³ Chaclaže'le gona' to da' gwlo'en chne Criston' len neda'. Da'nan' gona' castigw che nole chon da' xinjen'. Na' Criston' gwlo'e yela' guac xen che' cont saca'zi'le che da' xinj da' nonle.

⁴ Na' la'czla' Criston' ben cuine' ca' bene' bibi chac gon cate' gosote'ne' le'e yag cruzen', zoe' na'a da' nape' yela' guac xen che Diosen'. Na' lecze neto' nacto' txen len Criston' ben cuinto' ca' bene' bibi chac gon, perw gwlo'eto' le'e zoa' yela' guac che Diosen' len neto'.

⁵ Le gonyane' xbab chelen' še da' li chejnilaže'le Jesucriston'. Nach gacbe'ele zoe' len le'e še da' li chejnilaže'lene'.

⁶ Na' zoa' lez lecze gacbe'ele zoe' len neto' na' nacto' postlw che'.

⁷ Chol güižto'ne' chele chnabto' bich bi da' mal gonle, gague cont gacbe'ele zoa Jesucriston' len neto', san cont soale gonle da' güen. Le toze ca' nonen še chesache'e bene' zoe' len neto' o še bi chesache'ede'.

⁸ Na' bibi castigw gončo' le'e še chzenagle diža' li che Jesucriston', con gaclento' le'e, še ca'.

⁹ Yebeto' gonto' ca' bene' bibi yela' chnabia' nape', con še le'e ba chnabia'le chonle can' cheyala' gonle. Na' zoacztó' chol güižto' Diosen' chnabto' gaclene' le'e gonle doxen can' cheyala' gonlen'.

¹⁰ Ba bzoja' da' quinga za' yedena'a le'e cont yetinjle xtoła'len' na' bi yažjen gona' znia len le'e. Diosen' gwsele' neda' naca' postlw che' na' bene' neda' yela' chnabia' cont gaclena' le'e, gague cont gwžiaya'a le'e.

¹¹ Bene' migw chia', chnaba' gacšca güen chele. Le cuec yichjle gonyane'le yogo' da' chaclaže' Diosen' gonle. Le gon chač laže'le len bi da' chac chele. Le gac toze len ljež le'e chejnilaže'le Criston', na' le soa binlo tole yetole. Diosen' chacde' chio' na' chone' cont chzoa chbezcho binlo len xbab da' yo'o lo' yichjlažda'ochon', nachen' chnaba' soašcacze' len le'e.

¹² Le gwnopa' na' lježle gwguap lježle tiox cate' chežagle txen, cont gacbia' chaque lježle tole yetole.

¹³ Yogo' bene' ca' chesejnilaže' Criston' do nga chosoguape' le'e tiox.

¹⁴ Na' chnaba' Xancho Jesucriston' gaclenšcacze' le'e. Na' Diosen' gonšque' gacbe'echle chacde' le'e, na' gonšca Spiritw che Diosen' cont xbab chele gaquen toze len xbab chen. Da' na'zen' chzoja'.

CART DAN' BZOJ POSTLW SAN PABLO CHE BEÑE' GALACIA CA'

Pablon' chguape' tiox beñe' ca' chesonxene' Criston' Galacia

¹⁻² Neda' Pablo chzoja' le'e chdop chžagle chonxenle Criston' yež ca' zjachi' distritw che Galacia. Neda' len yogo' bene' lježcho ca' nite' nga chguapto' le'e tiox. Gague beñach gwlej neda' cont gona' xšine', san Jesucriston' txen len Xe' Diosen' ben' bosban le' ladjo beñe' guat ca', legaque' gosebeje' neda' cont naca' postlw chegaque'.

³ Na' chñaba' lao Xacho Diosen' len Xancho Jesucriston' yesaclene' le'e na' yesone' cont soa cuezle binlo len xbab da' yo'o lo' yichjlažda' ole.

⁴ Jesucristnan' bnežjw cuine' neche xtoła'chon' cont bich goncho txen len da' malen' chac lo yežlio nga. Bene' ca' le can' gwyazlaže' Xacho Diosen'

⁵ ben' cheyała' gonxencho toli tocañe. Na' ca' šcacze goncho.

Bich bi yeto diža' de da' gac nacho diža' güen che Diosen'

⁶ Diosen' gwleje' le'e cont Xi'ine' Criston' gaclene' le'e. Na' chebanda' can' chonlen' bedao'nez ba chbejyichjle Diosen' na' chzenagle che yeto da' chaquele naquen diža' güen.

⁷ Perw bi naquen diža' güen. Con nita' beñe' chososed chosolo'ede' xtiža' Diosen' clele na' chesone' cont chaczejlaže'le che diža' güen che Criston' dan' bseđ blo'eto' le'e.

⁸ Šaca' neto' chixjue'eto' yeto da' bi naquen diža' güen che Criston', chñabda' Diosen' gone' cont cuiayi'to'. Na' la'czla' to angl beñe' za' gan' zoa Diosen' chixjue'ede' yeto da' bi naquen diža' güen che Criston', lecze chñaba' gon Diosen' cont cuiaye'e.

⁹ Can' ba gwnian', lecze can' žia' da' yoble na'a: še note'teze bene' ba chyixjue'ede' xtiža' Criston' nža'le can' ba nsedlen, chñaba' gon Diosen' cont cuiaye'e toli tocañe.

¹⁰ Chnia' ca' cont na Diosen' chona' güen, gague cont yesena beñachen' chona' güen, na' gague cont yebe beñachen' neda'. Šaca' chi' yichja' nacle gona' cont yebe beñachen' can' chonan', bi chzenaga' che Criston' šaca'.

Diosen' gwleje' Pablon' na' gwsele'ne' cont goque' postlw

¹¹ Bene' migw, che'nda' nezele diža' güen che Criston' dan' ba be'lena' le'e bitw naquen xbab che beñach.

¹² Gague beñachen' bzenden' neda', na' neca nacho beñachen' bene' cont gwyejni'idan', san cuin Jesucriston' bzejni'ide' neda' diža' güen chen'.

¹³ Ba beneczele diža' can' ba bena' cate' ñe' na'ogua' costumbr che neto' beñe' Israel. Leca bchi bsaca' beñe' ca' chesonxene' Criston', goclaža' yesyenite'.

¹⁴ Na' gwche'chgua yichja' che costumbr dan' gosa'o da' xozxta'ogua' ca' na' bseđchan' clel ca zan beñe' l gualja' beñe' lecze zjanac beñe' Israel.

¹⁵ Perw cate' bina' galjtia', Diosen' bžie' bia' gona' xšinen'. Gwleje' neda' cont gonan', le nži'ide' neda'. Na' cate' bžin ža ben Diosen' can' gwchoglagüen' gone',

16 nach bene' cont bembia Xi'ine' Jesús. Na' bzejni'ide' neda' cont chyixjue'eda' xtiza' Jesús'en' len bene' ca' bi zjanac bene' Israel. Na' cate' ben Diosen' ca' len neda' notno gwñabda' gwzejni'ide' neda'.

17 Na' neca gwy'a Jerusalénna' cont postlw ca' yososed yosolo'ede' neda', bene' ca' gwlej Diosen' cont chesone' xšine' cate' neda' za' gonan'. San la' gwy'atia' gan' nzi' Arabia, na' gwdechle beza' Arabia bežina' Damasco.

18 Na' gocch šon iz gwy'a Damascon', nach beza' beya'a Jerusalénna' cont bembia' Pedron' na' jaso'a len le' žta'gwbiz'.

19 Perw bitw bšaga' yezica'chle postlw ca' san toze Jacobo bene' biše' Xanchon'.

20 Nezece Diosen' da' nga chzoja' naquen diža' li.

21 Nach gwy'a yež ca' zjachi' gan' nzi' Siria na' Cilicia.

22 Na' bene' ca' chesedop chesežag chesonxene' Criston' yež ca' zjachi' distritw Judean', legaque' bi'na' yesombi'e neda' ca' hora'.

23 Con ba gosende' chesena bene' chia': "Ben' bchi'bsaque' neto' bich chone' ca'. Ba chyixjue'ede' cheyala' šejnilaže'cho Criston', la'czla' cana' goclaže' gone' cont nono yesejnilaže' Criston'."

24 Na' bene' Judea ca' chesejnilaže' Criston' gosonxene' Diosen' cate' gosende' can' chonan'.

2

Yezica'chle postlw gosazlaže' can' chon Pablon'

1 Na' gocch žta' iz gwy'a Jerusalénna' nach da' yoble gwy'a len Bernabén', na' lecze gwchi'a Titon'.

2 Diosen' bzejni'ide' neda' cheyala' ša'a, na' da'nan' gwy'a. Na' btoba' bene' ca' zjanaque' blao len bene' ca' chesonxen Criston' Jerusalénna' na' legacze' bzejni'ida' bin' chyixjue'eda' len bene' ca' bi zjanaque' bene' Israel cate' cho'lena' legaque' diža' güen che Criston'. Bzejni'ida' legaque' bin' chsed chlo'eda', le goclaža' yesenežde' cont bi yesene' bibi zaca' dan' chona' na' da' ba bena'.

3 Ca' goquen' bitw chole gosone' byen soa bene' lježa' Titon' señw dan' nzi' circuncišion' la'czla' bi naque' bene' Israel.

4 Goc ca' la'czla' gwnita' bal' bene' gosaque' txen len bene' lježcho ca' Jerusalénna' ca' hora', bene' gague do laže' gosejnilaže' Criston', con besene'e še na'oto' costumbr ca' zjanyoj le'e ley che neto' bene' Israel. Legaque' gosaclaže' yesone' byen ga'oto' costumbr ca', la'czla' nezecho chebe Diosen' chio' dan' chejnilaže'cho Criston', gague dan' choncho can' ža leyna'.

5 Perw neto' ne late'ze bi bzenagto' che legaque', le goclaže'to' bi gata' da' gwžon gwzenaguechle diža' güen che Criston' da' naquen da' li.

6 Na' ca' nac bene' ca' gosac bene' blao len bene' ca' chesejnilaže' Criston' Jerusalénna', bitw gosazlaže' gwša'a can' chsed chlo'eda' che Criston'. (Žia' ca' la'czla' bitw bi nonen len neda' še gosaque' bene' blao o še bi gosaque', le len Diosen' tozce can' zjazaca' yogo'lol' bene'.)

7 Gosacbe'ede' Diosen' ngüe'e lo' na' chyixjue'eda' diža' güen che Criston' len bene' ca' bi zjanaque' bene' Israel can' ngüe'en lo' na' Pedron' chyixjue'eden' len bene' Israel gualaž cheto' ca'.

8 Le Diosen' ben' chaclene' Pedron' len yela' guac chen' cont chyixjue'ede' xtiza' Criston' len bene' Israel gualaž cheto', lecen' chaclene' neda' len yela'

guac chen' cont chyixjue'eda' xtiža' Criston' len bene' bi zjanaque' bene' Israel.

⁹ Can' goquen', Jacobon' len Pedron' len Juanna', bene' zjanacch blao len bene' ca' chesejnilaže' Criston' Jerusalénna', cate' legaque' gosacbe'ede' can' chaclen Diosen' neda' chona' xšinen', nach gosoxe' taca' len taca' Bernabén' cont bosolo'e zjanaque' txen len neto' na' gosazlaže' can' chonto'. Le gosacde' güencze gonto' xšin Diosen' len bene' ca' bi zjanac bene' Israel na' legaque' yesonen' len bene' Israel gualaż cheto' ca'.

¹⁰ Toze dan' gose'e neto' gonto', gaclento' bene' yaše' ca'. Na' da' licze chi'chgua yichja' chona' ca'.

Pablon' gwdiļe' Pedron' gan' nzi' Antioquía

¹¹ Na' gwdechle gwya'a gan' nzi' Antioquía. Na' šlac zoa' na' bid Pedron', na' gwdiļa'ne' can' chone', le bla'alaon chone' da' mal.

¹² Cate' za' bžine' Antioquían', gwzolaģüe' che'ej chagüe' txen len bene' ca' chesejnilaže' Criston' la'czļa' bi zjanaque' bene' Israel; perw gwdechna' cate' besežin bene' Jerusalén ben' gwseļa' Jacobon', bich goclaže' ye'ej gagüe' txen len bene' ca' bi zjanaque' bene' Israel. Bžebe' še bi yesena bene' ca' cheson xbab note'teže bene' chejnilaže' Criston' cheyaļa' soe' seřw dan' že' circuncišion.

¹³ Nach yezica'chle bene' Israel ca' chesejnilaže' Criston' ľecze besyebixe' bich gose'ej gosagüe' txen len bene' ca' bi zjanaque' bene' Israel, na' gosogo'oyele' Bernabén' cont lencze' bebixe'. Na' gosone' ca' cont yesebe bene' Jerusalén ca' legaque', la'czļa' gosenezde' bi naquen mal yese'ej yesagüe' txen len bene' ca' bi zjanaque' bene' Israel.

¹⁴ Goche'eda' bi chesone' can' cheyaļa' gon chio' nombia'cho diža' li che Criston'. Na' da'n'an' gwdiļa' Pedron' lao yogo' bene' ca' chesedop chesežag chesonxene' Criston', goša'ne': "Le' naco' bene' Israel, perw ba gwlejšyichjo' costumbr che chio' bene' Israel cont chono' txen len bene' ca' bi zjanaque' bene' Israel. Da'n'an' bitw cheyaļa' gono' byen yeson bene' ca' bi zjanaque' bene' Israel can' nac costumbr che chio' bene' Israel."

Con bene' chesejnilaže' Jesucriston' zjanaque' bene' güen len Diosen'

¹⁵ Neto' goljto' nacto' bene' Israel na' bitw goljto' ladjo bene' ca' cbi chesonxen Diosen'.

¹⁶ Perw ba nežeto' Diosen' bitw že' nacto' bene' güen len le' neče da' chonto' can' ža ley dan' bzoj da' Moisésen'. Con bene' chesejnilaže' Jesucriston' zjanaque' bene' güen len Diosen'. Da'n'an' lencze neto' chejnilaže'to' Criston' cont Diosen' že' cheto' ba nacto' bene' güen laģüe'na'; že' ca' gague neče dan' chonto' can' ža leyna'. Le bi nacho zoa bene' nac bene' güen len Diosen' neče chone' bi da' ža leyna'.

¹⁷ Baļ neto' bene' Israel ba chejnilaže'to' Criston' cont Diosen' none' neto' ca' bene' güen. Da'n'an' chache'eto' toz ca' bene' güen da' xinj nacto' len bene' bi zjanac bene' Israel. Perw bi nacho Criston' chone' cont nacto' bene' mal. Leca clenel' cheson bene' xbab še chesacde' ca'.

¹⁸ Nežecho bi chyažžen ga'ocho costumbr che da' xoxxta'o neto' bene' Israel cont gaccho bene' güen len Diosen'. Na' še ba gwlejšyichjo' costumbr ca' na' yezola'cho yeya'ochon da' yoble, gwlo'elaon nacho bene' güen da' xinj.

¹⁹ Ley dan' bzoj da' Moisés ba bžejni'in neda' bi naca' bene' güen len Diosen', le bi chona' can' žanna'. Perw dan' bi gwzoen yeyonen neda' bene' güen len Diosen', da'n'an' bich chonxenan', san yo'o yichja' soacza' gwzenaga' che Diosen'.

²⁰ Criston' bnežjw cuine' gote' neche xtolan', na' dan' chejnilaža'ne' da'nan' ba none' neda' ca to bene' guat len da' xinjen' cont bich gonan'. Na' bich zoa' to gualaza', san Criston' zualene' neda'. Na' dan' chona' na'a chonan' con can' ža' Xi'in Diosen' ben' chejnilaža'. Len' chacde' chio' na' bnežjw cuine' gote' neche chio'.

²¹ Diosen' nži'ilaže'de' chio' na' da'nan' gwsele' Criston', perw chzoacho to šla'ale dan' bnežjw cuine' gote' še chaquecho naccho bene' güen len le' neche choncho dan' ža leyna', le bitw byažjen bnežjw cuin Criston' neche chio' šaca'.

3

Naccho bene' güen len Diosen' dan' chejnilaže'cho Criston'

¹ Le'e bene' Galacia, nchoļ yichjlažda'olen'. ¿No gwziye' le'e cont chaquele cheyaļa' gonxenle costumbr che da' xozxta'oto' ca'? Ba bzejni'iyane'da' le'e che dan' got Criston' le'e yag cruzen' neche chio'.

² Da' ngazen' chnabda' le'e: ¿Zoa Spiritw che Diosen' lo' yichjlažda'ole neche dan' chonle can' ža ley dan' bzoj da' Moisésen'? Bitw naquen ca', san zoan len le'e neche dan' chejnilaže'le Criston'.

³ Spiritw che Diosen' gwyo'on lo' yichjlažda'olen' caten' gwzolaō chejni-laže'le Criston'. ¿Da' leca nchoļ yichjlažda'olen' chaquele chyažjen gonle can' ža leyna' cont yeyož gacē can' chazlaže' Diosen'?

⁴ Da' zan da' bosochi bososaca' bene' le'e dan' chejnilaže'le Criston'. ¿Na' bixe zacan' byo bchejele len da' ca' še na'a chaquele cheyaļa' gonle can' ža leyna'?

⁵ Nezele Diosen' ba bene' Spiritw chen' zoan len le'e na' chone' yela' guac da' chle'ele neche chejle'le xtiža' Criston' dan' bzeneto' le'e, gague chac ca' neche dan' chonle bi dan' ža leyna'.

⁶ Da' Abrahanna' gweyjnilaže' Diosen', na' da'nan' Diosen' gwne' naque' bene' güen lagüen'.

⁷ Da'nan' cheyaļa' nezele yogo' bene' chesejnilaže' Diosen', Diosen' none' legaque' ca xi'in diaža che da' Abrahanna'.

⁸ Diosen' bžie' bia' gone' len le'e bi nacle bene' Israel can' chone' len neto' bene' Israel, con note'tezcho chejnilaže'chone' none' chio' bene' güen lagüen'. Da'nan' Xtižen' dan' nyojen žan gože' da' Abrahanna' diža' güen qui cate' biņa' žin ža gaquen': "Dan' chejnilažo' neda' gona' güen len bene' ca' že' yogō nación."

⁹ Na' can' naquen, Diosen' chone' güen len bene' ca' chesejnilaže' le' can' bene' güen len da' Abrahanna' ben' gweyjnilaže'ne'.

¹⁰ Na' note'tez bene' chon xbab gaque' bene' güen len Diosen' lagüe' chone' bi dan' ža ley dan' bzoj da' Moisésen', da' mal juisyw gac che' še ca', le nyoj Xtiža' Diosen', žan': "Da' mal juisyw gac che note'tez bene' še bi nita'teze' yesone' yogōļ can' ža leyna' bate'teze."

¹¹ Na' Xtiža' Diosen' nyojen, žan: "Bene' chesejnilaže' Diosen' zjanaque' bene' güen lagüe', na' da'nan' guata'cze yela' mban chegaque' toļi tocanē." Na' da' žan ca' nezecho bitw že' che note'tezcho naccho bene' güen lagüen' neche choncho bi dan' ža leyna' goncho.

¹² Na' leyna' bi žan cheyaļa' šejnilaže'cho Diosen', san con žan: "Note'teze bene' chon doxen can' ža leyna' gac bane' toļi tocanē."

¹³ Perw Criston' bnitlagüe' xtoļa'chon' cont bi gac da' mal juisyw checho dan' bi chzoecho goncho doxen can' ža leyna'. Bnežjw cuine' goc da' mal juisyw

che' laz chio'. Goc che' can' nyojen, žan: "Da' mal juisyw chac che note'tez bene' chesote' chosode'ene' le'e yag."

¹⁴ Goc ca' cont lencze le'e bi nacle bene' Israel šejnilaže'lene' na' soale mbalaz ca mbalazen' gwzoa da' Abrahanna' dan' gwejnilaže' Diosen'. Nachen' da' chejnilaže'cho Cristo Jesúsén', Diosen' gwsele' Spiritw chen' zoan len chio' can' gwne' gone'.

Ley dan' bzoj da' Moisésen' na' dan' gwna Diosen' gone' len da' Abrahanna'

¹⁵ Bene' migw, gwzejni'ida' le'e len da' nga chac yežlio nga: Cate' to bene' chze'e yiš o chone' testament, bi nacho cate' beyož bosočele' can' gwne' gone' cbi gone' can' žanna' o gwzanche' can' žanna', la'czla' naquen to da' chon benachze.

¹⁶ Na' ca nac dan' gož Diosen' Abrahanna' gone' da' güen len le' na' len xi'in diaža che', Xtiža' Diosen' dan' nyojen bi choen' diža' che zan diaža che da' Abrahanna', san choen' diža' che toze', na' zejen Cristo.

¹⁷ Na' dan' gož Diosen' Abrahanna' gone' gac da' güen che', chzaca'leben ca to yiš dan' chosoz'a bene', le Diosen' bitw gwše'e can' gwne' gone'. Na' ba gwde tap gayoa šichoa iz gož Diosen' da' Abrahanna' gone' gac da' güen che' cate' bene' cont bzoj da' Moisésen' ley chen'. Perw la'czla' Diosen' bnežjue' leyna', bitw nacho cbi chone' can' gwne' gone' len Abrahanna' na' len xi'in diaža che' ca'.

¹⁸ Šaca' Diosen' že' con bene' cheson doxen can' ža leyna' zjanaque' bene' güen, bitw chone' da' güen che xi'in diaža che da' Abrahanna' can' ba gwne' gone' šaca'. Perw Abrahanna' goque' bene' güen len le' da' gwejle'e gon Diosen' can' gože'ne'.

¹⁹ Še naquen ca' žbixchen byažje ley dan' bzoj da' Moisésen'? Diosen' bnežjuen' da' xoxta'oto' bene' Israel cate' ba gwde tiemp che da' Abrahanna' cont gosacbe'ede' bi chesone' can' non Diosen' mandadw yesone'. Na' bžie' bia' gonen žin šlac biņa' yid Criston' ben' gwna Diosen' galje' lo diaža che da' Abrahanna', na' che le' be' Diosen' diža' caten' gwne' gone' güen len xi'in diaža che da' Abraham. Na' ca nac leyna', Diosen' bene' cont angl ca' bosonežjuen' da' Moisésen'. Na' Diosen' bchine' Moisésen' bzejni'ide' xoxta'oto' bene' Israel ca' can' žanna'.

²⁰ Perw cate' Diosen' gože' da' Abrahanna' gone' güen che', cuincze' bzejni'ide' da' Abrahanna', na' bi byažjde' bene' yoble gwzejni'ide' le' can' gone'.

Da' chzejni'i leyna' chio'

²¹ Na' bitw cheyla' gaquecho ley dan' bzoj da' Moisésen' chonen clele len da' gwna Diosen' gone' la'czla' leyna' bitw gac yocoben yichjlažda'ochon'. Šaca' gac yocoben yichjlažda'ochon' guac goncho can' ža leyna' nach gaccho bene' güen len Diosen' šaca'.

²² Perw Xtiža' Diosen' dan' nyojen žan yogo'lo' benachen' yesezi'e castigw toli tocaņe neche xtoła'gaquen', na' con bene' yesejnilaže' Jesucriston' nitlao xtoła'gaque' can' bsi Diosen' xnezen', cont gac güen chegaque' can' gwne' gac che xi'in diaža che da' Abrahanna'.

²³ Ca nac neto' bene' Israel, cate' biņa' nezeto' cheyla' šejnilaže'to' Criston', nchoglaon cheto' si'to' castigw toli tocaņe dan' nombia'to' leyna' na' bitw chonto' can' žanna'.

²⁴ Len neto' leyna' zaca'leben ca to bene' chgüia chne'e xi'in bene', da' zan da' chi'ebe' gombe' na' da' zan da' chi'ebe' bi gombe'. Perw na'a ba bid Criston', na' note'tezcho chejnilaže'chone', Diosen' že' naccho bene' güen len le'.

25 Na' dan' ba bid Criston' leyna' bich naquen ca bene' chgüia chne'e neto' bene' Israel, neto' chejnilaže'to'ne'.

26 Yogo' chio' chejnilaže'cho Cristo Jesúsen' naccho xi'in Dios.

27 Na' note'tezcho še ba gwzoacho nisen' cont blo'echo naccho txen len Criston', ba chzolao chac yichjlažda'ochon' can' nac yichjlažda'ogüen'.

28 Na' tozeczecan' zaca'cho lao Diosen' še naccho bene' Israel o še bi naccho, na' še naccho bene' esclavo o še bi naccho, na' še naccho bene' byo o še naccho no'ole. Yogo'cho ba naccho ca toze bene' neche dan' naccho txen len Cristo Jesúsen'.

29 Na' dan' naccho txen len Criston', lao Diosen' naccho xi'in diaža che da' Abraham, na' gon Diosen' güen len chio' can' gwne' gone' len xi'in diaža che da' Abrahanna'.

4

1 To bene' gwni'a še zoa xi'ine', bi'nan' gac lo na'be' da' de che'. Perw na' šlac ne' nache' bidao' bitw nacho mbalazech chac chebe' cdel ca che to bene' güen žin la'czla' žin ža gac lo na'be' yogo' dan' de che xaben'.

2 Bene' güen žin ca' nite' lo' yo'o chosgüia chesene'ebe' na' chesenabi'ebe' šlac bi'na' cha'obe' na' šlac žin ža co'o xaben' lo na'be' dan' de chen'.

3 Can' goc len neto' bene' Israel šlac bi'na' yid Criston', gwxaca'lebo' ca xi'in bene' gwni'an'. Na' leyna' gwzaca'leben ca bene' ca' chesenabia' xi'in bene' gwñian' šlac bi'na' žin ža si'be' dan' de che xaben'.

4 Perw cate' bžin ža bžia Diosen' bia' gwseła' Xi'inen' yežlio nga, gwxa to no'ole le'. Na' Xi'in Diosen' lecze benen byen bzenague' che leyna'.

5 Na' len' bedeyene' cont yogo' chio' chejnilaže'chone' ba non Diosen' chio' ca xi'ine' na' zoacho mbalaz dan' nezecho bich chonen byen gonxencho costumbr ca' da' zjanyoj le'e ley che neto' bene' Israel.

6 Na' cont nezecho ba non Diosen' chio' ca xi'ine', ba gwsele' Spiritw chen' dan' lecze naquen Spiritw che Xi'ine' Criston', zoan lo' lažda'ochon'. Na' Spiriton' chaclenen to tocho cont choł güižcho Diosen' che'chone': "Xa".

7 Nachen' dan' ba non Diosen' chio' ca xi'ine' bich cheyla' soacho ca to esclavo len dan' non leyna' mandaw goncho. None' chio' ca xi'ine' na' chone' güen len chio' doxen can' gwne' gone' len xi'in diaža che da' Abrahanna'.

Plablon' chi' yichje' nac cheson bene' ca' chesejnilaže' Criston'

8 Cate' bi'na' gombia'le Diosen', gwyejnilaže'le da' ca' bi cheyla' šejnilaže'cho, na' legaquen gosenabian' xbab chele.

9 Perw na'a ba nombia'le Diosen', o še güenč nacho Diosen' ba nombi'e le'e. Na' chebančgüeda' chele dan' chebiga'le cosxañle na' da' yoble chonxenle costumbr ca' ca no che da' ye'ej gagwcho, che ža ca', na' che cuerp chechon', na' cho'ele latje chesenabian' xbab chele la'czla' bitw zjazacan' cont yesaclenen chio'.

10 Ba chonxenle costumbr che no ža lni, che bio' ca', che tiemp ca' na' che iz ca'.

11 Chžeba' še bich chzenagle che dan' ba bsed blo'eda' le'e, le še bich chzenagle chen, ba gwžiyai' dan' bena' len le'e.

12 Bene' migw, chata'yoeda' le'e gacbe'ele costumbr che neto' bene' Israel dan' zjanyoj le'e leyna' bi yesaclenen le'e lao Diosen' ca chache'eda' bi yesaclenen neda' lao Diosen'. Na' caten' bedesoal' len le'e cana', bitw nacho ba benle mal len neda'.

13 Nezeceze bega'anlena' le'e da' nechw dan' gocšenda' na' gwđixjue'eda' diža' güen che Criston' len le'e.

14 Na' dan' gocšenda' ca hora' zacan' gue'ele neda', perw bitw bgue'ele neda', san do yichj do laže'le bleble neda' ca šale bleble to no angl che Dios o ca šale cuin Jesucriston'.

15 Mbalaz gwzoale cate' gwzoa' len le'e cana'. ¿Bixchen' bich chebele xtizan' na'a? Nezda' da' leca goquele neda' bzanele bite'teze da' de chele na' goclaže'le lente cuinle zanele gaclenle neda'.

16 Na' na'a žba chaquele chgue'eda' le'e dan' choe'lena' le'e diža' lin'?

17 Bene' ca' chososed chosolo'ede' le'e na'a leca zjachi' yichjgaque' le'e, perw gague cont yesone' güen len le'e, san cont yesyebeje' le'e bich gonle txen len neto', na' cont cue' yichjle legacze'.

18 Naqueczen güen yesebe' yichj bene' le'e bate'teze, gague cate'zen' zoa' len le'e, con še yesone' güen len le'e.

19 Xi'indagua', da' yoble chžaglagua' lo' lažda'ogua' neče le'e can' chžagla'o to no'ole bene' chzan, na' bich žaglagua' ca' cate'ch gac yichjlažda'olen' can' nac yichjlaždao' Criston'.

20 Yebechgüeda' šaca' netec na'a zoa' len le'e na' šaca' gac nia' chonle güen, perw leca chacžejlaža' chele.

Da' Agar na' da' Saran'

21 Le'e chaclaže'le gonxenle costumbr che neto' bene' Israel dan' zjanyoj le'e ley dan' bzoj da' Moisésen' žbiņa' yenele can' ža dan' nyojen'?

22 Žan gwnita' chope xi'in da' Abrahanna' bi' byo, tobe' gwzan to no'ol ben' goque' esclava che' na' yetobe' gwzan no'ol checze', no'ole nga bi goque' esclava.

23 Na' bin' gwzan no'ole esclavan' goljbe' dan' gwzoalen da' Abrahanna' le', perw bi' gwzan no'ol checze', goljbe' neče Diosen' gože'ne' san no'ol chen' la'czla' naque' no'ol güiž.

24 Na' dan' goc che no'ol ca' chzejni'in chio' che chop dan' gwna' Diosen' gone' cont gaclene' bene' Israel ca'. No'ole esclava ben' le Agar zaca'lebde' ca ley dan' ben Diosen' mandadw bzoj da' Moisésen'. Bzojen' par da' xozxta'o neto' bene' Israel lo ya'a Sinaí, na' bene' ca' zjazaca'lebde' ca esclavos.

25 Na' doxen nación Israelen' zaca'leben ca da' Agaren' no'ole esclava che da' Abrahanna'. Diosen' bnežjue' da' xozxta'oto' ca' leyna' lo ya'a Sinaí gan' nzi' Arabia, na' ža na'aža bene' Israel gualaž cheto', bene' guac nacho bene' Jerusalén, ne' zjanaque' ca esclavos neče chesacde' chonen byen yesa'ogüe' costumbr ca' dan' ža leyna'.

26 Perw chio' chejnilaže'cho Criston' naccho txen len yogo' bene' šjaya'aque' yaba gan' zoa Diosen' gan' lecze nzi' ciuda Jerusalén. Na' nezecho bitw chonen byen ga'ocho costumbr ca' dan' ža leyna'.

27 Quinga ža Xtiza' Diosen' dan' nyojen:

Bebe no'ole güiž, no'ole cbi chzan,

bosya'a yela' chbe chio', le' biņa' gaco' bes che yela' sanna'.

Chacdo' bi chaque Diosen' le' da' nono xi'ino' zoa,

perw nita' zanch xi'ino' cdel ca nita' che no'olen' ba gwzan xi'in bene' byon' gwzoalene'.

28 Bene' migw, xi'in da' Abrahanna' bin' le Isaac goljbe' neče gož Diosen' Abrahanna' san no'ol chen' la'czla' goque' no'ole güiž. Na' ca'cze chio'

chejnilaže'cho Criston', Diosen' none' chio' ca xi'in diaža che da' Abrahanna' bin' goljbe' neče goc dan' gož Diosen' le'.

²⁹ Bi' che da' Agaren', bin' goljbe' neče gwzoalen da' Abrahanna' le', bchi bsaca'be' Isaaquen' bin' ben Spiritw che Diosen' cont gwzan da' Saran'. Ca'cze naquen ža na'aža, beŋe' ca' chesa'o costumbr ca' dan' ža leyna' chosoči chososaque' chio' chejnilaže'cho Criston'.

³⁰ Na' Xtiža' Diosen' dan' nyojen žan Diosen' gože' da' Abrahanna': "Bebej no'ole esclavan' len bi' čhen', le bitw gwnežjua'be' dan' gwnia' gwnežjua' bi' gwzan no'ol chio'na'."

³¹ Da'nan' beŋe' migw, nezecho zaca'lebcho ca xi'in da' Saran', gague ca xi'in da' no'ole esclavan'.

5

Bi cheyala' yesa'ogüe' costumbr da' bi zjazaca'

¹ Caten' gwyejnilaže'cho Criston', le' bebeje' chio' lo' yogo' da' choncho chaquecho chebe Diosen' chio' lagüe dan' chonchonna'. Da'nan' bi cheyala' yeyonxencho costumbr da' bi zjazacan' len Diosen'.

² Neda' Pablo žia' le'e to da' žialao. Še soale seŋw dan' nzi' circuncisión na'a ba chejnilaže'le Criston', bibi zacan' dan' ba gwzolao chejnilaže'lene' še ca'.

³ Da' yoble žia' le'e, note'teze beŋe' soe' seŋw dan' nzi' circuncisión, lecze cheyala' gone' yogo'lol bite'teze dan' ža ley dan' bzoj da' Moisésen'.

⁴ Na' še chaquele gonle doxen can' ža leyna' cont gacle beŋe' güen len Diosen', ba chzoale Criston' to šla'ale še can' chaquele, na' bich chonle xbab catequen' nži'ilaže' Diosen' chio'.

⁵ Da' chejnilaže'cho Jesucriston' zoa Spiritw che Diosen' lo' lažda'ochon', na' chonen ga chebecho nezecho Diosen' ne' naccho beŋe' güen len le' cate' yežincho gan' zoe'na'.

⁶ Ca nac chio' chejnilaže'cho Cristo Jesús'en', bitw bi nonen len Diosen' še ba zoacho seŋw da' nzi' circuncisión o še cbi zoachon. Le dan' naquen da' žialao xen len Diosen', soateze soacho šejnilaže'cho Criston' na' gague lježcho cont gachia' chejnilaže'chone'.

⁷ Cana' gwzoale chonle can' chebe Diosen', perw na'a žnon' ba ben cont bich chzenagle che diža' li che Diosen'?

⁸ Dios ben' gwleje' le'e nacle xi'ine', bitw nacho le'na' chone' cont chzenagle che diža' yoble.

⁹ Le gon xbab can' ža diža' nga: "Late'ze levadura chonen cont chas doxen cuazina'."

¹⁰ Perw na' zoa' lez gon Xancho Jesucriston' cont gwzenagle chia'. Na' Diosen' gwnežjue' castigw che beŋe' chon cont chacžejlaže'le, note'teze naque'.

¹¹ Beŋe' migw, ca nac neda', šaca' ne' chsed chlo'eda' nia' yogo' beŋe' byo cheyala' yesezoe' seŋw dan' že' circuncisión cont yesenite' binlo len Diosen', bilja chosoči chososaca' bene' Israel gualaž čhian' neda' šaca', le can' chosed chosolo'e'legaue'. Perw dan' žia' Criston' bnežjw cuine' gote' le'e yag cruzen' cont soacho binlo len Diosen', da'nan' bi chesazlaže' xtižan'.

¹² Na' ca nac beŋe' ca' cheson cont chaquele bilja chebe Diosen' le'e še bi zoale seŋon', yebeda' šaca' yesečhog cuingaque' yelate'.

¹³ Beŋe' migw, Dios ben' gwleje' chio' cont naccho xi'ine' chaclaže' nezecho bich chonen byen ga'ocho dan' ža ley cont soacho binlo len le'. Perw bitw

cheyala' goncho bite'teze da' mal dan' ža lažda'ochon' goncho. Dan' cheyala' goncho, cheyala' gaclen lježcho lagüe dan' chaque lježcho tocho yetocho.

¹⁴ Na' ba zoaczcho choncho yogo'lo' can' ža leyna' še choncho can' nyojen žan: "Cheyala' gaque lježcho ca chaque cuincho."

¹⁵ Perw še chacyožlen lježcho o chdillen lježcho, chžiyi'cho dan' non Diosen' cont naccho toze.

Can' goncho še gwzenagcho che Spiritw che Diosen'

¹⁶ Chnia' le'e to da' zejen, cheyala' soateze soacho goncho can' chaclaže' Spiritw che Diosen'. Na' še goncho ca', bitw gwzenagcho che da' mal dan' yo'o lo' yichjlažda'ochon'.

¹⁷ Cate' chzenagcho che da' mal dan' yo'o lo' lažda'ochon', bitw choen' latje gwzenagcho che Spiritw che Diosen'. Na' cate' chzenagcho che Spiritw che Diosen', bi choncho con can' žan checho. Na' dan' zoa Spiriton' len chio', da'nan' bitw choncho da' mal dan' ža lažda'ochon' goncho.

¹⁸ Na' še chzenagcho che dan' chsed chzejni'i Spiritw che Diosen' chio', bich chonxencho costumbr ca' dan' ža ley dan' bzoj da' Moisesen'.

¹⁹ Nacbia'cze bene' ca' chosozenag che da' malen' dan' yo'o lo' lažda'ogaque' chesone' bite'teze da' mal quinga: chesata'lene' no'ol bi zjanac no'ol chegaque' o bene' byo bi zjanac bene' chegaque'; chesebede' chesone' bichle da' yela' zto' len cuerp chegaque';

²⁰ chesejnilaže' l gua'a lšaca'; chosozenague' xtiža' bene' ca' chesenelen da' xigüe'; chesegue'e lježe'; bitw nite' binlo len lježe'; chesacxi'a lježe'; cheseloque'; zjachi' yichje' gac güen che cuingacze' sin chi yesone' xbab nac gac che lježe'; bitw chesone' txen len lježe';

²¹ chesezelaže' bi da' de che bene' yoble; chesote' bene'; zjanaque' bene' borrašw; zjalene' no lni gan' chac žaš; na' chesone' bichle da' mal dan' zjanac ca da' mal quinga ba gwnia'. Na' da' yoble chnia' le'e can' ba gwnicza', nono yežin yaban' gan' zoa Diosen' chnabi'e še chone' da' xinj ca' zjanac ca'.

²² Perw na' še chzenagcho che Spiritw che Diosen', goncho yogo' da' quinga: gaguecho ljež benačcho; soacho mbalaz dan' nombia'cho Diosen'; soacho binlo len xbab dan' yo'o lo' yichjlažda'ochon'; gapcho yela' chxenlaže' len ljež benačcho bite'teze da' chesonde' chio'; goncho güen len bene' yezica'chle; gaccho bene' šagüe' len yogo'lo' bene'; goncho bi da' si' lo na'cho goncho;

²³ gaccho bene' gwzexjwlaže'; bitw soacho goncho con can' žan checho. Na' še choncho da' güen can' chaclaže' Spiritw che Diosen', bitw bibi ley de da' nan choncho da' mal.

²⁴ Na' chio' ba naccho txen len Cristo, bich choe'cho latje nabia' da' malen' chio' cont goncho can' žanna'.

²⁵ Spiritw che Diosen' ba benen yela' mban toli tocanē checho, na' da'nan' cheyala' soacho goncho can' chaclažen'.

²⁶ Na' bi cheyala' ga'laže'cho gaguecho leca bene' güen naccho, le še goncho ca', chonen cont yeseža'a bene' lježcho chio' na' yesegue'ede' chio'.

6

Cheyala' gaclen lježcho

¹ Bene' migw, še to bene' lježchon' ba blažoe' bene' da' mal, chio' chzenagcho che Spiritw che Diosen' cheyala' gaclenchwne' yetinjden' cont yezoe' binlo len Diosen'. Na' cheyala' gwsaca'cho, le xož lecze chio' lažo'cho goncho da' malen'.

² To tocho cheyała' gaclen bene' lježcho ca' bite'teze da' chesac čhegaque', le can' gwna Criston' chaclaže' goncho.

³ Na' še goncho xbab naccho bene' güen cate' bi naccho, chziye'ze cuinchon' še ca'.

⁴ To tocho cheyała' goncho xbab še dan' ba benchon' naquen da' güen o da' mal. Na' yebecho še ba bencho da' nac güen, perw bitw goncho xbab güench ba ben chio' clcl ca bene' yoble.

⁵ Le to tocho čhoglao Diosen' čhecho še bencho güen o še bencho mal.

⁶ Še no chsed chlo'e chio' xtiža' Diosen', cheyała' gwnežjwchone' late' bi da' šagüe' da' güen da' de čhecho.

⁷ Bitw güe'le latje no si'ye' le'e, bitw gac gwcušaše'cho da' choncho len Diosen'. Le še goncho da' mal, gone' cont si'cho castigw; na' še goncho da' güen, gone' cont soacho mbalaz. Can' zeje diža' dan' žan: "Con dan' chazcho, lenna' yelapcho."

⁸ Ben' chon con can' ža da' mal dan' yo'o lo' lažda'ogüe', gwžin ža cuiaye'e toli tocañe; perw ben' chon can' chazlaže' Spiritw čhe Diosen', Spiriton' gonen cont bane' toli tocañe.

⁹ Na' bitw cheyała' yeche'echo goncho da' güenna', le gwžin ža cate' Diosen' gone' cont soacho mbalaz juisyw, con še bi cuejijhcho choncho can' chaclažen'.

¹⁰ Da'nan' cheyała' goncho güen len yogo'lol bene' bate'teze de latje, na' chonchen byen goncho güen len bene' chesejnilaže' Criston' clcl ca len zezica'chle bene'.

Yeto čhope dan' che' Pablon' legaque'

¹¹ Le na'šc letr cha'o quinga, le cuina' chzoja' le'e.

¹² Bene' ca' chesaclaže' yesone' byen soale señw dan' že' circuncisión chesacde' yesyebe bene' Israel gualaž čheto' ca' legaque' še ba bosozoe' le'e señoñ'. Cheseyiljwlaže' nacle yesone' cont nono yosoči yososaca' legaque' da' chesejle'e Criston' bnežjw cuine' neče chio' cate' gote' le'e yag cruzen'.

¹³ Bene' ca' chesene' cheyała' soale señoñ' zjachi' yichjgaque' ley dan' bzoj da' Moisésen' perw ne legaque' cbi chesone' can' žanna'. Con chesaclaže' soale señoñ' cont yesonxen cuingaque' lao bene' Israel gualaž čheton'.

¹⁴ Ca nac neda', bitw gonxen cuina', san gonxena' Xancho Jesucriston' dan' bnežjw cuine' gote' le'e yag cruzen' neče chio'. Bitwbi nonen len neda' še benačhen' yesyebede' neda', le neda' bich chebeda' da' ca' chesena benačhen'.

¹⁵ Na' len chio' chejnilaže'cho Cristo Jesús'en' nezda' bibi nonen še zoacho señw dan' že' circuncisión o še bi zoachon, perw zaca'chgua dan' ba bocob Diosen' yichjlažda'ochon'.

¹⁶ Lao Diosen' naccho dogualje bene' Israel še ba chejnilaže'cho Jesucriston'. Na' chnaba' gaclen Diosen' yogo'le ba zoale chzenagle čhe' cont soa cuezchle binlo len xbab čhele, na' leče chnaba' yeyaše' yeži'ilaže'de' le'e.

¹⁷ Na' na'a chnabašca' bich gonle güedenag len xtižan', le cuerp chia' nga nsan' yiž čhe dan' bosochi bososaca' bene' neda' neče chyixjue'eda' xtiža' Xancho Jesús'en'.

¹⁸ Bene' migw, chnaba' soašca Xancho Jesucriston' gaclenšque' le'e len xbab dan' yo'o yichjlažda'olen'. Da' na'zen' chzoja' na'a.

CART DAN' BZOJ POSTLW SAN PABLO CHE BENE' CA' ŽE' EFESO

Pablon' bzoje' bene' chesejnilaže' Criston' ciuda Efeso

¹ Neda' Pablo naca' postlw che Jesucriston' con can' gwnalaže' Diosen'. Na' chzoja' le'e zoale Efeso le'e nacle lo na' Diosen' da' chejnilaže' le' Criston'.

² Chnabda' Xacho Diosen' na' Xancho Jesucriston' yesaclene' le'e na' yesone' cont soa cuežle binlo len xbab chelen'.

Diosen' chaclenchgüe' chio' da' ngode' cho txen len Criston'

³ Cheyała' gonxencho Diosen' ben' nac Xa Xancho Jesucriston' na' le' lecze chonxene' Diosen'. Chio' naccho txen len Criston', Diosen' ba bene' chio' yogo' da' chyažje yichjlažda' ochon' cont šjayzoacho len le' yaban'.

⁴ Na' da' bnežjw cuin Criston' neče chio', da' nan' Diosen' gwleje' chio' cate' biña' xe yežlion' cont gaccho bene' laždao' xilaže' na' bibi doła' gapcho lagüen'.

⁵ Diosen' chacde' chio' cate' biña' soacho. Da' nan' bsi'e xnezen' none' chio' ca xi'ine' con can' gwnalaže', na' da' nan' gwsele' Jesucriston' neče chio'.

⁶ Cheyała' soaczcho gonxencho Diosen' catec nži'ilaže' de' chio', le gwsele' Jesucriston' ben' chacde' cont le' goclenchgüe' chio'.

⁷ Caten' got Criston', blalj xchene' neče da' xinjen' ben chio' chejni-laže' chone'. Da' nan' Diosen' bezi'xene' xtoła' chon', le nži'ilaže' chgüede' chio'.

⁸ Na' chonchgüe' güen len chio', choñe' chio' doxen yela' sina' na' yela' chejni'i da' chyažjecho.

⁹ Na' bzejni'ide' chio' da' gwnalaže' da' nono gwneze cani' da' bžie' bia' gac.

¹⁰ Le Diosen' bžie' bia' žin ža cate' yogo' bene' že' yaba len bene' že' yežlion' yozozenague' che Criston' na' yesaque' txen len le'.

¹¹ Ca nac chio' naccho txen len Criston', Diosen' bsi'e xnezen' none' chio' ca xi'ine' cont gac lo na' cho da' chaclaže' gone' chio'. Na' Diosen' chone' cont chac dan' chsi'e xnezen' na' chone' da' nezde' naquen güen.

¹² Cani'te neto' bene' Israel ba chbezto' yid Criston', le zgua'tec gwlej Diosen' neto' cont gonxento'ne' da' naque' bene' zaca' juisyw.

¹³ Na' lecze ca' le'e, cate' benele diža' güen che Criston' dan' nac da' li na' gwnezele chaclaže' gone' yela' mban checho toli' tocañe, nach gwyejni-laže' lene'. Da' nan' lecze le'e ba nacle txen len Criston', na' Spiritw che Diosen' bžinen zoan lo' yichjlažda' olen', can' gwne' soan. Na' Spiriton' zoan len chio' cont nezecho ba non Diosen' chio' ca xi'ine'.

¹⁴ Lecze zoan lo' yichjlažda' ochon' cont nezecho žin ža gac lo na' cho yogo' da' ca' za' gonch Diosen' chio' naccho xi'ine' cate' gone' cuerp cobe chechon'. Na' gonche' chio' da' ca' cont gonxenchone' da' naque' bene' zaca' juisyw.

Pablon' gwnabe' gwnežjw Diosen' bene' chesejnilaže'ne' yela' sina' che'

¹⁵ Da' nan' cate' benda' diža' can' chejnilaže' le' Xancho Jesúsen' na' can' chaquele yezica' chle bene' chesejnilaže'ne', gwzolagua'

¹⁶ choa' yela' choxclen che Diosen' neče le'e cate' choł güiža' Diosen', na' bi chezi'laža' chona' ca'.

¹⁷ Dios ben' chonxen Xancho Jesucriston', ben' nac Xe' na' ben' nac bene' zaca' juisyw, len' choł güiža'. Na' chnabda'ne' cue' yela' sina' chen' lo' yichjlažda' olen' na' gaclene' le'e cont gombia' chlene'.

18 Na' chnaba' šo' be'ni' che' lo' yichjlažda'olen' cont nezele bi da' güenna' zoacho lez gone' len chion' ba gwleje' naccho xi'ine'. Na' chnaba' gone' cont nezele catec güen juisyw nac yogo' da' ca' za' gone' yesaquen che chio' chejnilaže'chone'.

19 Na' lecze chnaba' šo' be'ni' che' lo' yichjlažda'olen' cont nezele leca nape' yela' guac xen cont gaclene' chio' chejnilaže'chone'. Blo'e yela' guac xen juisyw che'

20 cate' bosbane' Criston' ladjo bene' guaten'. Na' gwde bosbane'ne' nach nzoe'ne' cuite' yaban' gan' chesenabi'e txen.

21 Le Criston' chnabia'che' ca note'teze angl. Chnabia'che' ca benačh, na' ca da' xigüe', na' ca bi da' chesejnilaže' bene', na' ca note'tezechle chesenabia' na'a na' tiemp da' za' za'.

22 Diosen' ba gwlo'e lo' na' Criston' yogo' bene' na' bica'chle da' zjade cont le' chnabi'e. Na' Diosen' bzoe' Criston' ca Xancho cont chnabi'e yogo' chio' chejnilaže'chone'.

23 Da'nan' chio' chejnilaže'chone' zaca'lebcho ca to cuerp, na' Criston' zaca'lebe' ca yichj cuerpen'. Guac nacho nya' Criston' neče chio' chejni-laže'chone'. Na' Criston' zoe' chnabi'e doxen.

2

Diosen' chacde' chio'

1 Na'a Diosen' ba bocobe' yichjla'ažda'olen' da' chejnilaže'le Criston'. Cana' gwzoale bentezle da' malen' na' gwdaple doła' lao Diosen'. Da'nan' gocle ca bene' guat da' bi bzenagle che'.

2 Con gwdacze benle da' mal can' cheson yezica'chle bene' bi chesejni-laže' Diosen', na' bzenagle che Satanás dan' chnabia' da' xigüe' ca' dan' zjanyechjen benačhen'. Na' ža na'aža Satanásen' ne' chnabian' yichjlažda'olen' bi chosozenag che Diosen'.

3 Na' ca'cze gwzoa yogo'cho, gwzoatezcho bencho bi da' mal can' gwnan checho na' bi da' mal da' gwzelaže' yichjlažda'ochon'. Na' da' bebecho da' malen' lo' yichjlažda'ochon', da'nan' gwchoglaon checho si'cho castigw che xtoła'chon' toli' tocanē, can' gac len yezica'chle bene' bi chosozenag che Diosen'.

4-5 Goccho ca bene' guat len yichjlažda'ochon' da' gwzoacho bentezcho da' malen'. Na' šlac ne' naccho ca', Diosen' leca beyaše' beži'ilaže'de' chio' na' gocchgüede' chio'. Na' lagüe da' nži'ilaže' Diosen' chio', da'nan' bocobe' yichjlažda'ochon' cate' gwyejnilaže'cho Criston', na' bene' yela' mban checho toli' tocanē.

6 Na' da' bocobe' yichjlažda'ochon', guac nacho bene' len chio' can' bene' len Cristo Jesúsen' cate' bosbane' le' ladjo bene' guat ca'. Na' da' naccho txen len Criston', mbalaz bačh zoacho chbezcho len le' na'a can' soacho cate' yežincho yaban' gan' chi'ena'.

7 Diosen' goclene' chio' ca' cont tiempen' za' za' gwlo'echde' catequen' nži'ilaže'chgüede' chio', le gonchgüe' zanch da' güen len chio' naccho txen len Cristo Jesúsen'.

8 Da' nži'ilaže' Diosen' chio', ba bene' yela' mban checho toli' tocanē cate' gwyejnilaže'cho Criston'. Con bene' to goclen, gague neče bi da' güen da' ben chio'.

9 Le Diosen' bi chaclaže' güe'cho diža' o gaquecho bnitlagüe' xtoła'chon' neče bi da' güen da' ba bencho.

10 Diosen' bene' chio' na' cate' gwyejnilaže'cho Cristo Jesúsén' bocobe' yichjlažda'ochon' cont soacho goncho da' güen. Cate' bina' soacho, bsi'e xnezen cont soacho goncho da' güen.

Bene' Israel na' bene' bi zjanaque' bene' Israel, Criston' bozoe' leaque' binlo toe'yeto'

11 Da'nan' le gon xbab can' goc len le'e cana', le'e goljle bi nacle bene' Israel can' nac neto'. Canan' neto' che' lježto': "Chio' zoacho señw da' že' circuncisión", na' che'to' le'e: "Bi zoale señw da' že' circuncisión" (señw da' chosozoa bene' Israel gualaž cheto' ca' lo cuerp che bi' byo dao' ca').

12 Na' le gon xbab can' gwzoale cana', bi nombia'le Criston', bi nacle nación che Diosen' ca neto' bene' Israel nacto', na' Diosen' bi gwne' gaclene' le'e can' gwne' gaclene' neto' bene' Israel. Bi gwzoale lez šjayzoale len Diosen' na' neca gwyejnilaže'le Diosen' lo yežlio nga.

13 Perw Criston' bnežjw cuine' gosote'ne' na' blalj xchene' neche chio'. Na' na'a da' chejnilaže'lene' ba nacle txen len Cristo Jesúsén'. Na' ba nacle toze len neto' bene' Israel, la'czla' cana' gogle bene' zito' len neto' na' len Diosen'.

14 Cana' neto' bene' Israel na' le'e bi nacle bene' Israel bgue'e lježcho. Perw Criston' ba bene' cont naccho toze na' ba bozoe' chio' binlo tocho yetocho.

15 Caten' bnežjw cuine' gote', bzoe' ca'ale ley da' bzoj da' Moisésén' len yogo' da' žan cheyala' goncho. Na' bzoen' ca'ale cont bozoe' chio' chejnilaže'chone' binlo tocho yetocho na' beyone' chio' to yež cobe che', chio' naccho bene' Israel lente chio' bi naccho bene' Israel.

16 Da' bnežjw cuine' gote' le'e yag cruzen', zoacho binlo len Diosen', chio' naccho bene' Israel na' chio' bi naccho bene' Israel, na' lecze naccho toze na' bich chgue'e lježcho.

17 Na' Criston' caten' bide' yežlion' bedeye'e diža', gwne' benachen' guac yesenite' binlo len Diosen', gwdixjue'eden' len le'e bi nacle bene' Israel, le'e bi nombia'le xtiža' Diosen' cana', na' lente neto' nacto' bene' Israel, neto' nombia'to' xtižen'.

18 Le chio' chejnilaže'cho Criston', chio' naccho bene' Israel na' len chio' bi naccho bene' Israel, toz Spiritw che Diosen' chaclenen chio' cont choe'lencho Diosen' diža'.

19 Da'nan' le'e bi nacle bene' Israel bich nacle ca bene' zito' len Diosen'. San yogo' chio' chejnilaže'cho Criston' ba naccho txen, le Diosen' ba none' chio' ca bene' lo' yo'o che'.

20 Chio' chejnilaže'chone' zaca'lebcho ca to yo'o de yej. Na' neto' postlw na' yezica'chle bene' chesoe'lene' le'e xtiža' Criston' zaca'lebo' ca lene yo'ona'. Na' Jesucriston' zaca'lebe' ca yej squin che yo'ona'.

21 Na' chio' naccho txen len Criston' lecze zaca'lebcho ca yej da' zjancua' zjangoden' gan' chac yo'o de yeja'. Zjangoden' txen na' zej cha' yo'ona'. Ca'cze chio' naccho txen len Xancho Criston' na' len lježcho, na' naccho ca to yo'o gan' zoa Diosen'.

22 Le'e txen len neto' na' len note'teze bene' chesejnilaže' Criston' naccho ca to yo'o gan' zoa Diosen', le zoa Spiritw chen' lo' yichjlažda'ochon'.

3

Diosen' gwleje' postlw Pablon' cont jatixjue'ede' xtižen' len bene' bi zjanac bene' Israel

1 Na' da' naquen ca', neda' Pablo chol güiža' Diosen' neche le'e. Dia' ližya nga da' chyixjue'eda' xtiža' Cristo Jesúsén' len le'e bi nacle bene' Israel.

² Chacda' ba nezeljele nži'ilaže' Diosen' neda' na' bsi'e xnezen' chzejni'ida' le'e xtižen'.

³ Ba bzejni'ide' neda' da' nono gwneze, can' ba bzoja' le'e to chope diža' le'e cart nga.

⁴ Cate' gwlabable cart nga gacbe'ele chejni'ida' da' nono gwejni'i cana' che Criston'.

⁵ Cana' Spiritw che Diosen' bi bzejni'in bene' da' nono gwneze che Criston', perw na'a ba bzejni'in neto' postlw che Diosen', na' ba bzejni'in nochle neto' gwleje' cont choe'to' xtižen', neto' nacto' lo na' Diosen'.

⁶ Da' nga bzejni'in neto', le'e bi nacle bene' Israel txen len neto' nacto' bene' Israel si'cho da' gwna Diosen' gone' che chio' naccho xi'ine' neche da' chejnilaže'cho Cristo Jesús'en', na' txen naccho ca toze bene', na' txenna' chaclen Diosen' chio' can' gwne' gone'.

⁷ La'czla' bitec bi zaca', Diosen' gwleje' neda' len yela' guac chen' cont chyixjue'eda' diža' güen chen'.

⁸ Chacda' ne late'ze bibi zaca' ladjo yogo' bene' ba gwlej Diosen' zjanaque' lo ne'e. Bia'cze nži'ilaže'de' neda' na' gwleje' neda' cont chyixjue'eda' len bene' bi zjanac bene' Israel caelc da' zan da' güen juisyw gone' len yogo' chio' chejnilaže'cho Criston'.

⁹ Na' Diosen' gwlo'e lo na' chzejni'ida' yogo'lo' bene' da' nžie' bia' gac. Gwzolaoten cate' gwxe yežlion', nono gwneze da' nžie' bia' gac, con toz Diosen' gwnežde', Dios ben' bene' yogo'lo' bene', yogo' beyixe' na' yogo' bichle da' de.

¹⁰ Le Diosen' nžie' bia' bene' ca' zjanac angl blao che' na' angl gwnabia' zjanita' yaban' yesele'ede' can' chone' len chio' chdop chžagcho chonxencho Jesucriston', cont yesacbe'ede' nape' yela' sina' len yogo'lo' da' chone'.

¹¹ Chone' can' bžie' bia' gone' caten' biņa' xe yežlion', le cani'te bsi'e xnezen' sele' Xancho Jesucriston'.

¹² Na' naccho txen len Criston' da' chejnilaže'chone'. Da'nan' bi chžebcho Diosen', san chbecho nezecho chac choe'lenchwn'e' diža'.

¹³ Nachen' chneyoeda' le'e bi gacžejlaže'le che da' chac chia' nga chyi chzaca' lagüe da' chyixjue'eda' xtiža' Jesucriston' len le'e. Naquen da' yebele, gague da' gacžejlaže'le.

Criston' chacde' chio' chejnilaže'chone'

¹⁴ Na' da' naquen ca', chzoa xiba' chol güiža' Xa Xancho Jesucriston'.

¹⁵ Le' bxie' yogo' diaža' che chio' zoacho yežlio nga na' che bene' že' yaba.

¹⁶ Diosen' naque' bene' zaca' juisyw na' nape' la'zelagüe' yela' guac xen. Nachen' chnabda'ne' gone' ga soa Spiritw chen' lo' lažda'olen' cont soa chač laže'le len yela' guac chen.

¹⁷ Chnaba' soateze soa Criston' len le'e da' chejnilaže'lene'. Na' chnaba' soaczle gaquele Diosen' na' gaque lježle do yichj do laže'le,

¹⁸ cont gac šejni'ile txen len yezica'chle bene' zjanaque' lo na' Diosen' catec chaquechgüe Criston' chio'. Da' xen chaquechgüede' chio', con bi cheyož yedo ca chacde' chio'.

¹⁹ Le biņa' šejni'icho catec chaquechgüede' chio'. Na' lecze chnaba' zej gacchle bene' güen doxen can' nac Diosen'.

²⁰ Na' Diosen' chac chone' yogo'lo', na' chone' da' gualch ca da' chnabechone' o da' choncho xbab gone'. Na' chone' cont Spiritw chen' zoan lo' yichjlažda'ochon' chaclenen chio' len yela' guac chen'.

21 Na' chio' chdop chžagcho chonxencho Criston', cheyała' gonxencho Diosen' na'a na' toli tocaņe da' gwsele' Cristo Jesúsen' neçe chio'. Na' can' gonšcaczccho.

4

Naccho toze len yogo' bene' chesejnilaže' Criston'

1 Neda' dia' ližya nga da' chyixjue'eda' xtiža' Xancho Jesucriston'. Nachen' chneyoeda' šejšcale gonle güen can' cheyała' goncho da' gwlej Diosen' chio' naccho xi'ine'.

2 Na' chata'yoeda' le'e bi gonxen cuinle, san le gon xbab bitec bi zaca'le; na' gacle bene' šagüe' na' gaple yela' chxenlaže' len bene' lježle na' le gacde' bite'teze yesone'.

3 Spiritw che Diosen' ba nonen chio' toze da' chejnilaže'cho Criston', na' le gon con ga zelao saque'le cont soaczele gonle toze xbab len bene' lježle, le Diosen' ba bozoe' le'e binlo tole yetole.

4 Yogo' chio' chejnilaže'cho Criston' naccho ca toz bene', na' toz Spiritw che Diosen' zoan lo' yichjlaždao' yogo'cho. Na' cate' Diosen' gwleje' chio' cont naccho xi'ine', lecze bene' cont toz can' zoacho lez gone' güen len chio'.

5 Toz Jesucriston' naque' Xancho, na' toz can' chejnilaže'chone', na' toz ca zejen cate' chzoacho nis.

6 Na' toz Diosen' chonxencho ben' nac Xa yogo'cho. Len' chnabi'e yogo'cho, na' chchine' yogo'cho choncho xšinen', na' zoacze' len yogo'cho.

7 Na' Criston' chaclene' to tocho na' none' checho gwde gwdele da' gon to tocho.

8 Da'nan' nyoj Xtiža' Diosen' žan:

Cate' beyepe' yaban' bebeje' bene' zan lo' na' gwxiyen' cont beči'e legaue'. Na' bi'e che benachen' da' gac gon to toe'.

9 Na' can' žan: "Beyepe' yaban'", zejen betje' golje' benach' yežlio nga na' gwden' gote' bgaše'.

10 Na' ben' betj golje' benach, lecze len' beyepe' yaban' gan' zoa Diosen', na' na'a zoe' chnabi'e doxen.

11 Na' lecze len' none' che balcho naccho postlw, na' none' che balcho chyixjue'echo bi da' ba gwne', na' none' che yebalcho chje'cho diža' güen chen' len bene' biņa' yesenden', na' yebalcho none' checho chgüia chna'cho bene' chesonxene' le' na' chsed chlo'echo legaue'.

12 Can' chon Criston' cont chio' naccho lo' ne'en chac choncho xšinen'. Na' chonchon cont to to chio' naccho toze len le' zejech gacchcho can' chazlažen'.

13 Diosen' chaclaže' yogo'cho gaccho toze šejnilaže'cho Xi'inen' do yichj do laže'cho na' gombia'chone' binlo. Chaclaže' gacyaņe'cho can' cheyała' gaccho, na' gaccho bene' güen can' nac Criston'.

14 Na' še gaccho ca', bich šo'cho xbab ca che to bidao', šejcho qui šejcho ca'ale na'ocho to to yela' chejnilaže' da' chesaljlaže' bene' güenlaže' na' bene' gwxiye' cont chesonlede' chio'.

15 Na' cheyała' güe'lencho bene' diža' li, perw gaccho bene' šagüe' len legaue' cont yesache'ede' le chaquechone'. Goncho ca' cont zejech gacchcho bene' šagüe' bene' güen can' nac Criston' ben' chnabi'e chio'.

16 Cate' to to cuen cuerp chechon' ngoden' na' noxe' lježen len bela' na' len žit na' len bečj bnia ca' da' ncan', na' to to cuenen chesonen ž'in, nach doxen cuerp chechon' chonen žin ca cheyała'. Na' ca'cze chio' chejnilaže'cho

Criston' ngode'cho txen cont to tocho goncho da' non Diosen' checho goncho, na' yogo'cho txen zej gacchcho bene' šagüe' na' zej gaquech lježcho.

Diosen' ba bocobe' yichjlaždao' chio' chejnilaže' chone'

¹⁷ Da' nga chnia' le'e, Xancho Criston' none' mandadw gwzejni'idan' le'e: bi cheyała' soacho goncho xbab ca cheson bene' bi chesejnilaže' Diosen', le bibi zacan'.

¹⁸ Nchoł yichjlažda'ogaque'. Na' bi zjanape' yela' mban toli tocañe ca da' non Diosen' chio', neca chesejni'ide' che Diosen', le zjanaque' bene' güedenag len le'.

¹⁹ Bibi zto' zjanombi'e che da' malen' chesone', na' con chesonteze' yogo' yela' zto', na' chesezelaže' yesenite' yesonche' da' malen'.

²⁰ Le'e ba nsedle can' ža Criston' na' nezele bi cheyała' goncho ca',

²¹ le chacda' ba benele dižan' gwñe' lo' yichjlažda'olen', na' neto' lece ba bzejni'ito' le'e diža' li chen'.

²² Nezele bich cheyała' gwzenagcho che da' malen' da' chzelaže' lažda'ochon' goncho, can' bencho cana' cate' yela' gwzelaže' chechon' ne' chonlen chio' cont bentezcho da' malen'.

²³ San na'a cheyała' gwša'cho xbab da' choncho lo' yichjlažda'ochon'.

²⁴ Cheyała' güe'cho latje yocobech Diosen' yichjlažda'ochon' cont soacho goncho da' zej to li can' chon le', na' gaccho bene' laždao' xilaže' can' chazlaže' le'.

²⁵ Da'nan' bich gonlaže'cho, san güe'len lježcho diža' li, le ngode' lježcho naccho ca toze bene'.

²⁶ Na' cate' chža'acho bi cheyała' goncho da' xinj. Cheyała' yob yeyacxenlaže'cho na' bich ža'acho do ža.

²⁷ Na' bi güe'cho latje cont Satanás dan' chnabia' da' xigüe' ca' nabian' xbab chechon' cont goncho da' xinj.

²⁸ Na' nole še ba yolaole chbanle, bich cheyała' cuanle. Cheyała' gonle žin da' nac güen len ni'a na'le cont gata' da' gwnežjwle bene' chyažj chchüne.

²⁹ Na' bi cheyała' güe'cho bite'teze diža' zban, san güe'cho diža' šagüe' len yogo'loł bene', con can' chyažje to toe' cont gaclenen le'. Goncho ca' cont xtiža'chon' gaquen da' zaca' gwzenag bene'.

³⁰ Na' bi goncho cont yeyaše'laže' Spiritw che Diosen', le Diosen' ba bene' ga zoan lo' yichjlažda'ochon' cont nezecho naccho xi'ine' na' nezecho žin ža yedyexi'e chio'.

³¹ Cheyała' cueyichjcho yogo' da' mal, bich gonchon. Bich co'olaže'cho, bich ža'acho, na' bich güe'cho diža' loc diža' lžej. Bi necho che bene', neca gaccho bene' xi'a.

³² San cheyała' gaccho bene' šagüe' na' yeyaše' lježcho tocho yetocho. Na' cheyała' yezi'xen che lježcho bite'tez da' chesonde' chio' con can' bezi'xen Diosen' checho cate' gwyejnilaže'cho Criston'.

5

Cheyała' goncho can' chon Diosen'

¹ Nachen' cheyała' soacho goncho can' chon Diosen', le naccho xi'ine' na' chacde' chio'.

² Cheyała' soacho gaque lježcho ca Criston' chacde' chio' na' bnežjw cuine' gote' neche chio'. Na' chebe Diosen' da' bene' ca', can' chebe bene' to da' chlā' zix.

³ Da' naccho lo na' Diosen' cheyała' gue'echo da' malen'. Gwbatech cheyała' gata'lencho no'ole bi nac no'ol checho o bene' byo bi nac bene' checho o goncho bichle da' nac da' yela' zto' len cuerp chechon'. Na' bi cheyała' selaze'cho da' de che bene'.

⁴ Bi cheyała' güe'cho diža' da' naquen da' yela' zto' o bite'teze diža' le'e, diža' da' bibi zaca' da' bi nca' xneze, le bi zejen güe'cho dižan' zjanac ca'. San cheyała' soacho güe'cho yela' choxcen che Diosen'.

⁵ Nita' bene' byo ben' chesata'lene' no'ole bi nac xo'olgaque' na' nita' no'ole ben' chesata'lene' bene' byo bi nac bene' chegaque', na' nita' bene' chesyebede' dan' naquen da' yela' zto'; na' nita' bene' chesezelaže' bi da' de che bene'. Ba nezeczele bene' ca' cheson da' malen' zjanac ca' bi yesyežine' yaban' gan' chnabia' Criston' len Diosen'. (Na' ca nac bene' chesezelaže' bi de che bene', toz ca malen' chesone' len da' cheson bene' chesejnilaže' l gua'a lšacan'.)

⁶ Bi güe'le latje no siye' le'e len diža' güenlaže'. Diosen' chnežjue' castigw toli tocanē che bene' ca' bi chosozenag che', bene' cheson da' mal ca' ba gwnia'.

⁷ Da'n'an' bi cheyała' gaccho txen len bene' cheson ca'.

⁸ Cana' nchoł yichjlažda'ochon', perw na'a ba yo'on be'ni' che Xancho Criston', na' cheyała' soacho goncho da' güen can' chaclaže' Diosen' gon chio' nombia'chone'.

⁹ Na' še ba gwyo'o be'ni' che Criston' lo' yichjlažda'ochon', nach gaccho bene' šagüe' na' goncho da' güen da' zej to licha.

¹⁰ Cheyała' gwsedcho cont nezecho can' chaclaže' Xancho Criston' goncho.

¹¹ Bi cheyała' goncho txen len da' malen' cheson bene' ca' zjanchoł yichjlažda'ogaque', le chesone' da' bibi zaca'. San cheyała' gwzejni'icho legaque' da' malen' chesone',

¹² le naquen da' cheto'echo güe'cho diža' che da' ca' chesone' do bagaše'ze.

¹³ Na' cate' be'ni' che Criston' šon' lo' yichjlaždao' bene', nach yesacbe'ede' che bite'teze da' chesone' še naquen da' mal, le be'ni' chen' chzejni'in benachen' che xbab chegaque' na' bi da' chesone' še naquen güen o še naquen mal.

¹⁴ Da'n'an' nyojen quinga che note'teze bene' chon da' malen': Naco' ca bene' chtas na' ca bene' guat da' bi chzenago' che Diosen'.

Bzenag che' cont Criston' cue'e be'ni' lo' yichjlažda'oguo'.

¹⁵ Nachen' cheyała' soacho na'cho dan' choncho. Cheyała' goncho da' naquen da' sina', gague goncho ca bene' bi chejni'.

¹⁶ Na' yogo' ža cheyała' goncho can' chazlaže' Diosen', le na'a že'chgua bene' chesone' da' malen'.

¹⁷ Bi goncho ca bene' bibi xbab nye'. Cheyała' šejni'icho can' chaclaže' Diosen' goncho cont gonchon.

¹⁸ Na' bi cheyała' gaccho bene' borrašw, le bene' chesezožde' chosožiai' cuine'. San chio' cheyała' güe'cho latje soachgua Spiritw che Diosen' lo' lažda'ochon' nabian' chio' len da' choncho.

¹⁹ Cheyała' gwšaljlen lježcho no salmos na' gollen lježcho no himnos o bichle da' ža Spiritw che Diosen' gołcho. Na' cheyała' nechon na' gołchon do yichj do laže'cho gonxencho Xancho Jesucriston'.

²⁰ Yogo' ni'a cheyała' güe'cho yela' choxcen che Xacho Diosen' che yogo' da' chone' chaclene' chio'. Na' Xancho Jesucriston' zoe' chaclene' chio' cont güe'cho yela' choxcen che'.

Can' cheyała' soalen bene' lo' yo'o chechon'

21 Da' chapcho Diosen' bala'an cheyała' gwzexjw yichjcho gwzenagcho tocho yetocho.

22 Na' le'e no'ole, le'e nšagna'le, to tole cheyała' gwzenagle che bene' chele, le chzenagle che Xancho Criston' cate' chzenagle chegaque'.

23 Diosen' nzoe' bene' chele cont zjanacche' blao ca le'e, can' nzoe' Criston' nacche' blao ca chio' chdop chžagcho chonxenchone'. Le chion' guac nacho naccho cuerp che Criston', na' le' none' chio' yela' mban toli tocanē.

24 Na' ca chio' chonxencho Criston' cheyała' gwzenagcho che', ca'czen' le'e no'ole le'e nšagna'le, to tole cheyała' gwzenagle che bene' chele yogo' bin' chese'e le'e.

25 Na' le'e bene' byo le'e nšagna'le, to tole cheyała' gaque no'ol chelen' con can' chaque Criston' chio' chonxenchwne' na' bnežjw cuine' neche chio' cate' gosote'ne'.

26 Na' cont gwlo'e chio' lo na' Diosen', beyone' lažda'ochon' xilaže' cate' gwyejle'cho xtižen'.

27 Na' bene' ca' cont yebede' chio' cate' yežincho lagüen', bibi xtoła'cho gata' na' ne bichle da' mal yo'o nyaz lo' yichjlažda'ochon', san gac lažda'ochon' xilaže' lagüen'.

28 Na' con can' nži'ilaže' Criston' chio', can' cheyała' ži'ilaže' to to bene' byo no'ol chen'. Le'e bene' byo, to tole cheyała' ži'ile no'ol chelen' can' nži'ile cuerp chelen', le nži'icze cuinle cate' chonle ca'.

29 Nono zoa no chgue'e cuerp che', san yogo'cho nži'icho cuerp chechon' na' chapši'ichon. Na' can' chon Criston' len chio' chonxenchone', nži'ide' chio' na' chapši'e chio'.

30 Na' chone' ca' da' naccho ca to cuen güeje cuerp chen', ca žit da' yo'e na' ca xpele'.

31 Na' Xtiža' Diosen' nyojen žan: "Da'nan' bene' byo le'e len xaxne'e na' si'e no'olen' gwšagna'lene' le' na' yesaque' toze."

32 Diža' quinga ba bzoja' naquen to da' nono gwyejni'i cani', perw chnia' naquen to da' chzejni'in chio' chdop chžagcho chonxencho Criston' cont nezecho can' cheyała' soacho len le'.

33 Na' lecze ca' le'e bene' byo le'e nšagna'le, to tole cheyała' gaque no'ol chele can' chaque cuinle, na' le'e no'ole nšagna'le, to tole cheyała' gaple bala'an bene' chele.

6

1 Na' le'e bidao', le gwzenag che xaxna'le, le can' cheyała' gon chio' naccho txen len Xancho Criston'.

2 Cate' Diosen' bnežjue' xozxta'oto' ca' ley chen', gwne': "Le gap bala'an xaxna'le." Na' goquen da' nechw da' bžie' bia' yesone' da' nsa' to da' güen da' gone' len legaue' še yosozenagbe' chen, gwne': "Le gap bala'an xaxna'le

3 cont gac güen chele na' cont banle sša lo yezlio nga."

4 Na' le'e nita' xi'inle, le yosgol le yoscha'o bi' chele ca' binlo, diža' šagüe' gwzejni'ile legacbe' cont yosozenagbe' che Xancho Criston' na' gague con gonle ga yeseža'a yeselocbe'.

5 Na' le'e mos, le gwzenag che xan žin chelen' do laže'le na' le yeyiljwlaže' naquen gonle da' yesazlaže' to toe', le lecze chzenagle che Criston' caten' chzenagle chegaque'.

6 Le gwzenag chegaue' do yichj do laže'le, gague cate'zen' chesene'e can' chonlen', le nacle bene' güen xšin Criston', na' can' chaclaže' Diosen' goncho.

7 Na' cheyała' güe'laže'cho goncho žin che bene' cont yebe Xancho Criston' chio', gague cont yebe bene' nac xan žin na'ze.

8 Goncho ca', le nezecho bite'teze da' güen da' choncho, Xancho Criston' gone' cont žin ža yebi'in güen len chio', chio' naccho esclavos na' len chio' bi naccho esclavos.

9 Na' le'e nacle bene' xan žin, le gon güen len bene' ca' cheson xšinle. Bitw co'ole legaque' šeb, le Xancho Diosen' zoe' yaban' chna'cze' can' chonlen', na' lecze chna'cze' can' cheson bene' güen žin chelen', na' toz can' chone' len yogo'lol bene' note'teze zjanaque'.

Can' goncho cont Satanásen' bi gonen chio' gan

10 Nachen' bene' migw, da' naccho txen len Xancho Criston', cheyała' soačhačcho šejnilaže'chone', le nape' yela' guac xen cont chaclene' chio'.

11 Cheyała' gon cuincho gual doxen can' chaclaže' Diosen' goncho, cont soačhačcho bi šejle'cho che Satanás dan' chnabia' da' xigüe' ca' cate' chy-ilywlažen' siyen' chio'.

12 Le gague bene' nac bela' chenna' chdillencho, san chdillencho da' xigüe' ca', da' ca' besyeyaquen da' mal, na' bichle da' chesenabia' bene' že' yežlio nga bene' nchol yichjlažda'ogaque' len da' malen'. Chdillencho yogo'lol spiritw mal ca' gate'teze chesašen.

13 Da'nan' cheyała' gon cuincho gual doxen can' chaclaže' Diosen', cont Satanásen' bi soeczlen chio' ža cate' tillenen chio'. Na' cate' ba bencho can' chazlaže' Diosen', nach cheyała' soačhačcho len le'.

14 Na' cont soačhačcho bi siye' Satanásen' chio', cheyała' güe'cho diža' li yogo' ni'a. Na' še goncho ca', gaclenen chio' ca da' chčhej soldadon' cho'a li'e. Na' cheyała' goncho da' nac güen yogo' ni'a, le še goncho ca', gwcue'ejen chio' ca xa soldadon' da' naquen de ya hcue'ejen cho'alcho'e.

15 Na' cheyała' soacho probnidw güe'lencho bene' diža' güen che Criston' da' chzejni'in can' guac soacho binlo len Diosen'. Na' še soacho probnidw güe'lenchon bene', gaclenen chio' can' chaclen xel soldadon' le'.

16 Na' da' zejehen ca bichle da' goncho, cheyała' soačhačcho šejnilaže'cho Diosen'. Na' še soačhačcho šejnilaže'chone', nach gaclenen chio' cont bi gwzenagcho che Satanásen'. Gaclenen chio' ca escudo da' chčhin soldadon' chaclenen le', chosolen yi' che flechas ca' da' chesala'ninen zja'aquen gan' zien', na' hcue'ejen le' len da' ca' zja'ac yeseyidjon cuerp čhen'.

17 Na' cheyała' yosa'laže'cho Criston' ba bene' yela' mban čecho toli tocañe, cont gaclenen chio' ca chaclen lapa' de ya da' chčhin soldadon'. Na' lecze Xtiza' Diosen' da' ben Spiritw che Diosen' cont nyojen, le gonchgua xbab čhen cont gaquen len le'e ca to spada da' chčhin soldadon'.

18 Na' do tiemp cheyała' yol güižcho Diosen' nabcho yogo' da' chzejni'i Spiritw čhen' chio'. Na' cheyała' gaccho bene' banlaže' na' yol güižchone' sin cbi yeche'echo, nabcho gaclene' yogo' bene' ba gwleje' cont zjanaque' lo ne'e.

19 Na' le nab gon Diosen' latje gua' xtižen', na' le nab bi žeba' gua' diža' tcho'a gwzejni'ida' bene' diža' güen che Criston' da' nono gwñeze cani'.

20 Le Diosen' gwsele' neda' ca gualaze' cont bia' xtižen', na' da'nan' dia' ližya nga. Nachen' le nabe Diosen' gaclene' neda' bi žeba' gua' xtižen' tcho'a can' cheyała' guan'.

Pablon' chone' chačh laže'gaque'

21 Chsela' bene' migw čecho Tíquico güe'e diža' doxen can' chac cont nezele can' chac chia' na' yogo' da' chona'. Chaquecho Tíquicon' da' naque' txen

len chio' chonxenko Criston' na' zoateze' chone' xšin Xancho Criston' can' cheyala' gone'.

²²Nachen' chsela'ne' cont nezele can' chac cheto' na' cont gone' chaçlaže'le.

²³Chnaba' lao Xacho Diosen' len Xancho Jesucriston' yesonšque' cont yogo'le chonxenle Criston' soa cuezle binlo len yichjlažda'olen', na' lecze yesonšque' cont yogo'le gaque lježle na' soaçaçhle šejnilaže'lene'.

²⁴Soašcacze Diosen' gaçlene' yogo' beņe' chesacde' Xancho Jesucriston' sin cbi yesebeze'. Da' na'zen' chzoja'.

CART DAN' BZOJ POSTLW SAN PABLO CHE BENE' CA' ŽE' FILIPOS

Pablo bzoje' carten' šlac die' ližya

¹ Neda' Pablo chsela' cart nga txen len bene' lježa' Timoteo. Chopte neto' gwlej Diosen' cont chonto' xšinen', bite'tezen' že'. Na' chzoja' cart nga che yogo' le'e zoale ciuda Filipos, le'e yo'ole lo na' Diosen' lagüe chejnilaže'le Cristo Jesúsen'. Na' le'e nchojle chgüia chna'le bene' lježle chesejnilaže'ne', na' le'e nchojle chonle žin bixjw da' chata' ladjo le'e chdop chžagle chonxenlne', decze da' nia' le'e len cart nga.

² Chnabšca' lao Xacho Diosen' na' Xancho Jesucriston' yesaclenšque' le'e na' yesone' cont soa cuezle binlo len xbab da' yo'o lo' yichjlažda'olen'.

Pablo chnabde' Diosen' gaclene' bene' ca' chesejnilaže' Criston' Filipos

³ Yogo' ni'a cate' chjayze'eda' le'e, choa' yela' choxclen che Diosen' ba naccho txen chejnilaže'chone'.

⁴ Na' yogo' ni'a cate' chol güiža' Diosen', chbeda' chnaba' gaclene' le'e.

⁵ Na' choa' yela' choxclen chen' naccho txen chejle'cho diža' güen che Jesucriston', gwzolaoten cate' za' gwyejnilaže'ne'.

⁶ Na' da' nga nezda', Diosen' gwzolağüe' chone' to da' güen lo' yichjlažda'olen' cana', na' gone' yoyož yeyac yichjlažda'olen' can' chazlažen' cate' žin ža yid Jesucriston' da' yoble.

⁷ Da' cheyala'cze gona' xbab chele ca', le chacchgüeda' le'e. Na' nezda' Diosen' ba goclene' le'e can' ba goclene' neda' šlac dia' ližya nga, na' šlac ba gwduxjue'eda' diža' güen che Criston' len bene' bi gosejle'e chen, bzejni'ida' legaque' naquen diža' li.

⁸ Diosen' nezde' chacchgüeda' yogo'le, le Cristo Jesúsen' chone' cont chacda' le'e.

⁹ Na' chnabda' Diosen' gonšque' cont gaquechlne' na' gaqueche lježle na' lecze šejni'ichle yogo'lol da' chaclaže' Diosen' šejni'ile na' gacbe'ele bi da' naquech güen gonle cont gaclen lježle.

¹⁰ Chnaba' da' ca' cont gacbe'ele bin' chazlaže' Diosen' gonle, na' lecze cont soacze do laže'le na' bibi dola' gaple cate' žin ža yid Criston' da' yoble.

¹¹ Nach gaclen Jesucriston' le'e gonchgualde da' nac güen, na' Diosen' si'e yela' bala'an na' yezica'chle bene' yesonxene' Diosen' can' chonlen'.

Pablon' chacde' Criston' do yichj do laže'

¹² Bene' migw, che'nda' nezele yogo' dan' ba goc chia' ba gosaclenen cont bene' zanch gosende' diža' güen che Criston'.

¹³ Le yogo'lol soldadw gop ca' cheson žin che bene' gwnabia' nga, na' yezica'chle bene' že' do nga zjanezde' dia' ližya neche choa' xtiža' Criston'.

¹⁴ Na' bene' zan bene' lježcho že' nga lecze ba chesejnilaže'chgüe' Xancho Criston' da' ba besel'ede' can' chaclene' neda' šlac dia' ližya nga. Da'nan' legaque' lecze ba cheseyaxjchde' cheso'e xtiža' Diosen' sin ca chesežebe'.

¹⁵ Da' li bale' cheseyixjue'ede' xtiža' Criston' da' chesacxi'ede' neda' na' da' chesacclaže' yesacche' blaoch ca neda', perw yezica'chle bene' ca' cheseyixjue'eden' do laže'.

16 Na' bene' ca' to cuen cheseyixjue'ede' xtiža' Criston' cont yesacxen cuine', gague cheseyixjue'eden' do laže'gague'. Chesone' xbab zoayaša' da' cheseyixjue'eden'.

17 Na' bene' ca' yezica'chle cheseyixjue'eden' lagüe chesacde' Criston' na' chesacde' neda', le zjanezde' neda' dia' ližya nga neche chzejni'ida' bene' bi chesejle'e diža' güen che Criston', chape'gaca'ne' naquen da' li.

18 Perw bibi nonen len neda' še cheseyixjue'eden' do laže' o še gague do laže', con chebeda' cheso'e diža' che Criston' da' nac diža' li.

Na' dehcze da' chebeda',

19 le nezda' yechoja' güen len da' quinga chac chia' lagüe dan' chñable gaclen Diosen' neda' na' lagüe dan' zoa Spiritw che Jesucriston' len neda' chonen chach laža'.

20 Da'nan' zoa' lez gaclen Diosen' neda' gua' xtiža' Criston' sin cbi žeba'. Na' la'czla' še soacha' o la'czla' še gata', chaclaža' si' Criston' yela' bala'an' na'a len da' gona' na' len da' gac chia' con can' ba gwxi'e yela' bala'an'.

21 Chzelaža' gacxen Criston' len bite'tez da' chona' šlac ne' mbana', na' lecze nezda' soa' mbalazchgua cate' ba gota', le šjayzoalena'ne'.

22 Perw še soacha' yezlio nga na' goncha' xšin Xancho Criston' cont šanch bene' yesejnilaže'ne', o še gata', bi nezda' non' nac güenche.

23 Naquen zdebe nia' non' naquech güen, še soacha' o še gata', le yebeda' gata' na' šjayzoa' len Criston', na' mbalazech soa' neda', še ca'.

24 Perw lecze chona' xbab le'e chyažjele soacha' bancha'.

25 Na' da' chacbe'eda' chyažjele soacha', nezda' soacha' len le'e cont gaclena' soachle mbalaz da' chejnilaže'le Criston' na' soachachle šejnilaže'lene'.

26 Na' cate' yechoja' nga soacha' len le'e da' yoble, yebele güe'le diža' can' ben Cristo Jesúsen' cont bechoja' ližyan'.

27 Na' bite'teze gac, le soa le gon da' güen can' cheyala' gon chio' ba bzenagcho che diža' güen che Criston'. Le gon ca' cont še yedena'a le'e o še bi yedena'a le'e, con che'nda' yenda' rson chele zoachachle len toze xbab, chonle txen len bene' lježle, na' chonle con ca zelao chzaque'le cont yezica'chle bene' yosozenague' xtiža' Criston' da' ba chejnilaže'le,

28 neca žeble še bi yesone bene' le'e neche chesegue'ede' le'e. Še bi žeble da' yesonde' le'e, gonon cont yesacbe'ede' ba zoa yesebiaye'e toli tocane; lecze gonon cont yesacbe'ede' Diosen' gone' cont šjayzoale len le'. Yogo' da' ca' zjanaquen da' gon Diosen'.

29 Na' Diosen' ba bsi'e xnezen' gacxen Criston', gague lagüe da' chejnilaže'lene' na'zen', san lecze gacxene' da' yosochi yososaca' bene' le'e neche chejnilaže'lene'.

30 Le'e len neda', toz can' chosochi chososaca' bene' chio'; na' ba ble'ele can' bchejda' len da' ba gosonde' neda' cana', na' ba nezele can' chac chia' na'a.

2

Criston' chacxene' da' bzande' yela' zaca' che' cont bide' golje' benačh

1 Nezda' zoale mbalaz da' chejnilaže'le Criston', nezda' chaclaže'le gonle da' güen lagüe dan' chague Criston' le'e, nezda' zoa Spiritw chen' len le'e, na' nezda' chague lježle na' cheyaše'laže'lene' cate' bi da' chesac che'.

2 Da'nan' chñeyoeda' le'e, le gon cont yebechgüeda' nezda' lecze yogo'czle nacle toz len lježle, na' yogo'czle toz can' zoale chaquele Criston', toz can' chonle xbab, na' toz can' chaclaže'le gac.

³ Bibi cheyała' goncho cont gac güen che cuinzcho na' bibi goncho cont gacxen cuincho, san cheyała' gwzejwlaže'cho na' goncho xbab zaca'ch bene' lježcho clel ca chio'.

⁴ Ne tocho bi cheyała' cue' yichjcho che cuinzcho, san cheyała' cue' yichjcho che dan' gaclenen bene' lježcho ca'.

⁵ Cheyała' goncho xbab ca xbab da' ben Cristo Jesúsen'.

⁶ Le la'czla' naque' Dios, bzande' yela' chnabia' che' na' yela' bala'an xen che' dan' nape' lagüe da' naque' toz len Xe' Diosen' cont bide' golje' benach.

⁷ Bzoe' to šla'ale yogo' da' zaca' dan' gota' che', na' ben cuine' bene' güen xšin Diosen' cate' golje' benach.

⁸ Na' ba naque' benachen' bzexjwlaže' cont bene' con can' gwna Xe' Diosen'. Bzenague' che' cont bnezjw cuine' gosote'ne' le'e yag cruz ca chesote' bene' malchgua.

⁹ Da'nan' Diosen' benxenchgüe' le' na' bsi'e xnezen' cont Jesucriston' naque' Xan benach, angl, da' xigüe' na' yogo' bichle da' de, na' cont Jesucriston' chnabia'che' ca note'tezechle.

¹⁰ Na' zin ža cate' yogo'lol benach na' yogo'lol angl ca' yosozoa xibgaque' lao Jesucriston', bene' že' yaba, yežlion' na' gate'tezechle. Na' lecze ca' yeson da' xigüe' ca'.

¹¹ Yogo'lol bene' yo'o biš grasyw yosozexjwlichje' yesene' le Jesucriston' nape' la'zelagüe yela' gwnabia' xen. Na' Xancho Diosen' gacxene' cate' yogüe' yesene' ca'.

Bene' chesejnilaže' Criston' zjazaca'lebde' ca be'ni'

¹² Da'nan' bene' migw, con can' ba gwzoale bzenagle chia' cate' gwzoa' len le'e, ca'czen' chonchen byen gwzenagle chia' na'a bi zoa' len le'e. To tole le gon cont nachia' Diosen' ba bene' le'e yela' mban toli tocanē, na' le soa cueze gwsaca'le gonle can' chazlaže' Diosen'. Le gon ca' do chžeblye, le nezecho bi soecho da' malen' še ba chzenagcho chen.

¹³ Socho Diosen' chone' cont che'nele gonle can' chazlažen', na' chaclene' le'e chonlen.

¹⁴ Le gon yogo' dan' chazlaže' sin chi gacyožlen'ne', nēca žeše'le che'.

¹⁵ Le gon ca' cont yesacbe'e bene' chonle can' chazlaže' Diosen' sin cbi doła' gapple. Bibi da' xinj gonle. Bi gonle ca cheson bene' laždao' mal ben' chesonchgua clele. Nach gacle ca to da' chseni' len yezica'chle bene' že' yežlio nga,

¹⁶ güe'lenle legaque' xtiža' Criston' da' nsa' yela' mban toli tocanē. Še gonle ca', nach cate' yid Criston' da' yoble, yebechgüeda' can' benlen' na' nezda' dan' bžaglagua' bena' xšin Diosen' gan' zoalen', gague bendadzan'na'.

¹⁷ Le'e chzane cuinle chonle xšin Diosen' lagüe dan' chejnilaže'lene', na' da'nan' zaca'leble ca to beyixe' be ba gosot bene' cont bosozeye'ba' gosonxene' Diosen'. Na' neda', chebeda' chzanda' yela' mban chia' cont gac doxen can' chazlažen', na' da'nan' zaca'leba' ca to vino da' chosolalje bene' lao Diosen' cate' chesonxene'ne'.

¹⁸ Le yebe len neda' da' chzane cuina' gac da' gac chia', na' le soa mbalaz can' zoa' neda'.

Timoteo na' Epafrodito

¹⁹ Zoa' lez gon Xancho Jesúsen' latje yob sela' Timoteo gan' zoalen', le yebechgüeda' yenda' can' ba chonlen'.

²⁰ Le nono nochle zoa bene' sela' bene' chi'chgua yichje' gac güen chele can' chi' yichj Timoteon'.

²¹ Yezica'chle bene' con zjachi' yichjgaque' che dan' chac chegaque', na' bi zjachi' yichje' can' chaclaže' Jesucriston' gac.

²² Perw nezezzele ca zoacze Timoteon' chone' da' zaca', na' nezele can' ba goclene' neda' cont gwdixjue'eda' xtiža' Diosen' zan yež. Ca bene' chaque xe' zoe' chaclene'ne' len xšinen', can' zoa Timoteon' chaclene' neda'.

²³ Da'nan' zoa' lez guac seła'ne' gan' zoalen' cate' la' nezteda' nac gac chia' nga,

²⁴ na' seła'ne' la'czla' chejli'a gon Xancho Criston' cont lecze neda' yob yeden'a le'e.

²⁵ Na' lecze chacda' chonen byen yesela' bene' lježcho Epafrodito gan' zoalen', ben' gwsela'le nga cont chaclene' neda' len bi da' chyažjda'. Ba bene' xšin Diosen' txen len neda', na' lecze ba gwdi gwxaca'to' txen.

²⁶ Che'nchgüede' yele'ede' le'e, na' leca da' chacde' gwnezele gocšende'.

²⁷ Na' da' li gocšenchgüede', yelate'ze ca gote', perw Diosen' beyaše'de' le', na' bi nacho toz le' beyaše'de', san lecze beyaše'de' neda' cate' beyone' le', le da' zan da' ba goc chia' na' nyaše'chgua goc chia' šaca' gote'.

²⁸ Da'nan' zelaže'cha' yesela'ne' gan' zoalen' cont soale mbalaz yežagle da' yoble na' cont bich soayaše'le che'.

²⁹ Le gwlebe' binlochgua da' naque' txen len chio' chejnilaže'cho Xancho Criston', na' le gon xbab ba bene' to da' zaca', na' lecze ca' le gon xbab che nochle bene' chon can' ba benen'.

³⁰ Le yelate'ze ca gote' da' bzane cuine' goclene' neda' nga len xšin Criston', can' goncze le'e šaca' zoale nga len neda'.

3

Soa cuezcho goncho can' chazlaže' Diosen'

¹ Na' na'a bene' migw, cheyała' soacho mbalaz da' chejnilaže'cho Xancho Criston'. Bi chacda' zed chozoja' che da' ca' ba bzoja', le chyažjen gonchle xbab čen.

² Le gwsaca' cont bi gwzenagle che bene' ca' chesene' cheyała' soale señw dan' že' circuncióń da' yesechogüe' lo cuerp čhelen', le zjanaque' bene' zban na' chesyela'de' chesone' da' mal.

³ Le de to señw checho cont nezecho naccho xi'in Dios. Señwna' naquen da' ba beń Diosen' chio' Spiritw čen' cont chaclenen chio' chonxenchone'. Chebechgüecho chejnilaže'cho Cristo Jesúsen', na' bi zoacho lez gata' bichle da' gaclenen chio' lao Diosen', ca no señw da' zoa lo cuerp čhechon' o bichle da' goncho.

⁴ De da' zan da' guac gona' xbab gaclenen neda' lao Diosen' šaca' chacda' yebe Diosen' neda' neče da' ba bena' o nac naca'. Nono zoa no nacho ba benče' da' zan da' yebe Diosen' ca neda'.

⁵ Le naca' bene' Israel na' golja' lo diaža che da' Benjamín, na' bosozoe' neda' señw che circuncióń to xmanzda'. Na' goljlena' diža' hebreo da' nac xaxna'a bene' chesaque' diža' hebreo. Na' bsedyana' ley dan' bzoj da' Moisésen' con can' chosozejni'i bene' fariseo ca' len.

⁶ Na' leca gwche' yichja' diža' gole che bene' Israel gualaž chia'. Da'nan' bchi bsaca' bene' ca' chesejnilaže' Criston'. Na' con ga zelao gwzoeda' bzenaga' che yogo' dan' že ley četon' cheyała' gonto' o bi cheyała' gonto'.

⁷ Na' cana' bena' xbab yogo' da' ca' yesaclenen neda' cont yebe Diosen' neda', perw na'a ba chache'eda' bi yesaclenen. Ba bchojyichja' da' ca' cate' gwyejnilaža' Criston', le gocbe'eda' bi yesaclenen neda' lao Diosen'.

⁸ Na' na'a da' nombi'a Xana' Cristo Jesúsen' naquen da' zaca'chgua len neda'. Bibi zaca' yogo' da' ca' gódda' cana' yesaclenen neda' lao Diosen'. Yogo' da' ca' bebeda' cana' ba' zjanaquen ca to da' bibi zaca' len neda', na' nonan' ca to beb da' ba gwcho'ona' cont gombia'cha' Criston'.

⁹ Le zelaže'chgua' gaca' toz len Criston', na' zelaža' na Diosen' naca' bene' güen len le'. Na' nezda' ne' naca' bene' güen len le' da' chejnilaža' Criston', gague lagüe da' chona' bi da' ža ley dan' bzoj Moisésen' cheyała' goncho. Le con bene' chesejnilaže' Criston' none' legaque' ca bene' güen.

¹⁰ Chaclaža' gombia'cha' Criston' na' gombi'a yela' guac che' dan' nape' lagüe bebane' ladjo bene' guaten', na' chzanlaže' cuina' saca'zi'a can' gwdi gwxcaca' le'. Na' ca Criston' gote' neče xtolan', chaclaža' gaca' ca to bene' guat len da' malen', bich gonan'.

¹¹ Zoa' chbeza' ca', le cheyljwlaža' nacle gona' cont yečhis yosban Diosen' neda' ladjo bene' guat ca' cate' ba gota'.

Pablo chaclaže' gac yichjlažda'ogüe' can' nac yichjlaždao' Criston'

¹² Bi nia' bačh nac yichjlažda'ogua' can' cheyała' gaquen, le biña' gaquen can' nac yichjlaždao' Cristo Jesúsen'. Perw chona' con ga zelao saqueda' cont gaquech yichjlažda'ogua' can' nac che le', le ba gwleje' neda' naca' xi'ine'.

¹³ Bene' migw, nezda' biña' gac yichjlažda'ogua' can' cheyała' gaquen, perw ba bchoyichja' yogo' da' ca' gosac da' zaca' len neda' cana' na' yogo' bin' ba bena', na' čhi' yichja' da' mbalaz da' chbeza' gac.

¹⁴ Chona' con ga zelao saqueda' cont Diosen' yebede' neda' cate' yežina' gan' zoen'. Le Diosen' gwleje' neda' cont gac yichjlažda'ogua' can' nac yichjlaždao' Cristo Jesúsen' lagüe da' chejnilaža'ne'.

¹⁵ Na' yogo'cho še ba zej chaccho can' chaclaže' Diosen' gaccho, cheyała' goncho xbaben' ca', na' še yo'ocho bichle xbab yoble, Diosen' gwzejni'iden' chio'.

¹⁶ Perw na' cheyała' soaczcho goncho can' ba bzejni'i Diosen' chio'.

¹⁷ Bene' migw, le gon can' chona' neda', na' le na' can' cheson yezica'chle bene' cheson can' ba bzejni'ida' le'e, cont gonle can' chesonen'.

¹⁸ Da' yoble žia' can' ba gwnia' zan las, can' zjanita' bene' zan, nacbia' chesegue'ede' Criston' ben' bnežjw cuine' gote' le'e yag cruzen' neče xtoła'chon'. Na' chbeža' da' chesone' ca'.

¹⁹ Žin ža yesebiayi' bene' ca' toli' tocañe, le chesyebchde' chese'ej chesagüe' clal ca yesonxene' Diosen'. Chesaclaže' cheso'e diža' che bi da' yela' zto' da' chesone', na' zjachi' yichje' tlaoze da' chac yežlio nga.

²⁰ Perw chio', bich choncho xbab nac lažcho yežlion', le nezecho naquen gan' zoa Xancho Jesucriston' ben' noñ chio' yela' mban toli' tocañe, na' chbezcho batcan' yide' da' yoble.

²¹ Na' caten' yide' da' yoble, gone' cont cuerp checho quinga da' bitec bi zaca' yesyeyaquen da' cobe, na' yesaquen leca güen can' ba nac cuerp che le'. Gone' ca', le nape' yela' guac neče gone' cont yogo' loł da' zjade yosozenaguen che'.

4

Cheyała' soacho mbalaz da' chejnilaže'cho Criston'

¹ Na' na'a bene' migw, chacda' le'e na' che'nchgüeda' le'e lježcho da' yoble. Chbechgüeda' da' chejnilaže'le Criston', na' zoa' mbalaz neče le'e. Le'e bene' chacda', le soačhach šejnilaže'le Xancho Jesucriston'.

² Na' chñeyoeda' le' Evodia, na' lecze ca' le' Síntique, le soašca binlo na' le gac txen tole yetole da' chejnilaže'le Xanchon'.

³ Na' ca nac le' bene' lježa', len' beno' xšin Diosen' do yichj do lažo' txen len neda' cana', na' chñeyoeda' gacleno' no'ol quinga yesyenite' binlo len lježe' da' yoble, le legaque' ba gosone' xšin Diosen' txen len neda' na' len Clemente na' len yezica'chle bene' lježcho ca', na' zjanyoj la yogo' bene' ca' le'e libr che Diosen' gan' zjanyoj la bene' ba zjanape' yela' mban toli tocaņe.

⁴ Le yebe yogo'te ža da' chejnilaže'le Xancho Jesucriston'. Da' yoble žia', le yebe.

⁵ Le gon cont yogo'lol bene' yesenezde' nacle bene' šagüe', le ba zoa yid Xanchon' da' yoble.

⁶ Bi gacle tole bite'teze da' chac chele, san le yol güiž Diosen', nable gaclene' le'e bite'teze da' chac, na' le güe'e yela' choxcen cate' bi da' nabelene'.

⁷ Nachen' Diosen' gone' soa cuezle binlo len xbab da' yo'o lo' yichjlažda' olen' lagüe da' chejnilaže'le Cristo Jesúsén', cont bi gacle tole. Na' cate' le' ba chone' cont zoa chbezcho binlo len xbab chechon', neca gacbe'echo bixchen' zoachguacho binlo.

Cheyała' cue' yichjcho che da' zjanac güen

⁸ Na' da' la'zelagüe dan' chaclaža' ñeyoeda' le'e bene' migw, cue' yichjle che diža' li, che dan' nac da' zaque', che dan' zej to licha, che dan' bibi da' mal nsa', che dan' naquen binlo, na' che da' zaca' yebecho. Bite'teze da' naquen da' güenchgua na' bite'teze da' chazlaže' Diosen', le cuec yichjle che dan' zjanac ca'.

⁹ Da' ca' bzejni'ida' le'e, yogo' dan' benele gwnia' cate' bsed blo'eda' le'e can' cheyała' gonle, na' da' ca' ba ble'ele chona' neda', da' ca' le gon. Na' Dios ben' chon cont chzoa chbezcho binlo len xbab da' yo'o lo' yichjlažda' ochon' soacze' gaclene' le'e.

Can' gosaclen bene' Filipos ca' Pablon'

¹⁰ Chbechgüeda' lao Xancho Cristo Jesúsén' da' ba chi' yichjle chaclenle neda' da' yoble. Nezda' gwzoale chonle xbab chia', perw bi beñen gaclenle neda'.

¹¹ Na' žia' da' qui gague neche byažjda' da' ca' byažjda', le Diosen' ba bzejni'ide' neda' cont zoa' mbalaz cate' de da' chyažjda' na' cate' bibi de.

¹² Ba yolagua' yela' yaše' yela' zi', na' yolagua' yela' šagüe'. Diosen' ba bzejni'ide' neda' cont zoa' mbalaz bite'teze chac chia', cate' de da' che'ej chagua' na' cate' chbił chdona', cate' de bichle da' chyažjda' na' cate' bibi de.

¹³ Chac chona' bite'teze da' cheyała' gona', le zoa Criston' len neda' chac-lene'nda'.

¹⁴ Perw benle güen gwseła'le da' goclenen neda' cont naccho txen len dan' chy chzaca' nga.

¹⁵ Na' le'e zoale Filipos, nezele caten' beyož gwyejle'le diža' güen che Criston' dan' bia' len le'e, benle txen len neda' cate' beza' distritw Macedonian', gwseła'le da' byažjda', na' nono nochle bene' ca' chesedop chesežag chesonx-ene' Criston' yež yoble goson ca'.

¹⁶ Le cate' ne' zoa' Tesalónica gwseła'le da' byažjda' zan ni'a.

¹⁷ Perw gague chzelaža' bi da' gonle neda', san chzelaža' soaczele gonle güen cont yebe Diosen' le'e.

¹⁸ Ba benle doxen da' cheyała' gonle na' da' zcha'och ca'te' da' cheyała' gonle. Ba decze da' zcha'o' chia' na'a. Bibi chyažjda', le ba beñ Epafrdito da' gwseła'le

chia'. Na' da' gwsela'le zaca'leben ca to yal da' chla' zix da' chzey bxozen' lao Diosen', le Diosen' chebede' can' benlen'.

¹⁹ Na' Dios chia' nan' goncze' yogo'te bi da' chyažjele lagüe chejnlaže'le Cristo Jesúsén', le yogo' da' de yo'on lo ne'e.

²⁰ Cheyala' gonxenko Xancho Diosen' toli tocané. Can' gonšcaczcho.

Pablon' zelagüe' bzedé' legaque' diža'

²¹ Le gwguap tiox yogo'lol bene' Filipos ca' yo'o lo na' Diosen' da' chesejni-laže' Jesucriston'. Bene' lježcho ca' nita' nga len neda' chguapto' le'e tiox.

²² Na' lecze yogo' bene' Roma quinga ba yo'o lo na' Diosen' chosoguape' le'e tiox, lente bene' ca' cheson žin che rey ben' nac la'zelagüe' bene' gwnabia' ben' chi' Roma.

²³ Xancho Jesucriston' soašque' gaclenšque' le'e len xbab da' yo'o lo' yichjlažda'olen'. Da' na'zen' chzoja'.

CART DAN' BZOJ POSTLW SAN PABLO CHE BENE' CA' ŽE' COLOSAS

Pablon' chzoje' bene' chesonxen Jesucriston' ciuda Colosas

1 Jesucriston' gwleje' neda' Pablo cont naca' postlw che', le can' chazlaže' Diosen'. Neda' txen len bene' lježcho Timoteon' chguapto' le'e tiiox.

2 Chzoja' le'e zoale Colosas, le'e chejnilaže' le Criston' na' nacle lo na' Diosen'. Chnaba' gaclenšca Xacho Diosen' le'e na' gone' cont soa cuezle binlo.

Pablo chnabde' Diosen' gaclene' bene' ca' že' Colosasen'

3 Yogo' ni'a cate' choj güižto' Dios ben' nac Xa Xancho Jesucriston' choe'to' yela' choxcen che' can' chonlen'.

4 Le ba beneto' diža' can' chejnilaže' le Cristo Jesús'en' na' can' chaquele yogo' bene' ca' yezica' chle zjanaque' lo na' Diosen'.

5 Na' nezeto' chejnilaže' lene' na' chaquele legaque' lagüe da' zoale lez šjayzoale len Diosen'. Caten' gwzola'o bzenagle che xtiža' Diosen' da' naquen da' güen na' da' li, gwyejni'ile gac chele ca'.

6 Na' xtiža' Diosen' da' ba bzenagle ba goslasen doxen, na' bene' zan ba chosozenague' chen. Na' legaque' lecze chesone' güen ca gwzola'o le'e chonle caten' gwyejni'ile diža' li da' chzejni'in nži'ilaže' Diosen' le'e, na' ne' chonle güen ža na'aža.

7 Chaqueto' Epafras ben' bzejni'ide' le'e xtiža' Criston'. Chone' xšin Diosen' can' chon neto', na' zoateze' chone' can' ža Criston' da' chaclaže' gaclene' le'e.

8 Len' ba gože' neto' ba ben Spiritw che Diosen' cont chaquele Diosen' na' chaquete lježle.

9 Da'n'an' caten' gwnezeto' ca güenna' chonle, gwzolaoto' yogo' ni'a cate' choj güižto' Diosen' chnabeto'ne' gaclene' le'e. Chnabto' gon Spiritw chen' le'e yogo' cuen yela' sina' na' yela' chejni'i cont nezele nacyanen' chaclaže' gonle.

10 Chnabto' soale gonle can' cheyala' gon chio' nombia'cho Xanchon', cont yebede' yogo' dan' chonle. Na' chnabto' gaclene' gonle zan cuen da' güen na' gaclene' šejch gombia'ine'.

11 Chnabto' gaclen Diosen' le'e len yela' guac xen che' cont soatezle šejnilaže' lene' na' gapple yela' chxenlaže' bite'tezen' chac.

12 Na' chnabto' soale mbalaz güe' le yela' choxcen che Xacho Diosen', le le'na' ba gwleje' chio' ba naccho lo ne'e cont šjayzoacho len le' gan' yo'o be'ni' juisyw.

13 Bebeje' chio' lo na' gwxiyen' cate' da' cholen' ne' chnabian' yichjlažda'ochon', na' gwlo'e chio' lo na' Xi'ine' Jesucriston' ben' chacde', cont na' gwzenagcho che le'.

14 Na' Xi'in Diosen' bnežjw cuine' gote' cont beque'e xto'la'chon' na' chezi'xen Diosen' checho.

Criston' bozoe' chio' binlo len Diosen'

15 Criston' naque' cayanen' nac Xe' Dios ben' nono chle'e. Ba zoacze Criston' cate' bina' xe yežlion' na' cate' bina' gata' yogo'lol' da' de le'e yaban' na' lo yežlion'.

16 Criston' bene' yaban' na' yežlion', bene' bene' že' yaba na' yežlio, len bica'chle da' zjade yaban' na' yežlio nga. Bene' da' ca' chle'echo na' da' ca' bi chle'echo. Bene' cont nita' angl' gwnabia' ca' na' da' ca' besyeyac da' xigüe' ca'

na' bichle da' ca' chesenabia' yichjlaždao' bene' ca' bi chosozenag che Diosen'. Na' Criston' bene' cont nita' bene' ca' na' yogo' da' ca' cont gacxene'.

¹⁷ Criston' ba zoacze' cate' bina' nita' yogo' lol da' de le'e yaban' na' lo yežlion'. Na' yogo' bite teze da' zjade zjanaquen con can' zjanaquen, le Criston' zoacze' chone' cont zjanaquen ca'.

¹⁸ Na' Criston' chnabi'e chio' chdop chžagcho chonxenchone'. Len' bxie' yela' mban toli tocane che bene' chesejnilaže'ne', na' naque' bene' nechw bebane' ladjo bene' guaten' ben' bich nabia' yela' goten' le'. Da'nan' naque' la'zelaogüe bene' blao na' chnabi'e yogo' lol bene' na' bica'chle da' zjade.

¹⁹ Na' Diosen' chazlaže' dan' nac yichjlaždao' Criston' cayanen' nac yichjlaždao' le' na' dan' nac yela' guac che Xi'ine' Criston' doxen can' nac yela' guac che le'.

²⁰ Na' lecze chazlaže' yozoe' binlo len le' yogo' bene' že' yaban' na' yežlion', le Xi'ine' Criston' bnežjw cuine' blaj xchene' le'e yag cruzen' cont gac yesenite' binlo len le'.

²¹ Cana' bi nombia'le Diosen'. Bgue'elne' na' gwzoale benle da' malen'. Perw na'a ba bozoa Criston' le'e binlo len Diosen'.

²² le bnežjw cuine' neche chio' caten' gosote'ne'. Na' beyone' lažda'ochon' xilaže' cont bibi doła' gapcho cate' yežincho lao Diosen', na' bibi de da' zaca' yosocuiše' chio' lagüen'.

²³ Na' še soacho šejnilaže'cho Criston' na' soačhačcho len toze xbab, na' soateze soacho lez šjayzoacho len Diosen' can' gwzelaže'cho gac checho cate' bzenagcho xtižen' da' nechw, nachen' bibi doła' gapcho cate' yežincho lao Diosen'. Na' diža' güen chen' ba bžinen doxen yežlion' cont benachen' chesenden', na' Diosen' gwleje' neda' Pablo chyixjue'edan'.

Diosen' gwleje' Pablon' cont bsed blo'ede' bene' chesonxen Criston'

²⁴ Da' zan da' chyi chzaca' lagüe da' chyixjue'eda' xtiža' Diosen' len le'e bi nacle bene' Israel. Na' le'e chdop chžagle chonxenle Criston' nacle ca cuerp che'. Na' chbeda' chžaglagua' yogo' da' chaclaže' Criston' žaglagua' da' gaclenen le'e. Na' cate' chžaglagua' neda', guac nacho cuin Criston' chžaglagüe'.

²⁵ Diosen' gwleje' neda' chyixjue'eda' xtižen' len le'e chdop chžagle chonxenle Criston', cont gwzejni'ida' le'e doxen can' zeje xtižen'.

²⁶ Cani' nono na' neze da' güen da' chon Diosen' len bene' chesejnilaže'ne', perw na'a Diosen' ba bzejni'iden' chio', chion' nacho lo ne'e.

²⁷ Diosen' chaclaže' nezecho leca güen juisyw chone' len note'tezcho chejni-laže'chone', la'czla' bi nacho bene' Israel. Cana' nono gwneze gone' da' güen juisyw len note'tezcho, perw na'a Diosen' ba bzejni'ide' chio' zoacze Criston' len chio' chejnilaže'chone' na' da'nan' zoacho lez šjayzoacho len Diosen' gan' yo'ochgua be'ni'.

²⁸ Choe'lena' yogo' bene' diža' che Criston', chata'yoeda' yogüe' yosozenague' che', na' chzejni'ida' yogüe' xtižen' cont yesejni'iden' binlo, le chaclaža' yogo' bene' chesejnilaže' Criston' yesaque' cayanen' chaclaže' Diosen'.

²⁹ Da'nan' chona' con ga zelao chozoda' chyixjue'eda' bene' xtižen', na' chaclenchgüe' neda' len yela' guac xen chen'.

2

¹ Chaclaža' nezele chonchgua' ga zelao chozoda' cont chaclena' le'e na' bene' lježcho že' Laodicea na' yezica'chle bene' lježcho bina' yesele'ede'nda'.

² Chaclaža' gona' čhač laže'le cont yichjlažda' olen' yesaquen toze lagüe da' chaque lježle. Na' chaclaža' nezeyane'le can' cheyala' gonle xbab cont šejni'ile da' ba bzejni'i Diosen' chio' che Criston' da' nono gwneze cani'.

³ Criston' nse'e doxen yela' sina' na' yela' chejni'i čhe Diosen' cont gwzejni'iden' chio'.

⁴ Chnia' ca' cont nono siye'e le'e len diža' da' chaquele naquen xdan.

⁵ Na' la'czla' bi zoa' na'le len le'e, zoa' chona' xbab čhele na' chebeda' nezda' chonle can' cheyala' gonle na' zoachachle chejnilaže'le Criston'.

⁶ Na' na'a, con can' ba gwzolaole chejnilaže'le Criston' na' ba nonlene' Xanle, con can' soachachle len le'.

⁷ Le soachach le šejnilaže'ch Criston' can' ba bsedlena', cont gacle ca to yag da' ba gwyaz loen sitjw. Na' le soa le güe'chgua yela' choxclen čhe Diosen' can' chaclene' le'e.

Criston' ba bocobe' yichjlažda'ochon'

⁸ Le gwsaca' cont nono co'oyele' le'e gwzenagle čhe diža' sina' čhe yežlio nga da' naquen da' güenlaže'. Bene' že' yežlion' chosozejni'ide' da' zan da' chesene' cheyala' goncho da' bibi zjazaca', na' bitw chosozejni'ide' che Criston'.

⁹ Yichjlaždao' Criston' naquen' cayanen' nac yichjlaždao' Diosa', na' nac yela' guac čhe Criston' doxen can' nac yela' guac čhe le'.

¹⁰ Na' Criston' chnabia'che' ca note'teze angl blao na' ca note'teze da' xigüe', na' chio', da' chejnilaže'chone', bich bi chyažjecho cont soa cuezcho binlo.

¹¹ Na' lecze da' naccho txen len Criston' de to checho da' zaca'leben ca señw da' že' circuncišion, perw bi naquen señw da' bzoa bene' lo cuerp chechon', san da' ba bocob Criston' yichjlažda'ochon' cont da' malen' bich chnabian' chio'.

¹² Na' da' gwzoacho nis caten' gweyjnilaže'chone', zejen con can' got Criston' neče xtol'a'chon', lecz ca' chio' ba naccho ca to bene' guat len da' malen' cont bi gonchon. Zejen bgaše'cho can' bgašen', na' lecze zejen bečhis bosban Diosen' chio' ladjo bene' guat ca' can' bene' len Criston'. Zejen ca' le chejle'cho Diosen' bosbane' Criston' len yela' guac čhen'.

¹³ Cana' gwxcacalebcho ca to bene' guat len yichjlažda'ochon' da' bi bzenagcho čhe Diosen' na' gwzoacho bzenagcho čhe da' malen'. Nach Diosen' bene' len chio' can' bene' bosbane' Criston' ladjo bene' guat ca', le bocobe' yichjlažda'ochon' na' bezi'xene' xtol'a'chon'.

¹⁴ Bi bencho yogo'lol can' ža ley čhe Diosen' cheyala' goncho, na' bencho da' žan bi cheyala' goncho. Da'n'an' gota' xya čhecho len leyna' na' nchoglaon čhecho saca'zi'cho toli tocané. Perw Criston' bnežjw cuine' bosode'ene' le'e yag cruza' neče doła' xya čhechon', na' da'n'an' nezecho Diosen' ba bnitlagüe' xtol'a'chon'.

¹⁵ Criston' cate' gote' le'e yag cruza' beque'e yela' gwnabia' čhe da' xigüe' ca' na' blo'ede' beņachen' ba blej bšošen'.

Cue' yichjcho čhe da' ca' zjazacan' len Diosen'

¹⁶ Bi gwzenagle čhe bene' ca' chesena chonle mal che'ej chagwle bi da' che'ej chagwle, o bene' chesene' čhele da' bi chonle no ža lni, o bene' chesena qui ca' goncho cate' naquen bio' che'eñ, o bene' chesena ža ni ža na' nac ža čhe Dios.

¹⁷ Yogo' da' ca' con bosozejni'in late'lasze čhe Criston', perw na'a da' bid Criston' bich chyažjecho da' ca', le ba nombia'chone'.

¹⁸ Bi gwzenagle še no bene' chzejni'ide' cheyala' gon cuinle ca to da' bibi zaca' cont soale binlo len Diosen', o bene' chzejni'ide' cheyala' gonxenle no

angl o gonle bi da' že' ble'edagüede', le bi chebe Diosen' bene' cheson da' ca'. Bene' ca' chosozejni'ide' ca' chesacde' xbab da' chesaljlaže' zaca'chguan, len bitw bi zacan',

¹⁹ le bi chosozenague' che Criston'. Perw chio' chdop chžagcho chonxenchone', Diosen' none' cont Criston' chnabi'e chio' ca yichjchon' chnabian' cuerp chechon'. Na' naccho txen len le' na' len bene' lježcho ca to cuen güeje cuerp chechon' ngoden' txen, le xpela'chon' na' bechj bnia' ca' zjanoxen' len con ca non Dios chegaquen.

²⁰ Chio' naccho txen len Criston', guac nacho Criston' ba none' chio' ca to bene' guat len da' xinjen' cont bi gonchon, ca bene' guaten' goc le' le'e yag cruzen'. Da'nan' bi cheyala' gwzenagcho cate' chesena bene' da' zan da' goncho cont soacho binlo len Diosen', le bi naccho bene' che yežlion'. ¿Bixchen' chzenagle che yela' sina' che yežlio nga da' ca' chesene' cheyala' gonle na' da' ca' chesene' bi cheyala' gonle?

²¹ Chesene': "Bi goxe'le da' nga", "Bi ye'ej gagwle da' na'", "Bi canle da' na'".

²² Na' yogo' da' ca' chesene' bi goxe'cho, bi ye'ej gagwcho na' bi cancho, da' chesede chen cate' chchinchon, na' dan' chesene' cheyala' goncho len da' ca', con xbab chegaczen'.

²³ Guacte goncho xbab nac da' sina' da' chesene' cheyala' goncho, na' goncho xbab gaclenen chio' gonxenchon Diosen', le chesene' cheyala' gwchi gwsaca' cuincho na' gon cuincho ca to da' bibi zaca'. Perw bibi zejen goncho ca', le bi chaclenen chio' cont bitw gwzenagcho che da' malen'.

3

¹ Can' bechis bosban Diosen' Criston' ladjo bene' guat ca', lecze can' bocobe' yichjlažda'ochon'. Da'nan' cheyala' cuec yichjcho goncho can' chazlaže' Diosen' na' cuec yichjcho gac can' chebe Criston' ben' zoa yaba chnabi'e txen len Diosen'.

² Na' cheyala' yebecho da' naquen da' zaca' len Diosen', gague da' naquen da' zaca' len benachen'.

³ Le guac nacho Criston' ba none' chio' ca to bene' guat len da' malen' cont da' malen' bich nabian' chio', na' mbancho len Criston' na'a cont naccho txen len Diosen'.

⁴ Criston' none' chio' yela' mban toli tocanē. Na' cate' le' yide' da' yoble, šjayzoacho txen len le' gan' yo'ochgua be'ni'.

Can' bencho cana' na' can' cheyala' goncho na'a

⁵ Da'nan' cheyala' cuejyichjcho da' mal da' žan goncho len cuerp chechon' dan' nac che yežlio nga. Bitw gata'lencho no'ole bi nac no'ol checho o bene' byo bi nac bene' checho. Bitw goncho bichle da' yela' zto' len cuerp chechon' neca yebecho bi da' nac da' yela' zto'. Bitw selaže'cho goncho bite'teze da' mal, neca selaže'cho da' zan da' gata' checho, le toz ca malen' nac yela' chzelažen' len da' cheson bene' chesejnilaže' l gua'a lsa'a ca'.

⁶ Žin ža cate' Diosen' gone' cont bene' cheson da' ca' yesezaca'zi'e toli tocanē.

⁷ Le'e lecze gwzoale cana' benle da' mal ca' ba gwnia'.

⁸ Perw na'a cheyala' cuejyichjle yogo' da' mal. Bitw ža'a lježle, bitw locle, bitw gacle bene' xi'a len lježle, bitw nele che lježle, na' bitw güe'le diža' zban.

⁹ Na' bich güe'len lježle diža' güenlaže'. Ba gwlejyichjle da' mal da' gwnabia' yichjlažda'olen' cana' na' bich cheyala' gwzenagle chen da' yoble.

¹⁰ Ba chzenagcho che Dios ben' ben chio', le ba bocobe' yichjlažda'ochon'. Na' tža tža chzejni'ide' chio' cont zej chacch xbab chechon' can' nac chen'.

11 Na' chio' ba bocob Diosen' yichjlažda'ochon', bibi nonen še naccho bene' Israel o še bi naccho. Bibi nonen še zoacho señw da' že' circuncisión o še bi zoachon, na' bibi nonen še naccho bene' zito', la'czla' še za'cho gan' že' bene' bi chesejni'i, na' bibi nonen še naccho esclavo o še bi naccho. Da' naquen da' zeje, ba chejnilaže'cho Criston' na' len' zoe' len yogo'cho.

12 Diosen' gwleje' chio' cont naccho lo'ne'na' na' chacde' chio'. Da'nan' cheyala' yeyaše'cho bene' na' gaccho bene' šagüe' len yogo'lol' bene'. Bi cheyala' ga'laže'cho, san gaccho bene' chzexjwlaže' na' gapcho yela' chx-enlaže' len yogo'lol' bene'.

13 Na' cheyala' gwdecho ca'ale še bi chac checho len bene' lježcho na' yezi'xencho še bi da' ba gosonde' chio', yezi'xencho con can' ba bezi'xen Xancho Criston' checho.

14 Na' yeto da' zejechen goncho ca yogo' da' ca', cheyala' gaque lježcho, le še chaque lježcho gaclenen goncho yogo' da' ca' can' cheyala' gonchon.

15 Diosen' gwleje' chio' cont soa cuezcho binlo, na' cheyala' gwzenagcho che Criston' na' gache'echo yogo'cho naccho toze cont soa cuezcho binlo. Na' lecze cheyala' soacho güe'cho yela' choxcen che Diosen'.

16 Cheyala' soacho goncho xbab che xtiža' Criston' na' gwzenagcho chen, na' lecze soacho gwzejni'i lježcho na' neyoe lježcho len doxen yela' sina' che Diosen' cont yogo'cho goncho da' güen. Na' cheyala' gołcho no salmos, no himnos, na' bichle da' ža Spiritw che Diosen' gołcho, na' güe'cho yela' choxcen che Diosen' lo' yichjlažda'ochon'.

17 Na' bite'teze da' goncho na' bite'teze diža' güe'cho, cheyala' nabcho gaclen Xancho Jesúsen' gonchon can' chazlaže', na' güe'cho yela' choxcen che Xancho Diosen' con can' chaclen Xancho Jesúsen' chio' chonchon'.

Can' cheyala' goncho len lježcho

18 Le'e no'ole nšagna'le, to tole le gwzenag che bene' chele, le can' cheyala' gon chio' chejnilaže'cho Xancho Criston'.

19 Na' le'e bene' byo nšagna'le, to tole le gaque no'ol chele na' bi gonle znia len legaque'.

20 Na' le'e bi' bixjw, le gwzenag che yogo'lol' bi da' yesena xaxna'le, le can' chazlaže' Xancho Criston' gonle.

21 Na' le'e nacle xaxna' bi' bixjw, bi gonle cont yeseloc bi' chele ca', le še gonle ga yeselocbe', yesaquebe' zdebe yosozenagbe' chele.

22 Na' le'e chonle xšin bene', le gwzenag yogo'lol' can' ža xan žinna' gonle. Bitw gonlele xan žinna' gonle ca bene' chonchgua žin cate'zen' chne'e le'e, san le gon žinna' do yichj do laže'le da' chejnilaže'le Diosen'.

23 Na' bite'teze da' gonle, le gonen do yichj do laže'le cont yebe Xancho Criston', gague contze yebe bene'.

24 Nezczele Xancho Criston' gone' cont yežincho gan' zoen' še soacho goncho can' chazlažen'. Na' zoacho cont goncho con can' ža Xancho Criston'.

25 Na' note'tezcho še bi choncho can' cheyala' goncho, Xancho Diosen' gone' saca'zi'cho neče dan' ba bencho. Na' toz can' chon Diosen' len yogo'lol' bene'.

4

1 Na' le'e nacle xan žin, le gon güen na' le gac bene' šagüe' len bene' cheson xšinlen', le nezczele Criston' ben' zoa yaban' naque' Xanle.

² Yogo'te ža cheyała' nabcho gaclen Diosen' chio' len da' choncho na' len bichle da' chac checho, na' cheyała' güe'cho yela' choxclen che', na' bi cheyała' güedcho yol güižcho Diosen'.

³ Na' le nabe Xancho Diosen' gone' cont gac güe'lento' bene' xtiža' Criston' da' biña' yesejni'ide', le neche dan' ba bia' xtiže'nan' dia' ližya nga.

⁴ Na' le nabe Diosen' gaclene' neda' gwzejni'ida' bene' diža' güen che Criston' binlo cont yesejni'iden'.

⁵ Cheyała' soacho goncho güen len bene' biña' yesejnilaže' Criston' na'a šlac de latje.

⁶ Na' cheyała' güe'cho diža' šagüe' diža' da' zejen len yogo'lol bene', na' cheyała' goncho xbab nac yoži'icho xtiža' yogüe'.

Pablo chguape' bene' migw che' ca' tiox

⁷ Bene' lježcho Tíquico ye'e le'e yogo'lol can' chac chia'. Chaquechone', le zoacze' chaclene' neda' can' cheyała' gone' na' chone' xšin Xancho Criston' txen len neda'.

⁸ Ba gwseła'ne' gan' zoalen' cont nezele can' chac cheto' na' cont gone' chach laže'le.

⁹ Na' txen len le' zeza' bene' lježcho Onésimo ben' nac bene' gualaž chele. Zoacze' chejnilaže' Criston' can' cheyała' gone' na' chaquechone'. Legaque' yese'e le'e yogo' da' ba chac nga.

¹⁰ Aristarco die' ližya nga txen len neda', na' le' chguape' le'e tiox. Na' lecze Marcos ben' nac biše' ljež Bernabé chguape' le'e tiox. Ba gwnia' can' cheyała' gonle güen len le' cate' le'e gan' zoalen'.

¹¹ Nach Jesús ben' lecze le' Justo lecze chguape' le'e tiox. Šonze bene' Israel ca' chesaclene' neda' len da' chona' cont bene' zan yosozenague' che Diosen' na' nabi'e yichjlažda'ogaquen'. Ba gosonchgüe' chach laža' can' ba gosaclene' neda'.

¹² Nach lecze bene' gualaž chele Epafras chguape' le'e tiox. Chone' xšin Criston' na' yogo' ni'a cate' chol güiže' Diosen' chnabchgüe' gwzejni'i Diosen' le'e yogo'lol da' chaclaže' gonle cont soachachle gonlen na' gacle cayanen' chazlaže' Diosen'.

¹³ Che'nda' nezele zoateze' chol güiže' Diosen' neche le'e chejnilaže'le Criston' le'e nita'le Colosas, Laodicea na' Hierápolis.

¹⁴ Nach Lucas ben' chon rmed, ben' chaquecho, chguape' le'e tiox na' lecze ca' Demas.

¹⁵ Le gwguapšca tiox bene' lježcho ca' že' Laodicea, len Ninfas na' bene' ca' chesedop chesežag chesonxene' Diosen' ližen'.

¹⁶ Na' cate' yeyož gwlable cart nga, le gwnežjon bene' ca' chesedop chesežag chesonxene' Diosen' Laodicean' cont yosolaben'. Na' lecze le gwlab dan' gwseła' che bene' Laodicean'.

¹⁷ Na' le ye' Arquipo chneyoeda'ne' gwza'lagüe' gone' dolol xšin Diosen' da' gwlo'o Xancho Criston' lo ne'e gone'.

¹⁸ Cuincza' neda' Pablo chzoja' late' dao' da' nga le'e carten'. Bi ganlaže'le can' dia' ližya nga. Diosen' soašque' gaclenšque' le'e. Da' na'zen' chzoja' na'a.

CART NECHW DAN' BZOJ POSTLW SAN PABLO CHE BENE' CA' ŽE' TESALÓNICA

Pablo bzoje' bene' Tesalónica ca' ben' chesonxene' Jesucriston'

¹ Neda' Pablo chzoja' le'e chdop chžagle chonxenle Xancho Jesucriston' Tesalónica na' nacle txen len le' na' len Xacho Diosen'. Na' neda' len Silvano na' Timoteo chnabto' lao Xacho Diosen' na' lao Xancho Jesucriston' yesaclene' le'e na' yesone' ca soa cuezle binlo len xbab dan' yo'o lo' yichjlažda' olen'.

Bene' Tesalónica bosolo'ede' chesejle'e che Jesucriston'

²⁻³ Yogo' ni'a cate' choj güižto' Xacho Diosen' choe'to' yela' choxclen che' par yogo'le. Na' cate' choj güižto'ne' chjayza'laže'to' yogo'lol da' güen dan' chonle dan' chejnilaže'le Diosen' na' chaquelne'. Na' chjayza'laže'to' can' zoachachle chbezle yid Xancho Jesucriston' yeto.

⁴ Nezetó' bene' migw, Diosen' chacde' le'e na' ba gwleje' le'e cont nacle lo ne'e.

⁵ Na' diža' güen da' bzejni'ito' le'e che Jesucriston' gague naquen con to diža'ze. Spiritw che Diosen' goclenen neto' bzejni'ito' le'e len yela' guac chen na' nezetó' diža' dan' bzejni'ito' le'e naquen da' li. Na' nezele can' bento' da' güen šlac gwzoato' len le'e cont goclento' le'e.

⁶ Na' le'e zoale chonle da' güen can' ba ben neto' na' can' ben Xancho Jesucriston'. Bzenagle dan' gwđixjue'eto' le'e che Jesucriston', na' Spiritw che Diosen' chonen cont chbele chzenaglen, la'czla' da' zan da' ba gwđi gwzaca'le dan' ba bzenagle chen'.

⁷ Na' da' zoale chonle da' güenna', bene' ca' chesejnilaže' Jesucriston' distritw Macedonia na' distritw Acaya ba zjanezde' naquen cheyala' yesone'.

⁸ Doxen ba bzenele bene' xtiža' Xancho Jesucriston', gague bene' že' Macedonia na' Acaya na'zen'. Na' ca'cze yogo'ze bene' ba zjanezde' can' chejnilaže'le Diosen', na' da'nan' bi chyažjen güe'to' diža' chele.

⁹ Na' bene' zan cheso'e diža' ca güen benle len neto' caten' bedena'to' le'e na' cheso'e diža' can' benle gwlejyichjle bich chejnilaže'le l' gua'a lsaca' chele ca', san na'a ba chejnilaže'le ben' nac dogualje Dios ben' zoa toli tocané.

¹⁰ Na' cheso'e diža' can' chbezle yetj Xi'ine' Jesúsén' yaban' yide' yežlio nga yeto, ben' bosban Diosen' ladjo bene' guaten'. Na' dan' chejnilaže'cho Jesúsén' ba bosle' chio' cont bi saca'zi'cho cate' žin ža bene' bi chosozenague' che Diosen' yesale'chgüede' toli tocané.

2

Pablon' gwzoe' Tesalónican'

¹ Bene' migw, le'e nezele dan' bedena'to' le'e goclenchguan le'e.

² Na' nezele can' gwđi gwxcaca'to' cate' gwyejto' Filipos, na' can' gosezi'diža' bene' ca' neto' dan' gwđixjue'eto' che Jesucriston'. Perw Diosen' goclene' neto' cont bi bžebto' gwđixjue'eto' diža' güen che' len le'e la'czla' bene' zan bosožone' chixjue'eton'.

³ Dan' gota'yoeto' le'e gwzenagle che Diosen' bitw nacho bzejni'ito' le'e clele, neca goclaže'to' gonto' da' mal, na' neca bento' xbab gonleto' le'e.

⁴ San zoato' choe'to' diža' can' chazlaže' Diosen' ben' ba gwleje'nto' par chyixjue'eto' diža' güen che'na'. Na' chyixjue'eton' gague cont yebe bene', san cont yebe Diosen' ben' neze bin' yo'o lo' yichjlažda'ochon'.

⁵ Nezele can' bento', ne tni'aze biña' gwpeto' le'e len xtiža'ton', na' neca benle'to' le'e cont gonle cheto' bi da' de chele. Cuiñ Diosen' nezde' can' naquen.

⁶ Na' neca cheyiljwlaže'to' nacle gonto' cont yesonxen bene' neto'. Neca nacho chaclaže'to' gonxenle neto', na' neca chaclaže'to' yezica'chle bene' yesone' ca'. Zaca'to' gonto' ga gwzenagle cheto' la fuers da' gwseła' Criston' neto' choe'to' xtiže'na', perw bitw chonto' ca'.

⁷ Nži'ito' le'e cacze no'ole šagüe' nži'ide' xi'ine' bi' chosgol chosča'ogüe'.

⁸ Na' dan' chaqueto' le'e, be'lento' le'e diža' güen che Diosen'. Na' gague da' na'zen' bento', lecze bzanlaže' cuinto' bento' ga zelao gwzaque'to' cont goclen'to' le'e, le chaqueto' le'e.

⁹ Za'laže'czle bene' migw, cate' gwzoato' len le'e benchguato' žin con ga zelao gwzoeto'. Bento' žin do ža do yel cont cbi bi gastw bzoato' le'e. Can' bento' gwduxjue'eto' le'e diža' güen che Diosen'.

¹⁰ Txenczen' nezele len Diosen' gwzoato' do laže'to' cate' gwzoato' len le'e chejnlaže'le Jesucriston'. Benczto' con can' chazlaže' Diosen' cont ne to cono gwna napt'o' dola'.

¹¹ Nezele can' gota'yoeto' le'e gonle da' güen na' can' bento' chach laže' to tole gonlen. Bento' can' chon to bene' byo len xi'ine'.

¹² Bento' mandawd gonle da' güen ca cheyala' gon chio' naccho lo na' Diosen', le ba gwleje' chio' par nabia'cho txen len le' na' par gone' gac da' mba juisyw checho cate' šjayzoacho len le'.

¹³ Bate'teze choe'to' yela' choxcen che Diosen' dan' bzenagle xtiže'na' caten' gwduxjue'eton' le'e. Zache'ele bi naquen xtiža' benač, san naquen xtiža' Dios dan' choe'to'. Na' xtiža' Diosen' dan' chejle'le chša'an xbab dan' yo'o lo' yichjlažda'olen'.

¹⁴ Na' bene' migw, ba goc chele can' goc che bene' chesedop chesežag chesonxene' Jesucriston' zan part Judean'. Bene' Israel gualaž čegaque' bosochi bososaque' legaque', na' lecze can' bosochi bososaca' bene' gualaž chelen' le'e.

¹⁵ Na' bene' Israel ca' gosote' Xancho Jesucriston' con can' gosote' da' bene' gosoe'lene' legaque' xtiža' Diosen' cani'. Na' lecze can' gosone' bosolağšibe' neto'. Na' ža na'aža ne' nite' chesone' da' bi chazlaže' Diosen' na' chesegue'ede' yogo'lol benačen'.

¹⁶ le chosožone' gwzejni'ito' yezica'chle bene' bi da' cheyala' goncho cont gata' yela' mban checho toli tocanē. Can' chesone' do tiemp chosozanch xtola'gaquen' na' Diosen' ba chža'achgüe' legaque'.

Pablo goclaže' šjayne'e bene' nita' Tesalónica

¹⁷⁻¹⁸ Na' neto' bene' migw, cate' zoato' ga bi chle'e lježcho, chjayze'eto' le'e. Da'n'an' cate' ba goc sša biña' le'e lježcho ba chaczejlaže'to' chele na' goclaže'to' yedena'to' le'e. Na' to chop ni'a godca' yida', perw Satanás dan' chnabia' da' xigüe' ca' bi benen latje.

¹⁹⁻²⁰ Chebeto' chonchguale güen na' da'n'an' zoato' lez soachguato' mbalaz cate' yid Xancho Jesucriston' da' yoble, le yebede' bzjeni'ito' le'e cont chzenagle che'. Da' li le'e chonle cont chbeto' na' cont zoato' mbalaz.

3

1-2 Na' bich gwzoeto' dan' bi chle'e lježchon'. Da'nan' bechoglaže'to' gwsela'to' bene' lježcho Timoteon' gan' zoalen' na' neto' bega'anto' Atenas. Timoteon' chone' xšin Diosen' na' chone' txen len neto' chyixjue'eto' diža' güen da' chzejni'in bene' che Criston'. Gwsela'to'ne' bedeyata'yoede' le'e bi soayaše'le na' bedeyene' chach laže'le cont zoachachle chejnilaže'chle Criston'.

3 Gwsela'to'ne' gan' zoalen' cont ne tole bi gacžejlaže'le bixchen' chy chzaca'le. Ba nezele chio' chejnilaže'cho Criston' cheyala' saca'zi'cho lo yežlio nga.

4 Caten' gwzoalento' le'e bzeneto' le'e leca yosoči yososaca' bene' chio'. Na' nezele ba chac can' gwnato'na'.

5 Na' dan' bi gocxenlaža' dan' bina' la' rson chelen', nachen' gwsela' Timoteon' gan' zoalen' cont nezda' še do laže'le chejnilaže'le Criston'. Le bena' xbab goda' še ba gwzoe gwxiyen' benlen le'e. Le še ba benlen le'e, con bendadzeto' xšin Diosen' len le'e še ca'.

6 Perw na' bela' Timoteon' dan' bide' gan' zoalen' na' be'lene' neto' diža' güen, gwne' zoale chejnilaže'le Criston' na' chaquele yogo'lo' bene'. Na' lecce gwne' chjayze'ele neto' na' zelaže'le yežagcho da' yoble lecce can' chaclaže'neto'.

7 Ca'czen' bene' migw, chžaglaoto' na' chy chzaca'to', perw ba beyacxenlaže'to' gwnezeto' can' zoateze zoale chejnilaže'le Criston'.

8 Da' li ba beyacxenlaže'to' na' zoato' mbalaz dan' zoachachle chejnilaže'le Xancho Criston'.

9 Na' da'nan' leca chbeto' lao Diosen' can' chonle na' leca choe'chguato' yela' choxcLen che' can' chonlen'.

10 Leca chol güižto'ne' do ža do yel chnabeto'ne' gone' ga yele'e lježcho da' yoble cont gwzejni'ichto' le'e na' šejchle šejnilaže'chlene'.

11 Chnabeto' Xacho Diosen' len Xancho Jesucriston' yesone' latje yedena'to' le'e.

12 Na' chnabeto' Xanchon' gone' cont gaquech lježle tole yetole na' gone' ga gaquechle yogo' benachen' con catezen' chaqueto' le'e.

13 Chnabezeto'ne' gone' cont soachachle šejnilaže'lene' na' gac lažda'olen' xilaže' lao Xancho Diosen' sin cbibi do'la' gapple cate' yid Xancho Jesús'en' da' yoble nče'e yogo'lo' bene' ba gwlej Diosa' cont zjanaque'lo ne'e.

4

Pablon' bzejni'ide' can' che'ne Diosen' yesezoa yesebeze'

1 Na'a bene' migw, bač bsd blo'eto' le'e gonle can' chazlaže' Diosen', na' bač zoale chonle ca'. Na' can' ža Xancho Jesucriston' chata'yoeto' le'e na' chonto' mandadw šejchle gonchle dan' chazlaže' Diosen'.

2 Ba nezceze bica' da' ca' bento' mandadw gonle na' zjanaquen con ca' ža Xancho Jesús'en'.

3 Diosen' chaclaže' soatez soacho gaccho bene' laždao' xilaže'. Bi chazlaže' gata'lencho no'ol bi nac no'ol checho o bene' byo bi nac bene' checho.

4 Chaclaže' neze tole naquen' cheyala' soalen' xo'ollen' sin chi gapple do'la' na' gonelene' ca' bene' zaca'.

5 Bitw gonle can' cheson bene' bi zjanombi'e Diosen', con chesezoalene' no'olen' contze yesone' can' chzelaže' lažda'ogaquen'.

⁶ Ne tole bitw gonle da' bi cheyała' gonle na' siye' bene' lježle na' soalenle no no'ol che'. Ba be'czto' diža' bosniset'o' le'e can' gon Xancho Diosen' cont yesezaca'zi'chgua bene' cheson bite'tez da' xinjen' zjanac ca'.

⁷ Diosen' gwleje' chio' cont gaccho bene' laždao' xilaže', gague cont goncho bi da' xinj da' zjanac ca'.

⁸ Da'n'an' note'tez le'e še bi chzenagle che da' qui ba bzejni'ito' le'e, gague xtiža' benachen' chzoale ca'ale, san Diosa' chzoale ca'ale. Len' bene' chio' Spiritw chen' na' Spiriton' naquen laždao' xilaže'.

⁹ Bitw chyažjen gwzoja' le'e can' cheyała' gaque ljež chio' chejnilaže'cho Jesucriston'. Dios nan' ba bsedde' le'e cont chaque lježle tole yetole.

¹⁰ Na' da' li ba chaquele yogo' bene' lježcho ca' nita' doxen Macedonian'. Na' chata'yoeto' le'e bene' migw, le gaquech legaque'.

¹¹ To tole le yeyiljwlaže' bi žin gonle cont soa cuezle binlo can' nonto' mandadw na' bitw tale gwgüia na'le bi cheson bene' yoble.

¹² Le gon can' ba gwnia' cont bene' bi zjanaque' txen len chio' yesache'ede' chonle güen, na' lecze cont bibi gac falt še bi dan' chyažj chchinele.

Can' gac cate' yid Criston' da' yoble

¹³ Bene' migw, chaclaže'to' nezele can' yesac che bene' gosejnilaže' Jesucriston' na' ba gosate'. Chaclaže'to' nezelelen cont bi yegüine'le ca cheson bene' bi nita' lez šjasyezoe' len Jesucriston'.

¹⁴ Nezecho gosot bene' Jesús'en' na' bebane' ladjo bene' guat ca'. Lecze nezecho Diosen' gone' cont yid Jesús'en' da' yoble nche'e bene' ca' ba gosat con bene' gosejnilaže' le'.

¹⁵ Na' diža' nga chzeneto' le'e naquen dan' non Xancho Jesús'en' mandadw gwzeneto'. Chio' mbancho na'a chejnilaže'chone', še ne' mbancho cate' yide' da' yoble, bitw nacho yobch yežagchone' cl'el ca' bene' ca' ba gosat.

¹⁶ Na' ca nac Xancho Jesús'en', cuine' yetje' le'e yaban', na' ne' zizje gone' mandaw yesyeban bene' guaten', na' to angl blaona' ne', na' yenecho cuež trompeta che Diosen'. Nach bene' ca' ba gosat bene' gosejnilaže' Criston', legaque' zgua'tec yesyebane' ladjo bene' guaten'.

¹⁷ Na' ca yeyoža', chio' chejnilaže'chone' še ne' mbancho yežlio nga, gon Diosen' cont yeyepcho txen len legaque' le'e yaban' to lo' bejw na' yežagcho Xancho Jesús'en' le'e yaban'. Nach šjayzoacho len le' toli tocaņe.

¹⁸ Da'n'an' le gon chačh laže' lježle tole yetole güe'le diža' can' gaca'.

5

¹⁻² Bene' migw, bitw chyažjen gwzoja' cont gwzenda' le'e bi ža bi hor yid Xancho Jesús'en' yeto. Nezele con yalzelaže'le žin ža žin hor can' chžin bene' gwban bene' chda šeže'le.

³ Na' šlac chesena bene': "Mba zoacho, bibi chac checho", cate' concze žin ža yesebiaje'e. Can' chac che no'ole cate' yalzelaže' chaque' bes che yela' san, ca'czen' zjajalzelaže' yesebiayi' bene' ca' bi chesejnilaže'ne'. Bitw gac yosoxnje'.

⁴ Perw chio' bene' migw, bi nchole yichjlažda'ochon', da'n'an' bitw gac checho can' chac che bene' chzenyal gwbanna' le'.

⁵ Diosen' ba bzejni'ide' chio' nombia'chone' na' be'ni' chen' ba chsenin' len chio'; da'n'an' bitw nchole yichjlažda'ochon'.

⁶ Cheyała' gonyane'cho xbab naquen' chaclaže' Diosen' goncho na' nabia' cuincho goncho can' chazlaže'na'.

⁷ Bene' ca' cbi chosozenag che Diosen' zjazaca'lebe' ca bene' zjantas na' ca bene' chesezože.

⁸ Perw ba bzejni'i Diosen' chio' cont bi goncho can' chesone'na'. Da'nan' cheyała' năbia' cuincho goncho can' chazlažen'. Cheyała' šejnilaže'cho Diosen' na' gague lježcho na' yebecho dan' nezecho šjayzoacho len Diosen'. Še goncho yogo' da' ca' gaccho ca soldadw ben' nyaze' to de ya da' chcue'ejen le' cont bibi chac che' cate' chdile' len bene'.

⁹ Gague gwlej Diosen' chio' cont saca'zi'cho che xtoła'chon'. Gwleje' chio' cont šejnilaže'cho Xancho Jesucriston' na' šjayzoacho len le'.

¹⁰ Na' Jesucriston' bnežjw cuine' neche chio' cate' gosot bene' le' cont šjayzoacho len le' la'czla' še mbancho o še ba gotcho cate' yide' da' yoble.

¹¹ Da'nan' le gonch can' ba chonle, le gon chač laže' lježle tole yetole na' le gaclench lježle cont soačhačhle šejnilaže'le Jesucriston'.

Pablon' bzejni'ide' bene' chesejnlaže' Jesucriston' can' cheyała' yesone'

¹² Chata'yoeto' le'e bene' migw, gapple bala'aŋ bene' ca' cheson xšin Xancho Jesucriston' chosogüia chesene'e le'e na' chosozejni'ide' le'e naquen' cheyała' soa cuezle.

¹³ Gapchgualne' bala'aŋ na' gaguechgüele legaque' dan' chesone' xšin Diosen' do laže'. Na' le soa binlo len lježle tole yetole.

¹⁴ Ca'cze bene' migw, le tile bene' bi chesaclaže' yeson žin, le gon chač laže' bene' chesacde' zdebe chosozenague' che Jesucriston', na' le gaclen bene' biŋa' yesejni'ide' naquen' cheyała' yesone'. Le soa le gap yela' chxenlaže' len yogo'loł bene'.

¹⁵ Še bi da' mal cheson bene' len le'e, le gon byen bi yoži'ile da' mal len legaque'. Le yeyiljwlaže' naclen' gonle güen len lježle tole yetole na' len note'tez bene'.

¹⁶ Do tiemp le yebe.

¹⁷ Le soateze le soa le yol güiž Diosen'.

¹⁸ Le güe' yela' choxcen che Diosen' bite'tez da' chac chele, le da'nan' chaclaže' gon chio' chejnlaže'cho Cristo Jesús'en'.

¹⁹ Bitw gwžonle gon Spiritw che Diosen' can' chaclažen' gonen len le'e o len bene' yoble.

²⁰ Bi gwzoale ca'ale dan' chesena bene' cheso'e diža' dan' ba gož Diosen' legaque'.

²¹ Na' le gonyane' xbab che yogo'loł diža' da' cheso'e cont soale gwzenagle che da' nac güen.

²² Na' bitw gonle bite'tez da' nac da' mal.

²³ Diosen' chone' ca chzoa chbezcho binlo len xbab dan' yo'o lo' yichjlažda'ochon'. Na' chnabda'ne' gone' cont lažda'olen' gacyanen' xilaže'. Na' lecze gonšque' cont bibi da' mal gonle len yichjlažda'olen' neca len cuerp chelen' cont bibi doła' gapple caten' yid Xancho Jesucriston' yeto.

²⁴ Diosen' ben' ba gwleje' chio' cont nachcho xi'ine' chone' con da' že' gone', na' da'nan' gone' cont gac lažda'ochon' xilaže'.

Pablon' gwnabe' gaclen Diosen' bene' Tesalónican'

²⁵ Bene' migw, le soa le nab gaclen Diosen' neto'.

²⁶ Na' cate' chežagle le gwnopa' na' lježle cont nacbia' chaque lježle.

²⁷ Chona' mandadw gwlable cart nga ga yesene yogo'loł bene' lježcho ca nita' gan' zoalna', le can' chaclaže' Xancho Jesucriston' gonle.

²⁸ Na' soateze Xancho Jesucriston' gaclenšque' le'e. Da' na'ze chzoja' na'a.

CART GWCHOPE DAN' BZOJ POSTLW SAN PABLO CHE BEÑE' CA' ŽE' TESALÓNICA

Pablon' bzoje' beñe' Tesalónican' beñe' chesonxen Jesucriston'

¹⁻² Neda' Pablo chzoja' le'e chdop chžagle chonxenle Xancho Jesucriston' Tesalónica na' nacle txen len le' na' len Xacho Diosen'. Na' neda' len Silvano na' Timoteo chnabto' lao Xacho Diosen' na' lao Xancho Jesucriston' yesaclene' le'e na' yesone' cont soa cuezle binlo len xbab dan' yo'o lo' yichjlažda' olen'.

Cate' yid Criston' da' yoble Diosen' gwnežjue' da' yesezaca'zi' beñe' bi chosozenag che'

³ Beñe' migw, neto' cheyała' soateze soato' güe'to' yela' choxclen che Diosen' che dan' chonlen'. Cheyała' gonto' ca' da' zejle chejnlaže'chle Diosen' na' zej chaquech lježle.

⁴⁻⁵ Da'nan' chbeto' choe'to' xtiza'len' len yezica'chle beñe' ba gwlej Diosen' na' chesežague' chesonxene' Jesucriston' ga yoble. Choe'to' diža' ca güen chonle dan' chyo chchejele chejnlaže'le Jesucriston' la'czła' da' zan da' chac chele na' chosoči chososaca' beñe' le'e. Da'nan' nezecho Diosen' zejcze' to licha da' nchogbi'e zaca'le par yeyejle yaban' gan' zoe' chnabi'e.

⁶ Na' Diosen' zeje' to licha da' gone' cont yesezaca'zi' beñe' ca' chosoči chososaque' le'e.

⁷ Na' lecze zeje' to licha da' gwcueze' yogo'te dan' chy chzaca'chon'. Gwcuezen' cate' le'echo yetj Xancho Jesús'en' le'e yaban' len angl che' ca' beñe' zjanse'e yela' guac che'. Yetje' nyechjde' yi' bel.

⁸ Na' gwnežjue' da' yesezaca'zi' beñe' ca' bi zjanombi'e Diosen', na' neca chosozenague' che diža' güen dan' chzejni'in che Xancho Jesucriston'.

⁹ Legaque' yesezaca'zi' e toli tocañe. Gwbat šjasyenite' len Xancho Jesucriston' ben' nac beñe' zaca' juisyw na' nape' yela' guac xen.

¹⁰ Cate' žin žan' yid Jesucriston' da' yoble, chio' chejnlaže'chone' na' naccho lo' ne'e gwlo'echo naque' beñe' zaca' juisyw na' yebanecho catec beñe' güen naque'. Nacto' txen len le'e da' ba chejle'le che diža' dan' be'lento' le'e.

¹¹ Da'nan' zoatez zoato' chnabeto' Dios'a' gaclene' le'e gonle güen cont yebede' ba gwleje' le'e par nacle xi'ine'. Na' chnabeto'ne' gaclene' le'e len yela' guac chen' cont yeyož gonle yogo' da' güen da' ba gwchoglaole gonle na' len bica'chle dan' che'nele gonle dan' chejnlaže'lene'.

¹² Chnabto' gonle cont Xancho Jesucriston' gacxene', na' le' gone' ga gacxenle txen len le', le Dios chechon' na' Xancho Jesucriston' nita'cze' chesaclene' le'e.

2

Choj ben' gonchgua güedenag len Diosen'

¹ Beñe' migw, da' yoble chnia' le'e ca gac cate' yid Xancho Jesucriston' yeto, yotobe' chio' šjazyoacho txen len le'.

² Chneyoeto' le'e bitw gaczejlaže'le o žeble še no yid yedezejni'ide' le'e, ne' Spiritw che Diosen' žan ba bžin ža yid Jesucriston' da' yoble. Na' neca gaczejlaže'le še bi da' yenele o še la' no cart güenlaže' da' chesena beñe' gwseła' neto', žan ba bžin ža yid Jesucriston'.

³ Bi güe'le latje no siye' le'e še bi yesene' o še bi da' yesone'. Le cate' za' yid Xancho Jesúsen' da' yoble, bene' zan yesase' yesyedabague' Diosen'. Lecze cana' choj to bene' blao bene' gonchgüe' güedenag len Diosen'. Benan' ba naquen yeyeje' lo yi' gabilen'.

⁴ Gaque' bene' ya'laže' na' gue'ede' Diosen' na' lecze ca' gue'ede' bite'tezech da' chesejnilaže' bene'. Na' cui'e lo' yodao' blao gan' chesonxene' Diosen', gon cuine' ca Dios cont yesonxen bene' le'.

⁵ ¿Bi za'laže'le cate' gwzoa' len le'e bzejni'ida' le'e can' gac cate' yid Jesucriston' da' yoble?

⁶ Na' na'a nezclez bi dan' chžon choj bene' blao ben' gonchgua güedenag len Diosen', perw cate' ba bžin ža bžin hor, cana' choje'.

⁷ Ba nita' bene' chesonchgüe' güedenag len Diosen' na'a, perw ne' ngaše' can' chesone'. Na' gwžin ža cate' bich soa dan' gwžon yesyedabaga'chgüe' Diosen'.

⁸ Cana'chen' choj bene' blaon' ben' gonchgua güedenag len Diosen'. Nach Xancho Jesúsen' yide' nyechjhgüede' be'ni', na' cate' bene' blaon' le'ede' le' nach Xancho' güe'e diža' na' ši'en goten le'. Can' gone' yonitlagüe'ne'.

⁹ Na' cate' choj bene' blaon' ben' gonchgua güedenag len Diosen', Satanás dan' chnabia' da' xigüe' ca' gonen cont gapchgüe' yela' guac, na' gone' da' yesyebane bene' contze gonlede' legaque'.

¹⁰ Yogo'te da' mal gone' gonlede' bene' ba naquen yesebiaye'e toli tocaņe. Yesebiaye'e da' bi chesejle'e diža' lin', le lenna' zaca' yesejle'e cont gata' yela' mban čegaque' toli tocaņe.

¹¹ Na' da'nan' Diosen' güe'e latje yeseziye'e legaque' cont yosozenague' diža' güenlaže'.

¹² Nach yesezaca'zi'e toli tocaņe da' bitw gosejle'e diža' li čhe Xancho' san besyebede' da' malen'.

Diosen' chbeje' bene' na' chone' cont gac šjasyenite' len le' toli tocaņe

¹³ Bene' migw, chaque Xancho Jesucriston' le'e. Na' neto' cheyala' soatez soato' güe'to' yela' choxclen čhe Diosen' da' gwleje' le'e cate' bina' xe yežlion' cont šjayzoale len le'. Na' cate' gwzolao chejle'le diža' li čhe Diosen' nach gwsele' Spiritw čhen' chonen cont nacle bene' laždao' xilaže'.

¹⁴ Neče da'nan' gwlej Diosen' le'e, na' dan' gwyejle'le diža' güen čhe Jesucriston' da' be'lento' le'e, žin ža gon Diosen' cont soale mba juisyw can' zoa Xancho Jesucriston'.

¹⁵ Da'nan' bene' migw, le soa čačh le gwzenag do yichj do laže'le čhe dan' bzejni'ito' le'e, diža' dan' ba be'lento' le'e na' dan' ba bzojto'.

¹⁶⁻¹⁷ Xacho Diosen' chacde' chio'. Gague da' te čhe dan' bene' cont beyone'xenlaže'cho, na' zoacho lez gonche' güen len chio', le nži'ilaže'de' chio'. Na' chnabda' cuin Xancho Jesucriston' len Xacho Diosen' yesone' čačh laže'le na' yesaclenšque' le'e cont yogo' da' gonle na' diža' da' güe'le yesaquen güen.

3

Gwnab Pablon' yosol güiže' Diosen' gaclene' le' len bene' lježe' ca'

¹ Na'a bene' migw, yol güižšcale Diosen' gaclene' neto' cont yob šjadixjue'eto' čhe Xancho Jesucriston' doxen, na' cont bene' yezica'chle yesebede' yosozenague' can' ba ben le'e.

² Lecze nabšquele Diosen' yosle' neto' lo na' bene' mal bene' cheson clele, le gague yogo' bene' chesejnilaže' Jesucriston'.

³ Xancho Jesucriston' zoatez zoe' chone' can' že' gone', na' gaclene' le'e cont soachachle šejnilaže'lene'. Na' lecze gwcuas gwcue'eje' le'e len da' malen'.

⁴ Na' nezeto' chaclencze' le'e cont chonle da' ba bento' mandadw gonle na' cont nita'czle gonlen.

⁵ Chnabda' Xancho Jesucriston' gone' cont nezele catec chaque Diosen' chio'. Na' lecze chnabda'ne' gone' cont gwyo gwchejle len da' chyí chzaca'le can' gwzoa Criston' byo bcheje' len da' gwdi gwxaque'.

Pablon' bene' mandadw yesone' žin

⁶ Bene' migw, chzeneto' le'e can' chon Xancho Jesucriston' mandadw, bi cheyała' gonle txen len note'tez bene' lježchon' bene' bi chesaclaže' yesone' žin, le bi chesone' ca nac da' bsed blo'eto' legaque'.

⁷ Neto' benczto' žin cate' gwzoato' len le'e, na' da'nan' nezele can' cheyała' gonle.

⁸ Cuent cheto' güe'ej gwdagwto'. Bžaglaoto' bento' žin do ža do yel cont güe'ej gwdagwto', na' bi gwnabeto' le'e da' byažje bchineto'.

⁹ Zaca'czto' ša gwnabeto' le'e da' ye'ej gagwto' cate' bento' xšin Diosen' gan' zoalen', perw bi goclaže'to' gonto' ca', le goclaže'to' gwlo'eto' le'e ca cheyała' gonle.

¹⁰ Caten' gwzoato' len le'e bžiato' bia' gwnato': "Še no bi gon žin, bi cheyała' gagüe'."

¹¹ Perw na' ba beneto' diža' chesene' baľle bitw bi žin chonle, con chdale chacle diža'.

¹² Na' še nole chonle ca', chata'yoeda' le'e na' chona' mandadw gonle can' ža Xancho Jesucriston', bich tale ca', san le yezolaošaze le yeyon žin cont gac si'le da' ye'ej gagwle.

¹³ Na' le'e bene' migw, bitw yeche'ele gonle da' güen.

¹⁴ Na' še no bene' chon güedenag len dan' ba bzojto' nga, le gon xbab non' chon ca' na' bich gonle txen len le' cont gacde' zto' che dan' chone'na'.

¹⁵ Perw bitw gue'elne', san gwzejni'ilne' diža' šagüe', le naque' bene' lježcho.

Pablon' gwnabde' Diosen' gaclene' bene' Tesalónica

¹⁶ Na' chnabda' Xancho Jesucriston' ben' chone' cont soa cuezcho binlo len xbab da' yo'o lo' yichjlažda'ochon', gonšcacze' cont soa cuezle ca' yogo'te ža bite'teze da' chac. Len' soašcacze' len yogo'le.

¹⁷ Na' cuincza' neda' Pablo chzoja' late' dao' le'e cart nga chguapa' le'e tiox. Can' choncza' len yogo' cart dan' chsel'a' cont nacbia' nedan' chselan', le ba nombia'le letr chian' can' chzojan'.

¹⁸ Xancho Jesucriston' gaclenšque' yogo'le. Da' na'zen' chzoja' na'a.

CART NECHW DAN' BZOJ POSTLW SAN PABLO CHE TIMOTEO

Pablo chzoje' cart che Timoteo

¹ Neda' Pablo chzoja' cart nga chio' le' Timoteo. Naca' postlw che Jesucriston', le Diosen' len Xancho Jesucriston' gosone' mandadw chona' xšinen'. Dios nan' non'e' chio' yela' mban toli tocan'e na' Xancho Jesucriston' chone' cont zoacho lez šjayzoacho len le' toli tocan'e.

² Chzoja' le' Timoteo, le naco' ca dogualje xi'ina' da' bzejni'ida' le' cont chejnilažo' Criston'. Na' chnablaža' nita' Xacho Diosen' len Xancho Jesucriston' yesyeyaše' yesyeži'ilaže'de' le' na' yesaclene' le', na' yesone' cont soa cuezo' binlo len xbab da' yo'o lo' yichjlažda'oguan'.

Nita' bene' chosozejni'ide' diža' güenlaže'

³⁻⁴ Caten' gwza'a Efeson' gwy'a Macedonian' gwneyoeda' le' cont bega'ano' Efeson' neche nita' bal' bene' chosozejni'ide' bene' Efeso ca' diža' güenlaže'. Con bi cheyož yedo chesonchgüe' xbab che diaža che da' xoxxta'ocho ca' na' cheso'e zan cuent che legaque'. Na' da' yoble chneyoeda' le' gono' mandadw bich yosozejni'ide' che da' ca'. Dan' chosozejni'ide' chonen ga yesacžejlaže' bene', na' bi chaclenen yesone' dan' gwlo'o Diosen' lo' na'cho gon chio' ba chejle'cho xtižen'.

⁵ Na' gono' mandadw yesone' güen, le chaclaža' yesenite' yesaque lježe'. Na' cont bibi gwžon yesaque lježe', cheyała' yesaque' bene' laždao' xilaže', cheyała' yesone' dan' nezecho naquen güen yogo' ni'a, na' cheyała' yesejli'e diža' li che Diosen' do yichj do laže'.

⁶ Bene' ca' chosozejni'ide' diža' güenlaže' bi chesone' ca', na' da'nana' cheso'e diža' da' bibi zaca'.

⁷ La'czla' chesaclaže' yosozejni'ide' ley dan' bzoj Moisésen', bi chesejni'ide' dižan' cheso'e na' neca chesejni'ide' da' ca' chesene' cheyała' goncho.

⁸ Nezecho ley nan' naquen güen con še gwčhinchon can' cheyała' gwčhinchon.

⁹ Na' lecze nezecho ley nan' gague chosbagan' bene' cheson da' güen, san chosbagan' bene' cheson da' mal na' bene' cheson güedenag len dan' nonen mandadw goncho. Chosbagan' bene' bi chosozenag che Diosen', na' bene' chesonteze' da' malen', na' bene' bi chesape' Diosen' bala'an neca chesonxene'ne', na' bene' chesot no xaxna'gaque', na' len nochle bene' güet bene'.

¹⁰ Lecze chosbagan' bene' chesata'lene' no'ole bi nac xo'olgaque' o bene' byo bi nac bene' chegaque', na' no bene' byo bene' chesata'lenteze' ljež bene' byoe' gualaz no'ole, na' bene' cheseche'xoxje' bene' yoble cont chesote' legaque' chesezi'e mechw, na' bene' ca' chesonlaže', na' bene' ca' cheso'e diža' güenlaže' lao justis, na' note'teze bene' cheson da' zej clele len diža' güen da' ba bzejni'i Diosen' chio'.

¹¹ Na' diža' güen da' ba bzejni'i Diosen' chio' zaca'chguan, na' Dios ben' zoa mba juisyw, le'na' ba gwlo'en lo' na' chyixjue'edan' bene'.

Pablon' cho'e yela' choxclen che Diosen' na' che Jesucriston'

¹² Choa' yela' choxclen che Xancho Jesucriston' ben' chon cont chac chyixjue'eda' xtiže'na'. Choxclenen' chacde' gona' xšinen' can' chazlaže' na' da'nana' gwleje'nda' gonan'.

¹³ Gwleje' neda' la'czla' cana' bia' diža' bya' che' na' bgue'eda'ne' na' bchi bsaca' bene' ca' chesonxene' le'. Na' la'czla' bena' ca', Diosen' beyaše' beži'ilaže'de' neda', le biña' šejnilaža'ne' ca hora' na' biña' gacbe'eda' chona' clele.

¹⁴ Nach Xancho Jesucriston' nži'ilaže'chgüede' neda' na' goclene'nda' cont gwejnilaža'ne', na' na'a chacda'ne' na' lecze chacda' yezica'chle bene'.

¹⁵ Da' nga naquen to diža' li da' zaca' šejle'cho: Jesucriston' bide' yežlio nga cont beque'e xtola' chio' bene' güen da' xinj. Na' chacda' neda' naca' bene' la'zelagüe gwyanch xtola'.

¹⁶ Na' la'czla' naca' bene' la'zelagüe gwyanch xtola', Jesucriston' beyaše'de' neda' na' bezi'xene' chia' cont blo'e napchgüe' yela' chxenlaže'. Bene' ca' cont bene' za' za'ac yesacbe'ede' nape' yela' chxenlaže' xen na' yesejnilaže'ne' na' gata' yela' mban chegaque' toli tocañe.

¹⁷ Cheyala' gonxencho Diosen' ben' nac Rey chechon' toli tocañe. Gague da' te chen'. Zoacze' la'czla' bi chle'echone' na' naque' la'zelagüe bene' sina'. Totc le' zaque' gonxencho na' gapchone' bala'añ toli tocañe. Na' can' gonšcaczcho.

¹⁸ Xi'ina' Timoteo, ben xbab che dižan' gosoe' bene' ca' bosozende' le' can' gwna Diosen' chio' cana'. Na' can' ba gose'e le' gono' xšin Diosen', lecze can' chneyoeda' le' gonon' do yichj do lažo', la'czla' še gacdo' zdebe gonon'. Soachacho' šejnilažo' Diosen', na' soatezo' gono' cont nezdo' lo' laždaguo' bibi da' mal chono'.

¹⁹ Bał bene' chesonteze' da' malen' la'czla' zjanęztede' lo' lažda'ogüe' bi cheyala' yesonen', na' da'nana' ba gosebejyichje' bich chesejnilaže' Diosen'.

²⁰ Can' goc che Himeneo na' che Alejandro. Da'nana' ba gwñabda' Diosen' yesaque' lo' na' Satanás dan' chnabia' da' xigüe' ca', na' gonen con ca chaclažen' len legaque' cont yesacbe'ede' bi cheyala' yesenye'e che Diosen'.

2

Dan' cheyala' nabecho Diosen' gone'

¹ Na' dan' nac da' žialao xen gon chio' chonxencho Diosen': cheyala' nabecho Diosen' gone' bi dan' chyažje chio' lente dan' cheseyažje yogo'lol bene', na' nabechone' gaclene' yogo'lol bene', na' güe'cho yela' choxclen che Diosen' che bi da' güen da' chesac che yogüe'.

² Cheyala' nabecho Diosen' gaclene' bene' gwnabia' ca', no rey, no gobernador na' nochle bene' ca' chesenabia', cont soa cuzcho binlo' na' bibi gwžon gonxencho Diosen', neca gata' da' gwžon goncho bichle da' cheyala' goncho.

³ Naquen güen nabecho Diosen' gaclene' yogüe' na' naquen da' chazlaže' Diosen', Dios ben' nonę' chio' yela' mban toli tocañe.

⁴ Le chaclaže' gwnežjue' yela' mban toli tocañe che yogo'lol bene' na' chaclaže' yesejni'ide' diža' li che'.

⁵ Toz Diosen' zoa bene' zaca' yesonxen yogo'lol bene', na' lecze toz ben' chozoe' chio' binlo' len Diosen', le'na' Jesucriston' ben' golje benach.

⁶ Jesucristw nan' bnežjw cuine' gote' neče da' mal da' goson yogo'lol benach, na' cate' bžin ža Diosen' bžie' bia', cana' bene' cont gosenęze benachen' che'.

⁷ Na' Diosen' gwleje' neda' cont naca' postlw che' na' cont chyixjue'eda' xtiže'. Choa' diža' li, bi chonlaža', le naca' Criston' txen, gwleje'nda' cont chzejni'ida' bene' ca' bi zjanac bene' Israel diža' li che' cont yesejnilaže'ne'.

⁸ Na' dan' che'nda' gac gate'teze chesedop chesežague' chesonxene' Diosen', chaclaža' beñe' ca' yosoł güiže' Diosen' yesaque' beñe' laždao' xilaže' cont yeselis na'gaquen' laogüen' sin cbi yeseže'e beñe' o yosošašlene' beñe'.

⁹ Na' ca' nac no'ol ca' chesonxen Jesucriston', bi cheyała' yesebec yichjgaque' še nite' xdanchgua, še yosoguale' bga o ret de oro o de perlas dan' naquen da' zaque', še nac yiša' yichjen' xdanchgua, na' še nac xagaque' da' chzaca' la'ay.

¹⁰ San cheyała' yesebec yichjgaque' yesone' da' güen ca' chaclaže' Diosen' yeson yogo' beñe' chesejnilaže'ne'.

¹¹ Na' no'ol ca' lecze cheyała' nite' šize yosozenague' che beñe' ca' chososed chosolo'ede' xtiža' Diosen', na' yesone' con da' yese'ene'.

¹² Neda' bi chona' latje cont no'ol ca' yosozejni'ide' beñe' byo latje lagüe', na' neca chona' latje yesenabi'e beñe' byo. Cheyała' yesenite' šize,

¹³ le cate' Diosen' bene' beñačen' zgua'tec bene' Adánna' na' gwdechle bene' Evan'.

¹⁴ Na' cate' Satanás dan' chnabia' da' xigüe' ca' gwxoayaguen beñe' nechw ca', gague gwxoayaguen Adánna', san gwxoayaguen Evan' cont bene' dan' gwna Diosen' bi gone', na' da'nán' beyaque' beñe' güen da' xinj.

¹⁵ Perw na' la'czła' no'ol ca' chesežaglagüe' chesezan xi'ingaque', žin ža šjasyenite' len Diosen' še zjanite' chesejnilaže'ne' na' še zjanite' chesacde'ne' na' chesacde' yezica'chle beñe', na' še zjanite' chesone' can' chazlaže' Diosen' len yela' sina' da' ba bnežjue' legaque'.

3

Can' yeson beñe' ca' yosogüia yesene'e yezica'chle beñe' chesonxene' Diosen'

¹ De to diža' da' zaca' šejle'cho da' žan: "Beñe' chesaclaže' yosogüia yesene'e yezica'chle beñe' chesonxene' Diosen', chesaclaže' yesone' to da' güen, še ca'."

² Na' beñe' gwłane' gone' žin dan' nac ca' cheyała' soateze' gone' da' güen yogo' ža sin cbi gone' da' zaca' tiłchone'. Cheyała' soa toz no'ol che', na' cheyała' gague' beñe' yo'o xbab, na' gague' beñe' chnabia' cuine' chone' da' güen, na' gague' beñe' chon da' zej tołi cont beñe' yoble yesape' le' bala'an. Cheyała' yebede' gwlebe' beñe' liže', na' cheyała' gague' beñe' chac chzejni'ide' xtiža' Diosen' binlo.

³ Beñe' chžože bi gac gwłane' žinna'. Bi cheyała' gague' beñe' yolao chdile chšaše'. Cheyała' gague' beñe' šagüe' beñe' chon güen len yezica'chle beñe', na' bi cheyała' gague' beñe' chon znia, neca selaže' chgüe' gone' gan mechw.

⁴ Na' cheyała' gague' beñe' neze can' gone' cont xi'ine' ca' na' nochle beñe' nita' liže' yosozenague' che' na' yesape' le' bala'an.

⁵ Le še bi neзде' nac gone' cont xi'ine' ca' yosozenagbe' che' na' yesapbe' le' bala'an, bi gac gone' cont beñe' chesedop chesežag chesonxene' Diosen' yosozenague' che'.

⁶ Bi cuejle beñe' za' chzolao chejnilaže' Diosen' cont gwgüia ne'e beñe' ca' chesonxene' Diosen', le beñe' coben' xož gonxen cuine' na' tena' Diosen' güe'e le' castigw še gone' ca'. Can' goc che Satanásen' cani'te cate' benxen cuinen na' Diosen' bebejen' gan' zoe'na'.

⁷ Na' beñe' cuejle cheyała' soe' gone' cont beñe' ca' bi zjanac txen yesenezde' chone' güen, le še gone' da' malen' yesene' beñe' che' na' Satanásen' co'oyelan' le' gonche' da' malen'.

Beñe' ca' yeson žin bixjw

8 Na' lecze cate' cuejle bene' yeson žin bixjw da' chata' len bene' ca' chesonxene' Diosen', le cuej bene' cheson güen cont gapcho legaue' bala'an. Lecze cheyala' yesaue' bene' chesoe' diža' li da' šejle'cho, bene' bi zjayolagüe' chesezožde', na' bene' bi yesezelaže' yeseni'e che xšin Diosen' dan' yesone' na'.

9 Cheyala' yesaue' bene' chesejle'e cayanen' ba bzejni'i Diosen' chio' che Jesucriston' dan' nono gwneze cana', na' bene' cheson da' güen cont yesenezde' lo' yichjlažda'ogüe' chesone' can' chazlaže' Diosen'.

10 Na' cate' za' cuejle bene' ca' yeson žin bixjwna', le na' yane' can' chesonen', na' še gata'bia' chesonen' binlo bibi chesechoe', nachen' cuejle legaue'.

11 Na' no'ol ca' yeson xšin Diosen' lecze cheyala' yesone' cont gapchone' bala'an. Bi cuejle no'ole chnie' che bene' o no'ole yolagüe' sožde', san cuejle no'ol ca' yesenite' yesone' can' chazlaže' Diosen'.

12 Na' cate' cuejle bene' byo yeson žin bixjw da' chata' ladjo bene' ca' chesonxene' Diosen', le cuej bene' zoa toze no'ol che', na' bene' chon cont bi' che' ca' na' nochle bene' nita' liže' chosozenague' che'.

13 Le še bene' ca' cheson žin bixjon' yesone' binlo dan' yo'o lo' na'gaue' yesone', nach yesejnilaže'chgüe' Jesucriston' sin cbi yesežebe', na' yezica'chle bene' yesape' legaue' bala'an.

Da' chejni'icho che Diosen' dan' nono gwneze cana'

14 Chzoja' le' da' quinga da' cheyala' gonle la'czla' zoa' lez yob yida' gan' zon',

15 cont še šeda' ba nezdō' nac cheyala' yeson bene' ca' zjanac diaža che Diosen', le chio' chdop chžagcho chonxencho Jesucriston' naccho diaža che Diosen' ben' zoa toli' tocañe. Na' chio' chdop chžagcho chonxenchone' yo'o lo' na'cho choncho cont chesombia' bene' diža' li che Diosen'.

16 Da' licze da' zaca'chgua dan' ba bzejni'i Diosen' chio'. Cana' nono gwneze da' quinga dan' bzejni'ide' chio' che Jesucriston', žan:

Diosen' bide' golje' benach,

na' Spiritw che Diosen' blo'en naque' bene' güen juisyw.

Na' bene' ca' zjanac angl che Diosen' bedesene'e le'.

Na' bžin ža Diosen' bene' cont beyepe' yaba gan' yo'ochgua be'ni'.

Na' bene' ca' cheso'e xtižen' ba goseyixjue'eden' len bene' že' nación zito',

na' zan bene' že' lo' yežlion' ba chesejle'e che'.

4

Žin ža bal' bene' yesebejyichje' diža' li che Diosen'

1 Na' Spiritw che Diosen' ba ben' diža' li cont šejni'icho žin ža cate' bal' bene' yesebejyichje' diža' li che Diosen' dan' chejle'cho na' yesejle'e che bi da' yeson da' xigüe' ca' cont yesexōayaguen legaue'.

2 Da' xigüe' ca' yeson cont nita' bene' yosozejni'ide' diža' güenlaže' da' siyen' bene', na' bene' ca' yosozejni'ide' diža' güenlažen' bibi yesacde' lo' yichjlažda'ogüe' caten' yeseziye'e bene'.

3 Yosožone' yosožagna' bene' na' yosožone' ye'ej gagwcho bal' yela' guagw, la'czla' Diosen' bene' cont zjade yela' guagw ca' cont chio' chonxencho Criston' na' nombia'cho diža' li chen' gagwchon na' güe'cho yela' choxclen che'.

4 Yogo' dan' ben Diosen' naquen güen na' bi naquen da' gue'echo, con še güe'cho yela' choxclen che' caten' gagwchon.

5 Na' nezecho guac gagwcho bite'teze yela' guagw, le ba gwna Diosen' naquen güen, na' güe'cho yela' choxclen che' cate' gagwchon.

Can' gon Timoteo xšin Diosen'

6 Ca nac bene' ljež chio' chonxencho Jesucriston', cheyała' gwzejni'ido' legaque' da' quinga ba gwnia' le' cont gacleno' legaque' can' chazlaže' Jesucriston', le gwleje' le' cont gwzejni'ido' bene'. Lecz gonon chachlažo' še gwzejni'ido' bene' xtiža' Diosen' dan' chejle'cho, le naquen to diža' güen, na' ba bzenago' chen do yichj do lažo'.

7 Bi gwzenago' che diža' güenlaže' dan' chesaljaže' bene' bi chesonxene' Diosen'. Ben byen soaczo' gono' can' chazlaže' Diosen'.

8 Nezecho cate' chda ni'a na'cho chaclenen cuerp chechon' late'. Perw na' cate' choncho can' chazlaže' Diosen', chaclenchen chio' cont zoa chbezcho binlo na'a na' lecz ca' cate' šjayzoacho len le' toli tocané.

9 Can' ža to diža' dan' zaca' šejle'cho na' dan' zaca' gwzenagcho chen do yichj do laže'cho.

10 Na' cont choncho can' chazlaže' Diosen', da'nan' chonchguacho xšinen' na' chyo chchejlaže'cho cate' chzi'diža' bene' chio', le nezecho Diosen' zoe' toli tocané na' zoacho lez gone' güen len chio'. Le' chaclaže' gwnežjue' yela' mban toli tocané che yogo' benač, na' can' nacczen gone' len bene' chesejnilaže' Jesucriston'.

11 Da'nan' bzejni'i bene' da' ca' ba gwnian' na' ben mandadw yosozenague' che yogo'czen.

12 Bi go'o latje yosozoa bene' le' šla'ale lagüe da' naco' bene' xcuide'. Len xtižo' na' len da' chono' ben güen cont yogo' bene' chesejnilaže' Criston' yesape' le' bala'an. Len xtižo' na' len da' chono' blo'e legaque' ca cheyała' yesacde' Diosen' na' bene' lježgaque', ca cheyała' yesenita'chache' yesejnilaže'ne' na' ca cheyała' yesaque' bene' laždao' xilaže'.

13 Na' na'a šlac bi'na' yida' da' yoble, gwlec yichjo' gwlabo' Xtiža' Diosen' dan' nyojen len bene' ca' chesedop chesežag chesonxene' Jesucriston'. Na' gwneyoede' yosozenague' chen na' bzejni'ide' bi zejen.

14 Bi gatlažo' dan' gwlo'o Diosen' lo nao' gono' caten' gosexoa na' bene' blao ca' yichjon', bene' ca' chosogüia chesene'e ljež chio' chonxencho Diosen', bosozende' le' gwlej Diosen' gono' xšinen'.

15 Cheyała' cuec yichjo' do yichj do lažo' gono' da' ca' gwlej Diosen' le' gono' cont yogo' bene' yesele'ede' zejcho' chono' da' güen.

16 Na' gwsaco' can' soa cuezo' cont soačhačo' gono' con can' chazlaže' Diosen' na' soačhačo' gwzejni'ido' bene' xtiža' Diosen' con can' naquen. Ben ca' cont gaclenen le' na' lecze gaclenen bene' ca' chosozenag xtižon' cont šjayzoalenle Diosen' cate' žin ža.

5

Can' cheyała' gon Timoteo len yezica'chle bene' chesejnilaže' Criston'

1 Še no bene' byo gole chone' bi da' mal, bi tilo'ne', san gwneyoede' cuejyichjen', con ben xbab naque' xao'. Na' še no bene' xcuide' chone' bi da' mal, gwneyoede' cuejyichjen', con ben xbab naque' bene' bišo'.

2 Na' še no no'ol gole chone' bi da' mal, gwneyoede' cuejyichjen', con ben xbab naque' xnao'. Na' še no no'ol xcuide' chone' bi da' mal, gwneyoede' cuejyichjen', con ben xbab naque' bene' zano'. Cheyała' gwsaco' cont gaco' bene' laždao' xilaže' len legaque'.

3 Chio' chdop chžagcho chonxencho Criston' cheyała' gwnežjwcho da' cheseyaže' no'ol ca' ba gosat bene' chegaque' še da' li zjanaque' bene' chyažj chchine.

4 Perw še nita' no xi'ingaque' no xesoagaque', bzejni'ide' legaque' cheyała' yosonežjue' da' cheseyažje' no'ol ca', le no'ol ca' ba bososgole' legaque', na' Diosen' chaclaže' yesone' güen len legaque' cont yosolo'e chesejnilaže'ne'.

5 No'ol ca' nono zoa bene' gwnežjw' legaque' da' cheseyažjde' na' zjanaque' dogualje güezebe, yesenite' lez gaclen Diosen' legaque' na' do ža do yel yesenite' yesenabde'ne' gaclene' legaque'.

6 Perw no'ol güezeb ca' chesacde' yesone' con ca' žan chegaque', len Diosen' yichjlažda'ogaquen' naquen ca' che to bene' ba got la'czla'ne' zjambane'.

7 Ben mandaw' neche bene' ca' chesedop chesežag chesonxene' Jesucriston' yesone' can' žia' nga na' bibi da' mal yesone' da' zaca' no tile' legaque'.

8 Še no bene' bi chaclene' cont gata' da' chyažje bene' zjanac diaža' che', ba bzoe' šla'ale xtiža' Diosen' dan' chejle'cho' chen, na' malech chone' ca' bene' bi chesejnilaže' Jesucriston'. Na' leca da' mal chone' še bi chaclene' bene' lo' yo' o' che'.

9 Quinga nezdo' no no'ol güezeb ca' cheyała' gwchelo' le'e yiš cont bene' ca' chesedop chesežag chesonxene' Jesucriston' yosogüe'ej yosoguagüe'ne' na' yosonežjue' bichle da' cheseyažjde'. Cuejle no'ol gol ca' bene' ba gwde gayon iz, no'ole goc toze bene' che'.

10 Cuejle con no'ol ca' zjaneze bene' ba gosonchgüe' da' güen, ca no da' quinga: še bosgole' bi' che' binlo, še blebe' bene' liže', še goclene' yezica'chle bene' chesonxene' Diosen', še goclene' bene' ca' cheseyi chesezaque', o še ba bene' bite'tezechle da' güen.

11 Bene' ca' chesedop chesežag chesonxene' Jesucriston' bi cheyała' yesego' o' lo' na'gaque' yosogüe'ej yosoguague' no'ol güezeb xcuide' ca'. Le no'ol ca', gwžin ža yesaclaže' yosyošagne'e da' yoble,

12 na' yesape' doła' še yesebejyichje' xšin Criston' dan' gosechebe' yesone'.

13 Na' lecze no'ol güezeb xcuide' ca' bi naquen güen gwco'olaochwne' yese-laže' to to liž bene', cont bi yesaque' bene' xagüed, na' cont bi yesaque' bene' güetob diža'. Bi yeselaže' to to liž bene' yesezi'diže' bi chac, le bi cheyała' yesone' dan' nac ca'.

14 Da'nan' chaclaža' no'ol güezeb xcuide' ca' yosyošagne'e da' yoble na' yesezanche' cont yosyosgole' xi'ingaque' na' yosogüia yesena' ližgaquen' binlo, na' bi yesone' cont bene' ca' chesegue'ede' chio' yesene' chesone' da' mal.

15 Chnia' ca' le nita' bał no'ol güezeb xcuide' ca' ba gosebejyichje' Criston' na' chosozenague' che Satanásen'.

16 Note'tez bene' chejnilaže' Criston', še nita' no'ol güezeb lo' diaža' chegaque', cheyała' yosonežjue'ne' da' yese'ej yesagüe' cont bibi da' zed yesone' len bene' ca' chesedop chesežag chesonxene' Criston'. Nach con no'ol ca' nono zoa yesaclen legaque', legacze' cheyała' yesego' o' lo' na' bene' ca' chesedop chesežag chesonxene' Criston'.

17 Na' ca nac bene' blao ba zjanchoj chosogüia chesene'e bene' ca' chesedop chesežag chesonxene' Criston' to to yež, še chesene'e bene' ca' binlo, da' xen cheyała' yesacxene', na' cheyała' gwnežjwchone' da' yesacbande'. Na' zaca'che' yesacxene' še cheseyixjue'ede' xtiža' Diosen' na' chosozejni'ide' bene' bi zejen.

18 Cheyała' yesacxene' na' gwnežjwchone' da' yesacbande', le nyoj Xtiža' Diosen' žan: "Bitw gwseyjwle cho'a go'n cont ca gagwba' cate' chlej chšošjba' trigon' neche choj xen'." Na' lecz nyojen žan: "Bene' güen žin cheyała' si' laxjue'."

19 Bi gono' cuent cate' no bene' gagw xya che to bene' blao bene' nchoj chgüia chne'e bene' lježe' chesonxene' Criston' še bi zoa yeto bene' o yechope bene' co' da' bali.

20 Na' še da' li ba bene' da' malen', cheyała' tiło'ne' lao bene' ca' chesedop chesežag chesonxene' Criston' cont yezica'chle bene' ca' yesežebe' yesone' da' malen' nac ca'.

21 Na' toze can' cheyała' gono' len note'teze bene', bitw nacho bal bene' gonxenchguachone' na' yebale' gonchone' nacteze. Na' Diosen' len Xancho Jesucriston' na' len angl bene' ca' zjanchoj chesone' mandadw che' zjanezde' chona' mandaw gono' yogo' da' ca' ba gwnia' nga.

22 Bitw yob cuejo' bene' güia ne'e lježe' cont gague leno' gapo' doła' še ben' gwlejon' gone' da' mal. Gwsaco' cont bibi doła' gapo'.

23 Na' dan' tolıze chac li'o, bi ye'ejo' toze nis, san güe'ej late' güeje vino.

24 Bal bene' nacia' chesone' da' mal na' yogo'ze bene' zjanezde' can' chesonen' la'czła' biña' žin ža yesezi'e castigw chen. Na' bal bene' chesone' da' malen' dan' ngaše' na' da' bi nacia', perw žin ža gwlo'elaon.

25 Na' lecz ca' naquen len bene' ca' cheson da' güen, nacia' še da' güenna' chesone', na' la'czła' gague nła' da' güenna' chesone', bi nacho yega'ancze багаše'ze dan' chesonen'.

6

1 Na' bene' ca' chesejniłaže' Criston', bene' zjanac esclavos, cheyała' yesache'ede' bene' ca' zjanaque' xan žin chegaquen' zjazaque' cont yosozenague' chegaque'. Cheyała' yesape' legaque' bala'an cont nono ne yela' ya' che Diosen', neca no ne che dan' chzejni'ichon'.

2 Bene' ca' zjanac esclavos, še xangaque' lecze chesejniłaže' Criston', bi cheyała' yesone' xbab bi yosozenague' chegaque' neche zjanaque' txen chesonxene' Criston', san nachle cheyała' yesone' žinna' do laže'che' na' cheyała' yesacde' xan žin ca' ca' bene' biše', lagüe zjanaque' txen chesejniłaže' Criston'. Bzejni'i da' ca' ba gwnia' cheyała' yesone' na' gwneyoe bene' yosozenague' chen.

Cheyała' soacho mbalaz len da' de checho

3 Nita' bene' chosozejni'ide' xbab chegacze' na' bi chososed chosolo'ede' diža' li che Xancho Jesucriston' dan' ba blo'eda' le', na' chosozejni'ide' clele, chesene' bi chonen byen soacho goncho can' chazlaže' Diosen'.

4 Bene' ca' chosozejni'ide' dan' zej clele chesonxen cuingaque', chesacde' zjanezde' da' zan, len bibi chesejni'ide'. Chosošaše' che no diža' o che bichle da' bi naquen da' zaque', chesacxi'e lježe', chesacyože' len lježe', chesezi'diža' lježe', na' chesacde' chesacxi'a bene' legaque'.

5 Con bi cheyož chedo chesedił chosošaše', le ba yo'o da' malen' lo' yichjlažda'ogüe' na' bi zjanombi'e diža' li che Diosen'. Con chesacde' yososed yosolo'ede' xtiza' Diosen' cont yesaque' bene' gwni'a. Bi gono' txen len ben' cheson ca'.

6 Da' li zoachguacho binlo cate' choncho can' chazlaže' Diosen' na' cate' zoacho mbalaz len bi da' dao' de checho.

7 Ga'alcho bla'cho yežlion' na' ga'alcho cate' yeza'cho.

8 Na' še de da' che'ej chagwcho na' še de xalana'cho da' chyažjecho, cheyała' soacho mba len da' ca'.

9 Bene' ca' chesezelaže' yesaque' bene' gwni'a chosozenague' che da' malen' na' cheselažoe' lo na' gwxiyen'. Chesezelaže' da' zan da' gata' chegaque' da'

yesede čhen, na' da' ca' chesezelaže' chesonen mal len legaque' na' žin ža yesebiaye'e.

¹⁰ Beñe' chzelaže' mechw nach chzenague' che bite'teze da' mal. Na' nita' bene' ba gosebejyichje' diža' li che Diosen' dan' chesezelaže' mechon', na' da' zan dan' chosožaglaochgüe' yela' güen da' mal čegaque' na'.

Cheyal'a cuec yichj Timoteon' gone' xšin Criston'

¹¹ Na' ca nac le' Timoteo, bi gono' can' cheson bene' ca', le Diosen' gwleje' le' cont gono' xšinen'. Cuec yichjo' gono' da' zej to licha, ben con can' chazlaže' Diosen', soachačo' šejnilažo'ne', goque bene', byo bchejlaže' cate' de da' saca'zi'o, na' goc bene' šagüe'.

¹² Gwlec yichjo' ben con ga zelao saquedo' cont gono' yogo' dan' chazlaže' Diosen'. Na' bebe dan' šjazyo' len Diosen' toli tocañe, le Diosen' gwleje' le' šjazyo' len le', na' ba bi'o diža' lao bene' zan žo' chejnilažo'ne'.

¹³ Dios ben' chnežjo yela' mban che yogo' benachen', che beyixe' ca' na' che bica'chle da' zjamban, na' Jesucristw ben' be' diža' li lao Poncio Pilato, gwne' Diosen' gwsele'ne', legaque' zjanezde' chona' mandadw

¹⁴ gwzenago' che yogo' dan' ba gwnia' le', na' bi go'o latje ten ca'ze, cont bi gono' da' zaca' no tile le'. Bzenag che yogo' dan' bena' mandadw gono' žinte ža yid Xancho Jesucriston' da' yoble.

¹⁵ Le cate' žin ža gwžia bia' Diosen', nach yide' da' yoble. Toz Dios nan' chnabi'e doxen na' zoachgüe' mba. Len' naque' Rey ben' chnabi'e yezica'chle rey ca', na' naque' Xancho ben' chnabi'e yezica'chle bene' gwnabia'.

¹⁶ Totec Dios nan' bi nacho žin ža gate'. Na' catec yo'ochgua be'ni' gan' zoen', nono gac bigue' gala'ze gan' zoe'na'. Nono zoa yežlio nga bene' ba ble'ede' Diosen' na' nono gac le'e le'. Cheyal'a gonxenchone' le chnabi'e toli tocañe. Na' can' gonščaczcho.

¹⁷ Na' ca nac bene' ca' chesejnilaže' Criston', bene' zjanac bene' gwñi'a lo yežlio nga, gože' bi yesaque' bene' ya'laže'. Na' yo'o legaque' bi yesone' xbab yesenite' mba lagüe zjanaque' bene' gwñi'a, le yob te che bite'tez da' de čegaque'. Yo'o legaque' yesezoe' lez yesenite' mbalaz len Dios ben' zoe' toli tocañe. Toga le' čone' chio' yogo' da' güen da' chyažjecho na' da' chbecho.

¹⁸ Na' yo'one' yesenite' yesonchgüe' da' güen, yesone' yogo' cuen da' güen can' chazlaže' Diosen', nach lecze yo'one' yesezande' da' de čegaque' cont yesaclene' bene' na' yesebede' yesone' ca'.

¹⁹ Še yesone' ca', na' gaquen ca to yela' gwñi'a da' bi te čhen, le Diosen' chaclaže' yesaclene' bene', na' gone' cont yesenite' mba cate' šjasyenite' len le' toli tocañe še yesone' ca'.

Pablon' chzože' carten'

²⁰ Timoteo, gwlecchgua yichjo' che yogo' dan' ba bzejni'i Diosen' le'. Bi gwzenago' che bene' chosošalj diža' da' bibi zaca', ne che dan' chesene bene' dan' bi zej lebe len diža' li che Diosen'. Chesonlaže' chesene' cheso'e diža' sina'.

²¹ Beñe' bosozenague' che dižan' nac ca' ba gosebejyichje' diža' li che Diosen' da' chejle'cho na' bich chesejnilaže'ne'.

Čnabšca' gaclen Diosen' le'. Da' na'žen' chzoja'.

CART GWCHOPE DAN' BZOJ POSTLW SAN PABLO CHE TIMOTEO

Pablon' chzoje' Timoteon'

¹ Neda' Pablo naca' postlw che Jesucriston', le Diosen' gwnalaže' gwsele' neda' chyixjue'eda' can' gwne' gone' cont note'teze bene' yesejnilaže' Jesucriston' gata' yela' mban chegaque' toli tocanē.

² Na' chzoja' le' Timoteo, ba nona' le' ca xi'ina'. Chnaba' lao Xacho Diosen' na' lao Xancho Jesucriston' yesaclenšque' le' na' yesyeyaše'laže'de' le', na' yesonšque' ca so' binlo len xbab da' yo'o lo' yichjlažda'oguoñ.

Cheyla' güe'cho diža' che Jesucriston'

³ Chonxena' Diosen' do yichj do laža' can' goson da' xozxta'ogua', na' nezda' lo' yichjlažda'ogua' chona' can' chazlaže' Diosen'. Na' yogo' ni'a cate' chol' güiža' Diosen', lagüe za na' šeže'le, choa' yela' choxcen che dan' chonon'.

⁴ Chjaza'laža' gwchežo' cate' beza' gan' zon', na' zelaža' le'e lježcho da' yoble, le yebechgüeda' še ca'.

⁵ Na' chona' xbab can' chejnilažo' Diosen' do yichj do lažo' can' zgua'tec goson taguo' Loida na' xna'o Eunice, na' nezda' lec ca' chono' le' na'a.

⁶ Da'nana' chneyoeda' le' da' yoble, güe'lažo' gono' da' gwlo'o Diosen' lo nao' gono' caten' gwxo'a na'ton' yichjon'.

⁷ Diosen' bene' chio' Spiritw chen' zoan lo' lažda'ochon', na' Spiriton' chaclen chio' cont bi žebcho, na' chonen chio' yela' guac cont goncho can' chazlaže' Diosen'. Lecze chaclenen chio' cont chaque lježcho na' cont choncho da' zejen na' güe'cho diža' da' zaca'.

⁸ Da'nana' chneyoeda' le', bi yeto'edo' chixjue'edo' xtiža' Xancho Jesucriston', na' nēca yeto'edo' chia' la'czla' dia' ližya nga da' chzenaga' che Jesucriston' na' chyixjue'eda' xtižen'. Cheyla' gono' can' chonan' na' gwyo gwchejlažo' bi da' gac chio' cate' chixjue'edo' diža' güen chen', le zoa Diosen' chaclene' chio' len yela' guac chen'.

⁹ Diosen' ba none' chio' yela' mban toli tocanē na' gwleje' chio' cont naccho lo ne'en. Na' bene' ca' da' nži'ilaže'de' chio', gague neče bi da' güen bencho. Cate' bina' xe yežlion' bsi'e xneze sele' Jesucriston' cont gaclene' chio'.

¹⁰ Na' na'a Diosen' ba blo'e nži'ilaže'de' chio', le ba gwsele' Jesucriston' ben' choñ yela' mban chechon' toli tocanē. Na' žin ža gwcuez Jesucriston' yela' goten' na' gone' cont chio' chejle'cho diža' güen chen' šjazyoacho len le' toli tocanē.

¹¹ Na' Diosen' gwleje' neda' naca' postlw che' na' gwsele'nda' cont chyixjue'eda' diža' güen che Jesucriston' na' chsed chlo'eda' bene' bi zjanac bene' Israel.

¹² Na' dan' chona' ca', chžaglagua' da' quinga chac chia', perw bi cheto'eda' chen, le nombi'a Diosen' ben' chejnilaža'. Ba ben cuina' lo ne'e, na' nezda' nape' yela' guac gone' cont ne' soačhača' šejnilaža'ne' caten' žin ža yid Jesucriston' da' yoble.

¹³ Soačhacho' gwzejni'ido' bene' diža' zaca' can' ba bendo' chzejni'idan', na' soatezo' šejnilažo' Jesucriston' na' gacdo'ne' do yichj do lažo'.

¹⁴ Be' latje gaclen Spiritw che Diosen' le' cont soatezo' gwzejni'ido' bene' diža' li da' bsd blo'eda' le'e, le zoa Spiriton' lo' lažda'ochon'.

¹⁵ Nezdo' Figelo na' Hermógenes len yezica'chle bene' migw chia' ca' že' distritw che Asia ba gosebejyichje'nda'.

¹⁶ Na' chnaba' gaclenšca Xancho Diosen' Onesiforo len bene' lo' yo'o che', le bi beto'ede' chia' da' dia' ližya nga, san zan ni'a bedetipe' laža' nga.

¹⁷ Cate' bide' Roma nga, bene' byen beyiljue' neda' con cate'ch beželde'nda'.

¹⁸ Nezdo' lecze da' zan bene' goclene' neda' cate' gwzoa' Efeso. Chnaba' lao Xancho Diosen' gacšca güen che' cate' žin ža yid Xancho Jesucriston' da' yoble.

2

Cheyala' gwyo gwchejcho len da' saca'zi'cho

¹ Xi'indagua', chnaba' soachachcho' šejnilažo' Jesucriston' lagüe' da' nži'ilaže'de' le'.

² Na' yogo' da' ba bendo' gwduxjue'eda' lao bene' zan, da' ca' bsed blo'en bene' yosozenag chen do yichj do laže'gaque', bene' ca' guac yosozejni'iden' bene' yoble.

³ Na' byo bchej len da' saca'zi'o šlac chono' xšin Jesucriston'. Goc ca to soldadw bene' bi chžeb bi gac che'.

⁴ Nezecho bene' zej yela' soldadon' bi chac gon xšine' šlac zeje' lao gwdiła', san chbejyichjen' cont gone' bin' ža ben' nac xan soldadw ca'.

⁵ Na' nezecho bene' chja'ac lo güitj cheyala' yesone' cayanen' ba bosoxi'e yesone' cate' yeseytje', cont gac yesezi'e da' yesone' gan.

⁶ Na' leze nezecho bene' chelale chone' žin yixe' chzi'e da' nechw da' chbia lao coseš chen'.

⁷ Ben xbab che da' quinga ba gwnia' le', na' Xancho Jesucriston' gaclene' le' šejni'ido' yogon'.

⁸ Ben xbab che Jesucristw ben' beyas bebane' ladjo bene' guaten', ben' nac xi'in diaža che da' rey Davin'. Che len' chzejni'ida' cate' chyixjue'eda' diža' güen che'.

⁹ Na' da' chyixjue'eda' diža' güen chen' chosoči chososaque'nda' na' dia' ližya nga ca to no bene' mal juisyw. Perw nezda' bibi gac yesone' cont bi gas laje xtiža' Diosen' lo yežlion'.

¹⁰ Da'n'an' chzanlaže' cuina' gac bi da' gac chia' lagüe' da' chyixjue'eda' xtiža' Diosen', le chaclaža' yezica'chle bene' ba gwleje' cont gata' yela' mban chegaque' toli tocaņe yesejnilaže' Jesucriston', na' žin ža šjasyezoe' len le' toli tocaņe gan' chac da' güen juisyw.

¹¹ Diža' quinga zjanaquen da' li:

Še chejnilaže'cho Criston' ben' got neče xtoła'chon', chio' lecze naccho ca to bene' guat len da' xinjen' cont bich gonchon.

Na' con can' bosban Diosen' Criston' ladjo bene' guaten', lecze ca' bocobe' yichjlaždao' chio' cont šjayzoacho txen len le'.

¹² Na' še soachachcho šejnilaže'chone' bite'teze chac checho, lecze gone' cont nabia'cho txen len le'.

San še cuejyichjcho Criston', lecze le' cuejyichje' chio'.

¹³ Na' la'czla' še chio' bi goncho can' gwnacho goncho, Diosen' zoe' chone' con da' ba gwne' gone', le Diosen' bi gac gwše'e da' ba nžie' bia' gone'.

Ben' chon xšin Diosen' binlo

¹⁴ Bi go'o latje yesanlaže' bene' ca' chesejnilaže' Jesucriston' da' ca' ba bzejni'ida'. Na' yosnido' legaque' naquen mal len Xancho Diosen' yesedił

yosošašlen lježe' che bize diža'. Bibi zejen yesone' ca', le cate' bene' chesende' chesedił chosošaše', chonen cont bi yesejle'e che xtiža' Diosen'.

¹⁵ Ben con ga zelao saque'do' cont yebe Diosen' can' chonon' na' cont bi gacdo' zto' lağüen' can' chono' xšinen'. Gwsed gwlo'edo' xtižen' to liča.

¹⁶ Bi gono' txen len bene' chesoe' chgüe' bite'teze diža' da' bibi zaca', diža' da' bibi zejen len Diosen', le dižan' zjanac ca' chziyen' bene' yesonche' da' mal.

¹⁷ Dižan' nac ca' chžiyain' bene' ca to yižgüe' mal. Can' ba goc che Himeneo na' Fileto,

¹⁸ gosebejyichje' diža' li da' chzejni'in che Criston'. Chososed chosolo'ede' chesene' bi soacho lez žin ža yebancho ladjo bene' guaten', le chesene' ba gwde che da' ca'. Na' bał bene' ba chesejnilaže' Criston' chesacžejlaže' na'a neche xtiža' bene' ca'.

¹⁹ San chio' zoačhačho chzenagcho diža' li che Criston' na' Diosen' chone' cont bi chbejyichjon. Da'nar' zaca'lebcho ca to lene yo'o da' nac da' gual. Na' nyojczye Xtiža' Diosen' žan: "Diosen' nezde' no bene' zjajo'o lo ne'e." Na' leczye nyojen žan: "Note'tez bene' že' chejnilaže' Xancho Diosen', cheyała' cuejyichje' bich gone' da' mal."

²⁰ Nezecho to liž bene' gwni'a de no tas platw na' no yeso' xguag de oro de plata da' zjazaca'chgua. Leczye de yeso' xguag de gona', na' de no batia na' bichle de yag da' chesonen žin da' bitec zjazaca'.

²¹ Can' naquen len chio', note'tezcho še cuejyichjcho da' malen', nach Xancho Diosen' gwčhine' chio' neche goncho da' zan da' güen da' chaclaže' goncho. Na' še goncho ca', sacalebcho ca to tas o to xguag de oro da' zaca'chgua.

²² Na' ca nac le', cheyała' cuejyichjo' bite'teze da' mal da' chzelaže' lažda'oguoñ' gono', da' ca' chesezelaže' note'teze bene' güego' yesone'. Bey- iljwlaže' nac gono' cont gaco' bene' güen len Diosen' na' cont soačhačho' šejnilažo'ne', cont gacdo' Diosen', na' cont soa cuezo' binlo len bene' lježo' ca'. Ben ca' txen len yogo' bene' chesenab goclen lao Xancho Diosen', bene' zjanac bene' laždao' xilaže'.

²³ Bi gono' txen len bene' bi chesejni'ide', bene' chosošaše' cheso'e diža' da' bibi zejen, le xtiža'gaquen' chonen ga chesacyož bene'.

²⁴ Chio' choncho xšin Diosen' bi cheyała' tiłe gwšašlencho bene'. Cheyała' gaccho bene' šagüe' len yogo'ze bene', cheyała' nezecho naquen' gwzejni'icho legaque' che Diosen', na' cheyała' gapcho yela' chxenlaže' len legaque'.

²⁵ Na' cate' güe'cho consejw che bene' bi chesaclačže' yosozenague' diža' li che Criston', cheyała' güe'lencho legaque' diža' šagüe', na' cuezcho gaclen Diosen' legaque' yosoša' xbab čhegaquen' cont yosozenague' che diža' li čen'.

²⁶ Can' goncho cont Diosen' gwnežjue' legaque' to xbab šagüe' na' yesyechoje' lo na' Satanás dan' chnabia' da' xigüe' ca', le chonen cont nite' chesone' con can' chazlažen'.

3

Naquen' yeson bene' cate' ba zoa yid Xancho Jesucriston' da' yoble

¹ Na' che'nda' šejni'ido' da' nga, cate' žin ža ba zoa yid Xancho Jesucriston' da' yoble, da' zan da' mal gac.

² Bene' zan yesonxen cuingaque', na' zane' yesebec yichje' gata' da' zča'o xmechwagaque'. Zane' yeso'e diža' ca güenna' chesone' na' yesaque' bene'

ya'laže'. Yeseneye'e che Diosen'. Bi yosozenague' che xaxna'gaque'. Bi yeso'e yela' choxclen che Diosen' na' bi yesape' le' bala'an.

³ Bi yesacde' bene', bi yesyezi'xen che lježe', yesene' mal che bene' yoble, con yesontezē' bite'teze da' mal da' žan chegaque', yesacchgüe' bene' znia, na' yesegue'ede' bite'tez da' nac da' güen.

⁴ Yosode lježgaque' lo na' bene' chesegue'ede' legaque', bi yesēžebe' yesone' bite'ze da' mal, yesone' xbab zjazaca'chgüe', na' yesaclaže' yesone' con da' chpe legacze' na' bi yesaclaže' yesone' xbab che Diosen'.

⁵ Lecze da' zan da' yesone' cont yesaque bene' chesonxenchgüe' Diosen', perw bi soa yela' guac che Diosen' len legaque'.

Bi gono' t xen len bene' ca' cheson da' ca' ba gwnian'.

⁶ Bene' ca' cheson ca' chja'aque' liž no'ole bene' chesejle'daze', na' chesonlede' legaque' len diža' da' cheso'e. No'ol ca' zjadechgua xtoła'gaque', le chesontezē' da' mal can' ža lo' lažda'ogaquen'.

⁷ No'ol ca' chosozenague' che note'teze' že' gwzejni'ide' legaque', perw na' bi chžin ža yesejni'ide' diža' li che Diosen'.

⁸ Cani'te da' Janes na' da' Jambres besegue'ede' Moisésen' na' bi gosaclaže' yosozenague' diža' li da' be'len da' Moisésen' legaque', na' ca'czen' nita' bene' gwxiye' na'a chesegue'ede' diža' li che Diosen'. Nchol yichjlažda'ogaque' yela' güen da' mal chegaquen', na' gague' da' li chesejnilaže' Diosen'.

⁹ Bi gac yesonlede' bene' sša, le yob gac chegaque' can' goc che da' Janes na' da' Jambres, žin ža cate' yezica'chle bene' yesacbe'ede' chosozejni'ide' clele yela' bi chejni'i chegaque'.

Consejw da' zelagüe' da' bnežjw Pablon' Timoteon'

¹⁰⁻¹¹ Na' le' Timoteo, nezczedo' can' ba bzejni'ida' le' na' can' zoa' chona' da' güen. Nezdō' chi' yichja' gona' yogo'loł da' ža Diosen'. Nezdō' zoačhača' chejnilaža' Diosen' bite'tez da' chac chia'. Na' nezdō' napa' yela' chxenlaže' len ljež benača' na' zoacza' chacda' legaque'. Nezdō' bi chbejyichja' xšin Diosen' da' chona', la'czla' da' zan da' ba bosochi bososaca' bene' neda'. Na' nezdō' da' ca' gosondē' neda' cate' gwzoa' ciuda' Antioquía na' cate' gwyā'a yež Iconio len yež Lистра, na' can' gwdi gwxcaca'. Na' nezdō' Xancho Jesucriston' bosle' neda' lo yogo' da' ca' da' goc chia'.

¹² Da' li yesenita' bene' yosoči yososaque' note'tez chio' chejnilaže'cho Cristo Jesúsēn', chio' chi' yichjcho chzenagcho che'.

¹³ Bene' mal bene' güexoayag ca' šja'acze' yesonche' da' xinjen', yeseziye'e bene' na' lecze yesejle'e che diža' güenlaže' da' yesoe' bene' yoble.

¹⁴ Na' le' Timoteo, cheyala' soačhačo' gwzenagō' che da' ca' chejni'ido' che Criston'. Nezdō' naquen diža' li, le bzejni'iton' le'.

¹⁵ Cate' nactio' bidao' ba nombi'o Xtiža' Diosen' da' nyojen. Na' Xtiže' nan' chzejni'in chio' cheyala' šejnilaže'cho Cristo Jesúsēn' cont gata' yela' mban checho toli tocanē.

¹⁶ Cuin Diosen' bzejni'ide' bene' ca' bosozoj Xtižen' cont bosozoje' xbab chen'. Da'nān' doxen Xtiža' Diosen' dan' nyojen zaca'chguan da' chzejni'in chio' che Diosen', chdižen chio' cate' choncho da' xinj, na' chzejni'in chio' nac goncho cont na' Diosen' choncho da' güen.

¹⁷ Na' chio' chejnilaže'cho Diosen', Xtižen' chzejni'in chio' yogo'loł da' cheyala' nezecho cont soačo goncho yogo' da' güen.

4

1 Yid Xancho Jesucriston' da' yoble cont gone' yela' justis che yogo' benach, bene' ne' zjamban lente bene' ba gosat, na' caten' yide' da' yoble nach solao nabi'e yežlio nga. Na' Timoteo, Diosen' len Xancho Jesucriston' zjanezde' chona' mandaw gono' da' quinga:

2 Chixjue'edo' xtiža' Diosen' cate' nlatjo' na' cate' chacdo' bi nlatjo'. Be'len bene' diža' cont yesenezde' chesone' da' xinj, gwđil legaque' che da' malen' chesone' cont yesyetinjen', na' gwđap yela' chxenlaže' bzejni'ide' da' cheyala' yesone'.

3 Gwžin ža cate' bi yesaclaže' bene' yosozenague' xtiža' Diosen' da' chzejni'icho da' naquen da' li, na' yosotobe' bene' yosozejni'ide' legaque' diža' yoble da' yesazlaže' legacze'.

4 Yesebejyichje' bich yosozenague' che diža' lin' na' yosozenagche' che diža' da' chesaljaže' bene'.

5 Perw ca naco' le', cheyala' gaco' bene' yo'o xbab, na' gwđap yela' chxenlaže' len yogo'te da' sacazi'o, na' soatezo' go'o diža' güen che Jesucriston' do yichj do lažo'. Ben yogo' da' gwlo'o Diosen' lo nao' gono'.

6 Na' ca nac neda', ba zoa yesote' neda', da' li ba chžin ža šjayzoa' len Diosen'.

7 Na' chebeda' guac nia' do yichj do laža' ba gwđillena' da' chgue'e Diosen'. Ba bena' yogo'lo' da' gwlo'o Diosen' lo na' gona' na' ba gwzoachacha' chejni-laža' Jesucriston' na' ne' zoachachcza'.

8 Na' cate' šjayzoa' len Diosen', gone' cont soa' mba da' bena' güen šlac mbana'. Xancho Jesucriston' zeje' to licha, na' cate' žin ža choglagüe' nac gac che yogo'lo' bene', gague neda'zen' gone' soa' mba, san yogo' nochle bene' chesyebede' chesebeze' baten' yide' da' yoble, lecze gone' cont legaque' yesenite' mba.

Da' chaclaže' Pablon' gon Timoteon'

9 Ben byen con ga zelao saque'do' yob yido' nga.

10 Ben ca', le Demas ba gwlejiyichje'nda' na' ba zjayde' yež Tesalónica da' ch'chgua yichje' bin' gata' che' lo yežlio nga. Na' Crescente ba zeje' Galacia na' Titon' ba zeje' Dalmacia.

11 Yetoga Lucas nga'anlen neda' nga. Na' che'šco' Marcos cate' yido', cont gaclene' neda' len xšin Dios da' chona'.

12 Ca nac Tíquicon', ba gwsela'ne' ciuda Efeso.

13 Na' chaclaža' goxo' xadon' chia' da' bocua'ana' yež Troas liž Carpo cate' yido', na' lecze goxo' libr ca', na' da' žialaoch goxo' yid ca' da' ba zjanyoj.

14 Alejandro bene' güechach yan' ba benchgüe' mal len neda'. Xancho Diosen' gwnežjue' le' castigw che da' malen' bene'.

15 Na' gwsaco' len le', le chonchgüe' clele len xtiža' Diosen' da' chyixjue'echo.

16 Cate' bosodie' neda' lo na' justis ca' da' nechw, nono gwzoo no gaclen neda', yogo' bene' ca' godca' yesaclen neda' gosebejyichje'nda'. Diosen' yezi'xene' chegaque' da' bi gosaclene'nda'.

17 Bia'cze Xancho Jesucriston' gwzoalene' neda' na' goclenchgüe' neda' cont bia' xtižen' len yogo' bene' ca' že' na', bene' bi zjanac bene' Israel. Na' bosle' neda' lo na' yela' goten'.

18 Na' nezda' yoslacze Xancho Jesucriston' neda' lo yogo' da' mal da' gac chia', na' guaclencze' neda' šlac žin ža šjayzoalena'ne' gan' zoe' chnabi'e. Cheyala' gonxenchwne' toli tocanē. Can' gonšcaczcho.

Pablo chguape' tioxyeto chhope' na' chnablaže' gaclen Diosen' legaque'

¹⁹ Gwguapšco' tiox Prisca na' Aquila na' lecz ca' bene' lo' yo'o che Onesíforo.

²⁰ Erasto bega'ane' ciuda Corinto, na' bocua'ana' Tróximo yež Mileto, le gocšende'.

²¹ Ben con ga zelao saque'do' cont yido' cate' za' žin tiemp zag. Eubulo, Pudente, Lino, Claudia na' len yezica'chle bene' chesejnilaže' Jesucriston' nga chosoguape' le' tiox.

²² Chnaba' soašca Xancho Jesucriston' len le' na' gaclenšca Diosen' yogo'le. Da' na'zen' chzoja'.

CART DAN' BZOJ POSTLW SAN PABLO CHE TITO

Pablon' bzoje' cart nga

¹ Neda' Pablo chona' xšin Diosen' na' naca' postlw che Jesucriston' cont gaclena' bene' ca' gwlej Diosen' yesejnilaže'ne', cont yesenezde' can' ža diža' li che Diosen'. Na' diža' li čhen' chzejni'in can' goncho da' chazlaže',

² na' chzejni'in zoacho lez šjayzoacho len Diosen' toli tocaņe. Za' xe yežlion' Diosen' gwne' bene' yesejnilaže' le' šjasyenite' len le' toli tocaņe, na' Diosen' bi chonlaže' bite'teze da' že'.

³ Na' na'a ba chac da' bžie' bia' gac da' ba chzejni'ida' bene' xtižen', le Dios ben' nonē' yela' mban čecho toli tocaņe gwlo'e lo na' chyixjue'eda' bene' xtižen'.

⁴ Chzoja' le' Tito, naco' ca dogualje xi'ina' da' bzejni'ida' le', na' naccho txen chejnilaže'cho Jesucriston'. Xacho Diosen' na' Xancho Jesucriston' ben' nonē' yela' mban čecho toli tocaņe yesaclenšque' le'e na' yesyeyaše'de' le'e na' yesone' cont soa cuezle binlo len xbab čhelen'.

Da' chon Titon' gan' nzi' Creta

⁵ Cate' bocua'ana' le' gan' zoa yežlio da' nzi' Creta dan' chi' lo nisaon', gwnia' gwzožo' gono' dan' chona' cate' gwzoo' na', to to yež cuejo' bene' blao bene' yosozejni'i na' yosogüia yesene'e yezica'chle bene' chesejnilaže' Jesucriston'.

⁶ Na' še zoa bene' zoacze' chone' da' güen cont bibi de da' yosode'e bene' yesene' da' xinjen' chone', še naque' bene' zoa toz no'ol čhe', še xi'ine' ca' chesejnilaže' Criston', na' še bi zjanaque' bene' chesyedabaga', san chosozenague' cont bi zjalaže' chesone' da' xinji, ca bene' nac ca' cheyała' cuejo' güia na' lježe'.

⁷ Cate' cuejo' bene' co' Diosen' lo ne'e güia ne'e yezica'chle bene' chesejnilaže' Jesucriston', cuejo' bene' zoacze' chone' güen. Bi cuejo' bene' ya'laže', bene' naque' bene' loc, na' bene' borrašw. Bi cuejo' bene' chebede' cueque' žaš, na' neca cuejo' bene' zelaže' gone' da' xinj cont gone' gan mechw.

⁸ Bene' cuejo' cheyała' gaque' bene' chbede' chlebe' bene' zito' ližen'. Cheyała' gaque' bene' zoateze' chone' da' güen na' bene' chon xbab, bene' chon da' zej to licha, bene' chon da' chazlaže' Diosen' na' bene' chon con ga zelao chzaque'de' cont chone' bi da' ža Diosen'.

⁹ Cheyała' gaque' bene' zoačhače' do laže' chzenague' diža' li che Diosen' da' bzejni'ida' cont gac gwzejni'ide' bene' yoble diža' güenna', na' gone' čhačhlaže' cont yesenite' yesejle'e da' naquen da' li, na' gac gwlo'ede' bene' ca' chesene' contr diža' li che Diosen' cont yesenezde' clelen' chesone'.

¹⁰ Chnia' gono' ca', le nita' bene' zan bene' Israel gualaž čhia' na' yebał bene' yoble chesene' zjanaque' chio' txen, perw bi chosozenague' čhe Diosen'. Bibi zaca' xtiža'gaque' da' chosozejni'ide', con chesonlede' bene'.

¹¹ Na' da' zjachi' yichjgaque' yesone' gan mechw, da'n'an' chosozejni'ide' da' zej clele. Cheyała' gonle cont yesenite' šize bich yosozejni'ide' diža' güenlažen', le clelen' chesone'. Na' bene' zan len bene' lo' yo'o čhegaque' chesacžejlaže' che xtiža' Diosen' neče xtiža'gaquen'.

12 Cana' gwzooa to bene' gwneya'a, goque' bene' Creta, na' gwne' che bene' gualaž che' ca': "Bene' Creta bate'teze zjanaque' bene' güenlaže' na' zjanaque' ca bež znia' yela' güen da' xinj čhegaquen'. Lecze zjanaque' bene' lia na' bene' xagüed."

13 Na' da' li can' gwnen'. Da'nan' tiło' legaque' che da' xinjen' chesonen' cont nita'čhače' yesejle'e xtiža' Criston'.

14 Gono' ca' cont bich yosozenague' che diža' güenlažen' chesaljaže' bene' Israel gualaž chia' ca', na' neca yosozenague' che nochle bene' ba gosebejyichje' diža' li che Diosen'.

15 Diosen' ba none' yichjlažda'ochon' xilaže', na' ne da' chagwcho ne da' choxe'cho bi chžonen gac yichjlažda'ochon' xilaže'. San ca nac bene' yichjlaždao' mal ca', bene' bi chesejnilaže' Criston', bibi de da' naquen da' xilaže' len legaque'. Chesone' xbab mal, na' bibi de cheseza'laže' cate' chesone' da' xinjen'.

16 Chesene' zjanombi'e Diosen', perw nacia' bi zjanombi'ene', le cheson-teze' da' xinjen'. Chesone' da' chgue'e Diosen'; zjanaque' bene' güedenag len xtižen' na' bi chesac yesone' da' güen.

2

Xtiža' Diosen' da' chsed chlo'echo bene' naquen güen

1 Na' le', cheyala' gwzejni'ido' bene' yesone' can' ža diža' li che Diosen'.

2 Bzejni'i bene' byo gol ca' bi yesezožde', san yesenite' cont bene' yezica'chle yesape' legaque' bala'an. Bzejni'i legaque' to toe' cheyala' yesenabia' cuine' cont yesenite' yesone' da' güen, na' bzejni'i legaque' cheyala' yesenita'čhače' yesejnilaže' Diosen'. Cheyala' yesacde' bene' na' yesape' yela' chxenlaže' bite'teze da' chac.

3 Lecze ca' bzejni'i no'ol gole ca' cont yesenite' yesonxene' Diosen', na' bi yesene' che bene', neca yesezožde'. Cheyala' yesenite' yesone' da' güen cont yesezeze bene' yezica'chle can' cheyala' yesone'.

4 Na' no'ol gol ca' cheyala' yosozejni'ide' no'ol xcuide' ca' yesenite' binlo len bene' che to toe' na' yesacde' legaque' len bi' čhegaque' ca'.

5 Na' yosozejni'ide' legaque' cont to toe' yesenabia' cuine' na' yesone' da' zaca' yesone' cont yesaque' bene' laždao' xilaže' len yogo' da' chesone', na' yosogüia yesena' ližgaque' binlo, yesaque' bene' šagüe' na' yosozenag to toe' che bene' čhegaque'. No'ole xcuide' ca' cheyala' yesone' güen can' ba gwnian' cont nono ne mal che xtiža' Diosen'.

6 Na' lecze cheyala' neyoedo' bene' byo xcuide' ca' cont to toe' yesenabia' cuine' na' yesone' da' cheyala' yesone'.

7 Na' le', bite'teze da' gono', ben con da' nac güen cont yesache'e bene' yoble naquen' cheyala' yesone'. Cate' chsed chlo'edo' bene', bzejni'i legaque' do lažo', benen cont nacia' chapo' Diosen' bala'an.

8 Bsed blo'e diža' li cont nono na xtižon' naquen mal. Na' še soatezo' gwsed gwlo'edo' diža' li, nachen' bene' ca' chesexi'a chio' yesyeto'ede' da' bi chesyēelde' bi da' mal yesene' checho.

9 Gož bene' güen žin ca' yosozenague' che xangaquen' na' yesone' bite'teze da' yese'ene' sin cbi yosyoži'e xtiža'gaquen'.

10 Bi yesebane' bi da' de che xangaquen', san yesenite' do laže' cont yezica'chle bene' yesele'ede' chesone' güen na' yesache'ede' güenna' nac xtiža' Diosen', Dios ben' noqe' yela' mban čhecho toli tocaņe.

11 Diosen' n̄zi'ilaže'de' chio' benaḥ na' ba blo'e chaclaže' gone' yela' mban toli tocaṇe che yog'o'cho.

12 Na' da' none' ca' chzejni'in chio' cheyaḷa' cuejyichjcho yog'o' da' choncho da' bi chazlaže' na' yog'o' da' chzelaže'cho gata' checho o da' chzelaže'cho goncho da' be'naqen güen lagüen'. To tocho cheyaḷa' soa cuezcho nabia' cuincho cont goncho da' nac da' zaca'. Na' cheyaḷa' goncho da' zej to licha; na' cheyaḷa' soacho gonxencho Diosen' yežlio nga.

13 Le ślac zoacho yežlio nga zoacho mbalaz nezecho žin ža yid Jesucriston' da' yoble nse'e be'ni' juisyw. Naque' Dios checho ben' chonxencho na' ben' none' yela' mban checho toli tocaṇe, na' zaca'chgüe'.

14 Len' bnežjw cuine' neche chio' cate' gosote'ne' cont bnitlagüe' xtoḷa'chon', na' beya' beyibe' yichjlažda'ochon' len da' malen' cont none' chio' ca xi'ine'. Na' bene' ca' cont yebecho goncho da' güen.

15 Can' cheyaḷa' gwzejni'ido' bene'. Na' cheyaḷa' gono' chaḥ laže' yesone' da' güen na' tiḷo' bene' cheson da' xinj, le Diosen' ba gwsele' le' na' ba bene' le' yela' chnabia' cont gwzejni'ido' legaue'. Bi go'o latje yosozoe' le' to šla'ale.

3

Can' cheyaḷa' gon chio' chejnilaže'cho Jesucriston'

1 Da' yoble yozzendo' bene' chesejnilaže' Jesucriston' cheyaḷa' yosozexjwyichje' yosozenague' che justis ca' na' che bene' gwnabia' chegaue' ca' na' bate'teze cheyaḷa' yesone' da' güen.

2 Yozzendo' legaue' bi cheyaḷa' yesene' mal che note'teze bene'. Bi cheyaḷa' yesediḷ yosošaše', san cheyaḷa' yesaque' bene' šagüe' na' yesape' yela' chx-enlaže' len yog'o'loḷ bene'.

3 Chio' lecze bi gwejni'icho cana' na' bencho güedenag len Diosen'. Gwejle'cho diža' güenlažen' na' bentezcho bi da' xinj da' gwzelaže' lažda'ochon'. Gwdacho bencho cont da' bebecho. Gwzoacho bxi'a lježcho. Besue'e bene' chio' na' bgue'e lježcho.

4 Perw bžin ža Dios ben' none' yela' mban checho toli tocaṇe blo'ede' chio' catec bene' šagüe' naque' na' catec chacde' chio' benaḥ.

5 None' chio' yela' mban toli tocaṇe gague neche bi da' güen benchon', san da' beyaše'de' chio'. Nachen' beya' beyibe' yichjlažda'ochon' len da' malen' cate' gwzola' chejnilaže'chone', na' Spiritw chen' bocoben yichjlažda'ochon'.

6 Diosen' gwsele' Spiritw chen' zoan lo' yichjlažda'ochon' chaclenchguan chio', le Jesucristw ben' none' yela' mban checho toli tocaṇe gwṇabde'ne' selen'.

7 Na' ca' ba beyaše' beži'ilaže'de' chio' cont beyone' chio' bene' güen lagüen' na' cont soa cuezcho nezecho žin ža šjayzoacho len le' toli tocaṇe.

8 Da' ca' ba gwnia' nga zjanaquen da' li, na' gono' byen yosozenag bene' ca' gwzejni'ido' chen. Le bene' ca' ba chesejnilaže' Diosen' cheyaḷa' yesebec yichjgaue' yesone' da' güen. Na' da' quinga ba gwnia' zjazaca'chguan na' yesaclenen note'teze bene'.

9 Perw bi gono' txen len bene' chesediḷ chosošaše' che bize diža' da' bi zejen. Na' bi cuec yichjo' che diaža che da' xozxta'och'o ca'. Bi gono' txen len bene' chesediḷ chosošaše' che bi zejen dan' nyoj le'e ley da' bzoj da' Moisésen', le da' chesone' ca' bi chaclenen bene' na' bi naqen da' zaca'.

10 Na' bene' ca' cheson cont bene' ca' chesedop chesežague' chesonxene' Jesucriston' chesechoje' chople, neyoedo' legaue' bich yesone' ca'. Na' še ba gwneyoedo' legaue' to chope ni'a na' bi chosozenague', yebejo' legaue' ca'ale.

¹¹ Le da' bi chosozenague' nachen' nezecho zjambiaye'e na' zjanape' doļa' che da' xinjen' chesone'.

Can' cheyaļa' gon Titon'

¹² Cate' seļa' Artemas o Tíquico gan' zon', ben con ga zelao saque'do' cont yido' yežagcho lo' ciuda Nicópolis, le ba bechoglaža' yega' ana' na' tiemp zag.

¹³ Na' ben yogo' da' gac gono' par gacleno' Zenas ben' nsed ley, na' Apolos, cate' yesa'aque' gan' zon' cont bibi yeseyažjde' chanez.

¹⁴ Beņe' lježcho ca' chesejnlaže' Criston' cheyaļa' yesoe'laže' yesone' da' nac güen na' yesaclene' bene' chyažj chchine. Le cheyaļa' gaccho bene' chon da' zaca'.

Beņe' ljež Pablon' chosoguape' Titon' tiox

¹⁵ Yogo' bene' cheson xšin Diosen' txen len neda' nga chosoguape' le' tiox. Na' chņaba' gwguapšco' tiox bene' ca' zoaleno' na', bene' ca' chesacde' chio' da' naccho txen chejnlaže'cho Criston'. Diosen' gaclenšque' yogo'le. Da' na'zen' chzoja'.

CART DA' BZOJ POSTLW SAN PABLO CHE FILEMÓN

Pablo chzoje' carten'

1 Neda' Pablo dia' ližya nga da' chyixjue'eda' xtiža' Cristo Jesúsén'. Chzoja' le' Filemón, na' txen len bene' lježcho Timoteon' chguapto' le' tiox. Chaqueto' le' da' naccho txen choncho xšin Diosen'.

2 Na' leceze chguapto' tiox bene' ca' chesedop chesežague' chesonxene' Jesucriston' ližo'. Na' le' Apia, naco' ca bene' zanto', na' le' Arquipo, chono' neto' txen choncho xšin Diosen', leceze chguapto' le'e tiox.

3 Chnabeto' Xacho Diosen' na' Xancho Jesucriston' yesaclenšque' le'e na' yesone' cont soa cuezle binlo len xbab chelen'.

Filemónna' chejnilaže' Jesucriston' na' chacde' bene' lježe'

4 Na' le' Filemón, yogo' ni'a cate' chjayze'eda' le' šlac chołgüiza' Diosen', choa' yela' choxclen che' can' ba chono'.

5 Ba benda' diža' can' chejnilažo' Xancho Jesucriston' na' can' chacdo' lježcho bene' leceze chesejnilaže' Jesucriston'.

6 Na' chnaba' gaclen Diosen' bene' ca' ba gosejnilaže' Jesucriston' lagüe be'lenu' legaque' diža' can' chejnilažo'ne'. Chnaba' gaclene' legaque' cont yesache'ede' yogo' da' güen juisyw da' chon Diosen' lo' yichjlaždao' chio' chejnilaže'chone'.

7 Bene' migw, leca chbeda' na' chac chach laža' nezda' chacchgüedo' bene' lježcho ca' chesejnilaže' Jesucriston', le chacleno' legaque' cont nita'che' mbalaz.

Gwnabe' yezi'xen Filemónna' che Onésimo

8-9 Dan' chacdo' Criston' na' chacdo' bene' lježo' ca', da'nana' chneyoeda' le' gono' to da' chaclaža' gono'. Da' naca' postlw che Criston' guac gona' byen gono' da' gwžia' bia' gono' šaca' žan gwchina' yela' chnabia' da' yo'olo' na'. Perw bi žan gona' ca'. Neda' Pablo ba naca' bene' gole na' leceze na'a ba dia' ližya nga da' chyixjue'eda' xtiža' Jesucriston'.

10 Na' chnaba' godlen laguon' par Onésimo ben' ba nona' ca' xi'ina'. Le šlac dia' ližya nga bsd blo'eda'ne' cont chejnilaže' Jesucriston'.

11 Cana' bi goque' mos güen chio', san na'a ba naque' mos güen chio' na' leceze ca' chia' neda'.

12 Ba chezselane' laguon', na' chneyoeda' le' yolebo'ne' na' yezi'xeno' che', le leca chacda'ne'.

13 Zelaža' yega'anlene' neda' cont gaclene' neda', gone' da' cheyalā' gono' šlac dia' ližya nga da' chyixjue'eda' xtiža' Jesucriston'.

14 Perw bi chaclaža' nabda'ne' bi gone', le naquen chio' le' nao' nac gone', cont do lažo' gono' bi da' güen da' gono' na' gague gonchi'on.

15 Diosen' be'e latje beza' Onésimon' ližon' šlož cont soale txen toli tocaņe.

16 Na' na'a bich naque' mos chio' na'ze san naque' ca' bene' bišo' da' naque' txen len chio' chejnilaže'cho Xancho Jesucriston'. Leca chacda'ne', na' le' cheyalā' gacchdo'ne', gague con ca' chacdo' note'teze benach, san can' chacdo' bene' lježo' chesejnilaže' Xancho'.

¹⁷ Da'nan' še da' li naccho txen chejnilaže'cho Jesucriston', yolebo'ne' cacze chlebo' neda' cate' chedena'a le'e.

¹⁸ Na' še bi da' mal bende' le' o še bi da' chale' chio', neda' chixjuan'.

¹⁹ Cuincza' neda' Pablo chzoja' da' nga, neda' chixjua' bi da' chale'. Na' bibi chnia' che da' chalo' le' chia' neda' da' ba de yela' mban chio' toli tocaṇe.

²⁰ Bene' migw, da' chaquecho Xancho Jesucriston' chaclaža' gono' dan' chṇaba' nga ca to goclen chia'. Benšca ca soa' mbalaz, le naccho txen len Criston'.

²¹ Zoa' lez gwzenago' chia' na' goncho' güen clél ca dan' žia' le', da'nan' chzoja' le'.

²² Na' yeto da' chṇaba', chaclaža' yedesoa' ližon' cate' yida' gan' zoalen'. Le zoa' lez yob gac yedyena'a le'e can' chṇable lao Diosen' cate' choḷ güižlene'.

Bene' ca' nita' len Pablon' chosoguape' Filemónna' tiox

²³ Epafras die' ližya nga txen len neda' da' chyixjue'ede' xtiža' Cristo Jesúsén'. Na' le' chguape' le'e tiox.

²⁴ Na' lecz ca' bene' ca' chesaclene' neda' len xšin Diosen' nga, Marcos, na' Aristarco, na' Demas, na' Lucas, chosoguape' le'e tiox.

²⁵ Xancho Jesucriston' soašque' len le' gaclenšcacze' le'. Da' na'zen' chzoja'.

CART DAN' NYOJ CHE BENE' HEBREO CA'

Diosen' gwsele' Xi'ine' cont be'lene' benachen' diža'

¹ Cani' Diosen' be'lene' da' xozxta' ocho ca' diža' len bene' gwsele' gosoe' xtizen'. Zan las gosoe' da' bene' ca' xtizen' na' nža'te ca gosoe'n toe'.

² Perw na'a ba zoa žin ža yeyož yežlion' na' Diosen' ba be'lene' chio' diža' dan' gwsele' Xi'inen' bedezejni' ide' chio'. Na' Xi'in Dios nan' bene' yaba na' yežlio nga len yogo' bichle da' de nga na' gate'teze. Na' bengaquen' con can' gwnałaze' Diosen'. Na' gwžin ža gac lo na' Xi'in Diosen' yogo' benach, beyixe', na' bica'chle da' bene'.

³ Na' Xi'in Diosen' chlo'e catec bene' zaca' nac Diosen', le cayane' nac yichjlaždao' Xe' Diosen' nac yichjlažda'ogüen'. Na' Xi'in Diosen' chone' cont yaban', yežlion' na' da' ca' chle'echo le'e yaban' na' yežlion' chesonen žin, le nape' yela' guac cont chac con can' že'. Len' bzanłaze' cuine' gote' cont bexi beyach chio' len xtoła'chon'. Na' beyož bene' ca' beyepe' yaban' zjajchi'e cuit Xe' Diosen' ben' nac bene' zaca' juisyw na' chnabi'e txen len le'.

Xi'in Diosen' zaca'che' ca angl ca'

⁴ Naque' bene' zaca'chgua ca angl ben' cheson žin che Diosen', na' Diosen' bene' cont leca ba chacxenche' ca angl ca'.

⁵ Diosen' bina' ye'e ne to angl ca dan' gože' Xi'inen', gože'ne':

Len' naco' Xi'ina';

na'aža ba blo'a zoaczo'.

Na' bina' güe'e diža' che note'teze angl can' bi'e diža' che Xi'inen', gwne':

Neda' gona' cont gacbia' naca' Xe',

na' gona' cont gacbia' naque' Xi'ina'.

⁶ Na' da' nac Xi'in Diosen' la'zelagüe bene' zaca', da'n nan' cate' Diosen' gwsele'ne' yežlio nga gwne':

Yogo'lol angl chia' cheyała' yesonxene' le'.

⁷ Na' che angl ca' gwne':

Chona' cont angl chia' ca' bene' chesone' žin chia' chesaque' ca be' dan' chechj na' chesaque' ca yi' beł.

⁸ Perw che Xi'inen' be'e diža', gwne':

Len' naco' Dios na' nabi'o toli tocanē.

Na' leca güen chnabi'o, chono' con da' zej to lica.

⁹ Chebedo' da' zej to lica na' chgue'edo' da' malen'.

Da'n nan' neda' Dios ben' chonxeno' ba bena' cont zoacho' mbalazech ca note'teze bene'.

¹⁰ Na' da' yoble gozna Diosen' che Xi'inen':

Xana' Dios, beno' yežlion' ža gwlaste,

na' yogo' da' chle'echo le'e yaban' lecze le' benon'.

¹¹⁻¹² Na' gwžin ža cate' te che yogo' dan' chle'echo le'e yaban' na' lo yežlion',

perw le' bi te chio'; soaczo' toli tocanē.

Na' gwša'a le'e yaban' na' yežlion' ca to bene' chša' xe' cate' ba beyoen na' chaze' yeton.

Na' le'e yaban' na' yežlion', gono' len len can' chon to bene' cate' chotob xe'.

Perw le', tozecz can' gaco' toli tocanē, gwbat žin ža te chio'.

¹³ Diosen' bina' ye'e ne to angl ca dan' gože' Xi'inen', gože'ne':

Gwche'edo' cuita' nga nabia'cho txen,

na' gona' cont yogo' no chesegue'e le' yosozexjw yichje' yosozenague' chio'.

14 Na' ca nac angl ca', yogue' zjanaque' bene' cheson xšin Diosen', na' chsele' legaque' chesaclene' chio' ba gwleje' šjayzoacho len le'.

2

Cheyala' gwzenagcho che Diosen' cont yeque'e xtola'chon'

1 Na' da' nac Xi'in Diosen' bene' zaca'ch ca angl ca', do yichj do laže'cho cheyala' gwzenagcho xtižen' da' ba benecho. Le še bi gwzenagcho chen do yichj do laže'cho, guanlaže'chon na' cuejyichjchon.

2 Diosen' goclaže' yosozenag da' xoxxta'ocho ca' che ley che' dan' goseyixjue'e angl ca'. Da'n'an' Diosen' bnežjue' castigw da' cheyala' si' to toe' bate'tez bi bosozenague' chen, con ca nac da' mal da' gosone'.

3 Gague da' yelacho bi si'cho castigw še bi gwzenagcho xtiža' Xancho Jesúsen' da' gwdixjue'ede' že' chaclaže' gone' yela' mban checho toli tocanē. Da' zaca'chgua da' ben Xancho Jesúsen' cont gata' yela' mban checho toli tocanē. Cuine' gwdixjue'eden' da' nechw, na' bene' ca' gosedalen le' bosolo'ede' chio' le naquen da' li.

4 Diosen' bene' cont gosone' da' zaca' yebanecho, na' bnežjue' legaque' zan yela' guac, na' Spiritw chen' benen cont gosone' da' zan da' güen len yela' guac chen. Na' yog' da' ca' goc con can' gwnalaže' Diosen'. Na' Diosen' bene' ga gosac da' ca' cont nezecho xtiža' Xancho Jesuscriston' naquen da' li.

Jesucriston' goque' can' nac chio' beñach

5 Na' gague angl can' yesenabia' cate' žin ža gata' yežlio cobe dan' choe'cho diža' chen.

6 Na' de late' Xtiža' Diosen' gan' nyoj diža' da' be'len to bene' Diosen', gwne': ¿Bixchen' nži'ilažo' neto' beñach? le bitec bi zaca'to'.

Na' ¿bixchen' chi' yichjo' chacleno' neto'?

7-8 Beno' cont beñachen' zjanaque' blao, na' con angl ca'ze zjanaquech blao ca beñach.

Na' beno' cont beñachen' naque' bene' zaca' na' cont chacxene'.

Beno' cont yogo'loł da' zjade yesaquen lo na' beñach, na' len yogo'loł beyixe' yesacba' lo na'gaque'.

Na' da' ben Diosen' cont yogo'loł da' de yesaquen lo na' beñachen' na' yogo' beyixe' yesacba' lo na'gaquen', bibi bocua'an Diosen' da' bi gwlo'e lo na' beñachen', la'czla' na'a bina' le'echo yesac yogon' na' yogo'ba' lo na' beñachen'.

9 Perw yogo'loł ba yo'ocze lo na' Jesúsen', la'czla' šlac gwzoe' yežlio nga angl ca' gosacche' blaoch ca le'. Perw na'a da' bzanlaže' cuine' gote', da'n'an' Diosen' bene' cont chacxenche' ca' legaque' na' cont nachbia' naque' bene' zaca' juisyw. Le da' nži'ilaže' Diosen' chio' beñach, da'n'an' bžie' bia' got Jesúsen' cont gac yeque'e xtola' to to beñach.

10 Diosen' bene' beñach, bene' beyixe' ca' na' bite'tezechle da' zjade cont chacxene'. Na' Diosen' chaclaže' bene' zan yesaque' xi'ine' na' šjasyezoe' len le' gan' yo'ochgua be'ni', na' güenna' bene' bžie' bia' gwxaca'zi' Jesúsen' cont gac gone' yela' mban toli tocanē che chio' beñach.

11 Jesúsen' ba gwlo'e chio' lo na' Diosen' na' txen len Jesúsen' naccho xi'in Dios. Da'n'an' bi cheto'e Jesúsen' ne' naccho biše' lježe'.

12 Quinga gwna Jesúsen' gože' Diosen':

Gwzejni'ida' bene' biše' lježa' ca' can' nac yichjlažda'oguo'n', na' txen len bene' ca' zjandop zjanžag chesonxene' le' goła' gonxena' le'.

13 Nach Jesúsen' gwne':

Neda' soacha' šejnilaža' Diosen'.

Nach da' yoble gozne':

Nga zoa' txen len bene' ca' gwlo'o Diosen' lo na', bene' ca' ba gwque'e ca xi'ine'.

¹⁴ Chion' ba gwca'a Diosen' ca xi'ine' naccho bene' bela' chen, na' da'nan' Jesúsen' lece golje' goque' bene' bela' chen cont bnežjo cuine' gosote'ne'. Na' da' got Jesúsen', da'nan' gwzoede' bzoe' šla' ale Satanás dan' chnabia' da' xigüe' ca' na' dan' choñen yela' got che benačhen'.

¹⁵ Jesúsen' bene' cont bich chžebcho gatcho, can' chesežeb yezica'chle benač šlac de yela' mban čegaque', chesežebe' yesate'.

¹⁶ Jesúsen' bide' yežlion', gague cont gaclene' angl ca', san cont goclene' chio' naccho xi'in diaža che da' Abrahanna'.

¹⁷ Na' da'nan' benen byen goc Jesúsen' doxen can' nac chio' benač cont naque' bžoz blao čecho lao Diosen'. Na' bnežjw cuine' bnitlagüe' xtoła'chon' na' zoe' cheyaše'de' chio' con can' chazlaže' Diosen'. Na' da' bnežjw cuine' bnitlagüe' xtoła'chon', zaca'lebbe' ca bžoz blao che nación Israel čechon' ben' gwej lao Diosen' bežue' chen che beyixe' cont gwnabe' yezi'xen Diosen' xtoła'gaquen'.

¹⁸ Na' da' bžaglao Jesúsen' cate' gwlo'oyela' gwxiyen' le' gone' da' mal, perw bibi da' mal bene', da'nan' nezde' naclen' gaclene' chio' cate' chgo'oyela' gwxiyen' chio' goncho da' mal.

3

Jesúsen' zaca'che' ca da' Moisésen'

¹ Bene' migw, Diosen' ba gwleje' chio' naccho lo ne'e, na' cheyalá' goncho xbab che Cristo Jesús ben' gwsele'. Naque' bžoz blao čecho na' ben' chejnilaže'cho.

² Jesúsen' bene' cayanen' gwna Dios ben' gwsela' le' šlac gwde' yežlion', ca'cze ben da' Moisésen' cate' le' goclene' da' xozxta'ocho ca' cani', bene' ca' gosac diaža che Dios.

³ Perw Jesúsen' zaca'che' ca da' Moisésen', le len' bxie' diaža che Diosen', na' da' Moisésen' naque' con to bene' za' lo diaža che Diosen'.

⁴ Gwnita' benač bene' bxie' to to diaža yežlio nga, san ca nac Diosen', len' bxie' yogo'te da' zjade.

⁵ Da' Moisésen' goque' ca xmos Diosen' cate' bene' con can' gwna Diosen' cont goclene' da' xozxta'ocho bene' ca' gosaque' diaža che Diosen'. Na' da' Moisésen' be'e diža' che da' za' gac da' za' čixijue'e Diosen' benačhen' ca tiempo'.

⁶ Perw Criston' bi goque' ca to mos dan' gwzoe' bene' can' gwna Diosen', san da' naque' Xi'in Diosen' da'nan' bene' can' gwnen', na' naque' Xan yogo' chio' naccho diaža che Diosen'. Na' da' li naccho diaža che Diosen' še zoačhačcho chejnilaže'chone' na' chebecho nezecho gac güen čecho.

Guac soacho mbalaz len Diosen'

⁷ Da'nan' cheyalá' gwzenagcho can' ža Spiritw che Diosen' len da' nga da' nyojen, žan:

Še Diosen' nie' le'e na'a,

⁸ bi gonle güedenag can' goson da' xozxta'ole cani' cate' besyedabague' Diosen' latje daš gan' chesaše'.

⁹ Nach Diosen' gwne':

Bi gosejle'e še leda' dan' goša' legaque' gwnežjua' da' yesezaca'zi'e neče xtoła'gaquen'.

Bi gosejle'e chia' cate' gosaše' latje dašen', la'czla' choa iz besele'ede' can' bena' len legaque'.

¹⁰ Da'nan' bža'a bene' ca' gwnitan' na' gwnia':

“Yogo' las chesejle'e diža' güenlaže',

na' bi chosozenague' chia' cont yesone' can' chazlažan'.”

¹¹ Nachen' bža'a legaque' na' da' balı gwlo'a gwnia':

“Gwbat nite' mbalaz yesyezi'laže' can' chezi'laža' neda'.”

¹² Bene' migw, bi güe'le latje nabia' da' malen' yichjlažda'ole na' gonen cont cuejyichjle bich šejnilaže'le Diosen' ben' zoa tolı tocanē.

¹³ Na' šlac na'a ne' decze latje gwzenagcho che Diosen', le neyoe lježle tža tža cont ne tole bi gonle xbabēn' clele, gaquele bibi nonen gontezle da' xinj.

¹⁴ Da' li naccho Criston' txen še ne' zoacho chejnilaže'chone' cate' žin ža gatcho, con can' gwzolaoch chejnilaže'chone'.

¹⁵ Nyoj Xtiza' Diosen' che chio', žan:

Še Diosen' nie' le'e na'a,

bi gonle güedenag can' goson da' xozxta'ole canı' cate' besyedabague' Diosen'.

¹⁶ Na' da' žan ca', choen' diža' che da' xozxta'ocho ca' bebej da' Moisesen' naciön gan' nzi' Egipto. Gosende' can' gož Diosen' legaque', perw bi bosozenague', besyedabague' Diosen'.

¹⁷ Da'nan' choa iz Diosen' bže'e legaque' neche gosone' da' xinjen', na' gosat ben' besyedabague' Diosen' šlac ne' zjalaže' latje dašen'.

¹⁸ Na' legaque', da' bi bosozenague' che Diosen', da' balı gwlo'e, gwne' bi güe'le latje yesenite' mbalaz yesyezi'laže' can' chezi'laže' Diosen'.

¹⁹ Na' nacbia' da' bi gosejle'e che Diosen', da'nan' bi goc nite' mbalaz yesyezi'laže' can' chezi'laže' le'.

4

¹ Na' ca' nezecho lecze neche chio' Diosen' gwne' bene' yesejle' xtiže' yesenite' mbalaz yesyezi'laže' can' chezi'laže' le'. Da'nan' cheyla' gwsaca'cho cont bi goncho güedenag len le'.

² Chio' ba benecho diža' güen cont gac soacho mbalaz ca diža' dan' gosene da' xozxta'ocho ca' canı', perw diža' da' gosende' bi goclenen legaque', le bi gosejle'en.

³ Na' chio', še chejle'cho da' ža Diosen', ba zoacho mbalaz chezi'laže'cho can' chezi'lažen'. Na' nyoj da' gwne' che da' xozxta'ocho ca', žan:

Nachen' bža'a legaque' na' gwlo'a da' balı, gwnia':

“Gwbat nite' mbalaz yesyezi'laže' can' chezi'laža' neda'.”

Na' nezecho Diosen' gwzolağüe' chezi'laže' cate' beyož bxie' yaban' na' yežlion' na' bichle da' bene' ža gwlaste.

⁴ Na' zoa late' gan' nyoj Xtiza' Diosen' can' bene' ža gažen', žan:

Xop ža ben Diosen' yaban', na' bichle da' bene' cate' bxie' yežlion'.

Na' bžin ža gaže, bich bi bene', con gwzoe' mbalaz bezi'laže'.

⁵ Na' lecze nyojen can' gwne', žan:

Gwbat nite' mbalaz yesyezi'laže' can' chezi'laža' neda'.

⁶ Na' ne' naquen da' li balı bene' yesejle'e xtiža' Diosen' na' nite' mbalaz yesyezi'laže' can' chezi'laže' le', na' bene' ca gosende' diža' güen čhen' canı' bi gosejle'en, na' bi goc yesenite' mbalaz yesyezi'laže' yela' güedenag čhegaquen'.

⁷ Na' gwdechle gwne' Diosen' da' yoble gwne': “Na'a guac nita'le mbalaz yezi'laže'le.” Na' bene' cont da' rey David bzoje' da' nga, žan:

Še Diosen' nie' le'e na'a,
bi gonle güedenag.

⁸ Da' Josué gw̄chi'e da' xozxtao' chio' bene' Israel gan' gosezi'e yežlion' da' bnežjw Diosen' legaque', perw bi bene' cont yesenita' bene' ca' mbalaz yesyezi'laže'. Da'n'an' Diosen' be'e diža' gwdele, gwne' gwžin ža yesenite' mbalaz yesyezi'laže'.

⁹ Na' da'n'an' bene' ba gwlej Diosen' cont yesaque' lo ne'e, legaque' guac yesenite' mbalaz yesyezi'laže' ca mbalazen' gwzoa le' cate' gwzologüe' chezi'laže'.

¹⁰ Na' bene' ca' ba nita' mbalaz chesyzezi'laže' can' chezi'laže' Diosen', bich chesone' can' ža xbab chegaquen', san chesone' can' ža Diosen'. Da'n'an' žacho zjanite' mbalaz chesyzezi'laže' can' zoa Diosen' mbalaz chezi'laže' da' beyož bxie' yogo' da' zjade.

¹¹ Da'n'an' cheyała' güe'laže'cho šejle'cho xtiža' Diosen' do yichj do laže'cho cont soacho mbalaz yezi'laže'cho can' chezi'laže' Diosen' na' cont bi cuiayi'cho can' gac checho še goncho güedenag len xtižen' can' goson da' xozxta'ocho ca'.

¹² Xtiža' Diosen' chazen lo' yichjlaždao' bene' chesenden' na' chaclenen bene' chosozenag chen. Na' zaca'leben ca to spada da' nľachgua chop ľa'a. Perw chonch Xtiža' Diosen' ca to spada, le' chlo'en chio' še chzenagcho che Diosen' o še che cuincho, na' chzejni'in chio' che xbab da' yo'o lo' yichjlažda'ochon' na' len yogo' da' chzelaže'cho še naquen güen o naquen mal.

¹³ Bibi de da' bi neze nle'e Diosen', ne to beňach, angl, da' xigüe' o bi da' zjade. Diosen' nezde' yogo'te da' yo'o lo' yichjlažda'ochon'. Na' gwžin ža nabyožde' chio' che yogo'te da' ba bencho.

Jesús' naque' b̄xoz gwnabia' checho

¹⁴ Jesús ben' naque' Xi'in Diosen' ba beyepe' yaban' na' zoe' gan' zoa Diosen'. Na' naque' b̄xoz blao checho bene' ľa'zelagüe zaca'. Da'n'an' cheyała' soachachcho šejnilaže'chone' can' ba be'cho diža' goncho.

¹⁵ Jesús' ben' nac b̄xoz blao chechon' chache'ede' bi da' naquen zdebe len chio', le' gwxyien' goclažen' co'oyelan' le' gone' da' mal, na' bžaglagüe' cayanen' chžaglao chio', perw bibi da' mal bene'.

¹⁶ Na' dan' zoe' naque' b̄xoz blao chechon' ben' cheyaše'de' chio', da'n'an' cheyała' yol güižcho Diosen' gan' chi'e chnabi'e, na' bi žebcho güe'lenchone' diža', nabechone' yezi'xene' checho na' gaclene' chio' bate'teze chache'echo chyažjecho gaclene' chio', le' nži'ilaže'de' chio'.

5

¹ Yogo' bene' ca' ba gosaque' b̄xoz blao che nación Israel chechon' gosac lo' ne'e šjasesane' bi da' šjasesane' lao Diosen' na' gosote' beyixe' bosolalje' xchengacba' cont Diosen' bezi'xene' xtoľa' da' xozxta'ocho ca'.

² Na' b̄xoz ca' gosape' yela' chxenlaže' len bene' bina' yesejni'i can' cheyała' yesone' na' len bene' ba n̄xoayag da' malen' legaque', le' ľecze beňach bene' güen da' xinj legaque'.

³ Da'n'an' benen byen b̄xoz ca' gosote' beyixe' na' bosolalje' xchemba' cont gosenabe' yezi'xen Diosen' xtolen' lente xtoľa' yezica'chle bene'.

⁴ Na' ne to b̄xoz ca' bi benxen cuine' n̄eca gwlej cuine' cont gaque' b̄xoz blao, san Diosen' gwleje' to toe' gosaque' b̄xoz blao can' gwleje' da' Aarón.

⁵ Na' ca'cze goc len Criston', bitw beyiljue' nac gone' cont gaxcene', n̄eca gwlej cuine' cont naque' b̄xoz blao checho, san Diosen' gwleje'ne' na' gože'ne': Len' naco' Xi'ina',

na'aža ba bena' cont nacbia' zoaczo'.

⁶ Na' ga yoble nyoj yeto da' gwne':

Naco' b̄xoz toli tocañe can' nac b̄xoz ben' le' Melquisedec.

⁷ Na' Criston' šlac gwzoe' yežlion' boļ güiže' Xe' Diosen' ben' nape' yeļa' guac cont yosle' le' bi gate', gwne' ziže na' gwcheže' gwnabe' gaclene' le'. Na' da' b̄zexjw yichj Criston' bene' con can' gwna Xe'n, na' Xe' Diosen' bzenague' na' goclene'ne' cont bi bžebe' yeļa' goten'.

⁸ Na' la'czla' Criston' naque' Xi'in Dios, bžaglagüe' yogo'loļ da' ca' goc che' cate' bzenague' che Diosen' cont gwyejni'ide' can' chac che chio' benačh.

⁹ Na' beyož goc che' yogo'loļ da' goclaže' Diosen', nach ba guaque' gwnežjue' yeļa' mban toli tocañe che yogo' bene' yosozenague' che'.

¹⁰ Can' naquen, Diosen' gwleje' le' cont naque' b̄xoz blao checho, na' naque' ca b̄xoz Melquisedec.

Gwsaca'cho cont bi cuejyichjcho xtiža' Diosen'

¹¹ Na' ñe' de da' zan da' chaclaža' ñia' le'e che da' ngan', perw naquen zdebe ñian' ca šejni'ilen, le bich chebele šejni'ilen.

¹² Ba gole' gwzejni'ile bene' xtiža' Diosen', perw gualaz da' gonle ca', chyažjele no yozejni'i le'e da' yoble da' ca' b̄sedle da' nechw. Da'nan' zaca'leble ca to bidao' biña' gac gagw na' con chaže'be'.

¹³ Na' bene' zjanac ca to bidao' ñe' chaže', biña' yesejni'ide' xtiža' Diosen' binlo cont yesone' da' zej to lica len Diosen'.

¹⁴ Na' dan' ža xtiža' Diosen' da' naquech zdebe, zaca'leben ca yeļa' guagw da' chagw bene' gole. Na' bene' chesejni'i lenna' chesacbe'ede' še to da' yesende' o to da' yesone' naquen güen o naquen mal, le ba zjayolagüe' chosozenague' che Diosen'.

6

¹⁻² Cana' betinjecho xtoļa'chon', gwyejnilaže'cho Criston', na' b̄sedcho diža' güen che'. Goccho ca to bene' guat len yichjlažda'ochon' ñeche da' choncho da' xinj, perw ba betinjecho xtoļa'chon' ña'a. Bich chyažjen yezolaocho šejnilaže'cho Diosen'. Bich chyažjen gwsedchcho che dan' chesezoa bene' nis o che dan' ch̄xoa na'cho yichj bene' na' chñabcho gaclen Diosen' legaue'. Bich chyažjen gwsedchcho can' gac cate' yechis yosban Diosen' bene' guat ca' o caten' chogbi'en yesezaca'zi' bene' ca' ba goson da' xinj. Ba n̄sedcho da' ca', na' ña'a bačh cheyaļa' gwsedcho xtiža' Diosen' da' nacch zdebe cont gacch yichjlažda'ochon' can' nac yichjlaždao' Criston'.

³ Lenna' goncho ña'a še Diosen' gonšque' latje.

⁴ Nita' bene' ba gwyo'o be'ni' che Criston' lo' yichjlažda'ogaue', na' ba chesacbe'ede' can' nac yeļa' mban da' chon' Criston', na' ba zoa Spiritw che Diosen' lo' yichjlažda'ogaue'.

⁵ Ba zjanezde' xtiža' Diosen' naquen güen na' ba zjanombi'e yeļa' guac che Diosen' da' za' gwlo'echde' benačhen'.

⁶ Na' še žin ža bich yesejnilaže' Criston' na' yesebejyichje' xtižen', bich gac yesyetinjde' che dan' ba gosebejyichje'ne', le lo' yichjlažda'ogaue' chesone' txen len bene' ca' bosode'e Xi'in Diosen' le'e yag cruzen', na' chesone' cont nochle bene' yesegue'ede' le'.

⁷ Cheyaļa' gac yichjlažda'ochon' ca to yežlio güen gan' chesaz bene'. Cheyož chac yejon' zan ñi'a, nach chac cosešen'. Na' chata' dan' cheseyažje bene' chesazen'. Na' nacbia' Diosen' chebede' yežlion' nac ca'.

⁸ Bi gaccho ca to yežlio gan' chla' yag yeše' na' bichle yiḡe' da' nono chagw. Yežlion' nac ca' bibi zacan', na' ba zoa cuejyichj xanen len na' yiḡe' da' chla' lagüen žin ža šeyen.

Nezecho šjayzoacho len Diosen'

⁹ Le'e bene' migw, chacda' le'e, na' la'czla' ba bia' dižan' ca', nezda' bilja gonle can' cheson bene' chesebejyichje' xtiža' Diosen'. Chacda' gonle güen da' ba gwlej Diosen' le'e cont šjayzoale len le'.

¹⁰ Diosen' zeje' to licha, na' bi ganlaže' can' ba benle xšinen' na' can' ne' chonlen na'a chaclenle yezica'chle bene' chesejnilaže'ne'. Na' chonle ca' da' chaquele Diosen'.

¹¹ Na' chaclaža' to tole soatezle gonchle ca' do yiḡhj do laže'le šlac bina' žin ža gatle, cont nezele šjayzoale len Diosen'.

¹² Chaclaža' bi gacle bene' xagüed len da' ža Diosen'. Na' chaclaža' gonle can' ba goson bene' zan bene' gosenite' gosejnilaže' Diosen' cani', gosejle'e gon Diosen' can' gože' legaque' gone', na' gosape' yela' chxenlaže' cate'ch bžin ža benen'.

¹³ Cate' Diosen' gože' da' Abraham xi'in diaža che' yesaque' bene' zan, bzoa cuine' gwlo'e da' baļi gac can' gwnen', le nono zoa bene' napch yela' gwnabia' ca Diosen'.

¹⁴ Gwne': "Da' li goncza' cont gac güen chio' na' cont yesac xi'in diaža chio' bene' zan."

¹⁵ Na' Abrahanna' gwdape' yela' chxenlaže' šlac gwleze', nach bžin ža gwzoloac chac can' gwna Diosen'.

¹⁶ Benachen' zjayolagüe' chosozoe' Diosen' cue'e da' baļi che bi dan' chesene', le Diosen' chnabia'che' ca legaque'. Chesone' ca' cont bene' ca' chesacyože' len legaque' yesejle'e na' yesyeyacxenlaže'.

¹⁷ Na' Diosen' bzoa cuine' cue'e da' baļi cont neze bene' ca' zjanac xi'in diaža che da' Abrahanna' gague da' te che dan' gwne' gonen'.

¹⁸ Diosen' bene' chope da' qui: gwne' can' gone' na' lecze bzoa cuine' cue'e da' baļi gac can' gwnen', na' gague da' te bi gac can' gwnen'. Chaclaže' chio' ba betinje xtoļa'chon' yebecho nezecho šjayzoacho len le'. Na' Diosen' bi chac güe'e diža' güenlaže'.

¹⁹⁻²⁰ Na' da' nezecho šjayzoacho len Diosen', bi soa xbab chechon' quile ca'le. Jesúsen' ba gwžialagüe' gwyo'e gan' zoa Diosen' gan' nono benačh goc šo', na' bene' cont chio' gac šo'cho. Le naque' bχoz blao checho toļi tocaņe, na' naque' ca bχoz Melquisedec.

7

Jesúsen' naque' ca bχoz Melquisedec

¹ Na' Melquisedequen' goque' rey na' gwnabi'e gan' nzi' Salem, na' Dios ben' nac la'zelagüe bene' blao gwleje' le' cont goque' bχoz. Na' goquen' Abrahanna' zeze'e lao gwdiļe gan' bene' gan gayo' rey, na' Melquisedequen' jašague'ne' na' gwdiḡjue'ede' gac da' güen che da' Abrahanna'.

² Ca horen' Abrahanna' zeze'e zonse'e yogo'loļ da' jaytobe' da' bene' gan lo yela' gwdiļen', na' gwlequen' ši cuen na' bnežjue' to cuen che bχoz Melquisedequen'. Na' Melquisedec zejen diža' "rey bene' zej to licha". Na' goque' rey che bene' zjanite' binlo, le Salem gan' gwnabi'e zejen diža' "zjanite' binlo".

³ Bi nyojen še no goc da' xaxna' Melquisedequen'. Neca nyojen še no goc xozxta'ogüe', na' neca nyojen baten' golje' na' baten' gote'. Da'nan' žacho

Melquisedequen' zaca'lebde' ca Xi'in Dios ben' zoa toli tocanē naque' b̄xoz checho, le bi golje Melquisedequen' lo diaža che nochle b̄xoz, na' neca gwzoa nochle bene' lo diaža che' bene' tie' gwlane' xlatje'.

⁴ Le gon xbab catec bene' blao goc b̄xoz Melquisedequen'. Da'nan' da' xozxta'ochō Abrahanna' gwleje' to cuen lo ši cuen da' ca' jaytobe' lo na' rey ca' na' bnežjue'n b̄xoz Melquisedequen'.

⁵ Na' da' xozxta'ochō bene' ca' gosalje lo diaža che da' Leví, ben' besyeyale' gosaque' b̄xoz che nación Israel chechon', gosone' con can' nyojen le'e ley da' bzoj Moisés, na' bosochixjue' to cuen lo ši cuen yogo' bi da' gota' che yezica'chle bene' gualaž chegaque' ca'. Na' yogo'cze' gosaque' diaža che da' Abrahanna', b̄xoz ca' na' bene' yezica'chle.

⁶ Perw Melquisedequen' la'czla' bi golje' lo diaža che da' Leví, Abrahanna' bnežjue'ne' to cuen lo ši cuen da' ca' jaytobe', na' Melquisedequen' gwñabde' Diosen' gac güen che da' Abrahanna' ben' gwna Diosen' yesac xi'in diaža che' bene' zan.

⁷ Na' nezecho bene' chac chñabde' Diosen' gac güen che bene' yoble zaca'che' ca ben' gac che' da' güenna'.

⁸ Na' bene' ca' zjanac b̄xoz can' ža ley dan' bzoj Moísesen' chesezi'e to cuen güeje lo ši cuen yogo' bi da' de che bene' Israel gualaž chechon', na' b̄xoz ca' zjanaque' con ljež benachcho bene' chesat. Na' che b̄xoz Melquisedequen' ben' gwxi' to cuen lo ši cuen da' jaytob da' Abrahanna', Xtiža' Diosen' choen' diža' che' ca to bene' ne' zoacze.

⁹⁻¹⁰ Na' da' bnežjo Abrahanna' le' da' ca', guac nacho da' Leví bnežjue' Melquisedequen' to cuen güeje lo ši cuen da' ca', le gwdechle Levín' golje' lo diaža che da' Abrahanna', na' Leví nan' goque' xozxtao' bene' ca' gosac lo na'gaque' bosotobe' da' ca' bosonežjo bene' Israel gualaž checho ca' che Diosen'.

¹¹ Na' Diosen' bnežjue' bene' Israel gualaž checho ca' ley chen' cani' cont benen žin t xen len da' goson b̄xoz ca' bene' gosalje' lo diaža che da' Levín'. Perw b̄xoz ca' bi goc yesone' cont yichjlaždao' benachen' yesaquen xilaže' len Diosen'. Da'nan' byažjecho bid Jesúsen' naque' b̄xoz checho toli tocanē, na' le' naque' ca b̄xoz Melquisedequen', gague ca da' b̄xoz Aarón.

¹² Na' cont goc zoa Jesúsen' naque' b̄xoz chechon', byažjen bža' ley da' nonen mandawd non' gac b̄xoz.

¹³ Le Xancho Jesúsen' ben' nac b̄xoz chechon' bi golje' lo diaža che da' Leví, na' noch no na' choj lo diaža che Jesúsen' bene' naque' b̄xoz.

¹⁴ Nezczecho Xancho Jesúsen' golje' lo diaža che da' Judá, na' da' Moísesen' bi bzoje' le'e leyna' ga nan bene' galje' lo diaža che da' Judán' guac yesaque' b̄xoz.

¹⁵ Na' nachia' ba bža' leyna', le ba zoa Jesúsen' naque' b̄xoz cobe chechon' na' naque' ca b̄xoz Melquisedequen'.

¹⁶ Bitō golje' lo diaža che da' Leví can' gosac b̄xoz ca' bene' goson žin can' ža ley da' bzoj da' Moísesen', san naque' b̄xoz da' bi gwzoe yela' goten' le' na' zoe' toli tocanē.

¹⁷ Quinga nyoj da' gwna Diosen' che', žan:

Naco' b̄xoz toli tocanē, can' nac b̄xoz ben' le' Melquisedec.

¹⁸ Na' b̄xoz ca' gwna Diosen' ñita' cana', bich nžie' bia' ñite' ña'a, le dan' bžia bia' leyna' yesone' bi goc yeca'an xtoła' benachen' to ši'i.

¹⁹ Na' leyna' lecze bi goc gonon cont yesac yichjlaždao' benachen' xilaže' len Diosen'. Perw ña'a ba chaquech güen checho, le ba zoa b̄xoz checho bene' ba beca'a xtoła'chon' to ši'i cont zoacho binlo len Diosen' na' chac chñelenchone'.

²⁰ Na' cont nezecho Jesúsen' naque' b̄xoz checho, Diosen' bzoa cuine' gwlo'e da' bałi le soacze Jesúsen' gaque' b̄xoz chechon'.

²¹ Bene' ca' gosaque' b̄xoz can' bzoj da' Moisésen', Diosen' bitw bzoa cuine' cue'e da' bałi cont šeje'le'cho zjanaque' b̄xoz. Perw nyoj can' gože' Jesúsen', žan: Diosen' bzoa cuine' gwlo'e da' bałi na' bi gwše'e can' ba gože'ne' gone': "Naco' b̄xoz toli tocaņe can' nac b̄xoz ben' le' Melquisedec."

²² Na' da'nan' zoa Jesúsen' chone' cont nezecho Diosen' gaclene' chio' toli tocaņe can' gwne' gone'. Na' can' za' gwne' gaclene' chio' na'a, zaca'chen ca' da' gože' da' xoxzta' ocho ca' cani'.

²³ Na' bene' ca' gosaque' b̄xoz can' ža ley dan' bzoj da' Miosésen', gosaque' bene' zan, le cate' gosat tgüeje tgüeje', la' benita'te bene' yoble.

²⁴ Perw Jesúsen' zoe' toli tocaņe, na' da'nan' naque' b̄xoz checho toli tocaņe.

²⁵ Da'nan' chac chone' yeła' mban toli tocaņe che chio' chnabcho yezi'xen Diosen' checho, le zoacze' toli tocaņe chnabe' goclen lao Diosen' che chio' chejnilaže' chone'.

²⁶ Na' Jesúsen' nacyaņe' bene' chyažjecho gaque' b̄xoz blao checho cont gaclene' chio', le naque' bene' laždao' xilaže'. Bibi da' xinj none' na' neca none' bi xbab mal, con bibi doła' nape'. Nža'le naque' len beňach bene' cheson da' xinj. Jesúsen' ba beyepe' zoe' gan' zoa Diosen', na' chnabi'e txen len le'.

²⁷ Nža'le naque' len b̄xoz blao ca' gosenita' cani'. Legaque' tža tža byažjen gosote' beyixe' bosolalje' xchemba' cont gosenabe' bezi'xen Diosen' xtola'gaque', na' gwdechle gosote' beyixe' yoble bosolalje' xchemba' cate' gosenabe' bezi'xen Diosen' xtola' yezica'chle bene' Israel gualaž checho ca'. Perw Jesúsen' šni'aze bnežjw cuine' neče xtola' beňachen' cate' gosote'ne' le'e yag cruzen', na' bi byažjde' gote' beyixe' can' goson b̄xoz ca' tža tža neče xtola'gaque' na' neče xtola' bene' yezica'chle.

²⁸ Bene' gosac b̄xoz blao can' ža ley da' bzoj da' Moisésen' gosaque' bene' güen da' xinj can' zjanac yezica'chle bene'. Na' cate' ba goc zan iz bzoj Moisésen' leyna', Diosen' bzoa cuine' gwlo'e da' bałi zoacze Xi'ine' Jesúsen' naque' b̄xoz blao checho. Na' Xi'ine' Jesúsen' zoacze' toli tocaņe na' nac yichjlaždagüen' cayaņen' chazlaže' Diosen'.

8

Jesúsen' bene' cont gwzolao chac da' cobe da' gwna Diosen' gone' cont gaclene' chio'

¹ Da' nga zejechen lao yogo' da' ba gwnia': zoa b̄xoz blao chechon' ben' nac cayaņe' chazlaže' Diosen', na' ba chi'e yaban' chnabi'e txen len Diosen' ben' nac la'zelagüe bene' zaca'.

² Chone' žin gan' zoa Xancho Diosen', gague lo' yo'o dan' goson beňach cont yesonxene' le'.

³ Na' yogo' b̄xoz blao che bene' Israel gualaž chechon' nite' chosonežjue' Diosen' bi da' chosonežjue'ne' na' chesote' beyixe' chosolalje' xchemba' lao Diosen'. Na' dan' nac Jesúsen' b̄xoz blao checho, benen byen bnežjw cuine' blalj xchene' neče xtola'chon'.

⁴ Na' šaca' ne' zoe' yežlio nga bi naque' b̄xoz, le nita' b̄xoz che bene' Israel gualaž chechon' chjasesane' bi da' chjasesane' lao Diosen' con can' ža ley dan' bzoj da' Moisésen'.

⁵ Na' bene' ca', chesone' bi da' chesone' lo' yodao' da' naquen ca' l' gua'a l'saca' che yaban' gan' zoa Diosen'. Na' nezecho naquen ca' l' gua'a l'saca' che yaban'

gan' zoa Diosen', le cate' za' gon Moisésen' yodao' dan' chacte chedobe gan' gason b̄oxoz ca' žin che Diosen' cani', Diosen' gože'ne': "Yogo' da' ba gwnia' gonle, le gonen cayañen' blo'eda' le' caten' gwzoacho lo ya'an."

⁶ Na' da' chon Jesúsén', da' xen zaca'chen ca da' cheson b̄oxoz che bene' Israel gualaž chechon', na' can' gwna Diosen' gaclene' chio' lagüe da' bnežjw cuin Jesúsén' neche xtoła'chon', lecze da' xen zaca'chen ca dan' gože' da' xozxta'ocho ca' cani'.

⁷ Le Diosen' gože' da' xozxta'ocho ca' gac güen chegaque' še yesone' can' ža ley chen', perw bi bosozenague', na' da'nan' byažjen gwdixjue' to da' cobe.

⁸ Na' Diosen' bi bebede' legaque', san gwne':
Gwžin ža cate' ñia' to da' cobe da' gona' gaclena' le'e nacle xi'in diaža che bene' ca' gosenite' Israel,
na' len le'e nacle xi'in diaža che bene' ca' gosenite' Judá.

Neda' naca' Xanle Dios žia' ca'.

⁹ Nža' can' goša' da' xozxta'ole gona' gaclena' legaque' cani', bži'ilaže'da' legaque' na' bena' cont besyechoje' lo na' bene' nación Egipto. Legaque' bi gosone' can' goša'ne' cont gac güen chegaque'. Na' da'nan' gwleza' bich goclena'ne', neda' Xanle Dios žia' ca'.

¹⁰ Na' quinga gona' gaclena' xi'in diaža che le'e nacle bene' Israelen' cate' žin ža:

Neda' Xanle Dios gona' cont šo' yichjgaque' da' nona' mandadw yesone', na' gona' cont yesyebeden' lo' yichjlažda'ogaquen', na' toza' neda' yesejnilaže', na' legaque' yesaque' nación chia'.

¹¹ Na' bi yažjen yosozejni'i lježe' cont yesombi'e neda', neca yažjen yosozejni'i no bene' biše' lježe', le cana' yogo'lole' yesombi'e neda', bi' bixjw lente bene' nac bene' gole.

¹² Canan' yezi'xena' xtoła'gaquen', na' bich gona' cuent še bi da' malen' ba gosonen'.

¹³ Na' Diosen' be'e diža' che da' cobe da' gwne' gone' gaclene' nación chechon', na' da'nan' nezecho ba bzoe' to šla'ale da'na' gože' da' xozxta'ocho ca' cani'. Na' da' gole da' ba bzoe' to šla'ale ba zoa yeniten.

9

Yodao' da' zoa yežlion' na' dan' zoa yaba gan' zoa Diosen'

¹ Cani' Diosen' gože' da' xozxta'ocho ca' gaclene' legaque' na' gac güen chegaque' še yesone' can' ža ley chen'. Na' šlac ne' chon žin da' nechw da'na' gože' legaque' cani', Diosen' bžie' bia' nacle yesonxene' le' na' nacle yesone' yodao' gan' yesonxene' le' yežlio nga.

² Gosone' yodao' da' nsan' čhope quart. Na' lo' quart nechon' bosozoe' to candeler na' to mes gan' bosocue' yetextil da' naquen che Dios. Na' cuartna' bososi'en Latje che Dios.

³ Na' bosozie' to lache' lo' yo'ona' cont bchojen čhope quart, na' quart gwchopen' bososi'en Latje ga Zoa Dios.

⁴ Na' lo' quart gwchopen' bosozie' yeto mes de oro gan' bosozeye' yal. Na' goseyixjue' to caj da' bosoguzaje' oro doxenen. Na' lo' cajan' gosegüe'e to yeso' de oro gan' gosegüe'e late' yela' guagw da' nzi' maná, na' gosegüe'e carrot che da' Aarón dan' bexeje. Lecze lo' caj nan' gosego'ošagüe' yej ta'a ca' gan' byoj yogo' dan' bžia' bia' Diosen' yesone' cont gaclene' legaque'.

5 Na' cože' cajen' bosonite' čhope l' gua'a l'saca' bene' gosone' ca angl bene' bososi'e querubines, cont nachbia' zoa Diosen' gan' žia cajen' na' naque' bene' zaca' juisyw. Na' cože' cajen' ladjo angl ca' gan' nžiljo xilgaquen', bosožiče xčhen beyixe' cate' gosenabe' yezi'xen Diosen' xtola' bene' Israel gualaž čhecho ca' to to iz. Perw bi chonen byen gü'e'cho diža' na'a doxen can' goca'.

6 Na' beyož gosone' yodaon' na' bosonite' yogo' da' ca' lo'enna', nach yogo' ža bžox ca' goso'e lo' cuart nechon' na' gosone' can' bžia bia' Diosen' gosone' gosonxene' le'.

7 Na' cuart gwchopen', toz bžox blao goc gwyo'e lo'enna' tni'a tgüiz. Na' cate' gwyo'ena' benen byen bežoe' chen čhe beyixe' bži'en lo' cajen' cont Diosen' bezi'xene' xtola' na' bezi'xente' xtola' yezica'chle bene' Israel gualaž čhecho neče da' xinj da' gosone' sin cbi gosacbe'ede'.

8 Na' da' bi de l'sens šo' nochle bene' lo' cuart gwchopen', Spiritw čhe Diosen' chzejni'in chio' biņa' gac šo' beņachen' gan' nac latje ga' zoa Diosen' šlac ne' chon žin yodao' nechua' lo' yežlion'.

9 Na' yodaon' len yogo' da' cheson bžox ca' lo'enna' chlo'en chio' zoacho na'a can' chac yaban' gan' zoa Diosen'. Na' la'czla' da' zan chesoe' bene' Diosen' na' be zan beyixe' chesote' chesonxene' le', bibi yela' guac zjansa' da' ca' cont yeseņzde' bibi doļa' zjanape' len Diosen'.

10 Na' da' ca' cheson bene' gualaž čhechon' lo' yodaon' naquen costumbr čhe no nis yela' guagw, no beyixe' chesote', na' nacle cha' čhyib cuingaque', na' bichle da' zjazacan' par cuerp čhegaque' na'ze. Na' ba gosonen žin šlac Diosen' biņa' gwš'e'e costumbr ca' len da' coben'.

11 Na' na'a Criston' naque' bžox blao čhecho na' ba bžin ža bxi'e costumbr güen ca'. Na' zoe' yaban' naque' bžox čhecho lao Diosen', na' gan' zoen' zaca'chen ca' yodao' da' goson beņachen' yežlio nga.

12 Na' bi bežoe' chen čhe no šib no go'n dao' cate' gwyo'e gwņabe' cont Diosen' bezi'xene' xtola'chon', san da' bnežiw cuine' gosote'ne' na' blalj xčhene' neče xtola'chon' tni'aze le'e yag cruzen', da'n'an' goc gwyo'e gan' zoa Diosen' na' ba beque'e xtola'chon' toli tocaņe.

13 Na' ley da' bzoj da' Moisésen' nyojen žan da' zan da' cheson bene' da' chonen cont bi chesaque' xilaže' len Diosen'. Na' cont yesyeyaque' xilaže' len Diosen' da' yoble, čhyažjen gwže'e bžoxen' legaque' xčhen no šib no go'n na' nčhixen len de da' čhega'aņ cate' chosozeye' to vaca' dao'.

14 Na' xčhen Criston' da' bedelalje' neče xtola'chon' zaca'chen ca' xčhen beyixe' ca', le xčhenen' čheyonen yichjlažda'ochon' xilaže' len da' xinj da' ba bencho. Da'n'an' bich nchoglaon čhecho gatcho neče xtola'chon', san soaczcho gonxencho Diosen' ben' zoa toli tocaņe. Spiritw čhe Diosen' goclenen Criston' bnežjo cuine' beque'e xtola'chon', na' bibi xtola' Criston' gota'.

15 Criston' bedelalj xčhene' cont gwzolao chac da' coben' dan' gwna Diosen' gone' cont soacho binlo len le'. Na' ba bxi'e' da' coben' cont balteze bene' ba gwlej Diosen' šjasyenite' len le' toli tocaņe. Na' da' got Criston' bedelalj xčhene', da'n'an' gwnitlao xtola' bene' ca' gosejnilaže' Diosen' šlac ne' chon žin dan' gwđixjue' da' nechw dan' gwne' gone' cont chio' bene' Israel soacho binlo len le'.

16 Cate' to bene' ba bene' testament, cate'ch ba gota'bia' ba got bena' ben testamenta', cana'ch gac can' žanņa'.

17 Le to testament bi gac can' žan šlac ne' mban ben' ben len. Cate'ch ba gote' canan' gac can' žanņa'.

18 Na' goc ca' len da' nechon' da' gož Diosen' da' xozxta' ocho ca' gone' gaclene' legaque'. Da' nan' bžie' bia' bosolalje' xchen beyixe' cont gwxen.

19 Cate' da' Moisésen' beyož be'lene' da' xozxta' ocho ca' diža' che yogo' dan' bžia' bia' Diosen' yesone' can' ža ley chen', nach Moisésen' bži'e' legaque' xchen go'n dao' na' xchen šib dao' na' nis. Bži'e' legaque' da' ca' len late' yiša' xa xila' da' mben color xna' na' len to xis yixe' dao' da' nzi' hisopo. Lecze bži'en lao libren' gan' nyoj ley chen'.

20 Na' da' Moisésen' gože' legaque': "Chen ni ben Diosen' mandadw gwžia' le'e cate' gože' chio' nac goncho cont gaclene' chio' gac güen checho can' gwnen'."

21 Na' lecz ca' bene' bži'e' chenna' yodaon' na' yeso' ša' ca' bosochine' gan' gosonxene' Diosen'.

22 Ley dan' bzoj Moisésen' nžian bia' gwže'e' bxozen' chen lo yogo' ze bi da' chosochine' cont yesyeyaquen xilaže' lao Diosen'. Na' leyna' lecze žan še biņa' lalj chen, Diosen' bi yezi' xene' xtoļa' beņachen'.

Criston' gote' blalj xchene' cont beque'e xtoļa' bene' chesejnilaže'ne'

23 Can' goc benen byen bosoži'e' xchen beyixe' lo' yodaon' na' lo da' ca' bosochine' yodaon' cont gosonen žin lao Diosen', na' yodaon' naquen con to l gua'a lsaca' da' chzejni'in can' nac yaban'. Perw da' de yaban' byažjen to chen da' zaca'ch.

24 Na' gan' gwyo'o Criston' gague naquen to yodao' da' naquen con to l gua'a lsaca' cont nezecho can' nac yaban'. Le' beyepe' yaban' na' gwyo'e gan' zoa Diosen' cont chņe' gualaz chio' lagüen'.

25 Bxoz blao che bene' Israel gualaz checho ca' cheso'e yodaon' tni'a tgüiz gan' nzi' Latje gan' Zoa Dios na' chosoži'e' chen che beyixe', perw Criston' bi bnežjw cuine' zan ni'a gosote'ne'. Tni'aze blalj xchene' neche xtoļa' beņachen'.

26 Šaca' byažjen blalj xchene' zan ni'a, ba gote' zan ni'a gwzolaon cate' gwxete yežlion', perw bi benen byen gac che' ca'. Bedelalj xchene' tni'aze cate' gwna Diosen' ba bžin ža che', cont chac cheque'e xtoļa' beņach.

27 Na' can' chac che beņachen', žin ža gat to toe' na' te yesate' nach na Diosen' che to toe' še yesezaca'zi'e o še yesenite' mbalaz.

28 Na' can' yesat beņachen' tni'aze, ca'cze bnežjw cuin Criston' tni'aze gosote'ne' cont chac cheque'e xtoļa' beņachen'. Nach žin ža yide' da' yoble perw gague cont yeque'e xtoļa' beņachen', san cont yeche'e bene' ca' chese-beze' batcan' yide' nach nite' mbalaz len le'.

10

1 Ley da' bzoj da' Moisésen' len costumbr da' nžian bia' goncho cate' gonx-encho Diosen' bzejni'in chio' late' lasze che da' güen da' ba chac checho na'a ba bid Criston'. Perw leyna' bi goc yocoben yichjlaždao' bene' ca' gosejnilaže' Diosen' la'czļa' gosote' beyixe' yogo' iz.

2 Šaca' yichjlažda' ogaque' beyaquen güen cate' gosote' beyixe' ca' na' cate' bxoz ca' bosoži'e' legaque' xchemban' neche xtoļa' gaquen', ba gwnitlao xtoļa' gaquen' to ši'ize šaca', na' bich bi yesacde' lo' yichjlažda' ogüen' che da' xinjen' chesonen'.

3 Perw da' chesote' beyixe' ca' na' bichle da' chesone' neche xtoļa' gaquen' to to iz, bi chac yesanlaže' zjanape' doļa'.

4 Le xchen no go'n dao' no šib dao' bi gac yeca'an xtoļa' beņach.

5 Da' nan' cate' Criston' bide' yežlio nga gože' Diosen':

Dan' chesote' beyix̄e' na' dan' chjasesane' bichle da' chjasesane' laguo', gague da' can' zelažo'.

Zelažo' gwnežjw cuina' gona' can' chazlažo', le da'nan' beno' cont golja benačh.

6 Da' chesote' beyix̄e' chosozeye'ba' laguo' na' yogo' da' ca' chesone' cont yezi'xeno' xtola'gaquen', gague da' can' chbedo'.

7 Da'nan' gwnia' can' nyoj le'e libr gan' žan: "Dios čhia', za'a nga zedeyena' con can' chazlažo'."

8 Zgua'tec Criston' gože' Diosen': "Dan' chesote' beyix̄e' na' dan' chjasesane' bichle da' chjasesane' laguo', na' dan' chosozeye' beyix̄e' cont yezi'xeno' xtola'gaquen', gague da' can' zelažo' na' gague da' can' chbedo'", la'czla' leyna' nžian bia' yogo' da' ca'.

9 Nach Criston' gože' Diosen': "Za'a nga zedeyena' con can' chazlažo'". Da'nan' nezecho ba bzoe' to šla'ale dan' bžie' bia' gotcho beyix̄e' cont yezi'xene' xtola'chon', na' gualaz len, blalj xčhen Criston' cont beque'e xtola'chon'.

10 Na' da' ben Jesucriston' con can' gwyazlaže' Diosen' cate' bnežjw cuine' gosote'ne' tni'aze cani', da'nan' ba beyac yichjlažda'ocho xilaže' lao Diosen', chio' chejnilaže'chone'.

11 To to bxož che bene' Israel gualaz čecho ca' con nita'cze' chesotcze' beyixen' tža tža na' chosoži'e xchemba' can' ža leyna' cheyala' yesone', la'czla' xčhen beyixen' bi gac yeca'an xtola' benačhen'.

12 San Criston' tni'azen' bnežjw yela' mban che' na' zaca'czen cont yeca'an xtola' benačhen' toli tocaņe. Na' beyož bnežjw cuine' zjajchi'e gan' chnabi'e txen len Diosen'.

13 Na' zoe' chbeze' žin ža yosozexjw yichj yogo' bene' chesegue'e le' na' yosozenague' che'.

14 Na' da' bnežjw cuin Criston' tni'aze cani', bene' cont chio' naccho lo na' Diosen' beyac lažda'ochon' xilaže' toli tocaņe.

15 Na' Spiritw čhe Diosen' lecze benen cont nezecho naquen ca', le nyojen, žan:

16 Quinga gona' gaclena' legaque' cate' žin ža, gona' cont šo' yichjgaque' da' nžia' bia' yesone', na' gona' cont yesyebeden' lo' yichjlažda'ogaquen', can' ža Xancho Diosen'.

17 Na' nyoj yeto da' ža Spiritw čhe Diosen', žan:

Na' bich gona' cuent še bi da' malen' ba gosonen' o še bi xtola'gaque' ba gota'.

18 Na' cate' ba gwnitlao xtola'chon' bich chyažžen gotcho no beyix̄e' neče xtola'chon'.

Cheyala' soacho gonxencho Diosen' neca žebcho

19 Bene' migw, nezecho gac šo'cho gan' zoa Diosen' neca žebcho, le Jesucriston' blalj xčhenen' na' beque'e xtola'chon'.

20 Guac nacho gwsaljue' to nez cobe, to da' chonen chio' yela' mban toli tocaņe, le da' bnežjw cuine' gote' neče chio', guac šo'cho gan' zoa Diosen' na' bich naquen ca part yodaon' da' ngaše' len lache' da' ze gan' nono gac šo'.

21 Na' zoa bxož blao chechon' naque' bene' zaca'chgua, na' naque' Xan yogo' chio' gwlej Diosen' cont chejnilaže'chone'.

22 Da'nan' cheyala' soacho gonxencho Diosen' do yichj do laže'cho neca žebcho, na' cheyala' soacho šejle'cho xčhen Jesucriston' ba beca'an xtola'cho, le nezecho ba gwzoacho nis da' chejnilaže'chone'.

²³ Na' can' gwzoloacho be'cho diža' gwnacho šjayzoacho len Diosen', ca'cze cheyała' goncho bate'teze, na' da' li šjayzoaczcho len Diosen', le zoacze' chone' con can' gwnen'.

²⁴ Lecze cheyała' yeyiljwlaže'cho nacle gaclen lježcho cont gaquech lježcho tocho yetocho na' gonchcho da' güen.

²⁵ Na' bi cuejyichjcho da' chdop chžagcho txen chonxencho Diosen' ca chesebejyichj bał bene'. Cheyała' neyoe lježcho soaczcho šejnilaže'cho Criston', na' gonchcho ca' na'a ba nacia' ba zoa te che yežlion'.

²⁶ Še ne' chontezechcho da' xinj la'czła' ba nombia'cho diža' li che Criston', bibi de bichle da' gon žin cont nitlao xtola'chon'.

²⁷ Na' cheyała'cze žebcho gon Diosen' cont saca'zi'cho še ca', na' yeyejcho lo yi' gabilen' gan' cuiayi' yogo' bene' chesegue'e Diosen'.

²⁸ Cani' da' xozxta'cho ca' gosote' note'teze bene' bi bzenague' che ley da' bzoj da' Moisésen', bi besyeyaše'de' legaque', con še gwnita' chope o šone bene' toz can' goso'e diža' che da' xinjen' none'.

²⁹ Na' da' mal juisyoch gac che chio' še gue'echo Xi'in Diosen' na' gaquecho bibi zaca' xchen Criston' da' blalje' cont beque'e xtola'chon' na' še necho che Spiritw che Dios ben' nži'ilaže'de' chio'. Le da' blalj xchen Criston' gwzoloa chac da' cobe da' gwna Diosen' gone' gaclene' bene' yesejnilaže'ne'.

³⁰ Nombia'cho Diosen' na' nezecho len' gwne': "Neda' yoži'a che da' mal da' chesone' na' neda' gona' cont yesezaca'zi'e." Na' lecze nyojen žan: "Xancho Diosen' chogbi'e nac gac che bene' ca' ba gwque'e ca xi'ine'."

³¹ Na' leca naquen da' žebcho še cuejyichjcho Diosen' ben' zoa toli tocañe, le gone' cont saca'zi'cho toli tocañe.

³² Perw le šjayza'laže' can' bchejele da' zan da' gwdi gwxaca'le cate' beyož gwyo'o be'ni' che Criston' lo' yichjlažda'olen'.

³³ Tgüeje gosezi'diže' le'e lao yogo' bene' yež na' tgüeje cate' gosotlate' le'e na' bichle da' bosochi bososaque' le'e, na' da' juisyw da' goquele cate' gosonde' bene' lježle ca'.

³⁴ Beyaše'le bene' lježcho ca' bene' gosata' ližya na' goclenle legaque', na' gwzoale mbalaz la'czła' bene' besegue'e le'e goseque'e bi da' gota' chele, le nezele de da' zaca'č chele yaban' da' bi te chen.

³⁵ Da'nan' bi cuejyichjle da' chejnilaže'le Diosen', neca žeble, le žin ža cate' soachgual mbalaz.

³⁶ Cheyała' gwyo gwchejle cont yeyož gonle yogo'lo' da' chnalaže' Diosen', na' tena' gone' cont soale mbalaz toli tocañe can' gwne'.

³⁷ Can' nyoj Xtiža' Diosen', žan:

La' žinte ža yid ben' seła' gan' zoalen', bich šede'.

³⁸ Na' xi'ina' bene' zjanac bene' güen len neda' yesata' yela' mban che' toli tocañe da' chesejnilaže' neda'.

Na' še bich yesejnilaže' neda', bich yebeda' legaque'.

³⁹ Perw chio' bi naccho ca' bene' ca' bich yesejnilaže'ne', bene' yesebiayi'. Chio' zoaczcho chejnilaže'chone' na' šjayzoacho len Diosen' toli tocañe.

11

Da' chejnilaže'cho Diosen' naquen to da' zejen

¹ Še chejnilaže'cho Diosen' nezecho gac da' güen da' chbezcho gac, na' nezecho gon Diosen' gac can' že' da' biña' le'echo.

² Bał bene' gwlas ca' bebe Diosen' legaque' da' gosejnilaže'ne'.

³ Da' chejnilaže' chone' chejle' cho con gwnie' na' goc yaban' len yežlion'. Na' bibi bĥine' da' le'echo cate' bene' yogo' da' ca' chle'echo.

⁴ Cani' da' xozxta'ocho Abel gwejnilaže' Diosen' na' da'nan' bnežjue' Diosen' to da' gocch da' güen ca da' bnežjw bene' biše' Caín. Na' dan' bebe Diosen' dan' bnežjw Abelen' le', da'nan' gwneze Abelen' naque' bene' güen len Diosen'. Na' la'czła' ba got Abelen', da' gwzoe' gwejnilaže' Diosen', naquen ca to da' ĥneyoen chio' soaczcho šejnilaže' cho Diosen'.

⁵ Na' ľecze da' xozxta'ocho Enoc gwzoe' gwejnilaže' Diosen', na' da'nan' Diosen' bezi' beque'ene' šlac ne' mbane'. Bi gote', con noch no ble'e le'. Na' nyoj Xtıza' Diosen', žan Diosen' bebede' Enoquen' šlac gwzoe' yežlion'.

⁶ Na' Diosen' bi chebede' note'teze bene' bi chejnilaže'ne'. Le note'tez bene' yoj güiže' Diosen' cheyała' šejle'e zoacze Diosen' na' šejle'e gwnežjue' yela' mban toli tocaņe ĥe nota'tez bene' nabden' le' do yichj do laže'.

⁷ Na' ca nac da' Noé, ľecze gwejnilaže' Diosen', na' cate' Diosen' bosnisd'e le' can' za' gac, gwejle' Noén' can' gož Diosen' le', na' do bžebe' bene' to barcw gan' gwoy'e len bene' lo' yo'o ĥe' ca' cont bi gosate' lo nisen'. Na' da' gwejle' Noén' can' gwna Diosen', blo'ede' yezica'chle bene' že' na' zjanape' dola' da' bi bosozenague' ĥe Diosen'. Na' ľecze da' gwejnilaže' Diosen', goc gwna Diosen' naque' bene' güen len le'.

⁸ Da' Abrahanna' ľecze gwejnilaže' Diosen'. Da'nan' bzenague' cate' boļ güiž Diosen' le' na' gože'ne' šeje' ga de to yežlio zito' da' gaquen ĥe'. Na' gweyje' la'czła' bi nombi'e latjen'.

⁹ Na' Abrahanna', da' gwejnilaže' Diosen' jasoe' laž bene' zito' da' gwna Diosen' gac ĥe' na' gac ĥe xi'in diaža ĥe'. Gwzoe' lo' yo'o de lache'ze na' ľecz lo' yo'o de lache'ze gwnita' xi'ine' Isaaquen' na' xi'in xesoe' Jacob bene' ľecze gož Diosen' gac yežlion' ĥegaque'.

¹⁰ Abrahanna' gwzoa gwleze' ca' lo yežlion', le gwnežde' žin ža šjayzoe' gan' zoa Diosen' gan' naquen to ciuda güen da' bi te ĥen, ciuda da' ben Diosen'.

¹¹ Na' Saran' no'ol nac no'ol ĥe Abrahanna', la'czła' naque' bene' güiž na' naque' bene' gole par soa xi'ine', Diosen' bene' to yela' guac cont gwzoa xi'ine', le gwejle'e gon Diosen' con can' gwne' gone'.

¹² Ca' goquen' gwzoa bi' ĥe da' Abrahanna' la'czła' goque' bene' gole par soa xi'ine', nachen' xi'in diaža ĥe' gosaque' bene' zan can' zjanac beljw ca' na' can' nac yox da' ĥi' cho'a nisdaon' da' nono ĥac gwlab.

¹³ Yogo' bene' ca' ne' ĥesejnilaže' Diosen' cate' bžin gosate'. Na' la'czła' biņa' gac lo' na'gaque' dan' gože' ľegaque' gac ĥegaquen', bi gosacžejaže', san gwnite' mbalaz gosejle'e gwžin ža gon Diosen' can' gwnen'. Goso'e diža' zjanaque' ca bene' zito' len bene' že' lo yežlion' na' bibi lažgaque' de lo yežlion'.

¹⁴ Na' da' goso'e diža' bibi lažgaque' de yežlion', nachia' gosezelaže' yesyežine' ga yoble gan' gac lažgaque'.

¹⁵ Šaca' gosone' xbab ĥe yežen' gan' gosaljen' naquen lažgaque', gota' latje jaya'aque' šaca', perw bi gosone' xbabem' ca'.

¹⁶ Gosezelaže' yesyežine' yaban', le gosejle'e na'len' nac lažgaque', na' gosenežde' nacchen güench ca yežlion'. Da'nan' Diosen' bi ĥeto'ede' ĥegaque' že' naque' Dios ben' ĥesonxene', na' ba benšagüe' to ciuda gan' zjanite'.

¹⁷ Na' Abrahanna' da' gwejnilaže' Diosen' da'nan' bzenague' cate' Diosen' bene' le' prueba gože'ne' cheyała' got xi'ine' Isaaquen' lao Diosen' cont gonxene'ne'. Ba zoa gote' xi'inen' la'czła' gwnežde' Diosen' gože'ne':

18 “Gona' cont ñita' xi'ñ diaža chio' bene' yesac xi'ñ diaža che Isaaquen'.”

19 Da' Abrahanna' bechoglaže' gote'be', le gwneзде' Diosen' chac chosbane' bene' guat. Perw na' Diosen' bi be'e latje gote'be'. Da'nana' guac nacho bosbane'be' ladjo bene' guaten', la'czla' gague gotbe'.

20 Gwdechle Isaaquen' gwejnilaže' Diosen'. Da'nana' gwñabde' Diosen' gone' güen len xi'ñe' Jacob na' Esaú.

21 Lecze da' Jacoben' gwejnilaže' Diosen'. Da'nana' cate' ba zoa gate', gwñabde' Diosen' gone' güen len xi'ñ xesoe' ca' bin' gosac xi'ñ da' José. Na' bcheque' yichje' benxene' Diosen' nchiše'teze' carrot che'.

22 Na' da' Josén' gwejnilaže' Diosen', na' gwejle'e žin ža yesyechoj bene' gualaž che' ca' Egipton' can' gwna Diosen'. Nachen' cate' ba zoa gate' bžie' bia' yesyeyo'e žit benat can' cate' yesyeyaque'.

23 Cate' golje da' Moisésen', da' leca gosejnilaže' xaxne'en Diosen', bi be-sežebe' yesyedabague' dan' bžia bia' reyen' yesone', gwne' cheyala' yesote' bi' byo chegaque' ca'. Šone bio' bosocuaše'be' ližgaquen', le gosacde' nacchguabe' xdan.

24 Nach bi' no'ol che rey beque'ebe' boscha'ogüe'be'. Perw cate' ba gwcha'o da' Moisésen' bžone' yesone' le' ca' xi'ñ bi' no'ol che rey che Egipton', le gwejnilaže' Diosen'.

25 Da'nana' gwyazlaže'che' bžaglägüe' txen len bene' gualaž che' ca' yogo' dan' bososaca'zi' bene' Egipto ca' legaque', clcl ca' gone' txen len bene' Egipto ca', le goche'ede' yob te che yela' chebe che da' xinj ca' cheson legaque'.

26 Goclaže' bžaglägüe' can' bžagläo Criston' cont bene' can' gwyazlaže' Diosen', bi gwzelaže' gac che' yogo' yela' gwñi'a da' de che bene' Egipto ca', le gwneзде' gwžin ža gon Diosen' cont soe' mbalaz.

27 Na' da' gwejnilaže' Diosen', bi bžebe' rey cate' bžin ža besyechoje' Egipton' la'czla' reyna' bža'achgüe' legaque', con gwzoacze' bzenague' che Diosen'. Gwneзде' zoacze Diosen' la'czla' bi chle'echone'.

28 Nach Moisésen' da' gwejnilaže' Diosen' bžie' bia' da' xozxta'ocho ca', bene' že' to to yo'o gosote' to xila' dao' na' bosoži'e xchemban' ližgaquen', cont angl bene' nsa' yela' got bibi goc gonde' bi' byo nechw lo' to to yo'o.

29 Na' da' xozxta'ocho ca' gwnita' cani', da' gosejnilaže' Diosen' da'nana' Diosen' bene' cont Nisdao' Xnan' goquen chople, na' bla' yo biž gacholen cont goc goselaguen'. Perw bene' Egipto ca' cate' gosaclaže' leze yeselague' nisdaon', bocuaše' nisa' gan' chesedien', na' gosate' gose'eje' nisen'.

30 Lecze da' gosejnilaže' da' xozxta'ocho ca' Diosen', da'nana' Diosen' bene' cont bebix ze'e da' gwyechj doxen ciuda Jericó cate' gosechje' ze'en yogo' ža lao gaže ža.

31 Na' da' no'olen' le' Rahab, no'olen' goque' no'ol zle', lecze gwejnilaže' Diosen', na' da'nana' bi gwžiaje'e txen len yezica'chle bene' Jericó bene' bi bosozenague' che Diosen', le blebe' chop da' xozxta'ocho ca' ližen' cate' jasegüia jasene'e lažen'.

32 Ba gwnita'ch bene' zan bene' gosejnilaže' Diosen', perw bi de tiemp gua' diža' che da' ben' gože' Gedeón, che da' ben' gože' Barac, che da' ben' gože' Sansón, che da' ben' gože' Jefté, che da' rey David, che da' Samuel, na' che yezica'chle bene' gosoe' xtiža' Diosen' cani'.

33 Da' gosejnilaže' Diosen' besechoje' gosone' gan cate' gosedile' len no' rey, na' bale' gosaque' bene' gwnabia' na' gosone' byen goson bene' yoble da' güen, yebale' besele'ede' ben Diosen' bi da' güen da' gwne' gone' len legaque', yebale'

Diosen' bene' cont bež znia bi gosagwba' legaque' na' bi gosoneba' legaque' zi' cate' gosegüe'e legaque' gan' že'ban'.

³⁴ Lecze da' gosejnilaže' Diosen', bale' bi goseye' cate' bene' bosozale' legaque' lo' yi', yebale' besyele' cate' bene' gosacłaže' yesote' legaque' len spada, yebale' beyon Diosen' legaque' bene' gual cate' bich zjanale', yebale' goclene'ne' gosaque' soldadw gual cont gosone' gan cate' soldadw bene' zito' gosedillene' legaque'.

³⁵ Na' gwnita' no'ol ca' da' gosejnilaže' Diosen' da'nan' Diosen' bosbane' no bene' lo' yo'o chegaque' ladjo bene' guat ca'.

Na' gwnita' bene' yoble, da' gosejnilaže' Diosen' da'nan' gosate', bi gosacłaže' yesyele' lo' na' bene' mal ca'. Goso'e latje bosochi bososaque' legaque', le gosenезде' gwžin cate' Diosen' yechis yosbane' legaque' ladjo bene' guat ca' cont yesenite' len le'.

³⁶ Gwnita' yebal bene' leca gosezi'diža' bene' legaque' na' leca goseyine' legaque', na' bosochije' legaque' gden na' goseyixjue' legaque' ližya.

³⁷ Na' bene' ca' besegue'e legaque' gosote' legaque', bale' bosochele' legaque' jej, yebale' bosozoxje' cuerp chegaquen' len sier, yebale' gosote' len spada. Na' bal bene' ca' gosejnilaže' Diosen' benen byen gosaše' yix'e' zjanyaze' no xa xila' no xa šib. Bibi gota' chegaque', leca nyaše' gosac chegaque' catec bosochi bososaca' bene' legaque'.

³⁸ Gosaš goselaže' do latje daš, do ya'adao', do ga ze bloj na' ga zoa no liž beyixe'. Yogo' da' ca' goc che bene' ca' gosejnilaže' Diosen', la'czła' zjazaca'chgüe' na' bene' že' yežlio nga bi zjazaque' yesenite' txen len legaque'.

³⁹ Diosen' bebede' yogo' bene' ca' da' gosejnilaže' le', perw ślac gosonite' bina' gone' yogo' da' güen da' gwne' gone' che xi'in diaža che da' Abrahanna'.

⁴⁰ Le goclaze' gone' ga gac che chio' zoacho na'a yogo' da' güen da' gwne' gone', cont txen len bene' ca' gosejnilaže'ne' cani', yeyoż gaccho can' chazlažen'.

12

Cheyała' soacho goncho xbab che Jesúsen'

¹ Nezecho ba gwnita' bene' zan gosone' da' güen neche da' gosejnilaže' Diosen', na' dan' gosonen' chzejni'in chio' can' cheyała' goncho. Da'nan' cheyała' gwzoacho ca'ale še bi da' chžonen goncho can' chazlaže' Diosen' na' cuejyichjo bi da' xinj da' choncho, le da' xinjen' chziye'czen chio'. Na' cheyała' soatezcho goncho can' ža Diosen' sin cbi yeche'echo.

² Jesúsen' bene' cont gwzolao chejnilaže'cho Diosen' na' gaclene' chio' cont soaczcho šejnilaže'chone' yežintecho gan' zoe'na'. Na' cheyała' soacho goncho xbab ca' Jesúsen' byo bcheje' len da' gwdi gwxaque' cate' gosote'ne' le'e yag cruzen'. Bi bžone' yesonde' le' da' zan da' naquen da' zban juisyw, le gwneзде' za' gon Diosen' cont soe' mbalaz len le'. Na' na'a Jesúsen' ba chi'e chnabi'e txen len Diosen'.

³ Cheyała' goncho xbab can' byo bchejlaže' Jesúsen' len yogo' da' ca' gosone bene' mal ca' le' na' bene' can' gwna Diosen'. Na' ca'cze cheyała' gwyo gwchejlaže'cho goncho can' chazlaže' Diosen' la'czła' še chaquechon zdebe; bi cheyała' yeche'echo.

⁴ Da' zan da' ba bžaglaole chdillenle da' malen', perw bina' lalj xchenle na' bina' yesote' le'e.

⁵ ¿Ba gonlaže'le can' ža Diosen' chneyoede' chio' can' chon bene' chneyoe xi'ine'? Nyoj xtize'na', žan:

Xi'indagua', bi gacdo' bibi zejen da' chnežjo Xancho Diosen' le' da' saca'zi'o' cate' chono' bi da' xinj,

na' bi gaco' tole cate' chdile' le'.

⁶ Le Xancho Diosen' chzejni'ide' yogo' bene' chacde',

na' chnežjue' da' saca'zi' yogo' bene' ba gwque'e ca xi'ine' cate' chesone' da' xinj.

⁷ Cheyala' gwyo gwchejlaže'cho cate' Diosen' chone' chio' da' saca'zi'cho, le chonde' chio' ca benachen' chonde' xi'ingaque'. Le yogo'ze bidao' chnežjo xaben' lebe' castigw cate' chontezbe' da' xinj.

⁸ Na' še bi chon Diosen' da' saca'zi'cho cate' chontezcho da' xinjen', zeje diža' bi naccho xi'ine', le yogo' bene' ba gwque'e ca xi'ine' chnežjue' da' yesezaca'zi'e cate' chesonteze' da' xinjen'.

⁹ Yogo' xaxna'cho bososgole' chio' yežlio nga na' gosone' castigw checho cate' bi da' xinj bencho, na' nezecho ca'cze cheyala' yesone'. Nacchxe cheyala' gwzenagcho che Xacho Diosen' bite'teze da' chzejni'ide' chio', cont šjayzoacho len le' toli tocañe.

¹⁰ Na' xaxna'chon' to chop izzen' šlac bososgole' chio' gosone' castigw checho con ca gosaclaže'. San Diosen' nezde' bi da' nac güen par chio', na' chdile' chio' na' chone' da' saca'zi'cho cont gaclenen chio' soacho goncho da' güen na' gac lažda'ochon' xilaže' can' nac lažda'ogüen'.

¹¹ Na' bite'tez da' chyi chzaca'cho, šlac chaquen bi chazlaže'chon, perw cate' ba gwden chaclenen goncho da' zej to licha na' chaclenen soacho binloch len xbab da' yo'o lo' yichjlažda'ochon'.

Diosen' gone' da' saca'zi'cho še bi gwzenagcho che'

¹² Da'nan' le soa le gon can' chazlaže' Diosen' sin cbi yeche'ele.

¹³ Le soa le gon da' güen cont gaclenle bene' ca' ne' chesacžejlaže' naquen' yesone' cont legaue' yosozenagche' che Diosen' na' bi yesebejyichje' xtižen'.

¹⁴ Le yeyiljwlaže' nacle gonle soale binlo len yogo'cze bene', na' le gwzenag che Diosen' cont gac lažda'olen' xilaže', le nono yežin gan' zoa Diosen' še bi nac lažda'ogüen' xilaže'.

¹⁵ Le gaclen lježle cont ne tole bi ganlaže'le catequen' nži'ilaže' Diosen' chio', le cate' chzolaochoncho güedenag len Diosen', bedao' chčha'o chxenen na' guacte gonen cont bene' zan yesonche' da' xinj.

¹⁶ Bi gata'lenle bene' byo bi nac bene' chele o no'ole bi nac no'ol chele. Na' bi gue'ele da' naquen da' zaca' len Diosen' can' ben da' bene' gože' Esau', ben' bše'ede' to platw yela' guagw da' cheyala' gwnežjo Diosen' le' dan' golje' goque' bene' nechw.

¹⁷ Nezele gwdechle goclaže' yeyac lo ne'e da' bdie' lo na' bene' biše', perw bich bi goc bi gone' cont yeyaquen lo ne'e la'czla' gwcheže' catec gwzelažen'.

¹⁸ Nža'le chac che chio' na'a na' can' goc che da' xozxta'ocho cani' cate' Diosen' bnežjue' legaue' ley chen'. Cate' betje' lo ya'a Sinai gwyechj yi' bel ya'ana', gwxoan žen, beyaquen chol, na' gwyechjchgua be'.

¹⁹ Gosende' gwchež to trompeta, na' gosende' be' Diosen' diža' len legaue'. Na' besežebchgüe' na' gosata'yoede' Moisésen' bich güe'len Diosen' legaue' diža'.

²⁰ Besežebchgüe', le Diosen' ba gožle' legaue' še noe' yesebigue' lo ya'an cheyala' yesote'ne' yosochele'ne' yej, na' lecz ca' yesone' še len beyixe'.

²¹ Da' zaca' žebcho goc lo ya'an, lente da' Moisésen' gwne': "Leca chaž chžeba' can' chaquen'."

²² Perw chio' chejnilaže'cho Criston' ba naccho txen len Diosen' ben' zoa toli tocaņe na' len yogo' angl che' bene' že' yaban' chesonxene'ne', bene' zjanaque' bene' zan juisyw. Da'nan' guac nacho ba gwbiga'cho lo ya'a Sión dan' lecze nzin' ciuda Jerusalén da' chi' yaba gan' zoa Diosen'.

²³ Na' naccho txen len yogo'lołte bene' chesedop chesežag chesonxene' Jesucriston' gate'teze, bene' zjanyoj lagaque' le'e libr che Diosen' da' de yaban'. Na' yogo' chio' chejnilaže'chone' zaca'lebcho ca bi' nechw to lo' yo'o, bi' chzi' byen che xaxna'be', le si'cho da' güen da' gon Diosen' chio'. Na' naccho txen len Diosen' bene' choglaogüen' che yogo' benach še de xtola'gague'. Lecze naccho txen len bene' ca' ba gosat, bene' gosaque' bene' güen lao Diosen' da' gosejnilaže'ne', na' na'a ba beyož zjanacyane' can' chaclaže' Diosen'.

²⁴ Na' naccho txen len Jesús ben' blalj xchene' cont gwzolao chac da' coben' da' gwna Diosen' gone' gaclene' benachen'. Na' blalj xchenen' cont ba bnitlao Diosen' xtola' chio' chejnilaže'chone'. Da'nan' xchen Jesús en' zaca'chen ca xchen da' Abelen' da' gwłalj caten' betw bene' bišen' le'.

²⁵ Da' mal juisyw še goncho güedenag len Diosen' cate' chne' chio'. Bene' cont gosezaca'zi' da' xozxta'ocho ca' cate' gosone' güedenag len xtizen' da' gwnelene' legaque' lo yežlion' cani', na' gonche' da' saca'zi' chio' še goncho güedenag len xtizen' da' choe'lene' chio' lo' lažda'ochon' zoe' yaba na'ate.

²⁶ Leca gwxo' cate' Diosen' betje' lo ya'a Sinaín' cont be'lene' da' xozxta'ocho ca' diža'. Na' na'a ba gwne': "Gwžin ža cate' gona' xo' yežlion' da' yoble, perw gague yežlio na'zen', san lente yogo' da' chle'echo le'e yaba."

²⁷ Na' da' gwne' gone' xo' da' yoble, zejen te che yogo' da' ca' ben Diosen' da' chle'echo, perw bi te che Diosen' na' che yogo' da' güen da' chone' da' bi chle'echo.

²⁸ Da'nan' cheyała' güe'cho yeła' choxcen che Diosen' da' gone' cont šjayzoacho mbalaz txen len le' gan' chnabi'e, na' gague da' te che da' güen da' gac checho len le'. Nach lecze cheyała' gache'echo bene' zaca'chgua nac Diosen' cont gonxenchone' do yichj do laže'cho can' chazlažen'.

²⁹ Cheyała' gwzenagcho chen', le Dios chechon' leca chgue'ede' da' malen', na' sele' lo yi' gabil bene' ca' bi yesyetinjde' che da' xinjen', da'nan' zaca'lebde' ca' yi' bel.

13

Da' chazlaže' Diosen' goncho

¹ Bitw gwsanle gague lježle, le yogo'cho chejnilaže'cho Jesucriston' naccho ca biše' lježcho.

² Na' bi ganlaže'le cheyała' gwleble bene' za'ac zito' ližlen' bene' chesejni-laže' Jesucriston'. Bał xozxta'ocho ca' cate' bosolebe' bene' zito' ližgaquen' bosolebe' angl bene' gwseła' Diosen' neca gosache'ede'.

³ Cheyała' gonle xbab che bene' lježcho ca' chesata' ližya cont gaclenle legaque'. Na' cheyała' gonle xbab can' gale'le šaca' chac chele can' chac che bene' ca'. Na' bi ganlaže'le bene' lježcho bi da' chosoči chososaca' bene' legaque', le šlac ne' mbancho, cuerp chechon' guac saca'zin' da' quinga. Na' cheyała' gonle xbab can' gale'le šaca' chac chele can' chac che bene' ca'.

⁴ Na' le'e nšagna'le, yogo'le le soa do laže'le len no'ol chele o bene' chele na' bi talenle bene' yoble, le Diosen' gone' saca'zi' bene' chesata'lene' no'ole bi zjanac no'ol chegaque' o bene' byo bi zjanac bene' chegaque'.

⁵ Bi cheyała' selaže'cho mechon', san cheyała' soacho becho bi da' dao' da' de checho, le Diosen' ba gwne' che to tocho: "Bi ganlaža' le' na' bi cuejyichja' le'."

⁶ Da'nan' bibi de da' žebcho, na' to tocho guac nacho:

Xana' Diosen' zoe' chaclene' neda'.

Bi žeba' bi da' gone benachen' neda'.

⁷ Le šjayze'e bene' gwnita' bosozejni'ide' le'e xtiža' Diosen'. Le gon xbab can' gosone' cont yogo'ze bene' gosacbe'ede' gosenite' gosejnilaže' Diosen', na' le nita' le šejnilaže' Diosen' can' gosonen'.

⁸ Na' can' nac yichjlaždao' Jesucriston' nej nase, ca'czen' naque' ža na'aža, na' ca'czen' gaque' toli tocane.

⁹ Bi güe'le latje yeseziye' bene' le'e len bi diža' yoble da' chosozejni'ide', le nža' xen can' chososed chosolo'e bale'. Da' chon Diosen' lo' lažda'ochon' neče da' nži'ilaže'chgüede' chio', lenna' chaclenen chio', gague da' ca' chesena bene' cheyała' ye'ej gagwcho. Na' ca nac da' ca' chesene' cheyała' ye'ej gagwcho cont yebe Diosen' chio', biña' yesaclenen bene' ca' chesene' cheyała' gagwchon, na' neca gaclenen chio'.

¹⁰ Xancho Jesucriston' bnežjw cuine' gosote'ne' neče chio', na' da' chejni-laže'chone' ba gwnitlao xtoła'chon'; perw bene' ca' ne' chosolalje' xchen beyixe' na' chosozeye'ba' cate' chesenabe' yezi'xen Diosen' čhegaque', da' got Jesucriston' bi chaclenen legaue'.

¹¹ Nezecho tni'a tguiz bene' nac bžoz blao che bene' Israel gualaž checho ca' chesote' beyixe' na' chjasesane' xchemba' lo' yodao' gana' nzi' Latje ga Zoa Dios cont chnabde'ne' yezi'xene' xtoła' yogo'lol gague'. Nach yezica'chle bžoz ca' chosozeye' cuerp che beyixe' ca' cho'a yežen'.

¹² Na' ca ca'le goc che Jesús'en' dan' gosote'ne' cho'a ciuda Jerusalénna' cate' bnežjw cuine' cont beque'e xtoła'chon' len xčene' dan' blaljen'.

¹³ Da'nan' cheyała' šejnilaže'cho Jesús'en' na' cuejyichjcho costumbr gol ca', la'czla' yesegue'e bene' chio' da' choncho ca'.

¹⁴ Gate'tez zoacho lo' yežlio nga da' te čen, perw chbezcho šjayzoalencho Diosen' lo' ciuda da' bi te čen.

¹⁵ Da' ba beca'a Jesucriston' xtoła'chon' cheyała' güe'cho yela' choxcen che Diosen' yešlale mbancho, gonxenchone' len xtiža'chon'. Lenna' da' chaclaže' Diosen' güe'chone'.

¹⁶ Na' cheyała' soacho goncho da' güen na' cheyała' gwnežjwcho con gaca'te da' saque' gwnežjwcho gaclencho bene' bi de čhegaque', le chazlaže' Diosen' cate' chonxenchone' choncho ca'.

¹⁷ Le gwzenag che bene' chososed cheselo'ede' le'e xtiža' Diosen' na' le güe' latje yesene' naquen' gonle, le chosogüia chesene'e le'e cont chesaclene' le'e len yichjlažda'olen', na' legaue' cheyała' yosyodie' cuent lao Diosen' še naquen' ba gosone'. Le gwzenag čhegaque' cont yesyebede' na' cont da' chesone' bi gaquen to da' zdebe, le še gonle güedenag len legaue', bibi da' güen chga'an čele še ca'.

¹⁸ Le nab cont gaclen Diosen' neto'. Nezeto' chonto' can' chazlaže' Diosen' na' chaclaže'to' gonto' con da' naquen güen.

¹⁹ Na' leca chata'yoeda' le'e yol güižle Diosen' nable yob gac yidcha' gan' zoalen'.

Čhnabe' gaclen Diosen' legaue'

²⁰ Na' na'a zoa Diosen' chone' cont zoa chbezcho binlo len xbab da' yo'o lo' yichjlažda'ochon'. Len' bečhis bosbane' Xancho Jesucriston' ladjo bene' guat,

le da' blalj xchenen' le'e yag cruzen' gwzolao chac da' cobe da' gwna Diosen' gone' gaclene' bene' yesejnilaže'ne'; na' gague da' te che dan' gwne' gonen'. Na' da' nži'ilaže' Xancho Jesucriston' chio', zaca'lebde' ca to bene' güeye' xila' bene' chon da' güen juisyw len be che' ca'.

²¹ Na' chñabda' Diosen' gaclene' le'e bite'tez da' chyažjele cont soale gonle yogo'te da' güen can' chazlažen', na' gone' cont gac yichjlažda'ochon' cayanen' chaclaže' lagüe da' nombia'cho Jesucriston'. Le gonxen Jesucriston' toli tocanē. Na' ca' gonšcaczcho.

²² Bene' migw, chñabšca' bi gaquele zed da' ba bzoja' le'e chñeyoeda' le'e nga, le bitec naquen da' tone.

²³ Na' chzenda' le'e bene' migw checho Timoteon' ba bechoje' ližyan' na' chbeza'ne' nga. Na' še yob yele'e nach chi'ane' cate' yedena'a le'e.

²⁴ Ca nac neda', chguapa' tiox bene' blao ca' chosozejni'ide' le'e na' chosogüia chesene'e le'e, na' lecze chguapa' tiox yogo' nochle bene' chesejni-laže' Diosen'. Bene' lježcho ca' za'ac Italia lecze chosoguape' le'e tiox.

²⁵ Diosen' gaclenšque' le'e. Da' na'zen' chzoja'.

CART DAN' BZOJ SANTIAGO

Santiago'n chguape' tiox bene' ca' zjanaslas zan yež

1 Neda' Santiago naca' bene' güen žin che Diosen' na' che Xancho Jesu-
criston'. Chguapa' le'e tiox, le'e nacle šižinw cue' xi'in diaža che da' Israel,
le'e chejnilaže'le Jesucriston' na' naslasle yežlion'.

Nac nezecho can' che'ne Diosen' goncho

2 Bene' migw, cheyala' yebechgüecho cate' chac bite'teze da' chac checho.

3 Cate' chac bi da' chac checho chonen chio' prueba še gonchachlaže'cho
šejnilaže'cho Diosen'. Na' nezecho cate' chonchachlaže'cho chejnilaže'chone',
chaclenen chio' cont gapchcho yela' chxenlaže' len bite'teze da' chac checho.

4 Na' da'nan' cheyala' gapple yela' chxenlaže' bite'teze dan' chac chele na'
gonchachlaže'le šejnilaže'le Diosen' cont gacle can' chaclaže' le'.

5 Note'tezcho cate' bi nezecho naquen' chaclaže' Diosen' goncho, cheyala'
nabechone' gwzejni'iden' chio', na' gwzejni'iczeden'. Le chebede' chaclene'
chio', na' bitw chdile' chio' cate' chnabechone' gaclene' chio'.

6 Perw cate' chnabechone' gwzejni'ide' chio', cheyala' šejle'cho chzenagcze'
chechon' na' bitw gaczejlaže'cho. Bena' chaczejlaže' še chzenag Diosen' che',
zaca'lebbe' ca nisdao' dan' chas chata' cate' chechj be' lagüen' na' chjatan' nile
na'le.

7 Ben' chaczejlaže' še chzenag Diosen' che', bitw cheyala' soe' lez gwnežjw
Diosen' le' bite'teze da' chnabe'.

8 Na' ben' chon ca' bitw neзде' bi xbab chone', con šayichj šayen chaque' len
bite'teze dan' chonen'.

9 Na' bene' migw, le'e chejnilaže'le Diosen', še nole nacle bene' yaše', le soa
mbalaz, le nacle bene' zaque' len Diosen'.

10 Na' bene' migw, še nole nacle bene' gwni'a, le soa mbalaz dan' ba
chache'ele lao Diosen' bitw zaca'chle clel ca yezica'chle bene'; na' yob te che
yela' gwni'an' can' chde che yej ca' zjaze yixe'.

11 Cate' chna'chgua gwbižen' chesecud yixe' ca', na' cheseyinj laga' che
yejen' na' bich chosolo'en xdan. Can' chac len yej ca', lecze can' gac len bene'
gwni'a ca', yeyol yenite' lao xšinen'.

Cheyala' soateze soacho šejnilaže'cho Jesucriston' bite'teze dan' chac checho

12 Še chyo chchejlaže'cho len da' chac checho na' chonchachlaže'cho
chejnilaže'cho Diosen', nachen' leca mbalaz zoacho. Na' cate' te dan' chyi
chzaca'chon', Diosen' gone' cont bancho len le' toli tocanē can' gwne' ban
yogo'cho chaquechone'.

13 Na' note'tezcho cate' žan goncho da' malen', bitw gac nacho Dios nan'
chgo'oyele' chio' goncho da' malen', le Diosen' bitw chgo'oyele' bene' yesone'
da' mal. Lecze ca' le', bitw bi de da' chgo'oyela' le' cont gone' da' malen'.

14 Yela' chzelaže' checho dan' yo'o lo' yichjlažda'ocho chonen cont chze-
laže'cho choncho da' mal.

15 Na' še ba choncho can' ža yela' chzelaže' dan' yo'o lo' yichjlažda'ochon' na'
zoacho choncho da' malen', nach gwžin ža cate' cuejyichj Diosen' chio' na'
bitw šjayzoacho len le'.

16 Bene' migw, bitw siye' cuinle gonle xbab Dios nan' chgo'oyele' le'e cont
gonle da' malen'.

17 Dios ben' zoa yaba, le'na' chsele' da' güen da' chac checho na' da' de checho. Xacho Dios ben' ben gwbiž, bio' na' beljw ca' cont chososenin' len chio', chone' cont gac güen checho, na' bitw chše'e ca chone' len chio', bia'cze zoacze' chone' güen.

18 Gwyazlaže' Diosen' bocobe' yichjlažda'ochon' cate' gweyle'cho che diža' li chen'. Na' ba bocobe' yichjlažda'ochon' cont žialaocho len bene' nechw ca' chesejnilaže'ne'. Na' da' ba bocobe' yichjlaždao' chio', nezecho za' gone' ca' len bene' zan.

Can' goncho cont yebe Diosen' chio'

19 Bene' migw, nezele cheyala' yebecho gwzenagcho che diža' güen, na' cheyala' goncho xbab cate' za' necho, na' neca la' ža'atecho.

20 Cate' chža'acho, bitw chac goncho güen can' chaclaže' Diosen' goncho.

21 Da'nan' cheyala' cuejyichjcho yogo'lo' da' xinjen' ba benchon' na' yogo'lo' da' chgue'e Diosen' da' gwcha'o gw Xenen lo' yichjlažda'ochcho cate' biña' šejnilaže'chone'. Cheyala' gwzexjw yichjcho na' gwzenagcho diža' li che Diosen' dan' ba yo'o lo' yichjlažda'ochon', cont gata' yela' mban checho toli tocanē.

22 Na' cheyala' goncho dan' ža diža' li che Diosen' goncho, gague con yenezcho can' žanna'. Le še con chenecho can' žanna' na' bi chonchon, chziye'ze cuincho še ca'.

23 Ben' chene diža' li che Diosen' na' bi chone' can' žanna', zaca'lebbe' ca to bene' chna' cho'alagüen' lo spejw,

24 le con chne'e can' nac cho'alagüen' na' cate' ba beyož gwne'en la' cheyanlažtie' can' naquenna'.

25 Perw bene' zoacze' chzenague' xtiža' Diosen' do yichj do laže' na' chone' can' žanna' sin čbi yeyanlažen', benan' soe' mbalaz, le xtiža' Diosen' chaclenen le' bite'tez da' chone'.

26 Note'tezcho še choncho xbab choncho can' chazlaže' Diosen', perw bi chnabia' cuincho cont bi necho diža' mal, chziye'cze cuincho še ca'. Le še xtiža'chon' bi naquen güen lao Diosen', bitw chebede' bite'tez dan' choncho še ca'.

27 Še goncho can' chebe Xacho Diosen', gaclencho no'ole güezeb ca' na' bi' güezeb ca' še bi dan' cheseyajde', na' cuejyichjcho bich goncho da' xinj dan' cheson bene' ca' bi zjanombia' Diosen'.

2

Toze can' cheyala' goncho len yogo' bene'

1 Bene' migw, Xancho Jesucriston' naque' la'zelagüe bene' zaca', na' še chejnilaže'chone', toze can' cheyala' goncho len note'teze bene', bitw nacho balže bene' gonxennguachone' na' yebale' gonechone' nacteze.

2 Še yesela' čhope bene' gan' chdop chžagcho chonxencho Jesucriston', na' toe' naque' bene' gwni'a na' nyaze' lache' šagüe' lache' xdan, na' ngo'o xbenen' to niy de oro, na' ben' yeto naque' bene' yaše' na' nyaze' lache' de'exo', toze can' cheyala' goncho len chope'.

3 Bitw naquen güen še gonxencho bene' gwni'a na'ze na' ye'chone': "Gwche'edo' lo yag siy nga ga nac binlo", na' ye'cho bene' yaše'na': "Gwzechateze do dan' na'le", o še ye'chone': "Gwche'etezdo' lo yo".

4 Bitw naquen güen lao Diosen' še cuinzcho choglaochon nacho noen' zaque' na' noen' bi zaca'. Xbab chechon' naquen da' mal še goncho ca'.

5 Bene' migw, Diosen' ba gwleje' zan bene' yaše' zjanaque' xi'ine' na' chesejnilaže'chgüe' le'. Na' yesenite' mbalaz cate' yesyežine' gan' zoen' chnabi'e, can' gwna Diosen' gac che note'teze chio' chaquecho le'.

6 Perw na' chonle bene' yaše' ca' ca bene' bibi zjazaca'. Na' bene' gwni'a ca' chongaclene' ca bene' zjazaca'chgua; len legaquen' chosoči chososaque' le'e na' cheseche'xoxje' le'e lao justis ca'.

7 Lecze legaquen' chosožie' yela' ya' che Jesucriston' ben' naccho txen, ben' naque' bene' zaca'.

8 Ley dan' nac da' žialao lao yogo' da' ca' nyela' le'e Xtiža' Diosen' žan: "Le gaque ljež benačle ca chaque cuinle." Še da' licze chonle can' žanna' choncze güen.

9 Perw ley che Diosen' chchoglaon chele nape doła' še chonxenle ba bene' na' yebale' chongaclene' ca bene' bibi zaca'.

10 Can' naquen, note'teze bene' zoe' chone' dołol can' ža leyna', perw na' še ba gwchoe' to da' dao', len doxen leyna' chape' doła' še ca'.

11 Diosen' ben' gwna: "Bitw gata'lenle no'ole bi nac no'ol chele o bene' byo bi nac bene' chele", lecen' gwne': "Bi gotle bene'". Na' la'czla' bitw chata'lencho no'ole bi nac no'ol checho o bene' byo bi nac bene' checho, še ba naccho bene' güet bene', bia'cze napcho doła' len leyna'.

12 Xtiža' Diosen' chaclenen chio' cont bi gwzenagcho che da' malen'. Na' cheyala' güe'cho diža' güen na' soacho goncho bichle can' žanna', le Diosen' gone' da' saca'zi'cho še bi choncho can' žanna'.

13 Diosen' gwnežjwchgüe' da' saca'zi' bene' ca' bi chesyeyaše' chesyezi'ilaže'de' ljež benače'. Perw bene' ca' chesyeyaše' chesyezi'ilaže'de' ljež benače', Diosen' yeyaše' yeži'ilaže'de' legaque'.

Bitwbi zejen še con žacho chejnilaže'cho Jesucriston'

14 Bene' migw, še to bene' že' chejnilaže' Jesucriston' perw bi chone' da' nac güen, bitwbi zejen že' ca'. Bitw chaclenen le' cont gata' yela' mban che' toli tocane še con žaze' ca'.

15 Ba bene' lježcho bene' chesejnilaže' Jesucriston' bi de da' yese'ej yesagüe' na' bi de xalana'gaque'.

16 Na' še bitw gaclenchone' len dan' cheseyažjde', še con ye'chone': "Le šjaya'ac to šagüe' to güen na' Diosen' gaclene' le'e cont želele dan' chyažjelen'", bitwbi zejen dan' con načo ca'.

17 Da'n'an', še con žacho chejnilaže'cho Jesucriston' perw bitw choncho da' nac da' güen, bitwcze bi zejen dan' žacho chejnilaže'chonen'.

18 Nita' bene' chesene' guac yesejnilaže' Jesucriston' la ca yesone' da' nac da' güen. Na' lecze nita' bene' chesene' še chejnilaže'cho Jesucriston' cheyala' goncho da' nac güen. Na' žia' le'e, še načo chejnilaže'cho Jesucriston' perw bitw choncho da' güen, bitw nachbia' še chejnilaže'chone'. Perw še da' li chejnilaže'chone' nach soacho goncho da' güen na' yesache'e bene' le chejnilaže'chonen'.

19 Chejle'cho toze Diosen' zaque' gonxenchone', na' ca'czen' cheyala' šejle'cho. Perw gague da' ca'zen' cheyala' goncho. Da' xigüe' ca' lecze chesejlen' toze Diosen' naque' bene' zaca' na' chesexizen chesežeben.

20 Chnecho diža' da' bi zejen še con žacho chejnilaže'cho Jesucriston' na' bitw choncho da' güenna', le bi gaclenen chio' še con žacho chejnilaže'chone'.

21 Da' xoxxta' ocho Abrahanna' blo'e le gwejnilaže' Diosen' dan' bzenague' che Diosen'. Da'n'an' bzande' xi'ine' Isaaquen' gote'be' cont gonxene' Diosen'.

Na' dan' bzenague' che Diosen', da'nana' Diosen' gwne' che' le naque' bene' güen len le'.

²² Na' nezecho can' ben da' Abrahanna', gague con gwyejnilaže'ze Diosen', san lecze bzenague' che'. Na' dan' bene' ca' blo'e le gwyejnilaže' Diosen'.

²³ Da'nana' goc can' nyoj Xtiža' Diosen' che', žan: "Abraham gwyejnilaže' Diosen' na' da'nana' Diosen' gwne' naque' bene' güen len le'." Na' lecze nyojen che Abrahanna' goque' bene' xmigw Dios.

²⁴ Can' naquen, gague dan' žacho chejnilaže'cho Dios nan' že' naccho bene' güen len le', san dan' chzenagcho che', da'nana' že' naccho bene' güen len le'.

²⁵ Na' da' Rahab goque' no'ole zle' no'ol con gwyej len note'teze bene' byo, perw bzenague' che Diosen' cate' blebe' bene' ca' chope jasegüia jasene'e laže'na'. Na' blo'ede' legaque' yetole nez ga jaya'aque' cont bi jasyexen soldadw che rey legaque'. Na' dan' godlene' bene' ca', blo'e gwyejnilaže' Diosen'. Na' gwna Diosen' naque' bene' güen len le'.

²⁶ Quinga naquen: Še to bene' bich nye'e biš grasyw, nacbja' naque' bene' guat. Ca'czen' naquen, še bitw choncho da' güen nacbia' bitw chejnilaže'cho Diosen' la'czla' žacho chejnilaže'chone'.

3

Choncho da' xinj len xtiža'cho

¹ Bene' migw, nezecho neto' chsed chlo'eto' bene' yoble xtiža' Diosen' saca'zi'chto' še bi gonto' can' žanna'. Da'nana' žia' le'e, gague la' si'te lo na'le gwswd gwlo'ele bene' yoble xtiža' Diosen'.

² Zan ni'a yogo'cho choncho da' xinj. Perw še to bene' bitw chone' da' xinj len xtiže'na', nacchgüe' bene' güen na' gwzoczdde' nabic' doxen cuerp čhen' še ca'.

³ Caten' chgo'ocho freno cho'a cabayw ca' cont yosozenagba' checho, na' šja'acba' con gate'teze chaclaže'cho šejlenchoba'.

⁴ Na' lecze bene' ca' chososa' barcw xen ca' chosochine' yag da'oze dan' chosose'eden' cont chejen con gate'teze chesende', la'czla' še chžiga' to be' gual legaquen'.

⁵ Ca'czen' naquen len lože'chon'. Toze da' dao' rizen' naquen lao cuerp chechon', perw chac chñelenchon diža' da' zjazaca'. Na' ca nac to yi' dao' riz, guac gwzeyen to ya'adao' xen, ca'czen' naquen len lože'chon' cate' chñelenchon diža' mal.

⁶ Lože'chon' naquen to da' chnabia' chonchguan da' xinj juisyw lao doxen cuerp chechon'. Lože'chon' naquen ca to yi' beł da' chla'an chca'an nile na'le chzeyen bite'teze da' de, le še choe'cho diža' malen' chya'la'ch yogo'lo'te da' xinj dan' chonchon', na' chonen cont zoacho chonchguacho da' xinj yešlale mbancho. Na' che gwxiyen' chzenagcho caten' choe'cho diža' mal ca'.

⁷ Chac chnabia'cho yogo'te beyixe', be žia tap ni'a na', be žia xil, be chda nxobe le'e, na' be ca' že' lo' nis. Ba gwnita' bene' gosnabi'eba'.

⁸ Perw ne to chio' bitw soečo lože'chon' cont bi güe'lenchon diža' mal. Con zoacho choe'cho diža' malen', na' diža' mal dan' choe'chon' zaca'leben ca venen che to beł znia.

⁹ Len xtiža'chon' chonxencho Dios ben' naque' Xacho. Na' lecze len xtiža'chon' chžiacho yela' ya' che ljež benachcho bene' ca' ben Diosen' can' nac le'.

¹⁰ Na' cho'acho na' chchoj diža' šagüe' cate' chonxencho Diosen' na' ľecze chchoj diža' mal cate' chžiacho yela' ya' che ľjež benachcho. Beņe' migw, bitw choncho ca cheyaļa' goncho.

¹¹ Nezecho ga chal nis bitw žia nis sia na' nis zbpaj toz bej.

¹² Na' ľecze ca' beņe' migw, nezecho to yag yixgüigw bitw chbian frut dan' nzi' aceituna, na' neca yag uvas chbian yixgüigw. Na' ľecze ca' ga chal nis, bitw chchoj nis sia to bej ga žia nis zbpaj.

Can' goncho še Diosen' ba beņe' chio' yela' sina' chen'

¹³ Še note'tezle žale nacle beņe' sina' na' chejni'ile xtiža' Diosen', cheyaļa' gonle yogo'loľ can' chazlaže' Diosen'. Cheyaļa' gonle da' güen sin cbi gonxen cuinle cont nacia' nacle beņe' sina'.

¹⁴ Perw še chgue'e ľježle na' chzelaže'le gacchle beņe' blaoch ca beņe' ľježle, bitw cheyaļa' nale nacle bene' sina', ľe con chonlaže'len' še ca'.

¹⁵ Na' še chgue'e ľježle na' chzelaže'le gacle beņe' blaoch ca beņe' ľježle, bitw nacle beņe' sina', san xbab chelen' zan' che Satanás dan' chnabia' da' xigüe' ca', na' con chonle da' xinjen' can' ža lažda'olen' na' can' cheson beņe' ca' bi zjanombia' Diosen'.

¹⁶ Še chgue'e ľježcho na' chzelaže'cho gaccho beņe' blaoch ca ľegaque', bitw zoacho binlo len ľegaque' še ca', na' choncho yogo'te da' xinj.

¹⁷ Cate' Diosen' chone' chio' yela' sina' chen', chaclaže'cho goncho yogo' da' nac da' güen. Chaclaže'cho soacho binlo len ľježcho na' naccho beņe' xenlaže' na' chzexjw yichjcho cont chzenag che ľježcho. Na' ľecze cheyaše' cheži'ilaže' ľježcho na' choncho da' güen len ľegaque', na' toz ca choncho len note'tez beņe'. Na' bite'tez da' choncho, chonchon do laže'cho.

¹⁸ Nach še chebecho yesezoa yesebez beņe' binlo na' chaclencho beņe' yezica'chle cont yesezoa yesebeze' binlo, na' chaclenen cont yeson beņe' da' güen.

4

Bitw gac goncho can' cheson beņe' bi zjanombia' Diosen'

¹ Chdile chšašlen ľježle, na' chonle ca' dan' yo'o nyaz da' malen' yichjlažda'olen' na' chnabian' le'e cont chonle con ca žan chele.

² Chzelaže'chgualē bi da' gata' chele na' chdile chšašlen ľježle na' chaclaže'tele gotle beņe' cont gata' chele dan' chzelaže'len'. Perw bitw gata' dan' che'nelen' lagüete chonle da' xinj na' bi chñabele Diosen' gone' cont gata' dan' chyažjelen'.

³ Na' cate' chñabele Diosen' gone' cont gata' bi dan' gata' chele, bitw chonen', ľe con che'nele gata' dan' chzelaže'le lo' lažda'olen' cont gonle con nacteze žan chele.

⁴ Na' da' chzenagle che dan' ža xbab chelen' na' chonle can' chzelažen'na', chonle txen len bene' ca' bi zjanombia' Diosen', na' chonle contr Diosen'. Na' note'tezcho še chaclaže'cho goncho txen len beņe' mal ca', choncho contr Diosen' na' bich chaquechone' ca cheyaļa'. Zaca'lebcho ca to no'ole nzoa xto, no'ole ben' bich chacde' beņe' che'.

⁵ Chonljale xbab Xtiža' Diosen' bitw bi zacan' gan' nyojen žan: "Spiritw che Diosen' dan' zoan lo' lažda'ochon' chzelaže'chguan gwzenagcho che toz Diosen'."

⁶ Diosen' chaclenchgüe' chio' cont chzenagcho che toz ľe'. Da'nan' nyoj Xtiža' Diosen' žan: "Diosen' chone' contr beņe' ca' chesonxen cuingaque', perw chaclene' beņe' ca' chesacbe'ede' bi chosozenague' che' ca cheyaļa'."

7 Da'nan' cheyała' gon cuincho lo na' Diosen' na' gwyo gwçhejlaže'cho bi gwzenagcho çe Satanásen'. Še goncho ca', gwcuasecen ca'ale.

8 Le soa le yol güiz Diosen', nach soe' gaclene' le'e. Cheyała' cuejyichjle da' xinj da' chonle. Na' še chonle xbab guac gonxencho Diosen' na' gontezcho can' za lažda'ochon', clelen' chonle xbaben' še ca', na' cheyała' güe'le latje yeyon Diosen' yichjlažda'olen' xilaže'.

9 Bi cheyała' yebele, san cheyała' yegüine'le neçe da' xinjen' ba benlen' na' yeto'ele çen.

10 Cheyała' gwzexjw yichjle lao Xancho Diosen', nach Diosen' gone' cont gacxenle.

Bi cheyała' nacho çe lježcho nape' doła'

11 Bene' migw, bi cheyała' nelaicho çe lježcho. Ben' chnelagüe' çe lježe' o chosbaguede' lježe', benan' chne' çe ley çe Diosen' na' chzoe' leyna' ca'ale. Na' nezecho ben' chon ca' bi chzenague' çe leyna'. Na' dan' chon cuine' ca bene' zaque' cont že' çe bene' lježe' nape' doła', chone' ley çe Diosen' ca to da' bibi zaca'.

12 Toz Dios nan' gwdixjue' leyna', na' toz le'na' zaque' çhoglagüe' çe to tocho še napcho doła'. Na' toz le' zaque' gone' cont bi šjaya'ac bene' lo yi' gabilen', na' lecze zaque' cont yesele' bene' lo yi' gabilen'. Perw chio' bitw zaca'cho nacho çe bene' lježcho zjanape' doła'.

Bitw nezecho bin' gac gwxe güizj

13 Na' le gwzenag da' nga: Balle chçhogbia'len šejle to ga šejle gonle negosyw cont gonle gan. Na' chbejle to za cate' šejle na' chçhogbia'len yega'anle na' tgüiz,

14 neca chacbe'ele bi nezecho bin' gac çecho o nac goncho gwxe güizj. Yela' mban çechon' zaca'leben ca to bejw, le bejon' šlože chle'echon na' cheyasen.

15 Cheyała' nacho: "Še Xancho Diosen' gone' latje bancho, na' goncho to da' goncho."

16 Perw da' xinjen' choncho še chonxen cuincho chžiacho bia' naquen' goncho sin cbi nabecho Diosen'.

17 Na' še nezecho cheyała' goncho da' nac güen na' bi chonchon, napcho doła' lao Diosen'.

5

Da' malchgua gac çe bene' gwni'a ca' bene' bi chosozenag çe Diosen'

1 Na' ca nac le'e bene' gwni'a, le'e bi chzenagle çe Diosen', le soayaše' na' le cuežyaše', le leca za' saca'zi'le.

2 Lao Diosen' dan' de çeche naquen ca to da' ba chbiayi', na' lache' šagüe' çelen' naquen ca to da' ba chle'e bełzila'.

3 Na' mechw çelen' dan' nac de oro na' de plata, len Diosen' naquen ca to da' ba chzen xche'en. Da'nan' žin za žaglaochgualo lo yi' gabilen'. Ba gwche' yichjle tlaoze btoble da' scha'o xmechwlen', la'czla' ba zoa gon Diosen' da' saca'zi'le.

4 Cheyała' gonle xbab can' benle len bene' güen žin çeche ca', bene' yaše' ca' besyela'p coseš çelen'. Benlele legaque' dan' bitw gwdixjwlene' ca cheyała'. Na' dan' bi bnežjwle laxjwgaquen' ca cheyała', chlo'en nacle bene' güen da' xinj. Diosen' chzenague' çe bene' güen žin ca' dan' chesyegüine'de', Dios ben' nape la'zelagüe yela' guac xen.

⁵ Zoatezle che'ej chagwšagüe'le na' chonditjele dan' de chele chonle con ca žan chele, na' bi chacbe'ele ba zoa gon Diosen' da' saca'zi'le. Na' lagüe dan' chonle ca', zaca'leble ca to beyixe' ben' chgüe'ej chguagwšagüe'cho cont ba chane'ba' cate' žin ža gotchoba'.

⁶ Na' gan' chi'le chonle yela' justisen', ba gwchoglaolen yesote' bene' goson da' güen, bene' bibi gosonde' le'e.

Cuezcho batcan' yid Xancho Jesucriston' da' yoble na' yol güižcho Dios

⁷ Ca nac le'e bene' migw, le gape yela' chxenlaže' len dan' chyi chzaca'le, le ba zoa yid Xancho Jesucriston' da' yoble. Bene' ca' chesaz, chesenite' chesebeze' cosešen', le cosešen' naquen da' zaca'. Na' chesape' yela' chxenlaže' chesebeze' chde tiemp yejon', le cate' chbeze yejon', cana'chen' chosyotobe' cosešen'.

⁸ Da'nan' bite'teze dan' chyi chzaca'le, cheyala' gape yela' chxenlaže' na' gonchachlaže'le šejnilaže'le Xancho Jesucriston', le ba zoa yide' da' yoble.

⁹ Bene' migw, bitw yosbaga' lježle še bin' chac chele. Še bin' yosbaga' lježle, ba zoa yid Xancho' da' yoble na' choglagüen' chele naple dola'.

¹⁰ Le gon xbab che da' bene' ca' goso'e xtiža' Xancho Diosen' cani'. Leca bosochi bososaca' bene' legaque', perw bia'cze bosoyo bosochje', can' cheyala' gonle.

¹¹ Da' li mbalaz bene' ca' gwnita'teze' gosonchachlaže' gosejnilaže' Diosen' la'czla' besežaglagüe'. Na' ba benele xtiža' da' Job can' benchachlaže' gwyejni-laže' Diosen', la'czla' da' zan da' gwdi gwxaque'. Perw na' cate' gwde dan' gwdi gwxaquen', Diosen' bene' cont gwzoache' mbalazch clel can' gwzoe' cani'. Can' nac Diosen', leca chazlaže' chaclene' chio', na' leca cheyaše' cheži'ilaže'de' chio'.

¹² Bene' migw, da' naquen da' žialao, gwbat gwzoale no co' da' baļi che bite'teze. Bitw nale yaban' co'on da' baļi choe'le diža' li, neca nale yežlio nga co'on da' baļi choe'le diža' li, neca bite'tezechle. Cheyala' güe'cho diža' li da' šejle' bene' cont Diosen' bi choglagüen' checho saca'zi'cho.

¹³ Note'tezcho cate' chac bi da' chac checho, cheyala' yol güižcho Dios. Na' note'tezcho cate' zoacho mbalaz, cheyala' goļcho gonxenchone'.

¹⁴ Note'tezcho cate' chacšenecho, cheyala' gaxcho bene' ca' gwlejcho cont chosogüia chesene'e chio' chdop chžagcho chonxenko Jesucriston'. Na' yosotope' yichjcho late' set, na' yosol güiže' Dios, yesenabe' yeyaquecho len yela' guac che Xancho Jesucriston' lagüe' da' chejni-laže'chone'.

¹⁵ Na' chio', cate' choļ güižcho Xancho Diosen', cheyala' šejle'cho le chzenagcze' checho cont yeyone' ben' chacšenen', na' še ba bene' da' xinj, güezi'xencze Xancho' che'.

¹⁶ Da'nan' cheyala' xoadola'cho lao bene' lježcho na' yol güižcho Dios tocho yetocho cont ca' yezoacho güen še bin' chac checho. Na' še naccho bene' güen len Diosen', Diosen' chzenagcze' checho cate' choļ güižchone' na' chone' da' zan da' güen dan' chnabechone' gone'.

¹⁷ Le gon xbab che Elías ben' be' xtiža' Diosen' cani'te. Goque' benač cayanen' nac chio'. Na' cate' boļ güiže' Diosen' do yichj do laže' gwñabe' bi gac yejw, na' Diosen' bzenague' che' na' bitw goc yejon' lao šon iz yogašjo.

¹⁸ Na' yetni'a cate' boļ güiže' Diosen' gwñabde'ne' sele' yejon' da' yoble, nach Diosen' gwseļen'. Na' goc coseš che bene' ca' da' yoble.

¹⁹ Bene' migw, cate' to bene' lježcho ba gwlejyichje' dan' nac da' li dan' bzejni'i Diosen' chio', cheyala' gaclenchone' cont yetinjde' xtole'na'.

²⁰ Chaclaža' nezele, cate' choncho cont note'teze bene' chetinjde' xtole'na', chaclenchone' cont chosla Diosen' le' lo yi' gabil, le chezi'xene' xtole'na' la'czla' še naquen da' zan. Da' na'zen' chzoja' ŋa'a.

CART NECHW DAN' BZOJ POSTLW SAN PEDRO

Pedro chzoje' cart nga che bene' ca' zjanaslas chesejnilaže' Criston'

¹ Neda' Pedro naca' postlw che Jesucriston'. Na' chzoja' cart nga che le'e chejnilaže'le Jesucriston', le'e naslasle distritw ca' gan' nzi' Ponto na' Galacia na' Capadocia na' Asia na' Bitinia. Chio' chejnilaže'cho Jesucriston' naccho ca bene' zito' len yezica'chle bene' že' yežlio nga.

² Con can' bsi'e xnezen' gwlaite, Xacho Diosen' gwleje' chio' cont Spiritw chen' bocoben yichjlažda'ochon' na' gwlo'on chio' lo na' Diosen'. Bene' ca' cont chzenagcho che Jesucriston' na' cont Jesucriston' zoacze' cheyone' lažda'ochon' xilaže' dan' blalj xchenen' neche chio' le'e yag cruzen'. Chnaba' soacze Diosen' gaclenchgüe' le'e na' soacze' gone' cont soa cuezle binlochgua len xbab chelen'.

Zoacho lez šjayzoacho len Diosen'

³ Cheyala' gonxencho Diosen'. Le' naque' Xa Xancho Jesucriston', na' Xancho Jesucriston' lecze chonxene' le'. Leca cheyaše' cheži'ilaže' Diosen' chio', na' da'nan' bocobe' yichjlažda'ochon' na' bene' cont zoacho lez šjayzoacho len le', le Jesucriston' beyas bebane' ladjo bene' guat ca'.

⁴ Na' Diosen' gone' ga gac da' güen checho, to da' mbachgua da' bi yenit neca te chen, to da' ngo'ošagüe' cont gaquen checho cate' yežincho yaban'.

⁵ Na' Diosen' len yela' guac xen chen' chcuas chcue'eje' chio' len da' malen' lagüe chejnilaže'chone'. Chone' ca' šlac biña' žin ža le'echo da' mba da' gone' gac checho caten' šjayzoacho len le'.

⁶ Da'nan' zoachgual mbalaz la'czla' chonen byen da' zan da' chyi chzaca'le šlož güeje na'a.

⁷ La'czla' da' te che oron', benachen' chosozeyen' cont chesybeje' bi da' nchixen da' bibi zaca'. Na' ca'cze zaca'lebe dan' choe' Diosen' latje chac chele, chaquen cont gwlo'ele še da' li chejnilaže'lene' cate' chac bi da' mal chele. Na' še soatezle šejnilaže'lene', leca zaca'chen clal ca no oro. Nach cate' Jesucriston' yide' da' yoble Diosen' güe'e diža' ne' benle güen na' gone' le'e yela' bala'añ xen na' gone' soale t xen len le' gan' yo'ochgua be'ni'.

⁸ Chaquele Jesucriston' la'czla' biña' le'elne'. Na' la'czla' bi chle'elne' na'a, chejnilaže'lene'. Da'nan' zoale mbalaz juisyw. Na' catec mbalaz zoale con bi chac gwzejni'ile bene' cayanen' chebele.

⁹ Na' da' chejnilaže'le Jesucriston', žin ža šjayzoale len Diosen'.

¹⁰⁻¹¹ Da' bene' ca' goso'e xtiža' Diosen' cani' gosene' yeyaše' yeži'ilaže' Diosen' chio' zoacho na'a. Spiritw che Criston' gwzoan len legaue' bzejni'in legaue' yid Criston' yežlion' na' saca'zi'e na' yeyoža' gwlo'e Diosen' naque' bene' zaca' juisyw. Da'nan' bososedyañe' na' besyeyiljwyože' non' seła' Diosen' gaclene' chio' na' batcan' yide'.

¹² Na' Diosen' bzejni'ide' legaue' che da' ca' bosozoje' cont gosenezde' gaquen che chio' zoacho na'a na' gague che cuingaque'. Na' na'a Spiriton' dan' za' gan' zoa Diosen' ba benen cont gwnita' bene' goseyixjue'ede' le'e diža' güen che Criston', na' diža' güen chen' naquen lebe len dan' bosozoj da' bene' ca' goso'e xtiža' Diosen' cani'. Na' lente angl che Diosen' chesezelaže' yesejni'ide' naquen' chaclen Diosen' chio'.

Cheyala' gac lažda'ochon' xilaže' len yogo' da' choncho

13 Da'nan' cheyała' soale len toze xbab na' gonle con ga zelao saque'le cont gonle can' chazlaže' Diosen'. Cheyała' soale yebele gon Diosen' gacchgua mba chele caten' yid Jesucriston' da' yoble.

14 Na' da' nacle xi'in Dios cheyała' gwzenagle che', na' bich gwzenagle che da' malen' can' gwna lažda'olen' gonle cana' cate' biņa' šejni'ile che Diosen'.

15 Dios nan' ba gwleje' chio' naccho xi'ine', na' le' naque' bene' laždao' xilaže'. Na' con ca nac le' bene' laždao' xilaže', lecze can' cheyała' gaccho bene' laždao' xilaže' len yogo' da' choncho.

16 Le Xtiža' Diosen' nyojen žan: "Cheyała' gacle bene' laždao' xilaže', le neda' Dios naca' bene' laždao' xilaže'."

17 Chio' chol' güižcho Diosen' che'chone': "Xato' Dios". Na' Diosen' chchoglagüen' che to to chio' benač še nocho napcho doła' ca nac da' choncho, na' toz can' chone' len note'tezcho. Da'nan' cheyała' žebcho goncho da' bi chazlaže' Diosen' šlac zoacho yežlio nga.

18 Nezecho Diosen' ba bebeje' chio' lo da' ca' bosozejni'i da' xoxxta'ocho ca' chio' da' bibi zaca'. Na' nezecho ca nac no mechw de plata o de oro na' bichle da' ca' chesede čen, bi goc yesyebejen chio' lo da' ca' choncho da' bibi zaca'.

19 San byažžen gwseła' Diosen' Criston' blalj xchene' da' zaca'chgua. Na' le' bnežjw cuine' gote' cont bebeje' chio' lo da' ca' bibi zaca'. Na' Criston' zaca'lebe' ca to xila' dao' be bibi yižgüe' da', be bibi naqueba'. Ben' nac ca' gosot bene' Israel gualaž četon' cont bezi'xen Diosen' xtoła'gaque'.

20 Za' xe yežlion' Diosen' gwleje' Criston' cont bnežjw cuine' neche xtoła'chon'. Na' Diosen' gwsele'ne' nga na'a ba zoa te che yežlion' cont chaclene' chio'.

21 Na' Criston' chone' cont zoacho chejnilaže'cho Diosen'. Na' Dios nan' bosbane' Criston' ladjo bene' guaten' na' blo'e nac Xi'ine' Criston' bene' zaca' juisyw. Nachen' zoacho chejnilaže'cho Diosen' na' zoacho lez gon Diosen' güen len chio'.

22 Na' da' chaclen Spiritw che Diosen' chio', ba chzenagcho diža' li che Diosen' na' choncho can' že'. Da'nan' ba beyac lažda'ochon' xilaže', na' da'nan' do laže'cho ba chaquecho yezica'chle bene' chesejnilaže' Jesucriston'. Na' ca'cze cheyała' goncho, cheyała' gaque lježcho do yichj do laže'cho, gague gaguechone' de diža'ze.

23 Xaxna' chio' zoacho yežlio nga zjanaque' bene' chesat, perw gague neche da' goljcho len legaue' naccho xi'in Dios, san naccho xi'ine' da' bocobe' yichjlažda'ochon' cate' gwyejle'cho xtižen'. Na' xtižen' zoan toli tocaņe, gague da' te čen.

24 Chac can' nyojen, žan:

Yogo' benač chesede che' ca chesede che no yixe' dao',
na' yogo' da' chebe benachen' yežlio nga da' chesacde' zaca'chguan, zaca'leben
ca yej da' žia yixe'.

Chesebiž yixe' ca' na' chesecquad chesebiž yej da' zjažia yixe'.

25 Perw xtiža' Diosen' zoan toli tocaņe, gague da' te čen.

Na' xtiže' nan' diža' güen da' ba gwdižjue'eto' len le'e.

2

1 Da'nan' cheyała' cuejyichjcho yogo' bite'teze da' xinj da' choncho. Bi gonlaže'cho, bi goncho contze yesaque bene' naccho bene' güen, bi xi'acho bene', bi necho diža' mal che bene'.

² Na' ca bi' che'en dao' žan yesaže'be' xiže'gacbe', can' cheyała' selaže'cho yenecho xtiža' Diosen', le naquen da' güenchgua, na' cate' chzenagchon chaclenen chio' cont choncho can' cheyała' gon chio' ba de yela' mban checho toli tocanē.

³ Le ba chacbe'echo na'a Xancho Criston' naque' bene' šagüe'.

Criston' zaca'lebde' ca to yej squin che yo'o

⁴ Cheyała' gwzenagcho che Xancho Jesucriston' ben' chon chio' yela' mban toli tocanē. Bene' zan chesegue'ede' le' la'czła' Diosen' gwleje'ne' cont chac-lene' chio' na' zaca'chgüe' len Diosen'. Da'nan' Jesucriston' zaca'lebde' ca to yej güen da' gwlej bene' cont gaquen yej squin ližen', perw bene' goson žinna' bi gosazlažen' na' gosebequen' šła'ale.

⁵ Na' chio' napcho yela' mban da' chejnilaže'cho Jesucriston'. Da'nan' yogo'cho txen zaca'lebcho ca yej ca' da' zjancua' zjangoden' gan' chac yo'o de yejen'. Na' zaca'lebcho ca' liž Diosen' dan' zoe' len chio'. Lecze zaca'lebcho ca bxož bene' zjanac lo na' Diosen', le naccho lo na' Diosen' na' chaclen Jesucriston' chio' cont zoaczcho chonxencho Diosen' con can' chazlaže'.

⁶ Na' Xtiža' Diosen' nyojen, žan:

Sela' to bene' ciuda Sión na' zaca'lebde' ca to yej da' zaca' da' gwlej bene' cont gaquen yej squin liže'.

Na' note'teze ben' šejnilaže' le', gwbatech yetinjde' da' gwyejnilaže'ne'.

⁷ Nach len chio' chejnilaže'chone', Jesucriston' naque' leca bene' zaca'. San bene' bi chesejnilaže'ne', nyojczde da' nga chegaque', žan:

Yej da' bi gosaclaže' bene' güen yo'o ca' yosochine',

len ba naquen yej squin.

⁸ Na' lecze ca' žan:

Zaca'lebde' ca to yej da' chčhego' bene' na' ca to yej da' chgo'o ni'e na' chjasebiže'.

Nyojen žan chesečhegüe' le bi chosozenague' xtiža' Diosen'; na' Diosen' bžie' bia' yesac chegaque' ca'.

Chio' chejnilaže'cho Diosen' naccho xi'ine'

⁹ Na' chio', Diosen' ba gwleje' chio' cont chejnilaže'chone'. Na' len Diosen' naccho ca rey na' ca bxož. Gwleje' chio' cont naccho nación che', na' nactecho diaža' che', le chaclaže' chixjue'echo catec da' güen juisyw chone'. Le'na' be-beje' chio' lo da' malen' bencho na' gwlo'e be'ni' xen chen' lo' yichjlažda'ochon' cont soacho goncho da' güen.

¹⁰ Cana' le'e bi gwyejnilaže'le Diosen' na' bi gogle nación che', perw na'a ba nacle nación che'. Cana' bina' yeyaše'de' le'e, san na'a Diosen' ba beyaše' beži'ilaže'de' le'e.

Cheyała' goncho can' chazlaže' Diosen'

¹¹ Chacda' le'e bene' migw, na' chņyoeda' le'e le gon xbab le yežlio nga bi naquen laže. Da'nan' bitw gonle bite'teze da' xinj da' žan gonle len cuerp chelen', le še gonlen, gwžonen soa yichjlažda'olen' binlo len Diosen'.

¹² Le soa le gon da' güen cont bene' ca' bi chesejnilaže' Diosen' yesele'ede' da' güen da' chonle, na' la'czła' na'a chesezi'diže' le'e chesene' chonle clele, žin ža yesele'ede' chonle da' güen na' yesonxene' Diosen' cate' žin ža chogbi'en nac gac che to toe'.

¹³ Da' chejnilaže'le Xancho Criston', le gwzenag che yogo' bene' ba bosozoa benachen' cont yeseñabi'e le'e. Le gwzenag che rey ben' chnabia' doxen gan' zoachon',

14 na' lecze le gwzenag che bene' gwnabia' ca' chsela' reyen'. Le nac lo na'gaque' yesone' castigw che bene' ca' cheson da' xinj na' yesonxene' bene' cheson can' cheyala' yesone'.

15 Diosen' chaclaže' goncho da' güen cont bene' ca' bi chesejni'i che', ben' zjanchoł yichjlažda'ogaque', bi žel diža' da' yesene' yosocuiše' chio'.

16 Cheyala' soa cuezcho mbalaz da' bich yo'ocho lo na' gwxiyen', perw bi goncho xbab guacte goncho bi da' xinj. San cheyala' soa cuezcho mbalaz da' yo'ocho lo na' Diosen', na' yo'ocho lo ne'en cont goncho con dan' chazlaže' goncho.

17 Cheyala' gapcho bala'an yogo'lol bene'. Na' cheyala' gague bene' lježcho bene' chesonxene' Jesucriston'. Cheyala' žebcho goncho da' bi chazlaže' Diosen'. Na' cheyala' gapcho bene' gwnabia' chechon' bala'an.

Criston' byo bcheje' dan' gwxaca'zi'ena'

18 Le'e chonle žin che bene', le gwzenag che xan žin chele da' chaple legaque' bala'an. Gague tlaoze gwzenagle che xan žin chelen' še zjanaque' bene' šagüe' bene' yo'o xbab, san lecze le gwzenag chegaque' še zjanaque' bene' znia.

19 Še bibi da' mal nonle na' bia'cze chosochi chososaque' le'e, chebe Diosen' chyo chchejle len da' chesonde' le'e lagüe nezele chaclaže' Diosen' goncho ca'.

20 Perw bibi zacan' še ba benle bi da' xinj na' chyo chchejle cate' chesebaže' le'e. San še chosochi chososaque' le'e cate' chonle da' güen na' chyo chchejle len da' chesonde' le'e, nachle chebe Diosen' le'e.

21 Le Diosen' gwleje' chio' cont gwyo gwchejcho len bi da' yosochi yososaca' bene' chio', na' Criston' gwxaca'zi'e neche chio' na' byo bchejde' len da' goc che' cont nezecho ca'czen' cheyala' goncho.

22 Bibi da' xinj ben Criston', ne to diža' güenlaže' bi be'e.

23 Cate' gosezi'diža' bene' le', bi boži'e dižan' nac ca' len legaque'. Na' cate' bosochi bososaque'ne', bi gwne' yebi'e mal len legaque'. Ben cuine' lo na' Diosen', le gwnezde' Diosen' chogbi'en yesezaca'zi' bene' ca' con can' cheyala' gac chegaque'.

24 Criston' bnežjw cuine' neche xtoła'chon' cate' gosote'ne' le'e yag cruzen'. Da'n'an' cheyala' cuejyichjcho da' xinjen' choncho na' soacho goncho da' güen. Gwxaca'zi'e cont bozoe' chio' binlo.

25 Goccho ca xila' be gosaczeje, perw na'a ba naccho ca be yo'o lo na' xamba' cont chyoba', le Criston' chgüia chne'e chio' na' yo'o lo ne'e lažda'ochon' chcuas chcue'ejen' len da' malen'.

3

Can' cheyala' yeson bene' zjanšagna'

1 Na' lecze le'e no'ole nšagna'le, to tole cheyala' gwzenagle che bene' chele. Bale' bina' yosozenague' xtiža' Diosen', na' še gwzenagle chegaque', yesache'ede' xtiža' Diosen' naquen da' güen la'czla' bibi ye'lnē'. Na' yosozenague' che Diosen'

2 cate' yesele'ede' chaple legaque' bala'an na' chi' yichjle soa cuezle cont lažda'olen' gaquen xilaže' len Diosen'.

3 Na' le'e no'ole, bi nacho naquen da' žialao gon cuinle xdan yopa'a no yichjle, gwguala' yenle no bga', gwguala'le no ret, co'ole no niy de oro, na' chazle lache' šagüe'.

⁴ Dan' nac da' žialao, gac lažda' olen' güen, la' czla' nono chle'e len. Zaca' chguan len Diosen' gaccho bene' nexjwlaže' na' bene' xenlaže', le bi te che yichjlažda' ochon'.

⁵ Gosenita' no'ole cani' no'olen' gosejnilaže' Diosen' na' goson cuine' lo' ne'e. Legaque' gosaque' bene' nexjwlaže' na' bene' xenlaže' na' bosozexjwyichje' cont gosone' bin' gwna bene' che to toe'.

⁶ Da' Sara, no'ol che da' xozxta'oto' Abrahanna', gwzoe' bzenague' che bene' che' na' gože'ne': "Xana". Na' le'e še soatezle gonle da' güen na' bi žeble, nach yesena bene' nacle xi'in da' Saran' lagüe chonle can' benen'.

⁷ Na' le'e bene' byo nšagna'le, lecze cheyala' gacle bene' šagüe' len no'ol chele na' gaplene' bala'an, le bi zjanaque' bene' gual can' nac chio' bene' byo. Na' lecze can' ba nži'ilaže' Diosen' chio' na' none' chio' yela' mban toli tocaņe, ca'tezecen' ba none' len legaque'. Nachen' cheyala' goncho güen len legaque' cont bibi gwžon gwzenag Diosen' checho cate' chol' güižchone'.

Can' goncho še yosoči yososaca' bene' chio' la' czla' choncho da' güen

⁸ Yogo'cho cheyala' goncho toze xbab na' cheyala' yeyaše'cho lo' lažda' ochon' še bi da' chac che bene' lježcho. Cheyala' gaque lježcho do laže'cho ca bene' biše' lježcho, na' cheyala' gaccho bene' šagüe' len bene' lježcho na' bi gon cuincho bene' xen.

⁹ Še bi da' mal cheson bene' len chio', bi načo lecze da' mal yebi'icho len legaque'. Na' še bene' chesezi'diže' chio', bitw yoži'icho dižan' nac ca' len legaque', san načo gac da' güen čegaque'. Le Diosen' ba gwleje' chio' cont goncho ca' na' cont gone' latje soacho mbalaz.

¹⁰ Goncho ca' le nyojen, žan:

Bene' chaclaže' soa cueze' mbalaz,
cheyala' gwsaque' bich güe'e bite'teze diža' mal,
na' gwsaque' bich güe'e bite'teze diža' güenlaže'.

¹¹ Cheyala' cuejyichje' yogo' da' mal na' gone' da' güen.

Cheyala' cuec yichje' gone' con ga zelao saque'de' cont soe' binlo len bene' lježe'.

¹² Le Xancho Diosen' chgüia chne'e bene' ca' cheson da' zej to licha, na' chzenague' čegaque' cate' chosol' güiže'ne'.

San bene' ca' cheson da' xiņj, Diosen' ngüie' gone' cont yesezaca'zi'e.

¹³ Na' nono zoa no gone' chio' mal še zoatezcho choncho da' güen do yichj do laže'cho.

¹⁴ Na' la' czla' še tgüej cate' yosoči yososaca' bene' chio' lagüe choncho da' zej to licha, Diosen' gone' soacho mbalaz. Na' bi cheyala' žebcho bene', neca gacžejlaže'cho.

¹⁵ San cheyala' gonxencho Criston' lo' lažda' ochon', le naque' Xancho. Na' bate'teze cheyala' soacho probnidw cont yoži'icho xtiža' bene' še yesenabde' chio' bixčhen' zoacho lez šjazyocho len Diosen' toli tocaņe. Na' cheyala' gapcho legaque' bala'an na' güe' lenchone' diža' šagüe'.

¹⁶ Tža tža cheyala' goncho cont nezecho lo' yichjlažda' ocho bibi doła' napcho len Diosen'; nachen' cate' yesezi'diže' chio' da' chejnilaže'cho Criston', yesacbe'ede' le choncho güen na' yesacde' zto'.

¹⁷ Yejni'a saca'zi'cho neče choncho da' güen, še can' chaclaže' Diosen' gac čecho, clel ca' saca'zi'cho neče choncho da' xiņj.

¹⁸ Le Criston' lecze gwdi gwxaque'. La' czla' gwyejczje' to licha len Diosen', bnežw cuine' gote' neče xtoła' benač tni'aze, na' da' bene' ca' zaca'czen' toli

tocane. Gote' cont ba bozoe' chio' binlo len Diosen'. Perw la'czla' gosote'ne', beyas bebane' ladjo bene' guaten', dan' ne' zoa spiritw chen'.

¹⁹ Na' len Spiritw chen' gwyeje' jatixjue'ede' xtiža' Diosen' len bene' ca' ba zjaneyw gan' yezezaca'zi'e toli tocane.

²⁰ Legaue' bi bosozenague' che Diosen' ža gwlaste, la'czla' gwdape' yela' chxenlaže' len legaue', gwleze' yosozenague' šlac da' Noén' bene' to barcw xen. Na' to chopga bene' goso'o lo' barcon' na' bi gosebiaye'e lo' nisen', con xono'gue' besyela.

²¹ Na' dan' goc ca' cani' zaca'leben can' ba gwzoacho nisen' lagüe dan' ba de yela' mban checho toli tocane. Na' gague gwzoacho nisen' cont beyaccho xilaže' len cuerp chechon', san gwñabecho Diosen' beyone' lažda'ochon' xilaže' cont nezecho bibi dola' napcho. Na' ba nac lažda'ochon' xilaže' na' a lagüe beban Jesucriston' ladjo bene' guaten'.

²² Na' na'a Jesucriston' ba beyepe' yaban' gan' chnabi'e txen len Diosen', na' chosozexjw yichj yogo' angl na' yogo' nochle no nape yela' chnabia' chosozenague' che'.

4

Diosen' none' da' go to tocho cont chaclen lježcho

¹ Criston' goque' bene' bela' chen na' gwxaca'zi'e yežlio nga, da'n'an' chio' cheyala' gončhačhlaže'cho bi gacžejlaže'cho cate' saca'zi'cho. Goncho ca', le cate' ba gwzaca'zi'cho chaclenen bich chzenagcho che da' malen'.

² Na' še bi chzenagcho che da' malen' šlac ne' mbancho, nach soa cuezcho bi goncho da' mal da' žan gon chio' beňach, san soa cuezcho goncho con can' chazlaže' Diosen'.

³ Cana' gwzoale benle con can' cheson bene' bi chesejniłaže' Diosen'. Benle da' nac yela' zto', benle bite'teze da' mal da' gwzelaže' lažda'olen', gwzožele, benle no žaš len lni chelen' na' güe'ejchgual, na' gwyejniłaže'le l gua'a lsaca' da' ca' gwna Diosen' bi cheyala' šejniłaže'chon.

⁴ Na' bene' ca' ne' cheson ca' chesyebande' bich chonle txen len legaue' can' chesaše' chosožiyai' cuingaque', nach chesezi'diže' le'e.

⁵ Perw žin ža cate' Diosen' nabyožde' legaue' che yogo'lol da' ba gosone', Dios ben' chbeze' chogbi'en nac gac che bene' zjamban len bene' ca' ba gosat.

⁶ Le da'n'an' gwsele' bene' goseyixjue'ede' diža' güen che' len bene' ba gosat can' goseyixjue'eden' len chio'. Diosen' goclaže' yesenite' mbalaz toli tocane' can' zoa le', la'czla' nchoglagüen' de yela' got che yogo' beňach yežlio nga.

⁷ Ba zoa te che yežlion'. Da'n'an' cheyala' soacho len toze xbab na' goncho byen goncho can' chazlaže' Diosen' cont bibi gwžon soacho yol güižchone'.

⁸ Na' da' nac da' žialaoch, cheyala' gaque lježcho do yichj do laže'cho, le cate' chaque lježcho chezi'xencho chegaque' bite'teze da' chesonde' chio'.

⁹ Na' cheyala' gwlebcho bene' lježcho cate' yeside' ližchon' sin cbi bixjwcho.

¹⁰ Con can' ba goclen Diosen' to tocho da' none' chio' grasyw che bi da' chac choncho, can' cheyala' gaclen lježcho len dan' choncho. Cheyala' gwčhincho bite'teze grasyw da' non Diosen' chio' con can' chaclaže' gwčhinchon, le nža' nža'te da' none' che to cho choncho.

¹¹ Še Diosen' ba none' checho chixjue'echo xtižen', le xtiže' na'zen' cheyala' chixjue'echo. Na' še ba none' checho gaclencho bene', cheyala' gaclenchone' do yichj do laže'cho, le Diosen' chone' cont chac chaclenchone'. Cate' bi

da' goncho, gonchon ca gacxen Diosen' da' gwsele' Jesucriston' len chio'. Zaca'cze' gonxenchone' toli tocanē na' zaca'cze' nabi'e toli tocanē. Can' gacšca.

Guata' da' saca'zi' chio' chejnilaže'cho Criston'

¹² Chacda' le'e bene' migw, na' chaclaža' bi yebanele can' chac chelen' chosoči chososaca'chgua bene' le'e. Bi naquen da' yebanele, san gwlo'en še da' li chejnilaže'le Diosen'.

¹³ Cheyala' yebele caten' chzaca'zi'le da' chejnilaže'le Criston', le chac chele can' goc che Criston' caten' gwxaca'zi'e. Le yebe caten' chzaca'zi'le cont lecze yebele na' soale mbalaz cate' žin ža le'ele yid Criston' ben' nac bene' zaca' juisyw.

¹⁴ Mbalaz chac chele na'a cate' chesezi'diža' bene' le'e da' chejnilaže'le Criston', le Spiritw che Dios ben' nac bene' zaca' juisyw zoan chaclenen le'e. Bene' ca' chosoči chososaque' le'e cheseñe' mal che Criston', san le'e chonxenlne'.

¹⁵ Na' še saca'zi'le, yejni'a gauen neče chonle da' güen, gague neče da' betwle bene' o gwlanle da' de che bene' o benle bichle da' xinj o blaže' chele len bi da' chac che bene'.

¹⁶ Le še saca'zi'le neče chejnilaže'le Criston', bi cheyala' gaquele zto' can' chac chele, san cheyala' gonxenle Diosen' da' ba chejnilaže'le'.

¹⁷ Ba bžin ža Diosen' ba chone' cont chyi chzaca' chio' naccho xi'ine' neče bi da' xinj da' choncho. Na' dan' chone' ca' zgua'tec len chio' naccho ca bene' lo' yo'o che', nezecho leca gwnežwche' da' yesezaca'zi' bene' ca' bi chosozenag diža' güen chen'.

¹⁸ Na' ca nac bene' zja'ac to licha, nacchguaze yesyele' bi yesezaca'zi'e toli tocanē, nach bene' bi chesejnilaže' Diosen' na' chesonteze' da' xinj, gague bi de da' yosla legaque'.

¹⁹ Da'nan' cate' chsi' Diosen' xnezen' chyi chzaca'cho, cheyala' soacho gonczcho da' güen na' gon cuincho lo na' Diosen', le len' bene' chio' benach na' zoacze' chaclene' chio'.

5

Can' cheyala' gon chio' chejnilaže'cho Criston'

¹ Na'achen' de da' nia' le'e nchojle cont chgüia chna' ljež le'e chejnilaže'le Criston'. Neda' lecze nchoja' chona' ca'. Ble'eda' gwxaca'zi' Criston' na' chon'lena' bene' diža' can' goquen', na' lecze nezda' žin ža šjayzoa' len le' gan' yo'ochgua be'ni' ca' le'e šjayzoalenlne'.

² Le güia na' bene' ba gwlo'o Diosen' lo na'le güia na'le, ca no xan xila' chgüia chne'e xila' che' ca'. Le gonen do yichj do laže'le can' chazlaže' Diosen', gague gonlen žan ca žan, neca gonlen cont gonle gan mechw, san le yebe gonlen.

³ Na' ca nac bene' ca' güia na'le, bi gonle znia cont yosozenague' chele, san soatezle gonle da' chazlaže' Diosen' cont yesele'ede' can' chonlen', na' yesache'ede' lecze can' cheyala' yeson legaque'.

⁴ Xancho Jesucriston' zaca'lebde' ca to bene' güeyoe' xila' bene' chnabi'e nochle güeyoe' xila'. Na' cate' yide' da' yoble, cana'ch gone' soale mbalaz juisyw še ba benle xšin Diosen' can' cheyala', na' gague da' te che yela' zoa mbalaz chelen' ca chde che no premio da' chesone' yežlio nga.

⁵ Nach lecze ca' le'e bene' xcuide', cheyala' gwzexjw yichjle gwzenagle che bene' ca' ba zjanchoj ben' chosogüia chosone'e le'e. Na' yogo'le le gwzexjw yichjle cont gwzenag che lježle, le: Diosen' chdilene' bene' zjanac ya'laže',

san chaclene' bene' chosozexjwlaže' lagüen'.

⁶ Cheyala' gwzexjw yichjcho gwzenagcho che Dios ben' nape yela' guac xen, cont žin ža gone' ga gacxencho.

⁷ Na' cheyala' gwcua' ancho yogo' lo_l da' chi' yichjcho chen lo na' Diosen', le len' chgüia chne' e chio'.

⁸ Cheyala' goncho byen goncho da' nac da' zaca', na' cheyala' gwsaca'cho cont Satanás dan' chnabia' da' xigüe' ca' bi co'on chio' to lo nez mal, le chgue'en chio' na' cheyiljwlažen' nac gonen gwžiyin' chio', ca to bež znia chosya'aba' chdaba' chyiljwba' be gagwba'.

⁹ Cheyala' soačhačho bi gwzenagcho che Satanásen' na' soačhačho šejnilaže'cho Jesucriston', le nezecho bene' lježcho ca' chesejnilaže'ne' gate'tezechle lo yežlion' lecze chesezaca'zi'e can' chac che chio'.

¹⁰ Perw cate' ba gwde da' chyi chzaca'cho šlož dao' na'a, cuin Diosen' gone' cont gacch yichjlažda'ochon' can' chazlažen', cont šejnilaže'chchone', cont soecho gonchcho can' chnalažen', na' cont soacho len toze xbab. Dios nan' nži'ilaže'de' chio' na' chaclene' chio' bite'teze da' chac checho, na' ba gwleje' chio' chejnilaže'cho Criston' cont šjayzoacho txen len le' gan' yo'ochgua be'ni'.

¹¹ Cheyala' soacho gonxenchone' toli točane da' naque' bene' zaca' juisyw, na' nabia'che' ca note'tezechle. Can' gonščaczcho.

Pedron' chguape' tiox bene' ca'yosolab carten'

¹² Bene' migw checho Silvano, ben' chacda', zoateze' chone' can' cheyala' gone', na' ba bzoje' xtiža' le'e cart dao' nga. Na' le'e cart nga chneyoeda' le'e soaczle gonle da' güen na' chzejni'ida' le'e Diosen' ba goclene' le'e cont nezele da' li nži'ilaže'chgüede' le'e. Da'nan' cheyala' soaczle šejnilaže'ine'.

¹³ Bene' ca' ba gwlej Diosen' cont chesedop chesežague' chesonxene' Jesucriston' lo ciuda Roma nga chosoguape' le'e tiox, ciudan' da' nsi'a Babilonia. Na' lecze Marcos ben' nona' ca xi'ina' chguape' le'e tiox.

¹⁴ Cate' chdop chžagle txen le gwnopa' na' lježle cate' gwguap lježle tiox cont gacbia' chaque lježle.

Na' chnaba' yogo'le chejnilaže'le Criston' soa cuzle binlo len xbab da' yo'o lo' yichjlažda'olen'. Da' na'zen' chnia'.

CART GWCHOPE DAN' BZOJ POSTLW SAN PEDRO

Pedron' bzoje' cart nga che bene' chesonxen Jesucriston'

1 Neda' Simón Pedro chona' xšin Jesucriston', na' len' gwsele' neda' naca' postlw che'. Chzoja' le'e ba chejnilaže'le Jesucriston' can' chon neto'. Jesucriston' naque' Dios ben' chonxencho na' none' yela' mban checho toli tocanē le zejzce' to licha. Na' da' zaca'chguan chejnilaže'chone'.

2 Chnaba' gaclenchgua Diosen' le'e na' gone' cont leca soa cuezle binlo len xbab chelen' lagüe nombia'le' na' nombia'le Jesús ben' nac Xancho'.

Can' cheyala' gon chio' chejnilaže'cho Jesucriston'

3 Dan' nap Diosen' yela' guac xennan', ba none' chio' yogo' da' chyažjecho cont de yela' mban checho toli tocanē na' cont goncho can' chazlažen'. None' chio' da' ca' lagüe nombia'cho Criston', na' Criston' ben' gwleje' chio' naque' bene' zaca' na' bene' šagüe'.

4 Na' da' naque' bene' zaca' bene' šagüe', da'nan' ba gwne' gaclene' chio' na' gone' da' güen juisyw len chio'. Na' zaca'chguan da' gwne' ca', le da' chaclene' chio' can' gwne', da'nan' yichjlažda'ochon' chesyeyaquen güen can' nac yichjlažda'ogüen', na' chac chbejyichjcho da' mal da' chžiyain' bene' bi chesejnilaže' Diosen', lagüe chesone' con ca žan chegaque'.

5 Na' da'nan' chio' chejnilaže'cho Jesucriston' cheyala' goncho con ga zelao saque'cho cont goncho da' güen, na' cont šejni'ichcho.

6 Na' cheyala' goncho con ga zelao saque'cho cont bi nabia' da' malen' chio'. Cheyala' soachachcho šejnilaže'cho Diosen' caten' chyi chzaca'cho, na' cheyala' soaczcho gonxenchone'.

7 Na' cheyala' ži'icho bene' lježcho ben' chesejnilaže' Jesucriston', na' lecze cheyala' gaquecho yogo'ze bene'.

8 Le še zejcho chonchguacho yogo' da' ca', nachen' gaccho can' cheyala' gac chio' nombia'cho Xancho Jesucriston', na' xšinen' da' goncho chojen güen.

9 Na' note'tez bene' bi chon da' ca' ba gwnia' cheyala' goncho, nchol yichjlažda'ogüe' na' bina' šejni'išagüe'de' can' cheyala' gone'. Chlo'en ba gonlaže' ba beya' beyib Diosen' lažda'ogüe' len da' xinjen' bene' cana'.

10 Da'nan' bene' migw, cheyala' goncho con ga zelao saque'cho cont nezecho da' li ba gwleje' Diosen' chio' cont šejnilaže'chone' na' ba bsi'e xnezen' gwque'e chio' ca xi'ine'. Na' še goncho ca', gwbat cuiayi'cho,

11 na' mbalazchgua gwleb Diosen' chio' cate' šjayzoacho len Xancho Jesucriston' gan' chnabi'e toli tocanē, Jesucristw ben' none' yela' mban checho toli tocanē.

12 Da'nan' ba gwchoglaža' yogo' ni'a güe'lena' le'e diža' che da' ca' ba gwnia' le'e cont šjaye'ele, la'czla' ba nezele can' gwnian' na' zoachachle chejnilaže'le diža' li che Diosen' dan' nombia'le.

13 Nan' chacda' šlac ne' mbana' cheyala' gona' cont šjaye'elen.

14 Le nezda' yob žin ža gata', con can' ba bzejni'i Xancho Jesucriston' neda'.

15 Da'nan' gona' con ga zelao saque'da' cont šjaye'ele can' gwnia' che da' quinga cate' ba gota'.

Postlw ca' besele'ede' cate' Diosen' blo'ede' yela' zaca' che Criston'

16 Ca nac da' bzejni'ito' le'e che yela' guac che Xancho Jesucriston' na' che dan' yide' da' yoble, bi nacho naquen diža' da' goljlaže' neto' postlw, le ble'eto' len yejlaoto' cate' Diosen' blo'e yela' zaca' che Jesucriston'.

17 Ble'eto'ne' cate' Xacho Diosen' bnežjue'ne' yela' bala'añ xen na' cate' Dios ben' nac bene' zaca' juisyw bene' cont gwyechje' be'ni' juisyw na' gože'ne': "Benga Xi'ina' ben' chacda' na' chbe chezaquelaže' chgüeda' che'."

18 Neto' beneto' can' gwna Dios ben' zoa yaba be'e diža' che', le gwzoato' lo ya'ana' len Xancho Jesucriston' caten' goc ca', ya'a dan' gwlej Diosen' cont goc ca' lagüen.

19 Napcho Xtiža' Diosen' dan' bosozoj bene' ca' goso'e xtižen' cani' na' nezecho naquen da' li. Na' güen gonle še gwzenagle che dan' bosozojen', le gwsen' lo' yichjlažda'olen' ca to yi' da' chseni' ga nac chol. Bi cheyala' yeche'echo gwzenagcho chen tža tža šlac žin ža yid Criston' da' yoble na' co'oche' be'ni' chen' lo' yichjlažda'ochon'. Na' dan' yide'na' zaca'leben ca dan' chla' beljw xsilen' cate' cheni'.

20 Na' naquen da' žialao xen šejni'icho da' nga: diža' dan' bosozoj bene' ca' goso'e xtiža' Diosen' cani', ne tozen bi gac šejni'ichon to gualazcho,

21 le ne toz da' ca' bosozoje' bi zan' che xbab chegacze'. San bene' gosaque' lo na' Diosen' gosenie' dan' gož Spiritw che Diosen' legaque' na' bosozojen'.

2

Bene' ca' chosozejni'ide' xtiža' Diosen' clele

1 Cani' lecze besechoj bał bene' gualaž cheto' bene' gosonlaže' gosene' cheseyixjue'ede' xtiža' Diosen', na' ca'czen' yesenita' bene' yosozejni'ide' le'e diža' güenlaže' gwxe güižj. Na' yesejiljwlaže' nacle yesone' cont yosozejni'ide' le'e diža' güenlaže' da' gwžiyin' le'e sin cbi gacbe'ele. Yosozoe' Xancho Jesucriston' to šla'ale, ben' bnežjw cuine' cont gata' yela' mban checho toli tocañe. Perw žin ža yesebiaye'e yalzelaže'.

2 Bene' zan yosozenague' chegaque' na' yesone' da' xinj dan' nac da' yela' zto' can' yeson legaque'. Na' neche yesone' ca', yesenita' bene' yesene' bibi zaca' diža' güen che Diosen' da' chlo'en chio' dogualje nez güenna'.

3 Na' bene' güenlaže' ca' yesezelaže' yeseque'e xmechwle. Da'n'an' yosozejni'ide' le'e diža' da' yesaljlaže' cont gwnežjwle legaque' mechw. Perw cani'te Diosen' ba nžie' bia' yesebiaye'e.

4 Nezecho Diosen' bi bezi'xene' che angl ca' cate' gosone' da' xinj, san gwsele' legaque' lo yi' gabilen' gan' nac leca chol, na' zjanite' zjancheje' gden šlac žin ža gone' yesezaca'zi'e toli tocañe.

5 Neca bezi'xen Diosen' che bene' ca' že' lo yežlion' bene' bi bosozenag che' caten' gwzoa da' Noé. Gwsele' yejw sio' juisyw da' bžiyin' legaque'. Na' Noén' gwzoe' gwdixjue'ede' can' cheyala' yesone' da' zej to licha. Da'n'an' Diosen' bosle' le' len yegaže bene' lježe'.

6 Na' Diosen' lecze bechoglaže' bžiyi'tecze' ciuda Sodoma len ciuda Gomorra cani' yela' güen da' xinj che bene' ca' že'na'. Bzeye' ciuda ca' na' yešinga de bega'añ. Na' bene' ca' cont chosnide' bene' za' za'ac gwnežjue' castigw chegaque' še bi yosozenague' che'.

7 Na' cate' Diosen' bžiyaye'e ciuda ca', bosle' ben' le Lot ben' goc bene' güen len le', le Loten' gocchgüede' zi' lo' lažda'ogüe' che da' yela' zto' goson bene' mal ca' že' ciuda ca'.

8 Loten' goque' bene' güen na' b'zaglagüe' lo' lažda'ogüe' t'ža t'ža ble'ede' goson bene' ca' da' bi cheya'la' yesone' na' bende' diža' che da' malen' gosone'.

9 Can' naquen, Xancho Diosen' nezde' nac gone' yosle' chio' chejni-laže'chone' lao da' ca' yesonen cuejyichjchone', na' nezde' nac gone' cont bene' ca' bi zjanac bene' güen len le' yesenite' yezezaca'zi'e na' a' na' cate'ch žin ža chogbi'en yezezaca'zi'e toli tocañe.

10 Diosen' gwnežjwchgüe' da' yezezaca'zi' bene' ca' chesonteze' da' yela' zto' can' chesezelaže' lažda'ogaquen' yesone' len cuerp chegaquen'. Bene' ca' bi chesape' Xancho Diosen' bala'an cont yosozenague' che'. Bitw chesežebe' chesone' con bi žan chegaque', na' neca chesežebe' chesezi'diže' no angl bene' zaca' na' no da' xigüe'.

11 San ca nac angl che Diosen', zjanaque' bene' gualch ca chio' benach na' zjanapche' yela' chnabia' xench ca chio', perw legaque' bi cheseyaxjde' yesezi'diže' no bene' zaca' na' no da' xigüe', san cheso'e diža' šagüe' chosocuiše' bene' ca' na' len no da' xigüe' lao Xancho Diosen'.

12 Bene' ca' chosozejni'ide' diža' güenlažen', chesezi'diže' da' ca' bi chesejni'ide'. Zjanaque' ca beyixe' be bi chesejni'i. Le beyixen' con nsi' Diosen' xnezen' chesal'ba' na' chesenita'ba' cont yesezen benachen' legacba' na' yese'te'ba'. Na' ca'cze yesebiayi' bene' ca' chosozejni'i diža' güenlažen',

13 yezezaca'zi'e da' chosochi chosoaque' bene' yoble. Chesazlaže' chesaše' chese'ej chesagw'atteze' t'ža t'ža. Na' cate' chesedobe' txen len le'e cont che'ej chagwle, bi chesacde' zto' da' chesezožde' na' chesagw'xate' catec chziye' da' malen' legaque'. Da'n'an' zjazaca'lebde' ca to da' bzigüe' da' dope to lo lache' šiš o ca to yiž xen da' žia cho'alao bene'.

14 Bate'teze chesele'ede' no'ole, chesezelaže' yesata'lenteze' legaque', na' bi chjasexaque'de' len da' xinjen' chesonen'. Chese'go'oyele' bene' biña' yesenita'chache' len Jesucriston' cont yesone' da' xinjen' txen len legaque'. Bene' ca' chosozejni'i diža' güenlažen' ba zjayolagüe' chesezelaže' bi de che bene'. Diosen' leca chgue'ede' yogo' da' chesone'.

15 Le ba gosebejyichje' xnez Diosen' da' zej to li'cha. Na' ba goseque'e nez malen' can' ben da' Balaam ben' be' xtiža' Diosen' cani', ben' nac xi'in da' Beor. Balaanna' gwzelaže' yeseyixjue'ne' len mechw cont nabe' gac da' mal che bene' Israel.

16 Na' Diosen' bene' cont xpurren' be bi chac chneba' gwne'czba' ca to benach na' gwdil'ba' le' che yela' tont chen', gožba' le' cueze' bich gone' da' xinjen' nac ca'.

17 Bene' ca' chosozejni'ide' diža' güenlažen' zjazaca'lebde' ca bej gan' bibi nis žia na' ca bejw da' nžiga' to be' gual. Ba nchoglaon chegaque' yezezaca'zi'e gabil toli tocañe ga nacchua chol.

18 Le cheso'e'chgüe' diža' chesonxen cuingaque' na' chese'go'oyele' bene' za' besyechoj lo da' xinjen' cont da' yoble yesonteze' da' yela' zto' da' chesezelaže' yesone' len cuerp chegaquen' can' chesoncze bene' ca'.

19 Bene' ca' chosozejni'ide' diža' güenlaže' chese'e legaque' guac yesenite' mbalaz yesone' bite'ze žan chegaque', la'czla' zjanaque' ca to esclavo len da' nac da' yela' zto'. Le note'tezcho naccho ca to esclavo len da' xinjen' cate'choncho con can' žan goncho.

20 Na' bene' ba zjanombi'e Xancho Jesucriston' ben' none' yela' mban checho toli tocañe, ba besyechoje' lo' da' xinj ca' dan' nac da' yela' zto' dan' gosone' cate' biña' yesombi'ene', na' še soe da' xinjen' legaque' na' da' yoble

yeso'e latje nabian' legaque' cont yesonchen', da' malch gac chęgaque' clel ca caten' bina' yesyechoje' lo da' xinjen' da' nechua'.

²¹ Yejni'a šaca' bi gosombi'e xnez Diosen' da' zej to licha clel ca gosebejyichje' nez güen da' nžia bia' Diosen' šejlencho.

²² Ba goc chęgaque' can' ža to diža' li žan: "Beco'na' cheyagwba' dan' ba beyebba' na' cošen' cate' bach bguazjchoba' cheyo'oba' lo gonan' da' yoble."

3

Yid Jesucriston' da' yoble

¹ Bene' migw chia', chacda' le'e, na' da' nga naquen cart gwchope da' chzoja' le'e. Na' ba bzoja' chopten da' chaclaža' gonle xbab che diža' güen da' ba nombia'le.

² Le šjajze'e diža' da' bosozoj bene' ca' gosac lo na' Diosen' ben' goso'e xtižen' cani'. Na' lecze le šjajze'e dan' nžia bia' Xancho Jesucriston' goncho, Jesucristw ben' none' yeļa' mban checho toli tocaņe. Lenņa' diža' da' ba bzejni'i neto' postlw le'e.

³ Naquen da' žialao šejni'ile da' nga. Na'a ba zoa te che yežlion', na' yesechoj bene' yesonle' che xtiža' Diosen' na' yesenite' yesone' con can' ža xbab mal chęgaquen'.

⁴ Na' yesonle' che Diosen' yesene': "ŽBatxen' gac can' gwna Diosen' yid Criston' da' yoble? Bi naquen da' šejle'cho, le toz can' chac ža na'aža lecze can' goc cate' gwnita' da' xozxta' ocho ca', na' lecze ca'czen' goc caten' gwxcete yežlion'."

⁵ Bene' chesena ca' bi chesaclaže' yesone' xbab can' ba ben Diosen'. Caten' gwxe yaban' na' yežlion', con gwne' yesaquen na' goc can' gwnen'. Gocxe yežlion' lao nisdao' da' nječj mbi'in doxen, na' bčhine' nisen' cate' benen'.

⁶ Nach bžin ža cate' da' ca' bene' bžiaye'en len yejw sio' juisyw da' goc cate' bexoa nisen' lo yežlion'.

⁷ Na' Diosen' lecze ba bžie' bia' yaban' na' yežlion' ne' zjanitan' can' zjanaquen na'a cate' žin ža gac juisyw. Cana' yeseyen cate' gone' yesezaca'zi' bene' mal ca' toli tocaņe.

⁸ Na' le'e bene' migw chia', chacda' le'e, na' che'nda' bi ganlaže'le da' nga, len Xancho Diosen' toz ca nac to ža o to mil iz, bi naquen sša len le'.

⁹ Baļ bene' chesacde' ba chže Xancho Diosen' da' bina' yid Jesucriston' da' yoble can' gwne' yide'. Perw bi nacho chžede', san da' nape' yela' chxenlaže' len chio' benač na' chbeze' da' bi chaclaže' cuiayi' note'tezcho. Chaclaže' yogo'cho yetinje xtoļa'chon'.

¹⁰ Na' Xancho Jesucriston' yide' da' yoble cate' bi nane'laže' bene', can' chac cate' cho'o gwban liž bene' šeže'le. Nach gac to sšag xen, na' te che yogo' da' ca' chle'echo le'e yaban', na' yogo' da' de le'e yaban' cuiayin' lo yi' gual, na' yežlion' na' da' de lagüen lecze yeseyen.

¹¹ Na' da' nezecho yesyenit yogo' da' ca' can' ba gwnia', cheyaļa' gon cuincho lo na' Diosen' na' soaczcho gonxenchone' do yichj do laže'cho.

¹² Na' cheyaļa' soa cuezcho batcan' žin ža gon Diosen' gac juisyw, na' goncho cont yob gaquen. Žana' šey le'e yaban' na' da' ca' chle'echo le'e yaban' yesyeyonan' lo yi' gual na' yesyeniten.

¹³ Perw chio' zoacho lez le'e yaban' na' yežlion' yesyeyaquen da' cobe can' ba gwna Diosen', na' con bene' cheson da' güen da' zej to licha yesenita' cana'.

¹⁴ Da'nan' bene' migw chia', šlac chbezcho gac da' ca', cheyała' goncho con ga zelao saque'cho cont soacho binlo len Diosen' cont bibi doła' de da' gwchenen yichjlažda'ochon'.

¹⁵ Na' cheyała' gache'echo nape Xancho Diosen' yela' chxenlaže' len chio' benač cont gwzenagcho che' na' gone' yela' mban checho toli tocaņe. Lecze can' ba bzoj postlw Pablon' checho ben' chaquecho, cho'e dižan' len yela' sina' da' bnežjw Diosen' le'.

¹⁶ Na' yogo' cart che' ca' chesoen' diža' che da' quinga ba bzoja', la'czła' bzoje' bał da' nac zdebe šejni'icho. Na' bene' biņa' yesejni' i xtiža' Diosen' binlo na' biņa' yesezoačache' yesejnilaže'ne' chesejni'ide' da' ca' clele, can' chesone' len bichle Xtiža' Diosen' da' nyoj, na' da'nan' zjangüe'e nez da' gwžiyain' legaque'.

¹⁷ Chacda' le'e bene' migw chia', na' ba nezele da' ca' ba bzoja' le'e. Na' le gwsaca' cont bi šejle'le xtiža' bene' bi chosozenag che Diosen', bene' cheson da' zej clele, san le soačhač le gwzenag che Diosen'.

¹⁸ Na' zej gache'echle catec chaque Xancho Jesucriston' le'e na' zej gombia'chlne', Jesucristw ben' none' yela' mban checho toli tocaņe. Cheyała' soacho gonxenchwne' na'a na' toli tocaņe. Can' gonšcaczcho.

CART NECHW DAN' BZOJ POSTLW SAN JUAN

Jesucriston' chenežjue' yela' mban toli tocanē che bene chesejnilaže'ne'

¹ Chyixjue'eda' le'e che ben' nzi' Xtiža' Dios, ben' chnežjue' yela' mban toli tocanē che bene' chesejnilaže'ne'. Ba zoacze' caten' gwxe yežlion'. Neto' postlw bzenagto' xtižen', ble'eto'ne' na' gwdanto'ne'.

² Len' golje' beṇach na' ble'eto'ne' na' choe'to' diža' žato' mbancze'. Chyixjue'eto' le'e ba zoacze' len Xacho Diosen' caten' gwxe yežlion' na' bedesoalene' chio' beṇach.

³ Chyixjue'eto' le'e che bena' ble'eto' na' che bena' bzenagto' xtižen' cont gonle neto' txen. Na' ca nac neto', da' li ba nacto' txen len Xacho Diosen' na' len Xi'ine' Jesucriston'.

⁴ Chzajtō' le'e cart nga cont soale yebechgüele.

Diosen' naque' la'zelagüe bene' güen

⁵ Neto' bzenagto' be' Jesucriston' diža' che Xe' Diosen' na' chyixjue'eton' le'e, bzejni'ide' gwne' Diosen' naque' ca to be'ni' da' naque' la'zelagüe bene' güen bene' laždao' xilaže'. Bibi da' xinj none'.

⁶ Na' še žacho choncho txen len Diosen' šlac choncho da' xinjen', con chonlaže'cho. Dan' chonchon' bi zejten to li.

⁷ Diosen' naque' la'zelagüe bene' güen bene' laždao' xilaže'. Na' še chio' zoacho choncho da' güenna' can' zoa Diosen' chone' da' güenna', nachen' naccho txen tocho yetocho na' yichjlažda'ochon' chega'anen xilaže' lagüete Xi'ine' Jesucriston' blalj xchene' cont beque'e yogo'lol xtoła'chon'.

⁸ Še žacho bibi xtoła'cho de, chziye'ze cuinchon' na' bi choe'cho diža' li.

⁹ Perw na' še chxoadola'cho lao Diosen', chezi'xene' doła' chechon' na' chnitlagüe' yogo'te da' xinj da' choncho, le chone' con can' že' na' chone' da' zej to li.

¹⁰ Še žacho bibi da' mal na' goncho, choncho Diosen' ca to bene' güenlaže' na' biṇa' šejle'cho diža' li čhen'.

2

Criston' chnabe' gaclen Xacho Diosen' chio'

¹ Xi'inda'ogua', chzoja' le' cart nga cont cbi gonle da' xinj. Perw na' še no chio' goncho da' xinjen', zoa Jesucriston' ben' chon da' zej to li na' chnabe' yezi'xen Xacho Diosen' checho.

² Jesucriston' blalj xchene' neche xtoła'chon' cont yozoe' chio' binlo len Diosen', na' gague neche xtoła' chio'zen' blalj xchene' san neche xtoła' yogo'lol beṇach.

³ Na' še choncho can' ža Diosen' nachen' guac ṇacho ba nombia'chwne'.

⁴ Na' še žacho ba nombia'chwne' na' bi choncho can' že'na', naccho bene' güenlaže' na' diža' li che Diosen' biṇa' šon' yichjlažda'ochon'.

⁵ Ba chaquecho Diosen' ca cheyała' gaquechone' še choncho con can' že'na', na' še ba choncho ca', nezecho ba nacchone' txen.

⁶ Na' note'tezcho še žacho naccho Diosen' txen, cheyała' soacho goncho da' güen can' ben Jesucriston'.

Dan' ža Diosen' cheyała' goncho

7 Le'e bene' chacda', dan' chzoja' nga chona' mandadw naquen' gonle, bi naquen to da' cobe. Naquen to da' gole dan' gwnezele caten' gwzolaole chejnilaže'le Jesucriston', le naquen diža' da' ba benele.

8 Na' dan' chona' mandadw naquen' gonle, bia'cze naquen ca to da' cobe, le ba bla' diža' güen che Criston' len benachen' na' ba chzola' chde che yogo' da' ca' da' chgue'e Diosen'. Na' dan' chona' mandadw gonle, Criston' ba blo'ede' naquen da' zaque' na' lecz le'e ba chlo'ele naquen da' zaque'.

9 Note'tezcho la'czla' žacho ba noncho Diosen' txen, bi naquen ca' še chgue'e lježcho; nac chol lo' lažda'ochon'.

10 Note'tezcho še chaque lježcho nachen' da' li ba noncho Diosen' txen na' bibi de da' yoslažon' chio' lo da' xinjen'. Lo' yichjlažda'ochon' ba naquen ca to da' yo'o be'ni'.

11 Na' note'tezcho še chgue'e lježcho nac chol lo' lažda'ochon' na' zejcho ca to bene' lchol bene' bi chache'e galen' yeque'e, le bi chache'echo can' cheyala' goncho.

12 Ba bzoja' da' quinga par le'e xi'inda'ogua', le Diosen' ba bezi'xene' chele dan' chejnilaže'le Jesucriston' do yichj do laže'le.

13 Ba bzoja' da' quinga par le'e bene' gole, le ba nombia'le Jesucriston' ben' ba zoa cate' gwxe yežlion'. Ba bzoja' da' quinga par le'e bene' güego' chaban, le bač gwzoele bi chzenagle che Satanás dan' chnabia' da' xigüe' ca'.

Ba bzoja' da' quinga par le'e xi'inda'ogua' da' ba nombia'le Xacho Diosen'.

14 Ba bzoja' da' quinga par le'e bene' gole, da' ba nombia'le Jesucriston' ben' ba zoacze cate' gwxe yežlion'. Lecz ca' ba bzoja' da' quinga par le'e bene' güego' chaban da' ngo'o yichjle xtiža' Diosen' na' da'nan' ba gwzoele bi chzenagle che Satanásen'.

15 Bi selaže'le gacle toze len bene' ca' bi chosozenag che Diosen', na' neca selaže'le gonle can' chesonen'. Note'tezcho chzelaže'cho goncho can' chesonen', bi chaquecho Xacho Diosen'.

16 Bene' bi chosozenag che Diosen' chesone' da' mal dan' chzelaže' lažda'ogaquen', na' chesezelaže' bi dan' chesele'ede', na' lecz ca' chesa'laže'. Na' yogo' da' ca' chesone' bi naquen che Xacho Diosen', naquen che da' mal dan' de yežlio nga.

17 Na' da' te che yežlio nga len da' ca' chesezelaže' bene' ca' bi chosozenag che Diosen'. Perw še chio' choncho can' chazlaže' Diosen', soaczcho len Diosen' toli tocanē.

Nezecho bin' nac da' li

18 Xi'inda'ogua', ba zoa žin ža te che yežlio nga. Neto' ba bzeneto' le'e gwžin ža yid ben' gonchgua contr Criston', na' na'a bene' zan ba za'aque' chesone' contr Criston'. Da'nan' nezecho ba zoa žin ža te che yežlion'.

19 Ladjo chio' besechoj bene' ca' cheseque'ede' Criston'. Gague do laže' gosone' txen len chio' chejnilaže'chone'. Le šaca' do laže' gosone' txen len chio', ne' nite' chesonche' chio' txen še ca'. Na' dan' bač besyechoje' nacbia' bi zjanaque' chio' txen.

20 Criston' ba bene' chio' Spiritw che Diosen' na' da'nan' yogo'cho nezecho can' ža diža' li che Diosen'.

21 Chzoja' le'e da' nga le bač nombia'le diža' li che Diosen', gague nacho bi nombia'lenna', na' lecz ca' nezele ne toz diža' güenlaže' ca nchixe diža' li che'na'.

22 Bene' güenlaže' ben' ža Diosen' bi gwsele' Jesucriston' golje' benach. Ben' že' ca' chgue'ede' Criston', le chzoe' Xacho Diosen' to šla'ale len Xi'ine' Criston'.

²³ Na' note'tez bene' cho'e diža' že' Diosen' bi gwsele' Jesucriston', bitw zoa Xacho Diosen' len le'. Perw note'tez bene' cho'e diža' že' Diosen' gwsele' Jesucriston', zoacze Xacho Diosen' lente Xi'ine' Jesucriston' len le'.

²⁴ Le soa le gwzenag che da' ca' ba bzeneto' le'e caten' gwzolaotele chejni-laže' le Criston'. Na' še soatezle gwzenaglen, nachen' soatezle len Xacho Diosen' na' len Xi'ine' Jesucriston'.

²⁵ Na' da' gwna Jesucriston' gone' checho, gone' yela' mban toli tocane.

²⁶ Ba bzoja' le'e da' nga bia' diža' che bene' ca' chesaclače' yesonlede' le'e.

²⁷ Na' Jesucriston' ba bene' chio' Spiritw che Diosen' zoan lo' lažda'ochon' chzejni'in chio' yogo'lol dan' cheyala' nezecho che cuine'. Na' Spiritw che Diosen' choen' diža' li, bi chonlažen'. Na' dan' zoan chzejni'in chio', bi chyažjecho nohle gwzejni'i chio' bi dan' nac da' li. Da'nan' le gwzenag dan' bzejni'i Spiriton' le'e na' le soa len Jesucriston'.

²⁸ Na' na'a xi'inda'ogua', cheyala' soatezcho gwzenagcho che Jesucriston' cont bi žebcho cate' yide' da' yoble na' cont bi yeto'echo na' cont bi nan gwcuaje'chone' cate' le'echo ba ble'e.

²⁹ Na' nezecho Criston' zeje' chone' con can' cheyala' gone', leczca' nezecho yogo'czecho še zejcho choncho can' cheyala' goncho naccho xi'in Dios.

3

Naquen' goncho še naccho xi'in Dios

¹ Le gon xbab catec chaquehgüe Xacho Diosen' chio' da' chne' naccho xi'ine', na' da' licze xi'ine' chio'. Bene' bi chesejni-laže' Diosen' bi chesejni'ide' naccho xi'in Dios, le bi chesacbe'ede' non' nac Diosen'.

² Xi'inda'ogua', chio' chejni-laže'cho Jesucriston' bačh naccho xi'in Dios. Na' biña' gata'bia' nac gaccho. Con nezecho caten' Jesucriston' yide' da' yoble canan' le'echwne' can' naque' na' yeyac yichjlažda'ochon' can' nac yichjlaždao' le'.

³ Na' note'tezcho še zoacho lez gaccho can' naquen', soacho gwsaca'cho cont lažda'ochon' gaquen xilaže', le nezecho laždao' Jesucriston' naquen xilaže'.

⁴ Note'tez bene' zoe' chone' da' xinjen' chone' clele len ley che Diosen', le cate' choncho da' xinj choncho clele len da' ba bžie' bia' goncho.

⁵ Nezczecho Jesucriston' bide' yežlio nga cont beque'e xtoła' chio' benačh, na' ca' nac Jesucriston', le bibi da' xinj none'.

⁶ Na' še chio' zoacho chzenagcho che', bi zoacho choncho da' xinj, san še zoacho choncho da' xinjen', biña' šejni'icho che' na' biña' gombia'chone'.

⁷ Xi'inda'ogua', bi güe'le latje no siye' le'e, še choncho da' güen can' cheyala' goncho, zejcho to liča can' zej Jesucriston'.

⁸ Na' še zoacho choncho da' xinj, naccho xi'in Satanásen', le Satanásen' zoaczen chonen da' xinj cate' gwxcete yežlion'. Na' bid Xi'in Diosen' yežlio nga par gwcueze' dan' chon Satanásen'.

⁹ Note'tezcho še Diosen' ba gwque'e chio' ca' xi'ine' bi zoacho choncho da' xinj, le ba bocobe' yichjlažda'ochon' na' bich žan goncho da' xinjen' da' zoa Diosen' len chio'.

¹⁰ Na' da' nga chlo'en non' nac xi'in Diosen' na' non' nac xi'in Satanásen': note'tezcho še bi zoacho choncho da' güen, bi naccho xi'in Dios, na' leczca' note'tezcho še bi chaque lježcho, bi naccho xi'in Dios.

Cheyala' gaque lježcho

¹¹ Na' da' nga ba beneczecho cate' gwzolaicho chejnilaže'cho Jesucriston': cheyała' gaque lježcho tocho yetocho.

¹² Bi gaccho ca goc da' Caín, goque' xi'in Satanásen' na' beyote' bene' biše'. ¿Nezele bichen' betue' le'? Betue' le' le gwzoe' bene' da' xinj na' bene' bišen' gwzoe' bene' da' güen.

¹³ Da'nan' xi'in da'ogua', bi yebanele cate' bene' ca' bi chosozenag che Diosen' cheseque'ede' le'e.

¹⁴ Nezecho bich mbiayi' yichjlažda'ochon', san ba de yela' mban checho toli tocanē le ba chaque lježcho. Na' še bi chaque lježcho, ne' mbiayi' yichjlažda'ochon'.

¹⁵ Note'tezcho še chgue'e lježcho, lao Diosen' naccho bene' güet bene'. Na' nezecho bene' güet bene' bi de yela' mban che' toli tocanē.

¹⁶ Bzane cuin Jesucriston' neche chio' gosote'ne' dan' leca chacde' chio', da'nan' nezecho can' cheyała' gaque lježcho. Na' ca'cze chio' cheyała' zane cuincho gatcho cont gaclen lježcho še chonen byen.

¹⁷ Na' cate' de da' de checho na' nezecho bene' lježcho chyažjden', še bi cheyaše'chone' bi gac nacho chaquecho Diosen'.

¹⁸ Xi'in da'ogua', bi cheyała' gaque lježcho de diža'ze. Cheyała' gaque lježcho do yichj do laže'cho na' soacho gaclen lježcho.

Nac goncho cont bi žebcho Diosen'

¹⁹ Na' nezecho naccho txen len Dios ben' choe' diža' li še chaque lježcho can' gwnia'na', na' še goncho ca', na' gacbe'echo zoacho binlo len Diosen'.

²⁰ Na' še zoa cate' choncho xbab bi zaca'cho par na Diosen' xi'ine' chio', Diosen' zaca'che' ca' xbab chechon' na' nezde' yogo'lol'. Da'nan' cheyała' gwzenagac can' žen', gague con can' ža xbab chechon'.

²¹ Le'e bene' chacda', še lo' yichjlažda'ochon' chacbe'echo bitw napcho doła', nachen' bich chžebcho Diosen'.

²² Na' bite'tez dan' chnabechone' chončzen', le choncho da' nžie' bia' goncho na' can' chaclažen'.

²³ Na' da' nga Diosen' nžie' bia' goncho, šejnilaže'cho Xi'ine' Jesucriston' do yichj do laže'cho na' gaque lježcho tocho yetocho, con can' nžie' bia'.

²⁴ Na' še choncho can' nžie' bian', nach zoacho len Diosen' na' Diosen' zoe' len chio'. Na' quinga nezecho Diosen' zoe' len chio': ba bene' chio' Spiritw ghen' zoan lo' lažda'ochon.

4

Spiritw che Diosen' na' dan' chon contr Criston'

¹ Le'e bene' chacda', bi šejle'le che yogo' bene' chesene' cheso'e diža' dan' gož Spiritw che Diosen' legaue', san le gone' prueba še xtiža'gaquen' naquen' da' bzejni'i Dios o še cbi naquen. Le gone' prueba, le ba chaš bene' zan bene' chesonlaže' chesene' cheseyixjue'ede' dan' gož Diosen' legaue'.

² Na' quinga guac nezecho še Spiritw che Diosen' bzejni'in legaue' dižan' cheso'e: yogo' bene' cheso'e diža' chesene' Jesucriston' naque' Dios golje' benač, nezecho yo'o Spiritw che Diosen' lo' yichjlažda'ogüe'.

³ Na' bene' cheso'e diža' chesene' Jesucriston' bi naque' Dios golje' benač, nezecho Spiritw che Diosen' bi yo'on lo' yichjlažda'ogüe'. Bene' ca' cheso'e diža' da' chonen contr Criston'. Na' ba bzeneto' le'e yid da' gon contr Criston' na' na'a ba blan' chonen contr le'.

⁴ Xi'inda'ogua', ba nacle Diosen' txen na' da'n'an' bi chejle'le che bene' güenlaže' ca'. Chzoele cbi chejle'le chegaque' neche da' yo'o Spiritw che Diosen' lo' lažda'olen' chzejni'in le'e, na' Spiriton' chnabia'chen ca Satanásen' dan' zoa len bene' ca' bi chosozenag che Diosen' yežlio nga.

⁵ Bene' ca' bi chosozenague' che Diosen' cheso'e diža' che dan' chac yežlio nga, na' da'n'an' bene' lježe' ca' chosozenague' chegaque'.

⁶ Ca nac chio', ba naccho Diosen' txen. Da'n'an' yezica'chle bene' chosozenague' che Diosen' lecz chosozenague' xtiža'chon'. Na' bene' ca' cbi zjanaque' Diosen' txen bi chosozenague' diža' chechon'. Can' chac nezecho no bene' yo'o Spiritw che Diosen' lo' lažda'ogüe' chzejni'in le' diža' li na' no bene' chzenague' diža' güenlaže' dan' chzejni'i Satanásen' le'.

Diosen' chacde' benach

⁷ Le'e bene' chacda', cheyała' soacho gaque lježcho tocho yetocho, le Diosen' zoacze' chone' cont chaque lježcho. Na' note'tezcho še chaque lježcho nachen' nacia' naccho xi'in Dios na' nombia'chone'.

⁸ Na' note'tezcho še bi chaque lježcho bi nombia'cho Diosen', le chio' bi choncho can' chonen'. Len' zoacze' chacde' benachen', le con can' nac yichjlažda'ogüe'.

⁹ Dan' ben Diosen' bzejni'ide' chio' can' chacde' chio', gwsele' laye'e Xi'ine' yežlio nga cont note'tezcho bancho toli tocanē še chejnilaže'chone' do yichj do laže'cho.

¹⁰ Bi goquecho Diosen'; lelen' godce' chio' na' gwsele' Xi'ine' Jesucriston' cont bnitlagüe' xtola'chon'.

¹¹ Le'e bene' chacda', dan' chaque Diosen' chio' lecz ca' cheyała' gaque lježcho tocho yetocho.

¹² Nono zoa bene' ba ble'ede' Diosen'. Perw na' še zoacho chaque lježcho tocho yetocho, nacia' Diosen' zoacze' len chio' na' ba chaquechone' can' cheyała' gaquechone'.

¹³ Nezecho zoacho len Diosen' na' le' zoacze' len chio' da' ba gwsele' Spiritw chen' zoan lo' yichjlažda'ochon'.

¹⁴ Na' neto' postlw ba ble'eto' na' choe'to' diža' nezeto' gwseła' Xacho Diosen' Xi'inen' cont gwnitlagüe' xtola' note'tez bene' šejnilaže' le'.

¹⁵ Na' note'tezcho še chejle'cho na' choe'cho diža' žacho Jesucriston' naque' dogualje Xi'in Dios, Diosen' zoe' len chio' na' lecz zoacho txen len Diosen'.

¹⁶ Chio' ba nezecho na' chejle'cho chaque Diosen' chio'. Diosen' zoacze' chacde' benachen', le con can' nac yichjlažda'ogüe'. Na' note'tezcho še zoacho chaquecho Diosen' na' lecze zoacho chaque lježcho, nachen' zoacho len Diosen' na' le' zoacze' len chio'.

¹⁷ Diosen' zoacze' chaclene' chio' cont chaquechone' can' cheyała' gaquechone' na' chaque lježcho can' cheyała' gaque lježcho, na' Diosen' chone' ca' cont bi žebcho cate' žin ža gone' yela' justis che yogo' benach. Na' bi žebcho še zoacho chaque lježcho yežlio nga can' chon Jesucriston'.

¹⁸ Še chaquecho Diosen' ca cheyała', bibi de da' žebcho. Caten' chžebchon' naqen ca to castigw len chio', na' še ne' chžebcho bina' gaquecho Diosen' can' cheyała' gaquechone'.

¹⁹ Chio' chaquecho Diosen' le len' godce' chio' da' nechw.

²⁰ Note'tezcho še chgue'e lježcho, la'czla' žacho chaquecho Diosen', con chonlaže'chon'. ¿Nacxe goncho gaquecho Diosen' ben' bi chle'echo še bi chaque lježcho bene' chle'etecho?

21 Na' ba bene' mandadw can' cheyała' gon chio' chaquechone', že' lecz cheyała' gaque lježcho.

5

Gwcuascho da' malen'

1 Note'tez chio' naccho xi'in Dios še chejle'cho Diosen' gwsele' Jesucriston' cont nabi'e. Na' še chaquecho Xacho Diosen', lecz can' gaque lježcho, le lecz xi'in Dios bene' lježchon'.

2 Cate' chio' zoacho chaquecho Diosen' na' choncho da' bžie' bia' goncho, nezecho lecze zoacho chaquecho yezica'chle xi'in Dios.

3 Še chaquecho Diosen', choncho can' nžie' bia' goncho. Na' dan' nžie' bia' goncho, bi naquen zdebe gonchon.

4 Note'tezcho še ba bocob Diosen' yichjlažda'ochon', ba chzoecho chcuascho da' xinj dan' de yežlio nga. Na' dan' chejnilaže'cho Jesucriston', da'nan' chzoecho chcuascho da' xinjen' dan' de yežlion' bi chonchon.

5 Na' noch no chzoede' chcuase' da' xinj dan' de yežlio nga san bene' ca' chesejle'e Jesucriston' naque' dogualje Xi'in Dios, legaquen' chesezoede' chosocuase' da' xinjen'.

Diosen' cho'e diža' že' Jesucriston' naque' dogualje Xi'ine'

6 Quinga ben Jesucriston' šlac bide' yežlio nga, bnežjw cuine' gwzoe' nis na' blalj xchene'. Bi načo con gwzoaze' nis, san lecz blalj xchene'. Na' Spiritw che Diosen' choen' diža' bene' ca', na' Spiriton' choen' pur diža' li.

7 Na' nita' šone bene' chesegüe'e da' bałi yaban' cheso'e diža' che Jesucriston': Xacho Diosen', len Jesucriston' ben' nzi' Xtiža' Dios na' len Spiritw che Diosen'. Na' toz can' cheso'e diža' che Jesucriston'.

8 Lecz de šone da' chesego'on da' bałi chesoen' diža' che Jesucriston' yežlio nga: Spiritw che Diosen', na' dan' gwzoe' nis na' dan' blalj xchenen'. Na' toz ca' chesoen' xtižen'.

9 Chejle'cho xtiža' benačen', na' nacch xtiža' Diosen' da' zaca'ch, na' Diosen' ba bi'e diža' che Xi'ine' Jesucriston'.

10 Na' še chejle'cho Jesucriston' naque' dogualje Xi'in Dios, nezecho lo' lažda'ochon' xtiža' Xacho Diosen' dan' bi'e che' naquen da' li. Na' še bi chejle'cho che Diosen', chonchone' ca to bene' güenlaže' da' bi chzenagcho diža' dan' cho'e che Xi'ine'na'.

11 Na' xtiža' Diosen' chzejni'in chio' guata' yela' mban che benačen' toli tocaņe še yesejnilaže' Xi'ine' Jesucriston'.

12 Quinga naquen, de yela' mban checho toli tocaņe še chejnilaže'cho Jesucriston', na' bi de yela' mban checho toli tocaņe še bi chejnilaže'chone'.

Can' beyož cart nga da' bzoj Postlw San Juan

13 Ba bzoja' le'e cart nga, le'e chejnilaže'le Xi'in Diosen', cont nezele de yela' mban chele toli tocaņe.

14 Na' bitw chžebcho chol güižcho Diosen', le nezecho chzenague' checho cate' chnabcho lagüen' da' chazlaže'.

15 Na' cate' nezecho chzenague' checho bite'tez dan' chnabechone', lecz nezecho gone' da' ca' ba gwñabechone'.

16 Na' še chache'echo bene' lježcho chone' bi da' xinj da' bi zaca' seła' Diosen' le' lo yi' gabil, cheyała' nabecho Diosen' gaclene' le' cont yezoe' binlo len Diosen' da' yoble. Da' xinj da' cheson bał bene' zacan' seła' Diosen' legaque' lo yi' gabil. Bi žia' nable gaclen Diosen' bene' ca'.

¹⁷ Napcho doła' še choncho bite'tez da' xinj, perw gague yogo' da' xinj dan' chonchon' seła' Diosen' chio' lo yi' gabilen'.

¹⁸ Nezecho še ba bocob Xacho Diosen' yichjlažda'ochon' bi zoacho choncho da' xinjen' le zoa Jesucriston' ben' nac Xi'in Diosen' chcuase' chio' len dan' chon Satanásen', na' da'nan' bi soen gwžiyin' chio'.

¹⁹ Lecz nezecho Diosen' zoe' len chio', perw beņe' ca' bi chosozenague' che', Satanásen' chnabian' yichjlažda'ogaquen'.

²⁰ Na' nezecho ba bid Xi'in Diosen', na' ba bzejni'ide' chio' cont nombia'cho Xe' ben' nac dogualje Dios. Nach zoacho toz len ben' nac dogualje Dios dan' zoacho toz len Xi'ine' Jesucriston'. Len' naque' dogualje Dios na' chnežjue' yela' mban toli tocaņe che beņe' chejnilaže' le'.

²¹ Xi'inda'ogua', gague nochle šejnilaže'le san ben' nac dogualje Dios. Da' na'zen' chzoja'.

CART GWCHOPE DAN' BZOJ POSTLW SAN JUAN

Chio' nombia'cho diža' li che Diosen' cheyała' gaque lježcho

¹ Neda' naca' bene' gole blao, na' chzoja' le' no'ole, len' ba gwlej Diosen' chzenago' xtižen', na' len xi'ino' ca'. Da' li chacda' le'e, na' gague nedaze' san lencze' yogo' bene' yezica'chle bene' zjanombia' diža' li che Diosen' chesacde' le'e.

² Chaqueto' le'e da' yo'o diža' li che Diosen' lo' lažda'ochon' na' soan lo' lažda'ochon' gaclenen chio' toli tocanē.

³ Xacho Diosen' na' len Xi'ine' Xancho Jesucriston' yesaclene' le'e, yesyeyaše' yesyeži'ilaže'de' le'e na' yesone' cont soa cuezle binlo len xbab dan' yo'o lo' yichjlažda'olen', le ba nombia'le diža' li che Diosen' na' ba chaque lježle tole yetole.

⁴ Leca gwbeda' cate' gwnezda' bał bi' chio' ca' ba nita'be' chesombe' can' ža diža' li che Xacho Diosen' can' bžie' bia' goncho.

⁵ Dan' cheyała' goncho, no'ole, cheyała' soacho gaque lježcho tocho yetocho. Na' dan' žia' goncho ca', bi naquen to da' cobe; naquen dan' ba bzeneto' le'e caten' gwzolaole chejnilaže'le Jesucriston'.

⁶ Še chaquecho Diosen' goncho da' nžie' bia'. Na' nezele nžie' bia' gaque lježcho, le cate' gwzolaole chejnilaže'le Jesucriston' bzejni'ito' le'e cheyała' gaque lježcho.

Čaš bene' chesonlede'

⁷ Bene' zan chesaše' lo yežlion' chosozejni'ide' clele, le cheso'e diža' che Jesucriston' chesene' bi naque' Dios ben' bide' golje' benač. Note'tez bene' chon ca' naque' bene' gwxiye' na' chone' contr Criston'.

⁸ Bi gwzenagle xtiža'gaque' san le soa le gon cont Diosen' gac gone' soale mbalaz juisyw da' chonle can' chazlaže' gonle.

⁹ Note'tezcho še chzoacho ca'ale dan' bsd blo'e Criston' cont chzenagcho bichle diža' dan' chzejni'i bene' chio', bi zoa Diosen' len chio' še ca'. Na' note'tezcho še zoacho chzenagcho che dan' bsd blo'e Criston', Xacho Diosen' len Xi'ine' Criston' nite' len chio'.

¹⁰ Na' še no bene' yide' gan' zalen' chaclaže' gwzejni'ide' le'e da' bi nac xtiža' Criston', bi gwleblene' ližlen' na' bi gwguaplene' tiiox.

¹¹ Čeyała' gonelene' ca', le še gwlebelene' zejen txen chonlenle' da' xinjen'.

Goclaže' šjane' legaque'

¹² De da' zan da' nia' le'e perw bich chaclaža' gwzozan' le'e yiš. Zoa' lez yida' gana' zoale na' güe'lena' le'e diža' cho'a cont soacho mbalaz juisyw.

¹³ Xi'in' no'ole bilon', no'ole ben' lecze gwlej Diosen' cont chzenague' che', chosoguape' le'e tiiox. Da' na'zen' chzoja' na'a.

CART GWYONE DAN' BZOJ POSTLW SAN JUAN

Postlw San Juanna' cho'e diža' güen che ben' le Gayo

1 Neda' naca' bene' gole blao, na' chzoja' cart nga par le', xmigua' Gayo. Da' li chacda' le'.

2 Bene' migw, chḡaba' lao Diosen' gac güen ḡhio' na' so' güen ca güenna' ba zoa lo' yichjlažda'oguo'.

3 Leca bebeda' cate' besela'ac to chope bene' lježcho gosoe diža' can' zoaczo' chono' güen da' chzenago' diža' li che Diosen' do yichj do lažo'.

4 Len neda' le'e nacle ca xi'ina', na' bich bi de da' chbechda' ca chbeda' chḡezda' chzenagle diža' li che Diosen' do yichj do laže'le.

5 Bene' migw, chono' güen dan' chacleno' bene' lježcho ca' bene' zjanac bene' zito'.

6 Legaque' ba gosoe diža' len neto' chdop chžagto' nga chonxento' Jesucriston' can' bži'ido' legaque'. Na' cate' yesele'e da' yoble güe'šco'ne' bi dan' yeseyažjde' cont yesyegüe'e nez da' yoble, le legaque' chesone' xšin Diosen'.

7 Ba gosa'ac laže' cont cheso'e xtiža' Criston' na' bibi goclen chesezi'e che bene' ca' bi chesejle'e che Criston'.

8 Da'nān' cheyała' gwlebocho bene' ca', gaclenchwne' na' gonchone' txen cont yesombia' bene' diža' li che Diosen'.

Diótrefes chone' da' mal

9 Baḡ bzoja' le'e chdop chžagle chonxenle Jesucriston', perw na' Diótrefes chaclaže' gague' la'zelaoze bene' blao len le'e na' bi chzenague' cheto'.

10 Da'nān' caten' yida' dezḡa'a le'e na' yapa'ne' che yogo' dan' chone' contr neto' na' diža' güenlaže' dan' chne' cheto'. Na' gague da' na'zen' chone', lecz bi chlebe' bene' lježchon' liže' bene' za'ac zito', na' cate' no le'e chaclaže'le gwleble legaque' ližlen' nach chžone' gonle ca', na' chbeje' le'e ladjo lježle chdop chžagle chonxene' Jesucriston' cate' chleble legaque'.

11 Bene' migw, bi gono' txen len bene' ca' cheson da' xinjen', san ben txen len bene' ca' cheson da' güen. Note'tez bene' zoateze' chone' da' güen, nachbia' nombi'e Diosen', na' note'tez bene' zoateze' chone' da' xinjen', nachbia' biḡa' gombi'e Diosen'.

Demetrimon' chone' da' güen

12 Yogo'ze bene' cheso'e diža' güen che Demetrio na' nachbia' zejlene' diža' li che Diosen'. Lencze neto' choe'to' diža' žato' chone' da' güen, na' nezele choe'to' diža' li.

Can' beyož carten'

13 Dech da' zan da' gocda' ḡia' le'e, perw bich chaclaža' gwzojan' le'e yiš.

14 Zoa' lez yob yežagcho cont güe'cho diža' cho'a cate' soacho txen.

15 Soago' binlo len xbab dan' yo'o lo' yichjlažda'oguo'n'. Bene' migw ḡhion' nita' nga chosoguape' le' tiox. Na' chḡaba' gwguapšco' tiox to to bene' migw cheto' ca' nita' gan' zalen'. Da' na'zen' chzoja' ḡa'a.

CART DAN' BZOJ SAN JUDAS

San Judas chzoje' bene' ca' zjanaque' lo na' Diosen'

¹ Neda' Judas naca' bene' güen žin che Jesucriston', na' naca' bene' biše' Jacobo. Chzoja' le'e ba gwlej Xacho Diosen' cont nacle lo ne'en nach zoale chcuas chcue'ej Jesucriston' le'e len da' malen'.

² Chnaba' gon Xacho Diosen' cont gacbe'echle cheyaše' cheži'ilaže' chgüede' le'e, na' gone' cont soa cuezechle binlo len xbab da' yo'o lo' yichjlažda' olen', na' gone' gacbe'echle chacchgüede' le'e.

Bene' ca' chososed chosolo'ede' diža' güenlaže' (2 Pedro 2:1-17)

³ Bene' migw, chacda' le'e, na' ba goclaže' chgua' gwzoja' le'e gwzejni'ida' le'e can' ben Xancho Jesucriston' cont de yela' mban checho toli tocanē. Perw na' ba chonen byen chzoja' chneyoeda' le'e soachachle šejle'le diža' li che Diosen' da' bzejni'ide' chio' to ši'ize, chio' naccho lo ne'en.

⁴ Nita' bal bene' cheseziye'e cont chaquele zjanaque' le'e txen. Bi chosozenague' che Diosen', san chesene' da' nži'ilaže' Diosen' chio' guacte goncho bite teze da' yela' zto' len cuerp chechon', le chezi'yencze' checho. Na' chosozoe' to šla'ale toz ben' nac dogualje Dios ben' cheyala' yosozenag yogo' benachen' che', na' len Xancho Jesucriston'. Cana'te byoj Xtiza' Diosen' žan bene' cheson ca' yesežaglaochgüe' neche xtoła'gaquen'.

⁵ Na' la'czla' ba gwnezele yogo' can' goquen', chaclaža' gona' cont šjajza'laže'le Xancho Diosen' bosle' da' xoxxta'o neto' bene' Israel lo na' bene' Egipto ca', perw gwdechle bžiaye'e balteze' bi gosejle'e che'.

⁶ Na' zan angl bi gosazlaže' yesone' da' gwlo' Diosen' lo na'gaque' yesone', san gosaclaže' yesacche' bene' blaoch. Nachen' besyechoje' gan' bžia' Diosen' bia' yesenite'. Nach Diosen' gwsele' legaque' gan' nacchgua chol, na' zjancheje' gden toli tocanē cont yesezaca'zi'e cate' žin ža gac juisyw.

⁷ Na' lecze ca' bene' gwnita' ciuda Sodoma na' ciuda Gomorra len yezica'chle ciuda ca' zjanyechj zjambi'in legaquen, gosonchgüe' da' nac yela' zto' len cuerp chegaquen', le gosata'lene' ljež bene' byogaque' gosone' le' ca xo'ole' cont gosone' da' yela' zto' len legaque'. Nach Diosen' gwsele' yi' da' bzejnen ciuda ca' gosebiayi'tecczen'. Na' da' bene' ca', chosnise' chio' benač gata' castigw lo yi' gabil toli tocanē che bene' bi yosozenag che'.

⁸ Na' bia'cze bene' ca' chososed chosolo'ede' le'e diža' güenlaže', zjanite' chesone' da' mal na' chesene' besele'edagüede' nac güen dan' chesonen'. Chesone' da' yela' zto' len cuerp chegaquen' bi chesaclaže' yosozenague' che Xancho Diosen', na' chesezi'diže' angl ca' bene' zjazaca'chgua.

⁹ Perw nža'le cheson angl che Diosen', le cani' gwzoa to timp cate' angl blao ben' le Miguel gocyože' len Satanás dan' chnabia' da' xigüe' ca' da' goclažen' yeyoan' cuerp che da' Moisésen'. Na' la'czla' Miguelen' naque' angl blao che Diosen', bi beyaxjde' si'diže' Satanásen', san con gožen': "Xanto' Diosen' tile' le'."

¹⁰ Perw bene' quinga chesezi'diže' bite'teze da' bi chesejni'ide'. Na' cheson-teze' da' ca' ža cuerp chegaquen' yesone', ca cheson beyixe' be bi chesejni'i, na' da' ca' chesonen' chosožiayin' legaque'.

11 Nyaše'chgua gac chegaque'. Zjanite' chesegue'e lježgaque' can' ben da' Caïn, na' lecze chesoe'laže' chesone' da' mal cont yesone' gan mechw can' ben da' Balaam. Chesone' güedenag len bene' ca' gwlej Diosen' cont chesenabi'e legaque' cacze güedenag ben da' ben' gože' Coré cani', na' can' gwžiai'y' da' Corén' neče yela' güedenag chen', lecza ca' yesebiaye'e.

12 Na' cate' le'e che'ej chagwle txen cont chlo'ele chaque lježle, legaque' chesagwxatzeze' con nacteze žan chegaque' na' chese'ejchgüe' gualaz da' yesone' güen len bene' lježe'. Na' da' bibi zaca' can' chesone', da'n'an' zjazaca'lebde' ca bzigüe' da' dope to le'e lache' šiš, na' lecze zjazaca'lebde' ca bene' güeye' xila' bene' chŋa' cuine' na' bi chŋe'e xila' ca'. Lecze zjazaca'lebde' ca bejw da' nžiga' be' da' bi cheyaquen yejw, na' ca to yag xen da' bibi chbian cate' ba bžin tiemp cuian, na' gualaz da' cuian chbižen na' chbižen lo yo.

13 Na' neče yela' zton' cheson bene' ca', zjazaca'lebde' ca nisdao' da' chas chata' na' checho'onen bžina' ga nac lo yo cho'a nisdao'n. Na' zjazaca'lebde' ca beljw da' bich zjažian xišne'en gan' cheyała' yesebian, le Diosen' bžie' bia' yesezaca'zi'e toli tocaŋe gan' nac leca chol.

14 Gwzolaon cate' gwzoa da' Adán bžinten cate' gwzoa da' Enoc goc gaže dia che Adánna'. Na' Enoquen' lecze be'e diža' da' bzejni'i Diosen' le' che bene' ca' chososed chosolo'ede' diža' güenlaže', cate' gwne': "Ble'eda' za' Xancho Diosen' len angl zan juisyw che' ca'

15 cont chogbi'en yesezaca'zi' yogo' bene' zjanape' dola'. Yogo' bene' ca' bi bosozenag che' yesezaca'zi'e toli tocaŋe neče da' gosone' da' mal juisyw yela' güedenag chegaquen' na' neče da' gosene' diža' ya' che'."

16 Na' ca nac bene' ca' chososed chosolo'ede' le'e diža' güenlaže', bate'teze chesežeše' che Diosen', na' bibi chesazlaže'. Con chesonteze' bite'teze žan chegaque'. Len xtiža'gaquen' chesonxen cuingaque' na' chosopede' bene' yoble cont yesone' gan mechw o cont yesaclen bene' legaque'.

San Judas che'e bene' chesonxen Jesucriston' can' cheyała' yesone'

17 San le'e bene' migw, bene' chacda', cheyała' šjajze'ele diža' nga gosena postlw ca' bene' ca' gwlej Xancho Jesucriston'.

18 Gosene': "Tiempen' cate' ba zoa yid Xancho Jesucriston', nita' bene' bi yesejle' che Diosen' na' yesonle' che' na' yesonteze' con da' žan chegaque' da' nac yela' zto'."

19 Na' na'a bene' ca' chesone' cont le'e chejnilaže'le Criston' bi chonle toze xbab, san nža' nža'te ca žale. Chesone' xbab che da' chnalaza'e cuerp chegaque', le bi yo'o Spiritw che Diosen' lo' yichjlažda'ogaquen'.

20 Perw le'e bene' migw, chacda' le'e, na' chŋeyoeda' le gonchach laže'le cont soachachle šejle'le diža' li che Diosen' da' zaca'chgua. Na' le yol' güiž Diosen' ye'ln'e' da' chzejni'i Spiritw chen' le'e.

21 Na' le soa le gon cont gache'ele chaque Diosen' le'e. Na' da' cheyaše' cheži'ilaže' Xancho Jesucriston' chio', gone' cont šjajzoalenchone' toli tocaŋe. Da'n'an' le soa le cueze batcan' gone' ca'.

22 Bal' bene' chesacžejlaže' še cheyała' yesone' can' ža Diosen'. Le gwzejni'i legaque'.

23 Na' bene' ca' ba chesezolažüe' chosozenague' che diža' güenlažen', le gon con ga zelao saca'le cont yesyechoje' lo nez malen' na' le co'o legaque' nez güenna'. Na' yebał bene' chesonchgüe' da' xinj, na' lecze cheyała' yeyaše'cho legaque', perw do chaž chžebcho, do chgue'echo dan' chesonen' na' cheyała' gwsaca'cho cont bi goncho txen len da' xinjen' chesonen'.

Judasen' chonxene' Diosen'

²⁴⁻²⁵ Cheyala' gonxencho toz Dios ben' zaca' gonxencho, ben' none' yela' mban checho toli tocanē. Dios nan' naque' bene' sina' juisyw. Chac chone' cont bi lažo'cho goncho da' xiņj, na' chac chone' cont bibi xtolā'cho gata' cate' yežincho lagüen' gan' yo'ochgua be'ni'. Leca yebecho cana'. Diosen' naque' la'zelagüe bene' zaca' bene' blaο, na' zaque' chnabi'e doxen. Naque' Xan yogo' benaç na' yogo' bica'chle da' de. Len' gocxene' cate' biņa' xe yežlion' na' cheyala' gonxenchone' toli tocanē dan' gwsele' Xancho Jesucriston' chaclene' chio'. Ca šca gac. Da' na'zen' chzoja'.

JESUCRISTON' BZEJNI'IDE' SAN JUANNA' CHE DA' CA' ZA' GAC

Diosen' bzejni'ide' Jesucriston' diža' quinga

¹ Diosen' bzejni'ide' Jesucriston' diža' quinga cont le' gwlo'ede' bene' ca' chesejnilaže'ne' can' ba zoa gac. Nach ba gwsele' to bene' nac angl che' cont bzejni'iden' neda' Juan, neda' naca' ben' chon xšine'.

² Na' chzoja' diža' li che yogo' da' ba ble'eda', na' nezda' da' li gwna Diosen' gac quinga, le' Jesucriston' bzejni'iden' neda'.

³ Mbalaz bene' ca' yosolab da' nga chzoja' da' bzene Diosen' neda' na' bene' ca' yesende' yosolab bene' yoble len, še da' li yosozenague' chen, le' ba zoa gac can' žanna'.

Juanna' chzoje' bene' ca' chesonxen Jesucriston' yež ca' gaže

⁴ Neda' Juan chzoja' le'e nita'le gaž yež che Asia chdop chžagle chonxenle' Jesucriston'. Diosen' len Spiritw chen' yesenita'sque' yesaclene' le'e na' yesone' soa cuezle binlo len xbab chelen', Dios ben' ba zoacze' cate' biņa' xe yežlion', na' soacze' toli tocanē. Na' Spiritw che Diosen' naquen ca gaže spiritw na' zoan lao Diosen' gan' chi'e chnabi'e.

⁵ Na' Jesucriston' lecze soa'sque' gaclene' le'e na' gone' soa cuezle binlo. Jesucriston' naque' ben' cho'e diža' li che Diosen'. Naque' bene' nechw bebane' ladjo bene' guaten' ben' bich nabia' yela' goten' le'. Na' le' chnabi'e yogo' nochle bene' gwnabia' že' yežlio nga. Dan' chacde' chio' bnežjw cuine' gosote'ne' na' blaj xchene' cont bnitlagüe' xtoła'chon'.

⁶ Nach ba gwleje' chio' cont nabia'cho txen len le' ca no rey na' cont soacho gonxencho Diosen' ca no bžoz, Dios ben' nac Xe' na' lecze naque' ben' chonxene'. Cheyała' gonxenchone' toli tocanē, le' zoacze' chnabi'e toli tocanē. Can' gonšcaczcho.

⁷ Jesucriston' yide' da' yoble to lo' bejw, na' yogo'lol bene' yesele'ede' le', lente bene' ca' gosot le'. Na' bene' ca' že' to to latje lo yežlion', yesebežyaše' cate' yesele'ede' le'. Can' žia', na' can' gacšca.

⁸ "Neda' naca' Dios ben' ben' yežlion' len yogo' bichle da' de, na' naca' ben' gon cont te chen. Da'nana' zaca'lebda' ca letr nechw da' nzi' A na' letr bzebe da' nzi' Z." Can' ža' Xancho Dios ben' nape' yela' guac xen juisyw, ben' ba zoacze' cate' biņa' xe yežlion' na' soacze' toli tocanē.

Juan ble'edaogüede' leca bene' zaca' juisyw nac Criston'

⁹ Neda' Juan naca' bene' lježle dan' naccho txen chzenagcho che Jesús'en' cont Diosen' chnabi'e yichjlažda' ocho, na' toz can' chosochi chososaca' bene' chio' neče xtižen', na' txen chaclen Jesucriston' chio' cont chyo chčejecho len yogo' da' chac checho. Da' ba gwđixjue'eda' xtiža' Diosen' na' ba bia' diža' che Jesucriston', da'nana' gosezene' neda' na' gosesele' neda' pres gan' že' Patmos dan' nac to yežlio dao' lo' nisaon'.

¹⁰ Na' to ža dmi gw Spiritw che Diosen' benen cont ble'edaogüeda', na' benda' Jesucriston' chne' cožan' zižjehgua ca ga chbež trompeta.

¹¹ Na' gože' neda':

—Neda' naca' ben' ben' yežlion' len yogo' bichle da' de, na' naca' ben' gon cont te chen. Da'nana' zaca'lebda' ca letr nechw da' nzi' A na' letr bzebe da' nzi' Z. Bzój to le'e yiš da' quinga le'edo', na' selon' lao bene' ca' nita' gaž yež

che Asia chesedop chesežague' chesonxene' neda', yež ca' zjanzi' Efeso, na' Esmirna, na' Pérgamo, na' Tiatira, na' Sardis, na' Filadelfia na' Laodicea.

¹² Na' gwyechja' gwña'a non' chne na' ble'eda' gaže candeler de oro.

¹³ Na' gachol candeler ca' gaže, ble'eda' to bene' nac ca to benach perw goche'eda' bi naque' benachze. Nyaze' to lache' ton' da' bžinte lo ni'e na' nchej cho'alcho'en ca to bant de oro.

¹⁴ Na' yiša' yichjen' naquen da' šiš ca xa xila' o ca no beye'. Na' yejlagüen' gosactiten ca to yi' da' čala'niñ.

¹⁵ Ni'e ca' ble'edan' ca to de bronce da' nľachgua cate' naquen ya'alj xoan lo yi'. Na' ši'en nenen zižjehgua ca chziž yegw cate' dechgua nis.

¹⁶ Na' noxe' gaže beljw len ne'e lican' na' lo' cho' en chchojen ca to spada da' nľa chop la'an. Na' cho'alagüen' goctiten ca gwbiž cate' čña'chguan.

¹⁷ Na' cate' ble'eda'ne' gwbiža' xni'en gottia' šlat. Nach bli ne'e lican' gwxoen' yichja' na' gože'nda':

—Bi žebo'. Neda' naca' ben' ben yežlion' len yogo' bichle da' de, na' naca' ben' gon cont te čen.

¹⁸ Naca' ben' nsa' yeľa' mban. Cana' gota' perw bebana' ladjo bene' guat na' zoacza' toli tocañe. Na' naquen lo na' nia' bat yesat to to bene' na' nac gac čhegaque' cate' bach gosate'.

¹⁹ Na' na'a bzoj diža' čhe da' ca' ba ble'edo' na' diža' čhe da' ca' chac na'a na' diža' čhe da' ca' za' gac.

²⁰ Na' da' nono na' neze čhe beljw ca' gaže dan' noxa' na' čhe candeler de oro ca' gaže, zejen quinga: beljw ca' zejen gaže bene' ca' cheso'e xtiža' len gaže cuen bene' ca' chesedop chesežag chesonxene' neda' gan' nzi' Asia. Na' candeler ca' gaže zejen gaž cuen bene' ca' chesonxen neda'.

2

Da' gwna Jesucriston' čhe bene' ca' chesonxen le' lo ciuda ca' gaže: Da' gože' bene' Efeso ca'

¹ Bzoj ben' choe' xtiža' len bene' ca' chesedop chesežag chesonxene' neda' lo ciuda Efeson', yo'one' neda' noxa' beljw ca' gaže len na' lican' na' chda' gachol candeler de oro ca' gaže, na' yo'one' nedan' chapa'ne' diža' quinga:

² "Neze nle'eda' ca güenna' chonle, can' chčhejlaže'le zoale chonchgual xšinan'. Nezda' bi chleble bene' cheson da' xinj, le ba ble'ele can' cheson bene' güenlaže' ca' chesene zjanaque' postlw na' chache'ele bi zjanaque' dogualje postlw.

³ Ba byo bčhejle len yogo' dan' ba goc čhele na' ba benchgual xšinan' na' bi jažaque'laže'le.

⁴ Perw da' nga bi chazlaža' can' chonle, da' bich chaquale neda' can' goquale neda' cana'.

⁵ Da'nan' le gon xbab can' gwzoale goquale neda' na' can' gwzoale bzenagle čhia' na' yetinje xtoľa'le cont da' yoble gonle güen can' benle cana'. Na' še bi yetinjele xtoľa'len', yedeyena' cont bich gacle candeler čhia'.

⁶ Perw la'czla' bi chontecle güen, chebeda' chgue'ele da' xinj da' cheson bene' ca' zjanzi' nicolaftas, bene' ca' chesene' guac gontezechle da' xinj, le neda' lecze chgue'eda' can' chesonen'.

⁷ Le'e žia nagle da' chene, le gwzenag čhe da' nga ža Spiritw čhe Diosen' chen' le'e chdop chžagle chonxenle neda' gate'teze: Note'tezle še soele bi cuejyichje xtižan', neda' gona' da' gagwle da' chbia lo yag yeľa' mban da' zoa latje xdan čhe Diosen'."

Da' gože' bene' Esmirna ca'

⁸ 'Na' na'a bzoj ben' choe' xtiža' len bene' ca' chesedop chesežag chesonxen neda' ciuda Esmirna, yo'one' naca' ben' ben' yežlion' na' len yogo' bichle da' de na' ben' gon cont te chen, ben' lecze gote' na' bebane' ladjo bene' guat ca', na' yo'one' nedan' chapa'ne' diža' quinga:

⁹ "Neze nle'eda' ca güenna' chonle. Nezda' chy chzaca'le. Nezda' nacchguale bene' yaše', la'czla' de chele da' zaca'ch clal ca yela' gwñi'an'. Na' ca nac bene' Israel bene' ca' chesene' ba gwlej Diosen' legaque' cont gone' güen len legaque', nezda' bale' chesenie' yela' ya' chele. Perw bi gwleje' ben' cheson ca', le bi chesejnilaže'ne', san zjanaque' dapa' txen chosozenague' che Satanás dan' chnabia' da' xigüe' ca'.

¹⁰ Bi žeble da' ca' za' gac chele, le Satanásen' gonen cont yesejixjue' balle liža cont gata'bia' še soen gonen cuejyichjle xtižan'. Na' lo to chope ža yosochi yososaque' le'e. Le soateze le gwzenag chia' la'czla' še yesote' le'e, na' gona' cont banle len neda' toli tocanē.

¹¹ Le'e žia nagle da' chene, le gwzenag che da' nga ža Spiritw che Diosen' chen' le'e chdop chžagle chonxenle neda' gate'teze: Note'tezle še soele bi cuejyichjle xtižan', bi gac chele can' yesac che bene' yesezaca'zi' toli tocanē dan' žacho yela' got gwchope."

Da' gože' bene' Pérgamo ca'

¹² 'Na' bzoj ben' choe' xtiža' len bene' ca' chesedop chesežag chesonxen neda' ciuda Pérgamo, yo'one' neda' napa' spada toše' dan' nla chop la'an, na' nedan' chapa'ne' diža' quinga:

¹³ "Neze nle'eda' ca güenna' chonle. Na' nezda' zoale lo ciuda gan' chn- abia'chgua Satanásen', perw zoale chzenagle chia'. Nezda' bi chbejyichjle xtižan' dan' chejle'le na' naca' gwlejyichjlen cate' gosote' Antipas ben' be'e xtižan' lo ciuda chelen' gan' že' bene' zan bene' chosozenag che Satanásen'.

¹⁴ Perw de to chope da' chonle da' bi chazlaža'. Le nita' balle chzejni'i iježle guac gontezle da' xinj. Ca'cze nac dan' bzejni'i da' Balaam da' rey Balac cani'. Da'nana' gwsele' no'ole gosego'oyele' bene' Israel ca' cont gosagüe' yela' guagw da' nac che l'gua'a lsaca' gosejnilaže' bene' zito' ca' na' cont gosone' da' yela' zto' len cuerp chegaque'.

¹⁵ Na' lecze nita' balle chzenagle che dan' chgue'eda' dan' chososed chosolo'e bene' ca' zjanzi' nicolaítas.

¹⁶ Da'nana' le yetinjē che da' xinjen' chonle. Na' še bi yetinjēle xtoła'len', la' yidtia' yedetillena' nole chonle da' xinjen' len spada dan' chchoj choan'.

¹⁷ Le'e žia nagle da' chene, le gwzenag che da' nga ža Spiritw che Diosen' chen' le'e chdop chžagle chonxenle neda' gate'teze: Note'tezle še soele bi cuejyichjle xtižan', gona' le'e to yela' guagw da' zaca' da' nono na' le'e lo yežlion', to da' zaca'leben ca maná, na' gona' to yej šiš che to tole gan' yoj lalē da' naquen to lalē da' cobe da' nono nombia', lete le'e gaquen lo na'le gombia'len."

Da' gože' bene' Tiatira ca'

¹⁸ 'Na' bzoj ben' choe' xtiža' len bene' ca' chesedop chesežag chesonxene' neda' lo ciuda Tiatira, na' yo'one' naca' dogualje Xi'in Dios, na' chactit yejlagua' ca to yi' da' čala'nin' na' ni'a ca' chesaquen ca bronce da' cheyac ya'alj cate' xoan lo yi'. Yo'one' neda' chapa'ne' diža' quinga:

¹⁹ “Neze nle'eda' ca güenna' chonle, nezda' zoale chaquele neda', chejni-laže'lenda', chonchguale xšinan' na' chchejele bite'teze chac chele, na' nezda' chonchle güen na'a clcl can' benle cana'.

²⁰ Perw de to da' chonle da' bi chazlaža', le choe'le latje zoa to no'ole naque' txen len le'e, no'olen' zaca'lebe ca da' reina Jezabel. Že' chsed chlo'ede' xtiža' Diosen' perw len diža' güenlaže' chen' chziye'e bene' chesejnilaže' neda' cont bale' chesone' da' nac da' yela' zto' len cuerp chegaquen' na' lecze chesagüe' yela' guagw da' chesena bene' naquen che l gua'a lsaca' chesejnilaže'.

²¹ Ba gwleza' cont yetinjde' che yela' zto' dan' chonen', perw bi chaclaže' yetinjden', na' biña' cuejyichje' yela' zton' chonen'.

²² Da'nana' gona' cont gacsende' na' gate' lo cam, na' gona' cont bene' ca' cheson yela' zton' txen len le'e lecze yesale'chgüede' še bi yesebejyichje' da' ca' chzejni'ide' legaue' yesone'.

²³ Nach bi' che' ca', gona' cont yesatbe'. Nach yogo' cuen bene' ca' chesedop chesežag chesonxene' neda' gate'teze yesache'ede' nombi'a yogo'te xbab da' yo'o lo' yichjlaždao' benach, na' gona' cont to toe' soe' mbalaz o saca'zi'e con ca nac da' ba bene'.

²⁴ Na' le'e zoale Tiatiran' le'e bi chonle can' chsed chlo'e no'ole güenlažen' na' neca nsedle dan' chesene' chesejni'ide' che Satanásen' dan' nono nombia', bi nia' bichle da' cheyala' gonle.

²⁵ Con soacze gonle da' güen can' chonle tža tža, cont ne' chonle güen caten' yida' da' yoble.

²⁶ Note'tezle še soele bi cuejyichje' xtižan', na' še soele ne' soatezle gonle can' nona' mandaw cate'ch yida' da' yoble, gona' cont nabia'le nación ca' txen len neda'.

²⁷ Ca Xan' ba bene' cont chnabi'a nación ca', lecze can' gona' cont bene' bi yesebejyichje' xtiža' yesenabi'e txen len neda'. Na' yesenabi'e nación ca' na' žan ca žan bene' nación ca' yosozenague' chegaue', na' bene' ca' bi chosozenag, yosožiyae'le legaue' ca to bene' chzoxj to no yeso' xguague.

²⁸ Na' gwnežjua' legaue' beljw xsilen'.

²⁹ Le'e žia nagle da' chene, le gwzenag che dan' ža Spiritw che Diosen' chen' le'e chdop chžagle chonxenle neda' gate'teze.”

3

Dan' gože' bene' Sardis ca'

¹ Na' lecze bzoj ben' choe' xtiža' len bene' ca' chesedop chesežag chesonxen neda' lo ciuda Sardis, yo'one' napa' Spiritw che Dios dan' nac ca gaže spiritw, na' noxa' beljw ca' gaže, na' neda' chapa'ne' diža' quinga: “Neze nle'eda' yogo'lo' dan' chonle. Nezda' nacle ca bene' guat la'czla' chze chele napple yela' mban toli tocané.

² Le gon xbab can' chonle na' le šejnilaže'ch neda' na' le gwzenag chia' šlac biña' yeyož cuiayi'le, le dan' chonlen' bi naquen can' chebe Dios ben' chonxena'.

³ Le soa le gon xbab che xtižan' dan' bosozejni'i bene' le'e na' da' bzenagle chen cana'. Le gwzenag chen na'a da' yoble cont yetinjjele xtola'len'. Na' še bi gonle xbab yetinje xtola'len', žin ža yedexenyala' le'e na' gona' castigw chele ca chzenyal to no bene' gwban cate' chbane'. Bi nezele bi ža bi hor.

⁴ Bia'cze nita' balle bene' Sardis biña' gonle da' malen' txen len bene' yezica'chle. Na' le'e nac lažda'olen' xilaže' len neda', žin ža gona' lache' šiš chazle na' talenle neda', le zaca'le cont gonle neda' txen.

⁵ Note'tezle še soele bi cuejyichjle xtižan', žin ža gona' lache' šiš çazle, na' gwbat yoxia' lalen' le'e libr çhia' gan' nyoj la yogo' bene' zjanape' yela' mban toli tocañe, na' güe'lena' Xan' diža' na' len bene' zjanac angl che' ca' yapagaca'ne' nacle neda' txen.

⁶ Le'e žia nagle da' chene, le gwzenag che dan' ža Spiritw che Diosen' chen' le'e chdop chžagle chonxenle neda' gate'teze."

Da' gože' bene' Filadelfia ca'

⁷ Na' lecze bzoj ben' choe' xtiža' len bene' ca' chesedop chesežag chesonxen neda' lo ciuda Filadelfia, yo'one' naca' bene' laždao' xilaže' juisyw, na' zoateza' chona' can' gwnia' gona'. Napa' xinya che da' rey David. Cate' chsaljua' cont yeso'o bene' gan' zoa Diosen' chnabi'e, nono gac yosejyw, na' cate' chseyjua' cont bi yeso'e, nono gac saljw. Yo'one' neda' chapa'ne' diža' quinga:

⁸ "Neze nle'eda' ca güenna' chonle. Nach ba gwsaljua' ca to puert che le'e da' nono gac yosejyw. Na' la'czla' bi nac zanle, ba chzenagle xtižan' na' bi gwlejyichjlen caten' bosochi bososaque' le'e.

⁹ Bał bene' Israel že' gan' zoalen' chesene' ba gwlej Diosen' legaque' cont gone' güen len legaque', perw bi gwleje' legaque', le bi chesejnilaže'ne'. Zjanaque' dapa' txen chosozenague' che Satanás dan' chnabia' da' xigüe' ca'. Na' ca nac legaque', gona' cont žin ža yesape' le'e bala'an' cate' yesacbe'ede' chacda' le'e.

¹⁰ Ba byo bchejle len yogo' dan' gwdi gwxaca'le na' benle can' nona' mandaw, na' da'nan' gona' yechojle güen cate' žin ža saca'zi' yogo' benačh. Cana' gata'bia' che to to benačh še yosozenague' chia' o še bi yosozenague'.

¹¹ Ba zoa yida' da' yoble. Le soachach le šejnilaže'nda' na' gwzenagle chia' cont bibi gwžon soale mbalaz toli tocañe.

¹² Note'tezle še soele bi cuejyichle xtižan', žin ža gona' gacle ca bdope da' zjanita' lo' yodao' blao che Dios ben' chonxena', le yežinle gan' zoa Diosen' na' yega'anlenle' toli tocañe. Na' gwzoja' loxga to tole la Dios ben' chonxena' na' la ciuda che', ciuda Jerusalén da' nac da' cobe da' chi' yaba na' yetjen lo yežlion'. Na' gwzoja' loxga to tole la neda' da' nac da' cobe.

¹³ Le'e žia nagle da' chene, le gwzenag che dan' ža Spiritw che Diosen' chen' le'e chdop chžagle chonxenle neda' gate'teze."

Dan' gože' bene' Laodicea ca'

¹⁴ Na' bzoj ben' choe' xtiža' len bene' ca' chesedop chesežag chesonxen neda' lo ciuda Laodicea, yo'one' chona' cont chac can' chnalaže' Diosen'. Cho'a diža' li da' nac cayanen' che' Diosen' neda'. Txen len neda' ben Diosen' benačh na' yogo'loł bichle da' de le'e yaban' na' lo yežlion'. Yo'one' neda' chapa'ne' diža' quinga:

¹⁵ "Neze nle'eda' ca chonle, bi nacho chgue'ele neda' na' neca chaquele neda'. Yebechda' šaca' chgue'ele neda' o šaca' chaquele neda'.

¹⁶ Na' da' bi chonle cuent gaquele neda', da'nan' ba zoa cuejyichja' le'e bich gona' le'e ca xi'ina'.

¹⁷ Le'e žale zoale mbalaz, žale chonle da' güenchgua, žale bibi chyažjele le chebechgüe Diosen' le'e. Na' bi chache'ele leca bene' zban nacle len Diosen'. Bi chache'ele nacle ca to bene' bi chle'e o ca to bene' laže' ga'alyid da' bi chajni'ile xtižan' neca chzenagle chen.

¹⁸ Da'nan' chnia' le'e cheyala' si'le da' gona' le'e, le naquen da' zaca'ch ca oro dan' ba bosozeye' cont bega'an' da' dogualje. Si'le da' gona' le'e cont da' li soale mbalaz. Na' le nab yezi'xena' xtoła'le cont gac lažda'olen' xilaže' can'

chac xalana' bene' nyaz to lache' šiš xila'. Gonle ca' cont bich le'eda' le'e ca to bene' laže' ga'alyid, bene' cheyala' gaque zto'. Na' le güe' latje yocoba' xbab chelen' cont bich gacle ca to bene' bi chle'e, bene' chyažje rmed che yejlagüe' cont le'ede', san gacbe'ele da' chaclaže' Diosen' gonle.

¹⁹ Note'teze bene' chacda' chdila'ne' na' chnežjua'ne' castigw cate' chone' da' xinj. Da'nan' cheyala' cuec yichje yetinjele xto'la'len'.

²⁰ Chnia' to tole ca to bene' zecha cho'a yo'o chelen' chnie' na' chsiže' le'e puerten'. Note'tezle še gwzenagle chia' na' še saljwle cont šo'a, yedesoa' len le'e na' gona' cont soale mbalaz txen len neda'.

²¹ Na' note'tezle še soele bi cuejyichje xtižan', žin ža gona' cont cue'lenle neda' gan' chi'a chnabi'a. Can' bena' neda', gwzoeda' cont bena' can' gwna Xan' nach chi'lena'ne' chnabi'a'to' txen.

²² Le'e žia nagle da' chene, le gwzenag che dan' ža Spiritw che Diosen' chen' le'e chdop chžagle chonxenle neda' gate'teze."

4

Ben' že' yaban' chesonxene' Diosen'

¹ Beyož boza' da' ca' gwne' neda', ble'edaogüeda' nyaljo to puert yaban'. Nach da' yoble benda' gwne Jesucristw ben' gwne neda' da' nechw žižjehgua cacze žiže chbež to trompeta, gože'nda':

—Gwyep gan' zoa' nga cont gwlo'eda' le' da' ca' za' gac.

² Nach la' bente Spiritw che Diosen' cont ble'edaogüeda' yaban' gan' chi' Diosen' chnabi'e.

³ Na' ble'eda' ben' chi' chnabian' chactite' ca chactit yejese, yej da' nzi' jasje na' da' nzi' cornalina. Na' to da' nac ca to pita' gwyechjen gan' chi'e chnabi'en, na' chactiten ca chactit to yej da' nzi' esmeralda.

⁴ Na' cue'ej cuit Diosen' gan' chi'e chnabi'e zjachi' yetapechoa bene' gwlej Diosen' zjanaque' blao, bene' chesenabi'e txen len le'. Zjanyaze' lache' šiš na' zjazoa corona de oro yichj to togaque'.

⁵ Na' gan' chi' Diosen' chnabi'e chep yes na' chac sšag na' chašjw chtin. Na' lagüen' nita' gaže yi' da' chala'nin. Yi' ca' gaže zjanaquen Spiritw che Diosen', na' Spiritw che Diosen' naquen ca gaže spiritw.

⁶ Na' doxen lagüe' gan' chi'e chnabi'en nžiljw lo yon' to da' chactit ca vidrw na' nlan' ca to nis nyadi da' nla'xeje.

Na' nita' yetap bene' gan' zoa Diosen'. Tgüejje' nita' cuite' chop la'ate, yetoe' cože' na' yetoe' lagüe', na' zjažia da' zan yejlaogaque', žia da' žia laogaque' na' lente cože'gaque'.

⁷ Bene' nechw naque' ca to león, na' bene' gwchope ca to go'n, na' bene' gwyone nac cho'alagüe' ca che benač, na' bene' gwdape naque' ca to bsia be ze lo be'.

⁸ Na' dapte bene' ca' to toe' žia xop güeje xilgaque', na' zjažia zan yejlao-gaque' lo xilen' lente cože' xilen'. Na' do ža do yel bi chososane' chesene':

Leca bene' laždao' xilaže' juisyw nac Xancho Diosen' ben' nape la'zelagüe yela' guac xen.

Ba zoacze' cate' za' xe yežlion', na' soacze' toli tocaņe.

⁹ Na' yogo' ni'a cate' bene' ca' tap cheso'e diža' catec bene' zaca' nac Dios ben' chi' chnabi'a, ben' zoacze toli tocaņe, yogo' ni'a cate' chesonxene' le' cheso'e yela' choxclen che',

¹⁰ bene' tapechoa ca' gwlej Diosen' cont zjanaque' blao chosozoa xibe' lao Dios ben' zoa toli' tocanē chesonxene' le' gan' chi'e chnabi'e na' chosonite' corona chēgaquen' xni'en, chesene':

¹¹ Xanto' Dios, zaco' gonxento' le', na' soato' le' bala'an' na' güe'to' diža' che yela' guac xen chion', le len' beno' yogolol' da' de, na' beno' yogo'lo len con ca gwnalažo'.

5

Jesucristw ben' zaca'lebe ca xila' daon' gosot bene' Israel ca' neche xtoła'gaque'

¹ Na' ble'eda' Dios ben' chi' chnabia', len ne'e licha noxe' to yiš da' ndobyoyen na' nyoj chop la'aten na' nyeyjon nyišen' gaže seyw.

² Na' ble'eda' to angl gual gwne' zižje gwne':

—¿Non' zaca' gwzoxj seyw ca' cont šaš yišen'?

³ Na' nono bžel bene' zaca' gwzaše' yišen' neca yaban' na' ne yežlion' na' neca gan' že' bene' guat ca'. Ne to nono bžel bene' la'ch le'ezden' nac naquen.

⁴ Na' gwchežchgua' da' nono zoa bene' zaca' gwzaše' yišen' gwlaben' na' neca zaque' na'ze' nac naquen.

⁵ Nach to bene' gwlej Diosen' cont naque' blao gože'nda':

—Bitw cuežo'. Gwna'šc, na' zoa Jesucristw ben' golje lo diaža che da' Judá, naque' rey can' nac da' xoxxta'ogüe' David, na' da' nape' yela' chnabia' xen zaca'lebbe' ca to bež be nzi' león. Na' le' zaque' gwzoxje' seyw ca' gaže na' gwzaše' yišen', le ba gwzoede' bene' cont gac nitlao xtoła' benačen'.

⁶ Nach ble'eda'ne' zeche' gan' chi' ben' chnabian' na' ladjo bene' ca' tap ben' zjažia xil, do gachol bene' blao ca' tapechoa. Ble'eda'ne' ca to xila' dao' ben' ba gosote', ca xila' be žia gaže lozba' na' gaže yejlaoba'. Na' yejlaoban' gaže zejen zoa Spiritw che Diosen' doxen lo yežlion' chonen can' ža Diosen'.

⁷ Nach ben' ble'eda' ca to xila' dao' jaxi'e yiš dan' noxe' ben' len ne'e licha gan' chi'e chnabi'en.

⁸ Na' cate' jaxi'e yišen' bene' ca' tap lente bene' blao ca' tapechoa bosozoa xibgaque' lagüen'. Na' to to bene' blao ca' zjanoxe' to arpa na' to barser de oro gan' chey yal, na' yalen' zejen xtiža' bene' ca' zjanac lo na' Diosen', dižan' chesoe'lene' le' caten' chosol güiže'ne'.

⁹ Nach bene' ca' gosole' to da' cobe dan' ža:

Zaco' jaxi'o yišen' cont gwzašon' na' gwzoxj' seyw ca' nyišen', le bnežjw cuino' gosote' le'.

Blalj xcheno' cont bnitlaguo' xtoła'to', na' gwxi'o neto' cont nacto' lo na' Dios,

neto' nacto' bene' to to nación, to to yež, to to diaža na' chacto' gwde gwdele diža' da' de lo yežlion'.

¹⁰ Na' gwlejo' neto' cont nacto' ca rey, na' zoato' chonxento' Dios cheton' ca bžoz, na' žin ža nabia'to' lo yežlion'.

¹¹ Nach gwna'a na' ble'eda' bene' zan juisyw angl, neca gwzoeda' gwlabane'. Zjazecha angl ca' cue'ej cuit ben' chi' chnabian' na' gan' že' bene' ca' tap na' bene' blao ca' tapechoa.

¹² Na' benda' cheso'e dižan' zižje chesene':

Jesucriston' bnežjw cuine' neche xtoła' benačen',

na' da'nan' zaca'lebde' ca xila' daon' gosot bene' Israel cont gwñitlao xtoła'gaque'.

Na' Jesucriston' zaca'cze' gonxenchone',
le chnabi'e doxen, na' yo'o lo ne'e yogo'te da' zjade.

Naque' sina' gual, na' nape' yela' guac xen.

Cheyala' güe'chone' yela' bala'añ,

na' güe'cho diža' naque' bene' zaca' juisyw.

¹³ Na' lecze benda' yogo' bene' že' yaban' na' yežlion' na' bene' že' latje che bene' guat, na' bene' zjanita' lo nisdao', cheso'e diža' chesene':

Tołi tocañe chonxencho Dios ben' chi' chnabia'

na' Jesucriston' ben' zaca'lebde' ca xila' daon' gosot bene' Israel cont gwñitlao xtoła'gaque'.

Zjanape' yela' bala'añ, na' zjanaque' bene' zaca' juisyw,

na' zjanape' yela' guac xen juisyw tołi tocañe.

Na' benda' lecze can' gosena be chaš yežlion' na' be chaš le'e yaban' na' lo' nis, na' len yogo' bichle da' zjade.

¹⁴ Nach bene' ca' tap ben' zjažia xil gosene':

—Ca'šcacz gac.

Na' bene' blao ca' tapechoa bosozoa xibgaque' gosonxene' Dios ben' zoa tołi tocañe.

6

Seyw ca' gaže

¹ Ca nac seyw ca' gaže, ble'eda' cate' ben' zaca'lebde' ca xila' daon' be gosot bene' gualaž cheto' neche xtoła'gaque' bzoxye' seyw nechon'. Nach bene' ca' tap zjažia xil, toe' gwñe' zižje, ca zižjen' chašjw chtin yi' gwzio', gwñe':

—Da, na' gwñ'a da' nga.

² Na' cate' gwñ'a'a, ble'eda' to cabayw be šiš na' ben' žie' cože'ban' noxe' to arcw. Ba bosozoe' to corona yichje' neche da' ba bene' gan lo gwdile, na' na'a ba zeje' da' yoble cont tillene' nöchle bene' chesegue'ede' le' na' gone' gan legaue'.

³ Na' ben' zaca'lebde' ca xila' dao' be gosot bene' gualaž cheto' neche xtoła'gaque', cate' bzoxye' seyw gwchope benda' gwñe yeto ben' žia xil, ben' nac bene' gwchope, gwñe':

—Da, na' gwñ'a da' nga.

⁴ Nach bchoj yeto cabayw, na' bena' nacba' be xña. Na' ben' žie' cože'ban' gwyo'o lo ne'e gone' cont bene' že' yežlion' bich yesenite' binlo len lježe' san yesot lježe'. Na' bosonežjue'ne' to spada xen.

⁵ Na' cate' ben' zaca'lebde' ca xila' daon' be gosot bene' gualaž cheto' neche xtoła'gaque' bzoxye' seyw gwyoñe, benda' gwñe bene' gwyoñe ben' žia xil, gwñe':

—Da, na' gwñ'a da' nga.

Nach gwñ'a'a na' ble'eda' to cabayw gasj na' ben' žie' cože'ban' noxe' to xigonz.

⁶ Na' benda' gwñe to bene' do gan' že' bene' ca' tap ben' zjažia xil, gože' ben' žia cože' cabayw gasja', gwñe':

—Gwyej jažiai' trigw na' cebada cont yesaquen gwbin na' cont chop ya trigw saca' laxjue' da' yesone' gan tža žin na' xop ya cebada saca' laxjue' da' yesone' gan tža žin, perw bi gono' cont cuiayi' set na' vino.

7 Na' cate' ben' zaca'lebde' ca xila' daon' be gosot bene' gualaž cħeto' neche xtoła'gaque' bzoxje' seyw gwdape, benda' gwne bene' gwdape ben' žia xil, gwne':

—Da, na' gwna' da' nga.

8 Nach gwna'a na' ble'eda' to cabayw be gaše, na' ben' žie' cože'ban' lie' Yela' Got. Na' yeto bene' zej cože', lie' Latje Gan' Že' Bene' Guat. Na' gosac lo na'gaque' bosoxje' gwdile gan' gosat bene' zan, na' gosone' cont gosat yezane' gwbin, na' gosone' cont yezan bene' gosate' len yizgüe', na' gosone' cont be znia gosotba' yezane', na' goc ca' lao to tlawc yežlion' dan' gosac lo ne'e.

9 Nach cate' ben' zaca'lebde' ca xila' daon' be gosot bene' gualaž cħeto' neche xtoła'gaque' bzoxje' seyw gayo', ble'eda' mes gan' bene' ca' že' yaban' chosozeye' bi dan' chosozeye' cate' chesonxene' Diosen', na' xni'a mesen' ble'eda' bene' ca' ba gosot yezica'chle bene' legaue' lagüe dan' bosozenague' xtiža' Diosen' na' lagüe dan' goso'e diža' gosene' chesejnilaže' Jesucriston'.

10 Na' bene' guat ca' gosone' zižje gosene':

—Xanto' Dios, le' naco' bene' laždao' xilaže' juisyw na' zoaczo' chono' con ca žo'. ¿Batcan' gono' yela' justis che bene' ca' že' yežlion' ben' gosot neto'? ¿Batcan' gono' cont yezezaca'zi'e da' bosolalje' xchenton'?

11 Nach Diosen' bnežjue' to to bene' guat ca' tgüeje xagaque' da' šiš da' gosaze'. Na' gože' legaue' yesyezi'laže'che' yeto cħop ža šlac yezesa' bene' cheyala' yesat gan' gosate' lagüe da' chesonxene' Criston', bene' zjanac ca biše' lježe'.

12 Nach ben' zaca'lebde' ca xila' daon' be gosot bene' gualaž cħeto' neche xtoła'gaque', cate' bzoxje' seyw gwwope, gwna'a na' leca gwwo'. Na' gwbižen' beyaquen gasj ca lache' gasj da' chesaz bene' chesegüine', na' doxen bion' beyaquen xna ca chen.

13 Na' beljw ca' beseyinjen besežinten lo yežlion' can' chyinj no yixgüigw da' žia lo xyaguen cate' chečj to be' gual da' chtan len.

14 Nach le'e yaban' benittecczen ca to no yiš da' chedoblolen. Na' yogo' ya'a ca' na' no yežlio dao' da' ca' zjachi' lo' nisdaon' bososa' xišnan'.

15 Nach yogo'lol bene' že' yežlion', yogo' bene' ca' chesenabia' lo yežlion', yogo' xan soldadw, yogo' bene' blao bene' gwni'a, yogo' bene' cheson xšin bene' yoble ca beyixe', na' len yezica'chle bene', yogo'cze' bosocuaše' cuin-gaque' do xan bloj, do ladjo yej xen da' zjažia lo ya'a ca'.

16 Na' gosene':

—Che'šca bdiņj na' yej quinga na' ya'a quinga yesebixen yeseyenen chio' cont bi le'e Diosen' chio', Dios ben' chi' chnabia', na' yeseyenen chio' cont Jesucriston' ben' zaca'lebde' ca xila' daon' be gosot bene' neche xtoła'gaque' bi gone' saca'zi'cho.

17 Le ba bžin ža gac juisyw, na' Diosen' len Jesucriston' leca cheseže'e chio' bi chonxencho legaue', na' nono soe da' yesone' saca'zi'cho.

7

Bene' Israel ca' bene' zjanyiše' seyw cħe Diosen'

1 Gwdena' ble'eda' tap angl zjazeche' tap squin cħe yežlion' bosozague' ben' cont bi gwyechjen lo yežlion', lo nisdaon' o gan' ze yag ca'.

2 Na' ble'eda' yeto angl bene' za' gan' chla' gwbiž na' noxe' to da' gwčhine' gwčhiše'de' seyw cħe Dios loxga bene' ca' chesonxen le', Dios bene' zoa toli

tocane. Na' anglen' gwne' zižje boļ giūze' angl ca' tap ben' zjanac lo ne'e yesone' gac yela' zi' lo yežlion' len lo nesdaon'.

³ Gože' legaque':

—Bi gwžiaiyl'le yežlion', ne nesdaon', ne yag ca' šlac biṇa' gwḡhiša' seyw che Dios checho loxga bene' ca' chesonxen le'.

⁴ Na' benda' gwne' baļ bene' bchiše' seyon' bene' za'ac lo yogo' diaža che bene' Israel, na' yogüe' gosac to gayoa tapeyon mile'.

⁵ Šižinw mile' za'aque' lo diaža che da' Judá, šižinw mile' lo diaža che da' Rubén, šižinw mile' lo diaža che da' Gad,

⁶ na' šižinw mile' lo diaža che da' Aser, šižinw mile' lo diaža che da' Neftalí, šižinw mile' lo diaža che da' Manasés,

⁷ na' šižinw mile' lo diaža che da' Simeón, šižinw mile' lo diaža che da' Leví, šižinw mile' lo diaža che da' Ísacar,

⁸ šižinw mile' lo diaža che da' Zabulón, šižinw mile' lo diaža che da' José na' šižinw mile' lo diaža che da' Benjamín.

Bene' zan zjanyaze' lache' šiš

⁹ Na' gwdena' gwṇa'a da' yoble na' ble'eda' zjaze bene' zan lao Diosen' gan' chi'e chnabi'e na' lao ben' zaca'lebde' ca xila' daon' be gosot bene' Israel neche xtoła'gaque'. Na' nono goc yosolab baļ bene' že', le gosaque' bene' zan juisyw, bene' to to nación, to to yež, to to diaža, na' gosaque' bene' chesac gwde gwdele diža' da' de lo yežlion'. Na' yogüe' zjanyaze' lache' šiš na' zjanoxe' zin.

¹⁰ Na' chesyebede' bososye'e gosene':

Xanto' Dios ben' chi' chnabi'a na' Jesucristw ben' zaca'lebde' ca xila' daon' be gosot bene' Israel neche xtoła'gaque', legaque' ba gosone' yela' mban checho toli tocane.

¹¹ Nach yogo'loļ angl ca' zjaze' cue'ej cuite' gan' chi'e chnabi'e, na' bene' blao ca' tapechoa na' bene' ca' tap zjažia xil, yogo'lole' jasechaze' coscho'ale lo yon' gosonxene' Diosen',

¹² gosene':

Chac can' cheyala' gac, Dios cheto'.

Zaca'czo' gonxento' le' toli tocane,

le naco' bene' zaca' juisyw,

naco' la'zelagüe bene' sina',

zaco' güe'to' yela' choxclen chio' na' güe'to' yela' bala'an chio' toli tocane,

chnabi'o doxen, na' napo' la'zelagüe yela' guac xen.

Can' nacczen.

¹³ Nach to bene' blao ben' nac txen len bene' tapechoa ca' gože'nda':

—¿Nezdo' no zjanac bene' quinga zjanyaz lache' šiš na' ga za'aque'?

¹⁴ Na' boži'an goša'ne':

—Le' nezdo' bene' gole, bi nezda' neda'.

Nach gože' neda':

—Bene' quinga ba gosale'de' da' ba gosac chegaque' yežlion'. Na' baḡ gwnitlao xtoła'gaque' na' ba zjanyaze' lache' šiš, le chesejnilaže' Jesucristw ben' blalj xchene' ca xila' dao' be gosot bene' Israel cont bezi'xen Diosen' xtoła'gaque'.

¹⁵ Da'nan' nite' lao Diosen' gan' chi'e chnabi'en chesonxene' le' do ža do yel. Na' Dios ben' chi' chnabi'e zoe' chape' legaque'.

¹⁶ Bich yesebil' yesedone', na' gwbižen' bich gwzeyen legaque', neca yesacde' zeye'.

¹⁷ Le Jesucristw ben' zaca'lebde' ca xila' daon' ben' gosot bene' Israel neche xtoła'gaque', len' chgüia chne'e legaque'. Ze' lao Diosen' gachol gan' chi'e

chnabi'e na' gone' cont nita'chgüe' mbalaz. Gone' cont bich yesebeže' nēca yesegüine'de'.

8

Seyw gažen'

¹ Gwde gože' neda' ca', nach Jesucristw ben' zaca'lebde' ca xila' daon' be gosot bene' gualaž cheton' bzojxe' seyw gaže da' nyiše' yiša', na' cate' bzojxen' goczī yaban' do gašj hor.

² Na' ble'eda' gaže angl ca' zjazeche' lao Diosen', na' bnežjue' legaque' tgüeje trompeta.

³ Na' yeto angl bedeseche' cho'a mes de oro da' zoa lao Diosen' gan' chi'e chnabi'e, mesen' gan' bene' ca' že' yaban' chosozeye' bi da' chosozeye' cate' chesonxene' Diosen'. Na' angla' noxe' to barser de oro gan' yo'o da' zcha'o yal na' bžien' lo yi' ya'alj da' žia lo mesen'. Anglen' bene' ca' cont naquen txen len ši'i bene' ca' chesonxene' Diosen' bate'teže chosol güiže'ne'.

⁴ Nach gwyas žen che yala' noxe' anglen' gwloen lao Diosen' len xtiža' bene' ca' chesonxene' le'.

⁵ Nach anglen' gwxi'e ya'alj da' žia lo mesen' gwlo'en lo' barseren' na' bzalen' lo yežlion' na' gošj gwtinchgua, na' goc bichle sšag, gwyep yes na' gwxo'.

Trompeta ca'

⁶ Nach angl ca' gaže ben' zjanoxe' trompeta ca' bosozoan' cho'agaque' cont yosocuežen'.

⁷ Angl nechon' bcuež trompeta čhen', na' gwche'chgua yej lo yežlion' na' nchixen yi' na' čhen. Na' da' zcha'o yežlion' gwžiai'yī, yelate'ze ca' goc gašje yo da' de lo yežlion' gwyeyen, lente yag da' ze lagüen goseyen, na' lecze yeto ca'ate' yiže' ga' da' de lo yežlion' goseyen.

⁸ Nach angl gwchope bcuež trompeta čhen', na' to da' nac ca to ya'a xen blažon' lo' nisdaon' čhala'ninēn. Na' yelate'ze ca' goc gašje nisdaon' beyaquen čhen.

⁹ Na' yelate'ze ca' goc gašje be ca' že' lo' nisdaon' gosatba', na' leze yeto ca'te' barcw ca' čhaš lo nisen' gosebiayin'.

¹⁰ Nach angl gwyone bcuež trompeta čhen' na' to beljw xen blažon' le'e yaba čhala'ninēn ca to yi' yech. Jago'onēn lo da' zan yegw na' da' zan ga čal nis lo yežlion', yelate'ze ca' goc gašje yegw ca' na' ga čal nis dan' zjade yežlion' gan' jago'onēnna'.

¹¹ Na' beljon' nzin' Da' Zla', na' nisen' gan' jago'onēnna' beyaquen zla' na' bene' zan gosat dan' gose'eje' nisen'.

¹² Nach angl gwdape bcuež trompeta čhen' na' yelate'ze ca' goc gašje gwbižen' gwžiai'yin', lecze yeto ca'te' bion' gwžiai'yin' na' lecze yelate'ze ca' goc gašje beljw ca' gosebiayin'. Na' da' ca' gosebiayin' bich bososenin'. Da'nān' gwdena' goc čhol yelate'ze ca' goc gašj ža gašj yel, na' goc ca' yogo' ža yogo' yel.

¹³ Nach gwna'a na' ble'eda' chda lo be' to angl do gachol le'e yaban' na' benda' gwne' zižje, gwne':

—iNyaše'chgua yesac che bene' ca' že' yežlion' yeyož yosocuež angl ca' yešone trompeta čhegaquen'!

9

1 Nach angl bene' gayo' bcuež trompeta chen' na' ble'eda' to beljw da' blažon' le'e yaban' jago'onen lo yežlion'. Na' beljon' goquen ca to bene' na' Diosen' bnežjue'ne' xinya cont saljue' yechw zitjwchgua dan' nac lo gabil.

2 Nach gwsaljue' yechon' na' gwyaschgua žen can' chas žen cate' chese-beque' yi' gual to lo' horn. Na' goc choł le'e yaban' can' chac cate' chi'chgua žendao', lao gwbižen' len lo be' goquen choł catec gwche' ženna'.

3 Gan' gwyas ženna' besežaš biše'zo zan gwyasba' lo yežlion', be yeseyižba' bene' can' cheson bejxoni' be chaš yežlio.

4 Diosen' gože'ba' bibi yesoneba' yiže' ga', ne da' zjanaze' na' neca yag ca' ze yežlion', san yeseyižba' bene' ca' bi nyiše' sey che Diosen' loxgagaque'.

5 Na' bi be'e latje yesotba' legaue', san šasba' gayo' bio' yosoči yososaca'ba' bene' ca'. Na' cate' yeseyižba' bene', yesežaglägüe' can' chžaglaöcho cate' chyž bejxonin' chio'.

6 Na' cate' žin ža yesomba' ca', bene' že' yežlion' yesenablaže' yesate', perw bi yesate'; yesaclaže' bich yesenite', perw bi gac can' yesaclažen'.

7 Ca nac biše'zo ca', ble'eda' zjanacba' ca cabayw be šja'ac lo gwdile. Yichjgacban' zjazoa da' nac ca corona de oro. Cho'alaoban' naquen ca cho'alaoban' naquen.

8 Zjažibaba' yiša' da' nac ca yiša' yichj no'ole. Layban' zjanaquen ca lay bež znia be nzi' león.

9 Na' zjanyazba' to da' nac de ya da' chcue'ejen cuerp chegacban'. Na' ššag da' chesomba' len xilgacban' chñin en ca chñin cate' chesa'aces cabayw zan zja'acba' lo gwdile zjanxobba' carret.

10 Na' lo xban biše'zo ca' zjazoa liba' zjanaquen ca xban bejxoni' cont yeseyižba' bene', na' goc lo na'gacba' yosoči yososaca'ba' bene' že' yežlion' gayo' bio', yeseyižba' legaue'.

11 Angl ben' beyac da' xigüe' dan' chnabia' gabilen' naquen xan biše'zo ca'. Lenna' nzi' Abadón diža' hebreo na' lecze nzin' Apolión diža' griego, na' zejen diža' Da' Chžiayin'.

12 Ba gwde yela' zi' nechon' na' za' za'ac yechopen.

13 Nach bcuež angl gwxopen' trompeta chen', na' benda' gwne to bene' do gan' zoa mes de oro dan' ze lao Diosen', mes da' žia lozen dapte squin, mesen' gan' bene' ca' že' yaban' chosozeye' bi da' chosozeye' cate' chesonxene' Diosen'.

14 Na' bol güiže' angl gwxop ben' noxe' trompetan', gože'ne':

—Besež dap angl ca' ben' besyeyac bene' mal ben' zjanchej cho'a yegw da' nzi' Eufrates.

15 Nach beseže' angl ca' tap bene' ca' bnita' Diosen' cont yesaše' lo iz, bio', ža na' horen' nžie' bia' yesote' beňach, na' caten' gosaše', yelate'ze ca goc gašje bene' že' yežlion' gosote'.

16 Na' gwnita' chop gayoa millón soldadw chegaque' zjažie' cože' cabayon'.

17 Quinga ble'edaogüeda' cabayw ca' na' angl ca' bene' besyeyac bene' mal zjažie' cože'gacba' zjanaque' soldadw. Angl ca' zjanyaze' to de ya da' chcue'ej cho'alcho'gaque' na' yana' chñan' ca color che yi' na' chñan' da' azul na' da' gaše. Na' yichj cabayw ca' zjanaquen ca yichj bež znia be nzi' león, na' chchoj yi' cho'agacba' len žen na' len azufre da' čala'nin.

18 Yelate'ze ca goc gašje bene' že' yežlion' gosat len yi' na' len žen na' len azufre da' bchoj lo cho'agacba'.

19 Na' bosochin cho'agacba' na' len xbangacba' cont gosotba' beṇach, na' xbangacban' gosaquen ca beḷ na' zjansa' yichjen cont goseyi'inen bene'.

20 Na' bene' ca' besyega'an bi gosat cate' gwyas cabayw ca' lo yežlion', legaque' bi besyetinjde' che da' mal ca' chesone', neca bososane' da' chesonx-ene' da' xigüe' ca' na' l' gua'a lsaca' chegaque' ca' da' zjanac de oro, de plata, de bronce, de yej o de yag, la'czla' l' gua'a lsaca' ca' bi chesele'en, neca chesenen, na' neca chac yesa'quen.

21 Na' neca besyetinjde' cont yesebejyichje' bichle da' mal da' chesone', ca' dan' chesote' bene', da' chesone' txen len no bene' guaža', da' chesone' da' yela' zto' len cuerp chegaquen', na' da' chesebane' da' de che bene'.

10

Angl bene' noxe' yiš dao' ndobyoyen

1 Nach ble'eda' yeto angl gual gwze'e yaban' betje' lo yežlion'. To bejw nyechjen le' na' zoa to pita' yichjen'. Cho'alagüen' chña'titen ca gwbiž, na' yen'e ca' ble'edan' zjanaquen ca bdope da' chala'nin.

2 Anglen' noxe' to yiš dao' da' ba beyašen. Na' bzoa šla'a ni'e licha lo nisaon' na' yešla'an bzoe' lo yežlion'.

3 Na' bosye'e zižje ca zižje chosya'a be nzi' león. Na' cate' bosye'e gwne gwzio' gaž ni'a na' to to gwzion' zoa da' gosenan.

4 Beyož goc ca' na' ba zoa gwzoja' diža' da' benda' šlac gwne gwzion' cate' to bene' zoa yaba gože'nda':

—Bi gwzojo' dižan' bendo' šlac gwne gwzion', san gwdapen lo' yichjlažda'oguo'.

5 Nach angl ben' zoa šla'a ni'en lo nisaon' na' yešla'an lo yežlion' gwliš ne'e lichan' yabale.

6 Na' gwlo'e da' baḷi gac can' ža Dios ben' zoa toli' tocaṇe, ben' ben le'e yaba len yogo'te da' chle'echo le'enna', bene' yežlion', beṇach, beyixe', na' bite'tezechle da' de lo yežlion', na' bene' nisaon' len be ca' na' da' ca' že' lo'enna'. Gwne':

—Bich cuz Diosen' gone' can' ba nžie' bia' gone'.

7 San cate' žin ža gwcuež angl gažen' trompeta chen', cana'ch gac da' nžia Diosen' bia' gac, can' ba gože' bene' ca' goso'e xtižen', da' nono gwneze cani'.

8 Nach da' yoble ben' zoa yaban' ben' ba benczeda' gwnie' neda', gwne':
—Gwyej jaži' yiš dao' dan' ba beyaš dan' noxe' angl ben' zecha zoa šla'a ni'en lo nisaon' na' yešla'an lo yežlion'.

9 Da'n'an' gwya'a gan' zoa anglen' jaṇaba' yišen'. Na' anglen' gože'nda':

—Bexon' gwdagon'. Lo' cho'on gacdon' zix ca šina' beser, perw lo' li'on yeyaquen zla'.

10 Nach bexoa' yišen' noxe' anglen' gwdaguan'. Na' lo' cho'an goquen zix ca šina' beser, perw cate' bedaguan' beyaquen zla' lo' li'an.

11 Nach anglen' gože' neda':

—Da' yoble cheyaḷa' go'o xtiža' Diosen' na' nao' can' gac che zan yež, che zan nación, che bene' chesac gwde gwdele diža' da' de yežlion', na' che zan bene' gwnabia'.

11

Chope bene' goso'e xtiža' Diosen'

1 Nach anglen' bene' neda' to ya ca nac da' chosochine' cate' chosochixe' yo'o, na' gože'nda':

—Gwyej jachixe yodao' blao na' mes gan' chosozeye' bi da' chosozeye' cate' chesonxene' Diosen', na' gwlabo' bal' bene' že' chesonxene' le'.

2 Perw bi gwchixo' chy'o'on, le ba naquen lo na' bene' bi zjanac bene' Israel bene' bi chesejnlaže' Diosen' cont yesone' nacteze chesaclačže' lo ciuda che Dios lao chopeyon bio'.

3 Na' seła' chope bene' yeso'e xtiža', na' yesaze' lache' gasj ca to bene' chegüine' na' yeseyixjue'ede' xtižan' lao to mil chop gayoa gayon ža.

4 Bene' ca' chope zjazaca'lebe' ca yag olivos ca' chope na' ca candeler ca' chope da' zjazoa lao Diosen' ben' nac Xan yežlio.

5 Na' že no chaclaže' gonxi'e legaque', choj yi' cho'a bene' ca' yeso'e xtižan' na' gwzeyen bene' chgüe'ede' legaque'. Can' gac yesat note'teže bene' chende' gonxi'e bene' ca' chope.

6 Na' bene' ca' yeseyixjue'ede' xtižan', gac lo na'gaque' yesone' cont bi gac yejw šlac yeso'e xtižan', na' gac lo na'gaque' yesone' cont nisen' yeyaquen chen, na' bate'teže yesaclačže', yesone' gac bite'tezechle da' yesežagłao bene' že' yežlion'.

7 Perw cate' yeyož yeso'e xtižan', nach choj lo' gabil' gan' nac yechw zitjwchgua to bež xigüe' nizba' legaque' na' gotteba' legaque'.

8 Na' bene' ca' že'na' yosyocua'ane' cuerp chegaquen' gan' chesetolen la cay che ciuda blaon' gan' gosote' Xancho Jesucriston'. Ciudadan' zaca'leben ca ciuda Sodoma na' ca nación Egipto.

9 Na' šone ža yo gašje bene' za'ac zan yež na' zan nación, bene' zjanac zan diaža, bene' chesac gwde gwdele diža' da' de lo yežlion', yesene'e bene' guat ca' na' bi yeso'e latje yesegaše'.

10 Bene' ca' že' yežlion' yesyebede' da' gosat bene' ca' chope, na' yosonežjo lježe' bi da' yosonežjo lježe' da' chesyebede' dan' bich nita' bene' ca' yeso'e xtiža' Diosen' len legaque', le leca zed chesacden'.

11 Na' ble'edaogüeda' gwde šone ža yogašje Diosen' bosbane' bene' ca' chope na' gosezeche' da' yoble. Na' yogo' bene' besele'e legaque' besežebchgüe'.

12 Nach bene' ca' gosoe' xtiža' Diosen' gosende' gož Diosen' legaque' zižje:

—Le yeda, le yeyep nga.

Nach bene' ca' chesegue'e legaque' besele'ede' besyeyepe' yaban' to lo' bejw.

13 Šlac chesyeyepen' leca gwxo' na' gwžiai' late' ciudadan', na' gaže mil bene' gosat caten' gwxon'. Na' bene' ca' besyega'an besežebchgüe' na' gosonxene' Dios ben' zoa yaba.

14 Ba gwde yela' zi' gwchopen' na' za' gac da' gwyone.

Can' goc cate' angl gaže bcueže' trompeta chen'

15 Nach angl bene' gažen' bcuež trompeta chen' na' benda' bal' bene' ca' že' yaban' gosene' zižje, gosene':

Doxen yela' chnabia' che yežlion'

bač naquen lo na' Xancho Diosen' na' lo na' Cristo ben' gwleje' cont chnabi'e. Na' Diosen' zoacze' chnabi'e toli tocanē.

16 Nach bene' blao ca' tapechoa ben' zjachi' cue'ej cuit Diosen', jasechaze' coscho'ale lo yon' gosonxene' Diosen',

17 gosene':

Chonto' yela' choxclen chio' Xanto',
le naco' Dios ben' nap yela' guac xen.

Ba zoaczo' cate' bina' xe yežlion',
na' soaczo' toli tocaṇe.

Na' ba gwzolaṇ chnabi'o len yela' guac xen chion' cont gac can' chazlažo'
doxen.

¹⁸ Beṇe' nación ca' že' yežlion' beseže'e le',
perw ba bžin ža gono' yesezaca'zi'e.

Ba bžin ža choglaguo' che yogo' beṇe' ca' ba gosat še noe' nap doļa'.

Na' gono' cont beṇe' güen xšino' ca' beṇe' ca' goso'e xtižon' yesenite' mbalaz,
len yogo' beṇe' gwlejo' cont zjanaque' lo nao', beṇe' gosonxen le'.

Con yogo' beṇe' gosonxen le' yesenite' mba, beṇe' gole len beṇe' xcuide'.

Łecze ba bžin ža yesebiayi' beṇe' ca' bosožiai' ljež benače' yežlion'.

¹⁹ Nach byaljo gan' chesonxene' Diosen' yaban' na' ble'eda' caj gan' že' yej
ca' gan' nyoj da' ca' gož Diosen' beṇe' Israel gualaž cheto' ca' yesone' cont
gaclene' legaque'. Na' šlac gwṇa'a, gwyp yes, gocchgua sšag, gošj gwtin, gwxo'
na' gwche'chgua yej.

12

No'olen' na' beļ be zoa gaž yichj

¹ Na' ble'edaogüeda' to da' yebanchgüecho le'e yaban', ble'eda' to no'ole na'
nyaze' gwbižen' ca' xe'. Nļeje' lo bion' na' zoa to corona yichje' da' žian šižinw
beljw.

² No'olen' no'e bdao' na' chosye'e, le chaque' bes che yela' sanṇa'.

³ Na' ble'eda' yeto da' zaca' yebanecho le'e yaban', ble'eda' Satanás dan'
chnabia' da' xigüe' ca', ba naquen ca to beļ be žia gaž yichj, be xen juisyw.
Nachba' be xṇa na' žia ši lozba' na' zoa tgüeje corona to to yichjban'.

⁴ Na' bta xbamban' cont bchinjen zan beljw ca' žia le'e yaban' na' beselažon'
lo yežlion', yelate'ze ca' goc gašje beljw ca' zjažia le'e yaban' bchinj xbamban'.
Na' gwlezba' xṇi'a no'olen' ba zoa sanṇa' cont yebba' bdao' chen' cate'
sane'be'.

⁵ Nach no'olna' gwxxane' to bi' byo bi' nabilia' nación ca' na' žan ca žan
yosozenague' chebe'. Nach Diosen' beyo'ebe' gan' chi'e chnabi'e.

⁶ Nach no'olen' boxonjde' belen', na' gwyeje' to latje daš da' benšagüe'
Diosen' che', gan' yeso'ene' da' ye'ej gagüe' lao to mil chop gayoa gayon ža.

⁷ Gwde na' goc to gwdile yaban', le angl blao ben' le' Miguel na' soldadw che'
ca' gosediłlene' beļ ben' žia gaž yichj lencze angl che belen' beṇe' ca' besyeyac
da' xigüe'.

⁸ Na' belen' len da' xigüe' ca' bi gosezoen angl ben' zjanac beṇe' che Dios, na'
bich bi latje gota' che belen' yaba, neca che da' xigüe' ca' zjanac leba' txen.

⁹ Angl che Diosen' bosozale'ba' lo yežlion'. Na' łecze bosozale' da' xigüe' ca' lo
yežlion'. Beļnan' ben' zoa ža gwlaste nacba' gwxiye' na' leba' Satanás, na' ne'
zoaczba' ṇa'a chziye'ba' yogo' beṇač.

¹⁰ Nach benda' to beṇe' zoa yaban' gwṇe' zižje gwṇe':

—Bač bžin ža ben Dios chechon' cont beṇe' ca' chesejnilaže'ne' zjanite'
len le'. Bač bžin ža nacbia' Dios chechon' nape' yela' guac xen. Ba bžin ža
chnabi'e cont gac con da' cheyała'cze gac. Na' ba bžin ža Criston' ben' gwleje'
cont nabi'e bač chnabi'lene' le'. Gac da' cheyała'cze gac, le Satanás dan'
ba gwzoa lao Diosen' do ža do yel bcuišen beṇe' chesejnilaže' Criston', bač
besyebjejen'.

¹¹ Na' beṇe' gosejnilaže' Criston' na' ba gosate', gosezoede' bi bosozenague'
che Satanásen', le gosejle'e Jesucriston' blalj xčhene' neče xtołagaque' na'

goso'e diža' chesejnilaže'ne'. Beñe' ca' ba gosat gosacbe'ede' yejni'a yesate' clcl ca yesebejyichje' Jesucriston'.

¹² Yaban' cheyala' gosya'an yela' chebe chen, na' le'e že'le gan' zoa Diosen' cheyala' yebele, perw nyaše' chgua gac che le'e zoale lo yežlion' na' lo' nisdaon', le Satanás dan' chnabia' da' xigüe' ca' ba betjen gan' zoalen' chaclocchguan, le nezen yešložga de latj chen.

¹³ Nach cate' belen' gocbe'eba' bosozale'ba' lo yežlion', blagsesba' no'olen' gwxañ bi' byo daon'.

¹⁴ Perw Diosen' bnežjue' chop xile' da' xen ca xil bsiadao' cont gweyje' latje daš gan' bi' goc žin belen', latje gan' benšagüe' che' gan' yeso'ene' da' ye'ej gagüe' šon iz yo gašje.

¹⁵ Na' bchoj nis zil cho'a belen' goquen to yegw cont bžinen gan' zoa no'olen' na' guan' le'.

¹⁶ Perw Diosen' bene' cont yežlion' goclenen no'olen', byaljon güe'ejen nis dan' bchoj cho'a belen'.

¹⁷ Nach belen' blocchguaba' no'olen' na' gweyjeba' jatillemba' yezica'chle xi'ine' da' chosozenague' che Diosen', chesone' con da' že' na' zjanita'chache' chesejnilaže' xtíža' Jesucriston'.

13

Chope bež xigüe' be ble'e Juan

¹ Na' gwzia' cho'a nisdaon' na' ble'eda' bchoj to bež xigüe' lo' nisdaon'. Bežen' nita' gaž yichjba' na' žia ši lozba' na' žia tgüeje corona lao to to lozban'. Na' to to yichjban' nyoj to laba' da' chlo'en chon cuimba' ca Dios.

² Ble'eda' bežen' nacba' ca to tigr, perw ni'ana'ban' zjanaquen ca ni'a na' oso na' cho'aban' naquen ca cho'a león. Nach bel ben' žia gaž yichj bnežjwba' bežen' yela' guac na' yela' chnabia' cheban' cont gwnabia'ba' na' cont gosenita' beñach bosozenague' cheba'.

³ Ble'eda' to yichj bežen' nacchguan güe', ca to da' gatlemba', perw beyacba'. Na' yogo'lol beñach besyebande' dan' beyachban' na' bosozenague' cheba'.

⁴ Yogo'ze beñe' gosonxene' belen' dan' bemba' cont gwnabia' bež xigüen', na' lecze gosonxene' bež xigüen', gosene':

—Nono zoa bene' nap yela' chnabia' xen ca bež nga, na' nono zoa bene' soede' tillene'ba'.

⁵ Lecze nono bžon gwna bežen' zaca'chba' ca Dios, na' gwnaba' yela' ya' che Diosen'. Na' goc lo na' bežen' gwnabia'ba' chopeyon bio'.

⁶ Na' gwnechguaba' yela' ya' che Diosen' na' che yaba gan' zoe' na' len che yezica'chle bene' ca' že' yaban'.

⁷ Na' gwyo'o lo na' bežen' gwdiilemba' bene' ca' gosejnilaže' Diosen' na' bi gosezoede'ba'. Bibi goc yesone' cont yesyechoje' lo na'ba'. Gwnabia'ba' yogo' nación, yogo' yež, yogo' diaža na' bene' chesac gwde gwdele diža' da' de lo yežlion'.

⁸ Na' yogo' bene' že' yežlion' bene' bi zjanyoj lagaque' le'e libr che Jesucriston', gosonxene' bežen'. Le cate' gwxxete yežlion' Jesucriston' bzoje' le'e libr che' la yogo' bene' nežde' gata' yela' mban chegaque' toli tocañe, Jesucristw ben' zaca'lebde' ca xila' dao' be gosot bene' gualaž cheto' neče xtola'gaque'.

⁹ Note'tez le'e žia nagle da' chene, le gwzenag da' nga nia' le'e.

¹⁰ Bene' yeseyixjue' ljež beñache' ližya, decze de ližya yesata' legaque'. Na' bene' yesot ljež beñache' len spada, decze de gac chegaque' ca'. Da'nan'

chonen byen soachach chio' ba gwlej Diosen' cont naccho lo ne'e, gwyo gwchejcho len bi da' gac checho na' soachachcho šejnilaže' chone'.

¹¹ Gwdena' ble'eda' yeto bež xigüen' be bchoj lo' yo. Na' žia chop lozba' da' nac ca loz xila', perw be'ba' diža' can' choe' beļ ben' žia gaž yichjen' diža'.

¹² Na' bež nechon' bamba' cont bež gwchopen' gwnabia'ba' par leba' na' bež gwchopen' bamba' cont yogo' bene' že' yežlion' gosonxene' bež nechon' ben' beyaque len güe' dan' naquen ze da' got leba'.

¹³ Na' bež gwchopen' bamba' zan da' bebanchgüe bene' len yela' guac cheban', na' bamba' cont besele'ede' yi' le'e yaban' na' beselažon' lo yežlion'.

¹⁴ Na' da' bamba' da' ca' gan' zoa bež nechon', gwziye'ba' bene' že' yežlion' cont bosozenague' cheba'. Nach bamba' mandadw gosone' to l' gua'a lsaca' da' nac ca bež nechon' da' gosonxene', bež ben' goc yichjban' güe' len spada, güe' da' naquen ze da' got leba' perw beyacba'.

¹⁵ Na' goc lo na' bež gwchopen' bamba' cont l' gua'a lsacan' gwyo'on biš grasyw. Na' goc gwñen, benen mandadw gosote' yogo' bene' bi gosonxenen'.

¹⁶ Na' bež gwchopen' lecze bamba' byen gosezoa yogo' bene' señw che bežen' le'e na'gaque' licha o loxgagaque', bene' gole len bi' bixjw, na' bene' gwñi'a len bene' yaše', na' bene' cheson xšin bene' yoble ca beyixe' len yezica'chle bene'.

¹⁷ Na' note'teze bene' še bi zoe' señw che bežen' o laba' o número da' zejen laba', bi goc bi si'e neca goc bi gote'.

¹⁸ Chyažjecho yela' sina' cont šejni'icho da' nga. Bene' chejni'i guac gwlabee' número cheban', le naquen número da' chch'in beñach, na' número cheban' naquen xop gayoa gayon xop.

14

Da' gosol bene' ca' to gayoa tapeyon mil gosonxene' Diosen'

¹ Na' gwñi'a na' ble'eda' Jesucristw ben' zaca'lebde' ca xila' dao' be gosot bene' gualaž cheto' neče xtola'gaquen', zeche' lo ya'a Sión len to gayoa tapeyon mil bene' yoble. Na' zjanyoj la Jesucriston' len la Xe' Diosen' loxgagaque'.

² Na' benda' chesol bene' zan bene' že' yaban'. Nenen ca chsiž ga zjadechgua yegw zan na' ca nen cate' chašjw chtin. Na' nenen ca nen cate' bene' zan chosogole' arpan' to ši'ize.

³ Na' gosole' to da' cobe lao Diosen' na' lao bene' ca' tap zjažia xil na' lao bene' blaō ca' tapechoa gan' chi' Diosen' chnabi'e. Noch no bene' yoble goc goļ len, con bene' ca' to gayoa tapeyon mil na'ze gosac bososede' dan' gosolen' cont gosonxene' Diosen', legacze' bebej Criston' lo na' Satanásen' šlac ne' nite' yežlion'.

⁴ Bene' ca' gosolen' zjanaque' bene' bi gosata'lene' no'ol bi nac xo'olgaque', na' gosapchgua cuingaque' cont gosac lažda'ogaquen' xilaže' len Diosen'. Na' zja'acteze' len Jesucriston' gate'teze zeje' chosozenague' che', le bebeje' legaque' lo na' Satanásen' cont zjanaque' lo ne'e na' lo na' Diosen'. Da'nan' zjazaca'lebde' ca to tlaw coseš da' bnežjw bene' Israel gualaž cheto' ca' lo na' Diosen'.

⁵ Gwbat goso'e diža' güenlaže' na' bibi doļa' zjanape' lao Diosen' ben' chi'e chnabi'e.

⁶ Nach ble'eda'yeto angl le'e yaban' chde' lo be'. Na' gwduxjue'ede' diža' güen che Diosen' da' bi te chen len bene' ze' yežlion', len bene' zjanac to to naciön, to to yež, to to diaža, na' bene' chesac gwde gwdele diža' da' de yežlion'.

⁷ Gwne' zižje gože' legaque':

—Le žeb Diosen' na' le gonxene', le ba bžin hor gone' yela' justis che benačh. Le gonxen Dios ben' ben yaban', yežlion', nisdao' na' ga chal nis.

⁸ Yeto angl za' cožen' gwne':

—Bačh bžin ža cuiayi' ciuda Babilonia da' nac da' blao. Bačh bžin ža cuiayi' ciuda che bene' ca' bosozoe' Diosen' ca'ale na' gosebede' da' nac yela' zto', le ba gosego'oyele' bene' ze' yogo' naciön cont chesone' güedenag len Diosen'.

⁹ Nach yeto angl zej cože' bene' gwchopa' be'e diža' zižje gwne':

—Note'teze bene' chesonxen bež xigüen' len l gua'a lsaca' cheba' na' cheso'e latje chesezoa señw che beža' loxgagaque' o taca'gaque',

¹⁰ Diosen' ba nžie' bia' yesesaca'zi'chgua bene' ca'. Yesezaca'zi'e gan' čala' yi' len azufre lao angl che Diosen' na' lao ben' zaca'lebde' ca xila' dao' ben' gosot bene' Israel neche xtoła'gaque'.

¹¹ Tołi tocanē chas žen che yi' gan' yesezaca'zi'en. Na' bene' ca' chesonxen bežen' len l gua'a lsaca' cheban', na' bene' zjazoa señw che bežen' loxgagaque' o taca'gaque', bi gac yesyezi'laže' len da' yesezaca'zi'en ne chel ne lagüe ža.

¹² Da'nan' chonen byen soačhačh chio' ba gwlej Diosen' cont naccho lo ne'en, gwyo gwčhejcho len bi da' chac checho, chio' chzenagcho che da' non Diosen' mandaw goncho na' bi chbejyichjcho dan' chejnilaže'cho Jesusen'.

¹³ Nach benda' to bene' zoa yaban' gwne':

—Bzoj da' nga: “Mbalaz bene' ca' ne' chesejnilaže' Xancho Jesucriston' žinte ža yesate'. Can' chac na'a na' can' gac bate'teze.”

Na' Spiritw che Diosen' žan:

—Da' li nite' mbalaz, le yesyezi'laže' len xšingaquen', na' gacia' yogo' da' güen da' ba gosone'.

Yotob Diosen' bene' bi chosozenague' che' cont yesezaca'zi'e

¹⁴ Nach gwna'a da' yoble na' ble'eda' to bejw šiš le'e yaban' na' cože' bejon' chi' to bene' nac ca to benačh. Na' zoa to corona de oro yichjen' na' noxe' to da' nzi' hoz da' nlačgua.

¹⁵ Na' yeto angl bchoj lo' gan' chesonxene' Diosen' yaban' na' gwne' zižje gože' ben' chi' cože' bejon':

—Ba bžin hor yotobo' coseš che uvas dan' de yežlion', le ba golen.

¹⁶ Nach ben' chi' cože' bejon' noxe' hoz botobe' cosešen'.

¹⁷ Nach bezchoj yeto angl lo' gan' chesonxene' Diosen' yaban' na' lecze noxe' yeto hoz da' nlačgua.

¹⁸ Na' lecze bezchoj yetoe' ben' yo'o lo ne'e yi' da' čala' lo mes gan' chesonxene' Diosen'. Na' angl nga gwne' zižje boł güiže' angl gwchopa' ben' lecze noxe' hoz, gože'ne':

—Ba güe uvas da' žia lo yežlion'. Bečhoguen len hoz chion' dan' nlačgua cont yotobchon.

¹⁹ Nach anglen' bečhogue' uvas da' žia yežlion' len hoz dan' noxen' na' botoben' bzalen' to lo' ša' xen ga yesesien' cont choj xisen'. Zeje diža', Diosen' botobe' bene' ca' bi bosozenag che' na' gwlo'e legaque' ga yesezaca'zi'e.

²⁰ Na' gan' gosezaca'zi'en naquen cho'a ciudan', na' lo' ša' xen gan' gwlo'e uvasen' belalje chen zil da' nac xčhengaque', bežinen ca sibe to xčhega' cabayw, na' bžiljon šone gaoa mil metr.

15

Angl ca' zjayo'o lo na'gaque' gaže yela' zi' da' zelao yesac

1 Na' ble'eda' yeto da' leca zaca' yebanecho le'e yaban'. Ble'eda' gaže angl bene' zjanac lo na'gaque' yesone' yegaže yela' zi' cont yeyož gwlo'e Diosen' can' chone' da' chloque' bene' ca' cheson da' xinj.

2 Lecze ble'eda' to da' nac ca to nisdao' de vidrw da' nchixen yi'. Na' cho'a nisdaon' zjazecha bene' ca' gosezoede' bi gosonxene' bežen' na' l gua'a lsaca' dan' nac ca leba', na' bi goso'e latje yosozoe' legaque' señw cheba' o número da' zejen laba'. Na' zjanoxe' tgüje arpa da' bnežjw Diosen' legaque'.

3 Na' ble'eda' legaque' chesonxene' Diosen' chesole' to da' bsede da' Moisésen' bene' Israel gualaž cheto' ca', Moisés ben' ben xšin Diosen' cani'. Lecze chesole' da' naquen to da' bsede Jesucriston' legaque', Jesucristw ben' zaca'lebde' ca' xila' dao' be gosot bene' gualaž cheto' neche xtola'gaque'. Quinga žan:

Xanto' Dios, yogo' da' ba beno' len yela' guac xen chio' naquen da' güen juisyw na' da' zaca' yebanecho.

Yogo' da' chono' zejen to licha na' naquen da' zaca'.

Len' chnabi'o nación ca'.

4 Nono zoa bene' bi cheyala' žebe' le' Xanto', da' chono' castigw che da' malen'. Nono zoa bene' bi cheyala' gonxene' le'.

Tozo' le' naco' bene' laždao' xilaže' juisyw.

Na' bene' že' yogo' nación yeside' laguon' yesonxene' le', le ba besele'ede' da' ba beno' na' zjanezde' zejczen to licha.

5 Gwde benda' da'na' nach gwna'a da' yoble na' ble'eda' byaljo gan' chesonxene' Diosen' yaban', latje gan' ngo'ošagüe' ley che Dios da' nyoj.

6 Na' ble'eda' gaž angl ca' zjayo'o lo na'gaque' yesone' gac gaž yela' zi' lo yežlion', besechoje' gan' chesonxene' Diosen' yaban'. Angl ca' zjanyaze' lache' šagüe' da' nac šiš xila' da' chactiten, na' to toe' nchej cho'alcho'e to bant de oro.

7 Na' ble'eda' bene' ca' tap zjažia xil ben' nita' lao Diosen', na' toe' bnežjue' angl ca' gažen' tgüje tas de oro da' zjanža'ten da' zjajožen da' chon cont chac yela' zi' ca' lo yežlion', na' zejen Diosen' ben' zoa toli tocane chlocchgüe' da' cheson bene' bi chosozenag che'.

8 Na' doxen gan' chesonxene' Diosen' yaban' gwche'chguan ca' žen che be'ni' da' nsa' Diosen' na' che yela' guac xen che'. Nono goc šo' gan' chacxen Diosen' šlac biña' yeyož yesac yela' zi' ca' gaž da' zjanac lo na' gaž angl ca'.

16

Tas ca' gaže na'yela' zi' ca' gosac cate' bososcho'en

1 Na' benda' gwne Diosen' zijzechgua, zoe' gan' chacxene', gože' angl ca' gaže: —Le šja'ac le šjalalj dan' yože lo' tas chelen' lo yežlion', da' zejen leca chloca' da' xinj cheson bene' ca' bi chosozenag chia', na' gona' ga yesezaca'zi'chgüe'.

2 Nach angl nechon' gwyeje' jalalje' da' yože lo' tas chen' lo yežlion' gan' nac yo biž, na' yogo' bene' ca' zjazoa señw che bežen' na' chesonxene' l gua'a lsaca' da' nac ca leba', gosebie' güe' xen güe' zban na' goselachgüe'.

3 Nach angl gwchopen' jalalje' da' yože lo' tas chen' lo nisdaon' na' nisdaon' beyaquen chen ca' chen che bene' guat, na' gosat yogo' be ca' že' lo' nisen'.

4 Nach angl gwyonen' jalalje' dan' yože lo' tas chen' lo yegw ca' na' gate'ze chal nis na' lecze besyeyaquen chen.

5 Nach benda' gwne angl ben' chape' nisen' da' de lo yežlion', gože' Diosen':

—Xanto' Dios, len' naco' bene' laždao' xilaže' juisyw. Ba zoaczo' le' cate' za' xe yežlion'. Zejczó' licha can' ba gwčhoglaguo' chac da' quinga,

⁶ le bene' že' yežlion' ba gosote' bene' ca' goso'e xtižon' na' gosote' nochle bene' gosac lo' nao'. Da'nán' ba beno' cont yese'eje' chen neče da' bosolalje' xčen bene' ca'. Na' da' chac čhegaque' naquen da' cheyala'cze gac.

⁷ Nach benda' gwne' do bene' do cho'a mes gan' bene' ca' že' yaban' chosoz-eye' bi da' chosozeye' cate' chesonxene' Diosen', gwne':

—Xanto' Dios, len' napo' la'zelagüe yela' guac xen, chono' con can' žo' gono', na' chono' da' zej to licha cate' chčhogbi'o čhe bene'.

⁸ Nach angl gwɔapen' jalalje' dan' yože lo' tas chen' lo' gwbižen', na' gwbižen' bzeyen beñač.

⁹ Yogüe' leca goseye', perw bi besyetiñjde' xtola'gaque' na' bi gosonxene' Diosen', con gosene' yela' ya' čhe Dios ben' be' latje goc da' ca' chesezaca'zi'e.

¹⁰ Nach angl gayon' jalalje' dan' yože lo' tas chen' gan' chi' bežen' chnabia'ba' na' beyac čol doxen gan' chnabia'ban'. Na' benačhen' gosagwxejte lože'gaquen' catec gosesezaca'zi'e.

¹¹ Na' gosene' yela' ya' čhe Dios ben' zoa yaban' neče dan' chesezaca'zi'en na' neče güe' xen dan' zjažia lo' cuerp čhegaquen', perw ne ca' bi besyetiñjde' čhe da' mal dan' gosonen'.

¹² Nach angl gwɔopen' jalalje' dan' yože lo' tas čhen' lo' yegw xen da' nzi' Eufrates, na' bebiž nis yegon' cont beyaquen to nez ga yesede bene' gwnabia' ca' za'ac do gan' čhla' gwbiž.

¹³ Nach ble'eda' šone da' xigüe' da' zjanac ba blož. Ton bchojen cho'a beł be zoa gaž yičj, yeton bchojen cho'a bež xigüen' na' yeton bchojen cho'a ben' cho'e diža' güenlaže' cont chesonxene' bežen'.

¹⁴ Na' da' xigüe' quinga gosonen yela' guac da' besyebane bene', na' jasetoben yogo' bene' gwnabia' ca' že' gate'teze lo' yežlion' cont yesedillene' Dios ben' nap la'zelagüe yela' guac xen cate' žin ža gac ca'.

¹⁵ Na' benda' ben' nac Xi'in Dios gwne':

—Le gwzenag da' nga: ba zoa yida' da' yoble, yedexenyala' bene' bi chosozenag čhia' can' chzenyal bene' gwban ga čhjalane'. Mbalaz zjazoa note'teze bene' nita'teze' chesebeze' neda' cate' yida' na' chesezaquede' bibi da' mal chesone', le yesacde' zto' še biña' yesyetiñjde' xtola'gaquen' caten' yida', na' yogo'ze bene' yesacbe'ede' da' malen' ba gosonen' še ca'.

¹⁶ Nach bezle'eda' da' xigüe' ca' šone bosyotoben yogo' bene' gwnabia' ca' že' lo' yežlion' to latje ga nzi' Armagedón diža' hebreo.

¹⁷ Na' angl gažen' jalalje' dan' yože lo' tas čhen' lo' be', na' benda' gwne' Diosen' zižje, gan' zoe' chesonxene' le' yaban' gan' lecze čhi'e chnabi'e, gwne':

—Bač goc da' cheyala' gac.

¹⁸ Nach gwyp yes, goc sšag, na' gošj gwtin, na' leca gwxo'. Gwxo'ch ca ba goc bate'tezechle šlac že' beñačhen' lo' yežlion'.

¹⁹ Na' ciuda da' nac la'zelagüe blao lo' yežlion' gwžiyain' bchojen šonle, na' lecze gosebiayi' yezica'chle ciuda da' zjachi' lo' yežlion'. Diosen' bich gwleze' bene' cont goseyi gosezaca'chgua bene' že' ciuda Babilonia čhe da' mal da' ba gosonteque', le blocchgüe' yela' mal čhegaquen'.

²⁰ Na' catequen' gwxo' besyeniťteze yogo' yež' da' zjachi' lo' nisdaon' na' yogo' ya'a ca'.

²¹ Na' gwche'chgua yej ži'a lo' yežlion', yej zi'i da' cha'a do tapa rob güeje beselažon' čože' bene'. Na' bene' že' yežlion' gosene' yela' ya' čhe Diosen' neče dan' besežaglaochgüe' len yej dan' gwchen'.

17

Diosen' be'e castigw che ciuda blao da' zaca'lebe ca to no'ole zle'

¹ Na' ca nac angl gaž ca' gosoxe' tas de oron', toe' bedenje' neda', gože'nda': —Da, gwlo'eda' le' can' gon Diosen' saca'zi' no'ole blaon' chi' lo nisdao' ca', no'olen' nac no'ol zle'.

² Yogo' bene' gwnabia' ca' že' yežlion' ba besyebede' bosozenague' che' gualaz che Diosen', na' da'nan' guac nacho zjanaque' xtoe'. Na' bene' že' yežlion' da' besyebechde' le' clel ca Diosen', guac nacho gosezožde' da' ba gose'eje' vino da' bnežjue' legaque'.

³ Nach šlac ben Spiritw che Diosen' cont ble'edaogüeda' da' quinga, anglen' gwche'e neda' to latje daš. Na' bžina' na' ble'eda' to no'ole žia cože' bež xna be nac gaž yichjba' na' žia ši lozba'. Na' doxen cuerp cheban' nyoj diža' da' chžiaba' yela' ya' che Dios.

⁴ No'olen' nyaze' lache' da' nac moradw na' xna, na' non cuine' xdan len oro, len yej zaca' na' len perlas. Na' noxe' to tas de oro da' nža'ten yožen vino. Na' vinon' zejen chbede' chone' da' yela' zto' na' bichle da' chgue'e Dios.

⁵ Na' loxgue' nyoj diža' da' žan naquen' naque', diža' da' bi gosejni'i benach, žan: "Naca' ciuda Babilonia na' nacchgua' blao. Naca' no'ole zle', le chona' cont bene' že' yežlion' bi chesonxene' Diosen', na' chgo'oyela' legaque' cont chesone' da' zan da' chgue'e Diosen'."

⁶ Na' ble'eda' chzože no'olen', le ba güe'eje' xchen bene' ca' zjanac lo na' Diosen', bene' goso'e diža' chesejnilaže' Jesüsen', na' da' nacho güe'eje' xchengaque' zeje diža' betue' zane'. Na' cate' ble'eda' no'olen' leca bebanda'.

⁷ Nach gož anglen' neda':

—Bi yebando'. Gwzejni'ida' le' bi zejen dan' ble'edo' no'olen' žie' cože' bež be gaž yichjen' na' žia ši lozba'.

⁸ Bežen' ble'edo' gwzoaba' gwnabia'ba' šlož na' bich zoaba' na'a, perw yechojba' lo' yechw zitjwchgua dan' nac lo gabilen' gan' yo'oba' na'a cont soaba' nabi'ba' yežlož, na' techle yeyo'oba' na' saca'zi'ba' toli tocanē. Cate' gwxe yežlion' Diosen' bzoje' la bene' ca' zjanape' yela' mban toli tocanē le'e libr chen'. Na' bene' ca' bi zjanyoj lagaque' le'e libr che Diosen' yesyebande' cate' yesele'ede' bežen' gwzoa, ben' bi zoa na'a perw soaba' da' yoble.

⁹ 'Chyažjecho yela' sina' cont šejni'icho da' nga: da' gaž yichj bežen' zjanaquen gaž ya'a gan' chi' no'olen'.

¹⁰ Na' lecze zejen gaž bene' gwnabia'. Gayoe' ba gosenite' gosenabi'e na' ba gwnit yela' gwnabia' chegaquen'. Toe' chnabi'e na'a na' ben' yeto bene' bzeben' za' yedenabi'e, na' cate' yide', šložze yedenabi'e.

¹¹ Na' bež ben' gwzoa cana' perw bich zoaba' na'a, zejen yeto bene' gwnabia', bene' xono'. Naque' to bene' ca' gaže gosenabi'e na' nabi'e da' yoble, perw Diosen' gone' cont cūiaye'e na' chi saque' toli tocanē.

¹² 'Na' lozba' ca' ši dan' ble'edo', zejen ši bene' gwnabia' bene' za' za'ac cont yesenabi'e. Na' gac lo na'gaque' yesenabi'e txen len bežen', perw šložze.

¹³ Na' yogo'te bene' ca' ši, toz ca yesone' yesegüe'e lo na' bežen' yela' gwnabia' chegaquen' na' bichle da' chac chesone' cont bežen' gacchba' blao.

¹⁴ Na' yesedillene' Jesucristw ben' zaca'lebde' ca xila' dao' ben' gosot bene' gualaz cheto' neche xtola'gaque', na' Jesucriston' gone' gan lo gwđilen', le len' naque' Rey ben' chnabi'e yezica'chle rey, na' naque' Xancho ben' chnabi'e yezica'chle bene' gwnabia'. Na' bene' ca' yeson txen len Jesucriston' zjanaque' bene' ca' ba gwlej Diosen' cont zjanaque' xi'ine', bene' ca' nezde' yesenita'chache' yesejnilaže'ne' bite'teze da' gac.

¹⁵ Nach anglen' gože' neda', gwne':

—Nisdao' ca' ble'edo' gan' chi' no'ol zlen' zejen yesenita' bene' zan juisyw, bene' yež zan na' nación zan, bene' chesac gwde gwdele diža' da' de lo yežlion'.

¹⁶ Na' bežen' žia no'olen' cože'ban', ben' žia ši loz, gue'eba' no'olen' na' lecz ca' yeson lozba' ca' ši dan' zejen ši bene' gwnabia'. Na' yesaque' txen yeseque'e da' de che no'olen' na' yosyocua'ane'ne' ga'alyide'. Tena' yesagüe' xpelen' na' yosozeye' bi da' yega'an da' bi yesagüe'.

¹⁷ Le Diosen' güe'e latje yesaque' txen yesone' yogo' da' ca' na bežen', na' yesone' yela' chnabia' chegaque' lo na' bežen' cont yeyož gac yogo' dan' ba gwna Diosen'.

¹⁸ Na' no'olen' bačh ble'edo', naque' ciuda blaochgua da' chnabian' bene' gwnabia' ca' že' doxen lo yežlion'.

18

Can' gac cate' cuiayi' ciuda Babilonian'

¹ Gwdena' ble'eda' yeto angl bene' gwza' yaban' betje' lo yežlion'. Goc lo ne'e yela' gwnabia' xen cont goc con can' gwne', na' gwyeni' lo yežlion' len be'ni' che' da' nse'e.

² Na' anglen' gwne' žižje, gwne':

—Ba bžin ža cuiayi' ciuda Babilonian' da' nac leca ciuda blao. Ba bžin ža yeyaquen xišna' da' xigüe' ca'. Na' ba bžin ža yeyaquen xišna' yogo'cze be zoa xil be chesegue'e be'nač.

³ Cuiayin', le bene' ca' že' ciudan' gosego'oyele' bene' že' yogo' nación cont bosozoe' Diosen' ca'ale bi gosonxene' le'. Na' bene' gwnabia' ca' že' yežlion' ba gosonchüe' da' mal txen len bene' Babilonia ca' catequen' besyebede' gosone' da' yela' zto', na' bene' güen delgens ca' že' lo yežlion' ba gosaque' bene' gwni'a, le bene' Babilonia ca' gosonditjchgüede' dan' gota' chegaque' gosezi'en.

⁴ Nach benda' gwne yeto bene' zoa yaban', gwne':

—Le'e nacle xi'ina', le yečoj ciuda Babilonian' cont bi gonle da' mal txen len bene' ca' na' cont bi saca'zi'le txen len legaque',

⁵ le dechgua xtoła' bene' Babilonia ca', na' bich cuz Diosen' gwnežjue' castigw chegaque'.

⁶ Yesezaca'zi'sque' lagüe dan' bosochi bososaque' bene', na' yesežaglašque' da' xench ca dan' bosochi bososaque' bene' yoble. Gacšca chegaque' castigw gualch ca da' gosone' che bene'.

⁷ Con can' gota'chgua da' šagüe' da' güen chegaque' na' gosone' con bi da' žan chegaque', chnablaža' gacchgua chegaque' yela' yaše' yela' zi' cont yesyegüine'chgüede'. Bene' Babilonia ca' ba gosone' xbab lo' yichjlažda'ogaque' gosone': "Gwbat te yela' chnabia' cheton'; gwbat soato' yela' güine', neto' že'to' ciuda blao nga."

⁸ Da'n'an' lo toze ža gac yogo' da' ca' gosacde' gwbat gac chegaque'. Bene' zan yesat, bene' zan yesegüine'de', na' yesebil' yesedone', na' yeseye' len yi'. Gac ca' che bene' že' ciuda Babilonian', le Xancho Diosen' nape' yela' guac xen cont gone' yesezaca'zi'e neče xtoła'gaque'.

⁹ Bene' gwnabia' ca' že' lo yežlion' bene' bosozenag che bene' Babilonia ca' cont bosozoe' Diosen' ca'ale na' gosone' bichle da' chgue'e Diosen', legaque' yesebeže' na' yesegüine'de' cate' yesele'ede' žen da' chas cate' šey ciudan'.

¹⁰ Na' yesyega'ane' zito'le yesene'e can' gac che bene' Babilonia ca', le yesežebchgüe'. Na' yesene':

—¡Nyaše'chgua chac che ciuda Babilonia nga da' nac blaoch ca yogo' ciuda! Ba chbiayi' ciuda da' gwnabia'ch lo yezica'chle ciuda da' zjachi' yežlion'. Ba bžin ža cuiayin' to ši'ize.

¹¹ Nach bene' güen delgens ca' že' yežliona' yesebeže' na' yesegüine'de' cate' cuiayi' ciudan', le noch no si' dan' yesoten'.

¹² Nono žel bene' si' da' yesote' da' nac de oro, de plata, de yej zaca', na' de perlas. Nono žel bene' si' lache' la'ay da' chesote' de lino, de sed, na' lache' moradw na' lache' xna. Nono žel bene' si' da' yesote' da' nac de yag da' chl'a' zix o de bichle yag zaque', de marfil, de ya na' de mármol.

¹³ Nono žel bene' si' canel, no set zix, no yal, no mirra, no perfume, no vino, no set yela' guagw, no yezj šiš, no trigw, no burr bžina', no xila', no cabayw, no carret, na' no benach bene' yesote' ca beyixe'.

¹⁴ Na' bene' güen delgens ca' yesene' che ciudan':

—Ba gwde che yogo' da' zix ca' na' yogo' bichle da' ca' gosazlaže' bene' Babilonia ca' yesezi'e lo yela' gwni'a chegaquen'. Gwbatech yesezi'e da' ca'.

¹⁵ Na' bene' güen delgens ca' bene' gosote' da' ca' gosezi' bene' Babilonian', ben' gosata' yela' gwni'a chegaque' neche bene' Babilonia ca', yeseze' zito'le yesežebchgüe' che dan' chesežagla'o bene' Babilonian'. Na' yesebeže' na' yesegüine'de',

¹⁶ na' zižje yesene':

—¡Nyaše'chgua ba goc che ciuda nga da' gocch blao ca yezica'chle ciuda ca' zjachi' yežlion'! Bene' gwže' ciudan' gosazchgüe' lache' šagüe' lache' zaque', no lache' moradw na' no lache' xna. Gosonchgua cuingaque' xdan len oro, len yej zaca' da' chesactiten, na' len perlas.

¹⁷ Perw na'a zejzenez gwžiai' yogo' da' šagüe' chegaquen'.

Yogo' xan barcw ca', yogo' bene' ca' chja'ac lo' barcw ca', len bene' ca' cheson žin lo' barcon' na' nochle bene' cheson žin lo' nisdaon', yogüe' yeseze zito'le yese'e.

¹⁸ Na' yesele'ede' chas žen cate' šey ciudan' na' yesene':

—Biña' gata' yeto ciuda yoble doxen lo yežlion' da' žinlaže' ca ciuda nga len yela' gwni'a yela' šagüe' chen.

¹⁹ Na' yosožia yo bište yichjgaque' da' yesyegüine'de', na' yesebežyaše', yesene':

—¡Nyaše'chgua ba goc che ciuda nga da' gocch blao ca yezica'chle ciuda ca' zjachi' yežlion'! Neche yela' gwni'a che bene' ca' gwže' lo ciudan' yogo' chio' bencho gan xen len žin da' bencho len barcw checho quinga. Na' na'a zejzenez gwžiai' ciudan'.

²⁰ Perw le'e že'le yaban', le yebe. Le'e gwsele' Diosen' gocle postlw che', na' le'e gwsele' be'le xtižen', na' yezica'chle le'e zoale lo na' Diosen', le yebe. Le Diosen' ba gwchoglagüe' yesebiayi' bene' Babilonia ca' neche dan' bosochi bososaque' le'e.

²¹ Nach to angl gual bcose' to yej xen ca dan' chon žin gan' chi' molin xen, na' bzalen' lo' nisdaon', gwne':

—Can' gac che ciuda Babilonian', yeniten can' benit yej xen dan' bzala' lo' nisdaon', na' gwbatech le'echon da' yoble.

²² Gwbatech yosogole' arpa lo ciudan'; gwbatech yosocuež güecuež ca' no flauta no trompeta. Gwbatech žel bene' zjansed cont yesone' no xšinlaze' da' chosochine', neca yenecho sšag che bene' chesot len molin lo ciudan'.

²³ Gwbatech le'echo be'ni' che lámpara, na' gwbatech yenecho bene' cheson lni che yela' güešagna'. Yesebiayi' bene' güen delgens che ciudan' bene' zjanac

bene' blao lo yežlion', le bene' Babilonia ca' ba goseziye'e bene' že' yogo' naci6n len yela' gūaža' chegaquen'.

²⁴ Bene' Babilonia ca' gosote' bene' goso'e xtiža' Diosen' na' nochle bene' gwlej Diosen' cont gosaque' lo ne'e, na' bene' ciuda nan' zjanape' doła' che yela' got che yezica'chle bene' gosot bene' doxen lo yežlion'.

19

¹ Gwdena' benda' bene' zan juisyw bene' že' yaban' chesonxene' Diosen', na' nen zižje, chesene':

Bene' güen juisyw nac Dios chechon'.

Ba bene' cont chio' chejnilaže' chone' zoacho len le'.

Naque' bene' zaca' juisyw, na' nape' yela' guac xen.

² Zejczje' to licha na' chone' can' cheyala'cze gac dan' chchoglagüe' yesezaca'zi' bene' bi chosozenag che'.

Ba gwchoglagüe' cuiayi' ciuda xen da' zaca'lebe ca to no'ole zle',

le bene' lo ciudan' gosego'oyele' bene' že' doxen lo yežlion'

cont bosozoe' Diosen' ca'ale bi gosonxene' le'.

Diosen' ba gwchoglagüe' cuiayi' laž bene' Babilonia ca',

le cheyala'cze yesezaca'zi'e da' gosote' bene' ca' gosonxen le'.

³ Nach da' yoble gosene':

—Bene' güen juisyw nac Diosen'. To li tocanē chas žen gan' šey ciudan'.

⁴ Nach bene' blao ca' tapechoa na' bene' ca' tap bene' žia xil jasechaze' coscho'ale lo yon' gosonxene' Diosen' gan' chi'e chnabi'e, gosene':

—Can' cheyala' gac. Bene' güen juisyw nac Diosen'.

⁵ Na' benda' gwne to bene' do gan' chi' Diosen' chnabi'e, gwne':

Yogo' chio' naccho bene' güen xšin Diosen' cheyala' gonxenchone',

chio' chzenagcho che', chio' naccho bene' gole na' chio' naccho bene' xcuide' na' bi' bixjw.

Yela' güešagna' che ben' zaca'lebde' ca xila' daon' gosot bene' Israel neche xtoła'gaque'

⁶ Nach benda' be xne che bene' zan juisyw chesonxene' Diosen'. Na' xtiža'gaquen' nenen ca' chac ga chziž yegon' cate' dechguan na' ca nen cate' leca chašjw chtin, chesene':

¡Bene' güen juisyw Xancho Diosen'!

Len' nape' la'zelagüe yela' guac xen na' len' chnabi'e.

⁷ Chebechgüecho na' zoachguacho mbalaz chonxenchone'.

Le ba bžin ža gac yela' güešagna' che ben' zaca'lebde' ca xila' dao' be gosot bene' Israel neche xtoła'gaque'.

Ba zoa no'olen' si'e gac xo'ole'.

⁸ Ba bnežjue'ne' lache' šagüe' da' nyaze', lache' šiš xila' juisyw.

Na' lache' šagüe' da' šiš xila' nyaze' zejen da' güen da' chon chio' ba gwlej Diosen' cont naccho lo ne'e.

⁹ Nach anglen' da' yoble gože'nda':

—Bzoj da' nga: "Mbalaz bene' ca' ba goxe' cont yesenite' cate' gac lni che yela' güešagna' che ben' zaca'lebde' ca xila' dao' be gosot bene' Israel neche xtoła'gaquen'."

Nach anglen' gwne':

—Diosen' gože' neda' dan' ba gwnia', na' naquen da' li.

¹⁰ Nach bzoa xiba' cont gonxena' anglen', perw anglen' bi bene' latje, gwne':

—Bi gono' ca'. Neda' naca' con to bene' güen xšin Diosen' can' naco' le' na' bene' lježo' ca' bene' bi chesebejyichje' xtiža' Jesúsen' da' chesejle'e. Benxen Diosen'.

Na' note'teze bene' cheso'e diža' li che Jesúsen', zoa Spiritw che Diosen' chzejni'in legaque' cont cheso'e xtižen'.

Bene' žia čože' cabayw šiš

11 Nach ble'eda' yaban' ca to da' nyaljo, na' ble'eda' to cabayw šiš na' žia to bene' čože'ba'. Na' ben' žia čože'ban' zjansi'ene' Ben' Chon Con Can' Že' na' Cho'e Diža' Li. Zejczje' to liča can' chchoglagüe' saca'zi' bene' bi chosozenag che' na' can' chdillene' da' malen'.

12 Na' ble'eda' yejlagüe' ca' chesactiten ca to yi' da' čala'nin, na' zjazoa zan corona yichje'. Na' ble'eda' nyoj yeto le' loxguen' da' nombia' toze le'.

13 Ble'eda' nyaze' to lache' da' dope chen, na' le' Xtiža' Dios.

14 Na' ble'eda' bene' zan bene' zjanac soldadw che Diosen' zjana'ogüe'ne', zjanyaze' lache' šagüe' da' nac da' šiš na' da' naquen xilaže', na' to to bene' ca' zjažie' tgüjeje cabayw šiš.

15 Cho'a ben' le' Xtiža' Dios chchoj to spada da' nľachgua da' gwčhine' čhine' nación ca' bi chosozenag che'. Le nabi'e nación ca' na' žan ca žan yosozenague' che'. Na' gone' yesezaca'zi'čgua bene' ba goson da' malen', le Dios ben' nap ľa'zelagüe' yela' guac xen chlocchgüe' can' ba gosonen'.

16 Na' le'e xcamise' na' le'e xichje' nyoj diža' quinga žan: "Naca' Rey ben' čnabia' yezica'chle rey na' naca' Xan yezica'chle bene' gwnabia'."

17 Nach ble'eda' to angl bene' zecha lo gwbižen', na' bosye'e bol güiže' yogo' cuen šod ca' chesaš le'e yaban', gože'ba':

—Le da, le yedobe nga gagwle to xše' xen da' gon Diosen' gagwle.

18 Gata' xpela' bene' gwnabia', xpela' xan soldadw, xpela' no bene' gual. Gata' xpela' cabayw na' xpela' bene' gosebie'ba'. Gata' xpela' yogo' cuen bene', bene' gosac esclavos na' bene' bi gosac esclavos, bene' gosac bene' xcuide' na' bene' gosac bene' gole.

19 Nach ble'eda' bež xigüe' nechon' len yogo' bene' gwnabia' ca' že' yežlion' na' soldadw čhegaque' ca'. Ba besedobe' txen cont yesedillene' Jesús ben' žia čože' cabayw šišen' len soldadw che' ca'.

20 Na' bež nechon' gocba' lo na' Jesúsen'. Na' lecze ca' goc che bež xigüe' gwchope ben' choe' diža' güenlaže' na' bamba' yela' guac cont beňachen' bosozenague' che bež nechon', cont gosoxene' l' gua'a ľsaca' čheba' na' cont gosezoe' seňw čheba'. Chopteba' gosacba' lo na' Jesúsen', na' ca' zjambamba' bosozale'ba' lo' yi' gabil' gan' čala'nin azufre, yi' xen da' nac ca to nisdao'.

21 Nach bene' ca' yezica'chle, Jesúsen' ben' žia čože' cabayw šišen' betue' legaque' len spada da' chchoj cho'en', na' yogo' šod ca' gosagwčatba' xpela'gaquen'.

20

Can' gac lo to mil iz

1 Na' ble'eda' to angl bene' zoa yaban' betje' cont gwsaljue' yechw zjtwčhgua dan' nac lo gabilen', na' noxe' to gden xen.

2 Na' anglen' bežoe' beľ ben' zoa gaž yichj, be bla' da' nechw ža gwlaste. Leba' čnabia'ba' da' xigüe' ca' na' leba' Satanás. Anglen' bčeje'ba' gdenňa' to mil iz.

3 Nach beyož bcheje'ba, na' bzale'ba lo' yechw gabilen' na' la' bseyjwrtie' cho'a yechon' na' bchišen' to seyw. Bene' ca' cont bich siye'ba benach ślac biŋa' te to mil iz. Na' cate' ba gwde to mil izen', cana'ch yeseže'ba' gdenna' cont yechojba' yešlož dao'.

4 Nach ble'eda' bene' ca' gwlo'o Diosen' lo' na'gaque' gosone' yela' justis che benach zjachi'e gan' chesenabi'e. Na' lecze ble'eda' bene' bi gosonxene' bež xigüen' len l' gua'a lsaca' cheba' neca goso'e latje yosozoe' señw cheba' loxgagaque' o taca'gaque'. Gosenita'chache' goso'e diža' chesejnilaže' Jesúsen' na' goseyxjue'ede' xtiza' Diosen'. Da'nan' bene' ca' besegue'ede' Diosen' gosote' legaque' gosechogoe' yengaque'. Perw Diosen' bene' cont besyebane' ladjo bene' guat ca', na' txen len Criston' gosenabi'e to mil iz.

5 Cate'ch ba goc to mil iz besyeban' bene' ca' gosenita'chach gosejnilaže' Criston', ben' gosac bene' nechw besyebane' ladjo bene' guat ca', cana'ch yosbane' yezica'chle bene' guat.

6 Mbalaz nita' bene' ca' belis bosbane' ladjo bene' guat ca' da' nechw, bene' ba gwlej Diosen' cont zjanaque' lo' ne'e. Bi yesac chegaque' can' gac che bene' ca' yesežagläue' neche xtoła'gaque' toli tocaŋe, da'nan' žacho yela' got gwchope. San yesenite' yesonxene' Diosen' na' yesonxene' Criston', na' da'nan' guac nacho yesaque' bxož. Legaque' yesenabi'e len Criston' to mil iz.

7 Na' cate' ba goc to mil izen', Diosen' güe'e latje yechoj Satanás dan' chnabia' da' xigüe' ca' lo' yechw zitjwchgua dan' nac lo' gabil gan' bseyjuen'.

8 Na' yechojen na' da' yoble siyen' bene' že' yogo' nación ca' že' lo' yežlion'. Na' siyen' bene' ca' zjanzi' Gog na' Magog, gwtojen legaque' cont yesedillene' Criston', na' yesaque' bene' zan juisyw ca' yox da' chi' cho'a nisdao' da' nono chac gwlab.

9 Nach ble'edagüe'da' bene' zan juisyw ca', gosa'aque' doxen lo' yežlion', ja'aque' gan' chi' ciuda dan' chaque Diosen' gan' že' bene' ca' gwleje' cont zjanaque' lo' ne'e. Na' cate' gosechje' ciudan', Diosen' bene' cont bchoj yi' le'e yaban' bzeytecczen legaque'.

10 Na' ca' nac Satanás dan' gwziye' bene' ca' že' yežlion', angl che Diosen' bosozalen' lo' yi' gabil gan' chala' azufre, yi' xen da' nac ca' to nisdao' gan' ba bosozale' bež xigüe' nechon' na' bež xigüe' gwchopen' ben' be' diža' güenlaže' cont gosonxen benachen' bež nechon'. Na' yesežaglaon do ža do yel toli tocaŋe.

Goc yela' justis che bene' ca' ba gosat

11 Nach ble'eda' chi' Diosen' to lo' siy xen da' nac da' šiš, chi'e chnabi'e. Na' chpa'tie' yežlion' len da' ca' chle'echo le'e yaban' na' besyeniten, noch no besele'e len, na' gach ga gosac xišne'en ga yoble.

12 Na' ble'eda' bene' ba gosat, bene' gole len bene' xcuide' len bi' bixjw, zjazeche' lao Diosen'. Nach Diosen' bzaše' libr ca' gan' zjanyoj yogo'lol da' goson to toe'. Na' gwdena' bzaše' libr gan' zjanyoj la' bene' ca' zjanape' yela' mban toli tocaŋe. Na' bene' yela' justis chegaque' con ca' gosone' ślac gosebane', le' yogo' da' gosone' zjanyojen le'e libr ca'.

13 Yogo' bene' gosat lo' nisdao' besyechoje' zjazeche' lao Diosen', na' yogo' bene' gosat ga yoble lecze besyechoje' zjazeche' lagüe' cont bene' yela' justis che to toe' con ca' gosone' ślac gosebane'.

14-15 Nach Diosen' bcueze' yela' goten' nombia'cho, na' bene' cont noch no gwže' latje che bene' guat ca' na' bnitlagüen'. Na' bene' bi bosozenag che Dios, yogo' bene' bi nyoj lagaque' le'e libr gan' nyoj la' bene' zjanap yela' mban toli tocaŋe, bosozale' legaque' lo' yi' gabil da' nac da' xen ca' to nisdao'. Na' dan' goc chegaque', lenna' yela' got gwchope chegaque'.

21

Yežlion' na' le'e yaban' besyeyaquen da' cobe

¹ Gwdena' ble'eda' le'e yaban' ba beyaquen da' cobe na' lecze ca' yežlion', le yaba dan' goc da' nechw na' yežlio nechua' besyeniten. Na' lecze bich gota' nisdao'.

² Neda' Juan ble'eda' ciuda che Diosen', ciuda Jerusalén cobe da' chi' yaban' gan' zoa Diosen', betjen lo yežlion'. Ba nonen' xdan ca to no'ole bene' ba bpa'a cuine' cont naque' xdan cate' gwšagne'e.

³ Na' do gan' chi' Diosen' chnabi'e benda' gwne to bene' zižje, gwne':
—Gwna'šc, Diosen' ba betje' zolene' benach. Soateze' len legaque', le gwleje' legaque' cont zjanaque' yež che', na' yesonxene'ne'.

⁴ Na' Diosen' gone' cont bich gac da' yesyeyaše' laže'de', da' yesyegüine'de' o da' yesebeže' čhen. Nono gat, nono šey la, le ba gwde che yogo' da' ca' gota' lo yežlio nechon'.

⁵ Nach Dios ben' chi' chnabi'e gwne':

—Da' li ba chocoba' yogo' lo da' de.

Lecze gwne':

—Bzoy diža' quinga ba bendo', le naquen diža' li na' gac can' gwnian'.

⁶ Nach gože' neda':

—Bač goc da' cheyala' gac. Neda' naca' ben' ben yežlion' len yogo' bichle da' de, na' naca' ben' gon cont te čhen. Da'nan' zaca'lebda' ca letr nechw da' nzi' A na' letr bzebe da' nzi' Z. Note'teze bene' chaclaže' si'e da' gwnežjua'ne', gwnežjua'ne' yela' mban toli tocanē da' zaca'lebe ca nis ya'a da' che'ejcho cate' chbiłecho, na' bi sia' laxjuen.

⁷ Na' bene' chesejnilaže' neda', še ba gosezoede' bi yesebejyichje' xtižan', gac čhegaque' yogo' da' šagüe' da' ba bia' diža' čhen, na' yesonxene' neda', na' gwlo'a zjanaque' xi'ina'.

⁸ Perw ca nac bene' ca' chesežeb yosozenague' chia', bene' bi chesejnilaže' neda', bene' cheson da' ca' chgue'eda', bene' chesot ljež benache', bene' cheson da' nac da' yela' zto' len cuerp čhegaque', bene' cheson txen len bite'teze yela' guaža', bene' chesejnilaže' l' gua'a šsaca', na' yogo' bene' cheso'e diža' güenlaže', yogo' bene' ca' yezezaca'zi'e toli tocanē lo yi' xen da' nac ca to nisdao', yi' gabil gan' čala' azufren'. Na' da' gac čhegaquen', lenna' žacho yela' got gwchope.

Ciuda Jerusalén da' nac da' cobe

⁹ Na' bezle'eda' to angl gažen' ben' gosoxe' tas ca' gaže dan' zjanža'te da' zjajožen da' bosolalje' cont gosac yela' zi' ca' la'zelagüe lo yežlion'. Gwbigue' gan' zoan' na' gože' neda':

—Da len neda' cont gwlo'eda' le' bene' ca' zjazaca'lebde' ca to no'ole za' gwšagna'. Na' Jesucristw ben' zaca'lebde' ca xila' dao' ben' gosot bene' Israel neče xtoła'gaque', guac nacho le' si'e no'olen'.

¹⁰ Nach Spiritw che Diosen' benen cont gwya'alena' anglen' to lo ya'a xen da' nac sibe, na' blo'ede' neda' ciuda Jerusalén da' nac ciuda che Dios. Ble'eda' gwzoan yaba gan' zoa Diosen' na' chetjen lo yežlion'.

¹¹ Na' ciudan' goctitchuan len be'ni' da' nsa' Diosen', na' ble'eda' chactiten ca to yej da' zaca'chgua, ca yej da' nzi' jaspe da' chle'echo ca vidrw.

¹² To ze'e xen da' nac sibe nyechjen ciudan', na' nita' šižinw puert čhen, na' to to cho'a puerten' zecha tgüje angl. Na' le'e puert ca' zjanyoj la šižinw bene' ca' bosoxie' šižinw cuen diaža che neto' nacto' bene' Israel.

13 Na' le'e ze'e dan' zoa šla'a ciudan' gan' chla' gwbiž nita' šone puert, na' šla'a gan' chxoa gwbiž yešonen, na' šla'a zej yichjelen yešonen, na' šla'a zej xanelen yešonen.

14 Na' ze'e dan' nyechje ciudan', lenenna' naquen de šižinw yej xen, na' zjanyoj le'e yej ca' la šižinw neto' nacto' postlw che Jesucristw ben' zaca'lebde' ca xila' dao' ben' gosot bene' gualaž cheto' neche xtoła'gaquen'.

15 Na' angl ben' be'len neda' diža' noxe' to ya da' nac de oro da' bchine' gwxi'e medidw ciudan', che ze'e chen na' che puert ca'.

16 Ciudan' naquen da' cuadradw, toze ca naquen zлага' len ton. Anglen' bchiže' ciudan' len ya chen' na' goquen chope mil chope gayoa kilómetros to to šla'an, ca'te' ndonen, ca'te' zlagan' na' ca'te' siben'.

17 Nach bchiže' ze'e dan' nyechj ciudan' na' goquen gayontap metr yela' sib chen, metr da' nombia' benač, le lenna' bchin anglen' gwxi'e medidon'.

18 Ze'e da' nyechj ciudan' naquen de yej da' zaca' da' nzi' jaspe, na' doxen ciudan' naquen de oro na' nlan' ca to vidrw da' nac xilaže'.

19 Na' ze'e da' nyechj ciudan', zjanone' lenen xdan len yogo' cuen yej da' zaca' da' de da' zjanac beya color na' chesactiten. Da' nechon' naquen de jaspe; da' gwchope de zafiro; da' gwyone de ágata; da' gwdape de esmeralda;

20 da' gayo' de ónice; da' gwxope de cornalina; da' gaže de crisólito; da' xono' de berilo; da' ga de topacio; da' ši de crisoprasa; da' šnej de jacinto; na' da' šižinw de amatista.

21 Na' puert ca' šižinw zjanaquen šižinw perlas, to ton zjanonen' de toze perla. Na' nez yo da' de lo ciudan' naquen de oro na' zjanlan' ca vidrw da' nac xilaže'.

22 Bibi yodao' ble'eda' lo ciudan', le bene' ca' že' ciudan' zjanite' lao Xancho Dios ben' nap la'zelagüe yela' guac xen na' lao Jesucristw ben' zaca'lebde' ca xila' dao' ben' gosot bene' gualaž cheto' neche xtoła'gaque'. Legaque' chesonxen bene' lo ciudan'.

23 Bene' ca' že' ciudan' bi cheseyažjde' gwbižen' ne bion' yososenin' lo ciudan', le be'ni' da' nyechj Diosen' chsenin' len legaque' na' lecz ca' be'ni' da' nsa' Jesucriston'.

24 Na' be'ni' che Diosen' gwsenin' len bene' za'ac yogo' nación bene' chesejnilaže' Diosen', na' bene' gwnabia' ca' že' yežlion' yesonexene' Diosen' yosonežjue'ne' bi da' zaca' da' šagüe' da' de čhegaque', len no yela' bala'an da' de čhegaque'.

25 Bitw šeyjw puert ca' zjanita' ciudan' lagüe' ža, na' gwbat gac šeže'le.

26 Can' ba gwnia', yela' zaca' yela' xdan da' zjade yogo' nación len yela' bala'an da' zjade che bene' gwnabia' che nación ca', yosonežjuen' Diosen' lo ciudan'.

27 Lo ciudan' gwbat gac šo' bene' chon da' zban. Bi gac šo' bene' chon bite'tez da' chgue'e Diosen' o bene' choe' diža' güenlaže'. Con bene' zjanyoj lagaque' le'e libr che Jesucriston' gan' zjanyoj la bene' zjanape' yela' mban toli točane, legacze' gac yeso'e na'.

22

1 Nach anglen' blo'ede' neda' yegw gan' yože nis da' chnežjon benačhen' yela' mban toli točane. Nisen' nacten ca vidrw le nyadichguan. Yegwna' chchojen do gan' chi' Diosen' chnabi'e txen len Jesucriston' ben' zaca'lebde' ca xila' dao' ben' gosot bene' gualaž cheto' neche xtoła'gaquen'.

² Na' gachol nez yo xen che ciudan' na' chop la'a cho'a yegon' ze yag da' chnežjon benachen' yela' mban toli tocaṇe. Na' yogo' bio' chesebian frut, šižinw ni'a chesebian lao tğüiz, na' bene' naciön ca' yosoçhine' xlaguenna' ca' rmed cont yesenite' güen.

³ Gwbat gata' bi da' chgue'e Diosen' lo ciudan', le ciudanan' cui'e nabi'e txen len Jesucristw ben' zaca'lebde' ca xila' dao' ben' gosot bene' gualaż cheto' neche xtola'gaque', na' yogo' bene' že' ciudan' yesonxene' le'.

⁴ Yesenite' yesele'ede' cho'alaö Diosen', na' yoj la Diosen' loxgagaque'.

⁵ Gwbatech gac šeže'le lo ciudan'. Na' bene' že' lo ciudan' bi yeseyažjde' be'ni' che no lámpara o che gwbiž, le be'ni' da' nyechj Xancho Diosen' gwseñin' len legaque'. Na' yesenabi'e len le' toli tocaṇe.

Ba zoa yid Jesucriston' da' yoble

⁶ Nach anglen' gože' neda':

—Yogo' diža' quinga ba bendo' zjanaquen da' li na' gac con can' ba gwnato'. Xancho Diosen' chbeje' bene' cheso'e xtižen' na' chzejni'ide' legaque' bin' yesene', na' len' ba gwsele' neda' chzejni'ida' le' len bene' lježo' ca' chesonxene' Diosen' cont gabe'ele da' ca' za' gac.

⁷ Nach gwna Jesüsen':

—Da' li ba zoa yida' da' yoble. Na' mbalaz bene' chosozenag che da' ca' ba bzojo' le'e libr chio' choen' diža' che da' ca' za' gac.

⁸ Neda' Juan benda' na' ble'eda' da' quinga ba bzoja' nga, na' beyož bendan' na' ble'edan' jazoa xiba' xni'a angl ben' blo'e neda' da' ca', godca' gonxena'ne'.

⁹ Perw anglen' bi bene' latje, gwne':

—Bi gono' ca', le naca' con to bene' güen xšin Diosen' can' naco' le', can' zjanac bene' lježo' ca' ba gwleje' cheso'e xtižen', na' can' zjanac yogo' bene' yosozenag che da' ca' ba bzojo' le'e libr chion'. San benxen Dios.

¹⁰ Lecze gože' neda':

—Bi gwcuašo' diža' ca' ba bzojo', le ba zoa gac da' ca' bzojon'.

¹¹ Na' bene' cheson da' mal, yesonchcze' da' malen' chesonen'. Na' bene' cheson da' yela' zto', yesonchcze' da' yela' zton' chesonen'. Na' bene' cheson da' chazlaže' Diosen', yesonchcze' da' güenna' dan' chesonen'. Na' bene' ba gwlej Diosen' cont zjanaque' lo ne'e, lo ne'en yesyega'ancze'.

¹² Nach Jesüsen' gozne':

—Da' li ba zoa yida' da' yoble, na' yedeyena' gac güen che to to benačh o saca'zi'e con can' ba ben to toe'.

¹³ Neda' naca' ben' ben yežlion' len yogo' bichle da' de, na' naca' ben' gon cont te čhen. Da'nán' zaca'lebda' ca letr nechw da' nzi' A na' letr bzebe da' nzi' Z. Ba zoa' cate' gwxe yežlion' na' soacza' cate' te čhen.

¹⁴ Mbalaz bene' ca' nita'teze' chesenabe' yeca'a xtola'gaque' cont yesaque' txen len bene' ca' ba ble'edo' ben' ba besyeyach xałana'gaque'. Legaque' gac yesagüe' frut dan' chbia yag yela' mban toli tocaṇe, na' gac yeso'e cho'a puert che ciudan'.

¹⁵ Perw ca nac bene' ca' cheson da' nac da' zban, bene' ca' cheson txen len no yela' guaža', bene' cheson da' nac da' yela' zto' len cuerp čhegaque', bene' chesot ljež benače', bene' chesejnilaže' i gua'a lsaça' o bi da' ca' ben Diosen', na' yogo' bene' cheso'e diža' güenlaže' o chesyebede' chosozenague' dan' zjanac ca', yogo' bene' ca' bi gac yeso'e lo ciuda čhian'.

¹⁶ —Neda' Jesús ba gwseła' angl čhian' cont ba bzende' le' yogo' da' ca' ba bzojon'. Na' cheyała' gwnežjon' bene' ca' chesedop chesežag chesonxene'

neda'. Neda' naca' xi'in diaža che da' rey David na' naca' ben' gwsela' Diosen' yežlion' lo diaža che'. Na' zaca'leba' ca beljw xsil.

¹⁷ Spiritw che Diosen' na' lecze ca' chio' chonxenko Jesúsēn' chñablaže'cho yob yidšca Jesúsēn' da' yoble, chio' zaca'lebcho ca to no'ole si'e. Na' yogo' bene' yesene diža' quinga lecze yesēnablaže'sque' yide' da' yoble.

Na' note'teže bene' chaclaže' si'e da' gwnežjw Jesúsēn' le', cheyała' yedenaben', na' gwnežjue'ne' yela' mban toli tocane da' zaca'lebe ca nis ya'a da' che'ejcho cate' chbiļecho, na' bi si'e laxjuen.

¹⁸ Na' chosnisda' le'e chzenagle can' ža libr nga che da' ca' za' gac, note'tezle še gwzanchle ca dan' ža libr nga, Diosen' gone' gac chele yogo' yela' zi' dan' zjanyoj le'e libr nga.

¹⁹ Na' note'tezle še žale bi gac yogo' da' qui zjanyoj le'e libr nga, Diosen' yoxie' lale le'e libr chen' gan' nyoj la bene' ca' zjanape' yela' mban toli tocane na' gone' cont bi gac šo'le lo ciuda chen', nēca gac chele yogo' da' güen da' zjanyoj le'e libr nga.

²⁰ Nach Jesús, ben' bzejni'ide' neda' yogo' da' ca' ba bzoja, že':

—Da' li ba zoa yida' da' yoble.

Na' neda' chapa'ne':

—Ca' gacšca. Yob yidšco', Xana' Jesús.

²¹ Xancho Jesucriston' soacze' gaclenšcacle' yogo'le. Da' na'zen' chzoja'.